


Nuevo Testamento en  
mixteco



New Testament in Mixtec, Atatláhuca (MX:mib:Mixtec,  
Atatláhuca)

# **Nuevo Testamento en mixteco** **New Testament in Mixtec, Atatláhuca (MX:mib:Mixtec, Atatláhuca)**

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

## **Copyright Information**

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022

9665e546-39d0-5bd5-8b10-38916a94951f

## Contents

SAN MATEO . . . . .	1
SAN MARCOS . . . . .	38
SAN LUCAS . . . . .	61
SAN JUAN . . . . .	99
HECHOS . . . . .	127
ROMANOS . . . . .	163
1 CORINTIOS . . . . .	178
2 CORINTIOS . . . . .	192
GÁLATAS . . . . .	202
EFESIOS . . . . .	208
FILIPENSES . . . . .	213
COLOSENSES . . . . .	217
1 TESALONICENSES . . . . .	221
2 TESALONICENSES . . . . .	224
1 TIMOTEO . . . . .	226
2 TIMOTEO . . . . .	230
TITO . . . . .	233
FILEMÓN . . . . .	235
HEBREOS . . . . .	236
SANTIAGO . . . . .	247
1 PEDRO . . . . .	251
2 PEDRO . . . . .	255
1 JUAN . . . . .	258
2 JUAN . . . . .	262
3 JUAN . . . . .	263
JUDAS . . . . .	264
APOCALIPSIS . . . . .	266

## JNUHUN VAHA NI TEE SAN MATEO

*Lista ñayuu yucūn jeē ní quiji Jesucristo  
(Lc. 3.23-38)*

<sup>1</sup> Yāha cūu lista ñayuu yucūn jeē ní quiji Jesucristo. Te máá yá ní quiji nuū yucūn rey David, te David ní quiji nuū yucūn Abraham.

<sup>2</sup> Abraham ní cuu de tátá Isaac, te Isaac ní cuu de tátá Jacob, te Jacob ní cuu de tátá Judá jiin táca ñani i. <sup>3</sup> Te Judá ní cuu de tátá Fares jiin Zara, te náná ndindúú i ní cuu Tamar. Te Fares ní cuu de tátá Esrom, te Esrom ní cuu de tátá Aram. <sup>4</sup> Te Aram ní cuu de tátá Aminadab, te Aminadab ní cuu de tátá Naasón, te Naasón ní cuu de tátá Salmón. <sup>5</sup> Te Salmón ní cuu de tátá Booz, te náná i ní cuu Rahab. Te Booz ní cuu de tátá Obed, te náná i ní cuu Rut. Te Obed ní cuu de tátá Isaí. <sup>6</sup> Te Isaí ní cuu de tátá David, tēe ní cuu rey. Te rey David ní cuu de tátá Salomón, te náná i, xihna gā ní cuu ña ñasihí Urias.

<sup>7</sup> Te Salomón ní cuu de tátá Roboam, te Roboam ní cuu de tátá Abías, te Abías ní cuu de tátá Asa. <sup>8</sup> Te Asa ní cuu de tátá Josafat, te Josafat ní cuu de tátá Joram, te Joram ní cuu de tátá Uzías. <sup>9</sup> Te Uzías ní cuu de tátá Jotam, te Jotam ní cuu de tátá Acáz, te Acáz ní cuu de tátá Ezequías. <sup>10</sup> Te Ezequías ní cuu de tátá Manasés, te Manasés ní cuu de tátá Amón, te Amón ní cuu de tátá Josías. <sup>11</sup> Te Josías ní cuu de tátá Jeconías jiin táca ñani i, máá tiempo jeē cuángoo ñayuu Israel preso nde ñuu Babilonia.

<sup>12</sup> Te náa cáyūcú i yūcuán, te Jeconías ní cuu de tátá Salatiel. Te Salatiel ní cuu de tátá Zorobabel. <sup>13</sup> Te Zorobabel ní cuu de tátá Abiud, te Abiud ní cuu de tátá Eliaquim, te Eliaquim ní cuu de tátá Azor. <sup>14</sup> Te Azor ní cuu de tátá Sadoc, te Sadoc ní cuu de tátá Aquim, te Aquim ní cuu de tátá Eliud. <sup>15</sup> Te Eliud ní cuu de tátá Eleazar, te Eleazar ní cuu de tátá Matán, te Matán ní cuu de tátá Jacob. <sup>16</sup> Te Jacob ní cuu de tátá José, tēe ní cuu yá María. Te María ní cuu ña náná Jesús, Yāa naní Cristo.

<sup>17</sup> Te nde Abraham te nde David ní iyo uxí cuūn yucūn. Te nde David te nde náa cuángoo ñayuu Israel preso ñuu Babilonia ní iyo inga uxí cuūn yucūn. Te nde ná ní jengoo i preso te nde ní cacu Cristo, suni ní iyo inga uxí cuūn yucūn.

*Jeē ní cacu Jesucristo  
(Lc. 2.1-7)*

<sup>18</sup> Te jeē ní cacu Jesucristo, súcuan ní cuu: Náná yá María, je ní cundaá jeē quijnáhan ña jiin José. Te nde ná tu quijnáhan ña jiin de,

te ní jecūhun séhe ña ní sáha Espíritu Santo. <sup>19</sup> Te José, tēe quijnáhan ña jiin, chí tēe ndaá cūu de. Te tu ní cúní de cuáha de jnūhun canu ña, chí sa cúní de jeē na jécuiñí sáhi jeē ma quijnáhan de jiin ña. <sup>20</sup> Te ní ní súcuan nácani ní de, te jiin jéni ní quée-ní ñin ndajéhé máá Jítoho yó Yāa Dios nuū de, te ní cahān yá jiin de:

José, séhe yucūn David, ma yūhu ró cueca ró ñasihí ró María, chí séhe jeē scácu ña, vēji i nde nuū máá Espíritu Santo. <sup>21</sup> Te scácu ña ñin séhe yá. Te snaní ró i Jesús, chí máá i cūu Yāa jnama ñayuu nuū cuéchi i, áchí ndajéhé.

<sup>22</sup> Súcuan ní cuu táca jniñu yáha, náváha squícu jnūhun Jítoho yó Yāa Dios jeē ní cahān tēe ní nacani jnūhun ya nde jenahán. Te suhva ní cahān de:

<sup>23</sup> Coo ñin sūchí síhí, te nihūn séhe i, te scácu i ñin séhe yá,

te conaní sūchí un Emanuel.

Achí tutu. Te síhví yáha cúní cahān: Yāa Dios ndeé yá jiin yó.

<sup>24</sup> Te ní natahū ní José, te ní sáha de nájnūhun ní cahān ndajéhé Jítoho yó jiin de. Te ní jeca de María ní cuu ña ñasihí de. <sup>25</sup> Te tu ní quixí de jiin ña, chí nde ní scácu ña séhe yá nuū ña. Te ní snaní de i Jesús.

*Jeē ní quijicoo tēe mago nuū yá*

### 2

<sup>1</sup> Te ná ní cacu Jesús ini ñuu Belén ndañúú Judea, te tiempo un ndácu rey Herodes jniñu. Yūcuán na te jecu tēe ndíchí jeē cascuáha siquí quámi, ní quijicoo de nde jicá, ichi nuū cáne niándii, te ní jinúcco de ñuu Jerusalén. <sup>2</sup> Te ní cacajnúhún de ñayuu:

¿Nde nuū íne sūchí jeē ní cacu jeē coo rey ñayuu hebreo? Chí ichi núú cáne niándii ní cajito ná ñin quámi cáhnu jeē cūu seña jeē ní cacu i. Te vējicoo ná chíñúhún ná i, áchí de.

<sup>3</sup> Te rey Herodes, ná ní jini de jnūhun yáha, te ní cunéé ní de, nde jiin táca ñayuu ñuu Jerusalén. <sup>4</sup> Te ní nastútú de táca sútú cácujeñnu jiin tēe cásteén tutu ley Yāa Dios nuū ñayuu. Te ní cajnúhún de tēe un ndé nuū cacu Cristo achí tutu. <sup>5</sup> Te ní cacachí nuū de:

Ini ñuu Belén ndañúú Judea. Chí suhva cáhán nuū tútu ní tee tēe ní nacani jnūhun ya nde jenahán:

<sup>6</sup> Te róho ñayuu ñuu Belén ndañúú Judá, cújeñnu ga ñuu ró vēsú táca gá jeē cújeñnu ini Judá.

Chí suu ini ñuu ró quenda ñin Yāa ndacu jniñu,

te coto ya ñayuu máá rí Israel, achí Yāa Dios. Achí tutu.

<sup>7</sup> Yūcuán na te Herodes ní cana sáhi de táca tēe ndíchí un jeē naní mago. Te ní cajnúhún yúcún de ndé quíví ní cane quámi ún. <sup>8</sup> Te ní tají de tēe un quíngoo de ñuu Belén. Te ní cahān de:

Cuángoo ní te cajñuhun yúćún ní ndé nuū íne sūchi lúli un. Te núu ní nanihín ní i, te quijicoo ní castúhun ní nuū ná, návāha suni máá ná quichiñhúhún ná i, áchi rey.

<sup>9</sup> Te jeé ní cajini de jñuhun ní cahān rey, te cuangoo de. Te máá quámi cáhu jeé ní cajito de ichi núu cáne niāndii, yósnuu núu de cuahān nde ní jinū nuū íne sūchi lúli un, te yūcuan ní jecuiñi. <sup>10</sup> Te ná ní cajito de jeé ní jecuiñi quāmi ún, te yōhyo ní cacusiñi ní de. <sup>11</sup> Te ní jinūcoo de ní quēvicoo de ini vehe, te ní cajito de nuū sūchi lúli un jín náná i María. Te ní cajecuiñi yití de nuū i, te ní cachiñhúhún de i. Te ní canune de yejnū de, te ní casocō de oro jín sūje cūtū jín sūje uvuā nuū i. <sup>12</sup> Yūcuán na te ní scóto jēni de, ní cachi nuū de jeé ma nuhún de nuū Herodes. Te inga ichi cuanuhun de ñuu de.

*Jeé ní jinu José cuangoo de nación Egipto*

<sup>13</sup> Te náa cuánuhun táca téé mago, te ní scóto jēni José jeé ñn ndajéhé máá Jitoho yō Yaā Dios ní cahān yā jín de:

Ndocuiñi te cunu ró quíngoo ró jín sūchi lúli jín náná i nde nación Egipto. Te yūcuán coyūcu ró nde castúhun rí nuū rō. Chi Herodes je yajni nanducú de sūchi lúli jínā jeé cáhni de i. Achí yā.

<sup>14</sup> Te ní natahū ní José. Te cuangoo de jín sūchi lúli jín náná i, te ñuu ní cajica de cuangoo de nación Egipto. <sup>15</sup> Te ní coyūcú de yūcuan ndé ní jihī Herodes. Te súcuan ní cuu návāha squícu jñuhun Jitoho yō Yaā Dios jeé ní cahān téé ní nacani jñuhun ya nde jenahán: Nde nación Egipto ní cana ri Sēhe ri vēji i, áchi Yaā Dios, achí tutu.

*Jeé ní ndacu Herodes jñiñu jeé na cúu táca sūchi yá lúli*

<sup>16</sup> Yūcuán na te Herodes ní jini de jeé súcuan ní castáhú téé mago un de, te yōhyo ní quiti ní de. Te ní tají de soldado cuangoo, te ní cajehni táca sūchi yá lúli jéé uú cuiyā jín jéé yiquín gá jeé cáyūcú ini ñuu Belén jín táca ñuu yajni. Chi je ní cajñuhun yúćún de táca téé mago un nasaa tiempo ní cuu jeé ní cacu Jesús. <sup>17</sup> Te súcuan ní squícu jñuhun ní cahān Jeremías, téé ní nacani jñuhun Yaā Dios nde jenahán, chí ní cahān de:

<sup>18</sup> Ini región Ramá ní jini sōho ri jeé cándahyū te cándahyū cohó. Chí ñahan cácuu yucūn Raquel, cándahyū ña jehē sēhe ña, te tu cácuu ña ndusiñi ní ña, chí ní cajihī i. Achí tutu.

<sup>19</sup> Yūcuán na te ní jihī Herodes. Te ní scóto jēni José jeé ñn ndajéhé Jitoho yō Yaā Dios ní cahān yā jín de nuū nde de nación Egipto. <sup>20</sup> Te ní cahān yā jín de:

Ndocuiñi te nuhun rō ñuu rō Israel jín sūchi lúli jín náná i. Chí je ní cajihī téé cánducú cahni sūchi lúli jínā nuū. Achí ndajéhé.

<sup>21</sup> Yūcuán na te ní ndocuiñi de, te cuanuhun de nación Israel jín sūchi lúli jín náná i. <sup>22</sup> Te ní nihín de jñuhun jeé Arquelao ní nucuiñi de nuū tatá de Herodes, te máá de ndácu jñiñu región Judea. Te ní yūhú de nuhun de yūcuán. Te ní scóto jēni de jeé na quíhín de región Galilea, te cuangoo de. <sup>23</sup> Te ní jinū de yūcuán, te ní coyūcú de ñuu naní Nazaret. Súcuan ní cuu návāha squícu jñuhun ní cacahān téé ní canacani jñuhun Yaā Dios nde jenahán. Chí ní cacachi de jeé cahān ñayuu jeé téé ñuu Nazaret cúu Jesús.

*Jñuhun Juan téé scuándute*

(Mr. 1.1-8; Lc. 3.1-9, 15-17; Jn. 1.19-28)

### 3

<sup>1</sup> Te ní yāha tiempo, te ní jinū Juan téé scuándute nde nuū ñuhun téhé ndañúu Judea, nácani de jñuhun suhva:

<sup>2</sup> Nacani ní rō jijnáhan ró jéé stóo ró cuéchi ró, chí je ní cuyajni Yaā ndeé andiví jéé ndacu ya jñiñu nuū rō. Achí de.

<sup>3</sup> Te Isaías, téé ní nacani jñuhun Yaā Dios nde jenahán, suhva ní tee de jñuhun Juan nuū tútu:

Coo ñn téé cana jee nde nuū ñuhun téhé: Sátúhva ró máá ró jijnáhan ró, chí quee maá Jitoho yō.

Te sáha ró jñiñu ndaa, chí vēji ya, achí de. Achí Isaías.

<sup>4</sup> Te sahma ñuhun Juan cúu ixi quiti nání camello, te núhni ñn cinturón ññ chíji de. Te jeé técu de cúu tica ndicuéhyí jín ndúxi yocó. <sup>5</sup> Te ñayuu ñuu Jerusalén jín táca ñayuu región Judea jín ñayuu yúcu yajni yuyúte Jordán, ní quijicoo i nuū de. <sup>6</sup> Te ní canacani ndaa i cuéchi i nuū Yaā Dios, te ní scuándute de i ini yūte Jordán.

<sup>7</sup> Te ná ní jito de jeé véjicoo cuehē téé grupo fariseo jín téé grupo saduceo nuū scuándute de, te ní cahān de jín:

Va sēhe coō cácuu ró, chí xeēn rō nájñuhun coō. ¿A cájeni ní rō jeé cuu cunu ró cácu ró núu castigo xeēn jeé quiji? <sup>8</sup> Núu súcuan te sáha ró jñiñu váha, te súcuan stéén ró jeé ní canacani ndije ní rō jeé stóo ró cuéchi ró. <sup>9</sup> Te ma cáni ní rō cahān ró jeé cuu cácu ró síquī jeé cácuu ró yúćún Abraham. Chí cáhán rí jín ró jeé cuu sáha Yaā Dios jeé táca yūu yáha nduu sēhe Abraham jeé candíje váha, te núu cúní yā. <sup>10</sup> Te cácuu ró nájñuhun nundehé jeé tu jéhe ndehē váha. Te vijna je íyó túhva Yaā Dios jeé cáhva ya castigo xeēn, nájñuhun je íyó túhva ñn cāa jeé cahnde nde yoho yujnu. Núu súcuan te sáha ya jín ró nájñuhun jín táca yujnu jeé tu cúun ndehē váha, jeé tahndé te cayú nuū ñuhún. <sup>11</sup> Te ruhú chí jín ndute scuándute ri rohó, te yūcuan cúu jeé steén ró jeé ní canacani ní rō jeé stóo ró cuéchi ró. Te Yaā jeé quiji, chí nájñuhun scuándute ya rohó ohó jeé cáhva ya Espiritu

Santo condee ini anuá rō, te poder yā cúu nájñuhun ñuhún. Te Yaā quiji chi cújéhu ndasí yá. Chi tú na vé jéhu cuiti cúu ri nuú yá, ni jeé cuajñíu ri nuú yá vésú ñin jniñu lúli gá nájñuhun jeé quénehen ri ndijén yá. <sup>12</sup> Te sáha ya nájñuhun sáha tée scánda trigo, chi sásñin ya ñayuu váha jíin ñayuu cunéé, nájñuhun cúndoo trigo jeé quéndá sñin paja. Te nastútú yá trigo yá ndívi ini yacā yá. Te paja chi jnaa yá nuú ñuhún jeé ma ndahvá cuiti. Achí Juan.

*Jeé ní jendute Jesús*

(Mr. 1.9-11; Lc. 3.21-22)

<sup>13</sup> Yúcuán na te ni quenda Jesús región Galilea, te ni quee yá yúte Jordán nuú íne Juan, náváha scuándute de ya. <sup>14</sup> Te tu ni cúni Juan scuándute de ya, chi ni cahán de jíin yá:

Sa suhva cánuú jeé scuándute máá ní sáñá, ¿te ndese cúu jeé sa nuú ná véji ní? áchí de.

<sup>15</sup> Te ni cahán Jesús jíin de:

Tuú chi sáha ró, chi súcuan cánuú squícu yó táca jniñu ndácu Yaā Dios, achí yá.

Yúcuán na te ni scuándute de ya. <sup>16</sup> Te ná ni cuu ni jendute Jesús, te ni quenda ya nuú ndúte. Te ni nune-ní andiví, te ni jito ya jeé cúun Espíritu Yaā Dios véji, te cáa nájñuhun ñin paloma, te ni quee xiní yá. <sup>17</sup> Te ichi ándiví ni cahán ñin jñuhun:

Yáha cúu Sêhe ri jeé maní ndasí rí jíin, te yōhyo cúsní ni rí jíin, áchí.

*Jeé ní jito ndee jexeén Jesús*

(Mr. 1.12-13; Lc. 4.1-13)

## 4

<sup>1</sup> Yúcuán na te ni jinú Jesús nde nuú ñuhun téhé ní sáha Espíritu Santo. Te yúcuán coto ndee jexeén yá, chi cúni jeé sáha ya cuéchi.

<sup>2</sup> Te ni iyo ndite ni yá uú xico nduu uú xico ñuu, sáá te jíi yá sóco. <sup>3</sup> Te ni quee maá jexeén jeé coto ndee un yá, te ni cahán jíin yá:

Núu máá ró cúu Sêhe Yaā Dios, te cahán rō jeé yuú yúcu yáha na ndúu staā caji rō, achí.

<sup>4</sup> Te ni cahán yá jíin:

Tuú chi yósó núu tútu ii: Nasūu máni máá jíin stáá cátecu ñayuu, chi suni jíin táca jñuhun cáhán Yaā Dios, achí yá.

<sup>5</sup> Yúcuán na te cuahán jexeén un jíin yá nde ñuu ii Jerusalén. Te ni jeni ya xiní torre templo. <sup>6</sup> Te ni cahán jíin yá:

Te núu Sêhe Yaā Dios cúu ró, te síngava ró máá ró nde nuú ñuhun, chi jnama ya rohó. Chi yósó núu tútu:

Tejníñu ya ndajéhé yá quijicoo coto rohó.

Te canundee yá rohó jíinahan ya, náváha ma cáchihí ró jéhé rō nuú yuú.

Achí tutu. Achí jexeén.

<sup>7</sup> Te ni cahán Jesús:

Tuú chi suni yósó núu tútu jeé ma coto ndee ñayuu Jitoho i Yaā Dios, núu jnama ya i chí tuú, achí yá.

<sup>8</sup> Te jexeén un ní jeca tucu ya cuahán jíin yá nde xiní ñin yucu súcún ndasí. Te ni steén táca nación ní cáhnu ñayívi núu yá, te yōhyo luu cáa ndihí. <sup>9</sup> Te ni cahán jíin yá:

Táca ñuu yáha cuáha ri nuú rō, te núu cuiñi yítí ró chiñuhún rō ruhú, achí.

<sup>10</sup> Yúcuán na te ni cahán Jesús nuú jexeén:

Satanás, cujiyo quihín rō, chi yósó núu tútu jeé chiñuhún ñayuu maá Jitoho i Yaā Dios, te nuú maá-ni ya cuajñíu i. Achí yá.

<sup>11</sup> Yúcuán na te ni cujiyo-ni jexeén un cuahán. Te ni quecoo ndajéhé Yaā Dios ni cajejníñu nuú yá.

*Jeé ní quejéé Jesús nácani ya jñuhun región Galilea*

(Mr. 1.14-15; Lc. 4.14-15)

<sup>12</sup> Te ná ni nihín Jesús jñuhun jeé íne Juan vecáa, te cuanuhun yá región Galilea. <sup>13</sup> Te tu ní cóndee yá ñuu Nazaret, chi ní jehén yá ni condee yá ñuu Capernaum. Te ñuu un íne yumar, máá región Zabulón jíin Neftalí. <sup>14</sup> Te súcuan ní squícu jñuhun ni tee Isaiás, tée ni nacani jñuhun Yaā Dios nde jenahán:

<sup>15</sup> Región Zabulón jíin Neftalí, ichi jeé yíhi yumar, lado yúte Jordán nuú cáne niándii,

jíin región Galilea nuú cáyúcú ñayuu táca nación tu jíni jñuhun ya.

<sup>16</sup> Ñayuu ún chí nájñuhun cáyúcú i nuú néé, te coto i nájñuhun ñin luz cáhnu.

Te ñayuu je yajni naa, nihín i jñuhun váha ndasí,

suu jñuhun jeé jnama ya anuá i.

Achí Isaiás.

<sup>17</sup> Te nde quiví yúcuán ní quejéé Jesús nácani ya jñuhun, te ni cahán yá suhva:

Nacani ní rō jíinahan ró jéé stóo ró cuéchi ró, chí je ni cuyajni Yaā ndeé andiví jéé ndacu ya jniñu nuú rō, achí yá.

*Jeé ní cana ya cuñ tée jñú chácá*

(Mr. 1.16-20; Lc. 5.1-11)

<sup>18</sup> Te jica Jesús yumar Galilea cuahán yá. Te ni jito ya nuú uú jñahan ñani. Te ñin de cúu Simón jeé suni nání Pedro, te inga de cúu Andrés. Te tée cájni chácá cácuu de, te cásinga de ñunu de ini mar. <sup>19</sup> Te ni cahán yá jíin de:

Condiquín ruhú na quihín yō, te nasáha ri rohó tée nihín cuehé ñayuu candije ruhú, nájñuhun cánihín rō chácá, achí yá.

<sup>20</sup> Yúcuán na te ni castóo-ni de ñunu de, te ni candiquín de ya.

<sup>21</sup> Te ní jica ya jecu gā, te ní jito ya nuú inga uú jñahan ñani. Te cácuu de Jacobo jíin Juan, sêhe Zebedeo. Te cáyúcú de ini barco jíin tátá de Zebedeo, cánachijní de ñunu de. Te suni ní cana ya de jeé cōndiquín de ya. <sup>22</sup> Te ní castóo-ni de tátá de jíin barco, te ní candiquín de ya cuango de.

*Jeē ni stéén yā nuū cuehē ñayuu  
(Lc. 6.17-19)*

<sup>23</sup> Te ni jica cuu Jesús ni región Galilea, ni steén yā jñuhun ini táca vehe li jeē cúu sinagoga. Te ni nacani ya jñuhun váha ndese ndáca Yaā Dios jñiñu. Te ni nasávaha ya ñayuu cácuñu táca-ni cuehyi. <sup>24</sup> Te ni jité nuū jñuhun ya cuahān ni región Siria. Te nuū yā ni caquindéca i táca ñayuu cácuñu, ñayuu cándoho tjini nuū cuehyi, jiín jéē jetú, jiín jéē ñúhun tachī ini, jiín jéē jihí yihí, jiín jéē ni jjin. Te ni nasávaha ya i jjináhan i. <sup>25</sup> Te cuehē ñayuu región Galilea jiín Decápolis, jiín ñayuu ñuu Jerusalén jiín región Judea, jiín táca ñuu ichi núu cáne niāndii yūte Jordán, ni cacondiquin i ya.

*Jeē ni nacani ya jñuhun nde nuū yúcu*

## 5

<sup>1</sup> Te ni jito Jesús nuū ñayuu cuehē. Te ni caa ya yucu cuahān yā, te ni cucōo ya. Te tēe cácuáha jiín yā, ni jinūcoo de nuū yā yūcuán. <sup>2</sup> Te ni quejéé yā ni steén yā táca jñuhun yáha nuū de:

*Jñuhun yóhoyo ndetū  
(Lc. 6.20-23)*

<sup>3</sup> Yóhoyo ndetū ñayuu jeē cánacuni i jeē tu iyó váha ánuá i siquī cuéchi i, chí je ni quívicoo i ndaha Yaā andiví jéē ndácu ya jniñu nuū i.

<sup>4</sup> Yóhoyo ndetū ñayuu cácuñuhá ni, chí ndusñ ni i sáha Yaā Dios.

<sup>5</sup> Yóhoyo ndetū ñayuu cáhiyo vitá suchi ini, chí ni jejnūhun ya jeē cutahū i ñayiví.

<sup>6</sup> Yóhoyo ndetū ñayuu jeē nájñuhun jeē cájil i sōco cájichí i, súcuan jnāá i sáha i jniñu ndaā, chí máá yá chindéé ñáhan yá i jeē cuu sáha i.

<sup>7</sup> Yóhoyo ndetū ñayuu cákundáhu ni jnáhan, chí suni cundáhu ni Yaā Dios i.

<sup>8</sup> Yóhoyo ndetū ñayuu cáhiyo ndoo ini anuá, chí coto i nuū Yaā Dios.

<sup>9</sup> Yóhoyo ndetū ñayuu cánasamaní jnáhan, chí cahān Yaā Dios jeē sēhe ya cácuu i.

<sup>10</sup> Yóhoyo ndetū ñayuu jeē cájito xeēn inga ñayuu i siquī jeē casáha i jniñu ndaā, chí je ni quívicoo i ndaha Yaā andiví jéē ndácu ya jniñu nuū i.

<sup>11</sup> Yóhoyo ndetū máá ró jjináhan ró núu cácahan neé i nuū ró jeē siquī ruhū, te coto xeēn i rōhó, te stáú yáhu i rōhó, vēsú tú cuéchi ró. <sup>12</sup> Na cúsn ni ró jjináhan ró núu súcuan, te sa vihá gā cusñ ni ró, chí cáhnu ndasí coo tahū ró nde andiví. Chí suni súcuan ni cajito xeēn i táca tēe ni canacani jñuhun Yaā Dios jeē ní quijicoo xihna gā vēsú rōhó.

*Jñuhun yátá siquī ñiñ jiín siquī luz  
(Mr. 9.50; Lc. 14.34-35)*

<sup>13</sup> Máá ró jjináhan ró cájeñiñu ró ini ñayiví nájñuhun jéñiñu ñiñ nuū cúñu návaha tú tehyū. Te núu ñiñ ún na náá jeē uhvuá, ¿te

ndese nduu uhvuá tucu? Tuá cuajniñu cuiti gā, chí sa cate ñayuu te cueñú i siquī.

<sup>14</sup> Máá ró cácuu nájñuhun luz jeē steén ini anuá ñayuu ñayiví. Te cácuu ró nájñuhun iñ ñuu íne xiní yúcu, jeē ma cúu quisáhi. <sup>15</sup> Te ni tu nástñin ñayuu iñ lámpara te chune i chíji cajón, chí sa suhva jéni i nuū súcún, návaha cundijin nuū táca jéē cáyúcu ini vehe. <sup>16</sup> Te suni súcuan na steén ró luz máá ró nuū táca ñayuu, te suu cúu jeē cúni i jniñu váha casáha ró, te cahān i jeē yóhoyo váha Yaā cúu Tátá ró jeē ndeé yá andiví.

*Jeē ni stéén yā siquī ley Yaā Dios*

<sup>17</sup> Ma cáni ni ró jjináhan ró jéē vēji ri snáá rī ley jeē ni jéhe Yaā Dios nuū Moisés, jiín jéē snáá rī táca jñuhun ni cacahān tēe ni canacani jñuhun ya jenahán. Tú vēji ri jeē snáá rī, chí sa suhva jeē steén cají rī jñuhun ndáso. <sup>18</sup> Chí jendaá cahán rī jiín ró jeē núu níni iyó andiví jiín ñayiví, te ma náa cuiti ni iñ punto ni iñ letra nuū tútu ley yā, chí nde na squicu táca ndihí jñuhun jeē cahán. <sup>19</sup> Núu súcuan te núu iñ ñayuu tu squicu i iñ jñuhun yáha jéē ndácu ley yá, vēsú iñ jñuhun luli gā cúu, te núu steén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu iñ ñayuu squicu i te steén i jeē squicu ñayuu, yūcuán na te cujéhnu i ichi andiví nuū ndácu Yaā Dios jniñu. <sup>20</sup> Chí cáhan rī jiín ró jeē núu tú coo ndaā gā jniñu casáha ró vēsú jniñu casáha tēe cástéen tutu ley yá jiín tēe grupo fariseo, te ma quívicoo cuiti ró ndaha Yaā andiví jéē ndacu ya jniñu nuū ró.

*Jeē ni stéén yá jeē ma quití ni yó  
(Lc. 12.57-59)*

<sup>21</sup> Je ni cajini ró jñuhun ni cacahān jiín ñayuu jenahán, jeē ma cáhni i ndiyi, te na-ni ñayuu núu cahni i ndiyi, te cundaā cuéchi i nuū táca tóhó, achí. <sup>22</sup> Te ruhū chí cáhan rī jiín ró, vēsú núu máá jéē quití ni iñ ñayuu jíto i jnáhan i, suni cundaā siquī cuéchi i ún. Te núu iñ ñayuu cahān neé i nuū jnáhan i, núu súcuan te cundaā cuéchi i un nuū justicia cujéhnu ga. Te núu iñ ñayuu cahān i nuū jnáhan i: Róhó jéē canéé íi, achi i, núu súcuan te quíví i nuū ñuhún infierno te núu ma nácani ni i.

<sup>23</sup> Jeē yúcuán te núu ni jinū ró nuū altar jiín jéē socó ró nuū Yaā Dios, te núu ni nucūhun ni ró jeē ni sáha ró cuéchi siquī jnáhan ró, <sup>24</sup> núu súcuan te squéndo ró jéē socó ró ún xiin altar, te xihna gā quihñ ró ndumaní ró jiín jnáhan ró. Yūcuán na te nandicó ró socó ró.

<sup>25</sup> Te núu iñ ñayuu quihñ i jiín ró nuū tohó jeē cacān i cuéchi siquī ró, núu súcuan te níni cuahān ró jiín i ichí te sándaá máá ró jiín i, návaha ma squíví i rōhó núu juez. Chí juez siáha de rōhó núu policía, te chune de rōhó vecāa. <sup>26</sup> Te jendaá cahán rī jiín ró jeē ma

quénda cuiṭi rō yūcuán, chi nde chunaa rō ndihi cuiṭi xūhun jéé cájicān de.

*Jeē ni stéén yā jeē ma cósiquí ndéé jnāhan*  
<sup>27</sup> 'Ni cajini rō jnūhun ni cacahān jēnahān jeē ma cósiquí ndéé jnāhan ñayuu. <sup>28</sup> Te ruhū chi cáhān rī jīn rō jeē núu iin tēe ndéhe de nuū iin ñahan jeē ndiyo ni de ña, yūcuán na te je ni casíquí ndéé de ñahan ũa iin anuá de.

<sup>29</sup> 'Núu súcuan te núu tinūu lado váha rō sáha jeē quívi rō cuéchi, váha ga quenehen rō te scāne rō, návāha tuá sáha rō cuéchi. Chi váha gā jeē náa iin tinūu rō vésú jeē cóo ndihi yiqui cúñu rō te quihīn rō infierno. <sup>30</sup> Te núu ndaha váha rō sáha jeē quívi rō cuéchi, váha ga cahnde rō te scāne rō, návāha tuá sáha rō cuéchi. Chi váha ga jeē náa iin ndaha rō vésú jeē cóo ndihi yiqui cúñu rō te quihīn rō infierno.

*Jeē ni stéén yā jeē ma ndusūn jnāhan*  
 (Mt. 19.9; Mr. 10.11-12; Lc. 16.18)

<sup>31</sup> 'Te suni ni cacahān nde jēnahān: Núu ndé iin cúní stóo ñasihí, te na cuáha acta nuū ña jeē ndusūn jīn ña. <sup>32</sup> Te ruhū chi sa cáhān rī jīn rō jeē núu iin tēe stóo de ñasihí de, te núu nasūu jéé tǵni ni ña, núu súcuan te sáha de jeē casíquí ndéé ña de, chi condee ña jīn inga tēe. Te núu iin tēe condeca de ñahan ni ndusūn, suni casíquí ndéé de ña.

*Jeē ni stéén yā siquí jnūhun jéjnūhun téyí*  
<sup>33</sup> 'Te suni ni cajini rō jnūhun jeē ni cáhān jīn ñayuu nde jēnahān: Núu ni jejnūhun téyí rō jeē squícu rō, jito jínúu Yāā Dios, núu súcuan te cánuu squícu rō jéé ni cáhān teyí rō un, áchí. <sup>34</sup> Te ruhū chi cáhān rī jīn rō jīnāhan rō jeē ni iin siquí jñiñu ma cahān teyí rō nde jīn síhvi Yāā Dios, ni ma cahān teyí rō jeē jito jínúu yā. Te núu jéjnūhun téyí rō te tú váha jeē ndácunehen rō andiví ni ñayiví. Chi andiví cúu nuū iin mesa nuū ndácu Yāā Dios jñiñu. <sup>35</sup> Te ñayiví cúu nájñūhun teyū nuū iin jehé yā. Te ni ma ndácunehen rō ñuu Jerusalén, chi suu cúu ñuu maá Yāā cúu Rey cujéhu. <sup>36</sup> Ni ma cahān rō jeē na cōndee cuéchi siquí rō núu tu squícu rō. Ma cahān rō súcuan, chi ma cúu cuiṭi sáha rō jéé ni iin ixi xíní rō nducujín chí ndujnúu. <sup>37</sup> Chi suhva-ni cahān rō: Cúu, achi rō. Tuú, achi rō. Chi núu chisóo gá rō jnūhun cahān rō, te nuū jexeén vėji.

*Jeē ni stéén yā jeē ma cuáha yó jéé ndútahū ñayuu*  
 (Lc. 6.29-30)

<sup>38</sup> 'Ni cajini rō jnūhun jeē ni cáhān jīn ñayuu jēnahān: Núu iin tēe ndahva de tinūu jnāhan de, suni súcuan na ndáhva tinūu de. Te núu iin tēe stáva de jnūhun jnāhan de, suni súcuan na stáva jnūhun de, áchí. <sup>39</sup> Te ruhū chi sa cáhān rī jīn rō: Ma nácuáha rō jéé ndútahū tēe sáha ndeváha jīn rō. Chi sa núu ndé tēe cani de yiqui núu lado váha rō,

te váha ga suni cuáha rō inga lado cani de, vésú jeē nácuáha rō jéé ndútahū de. <sup>40</sup> Te núu ndé tēe stáú yáhu de rōhó te quénde de camisa rō, suni cuáha rō jnūhun jeē na quihín de jīn ndé ticāchi rō. <sup>41</sup> Te núu ndé tēe scáca de rōhó jéé condiso rō ndajniñu de iin kilómetro, te caca rō úu kilómetro jīn de. <sup>42</sup> Te na-ni ñayuu núu jicán i ndajniñu rō, te cuáha rō núu i. Te ñayuu jicán núu ndajniñu nuū rō, ma sasáhan rō cuáha rō núu i.

*Jnūhun jeē cundáhú ni yó ñayuu cájito uhū yohó*

(Lc. 6.27-28, 32-36)

<sup>43</sup> 'Te suni ni cajini rō jnūhun jeē ni cáhān nde jēnahān: Cundáhú ni rō ñayuu cáhīyo maní jīn rō, te coto uhū rō ñayuu cájito uhū rohó, áchí. <sup>44</sup> Te ruhū chi sa cáhān rī jīn rō: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndeváha siquí rō. Te sáha váha rō jīn ñayuu cáquiti ni nuū rō. Te cacān tahú rō jehé ñayuu cácahān neé núu rō te cájito xeēn i rōhó. <sup>45</sup> Te súcuan stéén rō jeé cácuu rō séhe maá Tátá rō. Yāā ndeé andiví, chí maá yá jéhe niāndii cúndijin nuū ñayuu cuneeé jīn ñayuu váha. Te jéhe ya saū nuū ñayuu casáha jñiñu ndaá jīn nuū ñayuu casáha jñiñu neé. <sup>46</sup> Chi núu iyó maní rō jīn maá-ni ñayuu jeē maní jīn rō, te tú na tahū nihin rō nuū yā. Chi nde tēe cástútú xūhun renta jeē castáhú, suni súcuan casáha de. <sup>47</sup> Te núu maní jnāhan rō cáhān yñiñuhūn rō jīn, ¿te na vé jeé váha ga sáha rō núu súcuan? Chi nde ñayuu tu cácañdije Yāā Dios, suni súcuan casáha i. <sup>48</sup> Núu súcuan te ndaá na cóo ndihi jeé sáha rō, nájñūhun iyó ndáa ndihi jeé sáha Tátá rō, Yāā ndeé andiví.

*Jeē ni stéén yā ndese sáha yó jñiñu váha*

## 6

<sup>1</sup> 'Te jeé sáha rō táca jñiñu váha nuū Yāā Dios, coto rō jéé ma sáha rō maá siquí jeé cūni ñayuu te cuajñuhūn i rōhó. Chi núu súcuan sáha rō, te tú na tahú rō cuáha maá Tátá rō, Yāā ndeé andiví. <sup>2</sup> Jeé yúcan te jeé sáha rō caridad, te ma sáha rō jéé cūni táca ñayuu, nájñūhun casáha tēe stáhú-ni, cáhīn de nuū cúchitú ñayuu ini táca vehe i sin-agoga jīn nuū yáhu. Chi súcuan casáha de návāha cuajñuhūn ñayuu de jeé váha casáha de. Jendaá cahān rī jīn rō jeé tahú de cúu jeé jejnūhūn ñayuu de. <sup>3</sup> Te rōhó jīnāhan rō, núu casáha rō caridad, te sáha yuhu rō, návāha nde amigo váha rō tú cuni jeé sáha rō. <sup>4</sup> Súcuan na sáha yuhu rō caridad. Te maá Tátá rō jeé jito ya jeé sáha yuhu rō, iin quívi te cuáha ya tahú cuu rō.

*Jeē ni stéén yā ndese cacān tahú yó*  
 (Lc. 11.2-4)

<sup>5</sup> 'Te jeé cájicān tahú rō, te ma sáha rō nájñūhun casáha tēe stáhú-ni. Chi cánujnahān ni de cuiñi de cacān tahú de nuū iyó chitú



ñayuu ini tãcã vehe iï sinagoga jiïn tãca yiqui yãhu, nãvãha cuni ñayuu te cuajnúhún i de. Jendaá cahán rĩ jiïn ró jeë maá yúcuan-ni cúu tahũ jeë nihín de, suu jeë jejnúhún ñayuu de. <sup>6</sup> Te róhó jijnáhan ró, núu cájicãh tahũ ró, te ndivi ró ini vehe ró te casi ró yehyí. Te cacãh tahũ ró nuũ maá Tátá ró, Yaã ndeé yuhu jiïn ró. Yúcuan na te maá Tátá ró jeë jito ya jeë súcuan sãha yuhu ró, sãha ya jeë jicãh ró.

<sup>7</sup> Te jeë cájicãh tahũ ró, te ma cahán saá-ni ró jnúhun jeë tu cájecũhun ni ró, nãjnũhun casãha ñayuu tu cájini jnúhun Yaã Dios. Chi cájeni ni i jeë núu cuehẽ jnúhun súcuan cahãh i, te saá te cuni sôho ya, te tuú. <sup>8</sup> Núu súcuan te ma sãha ró nãjnũhun casãha maá i. Chi maá Tátá ró, je jini yã na vé cájini ñúhún ró nde ná tu cacãh ró nuũ yã. <sup>9</sup> Núu súcuan te suhva cacãh tahũ ró:

Tátá maá ná jijnáhan ná jẽẽ ndeé ní andiví, níni na cóo yñúhún ná nuũ ní, chi Yaã iï cúu ní.

<sup>10</sup> Te ñúhun ni na jẽẽ yachĩ quiví ndacu ní jniñu ní ñáyiví yãha.

Te na cóo tãcã jniñu núnjahan ni ní, nãjnũhun iyó ini andiví, súcuan na cóo ini ñáyiví.

<sup>11</sup> Staã jeë cátecu na tãca quiví, cuãha ní núu ná vijna.

<sup>12</sup> Te cone cahnu ni ni núu tãca cuéchi casãha ná núu ní,

nãjnũhun cáhine cáhnu ni na núu ñáyuu casãha cuéchi nuũ ná.

<sup>13</sup> Te ma cuãha ni jnúhun jeë coto ndee jexeén saña,

chi sa suhva jnama ní saña núu tãca jẽẽ neé. Chi maá ní cúu Yaã ndácu jniñu, te jnã ní poder,

te yôhoy luu cújẽhnu ní ní cáni. Súcuan na cóo. Amén.

Achi ró jijnáhan ró.

<sup>14</sup> Chi núu cone cáhnu ni ró nuũ ñáyuu casãha cuéchi nuũ ró, te suni súcuan cone cáhnu ni maá Tátá ró andiví nuũ cuéchi ró.

<sup>15</sup> Te núu ma cóne cáhnu ni ró nuũ ñáyuu casãha cuéchi nuũ ró, te suni súcuan ma cóne cáhnu ni maá Tátá ró nuũ cuéchi ró jijnáhan ró.

*Jeë ni stéén yã siquĩ jnúhun condite ni*

<sup>16</sup> Te núu condite ni ró jeë chiñúhún ró Yaã Dios, te ma sãha ró nãjnũhun casãha tẽe stáhú-ni. Chi casãha de jeë coto xii de, te súcuan stéén de nuũ ñayuu jeë iyó ndite ni de, nãvãha cuajnúhún i de. Jendaá cahán rĩ jiïn ró jeë maá yúcuan-ni cúu tahũ jeë nihín de, suu jeë jejnúhún ñayuu de. <sup>17</sup> Te maá ró jijnáhan ró, núu iyó ndite ni ró, te sa chuhun vãha ró xini ró te nandahá núu ró, <sup>18</sup> nãvãha ma cúni ñayuu jeë iyó ndite ni ró. Chi maá-ni Tátá ró jeë ndeé yuhu yã jiïn ró, cuni yã, te iïn quiví te cuãha ya tahũ cuu ró.

*Ndese coo cúcã yó nde andiví  
(Lc. 12.33-34)*

<sup>19</sup> Ma cóndihví ni ró caya ró ndajniñu cúcã ini ñayiví yãha, chi quiví tiquixín, te cáne xehyu, te tiví. Te suni quívicoo ñacuĩhnã te sácuihnã. <sup>20</sup> Chi sa suhva sãha ró tãca jniñu vãha nãvãha cayã tahũ ró nde andiví. Chi yúcuan má quiví tiquixín ni ma cáne xehyu jeë tiví. Ni ma cúu quiví ñacuĩhna sácuihnã. <sup>21</sup> Chi nde nuũ nihín ró tahũ vãha ró, yúcuan cúu nuũ cóndihví ni ró siquĩ.

*Tinũu cúu lámpara yiqui cúñu  
(Lc. 11.34-36)*

<sup>22</sup> Tinũu ró cúu nãjnũhun lámpara nuũ yiqui cúñu ró. Núu súcuan te núu tinũu ró iyó ndijin, te ní-ni yiqui cúñu ró cóndijin. <sup>23</sup> Te núu tinũu ró tu iyó ndijin, te ní-ni yiqui cúñu ró iyó nee. Te suni súcuan cúu ánuã ró, chi núu máni jeë jeni neé ni ró, te nacã jeë nee gã iyó ini anuã ró núu súcuan.

*Jeë ma cóndihví ni yó siquĩ xúhun  
(Lc. 16.13)*

<sup>24</sup> Ni iïn mozo ma cúu cuajniñu de nuũ uũ patrón. Chi quiví ni de nuũ iïn te coo maní de jiïn inga, chí squicu vãha de nuũ iïn te sãjẽẽ ni de nuũ inga. Te suni súcuan ma cúu cuajniñu ró núu Yaã Dios te núu máni siquĩ xúhun ndihví ni ró.

*Yaã Dios ndito ya yohó  
(Lc. 12.22-31)*

<sup>25</sup> Núu súcuan te cáhán rĩ jiïn ró jijnáhan ró: Ma nácani ndasí ni ró siquĩ jeë cótecu ró, núu ndese caji ró coho ró, ni siquĩ sahna, núu ndese cuhun ró. Chi Yaã Dios ni sãha ya jeë técu ró jiïn yiqui cúñu ró, te nagã ni cuu jeë ma cuãha ya jeë cáji ró jiïn jẽẽ cuhun ró. <sup>26</sup> Condẽhe ró ndese cátecu saa, chi tu cátaji ti, ni tu cánatútú tí jẽẽ chuvéha ti, ni tú yacã tí. Te vésú súcuan te maá Tátá ró andiví scãji yã tí. Te cánuú ndasí gã ró jijnáhan ró vésú tãcã saa ún. <sup>27</sup> Te ndé iïn ró, á cuu scuẽhnu ró maá ró sava metro gã, vésú na nácani ndasí ni ró?

<sup>28</sup> ¿Te najehẽ cáncani ndasí ni ró jeë ma nihín ró sahna? Condẽhe jijnáhan ró ndese jée ita tãca yúcũ. Chi tu sãjniñu, ni tu táú. <sup>29</sup> Te cáhán rĩ jiïn ró jeë ni rey Salomón, quiví ní ñúhun de sahna vãha ndasí, tu ní ñúhun de sahna lúu súcuan nãjnũhun ita ún. <sup>30</sup> Te núu súcuan jẽhe Yaã Dios sahna lúu ita un jẽẽ jee vijna te sajnẽ cayũ nuũ ñúhún, te nagã ni cuu róhó jijnáhan ró jẽẽ ma sãha ya jeë nihín ró sahna. ¿Te naun tu cácandije níhin ró jẽẽ ndito ya rohó? <sup>31</sup> Núu súcuan te ma nácani ndasí ni ró siquĩ jeë cáji ró, jeë coho ró, jeë cuhun ró. <sup>32</sup> Chi tãca ñayuu ñayiví jẽẽ tu cácandije cúu jeë máni siquĩ jeë yãha cándihví ni i. Te maá ró jijnáhan ró, chí iyó Tátá ró andiví, te jini yã jeë cájini ñúhún ró tãca jẽẽ yãha. <sup>33</sup> Te sa suhva cánuú gã jeë

cóndihvī ni rō siquī jniñu jeē ndácu Yaā Dios nuū rō, jín siquī jeē sáha rō jniñu ndaā jeē núnjahan ni yā. Yūcuán na te sáha ya jeē nihín rō táca jéé yáha. <sup>34</sup>Núu súcuan te ma nácani ni rō siquī jeē cóo sajnē, chí vijna cúu vijna te sajnē cúu sajnē. Chí cani ni rō siquī jnundóho jeē iyó ná ñn ná ñn-ni quiví.

*Jeē ma cahán yō siquī cuéchi jnahan yō*  
(Lc. 6.37-38, 41-42)

## 7

<sup>1</sup>Ma cahán rō siquī ñayuu ndese sáha i, návaha suni ma cahán Yaā Dios cuéchi siquī maá rō jeé casáha rō súcuan. <sup>2</sup>Chí nájñuhun cácahān rō siquī cuéchi ñayuu, suni súcuan cahán yā siquī cuéchi rō. Te cūhva jeē cándihvī ni rō siquī i, suni cūhva yúcuan sáha ya jín rō. <sup>3</sup>Chí cuéchi jnahan rō cúu nájñuhun jeē ñe ñn yāca lúli tinúu i. <sup>4</sup>Te naun cásaáha rō cuenta jeē súcuan, te tu cásaáha rō cuenta cuéchi máá rō jeé cúu nájñuhun jeē ñe ñn nduhu tinúu máá rō? <sup>4</sup>Te naun cácahān rō jín jnahan rō: Na táva rí yāca ñe tinúu rō, te tu cánacani ni rō jeē ñe ñn nduhu tinúu máá rō? <sup>5</sup>Tēe stáhú-ni cácuu rō núu súcuan. Xihna gā tinúu máá rō tava rō nduhu, te yūcuán na te cuu condēhe váha rō jéé táva rō yāca tinúu jnahan rō.

<sup>6</sup>Ma sáha fuerza rō ñayuu cunéé quívicoo i nuū jñuhun ñi yā núu tu cúní i. Chí ndonda i siquī rō nájñuhun ina jeé cáyihí tí rohó. Te ma nácani rō jñuhun ya nuū ñayuu jeé tu cúní cuiti cuajñuhún. Chí cándaá i nájñuhun quini jeé jeñú tí siquī perla jeé ndeé yahu ga.

*Cacān yō nuū yā te nihín yō*  
(Lc. 11.9-13; 6.31)

<sup>7</sup>Cacān rō nuū Yaā Dios, te cuāha ya nuū rō. Te nducú rō táca jéé váha iyó núu yā, te nihín rō sáha ya. Te cacān tahú rō nde nihín rō, nájñuhun sáha ñayuu cahán yehyí nde nune quiví i. <sup>8</sup>Chí táca ñayuu jicán, cuāha ya nuū i. Te ñayuu nducú, suni nihín i. Te ñayuu cahán, nune ya ichi nihín i jeé cuní i.

<sup>9</sup>Te ndé ñn róhó núu sēhe rō jicán i staā nuū rō, te á cuāha rō ñn yuū nuū i? <sup>10</sup>Te núu jicán i ñn chácá, te á cuāha rō ñn coó nuū i? Tú cuiti súcuan. <sup>11</sup>Núu súcuan te máá rō jijnáhan rō, vēsū ñayuu iyó cuéchi cácuu rō, te cájini rō cuāha rō jéé váha nuū sēhe rō. Te nagá ni cuu máá Tátá rō andiví jéé ma cuāha ya jeé váha nuū ñayuu jicán nuū yā.

<sup>12</sup>Te nájñuhun cúní rō jeé sáha váha ñayuu jín rō, suni súcuan na sáha váha rō jín i. Chí tutu ley Moisés súcuan nduca jniñu, jín táca tutu tēe ni canacani jñuhun Yaā Dios.

*Siquí jeē quiví yó yéhyí túu*  
(Lc. 13.24)

<sup>13</sup>Condihvī ni rō quívicoo rō ndaha Yaā Dios. Chí cúu nájñuhun ñn yéhyí túu. Chí yéhyí jín ichi jeé cuahán nuū jnahnú ndetū

ñayuu, jité te cáhnu, te cuehē i quívicoo yūcuán. <sup>14</sup>Te yéhyí jín ichi jeé cuahán nuū nihín tahú i cotecu i, chí tuū yehyí te cuñí ichi, te jecu-ni i cánihín i.

*Jín jniñu cásaáha ñayuu te nácuni yō ndese ñayuu cácuu i*

(Lc. 6.43-44)

<sup>15</sup>Te ma cándije cuiti rō tēe stáhú jéé cácahān de jeē jñuhun Yaā Dios cánacani de. Chí nájñuhun lanchi, quiti tú xeēn, súcuan cásaáha de vējicoo de nuū rō. Te ñni anuá de chí cácuu de nájñuhun yihí, quiti xéén. <sup>16</sup>Jín jniñu cásaáha de te nacuni rō de ndese tēe cácuu de. Chí cúu nájñuhun jeé tu scóyo rō ndehē uva xiní ñnu, ni tu scóyo rō higo xiní ñnu yóqin. <sup>17</sup>Te táca yujnu váha chí jéhe ndehē váha, te yujnu neé chí cúun ndehē neé. <sup>18</sup>Ñn yujnu váha ma cúun ndehē neé, te ni ñn yujnu neé ma cuāha ndehē váha. <sup>19</sup>Te táca yujnu jeé tu jéhe ndehē váha, chí tahndē te cayú nuū ñuhún. <sup>20</sup>Te suni súcuan cácuu tēe ún, chí jín jniñu cásaáha de te nácuni rō ndese tēe cácuu de.

*Nasúu ndihi ñayuu quívicoo andiví*  
(Lc. 13.25-27)

<sup>21</sup>Nasúu ndihi ñayuu jeé cahán i Jitoho i ruhú cúu jeé quívicoo nuū ndácu Tátá rí jniñu nde andiví. Chí quívicoo máá nene ñayuu jeé squícu jniñu cúní Tátá rí andiví. <sup>22</sup>Te quiví jeé sándaá rí jniñu ñayuu, te cuehē i cahán jín rí: Jitoho na jijnáhan ná, ni canacani ná jñuhun jín síhví ní, te ni caque-nehen ná táchí jín síhví ní, te ni casáha ná cuehē jniñu jéhu jín síhví ní jeé náá ni ñayuu sáha. Achí i. <sup>23</sup>Yūcuán na te cahán rí jín ñayuu ún: Tu jín cuiti rí rohó. Cuijyo quingoo rō, chí ñayuu casáha jniñu neé cácuu rō, achí rí.

*Siquí uú vehe*  
(Lc. 6.47-49; Mr. 1.22)

<sup>24</sup>Núu súcuan te táca ñayuu jeé cájini sōho jñuhun cáhán rí te squícu i, cácuu i nájñuhun ñn tēe ni nacani váha ní, te ni jeni de vehe de siquí cáva. <sup>25</sup>Te ni cuun saū, te ni ndaa yūte, te ni quee tachí xeén, te ni cachundahá vehe ún. Te tu ní cotúú, chí siquí cáva ndeé. <sup>26</sup>Te táca ñayuu jeé cájini sōho jñuhun cáhán rí te tu squícu i, cácuu i nájñuhun ñn tēe cánéé jeé ni jeni de vehe de nuū ñiti. <sup>27</sup>Te ni cuun saū, te ni quiji ndute ñuhún cuehē, te ni quee tachí xeén, te ni cachundahá vehe ún. Te ni cotúú-ni, te ni naa ñ-ni. Achí yá jín i jijnáhan i.

<sup>28</sup>Te ná ni jñu ni cahán Jesús táca jñuhun yáha, te ñayuu cuehē un ní canaa ni i ni cajini i jñuhun ni steén yā. <sup>29</sup>Chí ni steén váha ya nuū i, chí máá yá cúu jeé ndáso jniñu siquí ndihi. Te tēe cástéén tutu ley Yaā Dios, tu súcuan cástéén de.

*Jeē ní nasávāha ya ñin tēe ndóho cuehyí stehyú*

(Mr. 1.40-45; Lc. 5.12-16)

## 8

<sup>1</sup> Te ni nanuu Jesús yucu ún, te cuehē ñayuu cándiquín i ya. <sup>2</sup> Te ñin tēe ndóho cuehyí stehyú, ni quee de nuú yá. Te ni jecuiñi yiti de nuú yá, te ni cahān de jíin yá:

Jíni na jēe cuu sáha ni jēe nduvāha ná, te núu cúní ni, áchí de.

<sup>3</sup> Te Jesús ni soó yá ndaha ya siquí de, te ni cahān yá:

Cúní rí. Te na nduvāha ró, áchí yá.

Te ná ni cahān yá súcuan, te ni nduvāha-ni tēe ndóho cuehyí stehyú un. <sup>4</sup> Yūcuán na te ni cahān Jesús jíin de:

Ma cáchi cuiñi rō nuú ní ñin. Chi quis-teén rō maá rō nuú sutú, te condahá rō jee socó rō nuú Yaā Dios, nájñuhun ni ndacu Moisés jniñu jenahán, návāha cuni ñayuu jee ní nduvāha ró. Achí yá.

*Jeē ní nasávāha ya mozo capitán*

(Lc. 7.1-10)

<sup>5</sup> Te ni quívi Jesús ñuu Capernaum. Te ñin tēe nación Roma jeē cúu capitán, ni quee de nuú yá, te ni cahān ndahú de jíin yá:

<sup>6</sup> Mozo na cáti i vehe ná, chi ni ñin i te ndóho xeñi i, áchí de.

<sup>7</sup> Te ni cahān Jesús:

Quihín rí nasávāha ri i núu súcuan, áchí yá.

<sup>8</sup> Te ni cahān capitán jíin yá:

Tu cújehnu ná jēe quihín ni quívi ní vehe ná. Chi máá jēe cahān-ni ní, te na nduvāha-ni mozo na. <sup>9</sup> Chi máá ná suni ndíso jniñu ná ní casáha tēe cácujeñu ga. Te cújehnu ná núu táca soldado na. Te núu cáhán na jíin ñin de jeē na quihín de, te cuahān de. Te núu cáhán na jíin inga de jeē na quíji de, te quíji de. Te núu ndácu ná ñin jniñu nuú mozo na, te sáha i. Achí de.

<sup>10</sup> Te jeē ní jini Jesús jñuhun yáha, te ni naa ni yá. Te ni cahān yá jíin ñayuu cándiquín yá ún:

Jendaá cahán rí jíin ró jeē ní nación yō Israel tu ní níhín rí ni ñin ñayuu candíje níhín súcuan, nájñuhun cándíje tēe yáha, vésú tēe nación tu jíni jñuhun Yaā Dios cúu de. <sup>11</sup> Te cáhán rí jíin ró jeē quíjicoo cuehē ñayuu ichi núu cáne niāndii jíin ichi núu quée niāndii. Te cucōo i caji i staā jíin Abraham jíin Isaac jíin Jacob nuú ndácu Yaā Dios jniñu nde andívi. <sup>12</sup> Te sava ñayuu nación Israel jeē maá i quívicoo núu, te sa quenehen ya i quihín i nuú nēe, chi tu ní cácujeñu i. Te yūcuán ndáhyū i te nacayihí yuhu i jeē ndoho xeñi i. Achí yá.

<sup>13</sup> Yūcuán na te ni cahān yá jíin tēe cúu capitán:

Cuánuhun vehe ró, chi sáha ri nájñuhun cándíje ró jēe sáha ri.

Te mozo de un ní nduvāha-ni i máa hora un.

*Jeē ní nasávāha ya naná chíso Pedro*

(Mr. 1.29-31; Lc. 4.38-39)

<sup>14</sup> Te ni jehēn Jesús vehe Pedro. Te ni jito ya naná chíso de jeē catú ña yhi quíji ña. <sup>15</sup> Te ni jñi ya ndaha ña, te ni quenda-ni quíji ún ña. Te ni ndocuiñi ña, te ni sáha ña jeē ní cayeji de jíin yá.

*Jeē ní nasávāha ya cuehē ñayuu*

(Mr. 1.32-34; Lc. 4.40-41)

<sup>16</sup> Te jeē ní cuaa ni quecoo ñayuu jíin cuēhē ñayuu jeē ñuhun tachí ini i. Te ni quenehen ya tachí un cuángoo jíin jñuhun cáhán-ni ya. Te suni ni nasávāha ya táca ñáyuu cácuñu.

<sup>17</sup> Te súcuan ni cuu návāha cundaā jñuhun ni cahān Isaías, tēe ni nacani jñuhun Yaā Dios jenahán: Máá yá ni tejiyo ndinuú cuehyí cándoho yó, áchí Isaías.

*Siquí ñayuu jeē cácuñi i condiquín i ya*

(Lc. 9.57-62)

<sup>18</sup> Te ni jito Jesús jeē ní ndicó ndúu cuehē ñayuu yá. Te ni cahān yá jíin tēe cácuáha jíin yá jeē na yáha de jíin yá inga lado mar. <sup>19</sup> Te ñin tēe stéén tutu ley Yaā Dios, ni quee de nuú yá, te ni cahān de:

Maestro, condiquín na níhín quihín yō ndé-ni cúu-ni nuú quihín ni, áchí de.

<sup>20</sup> Te ni cahān Jesús jíin de:

Tāca ñúcui, iyó yáú cava cáñuhun ti. Te suni saa, iyó táca tī. Te ruhú, Yaā ní nduu tēe, tuú nuú cusú rí, áchí yá.

<sup>21</sup> Te inga tēe ni cahān de jíin yá, te tēe scuáha jíin yá cúu de:

Condetu ní ndé na quíchindúji ná tátá na xihna gā. Yūcuán na te condiquín na níhín, áchí de.

<sup>22</sup> Te ni cahān Jesús jíin de:

Condiquín ruhú na quihín yō. Te stóo táca ndíyi na chindúji jñahan ndíyi, chi ndíyi cácuu ñayuu tu cácujeñu. Achí yá.

*Jeē ní jecuiñi tachí níhín jíin mar ni sáha ya*

(Mr. 4.35-41; Lc. 8.22-25)

<sup>23</sup> Yūcuán na te ni quívi Jesús ini barco, te tēe cácuáha jíin yá ni quívicoo de cuahān de jíin yá. <sup>24</sup> Te nuú mar ni jecuiñi ñin tachí níhín, te ni stóna ndute mar, ni quívi ini barco un. Te Jesús chi quíxi yá. <sup>25</sup> Te tēe cácuáha jíin yá ni castóna de ya, te ni cacahān de:

Jnama ní yóhó, chi je quee yó chíji ndute, áchí de.

<sup>26</sup> Te ni cahān yá jíin de:

¿Naun cáyuhú ndasí ró? Te tu cácujeñu níhín ró jēe cácu ró sáha rí, áchí yá.

Yūcuán na te ni ndocuiñi yá, te ni cahān yá nuú tachí níhín un jíin núu mar. Te ni cuu nayúú í-ni. <sup>27</sup> Te ni canaa ni de jíjñahan de, te ni cacahān de:

¿Ndé ñn ga cúu tēe yáha, jéé ndé tachī níhin jín mar cájetáhú jéé cahán de? áchí de.

*Tēe Gadara jeé cándoho tachī  
(Mr. 5.1-20; Lc. 8.26-39)*

<sup>28</sup> Te ni jinū yā inga lado mar, máá región ñayuu Gadara. Te uū tēe ni quendacoo de nde nuū yíndūji ndīyí, ni quiijnahan de ya. Te cáñuhun tachī ini de, te siquī jeé yóhoyo xeēn tachī ún, te ni ñn ñayuu tu cúu yáha i ichi yúcuán. <sup>29</sup> Te ni cacana cóhó de ni casáha tachī:

¿Naun vēji ní nuū ná, Jesús Sēhe Yaā Dios? ¿A vēji ní yáha jeé stóho ní sáña ndé ná tu quee maá quiví? áchí.

<sup>30</sup> Te nde jicá jecu cáñin cuehē quinī cájitu tí. <sup>31</sup> Te tachī jeé cáñuhun ini tēe un ni cacahān ndahú jín yá:

Núu quenehen ní sáña, te cuāha ni jnūhun na quívicoo ná ini quinī cáñin yúcuán, áchí.

<sup>32</sup> Te ni cahān yā jín:

Cuángoo núu súcuán.

Te ni quendacoo tachī ún ini tēe ún, te ni quívicoo ini quinī. Te quinī un ní cajinu tí ni caningava tí ñn yucáva, te ni ndaquēhi tí ndute mar, ni cajihí tí.

<sup>33</sup> Te tēe cándito tí ni cajinu de cuangoo de jeé ní cayūhú de. Te ni najinūcoo de ñuu. Te ni cacastuhún de táca jniñu yúcuán, jín ndese ni cuu jeé ní quendacoo tachī ini ndindúú tēe ún. <sup>34</sup> Yúcuán na te ndivii ñayuu ñuu un, ní quendacoo i cuacondēhé i Jesús. Te ná ní jinūcoo i nuū ñe ya, te ni cacahān ndahú i jín yá jeé na quénda ya región yúcuán quihín yā.

*Jeé ní nasávaha ya ñn tēe ndóho cuehyí ni jín*

*(Mr. 2.1-12; Lc. 5.17-26)*

## 9

<sup>1</sup> Yúcuán na te ni ndīvi Jesús ini barco. Te ni nayáha ya cuahān yā inga lado mar, te ni najinū yā ñuu maá yá. <sup>2</sup> Te ni caquindeca ñayuu ñn tēe ndóho cuehyí ni jín, cátu de nuū ñn camilla. Te ni jini Jesús jeé cácañdije i jeé cúu nasávaha ya tēe ní jín ún. Te ni cahān yā jín de:

Na ndúndeyí ní rō séhē, chí je ñe cáhnu ní rí nuū táca cuéchi rō, áchí yá.

<sup>3</sup> Yúcuán na te jecu tēe cástéén tutu ley Yaā Dios, ni cajeni ní de siquī yā: Jeé cahān tēe yáha súcuán, chí cáhán de jnūhun ndevāha jeé quití ní Yaā Dios. <sup>4</sup> Te ni jini Jesús jeé súcuán cájeni ní de, te ni cahān yā jín de:

¿Naun cájeni ní rō jeé cahān ndevāha rí? <sup>5</sup> Jeé uū jnūhun yáha, ¿ndé ñn yí gá cáa? ¿A jeé cahān rí jín tēe cūhú: Je ñe cáhnu ní rí nuū táca cuéchi rō? ¿Chí yí gá jeé cahān rí: Ndocuñí te caca rō, chí je ní nduvāha rō, áchí rí? <sup>6</sup> Te vijna te na stéén rí jeé maá rí, Yaā ní nduu tēe, ndíso jniñu rí ini ñayiví yáha jeé cóne cáhnu ní rí nuū cuéchi.

Yúcuán na te ni cahān yā jín tēe ní jín ún: Ndocuñí te naquihín rō camilla rō te quinhun rō vehe rō, áchí yá jín de.

<sup>7</sup> Yúcuán na te ni ndocuñí-ni tēe ún, te cuanhun de vehe de. <sup>8</sup> Te ná ni cajito ñayuu un jéé súcuán ní sáha ya, te ní cayūhú i. Te ní cacahān i jeé yóhoyo vāha Yaā cúu Yaā Dios jeé súcuán ní jēhe ya poder nuū ñn tēe jeé cúu nasávaha de ñayuu, áchí i cájito i Jesús.

*Jeé ní cana ya Mateo*

*(Mr. 2.13-17; Lc. 5.27-32)*

<sup>9</sup> Te ni quenda Jesús yúcuán cuahān yā. Te ni jito ya nuū ñn tēe nání Mateo, néne de nuū cututú xúhun renta. Te ni cahān yā jín de:

Conduquín ruhú na quihín yō.

Te ní ndocuñí de, te cuahān de jín yá.

<sup>10</sup> Yúcuán na te ni jehēn yā ni yeji yā staā vehe de. Te cuehē tēe cástutú xúhun renta jín inga tēe casáha cuēchi, suni cáyūcú de cáyeji de staā jín Jesús jín tēe cáscuāha jín yá. <sup>11</sup> Te tēe grupo fariseo, ní cajito de, te ni cacahān de jín tēe cáscuāha jín yá:

¿Naun vēji maestro rō jín tēe cástutú xúhun renta jín inga tēe casáha cuēchi? áchí de.

<sup>12</sup> Te ni jini Jesús, te ni cahān yatá yá jín de:

Ñayuu cáhīyo vāha, tu jini ñūhún i tēe tájna, chí ñayuu cácuahú cúu jeé jini ñūhún.

<sup>13</sup> Cuahān jínánhan rō núu súcuán, te nacani ní rō na vé cúu jeé cahān jnūhun yáha jéé yosó núu tútu í: Cúni rí jeé na cúndáhú ní rō jnánhan rō, nasūu jéé socó rō quití nuū rí, áchí Yaā Dios nde jenahán. Te ruhú nasūu jéé vēji rí cana rí ñayuu tú cuēchi, jeé cúu i nájñuhun ñayuu cáhīyo vāha, chí sa suhva vēji rí cana rí ñayuu iyó cuēchi, jeé na nacani ní i te stóo i cuēchi i. Áchí yá.

*Jeé ní cacajñuhún de ya siquī jeé cóndite ní*

*(Mr. 2.18-22; Lc. 5.33-39)*

<sup>14</sup> Yúcuán na te tēe cáscuāha jín Juan tēe scuándute, ní quecoo de nuū Jesús. Te ni cacahān de jín yá:

Sáña jín tēe grupo fariseo, tíjini jínu cáhīyo ndite ní na núu Yaā Dios. Te tēe cáscuāha jín máá ní, ¿naun tu casáha de súcuán?

<sup>15</sup> Te ni cahān Jesús jín de:

¿A cuu condite ní de níni jéé iyó rí jín de? ¿A cuu cucuñháyá ní ñayuu cáñin vico nándāha, te núu níni néne tēe nándāha? Te quee quiví jeé cújiyo tēe nándāha, te quiví ún chí condite ní i.

<sup>16</sup> Te ni cahān yā uū jnūhun yatá síquī jeé tu quiijnánhan jnūhun jeé jéé steén yā jín táca jnūhun jenahán. Áchí yá:

Ní ñn tu náchuhun ñn pedazo sahma jéé núu ñn sahma túhú. Chí núu súcuán te ndīyí pedazo jeé un, te tahndé gā jeé tuhú un, te nducáhnu ga nuū catáhdndé un. <sup>17</sup> Te suni tu cáchuhun vino jeé ini ññi túhú. Chí núu súcuán te ndatá ññi ún, te naa vino jín ññi. Chí cánuú

jéé chühun i vino jeé ini ñi jéé, te súcuan te quéndoo vaha ndindúú. Achí yá.

*Jñuhun sêhe síhí Jairo jíin ñahan ní quehé yusáhma ya*

(Mr. 5.21-43; Lc. 8.40-56)

<sup>18</sup> Te níni cáhán Jesús táca jñuhun yáha, te ñin tée cújéhu nuú ñayuu hebreo, ni quee de nuú yá. Te ni jecuiñi yiti de nuú yá, te ni cahán de:

Sêhe síhí ná sá ní jihí i. Te núu na quihín yó soó ní ndaha ní síquí i, te natecu i. Achí de.

<sup>19</sup> Te ni ndocuiñi Jesús, te cuahán yá jíin de, te suni cuangoo tée cáscuáha jíin yá. <sup>20</sup> Te mēhñu ñayuu cuangoo jíin yá ni quee ñin ñahan, te je ni cuu uxí uú cuiyá ndóho ña cuehyí niñi. Te ni quee ña ichi yátá yá, te ni quehé ña yusáhma ya. <sup>21</sup> Chi ní jeni ní ña: Vésú maá sahma ya na ñihín rí quehé rí, te nduváha rí, jeni ní ña. <sup>22</sup> Te ni ndió cóto Jesús, te ni jito ya nuú ña, te ni cahán yá:

Na ndúndeyí ní rō, sêhē. Ni candije ró jéé cuu nasávaha ri rohó, te jeé yúcuan ní nduváha ró, achí yá.

Te ni nduváha ña maá hora un.

<sup>23</sup> Te ná ní jinū Jesús vehe tée cújéhu ún, te ni jito ya nuú tée cácuu músico jeé quíchindūji de i, jíin núu ñayuu cuehē, cásvaa i. <sup>24</sup> Te ni cahán yá jíin i:

Cujitoy jíináhan ró, chí sūchi síhí yáha, tu ní jihí i chí quixí-ni i, achí yá.

Te ni cajecū catá i jeé ní cáhán yá. <sup>25</sup> Te ni quenehen ya ñayuu cuehē ún, te ni quívi ya ini vehe. Te ni jñi ya ndaha sūchi síhí ní jihí ún, te ni ndocuiñi-ni i. <sup>26</sup> Te ná región yúcuan ní jitē núu jñuhun jñiñu jéhu ní sáha ya ún.

*Jeé ní nasávaha ya uú tée cuáá*

<sup>27</sup> Te ni quenda Jesús yúcuan cuáhán yá. Te uú tée cuáá cuángoo de yatá yá, cácana jee de: Máá ní jeé cúu ní Sêhe yucún David, cundáhú ní ní sáña víi, achí de.

<sup>28</sup> Te ná ní jinū yá vehe, te ni jinūcoo tée cuáá un núu yá. Te ni cahán yá jíin de:

¿A cávandije ró jéé cúu nanune ri tinūu ró? achí yá.

Te ni cacahán de:

Cávandije ná, achí de.

<sup>29</sup> Yūcuán na te ni tee ya ndaha ya tinūu de, te ni cahán yá:

Na sáha ri nájnūhun cávandije ró, achí yá.

<sup>30</sup> Te ni cananune-ni tinūu de. Te Jesús ní cahán ñihin ya jíin de:

Ma cáchi cuiti rō nuú ní ñin, achí yá.

<sup>31</sup> Te maá de chí ní quendacoo de, te ni cajete-ni de jñuhun ná región yúcuan jéé súcuan ní sáha ya jíin de.

*Jeé ní nasávaha ya ñin tée ñihín*

<sup>32</sup> Te nuú ní quendacoo tée un cuángoo de, te ni queeco ñayuu jíin ñin tée ñihín, jeé ñuhun tachí ini de. <sup>33</sup> Te ni quenehen ya tachí un

cuáhán. Te tée ñihín un ní nacahán de. Te ni canaa ní ñayuu ní cajito i, te ni cacahán i:

Ná tu cuni cuiti yō ní ñin jñiñu súcuan ini ñuu Israel, achí i.

<sup>34</sup> Te tée grupo fariseo chí ní cacahán de:

Tée yáha chí quénehen de tachí jíin fuerza maá jexeén jeé cújéhu nuú tachí, achí de.

*Jeé cundáhú ní yá ñayuu cuehē*

<sup>35</sup> Te ní jica cuu Jesús táca ñuu jíin rancho, te ni steén yá jñuhun ini táca vehe ñi sinagoga. Te ni nacani ya jñuhun vaha ndese ndácu Yaa Dios jñiñu. Te ni nasávaha ya ñayuu cácuñu na-ni cuehyí cándoho i. <sup>36</sup> Te cundáhú ní yá jíto ya nuú ñayuu cuehē ún. Chí cándoho i te cácuñuhá ní i, chí cácuu i nájnūhun lanchi jeé tú jitoho tí, chí tu ndíquín i Yaa cúu Jitoho i. <sup>37</sup> Yūcuán na te ni cahán yá jíin tée cáscuáha jíin yá:

Ñayuu yáha cácuu i nájnūhun trigo jeé tahndé, te ndaa jeé cuehē cúu, te tée cahnde chí jecu-ni de cúu. <sup>38</sup> Núu súcuan te cacán táhí rō nuú maá Jitoho rō Yaa Dios jeé na tají yá cuehē tée na quíngoo de cahnde de trigo, cúu jeé nácani de jñuhun ya nuú ñayuu. Achí yá.

*Jeé ní nacáji ya uxí uú tée apóstol*

(Mr. 3.13-19; Lc. 6.12-16)

## 10

<sup>1</sup> Yūcuán na te ni cana ya uxí uú tée jeé scuáha de jíin yá. Te ni jêhe ya poder nuú de jeé quenehen de tachí ini ñayuu, jíin jéé nasávaha de ñayuu cácuñu táca ndinuú cuehyí.

<sup>2</sup> Te yáha cúu síhví ndihúxí uú tée apóstol un: Tée ñin cúu Simón jeé suni nání Pedro, jíin ñani de Andrés. Te uú gā de cácuu sêhe Zebedeo, te nání de Jacobo jíin Juan. <sup>3</sup> Yūcuán na te Felipe, Bartolomé, Tomás, Mateo tée ní stútú xúhun renta, Jacobo sêhe Alfeo, jíin Lebeo jeé suni nání Tadeo, <sup>4</sup> jíin Simón tée grupo cananista, jíin Judas Iscariote, tée jeé ní nastúu de ya.

*Jeé ní tají yá ndihúxí uú de quinacani de jñuhun*

(Mr. 6.7-13; Lc. 9.1-6)

<sup>5</sup> Te ní tají Jesús ndihúxí uú tée yáha jeé quíngoo de. Te ni ndacu ya jñiñu nuú de ndese sáha de:

Ma quíngoo ró núu ñayuu jeé násūu ñayuu hebreo cácuu i, ní ma quívicoo ró táca ñuu ñayuu Samaria. <sup>6</sup> Chí nuú maá-ni ñayuu nación yō Israel quíngoo ró, chí cácuu i nájnūhun lanchi jeé ní sana. <sup>7</sup> Te jeé quíngoo ró te suhva nacani ró jñuhun: Je ni cuyajni Yaa ndeé andiví jeé ndacu ya jñiñu nuú rō, achi rō. <sup>8</sup> Te nasávaha ró ñayuu cándoho cuehyí stehyú jíin ñayuu cándoho táca gá cuehyí, te nastécu rō ndiyi te quenehen ró tachí ini ñayuu. Te súcuan-ni ní jêhe ri poder

nuū rō jeē sāha rō, te suni súcuan-ni sāha rō jín i.

<sup>9</sup> Te ma cóndiso rō xúhun oro, ni xúhun plata, ni centavo cuechí. <sup>10</sup> Ni ma cóndiso rō ñunu stáa caji rō ichi, ni inga camisa, ni ndijén, ni vara. Chi siquí jniñu jeē nácani rō jñuhun nuū ñayuu, te cánuú coto i rōhó.

<sup>11</sup> Te na-ni ñuu chí rancho núu ni jinūcoo rō, te yūcuán nducú rō ñn ñayuu vāha, te coyūcu rō vehe i nde quingoo tucu rō. <sup>12</sup> Te jeē quívi rō vehe ñayuu ún, te cahān rō jeē na quiñi jñuhun ndeyí; jñuhun siñ ni nuū i. <sup>13</sup> Te núu ñayuu vāha cácuu i, te jñuhun ndeyí ní cahān rō quendóo siquí i. Te núu nasūu ñayuu vāha cácuu i, te jñuhun ndeyí ní cahān rō ma quendóo siquí i. <sup>14</sup> Te núu iyó ñayuu jeē tu cájetáhú i rōhó, ni tu cúní i cuni nahín i jñuhun cahān rō, yūcuán na te quendacoo rō vehe un chí ñuu ún, te scóyo rō tícachā jehē rō, te súcuan stéén rō jeē iyó cuechi i jeē tu ní cájetáhú i. <sup>15</sup> Jendaá cahān rī jín rō jeē quívi juicio te xeēn gā coo castigo siquí ñuu casáha súcuan vēsú siquí ñuu Sodoma jín ñuu Gomorra nuū ní casáha ndasí ñayuu cuēchi.

*Jeē coto xeēn ñayuu de jijnāhan de*

<sup>16</sup> Cuni sóho rō, chí táji rī rohó quingoo rō nájnūhun lanchi mēhñu yihí. Núu súcuan te coo listo rō nájnūhun coó, te coo vítá ní rō nájnūhun paloma. <sup>17</sup> Te condito rō máa rō nuū ñayuu, chí quee quívi jeē quindeca i rōhó nuū tohó, te caní i rōhó ini táca vehe ñi sinagoga. <sup>18</sup> Te suni nde nuū táca gobernador jín rey quindeca i rōhó jeē siquí ruhū. Te súcuan te nune ichi jeē nacani ndaā rō jñuhun rī nuū de jín nuū ñayuu táca nación jeē tu jíní jñuhun Yaā Dios. <sup>19</sup> Te núu ni jendeca i rōhó nuū táca tēe ún, ma nácani ndasí ní rō ndese cahān rō. Chí máa hora un te máa yá steén nuū rō ndese cahān rō. <sup>20</sup> Chí nasūu máa rō cúu jeē cahān, chí Espiritu máa Tátá rō cúu jeē cahān jín yuhu rō.

<sup>21</sup> Te sava ñayuu tu cácañdije, nastúu i ñani i jeē na cúu. Te tátá nastúu séhe. Te séhe ndonda siquí tátá jín náná jeē na cúu. <sup>22</sup> Te ndihí ñayuu quiñi ní i nuū rō jeē siquí ruhū. Te ñayuu jeē quiñi nihin nde jeē jínú jñūndóho, ñayuu ún chí cácu ánuá i. <sup>23</sup> Te núu cájito xeēn i rōhó ñn ñuu, te cunu rō quiñi rō inga ñuu. Chí jendaá cahān rī jín rō jeē ma ndécava rō caca cuu rō ndihí nación yó Israel te ndiji-ni máa rí, Yaā ní nduu tēe.

<sup>24</sup> ñin tēe scuáha, tu cújehnu de nuū maestro de. Ní tēe cúu mozo, tu cújehnu de nuū patrón de. <sup>25</sup> Tēe scuáha chí nájnūhun ndóho maestro de suni súcuan ndoho nahín máa de, te tēe cúu mozo suni ndoho de nájnūhun ndóho patrón de. Núu súcuan te núu ruhū cácahān i jeē Satanás cúu rī, te nagā ni cuu jeē ma cahān i jeē rohó cácuu Satanás.

*Jeē ní cachi yā ndé ñn cúu jeē yūhu yó (Lc. 12.2-9)*

<sup>26</sup> Núu súcuan te ma yūhu rō coto rō ñayuu. Chí táca jñuhun cácahān sáhi i ma quendóo sáhi cuiñi, chí ndihí natūu ndijin, te cuni ñayuu. <sup>27</sup> Jñuhun ní cahān rī jín rō jeē tu ní jíní ñayuu, na nácastūhun cáji rō nuū i. Te jñuhun ní nacani sáhi rī nuū rō, na nácani jeē rō yátā táca vehe. <sup>28</sup> Te ma yūhu rō coto rō ñayuu cahni yiqui cúñu rō, chí ma cúu cahni i ánuá rō. Chí sa suhva yūhu rō jeē ma stívi rō nuū Yaā Dios, chí cuu snáhnú ndetū yā rohó jeē quívi ánuá rō jín yiqui cúñu rō infierno.

<sup>29</sup> Te táca saa chí tú yahu ndeé tí, chí nde uú tí jeē ñn centavo lulí. Te ní ñn tí tu nánga nuū ñuhun te núu tu jéhe Tátá rō jñuhun, chí ndíto ya tí. <sup>30</sup> Te nagā ni cuu rohó jijnāhan rō, chí nde ndihí ixi xíní rō je ni cahu ya. <sup>31</sup> Núu súcuan te ma yūhu rō jijnāhan rō, chí cánuú ndasí gá rō nuū yā vēsú cuehē táca saa.

*Ñayuu jejnūhún Jesucristo nuū inga ñayuu (Lc. 12.8-9)*

<sup>32</sup> Te táca ñayuu jeē cuajñuhún ruhū nuū inga ñayuu, suni súcuan cuajñuhún rī i nuū Tátá rī, Yaā ndeé andiví. <sup>33</sup> Te táca ñayuu jeē ma cuajñuhún ruhū nuū inga ñayuu, suni súcuan ma cuajñuhún rī i nuū Tátá rī, Yaā ndeé andiví.

*Jeē siquí Jesús te cusñn ini ñayuu (Lc. 12.51-53; 14.26-27)*

<sup>34</sup> Ma cáni ní rō jijnāhan rō jeē véji rī jeē cóyūcu máni ñayuu ñayiví. Tú véji rī jeē cóyūcu máni ñayuu, chí sa suhva cuajñahan i jeē siquí ruhū. <sup>35</sup> Chí jeē siquí ruhū te cusñn ini séhe yí jín tátá, te séhe síhí jín náná, te séhe jēnu jín náná chíso. <sup>36</sup> Chí táca ñayuu candije ruhū, chí jñahan vehe i cúu jeē quiñi ní nuū i.

<sup>37</sup> Te núu ndé ñn ñayuu maní gā i jín tátá i chí jín náná i vēsú jín ruhū, nasūu ñayuu vāha cúu i jeē cóndiquín i ruhū. Te núu ndé ñn ñayuu maní gā i jín séhe yí i chí jín séhe síhí i vēsú jín ruhū, te suni nasūu ñayuu vāha cúu i jeē cóndiquín i ruhū. <sup>38</sup> Te na-ni ñayuu núu tu jéhe i jñuhun ndoho i jñūndóho vēsú nde cuu i jeē siquí jeē cóndiquín i ruhū, nasūu ñayuu vāha cúu i jeē cóndiquín i ruhū. <sup>39</sup> Te núu ndé ñayuu cúní i cácu i nuū jñūndóho quiñi nuū i jeē siquí ruhū, núu súcuan te jñahnú ndetū i ní cáni. Te núu ndé ñn ñayuu vēsú na cúu i jeē siquí ruhū, te cotecu i ní cáni.

*Jeē iyó táhú yó nuū Yaā Dios (Mr. 9.41)*

<sup>40</sup> Te ñayuu cuatáhú rohó jijnāhan rō, núu súcuan te ruhū cájetáhú i. Te ñayuu cájetáhú ruhū, cájetáhú i Yaā ní tají ruhū véji rī. <sup>41</sup> Núu na-ni ñayuu cuatáhú i ñn tēe nácani jñuhun Yaā Dios, siquí jeē jica de jniñu Yaā Dios, núu súcuan te inuú-ni coo tahū de nuū Yaā Dios jín tēe nácani jñuhun Yaā Dios. Te núu na-ni ñayuu cuatáhú i ñn tēe ndaā, siquí jeē tēe ndaā cúu de, núu súcuan te inuú-ni coo tahū

de nuū Yaā Dios jīn tēe ndaa. <sup>42</sup> Te nū ndé ñayuu cuāha i vēsū ñn ñajin ndute mījin coho ñn sūchi yāha, siquī jeē cūu i sūchi cándje ruhū, ndaa ndije cūu jeē nihīn i tahū i. Achí yá.

*Jeē ní taji Juan uū tēe nuū yā  
(Lc. 7.18-35)*

## 11

<sup>1</sup> Te ná ni jīnu ni ndacu Jesús jniñu nuū ndihúxi uū tēe cáscuáha jīn yá, te ni quenda ya yūcuan cuāhān yā jeē steén yā te nacani ya jñūhun tāca ñuu región yūcuán.

<sup>2</sup> Te ñe Juan vecāa. Te ni nihīn de jñūhun tāca jniñu sāha Cristo. Te ni taji de uū tēe cáscuáha jīn de, <sup>3</sup> cuacajñūhūn de ya:

¿A máa ní cūu Cristo jeē achí tutu jeē quiji, chí condetu yó inga tēe quiji? áchí de.

<sup>4</sup> Te ni cahān yā jīn de:

Cuāngo te castūhun ró nuū Juan tāca jniñu cájito ró jīn jñūhun cájini ró. <sup>5</sup> Te cachi ró nuū de jeē ñayuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jīhí nátecu i sāha ri. Te suni nácani ri jñūhun nuū ñayuu ndahú jēe jnama Yaā Dios i. <sup>6</sup> Te yōhyo ndetu tēe jeē ma nácani yátá ni de jeē ruhū cūu Cristo. Súcan cachi ró nuū Juan. Achí yá jīn de.

<sup>7</sup> Te náa cuanuhun ndindúú tēe ún, te ni quejéé Jesús cahān yā jñūhun Juan jīn ñayuu:

¿Na vé ni jécondēhe ró jijnáhan ró nde nuū ñūhun téhé? ¿A ñn tēe jéni ñn jéni uū ni, nájnūhun ite jeē cánda sāha tachí? <sup>8</sup> Te nū tuú, ¿te na vé ni jécondēhe ró nū súcan? ¿A ñn tēe cūni cujéhu jeē ñūhun sahma lúu? Tuú chí cájini ró jeē tēe cáñuhun sahma lúu, máni ñni vehe rey cáyucú de. <sup>9</sup> ¿Te na vé ni jécondēhe ró nū súcan? ¿A ñn tēe nácani jñūhun Yaā Dios? Cahān ri jīn ró jeē suu ni jécondēhe ró, te cújéhu ga Juan yāha vēsú tāca gá tēe ni canacani jñūhun Yaā Dios. <sup>10</sup> Chí jñūhun Juan cūu jeē ni cahān Yaā Dios jeē yosó nūú tútu ñi: Taji rí tēe nacani jñūhun ri cosnūú de ichi nūú Cristo,

návāha coo túhva ñayuu jeē jinú yā. Achí Yaā Dios, achí tutu. <sup>11</sup> Te jendaá cahān rí jīn ró jeē ñni ñayiví yāha cújéhu ga Juan tēe scuándute vēsú tāca gá tēe jeē ni ñyo ñni ñayiví. Te vēsú súcan te tāca tēe nūu ga ñni ñuu nuū ndacu Yaā andiví jniñu, cújéhu ga de vēsú Juan.

<sup>12</sup> Te ndé quiví ní quee Juan tēe scuándute, te nde vijna, chí cánducú ndéyí ñayuu quívicoo i ndaha Yaā andiví jēe ndacu ya jniñu nuū i. Te nde ñayuu xeēn cánducú ndéyí i siquī. <sup>13</sup> Chí nde ná tu quiji Juan, te ni ñyo máa ley Moisés, te suni ní ñyo tāca tēe ni canacani jñūhun Yaā Dios. Te ni cacastūhūn

de ndese coo jeē ndacu Yaā Dios jniñu. <sup>14</sup> Te ni cacahān de jeē ndiji Elías. Te nūu cácani ró cuatáhú ró jñūhun, te jīn ró jeē maá Juan cūu tēe jeē ní cachi tutu jeē quiji, chí cūu de nájnūhun Elías. <sup>15</sup> Tāca rōhó jēe jīni sōho, na chūsóhó ró.

<sup>16</sup> Yāhá cachi rí ñn jñūhun yátá návāha na cūni ró ndese cūu ñayuu tiempo vijna. Cūu i nájnūhun sūchi lúli cáhīn nuū yāhu cácasiquí i. Te cácana ndee i xini jñāhan i: <sup>17</sup> Ni cativí rí scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū ró, achí i. Te nájnūhun cándāa sūchi lúli un jēe tu ní nūjnahan ni i ni ñn, súcan cándāa ró. <sup>18</sup> Chí ni quiji Juan te cuehē jīnu ni ñyo ndite ni de, te ní yéji de ni tu ní jīhi de. Te tu ní cánujnahan ni ró, chí ni cacahān ró jeē ñūhun tachí ñni de. <sup>19</sup> Yūcuán na te ni quee maá rí, Yaā ní nduu tēe, te yéji rí jīhi ri, te tu cánujnahan ni ró, te chísoó jñūhun ró cacahān ró jeē máni máa jēe yéji rí jīhi ri vino. Te quijnāhan ri jīn tēe cástútu xūhun renta jīn tāca gá tēe cásaaha cuēchi, áchí ró. Te nūu cúndichí ñn tēe jīn jñūhun Yaā Dios, te jīn jniñu sāha de te natūu jeē tēe ndichí cūu de. Achí yá.

*Jeē ní cuxeēn yā nuū sava ñuu ñhni ni  
(Lc. 10.13-15)*

<sup>20</sup> Yūcuán na te ni quejéé yá cuxeēn yā nuū tāca ñuu nuū ni sāha ya cuehē jniñu jéhu, chí tu ní cánacani ni i jeē stóo i cuēchi i. Te ni cahān yā:

<sup>21</sup> Nacá jeē xeēn ndoho ró, ñayuu ñuu Corazín. Te nacá jeē xeēn ndoho ró, ñayuu ñuu Betsaida. Chí nūu ñni ñuu Tiro jīn ñuu Sidón ni sāha ri jniñu jéhu jeē ni sāha ri ñni ñuu maá ró, te yachí nacani ni ñayuu ñuu un jēe stóo i cuēchi i nūú. Te sāha i seña jeē steén jeē nácani ni i siquī cuēchi i, chí cūhun i sahma jnūú te cūhun i yaā xini i nūú. <sup>22</sup> Nūu súcan te cáhān rí jīn ró jeē quiví coo juicio te xeēn gā coo castigo siquī ró jijnāhan ró vēsú jeē ni ñyo siquī ñuu Tiro jīn ñuu Sidón. <sup>23</sup> Te rōhó ñayuu ñuu Capernaum, ¿á cájini ni ró jeē cújéhu ró nájnūhun ñn jeē cáa cuahān ichi ándiví? Tuú chí sa nanuu ró ndé lugar nuū cáyūcu ánuá ndiyí. Chí nūu ñni ñuu Sodoma ni sāha ri jniñu jéhu jeē ni sāha ri nuū maá ró, te coo ñuu yūcuan ndé vijna nūú. <sup>24</sup> Nūu súcan te cáhān rí jīn ró jeē quiví coo juicio te xeēn gā coo castigo siquī ró vēsú jeē ni ñyo siquī ñayuu ñuu Sodoma. Achí yá.

*Nehen nuū rí ndetātu ró, achí yá  
(Lc. 10.21-22)*

<sup>25</sup> Te suni quiví un ní cahān Jesús:

Na cūtahū na nūu ni Tātā, Jitoho andiví jīn ñayiví. Chí ni jesí ní táca jñūhun ndichí ní, jeē ma cūni ñayuu ndichí jīn ñayuu túhva cuenta ñayiví yāha. Te ni steén ni nūú ñayuu cácuu nájnūhun sūchi lúli. <sup>26</sup> Chí súcan ni nujnahan ni ní Tātā, achí yá.

<sup>27</sup> Te ni cahān gā yá:

Ndivii ni jēhe Tátá rī nuū rī. Te tu cājini ñayuu ndé ñin cúu ruhū. Sēhe Yaā Dios, chí máá-ni Tátá rī cúu jeē jini yā ruhū. Ni tu cājini ñayuu ndese Yaā cúu máá Tátá, chí máá-ni Sēhe cúu jeē jini. Te iyó ñayuu jeē cuni máá Sēhe stéén yā nuū i ndese Yaā cúu Tátá yā, te máá i suni cuni i. <sup>28</sup> Tāca ró jēē ni cuíta ró jín táca jniñu jín ley jeē yí sáha jín ró, nehen quivicoo ró ndaha ri, te ndetātu ró sáha ri. <sup>29</sup> Quiví ró núu jniñu ndácu máá rí, te scuáha ró coo ró nájñuhun íyó máá rí. Chí vitá ni rī te suchí ni rī. Te súcuan te ndetātu ró jín ánuá ró sáha ri. <sup>30</sup> Chí tú yí jeē cuandetū ró nuū rī, ni tú yí jéé squicu ró jniñu ndácu ri. Achí yá.

*Jeē ní cataxín de yoco trigo quiví ndetátú  
(Mr. 2.23-28; Lc. 6.1-5)*

## 12

<sup>1</sup> Te ñin quiví ndetátú ni yáha Jesús cuahān yā nuū cáa trigo. Te tēe cáscuáha jín yá, cājil de sóco. Te ni quejéé de cátaxín de yoco trigo cáyeji de. <sup>2</sup> Te ni cajito tēe grupo fariseo, te ni cacahān de jín yá:

Condéhé, chí tēe cáscuáha jín ró casáha de jniñu jeē tu iyó váha sáha yó quiví ndetátú, achí ley Moisés.

<sup>3</sup> Te ni cahān máá yá jín de:

¿A tu ní cácahu ró tutu ndese ni sáha David, ñin quiví jeē ni jí de sóco jín tēe cáhīn jín de? <sup>4</sup> Te ni quiví de ini vehe Yaā Dios. Te ni yeji de pan íi jeē yosó ndijin nuū Yaā Dios. Te tú na ley jeē cáji de, ni tēe cáhīn jín de, chí máá-ni sutú cuu caji. Te vésú súcuan te tú na cuéchi ní iyo siquí de. <sup>5</sup> ¿Te á tu ní cácahu ró tutu ley Moisés, ndese cásájniñu sutú ini templo, vésú quiví ndetátú cúu? Te tú na cuéchi iyó siquí de, vésú quiví ndetátú cásájniñu de jniñu jeē cácuu de sutú. <sup>6</sup> Te cáhān rī jín ró jeē máá rí jeē iyó yáha, cújéñu ga rí vésú templo. <sup>7</sup> Te tu cájecūhun ni ró jijnáhan ró jñuhun yáha jeē yosó núu tútu íi jeē ni cáhān Yaā Dios: Jeē cuni gā rí cúu jeē cundáhú ni ró jnāhan ró, vésú jeē socó ró quiti nuū rī, achí yá. Te núu jeē ní cajecūhun ni ró jñuhun yáha, te ma cahān ró súcuan siquí tēe jeē tú na cuéchi núu. <sup>8</sup> Chí ruhū, Yaā ní nduu tēe, máá rí cúu jeē ndácu jniñu siquí ndese sáha ñayuu quiví ndetátú, achí yá.

*Jeē ní nduvāha tēe ni ichí ndaha  
(Mr. 3.1-6; Lc. 6.6-11)*

<sup>9</sup> Yūcuán na te cuahān Jesús, te ni quiví ya ini vehe íi sinagoga. <sup>10</sup> Te yūcuán íne ñin tēe ni ichí ñin ndaha de. Te cácu ni tēe grupo fariseo jeē nihīn de cuéchi siquí yā, te ni cacajnūhún de ya:

¿A iyó ley jeē cuu nasávāha yó ñayuu cuhú quiví ndetátú? achí de.

<sup>11</sup> Te ni cahān yá jín de:

¿Nde ñin róhó, núu névāha ró ñin lanchi, te núu nínga tí ini ñin yaū quiví ndetátú, te á tu jéhén ró natava ró tí, chí naún? <sup>12</sup> ¿Te á tu cánuú ndasí gá ñin tēe vésú ñin lanchi? Núu súcuan te vetú-ni sáha yó jniñu váha quiví ndetátú, achí yá.

<sup>13</sup> Yūcuán na te ni cahān yá jín tēe ni ichí ndaha ún:

Scaá ndaha ró.

Te ni scaá de, te ni nduvāha-ni nájñuhun íyó inga. <sup>14</sup> Yūcuán na te ni quendacoo tēe grupo fariseo, te ni candajnūhún de siquí Jesús, ndese cahni de ya.

*Jñuhun Jesús jeē ní cahān Isaías nde jeh-nahān*

<sup>15</sup> Te ni jini Jesús jeē súcuan cájeni ni de, te ni quenda ya yūcuán cuahān yā. Te cuehē ñayuu cándiquín i ya. Te ni nasávāha ya ndihí ñayuu cuhú. <sup>16</sup> Te ni ndacu ya jniñu nuū i jeē ma stéén i ya. <sup>17</sup> Te súcuan ni cuu návāha squicu jñuhun ni cahān Yaā Dios siquí Jesús, te ni nacani Isaías jñuhun ya un ndé jehahān: <sup>18</sup> Yáha cúu mozo rí jeē ní nacāji rí, te mani rí jín yá, te cúsiñ ní rí jín yá. Te cuāha rí Espíritu rí coo jín yá.

Te máá yá sándaā jniñu ñayuu táca nación.

<sup>19</sup> Ma tejnáhan ya, ni ma cána jee ya,

te ni ma cahān jee ya ichí jeē cuni ñayuu.

<sup>20</sup> Ma sáha xeēn yá jín ñayuu ni cunihin jñundóho siquí,

ni ma snáá yá ñayuu jeē máá lulí-ni cácandíje. Chí cujéñu ya siquí ndihí, te ndaā ndacu ya jniñu.

<sup>21</sup> Te ñayuu táca nación cocuhun ni i jeē jnāma ya i.

Achí Yaā Dios, achí Isaías nde jehahān.

*Jeē ní cacahān de jeē jeniñu ya fuerza Satanás*

*(Mr. 3.19-30; Lc. 11.14-23; 12.10)*

<sup>22</sup> Yūcuán na te ni caquindeca i nuū yá ñin tēe cuáá ñihán, chí ñuhun tachí ini de. Te ni nasávāha ya de. Te ni ndundijin tinū de te ni nacahān de. <sup>23</sup> Te ndihí ñayuu cuehē un ní canaa ni i cájito i, te ni cacahān i:

¿A tēe yáha cúu jeē ní cahān Yaā Dios jeē cacu nuū yucūn David? achí i.

<sup>24</sup> Te tēe grupo fariseo, ni cajini de jeē súcuan cacahān i. Te ni cacahān de:

Tēe yáha ma cúu quenehen de tachí núu jeē tu sáha de jín fuerza Satanás jeē cujéñu nuū tachí, achí de.

<sup>25</sup> Te Jesús ni jini yá jeē súcuan cájeni ni de, te ni cahān yá jín de:

Táca nación jeē casásñin máá te cájejnáhan máá, núu súcuan te snáá jeē iyó yáha máá. Te núu ñin ñuu chí ñin vehe cásásñin máá te cájejnáhan máá, te ma cúu ga coyūcu cáhnu. <sup>26</sup> Te suni súcuan Satanás núu quénehen jnāhan tachí, núu súcuan te sásñin máá. ¿Te ndese cuiñí nihin Satanás jeē ndácu jniñu núu súcuan? <sup>27</sup> Chí cacahān ró jeē jín fuerza



Satanás quénehen ri tachī. Te núu súcuan cúu núu, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni ró? Núu súcuan te máá i jijnáhan i cachi jeē ní castívi ndasí suhva ró ni cacahān ró jeē cáquenehen ri tachī jíin fuerza Satanás. <sup>28</sup> Te tuú chi sa jíin Espíritu Yaā Dios cúu jeē quénehen ri tachī. Núu súcuan te je ndéé Yaā Dios mēñu ró jeē ndácu ya jniñu.

<sup>29</sup> ¿Chi ndese cuu quívi ñn tēe ini vehe tēe ndacuī jeē quenehen de ndajniñu de? Chi cánuú jeē xíhna gā cuhni de tēe ndacuī ún, te yūcuán na te cuu quenehen de ndajniñu ún. Te suni súcuan cúu jeē jíhni rī Satanás te quénehen ri tachī.

<sup>30</sup> Te ñayuu tu iyó máni jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vejicoo nuū rī.

<sup>31</sup> Jeē yúcuan cáhan rī jíin ró: Iyó modo coo jñuhun cáhnu ni nuū táca cuéchi cásaña ñayuu, jíin núu táca jñuhun neé cácahan i. Te núu cahān ndevāha i siquī Espíritu Santo, te ma cóne cáhnu ni Yaā Dios nuū i. <sup>32</sup> Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquī Espíritu Santo, ma cóne cáhnu ni Yaā Dios nuū i, ni jeē iyó i ñayāvi yáha, ni ñá tiempo quíji.

*Jñuhun yujnu váha jíin yujnu néé*  
(Lc. 6.43-45)

<sup>33</sup> Núu yujnu váha, te váha ndehē, te núu yujnu neé, te cánéé ndehē. Chi jíin ndehē te jini yó ndese yujnu cúu. Te suni súcuan ñayuu. <sup>34</sup> Va sēhe coō cácuu ró, chi xeēn rō nájñuhun coō. ¿Ndese cuu cahān rō jñuhun váha, chi ñayuu cásaña neé cácuu ró? Chi jniñu jeē jéni ni anuá ñayuu, máni yūcuán cáhán i. <sup>35</sup> Tēe váha cáhán de jñuhun váha, chi iyó ndáa anuá de. Te tēe sáha neé cáhán de jñuhun neé, chi cánéé anuá de. <sup>36</sup> Te cáhán rī jíin ró jeē táca na-ni jñuhun cácahan ñayuu, nacuaña i cuenta jñuhun un quívi coo juicio. <sup>37</sup> Chi jíin jñuhun ni cahān rō sándaā yā siquī ró, núu jeē quéndōo ndaa rō chí jéé cóndee cuéchi siquī rō. Achí yá.

*Jeē ní cajicān ñayuu tu cácañdije ñn jniñu jéhnu*

(Mr. 8.12; Lc. 11.29-32)

<sup>38</sup> Yūcuán na te jecu tēe grupo fariseo jíin tēe cástéén tutu ley Yaā Dios, ni cacahān de jíin yá:

Maestro, cácuni na jéé sáha ní ñn jniñu jéhnu jeē steén núu máá ní cúu Yaā ní tají Yaā Dios, achí de.

<sup>39</sup> Te ni cahān yā jíin de:

Ñayuu yáha jeē casáha jniñu neé, tu cájetáhu cuiti i Yaā Dios. Te cájicān i ñn jniñu jéhnu jeē steén núu Yaā ní tají Yaā Dios cúu rī. Te tuá na inga jniñu jéhnu steén rī nuū i, chí máá-ni jniñu jéhnu nájñuhun ni cuu jíin

Jonás, tēe ni nacani jñuhun Yaā Dios. <sup>40</sup> Chi nájñuhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone ri chíji ñuhun unī nduú unī ñuú, te sáa te natecu rī. <sup>41</sup> Te táca ñayuu ñuu Nínive nuū ní nacani Jonás jñuhun, natecu i jíin ñayuu tiempo yáha, quívi juicio jeē sándaā yā cuéchi, te cahān i cuéchi siquī ñayuu yáha. Chi máá i ni canacani ni i ni castóo i cuéchi i quívi ní nacani Jonás jñuhun nuū i. Te vijna chi cújéhnu ga ruhū Yaā íne yáhá vesú Jonás, te tu cácañdije ró ruhū. <sup>42</sup> Te reina jeē ní cujéhnu nación ichi sur, natecu ña jíin ñayuu tiempo yáha, quívi juicio jeē sándaā yā cuéchi, te cahān ña cuéchi siquī i. Chi nde jíca téyí ní quíji ña ni jini nahín ña jñuhun ndíchí ní cahān rey Salomón. Te vijna chi cújéhnu ga ruhū, Yaā íne yáhá vesú Salomón, te tu cácañdije ró ruhū.

*Tachí jeē nastútú jñahan ndévi ini ñayuu*  
(Lc. 11.24-26)

<sup>43</sup> Núu ni quenda ñn tachí ini ñn tēe tu cándije, te jíca cuu nuū ñuhun tēhé, nducú núu ndétátú, te tu nihín, yūcuán na te jéni ní maá: <sup>44</sup> Na quínuhun rī vehe nuū ní quenda rī. Te núu ni ndee tucu, te jíto jeē tēe tu cándije ún, cúu de nájñuhun ñn vehe iyú te ni ndundoo. <sup>45</sup> Yūcuán na te jequihin uxá gā tachí neé gá vesú maá. Te quívicoo ini tēe un jéé cóyūcu yúcuan. Núu súcuan te xeēn gā ndoho tēe un jéé sándihí vesú jeē xíhna ñuhún. Te suni súcuan ndoho ñayuu tiempo yáha jeē casáha neé. Achí yá.

*Náná yá jíin ñani yá*  
(Mr. 3.31-35; Lc. 8.19-21)

<sup>46</sup> Te níni súcuan cáhán yā jíin ñayuu ún, te ni quee naná yá jíin táca ñani yá, íin ña nuū quéhe, te cúní ña cahān ña jíin yá. <sup>47</sup> Te ni cachi ñn tēe nuū yá:

Náná ní jíin táca ñani ni cáhíin nuū quéhe, te cácuni cahān jíin ní, achí de.

<sup>48</sup> Te ni cahān yā jíin tēe ni cahān súcuan jíin yá:

¿Ndé ñn cúu náná rī, te ndé ñn cácuu ñani rī? Achí yá.

<sup>49</sup> Te ni steén ndaha yá nde nuū cáyūcu tēe cáscuáha jíin yá. Te ni cahān yá:

Suni náná rī jíin ñani rī cácuu táca jéé yáha.

<sup>50</sup> Chi táca ñayuu casquícú jniñu cúní maá Tátá rī, Yaā ndeé andívi, suu cácuu ñani rī, cuáha rī, náná rī. Achí yá.

*Jñuhun yátá siquī tēe jéte trigo*  
(Mr. 4.1-9; Lc. 8.4-8)

## 13

<sup>1</sup> Te quívi un ní quenda Jesús vehe cuahān yá, te ni jinū yá ní cucōo ya yumar. <sup>2</sup> Te ni cutútú cuéhē ndasí ñayuu nuū yá. Te ni quívi ya ini ñn barco, ni cucōo ya. Te táca ñayuu un cáyūcú i yumar. <sup>3</sup> Te jíin jñuhun yátá ní

cahān yā cuehē jñuhun nuū i, te súcuan ni cahān yā:

¶ In tēe cate trigo, ni quenda de jeē cáte de.  
<sup>4</sup> Te ná ni quejéé de jéte de, te jecu trigo ni jité yuhíchi. Te ni quecoo saa, ni cayeji tī.  
<sup>5</sup> Te jecu gā trigo ni jité nuū ñuhun yuū, nuū tú cuehē ñuhun. Te yachī-ni ni cane, chi tu cóquin ñuhun.  
<sup>6</sup> Te nuū ní cane niāndii, te ni ichī-ni, te ni casun, chi tu ní níhín nuū quihín yoho.  
<sup>7</sup> Te jecu gā trigo ni jité nuū náne iñu. Te ni jehnu iñu ún, te ni jesi nuū.  
<sup>8</sup> Te jecu ni jité nuū ñuhun váha, te ni jēhe cuehē nunī. Sava ni jēhe ciento jeē ñin ñin, te sava ni jēhe unī xico, te sava ga ni jēhe ocō uxī.  
<sup>9</sup> Tāca rōhó jēé jīni sōho, na chúsóhó ró. Achí yá.

*Najehē cahān yā mání jñuhun yátá*  
 (Mr. 4.10-12; Lc. 8.9-10)

<sup>10</sup> Yūcuán na te tēe cáscuáha jíin yá un ní quecoo de nde nuū yā, te ni cacajñuhun de ya:

¿Najehē cúu jeē mání jñuhun yátá cáhán ni jíin ñayuu? achí de.

<sup>11</sup> Te ní cahān yā jíin de:

Róhó jíjnáhan ró chí sáha ya jeē cájecūhun ni rō jñuhun ni yisáhi yáha, ndese quívicoo ñayuu ndaha Yaā andiví jeē ndacu ya jñiñu nuū i. Te ñayuu yáha jeé tu cácanjíje, chí ma jécūhun ni i.  
<sup>12</sup> Chí ñayuu je jécūhun ni, chí stéén gā yā nuū i, te víhyá gā cuni i. Te ñayuu tu cándíje, sa suhva naa jecu jeé je jíni i ún.  
<sup>13</sup> Jeé yūcuan cáhán rī jñuhun yátá jíin i. Chí vésú cájito i, te quendōo i nájñuhun jeé tú na vé ni cájito i. Te vésú cájini sōho i, te ma jécūhun ni i, te quendōo i nájñuhun jeé tú na vé ni cájini i.  
<sup>14</sup> Ñayuu yáha chí síquī unī jñuhun ni cahān Yaā Dios jeé ní nacani Isaías, tēe ni nacani jñuhun nde jenahán: Vésú cuni nahín ró, te ma jécūhun ni rō, te vésú coto ró, te ma náculi rō.

<sup>15</sup> Chí ñayuu yáha yōhoyi ni ndunihni ni i, te yōhoyi uhū chusóhó i, te nájñuhun cájesi i tinūú i, náváha coo nájñuhun jeé tu cájito i, ni tu cájini nahín i, te ni ma jécūhun ni i, ni ma násāma ini i quívicoo i nuū rī jeé nasávāha ri anuá i nuū cucéchi i. Achí Yaā Dios, achí tutu.

<sup>16</sup> Te máá ró jíjnáhan ró, yōhoyi ndetū rō, chí cájito ró jíin tinūú ró, te cájini nahín ró jíin sóho ró.  
<sup>17</sup> Chí jendaá cahān rī jíin ró jeé cuehē tēe ni canacani jñuhun Yaā Dios jíin cuehē tēe ndaā, ni cacuni de coto de jeé cájito máá ró, te tu ní cájito de. Te suni ni cacuni de cuni sōho de jeé cájini sōho máá ró, te tu ní cájini de. Achí yá.

*Jeé ní castūhun cáji yá jñuhun yátá tēe jéte trigo*

(Mr. 4.13-20; Lc. 8.11-15)

<sup>18</sup> Nūu súcuan te cuni nahín jíjnáhan ró na vé cuni cahān jñuhun yátá tēe jéte trigo:

Trigo un cúu jñuhun Yaā Dios.  
<sup>19</sup> Te ñayuu cájini sōho jñuhun ndese ndácu Yaā andiví jñiñu, núu tu cájecūhun ni i te cácuu i nájñuhun trigo jeé ni jité yuhíchi. Yūcuán na te quíji jexeén te quēnde-ni jñuhun ini anuá i.  
<sup>20</sup> Te trigo jeé ni jité nuū ñuhun yuū cúu nájñuhun ñayuu cájini sōho jñuhun, te yachi-ni cájetáhú i te cácusii ni i jíin.  
<sup>21</sup> Te tu cúcutú jñuhun ún ini anuá i, te jecu-ni quiví cájetáhú i. Te núu ni quejéé jñundóho, chí jíto xeēn ñayuu i síquī jñuhun ún, te quejéé nácani yátá ni i.  
<sup>22</sup> Te jeé ni jité nuū náne iñu cúu ñayuu cájini nahín jñuhun, te cándihvī ni i síquī jeé iyó ini ñayiví yáha, te cúní i cucucá i, te stáhú un i cujñeñu i jíin. Te ndihí jeé yáha jési nuū jñuhun ya, te tu íje i jíin jñuhun ya.  
<sup>23</sup> Te trigo jeé ni jité nuū ñuhun váha cúu nájñuhun ñayuu cájini nahín jñuhun, te cájecūhun ni i, te cáhije i jíin jñuhun ya. Te sava i cúu nájñuhun nunī jeé jēhe ciento jeé ñin ñin, te sava ga i jēhe unī xico, te sava ga i jēhe ocō uxī. Achí yá.

*Jñuhun yátá síquī ite lasú*

<sup>24</sup> Te ní cahān yā inga jñuhun yátá jíin de:

Jeé ndácu Yaā andiví jñiñu cúu nájñuhun ñin tēe jeé ní jete de trigo váha nuū ñuhun de.  
<sup>25</sup> Te iyó ñin tēe jíto uhū de tēe chíi trigo. Te náa cáquixi tēe chíi trigo jíin táca jñáhan de, te ni jehēn ni jete ndiquin lású nuū trigo de, te cuahān.  
<sup>26</sup> Te nuū ní cane trigo ún, te ni cane yoco i, te suni súcuan ni jehnu ite lasú un.  
<sup>27</sup> Yūcuán na te ni jengoo mozo ni cacahān i jíin patrón i: ¿A násūu trigo váha ní jéte ní núu ñuhun ni? ¿Te ndese cúu jeé ní canecoo ite lasú nuū? <sup>28</sup> Te ní cahān de jíin i: In tēe jíto uhū ruhū ní sáha jeé yáha. Te ni cacahān mozo un jíin de: ¿Núu súcuan te á cúní ni jéé na quíngoo ná te jñuhun ná? achí i.  
<sup>29</sup> Te ní cahān de: Tuú, chí núu jñuhun ró lású un te sanaa te jñuhun ró ndé jíin trigo.  
<sup>30</sup> Váha ga na cuēhnu máá ndé quiví tahndé. Te quiví un cáhán rī jíin tēe cahnde jeé xihna gā ite lasú cahnde de, te chucú tútú de náváha cahnu yó. Yūcuán na te trigo chí cahnde de ndiví ini yacá rī, achí de. Achí yá.

*Jñuhun yátá síquī ndiquin mostaza*  
 (Mr. 4.30-32; Lc. 13.18-19)

<sup>31</sup> Te suni ní cahān yā inga jñuhun yátá jéé steén yā ndese ndúcuehē ñayuu ndácu Yaā andiví jñiñu nuū:

Ndúcuehē i nájñuhun jéhnu ñin ndiquin mostaza jeé ní jequín ñin tēe nuū ñuhun de.  
<sup>32</sup> Te jendaá jeé ñin ndiquin lúli gá cúu vésú táca gá ndiquin. Te núu ni jehnu. Te cúu cáhnu ga vésú táca gá yucū, chí ndúu nájñuhun ñin yujnu. Te quíjicoo saa, te cásáha tí tacá tī chíji ndaha ún. Achí yá.

*Jñuhun yátá síquī levadura*  
 (Lc. 13.20-21)

<sup>33</sup> Te inga jñuhun yátá ní cahān yā jíin de:

Jeē ndácu Yaā andiví jniñu nuū ñáyuu cūu nájñuhun levadura jeē ní quihin ññ ñahan. Te ni saca ña jjiñ úní kilo harina, nde ni ndaa ndihí ññen ni sáha. Achí yá.

*Jeē máni jñuhun yátá cáhán yā jiín i*  
(Mr. 4.33-34)

<sup>34</sup> Tāca jñuhun yáha ní cahān Jesús jiín ñáyuu cuehē ún. Te tāca jéē ní stéén yā, máni jñuhun yátá ní cahān yā jiín i. <sup>35</sup> Súcuan ní sáha ya návāha squícu jñuhun ní cahān tēe ní nacani jñuhun Yaā Dios nde jenahán:

Cahān rí tāca jñuhun yátá jiín ñáyuu, te cachí rí tāca jñuhun yísahí ndé quiví ní jecōo ñayiví. Achí tutu, achí yá.

*Jeē ní castūhun cáj yá jñuhun ite lasú*

<sup>36</sup> Yūcuán na te ní nacuatáhu Jesús nuū ñáyuu. Te ní ndiví ya ini vehe. Te tēe cácuáha un ní jinūcoo de nuū yá, te ní cacahān de jiín yá:

Nacani cáj ní jñuhun yátá ite lasú nuū ná, achí de.

<sup>37</sup> Te ní cahān yā jiín de:

Jeē jete trigo vāha un cūu máá rí, Yaā ní nduu tēe. <sup>38</sup> Te ñuhun un cūu ñayiví. Te trigo vāha un cūu ñayuu cáyihí ndaha Yaā Dios jeē ndácu ya jniñu nuū i. Te ite lasú un cūu ñayuu cáyihí ndaha jexeén. <sup>39</sup> Te tēe jito uhū jeē ní jete lasú un cūu máá jéxeén. Te quiví tahndé cūu quiví jínu ñayiví. Te tēe cahnde un cácuu ndajéhé Yaā Dios. <sup>40</sup> Te nájñuhun tahndé ite lasú te cayū nuū ñuhún, súcuan coo quiví jínu ñayiví. <sup>41</sup> Chi máá rí, Yaā ní nduu tēe, tají rí ndajéhé rí quingoo. Te nastútú yá tāca ñáyuu casquíví jñahan nuū cuéchi, jiín ñáyuu casáha jniñu néé, quenehen ya i mehñu ñáyuu ndácu rí jniñu nuū. <sup>42</sup> Te jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeén i. <sup>43</sup> Yūcuán na te ñayuu squícu nuū yā chi ndindéé i nájñuhun niāndii, te coyūcú i nuū ndácu máá Tátá i jniñu. Tāca róhó jéē jini sōho, na chúsóhó ró.

*Jñuhun yátá siquī yejñū xūhún jeē yísahí*

<sup>44</sup> Te jeē ndácu Yaā andiví jniñu nuū ñáyuu, suni cūu nájñuhun ññ yejñū xūhún jeē yísahí chíji ññ ñuhun. Te ní nanihñ ññ tēe, te ní nacasí tucu de siquī. Te jeē cúsiñ ní de jiín, te ní jehēn de ní xicó ndihí de jeē névāha de, te ní jeen de ñuhun ún.

*Jñuhun yátá siquī perla jeē ndeé yahu*

<sup>45</sup> Te jeē ndácu Yaā andiví jniñu nuū ñáyuu, suni cūu nájñuhun ññ tēe jéén xico, te ndúcú de perla vāha. <sup>46</sup> Te ní jini de ññ perla jeē yáhu ndasí, te ní jehēn de ní xicó ndihí de jeē névāha de, te ní jeen de perla un.

*Jñuhun yátá siquī ñunu jñú chācá*

<sup>47</sup> Te jeē ndácu Yaā andiví jniñu nuū ñáyuu, suni cūu nájñuhun ññ ñunu jeē cásiñgava de ini mar, te quivícoo ndinuū

chācá. <sup>48</sup> Te núu ní chítú ñunu ún, te cánatava de yundúte. Te cácuōo de cáncāji de chācá. Te chācá vāha cájnaa de ini jīca, te chācá tú vāha cáscāne de. <sup>49</sup> Te suni súcuan coo quiví jínu ñayiví. Chi quijicoo ndajéhé yā, te sásññ ya ñayuu casáha jniñu néé mehñu ñáyuu casáha jniñu vāha. <sup>50</sup> Te ñayuu cunéé chí jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeén i. Achí yá.

*Jñuhun yátá siquī ndajññū ndeé yahu*

<sup>51</sup> Te ní cajñuhun yá de jijnáhan de:

¿A ní cajecūhun ní rō tāca jñuhun yáha, chí tuú? achí yá.

Te ní cacahān de jiín yá:

Ni cajecūhun ní ná, achí de.

<sup>52</sup> Te ní cahān yā jiín de:

Iyó vāha núu súcuan. Te ññ tēe stéén tutu ley Yaā Dios, núu je ní cutūhva de ndese ndácu Yaā andiví jniñu, te cūu stéén de tāca jñuhun siquī ún. Chi cūu de nájñuhun ññ tēe chí vehe. Te ini yejñū de táva de ndajññū ndeé yahu, sava jeē jeē jiín sava jeē je ní cunahán iyó. Achí yá.

*Jeē cuánuhun yā ñuu Nazaret*

(Mr. 6.1-6; Lc. 4.16-30)

<sup>53</sup> Te ná ní ndihí ní cahān Jesús tāca jñuhun yátá yáha, te ní quenda ya yūcuan cuáhān yā. <sup>54</sup> Te ní najinñ yā ñuu yā Nazaret. Te ní stéén yā jñuhun ini vehe ññ sinagoga yūcuán. Te ní canaa ní ñayuu cájini nahñ i, te ní cacahān i:

¿Ndeé nuū ní cutūhva tēe yáha tāca jñuhun ndichí? ¿Te ndese cūu sáha de tāca jniñu jéhnu yáhá? <sup>55</sup> Chi sēhe carpintero cūu tēe yáha, te náná de cūu María, te ñani de cácuu Jacobo, José, Simón, jiín Judas. <sup>56</sup> Te suni cáyūcu cuáha de jiín yó yáhá. ¿Te ndese jini de tāca jñuhun yáha núu súcuan? Achí ñayuu.

<sup>57</sup> Te súcuan ní cacujéé ní i nuū Jesús. Te ní cahān yā jiín i:

Tāca tēe nacani jñuhun Yaā Dios, iyó yññuhún ñayuu jiín de, te máni ñayuu ñuu máá de jiín ñáyuu vehe máá de cūu jeē tu iyó yññuhún jín de. Achí yá.

<sup>58</sup> Te tu ní sáha ya cuehē jniñu jéhnu yūcuán, chí tu cáncāñje i ya.

*Jeē ní jññ Juan tēe scuándute*

(Mr. 6.14-29; Lc. 9.7-9)

## 14

<sup>1</sup> Te tiempo yūcuan te Herodes, tēe ndácu jniñu región Galilea, ní jini jñuhun de jñuhun Jesús. <sup>2</sup> Te ní cahān de jiín ñáyuu cáñññ jiín de:

Tēe yūcuan cūu Juan tēe ní scuándute, te ní natecu de. Jeē yūcuan iyó poder de sáha de jniñu jéhnu. Achí de.

<sup>3</sup> Chi Herodes, je ní ndacu de jniñu jeē ná quiví Juan vecā, jiín jéē ná cónuhñ de jiín cadena. Súcuan ní sáha de jeē siquí Herodías,

ñasihí ñani de Felipe. <sup>4</sup> Chi Juan ni cahān de nuū Herodes:

Tu iyó ley condeca ró ña, áchí de.

<sup>5</sup> Te jeē yúcuan ní cuni Herodes cahni de Juan. Te yúhú de jeē quiti ní ñayuu, chí ndihi i jéni ndije ni i jeē in tēe nácani jñūhun Yaā Dios cúu Juan. <sup>6</sup> Te in quiví ní sáha Herodes in vico quiví ní cacu de. Te sēhe síhí Herodías ní quiví i ní jita jéhé i nuū ñayuu ní cana de ún. Te ni cusí ní Herodes ní sáha i. <sup>7</sup> Te ni jejnūhun téyí de jeē cuáha de nuū na vé cacān i nuū de. <sup>8</sup> Te ni jehēn i ní cajñūhún i náná i na vé cacān i. Te ni ndāvi i nuū Herodes, te ni cahān i:

Cuáha ní xíní Juan tēe scuándute, cone nuū in cohō, achí i.

<sup>9</sup> Yūcuán na te rey Herodes ní cucuíhyá ní de. Te siquí jeē ní jejnūhun téyí de, jíin jéē ní cajini sóho tēe cáyeji staā jíin de, jeē yúcuan ní ndacu de jniñu jeē na cuáha nuū i. <sup>10</sup> Te ni taji de soldado jeē na quícahnde xíní Juan ini vecāa. <sup>11</sup> Te ní quee soldado un jíin xíní Juan, ine nuū in cohō, te ní jēhe nuū súchi síhí un. Te máá i ní jendeca i nuū naná i.

<sup>12</sup> Yūcuán na te ní jengoo tēe cáscuáha jíin Juan, te ní candonehen de yiqui cúñu Juan, te ní cachindúji de. Yūcuán na te ní jengoo de ní cacastūhún de nuū Jesús.

*Jeē ní scáji yā uhūn mil tēe*

(Mr. 6.30-44; Lc. 9.10-17; Jn. 6.1-14)

<sup>13</sup> Te ná ní jini Jesús jñūhun, te ní cujiyo ya yúcuan cuáhān yā jíin barco, jeē cóne sún ya in lugar nuū tú ñayuu. Te ní cajini ñayuu jeē cuáhān yā. Te táca ñuu ní quendacoo i cájica jéhé i, cuajnahān i ya. <sup>14</sup> Te nuū ní quenda Jesús ini barco, te ní jito ya ñayuu cuehē ún. Te ní cundáhú ní yā i, te ní nasávāha ya táca ñayuu cácuñu jeē véjicoo i jíin. <sup>15</sup> Te nuū ní ini, te tēe cáscuáha jíin yā, ní quecoo de nuū yā, te ní cacahān de:

Je ní ini, te yāhá chí tú na ñayuu yúcu. Núu súcuan te taji ní ñayuu na quíngoo i táca ñuu, te cuaan i jeē cáji i.

<sup>16</sup> Te ní cahān Jesús jíin de:

Tu jini ñūhún quíngoo i, chí cuáha máá ró jeē cáji i, achí yā.

<sup>17</sup> Te ní cacahān de jíin yā:

Tú na vé cánevāha ná yāha, chí uhūn-ni staā jíin úu-ni chācá, achí de.

<sup>18</sup> Te ní cahān yā jíin de:

Cuáha na quíji, achí yā.

<sup>19</sup> Te ní cahān yā jíin ñayuu un jéē na cúcōo i nuū ite. Te ní quihín ya ndihúhún staā jíin úu chācá un. Te ní ndacoto ya ichi ándiví, te ní nacuatáhú yā. Te ní tahú cuéchí yā staā ún, te ní jēhe ya nuū tēe cáscuáha jíin yā. Te máá de ní casaja de nuū ñayuu cuehē ún. <sup>20</sup> Te ndivii i ní cayeji, te ní candutú chíji i. Te ní canastútú de pedazo jeē ní quendōo, te ní chitú úxí uū jica. <sup>21</sup> Te tēe ní cayeji un cúu

nájñūhun uhūn mil, te sún ga cúu ñāhan jíin súchi lúli.

*Jeē ní jica jéhé yā nuū mar*

(Mr. 6.45-52; Jn. 6.16-21)

<sup>22</sup> Yūcuán na te ní cahān-ni Jesús jíin tēe cáscuáha jíin yā jeē na quívicoo de barco, te cosnúu de quíngoo de nde inga lado mar, níni jéē nātaji yā ñayuu un quíngoo i. <sup>23</sup> Te nuū ní cuu ní nacuatáhú yā nuū i, te máñūhún-ni ya ní caa ya yucu, cuacacān tahú yā. Te ní cuaa, te ine máñūhún yā yūcuán. <sup>24</sup> Te barco un, je ní cuu sava nuū mar cuahān. Te ndute mar un nátundahá níhin barco, chí vēji tachí ichi núu de. <sup>25</sup> Te jeē yinee ga ní quee Jesús nuū de, jica jéhé yā nuū mar. <sup>26</sup> Te tēe cáscuáha ún, ní cajito de ya jeē jica ya nuū mar. Te ní candondava de, te ní cacana cóho de jeē cáyūhú de.

Jíhná cúu, achí de.

<sup>27</sup> Te ní cahān-ni Jesús jíin de:

Ndeyí coo ní rō, te ma yūhu ró, chí máá rí cúu, achí yā.

<sup>28</sup> Yūcuán na te ní cahān Pedro jíin yā:

Núu máá ní cúu, te cahān ní jíin ná jéē na cáca jéhé ná nuū mar te jeē na núu ní, achí de.

<sup>29</sup> Te ní cahān yā:

Nehen núu súcuan, achí yā.

Te ní quenda Pedro ini barco, te ní jica de nuū ndute cuahān de nuū Jesús. <sup>30</sup> Te nuū ní jini de jeē níhin yhi tachí, te ní yúhú de. Te ní quejéé de queé de chíji ndute. Te ní cana cóho de:

Jnama ní saña, achí de.

<sup>31</sup> Te Jesús ní jni-ni ya ndaha de. Te ní cahān yā jíin de:

Tēe tu cándije níhin cúu ró. ¿Naun ní nayūhu ró? Achí yā.

<sup>32</sup> Te ní quiví ya ini barco un jíin de, te ní jecuíñi-ni tachí. <sup>33</sup> Yūcuán na te tēe cáhiin ini barco un, ní cajecuíñi yití de nuū yā. Te ní cacahān de:

Jendaā ndije jeē Sēhe Yaā Dios cúu ní, achí de.

*Jeē ní nasávāha ya ñayuu cácuñu región Genesaret*

(Mr. 6.53-56)

<sup>34</sup> Te ní quenda jíyo ya jíin de nuū mar un, ní jinú yā región Genesaret. <sup>35</sup> Te ñayuu yúcuan ní canacuni i ya. Te ní cascáca i jñūhun táca ndañúu yúcuan jéē ní jinú yā. Te ñayuu ní caquindeca i ñayuu cácuñu nuū yā. <sup>36</sup> Te ní cacahān ndahú i jíin yā jeē na quéhé i vesú yúsáhma ya. Te táca ñayuu jeē ní caquehé sahma ya, ní canduvāha i.

*Siqú ndese cújnehén ñayuu*

(Mr. 7.1-23)

## 15

<sup>1</sup> Yūcuán na te jecu tēe grupo fariseo jíin tēe cástéén tutu ley Yaā Dios, ní quendacoo

de ñuu Jerusalén, te ni quecoo de nuū yā. Te ni cacahān de jín yā:

<sup>2</sup> Tēe cáscuáha jín ró, ¿naun cástívi de costumbre jeē ní cajequin ñayuu jenahán? Chi tu ní cáscuicu de costumbre jeē nándahá de nuū yā te caji de staā. Achí de.

<sup>3</sup> Te Jesús ni cajñuhun yá de:

Te máá ró jijnáhan ró, ¿sumi naun cástívi ró jñiñu ní ndacu Yaā Dios nuū rō? Chi sa costumbre máá ró cúu jeē casquicu ró. <sup>4</sup> Chi ni cahān Yaā Dios: Coó yíñúhún ró jín tátá ró jín náná ró. Te núu ndé ñin cahān siquī tátá chí siquī naná, na cúu nahín, áchí Yaā Dios. <sup>5</sup> Te máá ró chí cacahān ró jeē cuu cahān ñin tēe jín tátá de jín náná de: Ma cúu chindéé ñahán ná nhín cuáha na jeē caji ni jeē cúhun ní, chí ndíhi jeē névaha ná, je ni socó na nuū Yaā Dios. <sup>6</sup> Te tēe cahān súcuán, tuá cánuú chindéé ñahán de tátá de náná de, áchí ró jijnáhan ró. Te súcuán cástívi ró jñiñu ní ndacu Yaā Dios, jeē siquī costumbre ni cajequin máá ró. <sup>7</sup> Tēe cáhú-ñi cácuu ró. Ndaā ní nacani Isaías jñuhun siquī rō nde jenahán, yósó nuū tútu ñi jeē ní cahān Yaā Dios:

<sup>8</sup> Ñayuu yáha chí máá yuhu-ñi i cájetáhú i ruhū,

te nasūu ndé jín ini jín ánuá i.

<sup>9</sup> Te cáchiñúhún sáa-ñi i ruhū, chí jñuhun cástéén i cúu jñiñu ní candacu tēe, te nasūu jeē ní ndacu máá rí cúu. Achí Yaā Dios. Achí yá.

<sup>10</sup> Te ni cana ya ñayuu cuehē ún, te ni cahān yā jín i:

Cuni sōho vāha jijnáhan ró, te chuhun ni rō: <sup>11</sup> Nasūu jeē quívi ini yuhu ñayuu cujnéhén i sáha. Chí jñuhun jeē quenda yuhu i, yūcuán cúu jeē cujnéhén i sáha, áchí yá.

<sup>12</sup> Yūcuán na te tēe cáscuáha jín yá, ni quecoo de nuū yā, te ni cacahān de:

¿A jín ní jeē ní caquití ni tēe fariseo jeē ní cajini sōho de jñuhun ni cahān ní? áchí de.

<sup>13</sup> Te ni cahān máá yá:

Cácuu de nájñuhun yujnu jeē tu ní náchuhun Tátá rí, Yaā ndéé andívi, te ñin quívi te jñuhun ya quihín. <sup>14</sup> Na quíngoo máá de. Chí cácuu de nájñuhun tēe cuáá cástéén ichi nuū inga tēe cuáá. Chí núu ñin tēe cuáá stéén de ichi nuū inga tēe cuáá, te ndindúú de inga de xehvā. Achí yá.

<sup>15</sup> Te ni cahān Pedro jín yá:

Castūhun caji ní jñuhun yátá yáha nuū na jijnáhan ná, áchí de.

<sup>16</sup> Te ni cahān Jesús:

¿Te á suni máá ró ná tu jecūhun ni rō chí naun? <sup>17</sup> ¿A tu cájecūhun ni rō jeē táca jeē yéji ñayuu, chí quívi chíji i, te quenda-ñi cuahān? <sup>18</sup> Te jñuhun jeē quenda yuhu ñayuu, chí nde ini anuá i véji, te yūcuán cúu jeē cujnéhén i sáha. <sup>19</sup> Chí nde ini anuá ñayuu quenda jeē jéni néé ni, jeē jéni ndívi, jeē casíqui ndéé jñáhan, jeē jica jnéni, jeē saculhá, jeē cahān

jñuhun stáhú, jeē cahān yā siquī jñáhan. <sup>20</sup> Táca jeē yáha cúu jeē cujnéhén ñayuu sáha. Te núu tu siquicu i costumbre jeē nándahá i te caji i staā, tu cúnéhén i sáha. Achí yá.

*Ñahan inga nación jeē ní candíje ñihin (Mr. 7.24-30)*

<sup>21</sup> Te ni quenda Jesús yūcuán cuahān yā región Tiro jín Sidón. <sup>22</sup> Te ñin ñahan ñuu Canaán, néne ña región Tiro jín Sidón, te ni quee ña nuū Jesús. Te ni cana jee ña:

Tátá, Sehe yucūn David, cundáhú ni ni sáña víi. Chí sēhe síhí ná, ñuhun tachí ini i, te yóhyo xeén ndóho i, áchí ña jín yá.

<sup>23</sup> Te tu ní cahān cuiti yā jeē ní cahān ña. Yūcuán na te ni quecoo tēe cáscuáha jín yá, te ni cacahān de:

Cahān ní jín ña na quihín ña, chí cána jee ña véji ña yatā yō, achí de.

<sup>24</sup> Te ni cahān yā jín ña:

Nuū maá-ñi ñayuu nación Israel ni tají Yaā Dios sáña véji ná, chí cácuu i nájñuhun lanchi, quiti ní sana.

<sup>25</sup> Te ñahan ún chí ni quee ña, te ni jecuíñi yití ña nuū yá, te ni cahān ña:

Tátá, chindéé ñahán ní sáña víi, achí ña.

<sup>26</sup> Te ni cahān yatá yā jín ña:

Tu íyó váha jeē quénde yō staā sēhe, te cuáha yó nuū ina, achí yá.

<sup>27</sup> Te ni cahān ña:

Jendaá cahān ní Tátá, te chindéé ñahán ní sáña vésú cúu ná nájñuhun ina. Chí suni máá tí cánihín nahín tí pedazo staā cuechí jeē cóyo chíji mesa jitoho tí cáyeji tí, achí ña jín yá.

<sup>28</sup> Yūcuán na te ni cahān Jesús:

Yóhyo vāha jeē cándíje ñihin ní súcuán, náná. Te na sáha ná jeē cuni ní, áchí yá.

Te máá hora un ní nduvāha-ñi sēhe síhí ña.

*Jeē ní nasávāha ya cuehē ñayuu cácuuhū*

<sup>29</sup> Te ni quenda Jesús cuahān yā yūcuán, te ni yāha ya yumar Galilea. Te ni caa ya ñin yucu, te yūcuán ní cucōo ya. <sup>30</sup> Te cuehē ñayuu ni quecoo i nuū yā, te cándeca i táca jeē cájica chácuá, jeē cuaa, jeē ñihín, jeē cacúhndú, jín cuehē gā ñayuu cácuuhū. Te ni cajequin i nuū jehé Jesús. Te ni nasávāha ya i jijnáhan i. <sup>31</sup> Te ni canaa ni ñayuu un cájito i jeē nácahān ñayuu ñihín, ndúvāha ñayuu cuhndú, nácaca vāha ñayuu chacuá, nánune tinūu ñayuu cuaa. Te ni cacahān i jeē yóhyo vāha Yaā cúu Yaā Dios ñuu i Israel.

*Jeē ní scáji yā cuūn mil tēe (Mr. 8.1-10)*

<sup>32</sup> Yūcuán na te ni cana Jesús tēe cáscuáha jín yá, te ni cahān yā jín de:

Cúndáhú ni rí ñayuu cuehē yáhá, chí je ni cuu uní quívi cáyúcu i jín rí, te tuá na vé caji i. Te tu cúní rí natají rí i nuhun ndite i, chí núu súcuán te sava ichi te cuíta í i. Achí yá.

<sup>33</sup> Te ni cacahān tēe cáscuáha jín yá:

¿Te ndé nuū nihín yō staā caji ñayuu cuehē yāhá? Chi yāhá tú na ñayuu yúcu, achí de.

<sup>34</sup> Te ni cajñūhun yá de:

¿Nasaa staā cánevāha ró?

Te ni cacahān de:

Uxā-ni, jín jecu chācá lúlí, áchí de.

<sup>35</sup> Yūcuán na te ni cahān yā jín ñayuu cuehē un jeē na cúcoo i. <sup>36</sup> Te ni quihín ya ndihúxá staā jín chāca ún, te ni nacuatáhu yá nuū Yāā Dios. Te ni tahú cuéché yá, te ni jēhe ya nuū tēe cáscuáha jín yá, te máá de ni casaja nuū ñayuu. <sup>37</sup> Te ndihi i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chítú úxá jīca. <sup>38</sup> Te tēe ni cayeji ún, nde cuūn mil de cúu, te sán ga cúu ñahan jín súchi lúlí. <sup>39</sup> Yūcuán na te ni nacuatáhu yá nuū ñayuu ún, te cuanungoo i. Te ni ndívi ya ini barco, te cuahān yā región Magdala.

*Jeē cājicān de ñn jñiñu jéhu nuū yā  
(Mr. 8.11-13; Lc. 12.54-56)*

## 16

<sup>1</sup> Te ni quecoo tēe grupo fariseo jín tēe grupo saduceo nuū yā. Chi cácu ni de coto ndee de ya, te ni cājicān de jeē na sáha ya ñn jñiñu jéhu jeē coo ñn seña ichi ándiví. <sup>2</sup> Te máá yá ni cahān yā jín de:

Núu ni ini, te cacahān rō: Nandii, chi ni nasácuéhé i andiví, áchí rō. <sup>3</sup> Te jenéhen chí cacahān rō: Vijna te cuun saū, chi ni nasácuéhé i andiví, áchí rō. Tēe stáhu-ni cácu rō. Chi cájecūhun ni rō ndese stéén seña andiví, te tu cájecūhun ni rō ndese stéén táca jñiñu jéhu sáha ri tiempo yáha. <sup>4</sup> Ñayuu yáha jeē casáha jñiñu née, tu cájetáhu cuiti i Yāā Dios. Te cājicān i jeē sáha ri ñn jñiñu jéhu jeē coo ñn seña andiví. Te tuá na inga jñiñu jéhu stéén rī nuū i, chí máá-ni jñiñu jéhu nájnūhun ni cuu jín Jonás, tēe ni nacani jñūhun Yāā Dios nde jenahán. Achí yá.

Te ni stóo ya de jñjñahan de, te cuahān yā.

*Jñūhun levadura tēe fariseo  
(Mr. 8.14-21)*

<sup>5</sup> Te tēe cáscuáha jín yá ni canaa ni de condiso de staā náa cuangoo de jín barco inga lado mar. <sup>6</sup> Te ni cahān Jesús jín de:

Coto má candíje rō levadura tēe grupo fariseo jín tēe grupo saduceo, achí yá.

<sup>7</sup> Te tēe cáscuáha un ní cacahān maá de:

Va siquí jeē tú na staā ndíso yó, jeē yúcuán cahān yā súcuán, áchí de.

<sup>8</sup> Te ni jini Jesús, te ni cahān yā:

¿Najehē cacahān rō jeē ní cahān rī súcuán siquí jeē tú na staā cándiso rō? Tēe tu cándíje nihín cácu rō. <sup>9</sup> ¿A ná tu jecūhun ni rō jeē tu ní cahān rī súcuán siquí jeē tu ndíso rō stáá? ¿A tu cánucūhun ni rō jeē ní tahú cuéché rī uhūn staā ni cayeji uhūn mil tēe, te nasaa jīca ni canastútú rō jeē ní quendōo? <sup>10</sup> ¿Te

á tu cánucūhun ni rō jeē ní tahú cuéché rī uxā staā ni cayeji cuūn mil tēe, te nasaa jīca ni canastútú tucu rō? <sup>11</sup> ¿Te najehē tu cájecūhun ni rō jeē násūu síquí staā ni cahān rī jín rō jeē ní cahān rī jeē coto má candíje rō levadura tēe fariseo jín tēe saduceo. Achí yá jín de.

<sup>12</sup> Yūcuán na te ni cájecūhun ni de jeē tu ní cahān yā jeē coto de jeē ma cáji de pan jeē yíhi levadura, chí sa suhva ni cahān yatá yá jeē ma cándíje de jñūhun stáhu cástéén tēe fariseo jín tēe saduceo.

*Jeē ní cahān Pedro jeē Jesús cúu Cristo  
(Mr. 8.27-30; Lc. 9.18-21)*

<sup>13</sup> Te nuū ni jín Jesús región Cesarea Filipo jín tēe cáscuáha jín yá, te ni cajñūhun yá de:

Ruhū, Yāā ní nduu tēe, ¿ndé ñn cúu ri cacahān ñayuu?

<sup>14</sup> Te ni cacahān de:

Sava i cacahān jeē cúu ní Juan tēe ni scuándute. Te sava ga i cacahān jeē cúu ní Elías, tēe ni nacani jñūhun Yāā Dios nde jenahán. Te sava ga i cacahān jeē Jeremías chí inga tēe ni nacani jñūhun Yāā Dios cúu ní. Achí de.

<sup>15</sup> Te ni cahān yā jín de:

Te máá rō, ¿ndé ñn cúu ri cacahān rō? achí yá.

<sup>16</sup> Te ni cahān Simón Pedro:

Máá ní cúu Cristo, Yāā ní tají Yāā Dios. Te cúu ní Sēhe Yāā Dios, Yāā técu níí cáni, áchí de.

<sup>17</sup> Te ni cahān Jesús:

Yōhu ndetú rō, Simón sēhe Jonás, chí nasúu ñn ñayuu ni steén jñūhun yáha nuū rō, chí sa suhva máá Tátá rī, Yāā ndeé andiví, ní steén yá nuū rō. <sup>18</sup> Te ruhū suni cahān rī jín rō jeē maá rō cúu Pedro, jeē cuní cahān: yuū. Te jñūhun ndaa jeē ní cahān rō jeē maá rī cúu Cristo, suu cúu nájnūhun ñn yuū cáhnu. Te siquí yuū cáhnu yáha sáha ri jeē quítuu vehe, te vehe un cúu ñayuu cáncandíje ruhū. Te tu ndé vé cundeyí cuiti siquí i, ní jñūhun xeēn jeē cājihí i, tuá na vé cúu sáha jín ánuá i. <sup>19</sup> Te máá rō condiso jñiñu rō sáha rō jēe quívicoo ñayuu ndaha Yāā andiví jeē ndacu ya jñiñu nuū i. Te táca jēe cási rō jeē ma sáha ñayuu ini ñayívi yáha, suni casi jeē cáyūcú nde andiví. Te táca jēe cuáha rō jñūhun sáha i ini ñayívi yáha, suni jeē cáyūcú nde andiví cuáha jñūhun. Achí yá.

<sup>20</sup> Yūcuán na te ní ndacu ya jñiñu nuū tēe cáscuáha jín yá, jeē ma cáchi de nuū ní ñn ñayuu jeē cúu ya Cristo.

*Jeē ní castūhún Jesús jeē cúu yā  
(Mr. 8.31-9.1; Lc. 9.22-27)*

<sup>21</sup> Te nde saá ní quejé Jesús cástūhun cáji yá nuū tēe cáscuáha jín yá jeē jini ñūhún quihín yā ñuu Jerusalén. Te táca tēe jéhu jín sūtú cácujeñu jín tēe cástéén tutu ley,

stóho ndasí de ya. Te cahni de ya, te nuū uní quiví te natecu yā, achí yā. <sup>22</sup> Yūcuán na te Pedro, ni cana máñúhún de ya, te ni quejéé de cáhán de nuū yā:

¿Naun cáhán ni súcuán? Chi tu cúní Yaa Dios jeé cuu súcuán. Tu jini ñúhún cuiti ndoho ní jnúndóho yáha, achí de.

<sup>23</sup> Te ni ndió cóto ya nuū Pedro, te ni cahān yā jíin de:

Cujiyo quihīn rō, chi cáhán rō ná cáhán Satanás. Chi tēe ndúcu stívi rúhū cúu rō. Te tu jéni ni rō nájñūhun jéni ni Yaa Dios, chi sa suhva jéni ní rō nájñūhun cájeni ni ñayuu. Achí yā.

<sup>24</sup> Yūcuán na te ni cahān yā jíin tēe cáscuáha jíin yā:

Na-ni ñayuu núu cúní i condiquīn i ruhū, na cási i jeé cuní maá i, te na cóndiquīn i ruhū te cuāha i jñūhun ndoho i jnúndóho jeé siquí rī, vésu na cúu i. <sup>25</sup> Chi núu ndé ñayuu cuní i cácu i nuū jnúndóho quiji nuū i jeé siquí ruhū, núu súcuán te jnahnú ndetū i níí cáni. Te núu ndé ñayuu, vésu na cúu i jeé siquí ruhū, te cotecu i níí cáni. <sup>26</sup> ¿Chi ndé cuajñiñu vésu na cúndeyí ñayuu niñi i níí ñáyiví, te núu quiví i nuū jnahnú ndetū i? Chi tú na jíin cuiti chunaa ñayuu jeé cácu ánuá i. <sup>27</sup> Chi ruhū, Yaa ní nduu tēe, ndiji rī jíin táca ndajéhé rī, te yōhoyo luu cujéhnu rī nájñūhun cújéhnu Tátá rī. Yūcuán na te cuāha rī tahū nuū ñin ñin ñayuu núu ndese jñiñu ni casáha i. <sup>28</sup> Te jendaá cahān rī jíin rō jeé sava tēe cáhīin yáha, ma cúu de chi nde cuní de jeé maá rī, Yaa ní nduu tēe, ndácu rī jñiñu jíin poder rī.

*Jeé tucu ni nduu ya  
(Mr. 9.2-13; Lc. 9.28-36)*

## 17

<sup>1</sup> Yūcuán na te nuū iñú quiví te Jesús ni jeca ya Pedro jíin Jacobo jíin Juan ñani Jacobo, cuahān sñn ya jíin de ñin yucu súcún. <sup>2</sup> Te yūcuán, tucu ni nduu ya nuū de. Chi ní ndindēe núu yā nájñūhun niāndii. Te sahna ya ni nducujín quiyí ndasí, nájñūhun nduva luz. <sup>3</sup> Te ni cajito-ni de jeé Moisés jíin Elías, tēe ni cahiyoy jenahān, cándajñúhún de jíin yā. <sup>4</sup> Te ni cahān Pedro jíin yā:

Nacá jeé váha jeé cáhīin ná yáha. Te núu cúní ní te na sáha ná uní vehe ramada, ñin cuu maá ní, inga cuu Moisés, te inga cuu Elías, achí de.

<sup>5</sup> Te níni cáhán gā de, te ni quiji vicō ñūhun jéé yaa ndasí, ni jesi-ni nuū de. Te nuū vicō un ní cahān ñin jñūhun:

Yáha cúu Séhe rī jeé maní ndasí rī jíin, te cúsiñ rī jíin. Na cúní nahín rō jñūhun cáhán yā. Achí.

<sup>6</sup> Te jeé súcuán ni cajini sōho tēe cáscuáha ún, te ni cajecava ndeyí de, chi yōhoyo ni

cayūhú de. <sup>7</sup> Yūcuán na te ni quee Jesús, te ni soó yā ndaha ya siquí de. Te ni cahān yā: Ndocuifí, te ma yūhu rō jijnáhan rō, achí yā.

<sup>8</sup> Te ni candacoto de, te tuá tēe un ní cájito de, chi maá ñin na Jesús.

<sup>9</sup> Te ni cananuu de jíin yā yucu ún. Te ni ndacu ya jñiñu nuū de:

Ma cáchi rō nuū ní ñin jeé súcuán ni cajito rō, chi nde na nátecu maá rí, Yaa ní nduu tēe, achí yā.

<sup>10</sup> Yūcuán na te tēe cáscuáha jíin yā, ni cacajñúhún de ya:

Núu súcuán te tēe cástéén tutu ley Yaa Dios, ¿najehē cácahán de jeé cánuú ndiji Elías xīhna gā, te saá te quiji Yaa cúu Cristo? achí de.

<sup>11</sup> Te ni cahān Jesús jíin de:

Jendaá cúu jeé xīhna gā quiji ñin tēe cuu nájñūhun Elías, te sātúhva de ndíhi, achí tutu. <sup>12</sup> Te cáhán rī jíin rō jeé jé ni quiji tēe ni cuu nájñūhun Elías, te tu ní jíin ñayuu jeé suu de cúu. Te ni casáha ndeváha ñayuu jíin de ndíhi jeé ní cacuu ní maá i. Te núu súcuán stóho i ruhū, Yaa ní nduu tēe. Achí yā.

<sup>13</sup> Yūcuán na te tēe cáscuáha un, ní cajecūhun ni de jeé cahān yā jeé Juan tēe scuándute, ni cuu de nájñūhun Elías.

*Jeé ní nasávaha ya ñin sūchi jhí yihí  
(Mr. 9.14-29; Lc. 9.37-43)*

<sup>14</sup> Te ni najinū yā jíin de nuū ñayuu cuehē ún. Te ni quee ñin tēe, ni jecuíñí yití de nuū yā, te ni cahān de:

<sup>15</sup> Cundáhú ní ni séhe yí ná, chi yōhoyo xeēn ndóho i cuehyí jíhi yihí. Te je ni cuu cuehē jínu cótúú i nuū ñúhún jíin núu ndúte. <sup>16</sup> Te ni quindeca ná i nuū tēe cáscuáha jíin ní, te tu ní cúu sávaha de i, achí de.

<sup>17</sup> Te ni cahān Jesús:

Ñayuu yōhoyo niñi ni cácuu rō chi tu cácañdije rō jéé cuu nduváha i. ¿Nasaa ga quiví condee rī jíin rō? ¿Te nasaa ga quiví cuandeyí ni rī jíin rō? Cuáquihin sūchí un na quíji i, achí yā.

<sup>18</sup> Te ni cahān yā nuū tachí, te ni quenda-ni ñin sūchí un. Te ni nduváha-ni i maá hora un.

<sup>19</sup> Yūcuán na te tēe cáscuáha un, ní cacajñūhun sñn de ya:

¿Najehē tu ní cúu quenehen ná tachí un jíjnáhan ná? achí de.

<sup>20</sup> Te ni cahān yā:

Siquí jeé tu cácañdije niñin rō jéé cuu sáha rō. Chi jendaá cahān rī jíin rō, jeé núu candije rō vésu ñin tíhli-ni, cūhva nájñūhun ñin ndiquin mostaza, te cuu sáha rō táca-ni jñiñu yí. Chi cuu cahān rō jeé na cújiyo yucu yáha quihīn inga lado, te cujiyo-ni. Te táca-ni jñiñu chi cuu sáha rō, te núu candije niñin rō jéé cúu. <sup>21</sup> Te ñin tachí súcuán chi ma quenda cuiti quihīn, te núu tu cacān tahú rō te coo ndite ní rō. Achí yā.

*Jeē ni cāhān tucu ya jeē cūyā*  
(Mr. 9.30-32; Lc. 9.43-45)

<sup>22</sup>Te jica cuu Jesús jiin de jijnáhan de región Galilea, te ni cāhān yā jiin de:

Máá rí, Yāā ní nduu tēe, nastúu i ruhū nuū tāca tēe xeēn. <sup>23</sup>Te cahni de ruhū, te nuū unī quivī te natecu rī, achí yá.

Te ni canducuihá ndasí ni de jeē ni cāhān yā jñuhun yáha.

*Siquī xūhun cuajniñu ini templo*

<sup>24</sup>Te ni jinū yā ñuu Capernaum jiin tēe cáscuaha jiin yá. Te tēe cástútú xūhun templo ni quecoo de, te ni cacajñuhún de Pedro:

Te maestro máá rí jijnáhan ró, ¿á tú cuaha de xūhún cuajniñu ini templo, chí naún? áchí de.

<sup>25</sup>Te ni cāhān Pedro:

Cuu, áchí de.

Te ná ni quivī de ini vehe, te xihna gā Jesús ni cāhān yā jiin de:

¿Ndese jéni ni rō, Simón? Tāca tēe cácuu rey ini ñayivī yáha, ¿ndé nuū cájicān de xūhun renta jiin xūhun cuajniñu ñuu? ¿A núu séhe de chí núu ñayuu sán vehe? áchí yá.

<sup>26</sup>Te ni cāhān Pedro:

Nuū ñayuu sán vehe, áchí de.

Te ni cāhān Jesús:

Núu súcuan te tú na inga cujéhu nuū séhe rey jeē cacán xūhún un núu i.

Súcuan ni cāhān yā jeē cujéhu ya cúu ya Séhe Yāā Dios. Te ni cāhān yā:

<sup>27</sup>Te na chúnaa yō, návāha tu squítí ni yō de. Núu súcuan te cuahán ndé yumar, te scáne ró gancho jeē jñí chācá, te tava rō chācá jeē jñí xihna gā. Te ndica rō yuhu tí, te yúcuan níhñ rō ñn xūhun jéé cānda chunaa rō jeē cájicān de. Te quindēca ró núu de jeē cúu ruhū jiin rōhó. Achí yá.

*Ndé ñayuu cúu jeē cujéhu ga*  
(Mr. 9.33-37; Lc. 9.48-48)

## 18

<sup>1</sup>Te suni quivī un ní quecoo tēe cáscuaha un núu yā, te ni cacajñuhún de ya:

¿Nde ñn cújéhu ga nuū ñayuu jeē ndácu Yāā andiví jniñu nuū? achí de.

<sup>2</sup>Te ni cana ya ñn sūchi lúli, te ni jeni ya i meñtú de. <sup>3</sup>Te ni cāhān yā:

Jendaá cāhān rī jiin ró, núu tú nandió cóo ni rō te caní ni rō nájñuhun ñn sūchi lúli, ma quiví cuiñi rō ndaha Yāā andiví jéé ndacu ya jniñu nuū rō. <sup>4</sup>Núu súcuan te ñayuu jeē jéni ní i jeē tu cújéhu i, nájñuhun jéni ní sūchi lúli yáha, suu i cújéhu ga nuū ñayuu jeē ndácu Yāā andiví jniñu nuū. <sup>5</sup>Te na-ni ñayuu núu jeē siquí ruhū jetáhú i ñn sūchi lúli nájñuhun sūchi yáha, te ruhū jetáhú i. Achí yá.

*Xeēn coo siquí ñayuu quiví nuū cuéchi*  
(Mr. 9.42-48; Lc. 17.1-2)

<sup>6</sup>Te núu ñn sūchi lúli yáha cándije i ruhū, te núu quiví i cuéchi sáha na-ni ñayuu, te vāha ga

núu ni conuhnī ñn yōso cáhnu sucūn ñayuu ún, te quēe i chíji ndute mar nuū. <sup>7</sup>Nacā xeēn cúu jiin ñayuu ñayiví, chí máni iyó jéé nducú squiví ñayuu nuū cuéchi. Te máni súcuan coo ini ñayiví. Te nacā xeēn ndoho ñayuu jeē squíví jñáhan nuū cuéchi.

<sup>8</sup>Núu súcuan te núu ndaha ró chí jéhe rō sáha jeē quiví ró cuéchi, vāha ga cahnde rō te scáne ró na quihín, návāha tuá sáha ró cuéchi. Chí vāha ga jeē coo chācuá ró chí coo tícúhndu ró te quiví ró núu cotecu rō ní cání, vésú jeē cóndee ndindúú ndaha ró jéhe rō te quiví ró núu ñuhún jeē cayú ní cání. <sup>9</sup>Te núu tinūu ró sáha jeē quiví ró cuéchi, vāha ga tava rō te scáne ró na quihín, návāha tuá sáha ró cuéchi. Chí vāha ga jeē coo ñn-ni tinūu ró te quiví ró núu cotecu rō ní cání, vésú jeē cóndee ndindúú tinūu ró te quiví ró núu ñuhún infierno.

*Jñuhun yátá siquí lanchi jeē ní sana*  
(Lc. 15.3-7)

<sup>10</sup>Coto ma sájéé ni rō nuū ní ñn sūchi lúli yáha. Chí cāhān rī jiin ró jeē táca ndajéhe andiví jéé ndito ya i, níni cāhñ ya nuū máá Tátá rī andiví. <sup>11</sup>Chí ruhū, Yāā ní nduu tēe, vēji rī jeē jñama rī ñayuu jeē ní sana i nuū Yāā Dios.

<sup>12</sup>¿Te ndese cájeni ni rō? Núu ñn tēe ndéca de ñn ciento lanchi, te núu sana ñn tí, ¿á tu stóo de cuñ xico xahún cuñ gā tí yucu, te ndicó de quinanducú de quiti ní sana ún? <sup>13</sup>Te núu ní nanihñ de tí, te ndaa jee yóhyo ga cúsi ní de jiin quiti ún vésú jiin cúñ xico xahún cuñ gā quiti jeé tu ní sana. <sup>14</sup>Te suni súcuan máá Tátá rō, Yāā ndeé andiví, te cúní yā jeé jñahnú ndetú ní ñn sūchi lúli yáha.

*Siquí jeē cóne cáhnu ni yō nuū jñáhan yó*  
(Lc. 17.3)

<sup>15</sup>Te núu jñáhan ró ní sáha de cuéchi siquí rō, núu súcuan te castúhu ró nuū mañuhún-ni de jeē ní sáha de cuéchi siquí rō. Te núu ní jetáhú de jñuhun ni cāhān ró jiin de, núu súcuan te je ni ndumaní de jiin ró ní sáha rō. <sup>16</sup>Te núu tu ní jetáhú de jñuhun cāhān ró, te quicāna ró ñn chí úú gā ñayuu quihñ rō jiin núu de, cuu i testigo jiin ró, te cundaá cuéchi de te ndumaní de jiin ró. <sup>17</sup>Te núu tu ní jetáhú tucu de jñuhun cácahān tēe ún, yúcuan na te castúhu ró nuū ñayuu cácañdije. Te núu tu ní jetáhú tucu de jñuhun cāhān ñayuu cácañdije ún, te siáá ró de na cóo de nájñuhun ñn tēe tu cándije nuū Yāā Dios chí tēe stútú xūhun renta.

<sup>18</sup>Jendaá cāhān rī jiin ró jéé táca jéé cási ró jeē ma sáha ñayuu ini ñayiví yáha, suni casi jeē cáyucú nde andiví. Te táca jéé cuáha ró jñuhun sáha i ini ñayiví yáha, suni jeé cáyucú nde andiví cuáha jñuhun.

<sup>19</sup>Te suni cāhān rī jiin ró, núu uñ jñáhan ró ini ñayiví yáha, inuú caní ni rō siquí ñn jeé cacán tahú rō, núu súcuan te máá Tátá rī



andiví cuāha ya jeē cājicān rō. <sup>20</sup> Chi núu ndé mí ndútútú úu chí úní ñayuu jeē cáchiñúhún i ruhū, te yūcuan íne ri jín i, áchí yá.

<sup>21</sup> Yūcuán na te ni quee Pedro nuū yā, te ni cajñuhún de ya:

¿Nasaa jínu cone cáhnu ni na núu jnánhan ná jeē sáha de cuēchi siquí ná? ¿A ndé uxā jínu chí naún? áchí de.

<sup>22</sup> Te ni cahān Jesús:

Tu cáhán rí jín ró jeē maá úxā jínu, chí nde uxā jínu jeē uní xico uxí.

*Jñuhun yátá siquí mozo jeē tu ní íne cáhnu ní*

<sup>23</sup> Núu súcuan te Yāā ndeē andiví, suhva cúu jeē íne cáhnu ní yā nuū ñayuu ndácu ya jniñu nuū: Cúu nájñuhun ñin rey jeē cuní de sándaā de jín mozo de jeē cátaū nuū de. <sup>24</sup> Te ni quejé de sándaā de jín i. Te ni caquindeca i ñin mozo jeē taú tjini millón peso nuū de. <sup>25</sup> Te tú na vé névāha mozo un chunaa nuū de. Te ni ndacu de jniñu jeē na cúyāhu mozo un jín ñasihí jín séhe jín táca ndajniñu, te nucūnaa xūhun taú. <sup>26</sup> Yūcuán na te ni jecuiñí yití mozo un, te ni cahān ndahú de jín patrón de ún: Condetu ní, te na chúnaa ndihí ná xūhun ní, áchí de. <sup>27</sup> Te maá patrón ni cundáhú ni de mozo de. Te ni ine cáhnu ni de jeē taú mozo de ún, te ni siaá de jeē ma chúnaa gā. <sup>28</sup> Te ni quenda mozo un cuáhān de, te ni najnāhan-ni de jín ñin jnánhan mozo de jeē taú jecu peso nuū de. Te ni jni de tēe ún, te ni quitu de sucūn, te ni cahān de: Chunaa jeē taú rō nuū rí, áchí de. <sup>29</sup> Te jnánhan mozo de un ní jecuiñí yití núu de, te ni cahān ndahú jín de: Condetu te na chúnaa ndihí ri xūhun ró, áchí. <sup>30</sup> Te maá de tu ní cúní de, chí ni chune de tēe un vecāa nde quiví nachunaa jeē taú nuū de. <sup>31</sup> Te cáca jnánhan mozo de ni cajjito jeē súcuan ní sáha de, te ni cajnahuhū ndasí ni de. Te cuango de nuū patrón de, te ni cacachí de ndihí ndese ní cuu. <sup>32</sup> Yūcuán na te patrón un ní nacana de mozo un, te ni cahān de jín: Mozo ndevāha cúu ró. Chí ni ine cáhnu ní rí ndihí jeē taú rō nuū rí, chí ni cahān ndahú ró jín rí. <sup>33</sup> Te nájñuhun ní cundáhú ní rí rohó, suni súcuan ní jini ñúhún cundáhú ní ró jnánhan mozo rō nuú, áchí de. <sup>34</sup> Te ni quití ndasí ní patrón, te ni ndacu de jniñu jeē na quiví vecāa nde nachunaa ndihí jeē taú nuū de.

<sup>35</sup> Te ni jínu ni cahān yā, te áchí yá:

Nájñuhun ní sáha rey un jín mozo de, suni súcuan sáha maá Tátá rí andiví jín táca rohó núu tu cone cáhnu ní rō nuū jnánhan ró nde jín ini jín ánuá rō, núu na-ni cuēchí sáha i nuū rō. Áchí yá jín de jijnánhan de.

*Siquí jeē ma stóo jnánhan tēe jín ñahan (Mr. 10.1-12; Lc. 16.18)*

## 19

<sup>1</sup> Te nuū ní ndihí ní cahān Jesús táca jñuhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndi. <sup>2</sup> Te cuehē ñayuu ní candiquín i ya, te yūcuan ní nasávāha ya ñayuu cácuhu.

<sup>3</sup> Yūcuán na te ni quecoo jecu tēe grupo fariseo nuū yā, chí cácuni de coto ndee de ya núu ndese cahān yā. Te ni cacajñuhún de ya:

¿A iyó ley jeē cuu ndusín ñin tēe jín ñasihí de núu na-ni siquí cúu, chí naún? áchí de.

<sup>4</sup> Te ni cahān yā:

¿A tu ní cácahu ró tutu ñi ndese ní sáha Yāā Dios ñayuu nde xihna ñúhún? Chí tēe jín ñahan ní sáha ya, áchí. <sup>5</sup> Te suni ní cahān Yāā Dios: Jeē yūcuan cúu jeē stóo tēe tátá de náná de, te quijnánhan de jín ñasihí de, te ñin na cuu ndindúu de, áchí Yāā Dios, áchí tutu. <sup>6</sup> Núu súcuan te tuá cúu uú jnánhan de, chí ñin na cúu. Jeē yūcuan tu iyó váha jeē stóo jnánhan, chí jeē ní squijnánhan Yāā Dios cúu, áchí yá.

<sup>7</sup> Te ni cacajñuhún de ya:

Núu súcuan ¿te naun ni ndacu Moisés jniñu jenahán jeē núu stóo ñin tēe ñasihí de, te na cúvāha acta jeē ndusín de jín ña? áchí de.

<sup>8</sup> Te ni cahān yā jín de:

Siquí jeē níhni ní rō jijnánhan ró, jeē yūcuan ní jēhe Moisés jñuhun jeē stóo ró ñasihí ró. Te nde xihna ñúhún chí nasūu súcuan ní cuu. <sup>9</sup> Te ruhū chí cáhán rí jín ró, núu ñin tēe stóo de ñasihí de, te núu nasuu jēe tjini ní ña, te quijnánhan de jín inga ñahan, núu súcuan te cásiquí ndéē de ña. Te núu ñin tēe condeca de ñahan ní ndusín, suni cásiquí ndéē de ña, áchí yá.

<sup>10</sup> Yūcuán na te ni cacahān tēe cácuáha jín yá:

Te núu ma cúu stóo tēe ñasihí de, núu súcuan te váha ga ma cóndeca de ñahan, áchí de.

<sup>11</sup> Te ni cahān yā jín de:

Jñuhun ní cahān rō yáhá, tu níhín jniñu nuū ndihí tēe, chí maá nene tēe jeē ní sáha Yāā Dios jeē níhín jniñu nuu. <sup>12</sup> Chí iyó tjini siquí jeē jési jeē ma cóndeca tēe ñahan. Chí sava tēe ní cacacu de jeē ma cúu condeca de ñahan. Te sava ga tēe ní sáha ñayuu jeē ma cúu condeca de ñahan. Te sava ga tēe ní cajeni ní maá de jeē ma cóndeca de ñahan siquí jeē ndihví ní de jín jniñu jeē ndácu Yāā andiví nuū de. Tēe jeē cúu cuatáhú jñuhun jeē ma cóndeca de ñahan, na cuatáhú de núu súcuan. Áchí yá.

*Jeē ni jicān tahú Jesús jehé sūchi lúli (Mr. 10.13-16; Lc. 18.15-17)*

<sup>13</sup> Yūcuán na te ni quecoo ñayuu jín sūchi lúli, jēe na sóo yá ndaha ya xiní i te cacān tahú yá jehé i. Te tēe cácuáha jín yá, ní

cahān de nuū ñayuu vējicoo jíin i. <sup>14</sup> Te ni cahān Jesús:

Cuāha jñuhun na quǐjicoo sūchi lúlí jíñā nuū rí, te ma cásí rō jeē quǐjicoo i. Chi ñayuu jeē ndió cóo ni i caní ni i nájñuhun sūchi yāha, suu i quíví ndaha Yaā andiví jeē ndacu ya jñiñu nuū i, áchí yá.

<sup>15</sup> Te ni soó yá ndaha ya xiní i jíjnāhan i. Te ni quenda ya yūcuan cuáhān yá.

*Jñuhun tēe cúcá*

(Mr. 10.17-31; Lc. 18.18-30)

<sup>16</sup> Te ñin tēe suchí ní quee de nuū Jesús, te ni cajñuhún de ya:

Tēe vāha cúu ní Maestro. Te cachi ní, ¿na jñiñu vāha sáha ná te nihín tahú na cotecu na níí cáni andiví? áchí de.

<sup>17</sup> Te ni cahān yā jíin de:

¿Naun cáhān rō jeē tēe vāha cúu rí? Tú ni ñin tēe vāha íyó, chí máá ñin-ni Yaā Dios. Te núu cúní rō cotecu rō níí cáni, te squícu rō jñiñu ní ndacu ya. Achí yá.

<sup>18</sup> Te ni cahān de:

¿Ndé-ni jñiñu cúu núu súcuan?

Te ni cahān yā:

Ma cáhni rō ndíyí. Ma cosíquí ndéē jñáhan ró. Ma sacuíhná ró. Ma sajnühún ró. <sup>19</sup> Cuatáhú ró nuū tatá rō nuū naná rō. Te cundáhú ni rō jñáhan ró nájñuhun cundáhú ni rō maá ró, áchí yá.

<sup>20</sup> Te ni cahān tēe suchí un:

Tácá jñiñu yáha je ni squícu ná ndé ná lulí ná. ¿Te na vé cúmani gá sáha ná núu súcuan?

<sup>21</sup> Te ni cahān Jesús:

Núu cúní rō squícu ndihí ró, cuáhān te xíco ró ndihí jeē névāha ró, te cuāha ró núu ñayuu ndahú. Te nde andiví cuāha ya jeē ndetú ndasí coo ró. Yūcuán na te quíjri rō condiquín rō ruhú quihín yó, áchí yá.

<sup>22</sup> Te tēe suchí un, ná ni jini sōho de jñuhun yáha, te ni cuculhyá ni de te cuahān de, chí cúcá ndasí de.

<sup>23</sup> Yūcuán na te ni cahān Jesús jíin tēe cáscuáha jíin yá:

Jendaá cahān rí jíin ró, tēe cúcá chi yóhoyo yí quívicoo de ndaha Yaā andiví jeē ndacu ya jñiñu nuū de. <sup>24</sup> Te cáhān tucu rí jíin ró jeē yachí gā yāha ñin camello yaū yutícuí, vēsú jeē quíví ñin ñayuu cucá ndaha Yaā Dios jeē ndacu ya jñiñu nuū i, áchí yá.

<sup>25</sup> Te tēe cáscuáha jíin yá, yóhoyo ni canaa ni de jeē ní cajini de jñuhun yáha, te ni cacajñuhun jñáhan de:

¿Ndé ñayuu cúu jeē cácu núu súcuan?

<sup>26</sup> Te ni ndacoto Jesús nuū de, te ni cahān yā:

Ñayuu chi ma cúu squíví i máá i ndaha Yaā Dios, te máá yá chí ndihí-ni cuu sáha ya, áchí yá.

<sup>27</sup> Yūcuán na te ni cahān Pedro:

Sāña jíjnāhan ná ní castóo ná ndihí jeē cánevāha ná, te cándiquín na níhín. ¿Te na vé nihín na núu súcuan? áchí de.

<sup>28</sup> Te ni cahān Jesús jíin de:

Ruhú, Yaā ní nduu tēe, jendaá cahān rí jíin ró jíjnāhan ró jeē ñin quíví conene rí mesa ndacu rí jñiñu, te yóhoyo luu cújéhu rí ini ñayívi jeé. Te quíví ún te máá ró jeē ní cacondiquín rō ruhú, suni coyūcu ró nuū uxí uū mesa ndacu ró jñiñu. Te sándaā rō jñiñu ndihúxi uū yucūn ñayuu Israel. <sup>29</sup> Te táca ñayuu jeē ní stóo vehe, chí ñani, chí cuāha, chí tátá, chí náná, chí ñasihí, chí séhe, chí ñuhun, siquí jeē cóndiquín i ruhú, te nanihín i ñin ciento gā jeē súcuan. Te suni nihín tahú i cotecu i níí cáni. <sup>30</sup> Te cuehē ñayuu jeē vijna cácuu i nuū, nduu i sandihí. Te ñayuu jeē vijna cácuu i sandihí, nduu i nuū. Achí yá.

*Jñuhun yátá siquí tēe cásájñiñu*

## 20

<sup>1</sup> Te suhva cúu jeē ndácu Yaā andiví jñiñu nuū ñayuu: Cúu nájñuhun ñin tēe chíí ñuhun. Te ñin nehen ni quenda de, ndúcu de tijni mozo jeē taxín ndéhé uva de. <sup>2</sup> Te ni sándaā de jíin mozo un jeé chúnaa de ñin denario jeē quíví. Te ni tají de tēe un cuángoo jeē taxín uva de. <sup>3</sup> Yūcuán na te ni quenda tucu de nájñuhun cahíin. Te ni jito de nuū sava ga tēe cáyūcu sáa-ni de nuū yáhu. <sup>4</sup> Te ni cahān de jíin: Róhó jíjnāhan ró, cuángoo taxín ró uva rí, te chunaa vāha ri yāhu ró, áchí de. Te tēe un cuángoo de. <sup>5</sup> Te ni quenda tucu de jeē cuácuu cahuxí uū jíin jeé cuácuu cahuní, te suni súcuan ni nihín tucu de mozo. <sup>6</sup> Te jeé cuácuu cahuhún ni quenda tucu de. Te ni nihín tucu de jecu gā tēe cáyūcu sáa-ni nuū yáhu. Te ni cahān de jíin: ¿Najehē cáhíin sáa-ni ró yáha níí ndiáca? áchí de. <sup>7</sup> Te ni cacahān tēe ún: Siquí jeē tú ni ñin ní cána sáña jeé sájñiñu ná. Te ni quenda de jíin tēe ún: Núu súcuan te suni máá ró quingoo ró taxín ró ndehé uva rí, chí chunaa vāha ri yāhu ró, áchí de. <sup>8</sup> Te nuū ní ini, te tēe chíí ñuhun ni cahān de jíin tēe cújéhu nuū mozo de: Cana xiní tēe cásájñiñu te chunaa rō yāhu de, te xíhna gā tēe ni quívicoo sandihí, te sáá te tēe ni quívicoo xíhna ñuhún, áchí de. <sup>9</sup> Te ni quecoo tēe jeē ní quívicoo cahuhún. Te ñin denario ni caquihín ñin ñin de. <sup>10</sup> Yūcuán na te ni quecoo tēe jeē ní quívicoo xíhna ñuhún. Te cájeni ni de jeé cuehē gā quiyāhu de. Te ñin-ni denario ni caquihín ñin ñin de. <sup>11</sup> Te nuū ní caquihín de, te ni caquejeé de cáhān sōo de siquí tēe chíí ñuhun, áchí de: <sup>12</sup> Máá ná jíjnāhan ná, ndiáca ni casájñiñu ná, te ni candoho ná jeé jñhí. Te tēe yáha jeé ni quívicoo sandihí, chí máá ñin hora-ni ni casájñiñu de. Te inuú-ni ni chíyāhu ní sáña jíin de, áchí de. <sup>13</sup> Te tēe chíí ñuhun ni cahān jíin ñin de: Amigo, nasūu jeé tú

váha sáha ri jín ró. ¿A tu ní sándaā yō jeē ñn denario quiyáhu ró, chí naún? <sup>14</sup> Núu súcuan te quihín yáhu ró te quinhun rō. Chí cúní rí jeē tēe ní quívicoo sandíhi yáha, inuú quiyáhu de jín máá ró. <sup>15</sup> ¿Te á tu cuu sáha rí ndese cúní rí jín xúhun máá rí? ¿Te chí cúcuésún ní rō jeē ní chiyáhu váha rí de jínáhan de siquí jeē váha ní rí? áhí de. <sup>16</sup> Te nájnūhun ní sáha tēe chí ñuhun, suni súcuan sáha Yaā Dios. Chí ñayuu cácuu sandíhi, nduu i nuū. Te ñayuu cácuu nuū, nduu i sandíhi. Chí cuehē ñayuu cána ya jeē candíje i ya. Te jecu-ni i cándíje, te nácáji ya máá i jeē ndúu i sēhe ya. Achí yá.

*Jeē ní cáhān tucu Jesús jeē cúu yā  
(Mr. 10.32-34; Lc. 18.31-34)*

<sup>17</sup> Yūcuán na te ná ní quihín Jesús ichi cuahān yā ñuu Jerusalén, te ní cana sín ya ndihúxi uū tēe cáscuáha jín yá. Te ní cahān yā jín de:

<sup>18</sup> Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū. Yaā ní nduu tēe, nuū sutú cácujeñhu jín nuū tēe cástéén tutu ley. Te ndonda de siquí rí jeē cúu rí. <sup>19</sup> Te squívi de ruhū nuū tēe nación Roma jeē cáyūcú Jerusalén cándacu jniñu. Te táca tēe un sácata de nuū rí. Te cani de ruhū, te sáa te cahni de ruhū jicā cruz. Te nuū uní quívi te natecu rí. Achí yá.

*Jeē ní jicān naná Jacobo jín Juan ñn favor nuū yā*

*(Mr. 10.35-45)*

<sup>20</sup> Yūcuán na te ní quee ñasihí Zebedeo nuū yā jín sēhe ña Jacobo jín Juan. Te ní jecuíñi yití ña nuū yā, jicān ña ñn favor nuū yā. <sup>21</sup> Te ní cajnúhun yā ña:

¿Na vé cuní rō?

Te ní cahān ña:

Cuáha ní jnúhun jeē quívi ndácu ní jniñu te conēne ndindúú sēhe ná yáha xiin ní, ñn i lado váha ní, te inga i lado jecó ní, achí ña.

<sup>22</sup> Yūcuán na te ní cahān Jesús jín Jacobo jín Juan:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquí rí? ¿Te á canda ró ndoho xeēn rō nájnūhun ndoho rí? Achí yá.

Te ní cacahān de:

Cuu sáha ná.

<sup>23</sup> Te ní cahān yā jín de:

Jendaá jeē ndoho rō jnúndóho nájnūhun jeē quíji siquí rí, te ndoho xeēn rō nájnūhun ndoho rí. Te jeē cónēne ró lado váha rí jín lado jecó rí, nasūu ruhū cúu jeē cuáha jnúhun. Chí je iyó túhva cuu táca tēe jeē ní nacáji Tátá rí, te tēe un níhñ. Achí yá.

<sup>24</sup> Te uxí gā tēe cáscuáha jín yá ní cajini de jnúhun yáha. Te ní caquítí ní de nuū uú ñani ún. <sup>25</sup> Te Jesús ní cana ya de, te ní cahān yā jín de:

Cájini rō ndese cásaha tēe cácujeñhu nuū ñayuu táca nación. Chí cándacu níhñ de jniñu nuū i, te máá de cáhí ndese coo. <sup>26</sup> Te máá ró jijnáhan ró, chí ma sáha ró súcuan. Chí núu ndé ñn ró cúní cujeñhu, sa suhva cuajniñu ró núu jnáhan ró. <sup>27</sup> Te núu ndé ñn ró cúní cuu nuū, sa suhva sáha ró máá ró mozo nuū jnáhan ró. <sup>28</sup> Chí suni súcuan sáha ruhū, Yaā ní nduu tēe, chí nasūu jēe véji rí jeē cuajniñu ñayuu nuū rí, chí sa suhva véji rí jeē cuajniñu rí nuū ñayuu. Te cuáha rí máá rí cuu rí návaha jnama rí cuehē ñayuu, achí yá.

*Jeē ní nasávaha ya uū tēe cuáá*

*(Mr. 10.46-52; Lc. 18.35-43)*

<sup>29</sup> Yūcuán na te ní quenda ya jín de ñuu Jericó. Te cuehē ndasí ñayuu ní candiquín i ya. <sup>30</sup> Te yuhíchi un cáyūcu uū tēe cuáá. Te ní cajini de jnúhun jeē yáha Jesús cuahān yā, te ní cacana jee de:

Máá ní jeē cúu ní Sēhe yucūn David, cundáhú ní ní sáña, achí de.

<sup>31</sup> Te ñayuu un ní cacahān i nuū de jeē na cási de yuhu de. Te víhyá gā ní cacana jee de:

Máá ní jeē cúu ní Sēhe yucūn David, cundáhú ní ní sáña víi, achí de.

<sup>32</sup> Te ní jecuíñi Jesús, te ní cana ya ndindúú tēe cuáá un, te ní cajnúhun yá de:

¿Na vé sáha rí jín rō cácuni rō?

<sup>33</sup> Te ní cacahān de jín yá:

Jeē na ndúndijin tinūu ná cácuni ná, achí de.

<sup>34</sup> Te ní cundáhú ní yā de. Te ní tee ya ndaha ya tinūú de. Te ní candundijin-ni tinūú de. Te ní candiquín de ya cuangoo de jín yá.

*Jeē ní quívi Jesús ñuu Jerusalén*

*(Mr. 11.1-11; Lc. 19.28-40; Jn. 12.12-19)*

## 21

<sup>1</sup> Te nuū cuácuyajni ya ñuu Jerusalén, te ní jinū yā jín tēe cáscuáha jín yá ñuu Betfagé, jeē íne jehē yucu Olivos. Te ní tají yá uū tēe cáscuáha jín yá jeē quíngoo de. <sup>2</sup> Te achí yá jín de:

Cuáhān ñuu lulí íne ichi núú. Te yūcuan níhñ rō ñn burra, núhñí tī jín ñn burro lulí. Te ndaji ró tī, quíjicoo ró jín tī nuū rí.

<sup>3</sup> Te núu ndé ñn cahān jín ró, te cachí rō nuū: Máá Jítoho yō jini níhún yá tī, achí rō. Yūcuán na te siáá-ni i tī, quíji ró jín tī, achí yá.

<sup>4</sup> Te súcuan ní cuu táca jniñu yáha návaha squícu jnúhun ní cahān tēe ní nacani jnúhun Yaā Dios nde jenahán, yósó núú tútu:

<sup>5</sup> Cachí rō nuū ñayuu ñuu Jerusalén jeē naní ñuu Sión:

Yáhá condēhe ró jeē véji Rey rō.

Tu sájéñhu ya máá yá, chí máá burra-ni yósó yá,

jín burrito, sēhe quiti ndíso.

Achí tutu.

<sup>6</sup> Yūcuán na te tēe cáscuáha un cuángoo de, te ni casáha de nájñuhun ni ndacu Jesús jniñu nuū de. <sup>7</sup> Te ndéca de burra jíin séhe tí, ni ndecoo de nuū yá. Te ni casoó de sahma de siquí tí, te ni jecosó yá tí. <sup>8</sup> Te cáhiin cuehē ñayuu, te ni cascáá i sahma i ini ichi. Te sava ga i ni cajehnde ndaha ñúú, te ni cachucun i ini ichi. <sup>9</sup> Te ñayuu cuangoo ichi núú jíin ñayuu cuangoo ichi yátá, cácana jee i:

Yōhyo cújéhu Yaā cúu Sēhe yucūn rey David. Yōhyo vāha Yaā cúu Yaā jeē véji jíin jniñu máá Jítóho yō Yaā Dios. Te yōhyo cújéhu máá Yaā Dios. Achí i.

<sup>10</sup> Te nuū ni quívi ya ñuu Jerusalén, te ndihi ñayuu ñuu un ní cacuvaá i, te cuehē i cájnūhun jnāhan:

¿Ndé tēe cúu tēe yáha? achí i.

<sup>11</sup> Te ni cacahān ñayuu vējicoo jíin yá:

Yāha cúu Jesús jeē nācani nūhun Yaā Dios, jeē véji nde ñuu Nazaret ndañúú Galilea. Achí i.

*Jeē ní quenehen ya ñayuu ini templo*

(Mr. 11.15-19; Lc. 19.45-48; Jn. 2.13-22)

<sup>12</sup> Yūcuán na te ni quívi Jesús ini templo cáhnu Yaā Dios. Te ni quenehen ya táca ñayuu cájeen quití te cánaxico núú ñayuu jeē socó i. Te ni scotúú ndeyi ya táca mesa tēe cástáyi xūhún, jíin silla tēe cáxicó paloma. <sup>13</sup> Te achí yá jíin i:

Yósó núú tútu íi jeē cahān Yaā Dios: Vehe ri chí vehe nuū cájicān tahú cúu, achí Yaā Dios. Te máá ró jijnāhan ró, chí nájñuhun yaū cava ñacuñhá ní canasáha ró. Achí yá.

<sup>14</sup> Yūcuán na te sava ñayuu cuaá jíin ñayuu chacuá ní quecoo i nuū yá ini templo un. Te ni nasávāha ya i. <sup>15</sup> Te sutú cácuéhu jíin tēe cástéén tutu ley Yaā Dios, ni cajito de táca jniñu jéhu sáha ya, te ni cajini de jeē cácana jee sūchi lúli ini templo: Yōhyo cújéhu Yaā cúu Sēhe yucūn rey David, achí i. Te ni caquití ni de. <sup>16</sup> Te ni cacahān de jíin yá:

¿A tu jíni ró jéē sūcuan cácahān sūchi yáha? achí de.

Te ni cahān Jesús jíin de:

Jíni rí. ¿Te á ná tu cahu ró jéē yosó núú tútu íi jeē suhva cáhān in tēe jíin Yaā Dios? Sáha ní jéē táca sūchi lúli jíin sūchi cájexin, vāha ndasí cáhān i jeē Yaā cujéhu cúu Cristo. Achí.

<sup>17</sup> Te ni stóo ya de. Te ni quenda ya ñuu Jerusalén, cuahān yá nde ñuu Betania. Te yūcuan ní ndōo ya jecuaā ún.

*Jeē ní cahān yá nuū yujnu higo*

(Mr. 11.12-14, 20-26)

<sup>18</sup> Te jenéhen inga quívi cuanuhun yá ñuu Jerusalén, te jíi yá sóco. <sup>19</sup> Te ni jito ya in nundéhe higo, in yuhíchi. Te ni jehēn yá jehē. Te tú na ndehē ní níhín yá, chí máá ndaha-ni ín. Te ni cahān yá jíin:

Vijna te ma cúun cuiti gā ndehē xiní ró, achí yá.

Te ni ichi-ni yujnu higo ún. <sup>20</sup> Te tēe cáscuáha jíin yá, ní canaa ní de cájito de. Te ni cacajnūhun de ya:

¿Ndese ní sáha ní jéē yachí-ni ní ichi yujnu higo? achí de.

<sup>21</sup> Te ni cahān yá jíin de:

Jendaá cahān rí jíin ró, núu candíje ró te tú cani siquí ní ró, te cuu sáha ró jniñu jéhu nájñuhun ní sáha rí jíin yujnu higo. Te nde jniñu jéhu ga cuu sáharó, chí nde cuu cahān ró jeē cújiyo yucu yáha, quihín nuū mar, te sáha nájñuhun cahān ró. <sup>22</sup> Te táca jéē cacán tahú ró jijnāhan ró, te núu candíje ró jéē níhín ró, te níhín ró. Achí yá.

*Siquí jeē ndíso jniñu Jesús*

(Mr. 11.27-33; Lc. 20.1-8)

<sup>23</sup> Te ní quívi tucu ya ini templo cáhnu. Te níni stéén yá jñuhun, te sutú cácuéhu jíin táca tēe jéhu jeē cándacu jniñu nuū ñayuu hebreo, ní quecoo de nuū yá. Te ni cacajnūhún de ya:

¿Ndé ní níhín jniñu ró jéē sáha ró jniñu yáha? ¿Te ndé in ní tee jniñu siquí ró jeē sáha ró sūcuan? Achí de.

<sup>24</sup> Te ní cahān Jesús:

Suní ruhū, cajñuhun rí rohó in jñuhun jijnāhan ró, te núu cuu stió cuñí ró, yūcuán na te cachí rí nuū ró ndé ní níhín jniñu rí jeē sáha rí jniñu yáha. <sup>25</sup> ¿Ndé in ní tee jniñu siquí Juan jeē ní scuándute de? ¿A Yaā Dios chí táca tēe? achí yá jíin de.

Yūcuán na te ní candajnūhun máá de:

Núu cahān yō jeē Yaā Dios ní tee ya jniñu un siquí Juan, te cahān de jíin yó: Núu sūcuan ¿te najehē tu ní cácaandíje ró de? <sup>26</sup> Te núu cahān yō jeē ñayuu ní catee jniñu un siquí de, te cáyūhu yō ñayuu, chí ndivii i cácaandíje i jeē tēe ní nacaní jñuhun Yaā Dios ní cuu ndije Juan. Achí de cácahān máá de.

<sup>27</sup> Te ní cacahān de jíin Jesús:

Tu cájini rí, achí de.

Yūcuán na te ní cahān yá jíin de:

Ní ruhū, suni ma cachí rí nuū ró ndé in ní tee jniñu siquí rí sáha rí jniñu yáha, achí yá.

*Jñuhun yátá siquí uú séhe yí*

<sup>28</sup> Te ní cahān gā yá jíin de:

Cuni nahín ró jñuhun yátá yáha: in tēe ní Iyo uú séhe yí de. Te ní cahān de jíin in i: Séhē, quihín ró taxín ró ndehē uva rí vijna, achí de. <sup>29</sup> Te ní cahān i: Ma quihín na, achí i. Te ní cunúu, te ní nacani ní i, te cuahān i nuū jniñu ún. <sup>30</sup> Te tēe un ní jehēn de nuū inga séhe de, te suni sūcuan ní cahān de jíin i. Te ní cahān i: Cuu núu sūcuan, te quihín na, achí i. Te tu ní jéhen i. <sup>31</sup> ¿Te ndese cájeni ní ró? Jeē ndíndúú i, ¿ndé in ní squícu jniñu cúní tatá i? achí yá.

Te ní cacahān de:

Sūchi jéē ní cahān de jíin xíhna gā, achí de.

Te ni cahān Jesús jín de:

Súcuan cúu, te jendaá cahān rī jín ró jeē tēe cástútú xúhun renta jín ñahan cájica jnéni, yachí cáncani ni i jeē stóo i cuéchi i te quivícoo i ndaha Yaā Dios jeē ndacu ya jniñu nū i, te máá ró jijnáhan ró chi ma quiví ró. <sup>32</sup> Chi ni quiji Juan, ni steén de ndese condiquín ró jñuhun ndaá, te tu ní cácadíje ró jñuhun ni cahān de. Te sa suhva tēe cástútú xúhun renta jín ñahan cájica jnéni, ni cacandíje i jñuhun ni cahān de. Te máá ró, vésú ni cajito ró jéé ní cacandíje i, te tu ní cáncani cuiti ni ró jeē candíje ró. Achí yá.

*Jñuhun yátá síquī tēe neé cásjáñiñu nuū uva*

(Mr. 12.1-12; Lc. 20.9-19)

<sup>33</sup> Cuni sōho inga jñuhun yátá jijnáhan ró: Ni Iyo ñn tēe chíí ñuhun. Te ni nachuhun de cuehē ndehē uva. Te ni jesi de corral, te ni sáha de ñn nuū cūhun ndehē un táxín. Te ni jeni de ñn vehe súcun návaha cuu coto de níí cáhnu.

Te ni stóo de nuū sava tēe sáñiñu nuū, te cuu sava de ndehē jín. Te ni tee de ichi cuahān jicá de. <sup>34</sup> Te máá tiempo ndutútú uva, te ni tají de jecu mozo cuanuquihin sava uva nuū tēe cásjáñiñu ún. <sup>35</sup> Te tēe un ní cajni de mozo un. Te ñn i ni cacani de, te inga i ni cajehni de, te inga i ni cajéhe de yuū xini. <sup>36</sup> Te tēe chíí uva ni tají tucu de jecu gā mozo cuangoo, cuehē gā vésú jeē xíhna ñúhún. Te suni súcuan ni casáha tēe un jín ndhi mozo un.

<sup>37</sup> Te jeē sándihí na te ni tají de sēhe de cuahān. Te jeni ni de: Tēe ún chi cuatáhú de jijnáhan de nuū sēhe rí. <sup>38</sup> Te tēe cásjáñiñu ún, núu ní cajito de nuū sēhe tēe chíí uva, te ni cacahān maá: Tēe chíí táhú cúu jeē yáha. Na cáhni yō de, te ndóo tahú de cuu yó, achí. <sup>39</sup> Te ni cajni de i, te ni caquenehen de i inga lado, te ni cajehni de i. Achí yá.

<sup>40</sup> Yūcuán na te ni cajñuhun yá de:

Núu súcuan te núu na quiji tēe chíí uva un, ¿te ndese sáha de jín tēe cásjáñiñu ún? achí yá.

<sup>41</sup> Te ni cacahān de jín yá:

Ma cundáhú cuiti ni de táca tēe casáha jniñu neé un, chi cahni de. Te cuáha de ñuhun cáá uva un núu inga sava tēe sáñiñu nuū, cuu sava de ndehē jín. Te quiví ndutútú ndehē, te tēe ún nacuaāha de sava ndehē nuū tēe chíí uva. Achí de.

<sup>42</sup> Te ni cahān Jesús jín de:

¿Te a ná tu cahu ró jñuhun yáha jeē yosó núu tútu íi, jeé ruhú cúu nájñuhun ñn yuū? Chí achí tutu:

Yuū jeé ní casquéhichí tēe cájeni vehe, yuū yáha nduu jeé quítuu vehe.

Máá Jítoho yō Yaā Dios ni sáha ya súcuan, te cánaa ni yō jito yó jniñu yáha.

Achí tutu. <sup>43</sup> Núu súcuan te cahān rī jín ró jeé cujiyo-ni jeé ndácu Yaā Dios jniñu nuū ró jijnáhan ró, te nacuaāha ya jniñu un núu inga ñayuu jeé síquīcu váha i jniñu ndácu ya nájñuhun cúní yá. <sup>44</sup> Te ñayuu tu cácadíje, ndóho i nájñuhun ndóho ñayuu jeé cotúu síquī yuū te jnánhú i. Te quiví sándaā Yaā Dios cuéchi, te ñayuu tu cácadíje, ndóho i nájñuhun ndóho ñayuu jeé nínga yuū síquī i te cundihí i sáha. Achí yá.

<sup>45</sup> Te sutú cácujeñhu jín tēe grupo fariseo ni cajini sōho de táca jñuhun yátá ní cahān yá. Te ni cajecūhun ni de jeé síquī maá de cúu jñuhun yátá ní cahān yá síquī tēe cásjáñiñu nuū uva jín tēe cájeni vehe. <sup>46</sup> Te ni canducú de modo jni de ya. Te cáyuhú de jeé quiti ni ñayuu, chí cájeni ni i jeé tēe nácani jñuhun Yaā Dios cúu ya.

*Jñuhun yátá síquī vico nándāha*

## 22

<sup>1</sup> Yūcuán na te ni cahān tucu Jesús inga jñuhun yátá jín de jijnáhan de:

<sup>2</sup> Súcuan cúu jeé ndácu Yaā andiví jniñu nuū ñayuu: Cúu nájñuhun ñn rey jeé sáha de ñn vico jeé nándāha sēhe yí de. <sup>3</sup> Te ni tají de táca mozo de cuacana ñayuu jeé ní cahān de jín jéé quijicoo. Te ñayuu ún tu ní cáculi i quijicoo i. <sup>4</sup> Te ni tají tucu de jecu gā mozo quingoo, te achí de jín: Cahān jín ñayuu ní cana rí un jéé iyó túhva ndeyu. Chí je ni jehni rí stiquí rí jín táca gā quiti ní nduu, te ndihí je iyó túhva. Nehen jijnáhan ró vico nándāha. Achí ró jín i. Achí de. <sup>5</sup> Te ñayuu ní cana de ún tu ní casáha i cuenta. Chí ñn i cuahān nuū ítu i, te inga i cuahān nuū jniñu sáha i. <sup>6</sup> Te sava ga i ni cajni i táca mozo rey, te ni casacatá i nuū, te ni cajehni i. <sup>7</sup> Yūcuán na te yōhyo ni quiti ní rey. Te ni tají de soldado de ni jengoo, ni cajehni de ñayuu ní cajehni ndiyi ún, te ni cajehnu de ñuu i. <sup>8</sup> Yūcuán na te ni cahān de jín sava ga mozo de: Ndihi je iyó túhva jeé cóo vico nándāha. Te ñayuu ní cana rí ún, tu iyó váha jeé quijicoo i chí nasūu ñayuu váha cácu i. <sup>9</sup> Núu súcuan te cuahān jijnáhan ró táca núu náquijnáhan calle. Te cana ró núu nasaa ñayuu ñihín ró, na quijicoo i vico nándāha. Achí de. <sup>10</sup> Te ni quendacoo mozo un cuángoo táca ichi. Te ní castútú de ndihí ñayuu ní canihín de, cúu ñayuu cunéé, cúu ñayuu váha. Te súcuan te ní chitú ñayuu ini vehe nuū iyó vico nándāha.

<sup>11</sup> Te ni quiví rey ini vehe jeé cahān de jín ñayuu ni cutútú. Te ni jito de nuū ñn tēe jeé tu ñuhun sahma jeé ní jéhe de cūhun ñayuu quijicoo vico nándāha. <sup>12</sup> Te ni cahān de jín tēe ún: Amigo, ¿ndese ni quiví ró yáha jeé tu ñuhun ró sahma vico nándāha? achí de. Te máá tēe ún tu ní cahān cuiti de. <sup>13</sup> Yūcuán na te ni cahān rey jín tēe cájeni cohó: Jni de te cuhni ró ndaha de jehé de, te quenehen

ró de na quíhín de nuū quéhe nuū néē. Te yūcuan ndáhyū de te nacayíhí yuhu de jeē ndóho xeēn de. Achí rey. <sup>14</sup> Chi cána Yaā Dios cuehē ñayuu jeē na cándjje i. Te jecu-ni i cándjje, te máá i nácāji ya jeē ndúu i sēhe ya. Achí Jesús.

*Siquí xúhun renta*  
(Mr. 12.13-17; Lc. 20.20-26)

<sup>15</sup> Yūcuán na te cuango tēe grupo fariseo. Te ni candajnūhún de núu ndese sáha de návaha cahān yā ñn jnūhun jeē nihín de cuechi siquí ya. <sup>16</sup> Te ni catajé de jecu tēe cáscuáha jíin máá de jíin tēe grupo Herodes cuango de. Te ni cacahān de jíin yá:

Maestro, cájini na jēē tēe cahān ndaā cúu ní, te stéén ndaā ní ndese squicu ñayuu nuū Yaā Dios. Te tu yúhú ní jeē cahān ni ñn ñayuu siquí ní, chí tu sáha ní cuenta ndese cúu ñn ñn i, chí inuú-ni sáha ní jíin i. <sup>17</sup> Núu súcuan te cahān ní ndese jéni ní ní: ¿A íyó váha jeē chúnua yō renta nuū rey nación Roma jeē jnā nación yō, chí tuú? áchí de.

<sup>18</sup> Te ni jini Jesús jeē cájito ndee de ya. Te ni cahān yā jíin de:

Tēe stáhú-ni cácuu ró. ¿Najehē cájito ndee ró ruhū? <sup>19</sup> Stéén xúhun jēē jéconaa renta na cóto ri, achí yá.

Te ni castéén de ñn denario nuū yā. <sup>20</sup> Te ni jito ya, te ni cajnūhun yá de:

¿Ndé ñn nuū cúu jeē ndeé nuū xúhun yáha, te ndé síhví cúu jeē ndeé yáhá?

<sup>21</sup> Te ni cacahān de jíin yá:

Nuū jíin síhví rey un cúu, áchí de.

Yūcuán na te ni cahān yā jíin de:

Núu súcuan te nacuáha ró núu rey un jēē yíhi cuenta nuū de, te nacuáha ró núu Yaā Dios táca jēē yíhi cuenta nuū máá yá, achí yá.

<sup>22</sup> Te nuū ní cajini de jeē ndichí ní cahān yā jnūhun yáha, te ni canaa ni de, te ni castóo de ya, te cuango de.

*Jeē ní cacajnūhún de siquí jeē nátecu ndíyi*  
(Mr. 12.18-27; Lc. 20.27-40)

<sup>23</sup> Te suni quiví un ní quecoo jecu tēe grupo saduceo nuū yā. Te tēe un cacahān jeē tu nátecu cuiti ndíyi. Te ni cacahān de jíin yá siquí ñn jnūhun, áchí de:

<sup>24</sup> Maestro, Moisés ni cahān de jeē núu ñn tēe cuu de, te ndōo ñasihí de, te núu tú sēhe de ní íyo jíin ña, núu súcuan te cánuú jeē ñani de naquihín ñasihí de, te sēhe de jeē cácu jíin ña nucuifí nuū ndíyi ñani de. Achí Moisés.

<sup>25</sup> Te ñuu na ní íyo uxá ñani. Te tēe núu ní quijnáhan de jíin ñahan. Te ni jihí de. Te jeē tú sēhe de ní íyo, te ni ndōo ñasihí de nuū ñani de. <sup>26</sup> Te tēe ún suni ní jihí de, te tú na sēhe de ní íyo tucu. Te suni súcuan tēe uní, nde jíin ndihúxá de. <sup>27</sup> Te nuū ní ndíhi de ní cajihí, te suni ní jihí ñahan ún. <sup>28</sup> Núu súcuan te quiví nátecu ndíyi, ¿ndé ñn de cuu ña ñasihí de? Chí ndihúxá de ní condeca de ña. Achí de jíin yá.

<sup>29</sup> Yūcuán na te ni cahān yā jíin de:

Yóhoyo cástívi ró jnūhun siquí jeē tu cájecūhun ní ró jeē cahān tutu ñ, ni tu cájini ró jeē iyó poder Yaā Dios jeē nastécu yā ndíyi. <sup>30</sup> Chi quiví nátecu ndíyi, te tuá na jnūhun quijnáhan tēe jíin ñahan coo. Chi coo i nájnūhun ndajehé Yaā Dios andíví. <sup>31</sup> Te siquí jeē nátecu ndíyi, ¿á tu ní cácahu ró tutu jnūhun jeē cahān Yaā Dios jíin ró? <sup>32</sup> Máá rí cúu Yaā Dios Abraham jíin Isaac jíin Jacob, achí Yaā Dios. Chí vésú je ní cajihí de, te cátecu de nuū iyó máá yá, chí cúu ya Yaā sáha jeē técu ñayuu ní cáni. Achí yá jíin de.

<sup>33</sup> Te ñayuu un ní canaa ni i cájini nahín i jnūhun stéén yá.

*Jniñu cánuú ndasí gá jeē ní ndacu Yaā Dios*

(Mr. 12.28-34)

<sup>34</sup> Yūcuán na te tēe grupo fariseo ni cajini de jeē ní cajesi tēe saduceo yuhu de ní sáha ya. Te ni candutútu de nuū yá. <sup>35</sup> Te ñn de jeē cúu tēe stéén tutu ley Yaā Dios, ni cajnūhún de ya, chí coto ndee de ya cuní de:

<sup>36</sup> Maestro, ¿ndé ñn cúu jnūhun ndácu jniñu cánuú ndasí gá nuū tútu ley? achí de.

<sup>37</sup> Te ni cahān Jesús jíin de:

Coo maní ndasí ró jíin máá Jítoho ró Yaā Dios, nde jnāá ndasí ró sáha ró ndíhi jeē cúsi ní yá, nde jíin ini jíin ánuá ró, jíin ní jēé níjmní ró, achí tutu. <sup>38</sup> Yáha cúu jniñu ndácu ya jeē cujéhu ga te cánuú ndasí gá. <sup>39</sup> Te jniñu uū jeē ní ndacu ya, suni súcuan cáhán: Cundáhú ní ró jnāhan ró nájnūhun cundáhú ní ró máá ró. <sup>40</sup> Te chíjī ndíndúu jnūhun yáha ní quenda ndíhi ley jeē ní tee Moisés, jíin ndíhi jeē ní castéén tēe ni canacani jnūhun Yaā Dios, achí yá.

*Siquí jeē cúu Cristo sēhe yucūn David*  
(Mr. 12.35-37; Lc. 20.41-44)

<sup>41</sup> Te níni cáyūcu tútu gá tēe fariseo un, te Jesús ni cajnūhun yá de:

<sup>42</sup> ¿Ndesé cájini ní ró siquí Cristo? ¿Sēhe ndé yucūn cúu ya?

Te ni cacahān de:

Sēhe yucūn David, achí de.

<sup>43</sup> Te ni cahān yā jíin de:

Núu súcuan ¿te ndese cúu jeē David ní cahān de Jítoho de ya, ní sáha Espíritu Santo nde jengahán? Chí ní cahān de:

<sup>44</sup> Máá Jítoho yō Yaā Dios ní cahān yā jíin Jítoho rí, Yaā quiji:

Cucōo ró lado váha ri nuū cujéhu ró, te na sáha ri jeē quende ró poder táca jēé cájito uhū rohó.

Achí Yaā Dios. Achí David. <sup>45</sup> Te núu sēhe yucūn David cúu Cristo, ¿te ndese cúu jeē ní cahān de jeē Jítoho de cúu ya? áchí yá.

<sup>46</sup> Te ní ñn de tu ní cúu stió cuñí cuiti de jnūhun nuū yá. Te nde quiví ún tuá ní ñn de ní chúndeyí ní de cajnūhún de ya.

*Jeē ni cāhān yā jeē iyó cuēchi de jijnāhan de  
(Mr. 12.38-40; Lc. 11.37-54; 20.45-47)*

## 23

<sup>1</sup> Yūcuán na te ni cahān Jesús jīn ñāyuu jīn tēe cācuáha jīn yá:

<sup>2</sup> Tēe cástéén tutu ley Yaā Dios jīn tēe grupo fariseo, cājeni ni de jeē ndiso jniñu de jeē steén de ley jeē ni jéhe ya nuū Moisés. <sup>3</sup> Núu súcuan te cuatáhú ró te squícu ró táca jéé cāndacu de nuū ró. Te ma sáha ró nájñuhun casáha máa de. Chi cācāhān-ni de, te tu cásquicu de. <sup>4</sup> Chi suni cástéén de táca ley ni catava máa de veē yí sáha, de cátee de siquī ñāyuu, te tu cācundeyí i squícu i. Te máa de jijnāhan de, chi ni ñin xini ndáha de tu cāscānda de jeē squícu de. <sup>5</sup> Te máni siquī jeē na cuājñuhún ñāyuu de cúu ndihi jéé casáha de. Chi cānujñahan ni de cuhni de cuehē jñuhun tutu ñi jneē de jīn ndaha de. Te suni cāsácáni ga de yuhvā yusáhma de jeē steén jeē cācujéhu ga de veē inga ñayuu. <sup>6</sup> Te cānujñahan ni de cucōo de nuū silla yñíuhún gá nuū cáyeji ñayuu vico, jīn silla yñíuhún gá ñi vehe ñi sinagoga. <sup>7</sup> Te suni cānujñahan ni de jeē cahān yñíuhún ñāyuu jīn de nuū calle, jīn jéé cahān i maestro jīn de.

<sup>8</sup> Te máa ró jijnāhan ró, ma cuáha ró jñuhun jeē cahān ñayuu maestro jīn ró. Chi ñnuū cācuu ndihi ró jéé cúu ró hermano, te iyó ñn-ni Maestro ró jeē cúu ruhū, Cristo. <sup>9</sup> Te ma chiñíuhún ró ni ñin tēe ñayívi yáha jeē cahān ró padre jīn de. Chi iyó ñn-ni Tátá ró jijnāhan ró, Yaā ndeé andiví. <sup>10</sup> Te suni ma cuáha ró jñuhun jeē cahān i jitohe jīn ró. Chi iyó ñn-ni Jitoho ró, te suu cúu ruhū, Cristo. <sup>11</sup> Te tēe mēñū ró jijnāhan ró jeē jejniñu nuū jñahan, suu de cúu jeē cūjéhu ga. <sup>12</sup> Chi tēe jeē sajéhu de máa de, sa ndululí de. Te tēe jeē sálulí de máa de, sa ndujéhu de.

<sup>13</sup> Nacā xeēn ndoho róhó tēe cástéén tutu ley jīn róhó tēe fariseo, chi tēe stáhú-ni cācuu ró. Chi cājesi ró jeē quívi ñayuu ndaha Yaā andiví jéé ndacu ya jniñu nuū i. Chi tu quívicoo máa ró, ni tu cājéhe ró jñuhun quívicoo ñayuu nducú quívi.

<sup>14</sup> Nacā xeēn ndoho róhó tēe cástéén tutu ley jīn róhó tēe fariseo, chi tēe stáhú-ni cācuu ró. Chi cáquende ró vehe ñahan ní caquendōo ndáhú. Yūcuán na te cājicān tahú nahān ró návāha caní ni ñayuu jeē tú na cuēchi ró. Jeē yūcuán xeēn gā ndoho ró castigo.

<sup>15</sup> Nacā xeēn ndoho róhó tēe cástéén tutu ley jīn róhó tēe fariseo, chi tēe stáhú-ni cācuu ró. Chi ní ñuhun íchi jīn ní mar cājica cuu ró cānducú ró ñin ñayuu scandíje ró sáhān máa ró. Te núu ni candíje i, te casáha ró jéé vihyá gā cúu cuēchi i jeē quihín i infierno vesú máa ró.

<sup>16</sup> Nacā xeēn ndoho ró, chi cācuu ró nájñuhun tēe cuáá jéé steén íchi nuū ñāyuu.

Chi cācāhān ró: Núu ndé tēe jéjnūhun téyí de, te núu cahān de jeē Yaā Dios jeē ndeé ñi templo na cuáha ya castigo núu ma squícu de, yūcuán na te tu cānuū squícu de. Te núu cahān de jeē Yaā Dios jeē chíí oro jeē iyó ñi templo, na cuáha ya castigo núu ma squícu de, yūcuán na te cānuū squícu nahín de, cācāhān ró. <sup>17</sup> Tēe cānéé tēe cuáá cācuu ró jéé castívi ró jñuhun cācāhān ró. ¿Ndeé ñin cúu jeē cūjéhu ga, á oro un chíí Yaā Dios jeē ndeé ñi templo jeē sáhií oro un? <sup>18</sup> Te suni cācāhān ró: Núu ndé tēe jéjnūhun téyí de, te núu cahān de jeē Yaā Dios jeē chíí altar na cuáha ya castigo núu ma squícu de, yūcuán na te tu cānuū squícu de. Te núu cahān de jeē Yaā Dios jeē chíí ndajñíu jeē cāsocō nuū altar, na cuáha ya castigo núu ma squícu de, yūcuán na te cānuū squícu nahín de, cācāhān ró. <sup>19</sup> Tēe cānéé tēe cuáá cācuu ró jéé castívi ró jñuhun cācāhān ró. ¿Ndeé ñin cúu jeē cūjéhu ga, á ndajñíu yúcu nuū altar, chíí Yaā Dios jeē sáhií yā ndajñíu ún? <sup>20</sup> Núu súcuan te tēe jéjnūhun téyí, te núu ndácunehen de Yaā Dios jeē chíí altar, núu súcuan te nde jīn ndajñíu yúcu nuū altar ndácunehen de. <sup>21</sup> Te tēe jeē jéjnūhun téyí, te núu ndácunehen de templo, núu súcuan te nde jīn Yaā Dios jeē ndeé ñi templo ndácunehen de. <sup>22</sup> Te tēe jéjnūhun téyí, te núu ndácunehen de andiví, núu súcuan te suni ndácunehen de mesa Yaā Dios te nde jīn máa Yaā Dios jeē ndeé nuū mesa un.

<sup>23</sup> Nacā xeēn ndoho róhó tēe cástéén tutu ley jīn róhó tēe fariseo, chi tēe stáhú-ni cācuu ró. Chi casáha ró úxi úxi nuhñi tamínú jīn yucú anís jīn yucú comino, te cāsocō ró ñin ñin siquī táca úxi un nuū Yaā Dios. Te cástóo ró jñuhun cānuū ndasí gá nuū ley, suu jeē cáca ndaā ró, jīn jéé cundáhú ni ró jñahan ró, jīn jéé candíje ró. Táca jéé yáha cānuū sáha ró núu, te suni ma stóo ró jéé socó ró táca yúcu ún. <sup>24</sup> Cācuu ró nájñuhun tēe cuáá jéé steén íchi nuū ñayuu. Chi cásquicu ró ñin jeē lulí gá un, te cástóo ró jéé cānuú gá. Te suu cúu nájñuhun jeē cātava ró chūcún ndíhi jeē ñíuhun nuū ndúxi, te cācocó ró ñin quiti cāhnu jeē naní camello.

<sup>25</sup> Nacā xeēn ndoho róhó tēe cástéén tutu ley jīn róhó tēe fariseo, chi tēe stáhú-ni cācuu ró. Chi nájñuhun jeē cāncate ró yātā vaso jīn yātā cohó. Te íchi ñi ró chi ñíuhun máni máa jñuhun cuihná jīn jñuhun ndíyo ni. <sup>26</sup> Tēe cuáá cācuu ró, fariseo. Xihna gā sáha ró jéé coo ndoo ñi anuá ró, te yūcuán na te suni coo ndoo táca jéé casáha ró jéé cājito ñayuu nuū.

<sup>27</sup> Nacā xeēn ndoho róhó tēe cástéén tutu ley jīn róhó tēe fariseo, chi tēe stáhú-ni cācuu ró. Chi cāndāa ró nájñuhun vehe ndíyi nuū panteón jeē cáyaa. Chi íchi yātā jito luu, te íchi ñi ñíuhun chítu yiqui ndíyi jīn táca jéé tehyú. <sup>28</sup> Te súcuan cācuu máa ró, chi

ichi yátá rō casáha ró jeē téé ndaā cácuu rō núu ñáyyuu. Te ichi ini rō ñúhun chitú jnúhun stáhú-ni jíin jnúhun néé.

<sup>29</sup> Nacā xeēn ndoho rōhó téé cástéén tutu ley jíin rōhó téé fariseo, chí téé stáhú-ni cácuu rō. Chi casáha ró vehe siquí nuū yíndúji ndíyí jíi rō, téé ni canacani jnúhun Yaā Dios nde jenahán. Te casáha luu ró vehe siquí nuū yíndúji táca téé ni iyo ndaā. <sup>30</sup> Te cácahān rō: Núu jeē suni yúcu yó tiempo jeē ní cotecu ndíyí jíi yō, te ma squívi nduu yō jíin de jeē cáhni yō téé ni canacani jnúhun Yaā Dios, achí ró. <sup>31</sup> Te súcuān cácahān ndaā rō jeē maá ró cácuu yucún ñayuu ni cajehni téé ni canacani jnúhun ya. <sup>32</sup> Núu súcuān te táca cuéchi jeē ní casquéjéé ndíyí jíi rō, máni un casáha ga maá ró.

<sup>33</sup> Va sēhe coō cácuu ró, chí xeēn rō nájnúhun coō. ¿Nde se cácuu ró jeē ma jnahnú ndetū rō quingoo rō infierno? <sup>34</sup> Núu súcuān te taji rí táca téé nacani jnúhun Yaā Dios nuū rō, jíin táca téé ndíchi jeē cástéén jnúhun ya. Te sava de cahni rō, te sava de cata caa ró jíic cruz. Te sava ga de cani ró de ini táca vehe íi sinagoga, te scúnu ró de quingoo de táca ñuu. <sup>35</sup> Te súcuān te condee cuéchi siquí maá ró jeē ní cajehni jíi rō táca téé ndaā, xihna gā nde Abel téé ndaā, te nde Zacarías sēhe Berequías, téé ni cajehni de ini templo sava mehñu cuarto íi jíin altar. <sup>36</sup> Jendaā cahán rí jíin ró jeē táca cuéchi yáha condee siquí ñayuu iyó vijna.

*Jeē cuculhyá ni yá jito ya ñuu Jerusalén  
(Lc. 13.34-35)*

<sup>37</sup> Róhó ñuu Jerusalén, jéhni rō téé cánacani jnúhun Yaā Dios, te jéhe ro yúu xiní téé táji Yaā Dios vejicoo nuū rō. Te cuehē jíinu ni cuni rí nastútú rí sēhe ró, nájnúhun ndují jeē nastútú tí sēhe tí chíji ndíjēn tí, te tu ní cúní rō. <sup>38</sup> Núu súcuān te vijna te stóo uun na ri rohó jíin sēhe ró. <sup>39</sup> Chí cáhān rí jíin ró jeē ndé vijna te ma cóto cuiti gā rō nuū rí, chí nde quiji quiví jeē cahán sēhe ró: Yōhyo váha Yaā cúu Yaā véndiji jíin jniñu máá Jítoho yō Yaā Dios, achí i. Achí yá.

*Jeē ní cachi yá jeē náa templo  
(Mr. 13.1-2; Lc. 21.5-6)*

## 24

<sup>1</sup> Te ni quenda Jesús ini templo cáhnu cuahān yá. Te ni quecoo téé cáscuáha jíin yá, te ni cacahān de jíin yá siquí táca vehe jeē ndejnáhan jeē cúu máá templo un. <sup>2</sup> Te ni cahán yá jíin de:

Táca jéé cájito ró yáha, jendaā cahán rí jíin ró jeē quiji quiví jeē ma cóso jnáhan ga ní ñin yuū, chí ndihi jnanū. Achí yá.

*Na seña coo nuū cuácuyajni ndíhi ñayiví  
(Mr. 13.3-23; Lc. 21.7-24; 17.22-24)*

<sup>3</sup> Te ni jehēn yá jíin téé cáscuáha jíin yá nde yucu Olivos, te ní cucōo ya yūcuán. Te ní

quecoo de nuū yá, te ni cacajnúhun sñin de ya:

Castúhun ní ndé quiví coo táca jéé ní cachi ní jéé coo. ¿Te na seña coo núu ni cuyajni quiví ndíji ní jíin jéé jínu ñayiví? áchi de.

<sup>4</sup> Te ní cahān Jesús:

Coto ró jeē ma stahú ní ñin de rōhó. <sup>5</sup> Chí quijicoo cuehē téé jeē stahú jíin síhvi rí. Máá rí cúu Cristo, achí de. Te súcuān stáhú de cuehē ñayuu. <sup>6</sup> Te nihñ rō jnúhun jeē táca lado iyó guerra, chí je yajni coo guerra. Te ma yúhu ró, chí cánuu coo súcuān. Te ní ná tu jínu quiví ndíhi ñayiví. <sup>7</sup> Chí ndonda nación siquí inga nación, te ndonda ñuu siquí inga ñuu jeē cuajnáhan. Te coo jnamā jíin cuéhyí xeēn. Te cháha chúcuān jnáa. <sup>8</sup> Te táca jéé yáha cácuu jnúndóho quejéé xihna ñúhún gá.

<sup>9</sup> Yūcuán na te nastúu i rōhó jíin náhan ró jeē stóho i rōhó te cahni i rōhó. Te ndíhi ñayuu quiti ní i nuū rō jeē siquí ruhū. <sup>10</sup> Te quiví ún chí cuehē ñayuu candíje caca yátá í, te quiti ní i nuū jnáhan í, te nastúu jnúhun ya. <sup>11</sup> Te canecoo cuehē téé stáhú, te cahán de jeē jnúhun Yaā Dios cánacani de, te stáhú de cuehē ñayuu. <sup>12</sup> Te nducuehē jniñu néé, te jeé yúcuān cuehē i ma cóo maní gā í. <sup>13</sup> Te ñayuu cuiñi nihñ jíin jnúhun rí nde quiví jínu, ñayuu ún chí cácu. <sup>14</sup> Te jnúhun yáha siquí ndese ndácu Yaā Dios jniñu, cuité núu ní cáhnu ñayiví, náváha cuni ñayuu táca nación. Yūcuán na te jínu ñayiví.

<sup>15</sup> Te Daniel, téé ni nacani jnúhun Yaā Dios, ní tee de jnúhun ñin téé néé jéé quíji. Te rōhó jéé cácahu tutu ún, na jécúhun ní rō. Chí ñin quiví te cuni rō jeē sáha ndeváha de jeē stívi de táca ndajniñu íi ini templo, te cuiñi de ini lugar íi. <sup>16</sup> Te núu cuni rō jeē súcuān cúu, te ñayuu cáyucú región Judea, na cúnu i caa i yucu quingoo i. <sup>17</sup> Te ñayuu cáyucu núu quéhe, ma ndívi i ini vehe jeé quénehen i ndajniñu i, chí cánuu cunu yachí i náváha cácu i. <sup>18</sup> Te ñayuu cáhñi nuū ítu, ma ndíji i vehe jeé quíhin i sahna i. <sup>19</sup> Te quiví ún nacá jeē ndahú ñahan cáñuhun sēhe jíin ñahan cándeca yiquán, chí ma cúnihñ ña cunu yachí ña. <sup>20</sup> Te cacán tahú rō jeé ma quíji jnúndóho un jéé cunu ró máá tiempo cúun yuhvá ní quiví ndétátú. <sup>21</sup> Chí jeé quejéé un te coo cuehē jnúndóho xeēn, jeē ná tu coo súcuān nde quiví ní jecōo ñayiví te nde vijna. Te jeé ndíhi jnúndóho ún te ní ma cóo ga jeé súcuān. <sup>22</sup> Te núu tú nastíyí Yaā Dios tiempo jnúndóho ún, te ní ñin ñayuu ma cácu cuiti i. Te jeé siquí ñayuu cáandíje jeé ní nacáji ya, jeé yúcuān nastíyí ya tiempo un.

<sup>23</sup> Núu súcuān te núu ñin ñayuu cahán jíin ró: Yáha condēhe ró íne Cristo, chí: Yūcuán condēhe ró íne ya, achí í, te ma candíje ró jéé cahán i. <sup>24</sup> Chí canecoo téé cástáhú jéé achí de jeé Cristo cúu de, chí achí de jeé téé nacani jnúhun Yaā Dios cúu de. Te sáha de jniñu jéhu jeé naa ní ñayuu coto i, náváha stáhú de



nde maá ñayuu ní nacāji ya, te núu na cúu.  
 25 Je ní castúhun rí nuū rō vjna nde ná tu  
 coo. 26 Núu súcuan te núu cahān ñayuu jín rō:  
 Cuácondēhe rō, chí nde nuū ñuhun téhé íne  
 ya, achi í, te ma quihín rō condēhe rō. Chí  
 núu cahān í: Nehen condēhe rō, chí iní vehe  
 yāha íne ya, achi í, te ma candíje rō jínáhan  
 rō. 27 Chí nájnūhun jeē ndíndēe sáha taja te  
 cúndijin nde ichi núu cáne niāndii jín ndé  
 ichi núu quée niāndii, suni súcuan coo quiví  
 ndiji ruhū, Yāā ní nduu tēe, chí ndihí ñayuu  
 coto. 28 Te nájnūhun jeē cutútú téji ndé-ni  
 cúu nuū catú quiti ní jíhi, suni súcuan coo  
 táca jēe ní cahān rí ndé-ni cúu-ni nuū cáhíyo  
 ñayuu.

*Ndese coo quiví ndiji Yāā ní nduu tēe*

(Mr. 13.24-37; Lc. 21.25-33; 17.26-30,  
 34-36)

29 Yūcuán na te núu ní ndihí táca jnūndóho  
 quiví ún, te cojnúú niāndii, te yóo ma ndíi  
 ga. Te ningoo quimí andiví. Te táca jēe  
 ín andiví chí quisi í. 30 Yūcuán na te coto  
 ñayuu nuū maá rí, Yāā ní nduu tēe, ndiji rí  
 ichi ándiví. Te ndahyū ñayuu táca nación  
 ní cáhnu ñayiví. Te coto í nuū ruhū, Yāā ní  
 nduu tēe, ndiji rí jín vicō andiví, te condiso  
 rí cuehé poder, te yóhoyo luu cujúhnu rí. 31 Te  
 tají rí ndajéhé rí quingoo, te tiví ñihin ya  
 trompeta. Te quinatútú yá ñayuu ní nacāji  
 rí ndicúún lado ñayiví, nde in lado ñayiví jín  
 ndé inga lado.

32 Vjna te scuáha rō ndese sáha nundēhe  
 higo: Núu je ní nane numa, te ní najee  
 ndaha, te cájini rō jeē jé ní cuyajni tiempo  
 jihní. 33 Te suni súcuan núu ní cajini rō jeē ní  
 quejéé cúu táca jniñu jeē ní cahān rí, yūcuán  
 na te na jécūhun ní rō jeē ní cuyajni quiví  
 ndiji rí, te yachí coo. 34 Jendaá cahān rí jín  
 rō jeē ma cúu ndihí ñayuu jeē cóto jnūndóho  
 ún, chí nde squícu ndihí jniñu ún. 35 Andiví  
 jín ñayiví chí naa, te táca jnūhun cahān rí chí  
 ma náā, chí ndihí squícu.

36 Te quiví jín hora jeē ndiji rí, tú ní in  
 ñayuu jín, ní maá ndajéhé cáhíyo andiví, ní  
 maá rí, Sēhe Yāā Dios. Chí maá in ní Tátá rí  
 Yāā Dios cúu jeē jíní.

37 Chí nájnūhun ní cuu quiví ní íyo Noé,  
 suni súcuan coo quiví ndiji ruhū, Yāā ní nduu  
 tēe. 38 Chí quiví ún, nde ná tu cuun saū  
 xeén, te cáyeji í cájili í, cánandáha í, te cájēhe  
 í sēhe sáhí í jeē nándáha, nde ní jinū quiví  
 jeē ní quiví Noé iní barco cáhnu jeē naní  
 arca. 39 Te tu ní cácandíje ñayuu jeē cuun  
 saū xeén, te ní cuun, te ní ndaa ndute ní  
 cajihí ndihí í. Te suni súcuan coo núu na ndiji  
 ruhū, Yāā ní nduu tēe. 40 Te quiví ún cone  
 uū tēe sájniñu nuū ítu. Te in de naquihin  
 rí, te inga de ndōo. 41 Te coo uū ñahan jeē  
 ndíco cáhnu, te in ña naquihin rí, te inga ña  
 ndōo. Súcuan cuu jeē sava ñayuu naquihin rí  
 te sava í quendōo, chí tu ní cácandíje í.

42 Núu súcuan te ndito na cóo ní rō, chí  
 tu cájini rō na quiví ndiji jitoho rō. 43 Te  
 na chúhun ní rō jeē cahān jnūhun yátá yáha:  
 Tēe chíí vehe, núu jeē jíní de na hora quiji  
 ñacuíhná, te condito de, te ma cuáha de  
 jnūhun sácuihná ndajniñu vehe de núu. 44 Te  
 rōhó jínáhan rō, suni súcuan coo tūhva rō, chí  
 maá hora jeē tú na vé cájeni ní rō, te ndiji  
 ruhū, Yāā ní nduu tēe.

*Jnūhun yátá síquí mozo*  
 (Lc. 12.41-48)

45 Núu súcuan te coo rō nájnūhun in mozo  
 jeē ndito xiní te squícu váha. Te maá patrón  
 ní jeni de mozo un jéé cóto í ñayuu vehe de,  
 náváha scáji í maá hora. 46 Te yóhoyo ndetū  
 mozo un jéé núu ní ndee patrón, te cuni de  
 jeē súcuan squícu váha í. 47 Jendaá cahān rí  
 jín rō jeē cani de mozo un jéé cóto í ndihí  
 ndajniñu de. 48 Te núu mozo sáha néé cúu í,  
 te jeni ní í jeē ma ndiji yachí patrón í, 49 te  
 quejéé í cani í jnāhan mozo í, te caji í coho  
 í jín tēe cánajini, 50 núu súcuan te ndee-ni  
 patrón quiví jeē tu ndétu í jín hora jeē tú na  
 vé jeni ní í. 51 Te stóho xeén de í, te squícu de  
 í nuū cáhín tēe stáhú-ni. Te yūcuán ndahyū í  
 te nacayihí yuhu í jeē ndoho xeén í. Achí yá.

*Jnūhun yátá síquí uxí sūchi sáhí*

## 25

1 Te suhva cúu jeē ndácu Yāā andiví jniñu  
 nuū ñayuu: Cúu nájnūhun in vico nándáha.  
 Te ní íyo uxí sūchi sáhí jeē ní caquihin í lin-  
 terna cándaha í, te ní quendacoo í cuajñahan  
 í in tēe nándáha. 2 Te uhún í chí tú ndito  
 xiní í, te uhún í chí ndito xiní í. 3 Te sūchi tú  
 ndito xiní, cándaha í linterna í, te tu cándaha í  
 petróleo jeē náchuhun í. 4 Te sūchi ndito xiní,  
 chí cándaha í botella petróleo jín linterna í.  
 5 Te níni cúcuéé quiji tēe nándáha ún, te ní  
 quee máhná, te ní caquixí ndihí í. 6 Te nuū  
 ní cuu sava ñuu, te ní cajini í jeē cácana jee:  
 Je véji tēe nándáha. Cuángoo quijnahan rō de  
 jínáhan rō, áchí. 7 Yūcuán na te táca sūchi sáhí  
 un ní candonda í, te ní casátūhva í linterna  
 í. 8 Te sūchi tú ndito xiní, ní cacahān í jín  
 sūchi ndito xiní: Cuáha jecu petróleo nuū rí  
 jínáhan rō, chí cuandahvá linterna rí, áchí í.  
 9 Te ní cacahān sūchí ndito xiní: Ma cúu, chí  
 ma cánda jeē cúu maá rí jín maá rō. Váha ga  
 quingoo rō núu cúyáhu, te cuaan rō jéé cúu  
 maá rō. Achí í. 10 Te níni cuángoo í cuaan í,  
 te ní quee-ní tēe nándáha. Te sūchi cáhíyo tūhva  
 un, ní quívicoo í jín de vico nándáha de. Te  
 ní ndihyū yehyí. 11 Te ní cunúu, te ní queecoo  
 uhún gá sūchi sáhí un. Te ní cacahān í jín tēe  
 nándáha: Nune ní yéhyí na quívicoo ná, áchí  
 í. 12 Te ní cahān maá de: ¿Nde nuū véjicoo rō?  
 Chí tu jíní rí rohó, áchí de. Achí yá.

13 Yūcuán na te ní cahān ya:

Núu súcuan te ndito coo ni rō, chí tu cájini rō na quiví na hora ndiji ruhū. Yaa ní nduu tēe. Achí yá.

*Jñuhun yátá síquí tēe ní jēhe núu xūhun núu tāca mozo*

14<sup>o</sup> Te suhva cúu jeē ndácu Yaā andiví jniñu nuū ñáyuu: Cúu nájñuhun ñn tēe jeē quihñ jicá de inga ñuu. Te nde ná tu quihñ de te ni cana de mozo de jñnahan, te ni jēhe núu de xūhún de nuū i, jeē na sájniñu i jín návāha nducuehē.

15<sup>o</sup> Te nuū ñn i ni jēhe de uhñ mil xūhun cáa. Te nuū inga i ni jēhe de uñ mil. Te nuū inga i ni jēhe de ñn mil. Súcuan ni jēhe de, chí jini de nasaa canda ñn ñn i sájniñu i jín. Yūcuán na te ni quihñ de ichi cuahñ jicá de. 16<sup>o</sup> Te mozo jeē ní quihñ uhñ mil xūhún, ni sájniñu de jín. Te ni nihñ de uhñ gā mil síquí. 17<sup>o</sup> Te mozo jeē ní quihñ uñ mil xūhún, suni ni nihñ de uñ gā mil síquí. 18<sup>o</sup> Te mozo jeē ní quihñ ñn mil xūhún, ni jēhē de ni jete de yaū, te ni chisáhi de xūhún patrón de.

19<sup>o</sup> Te ni yāha cuehē tiempo, te ni ndee patrón mozo un jñnahan. Te ni nandacñ de cuenta nuū i. 20<sup>o</sup> Te ni quee mozo jeē ní quihñ uhñ mil xūhún un, te ni nacūaha de xūhún un núu patrón de jín uhñ gā mil jeē ni nihñ de síquí. Te ni cahñ de: Ni jēhe ní uhñ mil nuū ná, te yāha íyó uhñ gā mil jeē ni nihñ na síquí. Achí de. 21<sup>o</sup> Te ni cahñ patrón jín de: Íyó váha núu súcuan. Yōhō váha mozo cúu rō jēē squícu váha rō. Chí váha ní squícu rō ñn jniñu lúli-ni, te vijna te cuāha ri jniñu jēhnu ndacu rō. Te quiví rō núu cusñ ní rō jín rí. Achí de. 22<sup>o</sup> Yūcuán na te ni quee mozo jeē ní quihñ uñ mil xūhún un. Te ni cahñ de: Ni jēhe ní uñ mil nuū ná, te yāha íyó uñ gā mil jeē ni nihñ na síquí. Achí de. 23<sup>o</sup> Te ni cahñ patrón jín de: Íyó váha núu súcuan. Yōhō váha mozo cúu rō jēē squícu váha rō. Chí váha ní squícu rō ñn jniñu lúli-ni, te vijna te cuāha ri jniñu jēhnu ndacu rō. Te quiví rō núu cusñ ní rō jín rí. Achí de. 24<sup>o</sup> Te ni quee mozo jeē ní quihñ ñn mil xūhún un, te ni cahñ de jín patrón: Je jini na nihñ jē tēe xeñ cúu ní. Chí cuehē gā cuní ni vēsú jeē cúu sáha mozo ni, te cuehē gā nandacñ ní vēsú jeē ní jēhe ní. 25<sup>o</sup> Te jeē yūcuán ní yūhō ná, te ni jēhē na ní chisáhi ná xūhun ní chíji ñuhun. Te yāhá na nacūaha na xūhun ní. Achí de. 26<sup>o</sup> Te ni cahñ patrón jín de: Mozo cuxí cúu rō te máni jniñu neé sáha rō. Chí jéni ní rō jeē cuehē gā cuní rí vēsú jeē cuu sáha mozo rí, te cuehē gā nandacñ rí vēsú jeē ní jēhe rí. 27<sup>o</sup> Núu jeē ní chūne rō xūhun rí nuū banco nuū, te jeē ní ndee rí te naquihñ rí xūhun rí nde jín séhe xūhun núu. Achí de jín i. 28<sup>o</sup> Te ni cahñ de jín táca gá mozo de: Núu súcuan te quende rō mil xūhun jíñā nuū i, te cuāha rō núu mozo névāha uxí mil. 29<sup>o</sup> Chí ñáyuu jeē névāha, sa quiji ga nuū i, te

conevāha cuehē i. Te ñáyuu jeē tu névāha, sa cujiyo-ni vēsú jecu jeē névāha i. 30<sup>o</sup> Te mozo yāha jēē tu sájniñu váha, quenehen rō i na quihñ i nuū quēhe nuū neē. Te yūcuán ndáhyū i te nacayñí yuhu i jeē ndoho xeñ i. Achí patrón un.

*Siquí jeē cóo juicio tāca nación*

31<sup>o</sup> Te ni cahñ gā yá:

ñn quiví te ndiji máa Yaā ní nduu tēe, te cuu ya Rey nuū ñáyuu. Te táca ndajehé yā cuiñí ní xin ya. Te cucōo ya mesa nuū ndácu ya jniñu, te yōhō luu cujēhnu ya. 32<sup>o</sup> Te ndutútú ñáyuu táca nación nuū yá. Te sásñn ya i jñnahan i, nájñuhun cúsñn lanchi jín ndixuhú sáha tēe ndito ti. 33<sup>o</sup> Te ñáyuu váha jeē cúu nájñuhun lanchi, chucú yá i lado váha ya. Te ñáyuu neé jeē cúu nájñuhun ndixuhú, chucú yá i lado jecó yá. 34<sup>o</sup> Yūcuán na te cahñ Rey jín ñáyuu cáhñn lado váha ya: Nacá ndetú rō jeē ní sáha Tátá rí jín rō. Nehen quivicoo rō núu ndácu rō jniñu. Chí nde quiví ní jecō ñayiví te je ni sátuhva ya nuū ndacu rō jniñu. 35<sup>o</sup> Chí ni jii rí sóco, te ni cajēhe rō jēē ní yeji rí. Ni jichí rí ndute, te ni cajēhe rō jēē ní jhi rí. Ni quiji rí nde ñuu jicá, te ni cajēhe núu rō vehe ni ndōo rí. 36<sup>o</sup> Ni cumaní sahma rí, te ni cajēhe rō. Ni cocuhú rí, te ni jecondēhe rō ruhū. Ni ine rí vecāa, te suni ni jecondēhe rō ruhū. Súcuan cahñ yá jín ñáyuu cáhñn lado váha ya. 37<sup>o</sup> Yūcuán na te cahñ ñáyuu váha un jín yá: ¿Na quiví ní cajito ná nihñ jēē jii ní sóco, te ni cajēhe na jēē ní yeji ní, chí jēē jichí ní ndute, te ni cajēhe ná ní jhi ní? 38<sup>o</sup> ¿Te na quiví ní cajito ná jēē ní quiji ní ndé ñuu jicá, te ni cajēhe núu ná vehe ni ndōo ní, chí jēē cumaní sahma ní, te ni cajēhe ná? 39<sup>o</sup> ¿Te na quiví ní cajito ná jēē cuhú ní, chí jēē ine ní vecāa, te ni jecondēhe ná nihñ? achí i. 40<sup>o</sup> Yūcuán na te cahñ Rey jín i: Jendaá cahñ rí jín rō jēē ná ní casáha rō súcuan jín ñn táca hermano rí jeē cácadíje, vēsú ñáyuu núu ga cúu i, te nuū maá rí ní casáha rō.

41<sup>o</sup> Yūcuán na te suni cahñ Rey jín ñáyuu cáhñn lado jecó yá: Ñáyuu jnahñu ndetú cácuu rō. Cuijiyo quingoo rō núu ñuhún jeē cayú ní cáni, nuū íyó túhva cone jexēñ jín táca táchi teē cajejniñu nuū. 42<sup>o</sup> Chí ni jii rí sóco, te ni cajēhe rō jēē caji rí. Ni jichí rí ndute, te tu ní cajēhe rō jēē coho rí. 43<sup>o</sup> Ni quiji rí nde ñuu jicá, te tu ní cajēhe núu rō vehe ndōo rí. Ni cumaní sahma rí, te tu ní cajēhe rō. Ni cocuhú rí, ni ine rí vecāa, te tu ní jecondēhe rō ruhū. Súcuan cahñ yá jín ñáyuu cáhñn lado jecó yá. 44<sup>o</sup> Yūcuán na te cahñ ñáyuu un jín yá: ¿Na quiví ní cajito na nihñ jēē jii ní sóco, chí jēē jichí ní ndute, chí jēē ní quiji ní ndé ñuu jicá, chí jēē cumaní sahma ní, chí jēē cuhú ní, chí jēē ine ní vecāa, te tu ní cajēhe na jēē cumaní nuū ní? Achí i. 45<sup>o</sup> Yūcuán na te cahñ yá jín i: Jendaá cahñ

rī jīn ró, jeē tu ní cásáha ró súcyan jīn ni ĩn táca hermano rī jeē cáandje, vēsú ñayuu núu ga cúu i. Núu súcyan te suni nuū maá rī cúu jeē tu ní cásáha ró, achi yā. <sup>46</sup> Yūcuán na te quingoo ñayuu un nuū ndóho i ní cání. Te ñayuu váha un quávicoo i nuū cótecu i ní cání. Achí Jesús.

*Jeē ní casquijnáhan de jnūhun jeē jnū de Jesús*

(Mr. 14.1-2; Lc. 22.1-2; Jn. 11.45-53)

## 26

<sup>1</sup> Te nuū ní ndihi ní cahān Jesús táca jnūhun yáha, te ní cahān yā jīn tēe cáscuáha jīn yá:

<sup>2</sup> Je cájini rō jeē uū na quivī te coo vico pascua. Te ruhū, Yāā ní nduu tēe, nastúu i ruhū jeē cúu rī jicá cruz, achí yá.

<sup>3</sup> Yūcuán na te sutū cácujeñhu, jīn tēe cástéen tutu ley, jīn táca tēe jeñhu jeē cándacu jniñu nuū ñayuu hebreo, ni candututú de ini patio vehe palacio maá sutū cujeñhu ga jeē naní Caifás. <sup>4</sup> Te ní candajñuhún de ndese jnū de Jesús jīn jnūhun stáhú, te cahni de ya. <sup>5</sup> Te ní cacahān de:

Ma jnū yó de maá quivī vico, chí ndonda ñayuu siquī yō, achí de.

*Jnūhun ñahan jeē ní chuhun perfume xini yā*

(Mr. 14.3-9; Jn. 12.1-8)

<sup>6</sup> Te ine Jesús ñuu Betania vehe Simón, tēe ní ndoho cuehyī stehyú. <sup>7</sup> Te ní quee ĩn ñahan nuū yā, ndáhá ña ĩn frasco yuū luu jeē ñūhun aceite perfume jeē yóhyo yahu ndéé. Te ní chuhun ña xini yā níni jēe yéji yā staa. <sup>8</sup> Te ní cajito tēe cáscuáha jīn yá, te ní caquití ní de, te ní cacahān de:

¿Najehē cúu jeē náa saá-ni perfume jīnā?  
<sup>9</sup> Chí cuu xicó yahu yó núu, te cuāha yo xūhun núu ñayuu ndahú. Achí de.

<sup>10</sup> Te ní jini Jesús jnūhun cácahān de. Te ní cahān yā jīn de:

¿Naun cásáha ró jēe nácani uhū ní ñahan yáha? Chí ĩn jniñu váha cúu jeē ní sáha ña jīn rī. <sup>11</sup> Chí níni coyūcu ñayuu ndahú jīn ró, te ruhū chí tuá condee rī jīn ró. <sup>12</sup> Chí jeē ní chuhun ña perfume yáha ruhū, suu cúu jeē ní sátuhva ña ruhū nde quivī quindūji rī. <sup>13</sup> Jendaá cahān rī jīn ró jeē ní cáhnu ñayiví ndé-ni cúu nuū cuité jnūhun yáha jēe jnáma rī ñayuu, suni nacani i jnūhun jeē ní sáha ñahan yáha, návaha cocuhun ní ñayuu ña, achí yá.

*Jeē ní nastúu Judas yā*

(Mr. 14.10-11; Lc. 22.3-6)

<sup>14</sup> Yūcuán na te ĩn jeē ndihúxi uū tēe cáscuáha ún, nání de Judas Iscariote, ni jehēn de nuū sutú cácujeñhu. <sup>15</sup> Te ní cahān de jīn:

¿Nasaa cuāha ní núu ná, te na nastúu ná de nuū ní? achí de.

Te ní cajēhe ocó uxí xūhun plata nuū de. <sup>16</sup> Yūcuán na te nde quivī un ní quejé de

ndúcú de modo ndese nastúu de ya nuū sutú jijnáhan.

*Jeē ní jequín yā Cena yā*

(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Te maá quivī jeē quejé vico jeē cáyeji ñayuu pan jeē tú na levadura yāhi, te ní quijicoo tēe cáscuáha un núu Jesús. Te ní cacahān de jīn yá:

¿Ndé nuū cuni ní jēe quisatuhva ná cuxini ní vico pascua? achí de.

<sup>18</sup> Te ní cahān yā:

Cuángoo nde ñuu, vehe tēe jeē jé ní cacahān yō, te cahān rō jīn de: Achí maá Maestro jeē ní cuyajni quivī cuu yā. Te vijna te caji yā vico pascua ini vehe ní jīn tēe cáscuáha jīn yá, achi rō. Achí yá.

<sup>19</sup> Te tēe cáscuáha jīn yá, ní casáha de nájñuhun ní ndacu Jesús jniñu nuū de, te ní casatuhva de jeē cuxini ya vico pascua.

<sup>20</sup> Te jeē cuácuaa, te ní quee yā, te ní cucōo ya mesa jīn ndihúxi uū tēe cáscuáha jīn yá.

<sup>21</sup> Te níni yéji yā jīn de te ní cahān yā:

Jendaá cahān rī jīn ró jeē ĩn rōhó nastúu ruhū vijna, achí yá.

<sup>22</sup> Te ní cacucuihyá ndasí ní de. Te ná ĩn ná ĩn de ní cacajñuhún de ya:

¿A sáña cúu? achí de.

<sup>23</sup> Te ní cahān yā:

ĩn rōhó jēe cáyeji cáhnu jīn rī ĩn cohō, suu ró nastúu ruhū. <sup>24</sup> Te ruhū, Yāā ní nduu tēe, jendaá cúu jeē quihín rī cuu rī, nájñuhun yósó jnūhun rī nuū tútu ĩ. Te nacá xēen ndoho tēe nastúu ruhū. Váha ga núu tu ní cácu tēe un núu, achí yá.

<sup>25</sup> Yūcuán na te ní cahān Judas, tēe nastúu ya:

¿A sáña cúu, Maestro? achí de.

Te ní cahān yā jīn de:

Suu ró cúu, achí yá.

<sup>26</sup> Te níni jēe cáyeji de jīn yá, te ní quihin ya pan, te ní nacuatáhú yá, te ní tahú cuéchi yá, te ní jēhe ya nuū tēe cáscuáha jīn yá. Te ní cahān yā:

Caji rō jijnáhan ró, chí yáha cúu yiqui cúñu rī, achí yá.

<sup>27</sup> Yūcuán na te ní quihin ya ĩn copa ndūxi uva, te ní nacuatáhú yá, te ní jēhe ya nuū de. Te ní cahān yā:

Coho jijnáhan ró. <sup>28</sup> Chí yáha cúu níñi rī jeē cuáha rī jeē cúu contrato jeé, te cati jeē ndundoo cuéchi cuehē ñayuu, te coo jnūhun cáhnu ní nuū cuéchi i. <sup>29</sup> Te cáhān rī jīn ró jeē ndé vijna te ma cóho ga rī ndūxi ndehē uva yáhá, chí nde quiji quivī ndacu Tátá rī jniñu ní ñayiví, te sáá te coho tucu rī jīn ró jijnáhan ró. Achí yá.

*Jeē ní cachi yā jeē yūhu Pedro cahān de jeē jini de ya*

(Mr. 14.26-31; Lc. 22.31-34; Jn. 13.36-38)

<sup>30</sup> Te ni jita ya ñin yaa ñi jín de jínáhan de. Te ni quenda ya cuahán yá jín de nde yucu Olivos. <sup>31</sup> Yūcuán na te ni cahán yá:

Ndivi rō nayūhu ró jeē siquí ruhū jecuáa vjna. Chi suhva je yósó jnúhun ri nuū tútu ñi, ni cahán Yáa Dios: Cuáha ri jnúhun jeē cáhni ñayuu tēe ndíto lanchi, te lanchi un cuitē núu tí jeē yūhu tí, achí. <sup>32</sup> Te jeē nátecu rí, te xihna ruhū cosnúu rí quihín rí región Galilea, te sáa te najinūcoo ró, achí yá.

<sup>33</sup> Yūcuán na te ni cahán Pedro:

Vēsú ndihi de na náyūhú de, te máa ná chi ma náyūhú cuiti ná, achí de jín yá.

<sup>34</sup> Te ni cahán yá jín de:

Jendaá cahán rí jín ró jeē jecuáa vjna, nde ná tu cana líhli, te yūhu ró jeē jñi ñayuu rohó, te uni jínu cahán ró jeē tu jín ró ruhū, achí yá.

<sup>35</sup> Te ni cahán Pedro jín yá:

Vēsú núu cuu na jín ní, te ma cahán cuiti na jéé tu jín na níhín, achí de.

Te suni súcuán ni cacahán ndihi tēe cácuáha jín yá.

*Jeē ni jicān tahú yá nuū huerto Getsemaní*  
(Mr. 14.32-42; Lc. 22.39-46)

<sup>36</sup> Yūcuán na te ni jín Jesús jín tēe cácuáha jín yá ñin lugar nuū nani Getsemaní. Te ni cahán yá jín de:

Yáhá-ni cucōo ró, te na quihín rí yūcuán cacān tahú rí, achí yá.

<sup>37</sup> Te ni jeca ya Pedro jín ndindúú séhe Zebedeo cuahán yá jín de. Te ni quejéé yá cuculhyá ndasí ní yá te cúxí ní yá jeē quíji jnúndóho siquí yá. <sup>38</sup> Yūcuán na te ni cahán yá jín de:

Yōho cúculhyá ní rí, te ndúcu sáha jeē cúu rí. Yáhá condetu ró te condito ró jín rí.

<sup>39</sup> Te ni jica ya jecu gā, te ni jecuiñi yití yá ni jequín ya nuū yá nuū níhun, te ni jicān tahú yá suhva nuū Yáa Dios:

Tátá maá ná, núu cuu te tejiyo ní jnúndóho yáha jéé ma quíji siquí ná. Te nasūu jéé cuní maá ná, chi jeē cuní maá ní na cóo, achí yá.

<sup>40</sup> Yūcuán na te ni ndee yá nuū ndinúni tēe cácuáha jín yá, te ni jito ya jeē cáquixí de. Te ni cahán yá jín Pedro:

¿A tu ni cánda ró condito ró jín rí vēsú ñin hora? <sup>41</sup> Coó ndito ní ró te cacān tahú ró jeē chindéé ñáhán yá rohó jéé ma sáha ró cuéchi jeē coto ndee jeneé róhó. Chi cuní ndije ánuá ró squícu yáha ró, te yiqui cúñu ró chi tu fuerza, achí yá.

<sup>42</sup> Te ni jehén tucu ya vuelta uñ, te suhva ni jicān tahú yá:

Tátá maá ná, te núu ma cúu cujiyo jnúndóho yáha jeé ma ndóho ná, te na cóo jeé cuní maá ní núu súcuán, achí yá.

<sup>43</sup> Te ni ndee tucu ya nuū de, te ni jito ya jeē cáquixí tucu de, chi yōhyo cáji de máhná. <sup>44</sup> Te ni stóo ya de, te cuahán tucu ya cuacacān tahú yá vuelta uní. Te suni jnúhun

yūcuán ní cahán yá. <sup>45</sup> Yūcuán na te ni ndee tucu ya nuū de jínáhan de, te ni cahán yá jín de:

Vijna te cusú ró te ndetātu rē. Te je ni quee hora, te ruhū, Yáa ní nduu tēe, natūu ri te jñi tēe cáhyo cuéchi ruhū. <sup>46</sup> Ndocuiñi jijnáhan ró, chi je vēji tēe nastúu ruhū, te quihín yó jín de, achí yá.

*Jeē ní cajñi de Jesús*

(Mr. 14.43-50; Lc. 22.47-53; Jn. 18.2-11)

<sup>47</sup> Te sá cáhán gā yá súcuán, te ni quee-ni Judas, ñin jnáhan jeē uxí uñ tēe cácuáha jín yá. Te vējicoo cuehē tēe jín de, cándaha de espada jín yujnu. Chi sutú cácuájñu jín táca tēe jéñu cándacu jniñu nuū ñayuu hebreo, ni catají tēe ún. <sup>48</sup> Te Judas, tēe nastúu ya ún, je ni jēhe de ñin seña nuū tēe un jijnáhan, chi ni achí de:

Tēe jeé téchūhu rí un cúu. Te jñi ró jijnáhan ró, achí de.

<sup>49</sup> Te ni quee-ni de nuū Jesús, te ni cahán de:

Ta ni cuaa, Maestro, achí de.

Te ni techúhú de ya. <sup>50</sup> Te ni cahán Jesús jín de:

Amigo, ¿na jniñu vēji ró? achí yá.

Yūcuán na te ni jínucóo táca gā tēe ún, te ni cajñi de Jesús.

<sup>51</sup> Te ñin tēe jeē cáhín jín Jesús, ni tava de espada de, te ni jehnde de sōho ñin mozo maá sutú cujéñu ga. <sup>52</sup> Yūcuán na te ni cahán Jesús jín de:

Nachuváha espada ró, chi táca jéé cájeñáhan jín espada, suni jín espada cuu. <sup>53</sup> ¿Te á tu cajini ró jeé cuu cacān tahú rí nuū Tatá rí, te vijna níhún tají yá víhyá gā uxí uñ míl ndajéhe andiví jeé jnama ruhū? <sup>54</sup> Te núu súcuán, ¿te ndese cuu squícu jnúhun cáhán tutu ñi jeé cánuu ndoho rí súcuán? achí yá.

<sup>55</sup> Yūcuán na te ni cahán yá jín ñayuu cuehē ún:

¿Te va tēe culhá cúu ri jeé vējicoo ró jín espada jín yujnu jeē jñi ró ruhū jeé súcuán. Táca quíví ni cucōo rí jín ró jijnáhan ró ñi templo cáhnu, ni steén rí jnúhun, te tu ní cájñi ró ruhū. <sup>56</sup> Te súcuán cásaaha ró náváha na squícu jeé cahán tutu ñi jeé ñi cateé tēe ni canacani jnúhun Yáa Dios, achí yá.

Yūcuán na te ndihi tēe cácuáha jín yá, ni castóo de ya, ni cajinu de cuango de.

*Jeē ní indichi Jesús nuū junta tēe cácuájñu ga*

(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup> Te tēe ni cajñi Jesús, cuango de jín yá nuū Caifás, tēe cúu sutú cujéñu ga. Te yūcuán cáhín tútu tēe cástéén tutu ley jín táca tēe jéñu cándacu jniñu. <sup>58</sup> Te Pedro chí jíca-ni ndíquin de ya, te ni jín de patio sutú cujéñu ga. Te ni quívi de ñi patio, te

ni cucōo de jíin táca policía, návāha coto de ndese coo siquī yā.

<sup>59</sup> Te sutū cácujuhnu jíin táca tēe jéhnū jíin ndihī tēe cásáha junta cujéhnū ga, ni canducú de tēe cahān jnūhun yáá siquī Jesús, chi cahni de ya cácu ni de. <sup>60</sup> Te vēsú ni quecoo cuehē ñayuu cácahān yaá, te tu ní cánihīn de cuēchi siquī yā jeē cáhni de ya. Te jeē sándihī te ni quecoo uū testigo jeē cahān yaá siquī yā. <sup>61</sup> Te áhí:

Tēe yáha ní cahān de jeē cuu canu de templo Yāá Dios, te nuū uní-ni quivī te nuncondichi sáha de, áhí.

<sup>62</sup> Yūcuán na te ni ndocuiñī maá sūtū cujéhnū ga, te ni cahān de jíin yá:

¿Naun tu cáhān cuiti rō? ¿A iyó ndáa jeē cácahān tēe yáha siquī rō? Achí de.

<sup>63</sup> Te Jesús tu ní cáhān cuiti yā. Te ni cahān maá sūtū cujéhnū ga:

Ndácu ri níñū nuū rō jeē cahān ndaā rō cuni nahīn maá Yāá Dios, Yāá técu. Cachi cají te núu maá ró cúu Cristo, Sēhe Yāá Dios, achí de jíin yā.

<sup>64</sup> Te ni cahān yā:

Suu ri cúu, nájnūhun cáhān rō. Te na cástūhun rí nuū rō jíināhan ró jéē táca quivī jeē quiji te coto ró ruhū, Yāá ní nduu tēe, condee rí lado váha Yāá iyó poder. Te coto ró jéē ndíji ri ichi ándiví jíin vicō. Achí yā.

<sup>65</sup> Yūcuán na te sutū cujéhnū ga ni jehnde de sahma de jeē quití ndasí ni de, te ni cahān de:

Tēe yáha chi cáhān de jnūhun ndevāha jeē quití ni Yāá Dios, chi sáha de maá de Sēhe Yāá Dios. ¿Ndé jíni níñūn gá yō testigo núu súcuan? Chi je ni cajini ró jnūhun ndevāha cáhān de. <sup>66</sup> ¿Te ndese cájeni ni rō? achí de.

Te ni cacahān tēe cuehē ún:

Cuēchi cúu jeē cahān de súcuan, te jíni níñūn cuu de, áhí.

<sup>67</sup> Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā. <sup>68</sup> Te ni cacahān de:

Te núu Cristo cúu ró, te cachi rō ndé ñn cúu jeē ní cani rōhó, achí de.

*Jeē ní cachi Pedro jeē tu jíni de ya*

(Mr. 14.66-72; Lc. 22.56-62; Jn. 18.15-18, 25-27)

<sup>69</sup> Te níni jéē súcuan cúu, te Pedro néne de nuū quéhe ñni patio. Te ni quee ñn ñahan jéñiñū vehe ún, te ni cahān ña jíin de:

Róhó chi suni ni jica ró jíin Jesús tēe Galilea, achí ña.

<sup>70</sup> Te maá de tu ní cáchi de, chi ni cahān de ni cajini ndihī ñayuu:

Tu jíni rí na jnūhun cáhān rō, achí de.

<sup>71</sup> Te ni quenda de yéhyí nuū quéhe, te ni jito ñga ñahan nuū de. Te ni cahān ña jíin ñayuu cáhiin yūcuán:

Tēe yáha chi suni ni jica de jíin Jesús, tēe ñuu Nazaret, achí ña.

<sup>72</sup> Te ñga jínu tu ní cáchi tucu de, chi sa ni cahān teyí de:

Tu jíni rí tēe ún, áhí de.

<sup>73</sup> Te ni cunúu jecu gā, te ñayuu cáhiin yūcuán ní quecoo i nuū Pedro, te ni cacahān i:

Jendaá ndije jeē suni jnāhan tēe un cúu ró, chi ndijin cahān rō jeē tēe Galilea cúu ró, áhí i.

<sup>74</sup> Yūcuán na te ni quejé de cáhān teyí de jeē na cóndee cuēchi siquī de núu tu cáhān ndaā de:

Tu jíni cuiti rí tēe ún, áhí de.

Te ni cana-ni líhli. <sup>75</sup> Te ni nucūhun ni de jnūhun ni cahān Jesús jíin de: Nde ná tu cana líhli, te yūhu ró te cahān rō uní jínu jeē tu jíni rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíni de ya.

*Jeē cuángoo de jíin yá nuū Pilato*

(Mr. 15.1; Lc. 23.1-2; Jn. 18.28-32)

## 27

<sup>1</sup> Yūcuán na te ni cundijin. Te táca sūtū cácujuhnu jíin táca tēe jéhnū jeē cándacu jniñū nuū ñayuu hebreo, ni casquínāhan de jnūhun ndese sáha de jeē cuu Jesús. <sup>2</sup> Te ni cajihni de ya, te cuangoo de jíin yá nuū Poncio Pilato, tēe cúu gobernador.

*Jeē ní jíhī Judas*

<sup>3</sup> Yūcuán na te Judas, tēe ni nastúu ya un, ní jito de jeē ní cunihīn siquī yā jeē cúu yā. Te ni jnahuhú ni de, te ni nacuaña de ocō uxí xūhun plata jeē ni níñin de nuū sutū cácujuhnu jíin núu táca tēe jéhnū. <sup>4</sup> Te ni cahān de jíin:

Cuēchi ní sáha ná jéē ní nastúu ná ñn tēe cuu de, te tú na cuēchi de.

Te maá sūtū un ní cacahān de:

¿Vé jítu ní ruhū? Cuēchi maá ró cúu. Achí de.

<sup>5</sup> Te ni scāne Judas xūhún un ini templo. Te ni quenda de cuahān de, te ni scuéhne de maá de.

<sup>6</sup> Te sutū cácujuhnu ni canastútú de xūhún un, te ni cacahān de:

Ma cúu chuhun yó xūhun yáha ñni jeynū nuū cásocō ñayuu, chi xūhun jéē ní jéconaa jeē cúu ñn tēe cúu, achí de.

<sup>7</sup> Yūcuán na te ni casāndaā de jeē xūhun yūcuán cuan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá. <sup>8</sup> Jeē yūcuán cúu jeē ndé vijna nání ñuhun ún Lugar Ñuhun Niñí. <sup>9</sup> Te súcuan ni squícu jnūhun ni cahān Jeremías, tēe ni nacani jnūhun Yāá Dios nde jenahán: Ni caquihīn de ndihócó uxí xūhun plata, te súcuan-ni cúu ñn yāhu jeē ní casáha ñayuu Israel cuenta jeē ndeé yā nuū i. <sup>10</sup> Te jíin xūhun un ní cajene de ñuhun quíxin, nájnūhun ní

ndacu máá Jítóho yō Yaā Dios jniñu nuū rī. Achí Jeremías.

*Jeē ní indichi Jesús nuū Pilato*  
(Mr. 15.2-5; Lc. 23.3-5; Jn. 18.33-38)

<sup>11</sup> Te nuū ní jinūcoo de jíin Jesús nuū gobernador, tēe cúu Pilato, te ni cajñuhún de ya: ¿A máá ró cúu Rey ñayuu hebreo? achí de. Te ni cahān Jesús:

Suu ri cúu, nájñuhun cáhān rō.

<sup>12</sup> Te sutū cácujeñhu jíin tēe jéñhu cándacu jniñu, ni cacahān de cuēchi siquī yā. Te tú na vé ni cáhān cuiti yā. <sup>13</sup> Yūcuán na te ni cahān Pilato jíin yá:

¿A tu jíini ró jēē cácahān de cuehē cuēchi siquī rō? achí de.

<sup>14</sup> Te tu ní cáhān cuiti yā ni iin jñuhun jíin de. Te nahān ní naa ni gobernador jeē tú na vé ni cáhān yā jíin de.

*Jeē ní cundaā jeē cúu yā*  
(Mr. 15.6-20; Lc. 23.13-25; Jn. 18.38-19.16)

<sup>15</sup> Te iyó costumbre gobernador jeē quivī víco un siaá de iin tēe íne vecāa, núu na-ni tēe cácuni ñayuu. <sup>16</sup> Te suu quivī un iyó iin tēe íne vecāa, nání de Barrabás, te je ní jitē núu jñuhun jeē ní sáha de cuēchi xeēn. <sup>17</sup> Te nuū ní candutútú ñayuu, te ni cahān Pilato jíin i:

¿Ndé tēe cácuni rō jeē siaá rī vijna: á Barrabás, chí Jesús jeē cúu Cristo, Yaā ní taji Yaā Dios? achí de.

<sup>18</sup> Súcuān ni cahān de chí cúní de siaá de Jesús. Chí je ní jecūhun ni de jeē ní cacucúsún ni táca sutū un cájito de ya, te jeē yúcuān ní quijicoo jíin yá nuū de.

<sup>19</sup> Te níni jēē néne Pilato silla nuū sándaā de jniñu, te ñasihí de ní taji ña jñuhun nuū de: Ma quivī nduu rō jíin ñayuu siquī tēe ndaā jíin, chí yōhyo ní siūhu jéni ruhū cuni jeē siquī de, achí ña.

<sup>20</sup> Te sutū cácujeñhu jíin táca tēe jéñhu, ni cascāhān de ñayuu jeē na cácan i jeē siaá de Barrabás, te na cúu Jesús. <sup>21</sup> Yūcuán na te ni cajñuhún tucu gobernador:

Jeē uú de, ¿ndé iin de cácuni rō jeē siaá rī? achí de.

Te ni cacahān i:

Siaá ni Barrabás, achí i.

<sup>22</sup> Te ni cajñuhún Pilato:

Núu súcuān te ¿ndese cácuni rō jeē sáha ri jíin Jesús, tēe cúu Cristo? achí de.

Te ni cacahān ndihi i:

Cata caa ní de jicā cruz, na cúu de, achí i.

<sup>23</sup> Yūcuán na te ni cahān Pilato:

¿Na cuēchi ní sáha de núu súcuān? achí de.

Te ñayuu un ní cacana jee ndasí i:

Cata caa ní de jicā cruz, na cúu de, achí i.

<sup>24</sup> Te ní jini Pilato jeē tu cúndeyí de jíin ñayuu, chí sa víhyá gā cácuvaā i. Te ní ndacu de jniñu jeē na quíji ndute, te ni nandahá de nuū ñayuu cuehē ún. Te ni cahān de:

Jeē nándahá rī yāha cúu seña jeē tú na cuēchi cōndee siquī rī jeē cúu tēe váha yāhá.

Chí siquī máá ró jijnáhan ró na cōndee. Achí de.

<sup>25</sup> Te ni cacahān ndihi ñayuu:

Suu siquī máá ná jíin siquī séhe ná na cōndee cuēchi jeē cúu de, achí i.

<sup>26</sup> Yūcuán na te ní siaá de Barrabás. Te ní ndacu de jniñu jeē na cáni táca soldado un Jesús, jíin jēē cáta caa de ya jicā cruz.

<sup>27</sup> Yūcuán na te soldado un cuango de jíin Jesús ini palacio. Te ni cacana de ndihi jnāhan de ní candutútú núu yā. <sup>28</sup> Te ní caquenehen de sahma ya, te ni cachuhun de ya iin sahma cuehé jeē cúu sahma rey. <sup>29</sup> Te ní casáha de iin corona iñu, ni cachuhun de xiní yā. Te ní cachihí de ndaha váha ya iin yujnu jeē nájñuhun bastón. Te ní casácatá de nuū yá, chí ní cajecuñi yití de, casáha de jeē chíñuhún de ya.

Nacā jeē váha rey cúu Rey ñayuu hebreo, achí de.

<sup>30</sup> Te ní catesihí de nuū yā. Te ní caquihin de yujnu jeē ní cachihí de ndaha ya, te ní cacani de xiní yā. <sup>31</sup> Te nuū ní cuu ní casácatá de nuū yā, te ní catava de sahma cuehé un, te ní canachuhun de ya sahma máá yá. Te cuango de jíin yá jeē cata caa de ya jicā cruz.

*Jeē ní cacata caa de ya jicā cruz*  
(Mr. 15.21-32; Lc. 23.26-43; Jn. 19.17-27)

<sup>32</sup> Te nuū ní quendacoo soldado un jíin yá, te ní canajnáhan de jíin iin tēe ñuu Cirene, nání de Simón. Te ní catejñiñu de tēe un jēē cōndiso de cruz yā.

<sup>33</sup> Te ní jinūcoo de iin lugar nuū nání Gólgota, jeē cuní cahān Lugar Yiquí Xiní. <sup>34</sup> Te ní cajēhe de vino jeē ní sácā núu jíin iin jeē uvuá jeē cóho ya. Te nuū ní jito ndee ya, te tu ní cúní yá coho ya.

<sup>35</sup> Te nuū ní cuu ní cacata caa de ya jicā cruz, te ní casáha de sorteo jeē siquī ndese nihín iin de sahma ya. Te súcuān ní squícu jñuhun ní tee tēe ní nacani jñuhun Yaā Dios jenahán: Ní casáha de sorteo siquī ndese nihín iin de sahma ri, achí yā, achí tutu.

<sup>36</sup> Yūcuán na te ní cacucōo de yūcuān jēē cóto de nde cuu yā. <sup>37</sup> Te ní catee de iin jñuhun xiní cruz yá jeē cahān na siquī ní jíhi yā: Yāha cúu Jesús, Rey ñayuu hebreo, achí.

<sup>38</sup> Te suni ní cacata caa de uú tēe cuíhná núu uú gā cruz, iin de lado váha ya, te inga de lado jecó yá. <sup>39</sup> Te ñayuu cáyāha yūcuān cáscuicó i xiní i, te cácahān neé i:

<sup>40</sup> Róhó chí cáhān rō jeē cáhu rō templo cáhnu, te nuū uní quivī te nacani ró. Núu súcuān te jnama ró máá ró vijna. Te núu Séhe Yaā Dios cúu ró, te nuu ró jicā cruz víi, achí i.

<sup>41</sup> Te sutū cácujeñhu, jíin tēe cástéén tutu ley, jíin tēe grupo fariseo, jíin tēe jéñhu jíin náhan de, suni súcuān ni cacahān catá de, te achí de cácahān máá de:

<sup>42</sup> Nuu inga ñayuu ni jnama de, ¿te naun tu cúu jnama de máa de vijna? Nuu Rey ñayuu Israel cúu de, te na núu de jicā cruz, návāha candije yó de. <sup>43</sup> Ni candije de Yaā Dios, te na jnama ya de vijna te núu cundáhú ni yā de, chí ni cahān de jeē cúu de Sēhe ya. Achí de jijnáhan de.

<sup>44</sup> Te tēe cuihná jeē cándita caa xiin ya, suni súcuan ni cacahān neé de.

### *Jeē ni jihí Jesús*

(Mr. 15.33-41; Lc. 23.44-49; Jn. 19.28-30)

<sup>45</sup> Te nuu ní cuu cahuxí uu, te ni cunee níi cáhnu nde cahuní. <sup>46</sup> Te nájnūhun cahuní, te ni cana jee Jesús:

Elí, Elí, ¿lama sabactani? achí yá. Te jnūhun un cúni cahān: Yaā Dios maá ná, Yaā Dios maá ná, ¿naun ni stóo ní sáña?

<sup>47</sup> Te sava ñayuu cáhīn yūcuan ní cajini i jnūhun ún, te ni cacahān i:

Tēe yāha cána de xiní Elías, tēe ni nacani jnūhun Yaā Dios jenahān, achí i.

<sup>48</sup> Te ni jinu-ni iin tēe, ni jequihin de iin cachí, te ni chundaji de nuū vinagre iyá. Te ni tee de xiní iin yujnu, te ni tee de yuhu ya jeē coho ya. <sup>49</sup> Te sava ga de ni cacahān:

Condetu ró, na condēhe yó núu quiji Elías jnama de chí tuú, achí de.

<sup>50</sup> Te Jesús ni cana jee ya inga jinu, te ni jihí-ni ya. <sup>51</sup> Te sahma ndíta caa jeē ndihyú cuarto i ini templo cáhnu, ni ndatá-ni sava sava nde xiní te nde nuū jehé. Te ni jnāa, te ni catahū sava toto. <sup>52</sup> Te ni cananune yaū nuū yindūji ndiyi. Te cuehē ndiyi jeē ní cacandije i Yaā Dios, ni canatecu i. <sup>53</sup> Te nuū ní natecu Jesús, te ni quendacoo i nuū yindūji i. Te ni ndivicoo i ini ñuu i Jerusalén, te cuehē ñayuu ni cajito nuū i.

<sup>54</sup> Te ná ni jihí Jesús, te tēe cúu capitán jīn tēe cáhīn jīn de jeē cándito de nde cuu yā, ni cajini de jeē ni jnāa, jīn táca gá jniñu ni cuu. Te yōhyo ni cayūhú de, te ni cacahān de:

Jendaá ndije jeē Séhe Yaā Dios cúu tēe yāha, achí de.

<sup>55</sup> Te yūcuan cáhīn cuehē ñahan, cándēhe jicá ña. Te suu ñahan un ní candiquin ña Jesús nde Galilea, vējicoo ña cájejniñu ña nuū yā. <sup>56</sup> Te uní ñahan un cácuu María ñuu Magdala, jīn María naná Jacobo jīn José, jīn naná ndindúú séhe Zebedeo.

### *Jeē ní quindūji Jesús*

(Mr. 15.42-47; Lc. 23.50-56; Jn. 19.38-42)

<sup>57</sup> Te nuū ní ini quiví ún, te ni quee iin tēe cúcá, nání de José, te tēe ñuu Arimatea cúu de. Te suni tēe ni scuáha jīn Jesús cúu de. <sup>58</sup> Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de. <sup>59</sup> Te José ni quihin de yiqui cúñu yā, te ni chusúcn de iin sahma cuitá iyó ndoo. <sup>60</sup> Te névāha de iin yaū jeē ní caan jeē jicá iin cava, nuū ná tu quindūji ndiyi. Te yūcuan ní chindūji de ya. Te ni jesí de iin yuū

cáhnu yuhu yá un, te cuahān de. <sup>61</sup> Te María ñuu Magdala, jīn inga María, cáyūcú ña ichi núu nuū yindūji ya.

### *Jeē ní cacondito soldado nuū yindūji ya*

<sup>62</sup> Te ni cuu táca jniñu yāha máa quiví jeē casátūhva ñayuu jeē quiji quiví ndétátú. Yūcuán na te ni cundijin maá quiví ndétátú. Te sutú cácujeñnu jīn tēe grupo fariseo ni jengoo de nuū Pilato. <sup>63</sup> Te ni cacahān de:

Cānucūhun ni na jēe nde na tēcu tēe stáhú neé un te ni cahān de jeē nátecu de nuū uní quiví. <sup>64</sup> Nuu súcuan te ndacu ní jniñu na cóto vāha táca soldado yuhu yá un nde núu ni yāha uní quiví. Chí núu tuú te sanaa te quiji-coo tēe ni cascuáha jīn de, te tava cuihná de ndiyi ún jecuáa, quingoo de jīn. Yūcuán na te cachi de nuū ñayuu jeē ní natecu tēe ún. Te cáhú gá cuu jnūhun stáhú yūcuan vēsú jeē xīhna ñūhún. Achí de.

<sup>65</sup> Te ni cahān Pilato:

Yāha cáhiyo soldado. Cuángoo jīn de, te sácútú vāha ró yuhu yá un, te coto vāha ró, núu ndese vāha ga cuu sáha ró. Achí de.

<sup>66</sup> Te cuangoo de, te ni casácútú de yuū jeē ndihyú yuhu yá un nuū yindūji ya, te ni castān niñin de. Te ni castóo de táca soldado un cándito.

### *Jeē ní natecu Jesús*

(Mr. 16.1-8; Lc. 24.1-12; Jn. 20.1-10)

## 28

<sup>1</sup> Te ni yāha quiví ndétátú un, te ni cundijin quiví domingo. Te María ñuu Magdala jīn inga María un, ní jecondēhé ña nuū ní yindūji Jesús. <sup>2</sup> Yūcuán na te iin sanaa-ni te ni jnāa niñin ndasí. Chí iin ndajéhé maá Jítoho yó Yaā Dios ni cuun ya ichi ándiví, ni quee ya nuū ní yindūji Jesús. Te ni stáa ya yuū ndihyú yuhu yá un, te ni cucóo ya siquí. <sup>3</sup> Te ndíndēe nuū yā nájnūhun taja, te sahma ñūhun ya yaa quiyi nájnūhun yuhvá volcán. <sup>4</sup> Te soldado cándito yūcuan ní quisi i de jeē cáyūhú de cájito de ya. Te ni cacuu ndiyi de. <sup>5</sup> Te ni cahān ndajéhé jīn ndindúú ñahan ún:

Ma yūhu ró, chí jini rí jeē vēcondēhe ró Jesús, Yaā ni jihí jicá cruz. <sup>6</sup> Tuá yā yāhá, chí je ni natecu yā, nájnūhun ni cahān yā. Nehen condēhe ró nuū ní cachindūji de ya. <sup>7</sup> Te yachí quingoo ró, te cachi ró nuū tēe cácuáha jīn yā jeē ní natecu yā. Te xīhna gā maá yá jinu Galilea, te sáa te najinūcoo de. Te yūcuán coto de nuū yā. Achí ró na cūni de. Je ni castūhun rí nuū ró, achí ndajéhé.

<sup>8</sup> Te ni quendacoo ña nuū ní yindūji ya, te yachí cuangoo ña. Te cáyūhú ña, te suni yōhyo cácusí ni ña. Te ní cajinu ña cuacastūhún ña nuū tēe cácuáha jīn yā. <sup>9</sup> Te níni cuángoo ña, te ni quee-ni Jesús nuū ña, te ni cahān yā jīn ña. Te ni quecoo ña nde nuū yā, te ni canundee ña jehé yā, te ni cachiñūhún ña ya. <sup>10</sup> Te ni cahān yā jīn ña:

Ma yūhu ró jijnáhan ró. Cuángoo te castūhun ró nuū tācá hermano rī, tēe ni cascuáha jíin rí, jeē na núngoo de nde Galilea, te yūcuán coto de nuū rī. Achí yá.

*Jnūhun ní cacahān soldado*

<sup>11</sup> Te níní cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujeñhu tācá jniñu jeē ní cuu. <sup>12</sup> Te sutú cácujeñhu ni candutútú de nuū tāca tēe jēhnu cándacu jniñu, te ni casquijnáhan de jnūhun. Yūcuán na te ni cajēhe de cuehē xūhun núu soldado jijnáhan. <sup>13</sup> Te ni cacahān de jíin:

Cahān rō jijnáhan ró jēe tēe cascuáha jíin de ni quijicoo jecuáa, te ni catava cuñha ndíyí un níní cáquixí rō, achi rō. <sup>14</sup> Te núu na cúni gobernador jnūhun yáha, te máá rí quiscahān rī de, návāha tú nihīn rō castigo jijnáhan ró. Achí de.

<sup>15</sup> Te soldado un ní caquihin de xūhún un, te ni cacachi de nájnūhun ni cacahān jíin de. Te nde vijna chí súcuan cácahān ñayuu hebreo nájnūhun ni cacahān soldado un.

*Jeē ní tejnūñu ya de nacani de jnūhun*

(Mr. 16.14-18; Lc. 24.36-49; Jn. 20.19-23)

<sup>16</sup> Te ndihúxí ñin tēe ni cascuáha un cuánungoo de nde Galilea, nde yucu nuū ní cachi Jesús jeē quíngoo de. <sup>17</sup> Te nuū ní cajito de nuū yá, te ni cachiñūhún de ya. Te sava de tu cácañdije vāha de jeē maá yá cúu. <sup>18</sup> Te ni quee ya nde nuū de, ni cahān yá jíin de:

Je ni jēhe Tátá rī ndihí poder nuū rī jeē ndácu rí jniñu andíví jíin ñáyiví. <sup>19</sup> Núu súcuan te cuángoo nuū ñayuu tācá nación, te stéén rō jnūhun rí nuū i návāha na cándije i. Te scuándute ró i jeē ní cacandije i máá Tátá jíin Séhe jíin Espíritu Santo. <sup>20</sup> Te stéén rō nuū i jeē na cuátáhú i tācá jniñu ní ndacu rí nuū rō. Te cocuhun ni rō jeē maá rí íne rí jíin ró níf cáni nde quiví jíinu ñayiví. Achí yá. Te ni cuu. Amén.



## JNUHUN VAHA NI TEE SAN MARCOS

*Jñuhun Juan tēe scuándute*

(Mt. 3.1-12; Lc. 3.1-9, 15-17; Jn. 1.19-28)

<sup>1</sup> Yāha quejéé jñuhun vāha máá Jesucristo Sēhe Yāā Dios, jeē ní quiji ya jeē jnama ya yohó.

<sup>2</sup> Isaías, tēe ni nacani jñuhun Yāā Dios nde jenahán, súcuan ni tee de jñuhun Juan nuū tútu:

Tají rí tēe nacani jñuhun ri cosnúú de ichi núú rō,

návāha coo túhva ñayuu jeē jinú rō, achí Yāā Dios jín Cristo.

<sup>3</sup> Te tēe ún cana je de nde nuū ñuhun téhé: Sátuhva ró máá ró jijnáhan ró, chi quee máá Jítoho yō.

Te sáha ró jñiñu ndaā, chi vēji ya, achi de.

Achí Isaías. <sup>4</sup> Te Juan ni jinú de nde nuū ñuhun téhé, scuándute de ñayuu. Te cáhán de jín i jeē na nácani ni i jeē stóo i cuēchi i te cuandute i, návāha cone cáhnu ni Yāā Dios nuū cuéchi i. <sup>5</sup> Te táca ñayuu región Judea jín ñayuu ñuu Jerusalén, ni quijicoo i nuū de. Te ni canacani ndaā i cuēchi i nuū Yāā Dios, te ni scuándute de i ini yūte Jordán.

<sup>6</sup> Te sahma ñuhun Juan cúu ixi camello, te núhni ñn cinturón ññ chíji de. Te jeē técu de cúu táca ndicuéhyí jín ndúxi yocō. <sup>7</sup> Te suhva ni nacani de jñuhun:

Quiji máá Yāā cujéhu ndasí. Chi tú na vé jéhu cuiti cúu ri nuū yā, ni jeē cuajñiñu ri nuū yā vēsú ñn jñiñu lúli gá nájñuhun jeē cuíta ndeyí ri ndají ri correa ndijēn yā. <sup>8</sup> Te ruhū chí jín ndute scuándute ri rohó jijnáhan ró, te Yāā ún chí nájñuhun jeē scuándute ya rohó cúu jeē cuáha ya Espíritu Santo condee ini anuá rō, achí Juan.

*Jeē ní jendute Jesús*

(Mt. 3.13-17; Lc. 3.21-22)

<sup>9</sup> Te ni cuu jecu quiví, te Jesús ni quenda ya ñuu Nazaret ndañú Galilea, te Juan ni scuándute de ya ini yūte Jordán. <sup>10</sup> Te ná ni quenda ya nuū ndúte, te ni jito ya jeē ní nune-ni andiví, te ni cuun Espíritu Santo ni quee xiní ya, te cáa nájñuhun ñn paloma. <sup>11</sup> Te ichi ándiví ní cahān ñn jñuhun:

Máá ró cúu Sēhe ri jeē maní ndasí rí jín, te yōhyo cúsi ní rí jín ró, achí.

*Jeē ní jito ndee jexeén Jesús*

(Mt. 4.1-11; Lc. 4.1-13)

<sup>12</sup> Yūcuán na te ná ni jinú Jesús nde nuū ñuhun téhé ní sáha Espíritu Santo. <sup>13</sup> Te uū xico quiví ni condee yā nuū ñuhun téhé un núú ñn quiti yúcu. Te ni jito ndee Satanás yā, chí cúní jeē sáha ya cuéchi. Te nuū ní cujiyo

Satanás cuahān, te ni quecoo ndajéhé Yāā Dios, ni cajejñiñu nuū yā.

*Jeē ní quejéé Jesús nacani ya jñuhun*

(Mt. 4.12-17; Lc. 4.14-15)

<sup>14</sup> Yūcuán na te ná ni cachune de Juan vecāa, te ni jinú Jesús región Galilea, nácani ya jñuhun vāha ndese ndácu Yāā Dios jñiñu. <sup>15</sup> Te ni cahān yā:

Je ni jinú quiví, te je ni cuyajni jeē ndácu Yāā Dios jñiñu nuū rō. Nacani ní rō jeē stóo ró cuéchi ró jijnáhan ró, te candije ró jñuhun jeē jnama ya rohó. Achí yā.

*Jeē ní cana ya cuñn tēe jñi chācá*

(Mt. 4.18-22; Lc. 5.1-11)

<sup>16</sup> Te jíca Jesús yumar Galilea cuahān yā. Te ni jito ya nuū Simón jín ñani de Andrés. Te tēe cájni chācá cácuu de, te cásinga de ñunu de ini mar. <sup>17</sup> Te ni cahān yā jín de:

Condiquín ruhū na quíhín yō, te nasáha ri rohó téé nihín cuéhē ñayuu candije ruhū, nájñuhun cánihín rō chācá, áchí yā.

<sup>18</sup> Yūcuán na te ni castóo-ni de ñunu de, te ni candiquín de ya.

<sup>19</sup> Te ni jica ya jecu gā, te ni jito ya nuū Jacobo jín ñani de Juan, sēhe Zebedeo, suni cáyucú de ini barco de, cánachijnñ de ñunu de. <sup>20</sup> Te suni ni cana ya de jeē cóndiquín de ya. Te ni castóo-ni de tátá de Zebedeo ini barco un jín mozo de, te ni candiquín de ya cuango de.

*Jeē ní quenehen ya tachí ini ñn tēe*

(Lc. 4.31-37)

<sup>21</sup> Te ni jinú yā jín de ñuu Capernaum. Te quiví ndétātu ní quiví ya ini vehe ñi sinagoga, te ni steén yā jñuhun. <sup>22</sup> Te ni cana ni ñayuu ni cajini i jñuhun steén yā. Chi ni steén vāha ya nuū i, chí máá yá cúu jeē ndíso jñiñu siquí ndihí. Te tēe cástéén tutu ley Yāā Dios, tu súcuan cástéén de. <sup>23</sup> Te ini vehe ñi sinagoga ñuu un ñe ñn tēe jeē ñuhun tachí ini. Te ni cana cóhó de:

<sup>24</sup> ¿Naun vēji ní núú na jijnáhan ná, Jesús ñuu Nazaret? ¿A vēji ní jéé snáá ní sáña, chí naún? Je jín na ndé ñn cúu ní, chí Sēhe ñi Yāā Dios cúu ní. Achí de.

<sup>25</sup> Te Jesús ni cahān xeén yā jín táchí ún:

Casi yuhu ró te quenda ró ini de, achí yā.

<sup>26</sup> Te tachí ún xeén ní jehni yíhí téé ún. Te ni cana cóhó, te ni quenda ini de cuahān. <sup>27</sup> Te ndihí ñayuu ní cayuhú i, te cácajnñuhun jnánhan i:

¿Na vé cúu jeē yáha? ¿A ñn jñuhun jéé cúu jeē yáha? Chí tēe yáha cujéhu de jeē ndácu de jñiñu nde nuū tachí te quéndacoo, áchí i.

<sup>28</sup> Te yachí ni jíté nūu jñuhun Jesús cuahān ní cáhnu región Galilea.

*Jeē ní nasávāha ya naná chíso Simón Pedro*

(Mt. 8.14-15; Lc. 4.38-39)

<sup>29</sup> Te ni quenda ya jíin de jíjnáhan de ini vehe íi sinagoga. Te Jesús ni jehên yâ jíin Jacobo jíin Juan nde vehe Simón jíin Andrés. <sup>30</sup> Te náná chíso Simón, catú ña yíhi quíji ña. Te ni cacastühun de nuú yâ jeê cuhú ña. <sup>31</sup> Yücuán na te ni quindehe ya nuú catú ña, te ni jñi ya ndaha ña, te ni ndonehen ya ña. Te ni quenda-ni quíji ún ña, te ni sáha ña jeê ní cayejí de jíin yâ.

*Jeê ní nasávâha ya cuehê ñayuu*  
(Mt. 8.16-17; Lc. 4.40-41)

<sup>32</sup> Te ni queê niándii te ni cuaa. Te ni quecoo ñayuu jíin táca ñayuu cácuñú jíin jéê ñúhun tachí ini. <sup>33</sup> Te táca ñayuu ñuu un ní cacutútú i yehýí un. <sup>34</sup> Te ní nasávâha ya cuehê ñayuu cácuñú tjini nuú cuehyí, te ni quenehen ya cuehê tachí un cuángoo. Te tachí chí je cájini un yâ, te tu ní jéhe ya jñuhun jeê cástühun ndé ñin cúu ya.

*Jeê ní nacani ya jñuhun región Galilea*  
(Lc. 4.42-44)

<sup>35</sup> Te nehen ndasí ní ndonda ya, nde yínee gâ. Te ni quenda ya cuahân sún ya yatâ ñúú nuú tú ñayuu, te yücuan ní jicân tahú yâ. <sup>36</sup> Te Simón jíin téê cáhiin jíin de, ni jenanducú de ya. <sup>37</sup> Te ní cananihin de ya, te ní cacahân de jíin yâ:

Táca ñayuu cánanducú i nihín, áchí de.

<sup>38</sup> Te máá yâ ní cahân yâ:

Sa suhva na quíhin yô táca gâ ñuu íne yajni, návâha suni nacani ri jñuhun nuú i, chí jeê yücuan ní quee rí. Achí yâ.

<sup>39</sup> Te súcuan te ní jica cuu ya ní región Galilea, ní nacani ya jñuhun ini vehe íi sinagoga táca ñuu, te ní quenehen ya tachí ini ñayuu.

*Jeê ní nasávâha ya ñin téê ndóho cuehyí stehyú*

(Mt. 8.1-4; Lc. 5.12-16)

<sup>40</sup> Te ñin téê ndóho cuehyí stehyú, ní quee de ní jecuiñí yití de nuú yâ, te ní cahân de jíin yâ:

Jíni na jeê cuu sáha ní jéê nduvâha ná, te núu cúní ní, áchí de.

<sup>41</sup> Te Jesús ní cundáhu ní yâ de, te ní soó yâ ndaha ya siquí de, te ní cahân yâ:

Cúní rí. Te na nduvâha ró, áchí yâ.

<sup>42</sup> Te ná ní cahân yâ súcuan, te ní nduvâha-ni téê ndóho cuehyí stehyú un. <sup>43</sup> Yücuán na te nátají yâ de quinhun de, te ní cahân ñihin ya jíin de:

<sup>44</sup> Ma cáchi cuiti rō nuú ní ñin. Chí quisteén rō maá ró nuú sutú, te condahá ró jeê socó rō nuú Yáa Dios siquí jeê ndúndoo ró núú yâ, nájnühun ní ndacu Moisés jñiñu jenahán. Te súcuan te cuni ñayuu jeê ní nduvâha ró. Achí yâ.

<sup>45</sup> Te ní quenda de cuahân de, te ní quejé de nácani de jñuhun nuú ndíhi ñayuu ndese ní nduvâha de. Te siquí yücuan tuá ní cúu

quívi Jesús táca ñuu, chí cúchitú ndasí ñayuu nuú yâ. Te ní jica ya yatâ táca ñuu nuú tú cúchitú ñayuu. Te táca lado ní quijicoo ñayuu nuú yâ.

*Jeê ní nasávâha ya ñin téê ndóho cuehyí ní jíin*  
(Mt. 9.1-8; Lc. 5.17-26)

## 2

<sup>1</sup> Te ní cuu jecu quívi, te ní quívi tucu Jesús ñuu Capernaum. Te ní cajini ñayuu jeê néne ya vehe. <sup>2</sup> Te ní cacutútú-ni cuehê ñayuu, te ní chitú vehe jeê ndé yehýí tuá núne. Te ní nacani ya jñuhun Yáa Dios nuú i. <sup>3</sup> Yücuán na te ní quecoo cuñin téê nuú yâ, cándiso de ñin téê ndóho cuehyí ní jíin. <sup>4</sup> Te tu ní cúu quívicoo de nuú yâ siquí jeê chitú ñayuu. Te ní cacoo de siquí véhe, te ní canune de ndaa nuú íin ya, te yaú un ní cascúun de téê cühú, cátu de nuú ñin camilla. <sup>5</sup> Te ní jini Jesús jeê cácañdíje de jeê cúu nasávâha ya téê cühú un. Te ní cahân yâ jíin téê cühú un:

Séhê, je íne cáhnu ní rí nuú táca cuéchi ró, áchí yâ.

<sup>6</sup> Te yücuan cáyúcú jecu téê cástéén tutu ley Yáa Dios, te téê un ní cajeni ní de siquí yâ: <sup>7</sup> ¿Naun cáhân téê yáha súcuan? Cáhân de jñuhun ndevâha jeê quítí ní Yáa Dios, chí nasúu Yáa Dios cúu de jeê cóne cáhnu ní de nuú cuéchi. <sup>8</sup> Te ní jini Jesús jeê súcuan cájini ní de, te ní cahân yâ jíin de:

¿Naun cájini ní rō jeê cahân ndevâha ri? <sup>9</sup> Jeê uú jñuhun yáha, ¿ndé ñin yí gá cáa? ¿A jéê cahân rí jíin téê cühú: Je íne cáhnu ní rí nuú táca cuéchi ró? ¿Chí yí gá jeê cahân rí: Ndocuiñí te naquihin ró camilla ró, te cacá ró, achí rí? <sup>10</sup> Te vijta te na stéén rí jeê maá rí, Yáa ní nduu téê, ndíso jñiñu rí ini ñayívi yáha jéê cóne cáhnu ní rí nuú cuéchi.

Yücuan na te ní cahân yâ jíin téê ní jíin ún:

<sup>11</sup> Cáhân rí jíin ró, ndocuiñí te naquihin ró camilla ró, te quinhun ró vehe ró, áchí yâ jíin de.

<sup>12</sup> Yücuán na te ní ndocuiñí-ni téê ún, te ní naquihin de camilla de, te ní quenda de cuahân de, jíto jínúú ndíhi ñayuu. Te ndívi i ní canaa ní i cájito i, te ní cacahân i jeê yóhyo vâha Yáa cúu Yáa Dios. Te áchí i:

Ná tu coto cuiti yô ní ñin jñiñu súcuan, áchí i.

*Jeê ní cana ya Leví*

(Mt. 9.9-13; Lc. 5.27-32)

<sup>13</sup> Te ní quenda tucu ya cuahân yâ nde yumar. Te táca ñayuu ní jñucoo i nuú yâ, te ní stéén yâ jñuhun nuú i. <sup>14</sup> Yücuán na te ní yáha ya cuahân yâ, te ní jito ya nuú Leví séhe Alfeo, néne de nuú cutútú xuhun renta. Te ní cahân yâ jíin de:

Conduquín ruhú na quíhin yô.

Te ní ndocuiñí de, te cuahân de jíin yâ.

<sup>15</sup> Yücuán na te ni jehēn yā ni yeji yā staā vehe de. Te cuehē tēe cástútú xúhun renta jín inga tēe cása ha cuēchi, suni cáyucú de cáyeji de staā jín Jesús jín tēe cáscuá ha jín yá, chí iyó cuēhē de jeē cándiquin de ya. <sup>16</sup> Te tēe cástēen tutu ley Yaā Dios jín tēe grupo fariseo, ni cajito de jeē yeji yā staā jín ndihí táca tēe ún. Te ni cacahān de jín tēe cáscuá ha jín yá:

¿Naun yeji maestro rō jín tēe cástútú xúhun renta jín inga tēe cása ha cuēchi? áchi de.

<sup>17</sup> Te ni jini Jesús, te ni cahān yā jín de:

Ñayuu cáhiyo váha, tu jini nūhún i tēe tájána, chí ñayuu cácuahū cúu jeē jini nūhún. Te ruhú nasūu jēe véji ri cana ri ñayuu tú cuēchi, jeē cúu i nájnuhun ñayuu cáhiyo váha. Chí sa suhva véji ri cana ri ñayuu cáhiyo cuēchi, jeē na nácani ni i te stóo i cuēchi i. Áchi yá.

*Jeē ní cacajnuhun de ya siquī jeē cóndite ní (Mt. 9.14-17; Lc. 5.33-39)*

<sup>18</sup> Te ni cuu in quiví jeē cáhiyo ndite ni tēe cáscuá ha jín Juan, jín tēe cáscuá ha jín grupo fariseo. Te ni quecoo jecu tēe, ni cacahān de jín Jesús:

Tēe cáscuá ha jín Juan jín jēe cáscuá ha jín grupo fariseo, tijni jínu cáhiyo ndite ni de. Te tēe cáscuá ha jín máá ní, ¿naun tu cása ha de súcuan?

<sup>19</sup> Te ni cahān Jesús jín de:

¿A cuu condite ni de níni jēe iyó rí jín de? ¿A cuu condite ni ñayuu cáhiin vico nándáha, te núu níni néne tēe nándáha? Chí núu néne tēe nándáha, te ma cúu condite ni i. <sup>20</sup> Te quee quiví jeē cújiyo tēe nándáha, te quiví ún chí condite ni i.

<sup>21</sup> Te ni cahān yā uū jñuhun yátá siquī jeē tu quijnáhan jñuhun jeē jēe steēn yā jín táca jñuhun jenahán. Áchi yá:

Ni in tu náchuhun in pedazo sahma jēe núu in sahma túhú. Chí núu súcuan te ndiyi pedazo jeē un, te tahndé gā jeē túhú un, te nducáhu ga nuū catáhné un. <sup>22</sup> Te suni tu cáchuhun vino jeē ini ñi túhú. Chí núu súcuan te vino jeē un ndatá ñi ún, te naa vino jín ñi. Jeē yúcuan cánú jēe chúhun i vino jeē ini ñi jēe.

*Jeē ní cataxín de yoco trigo quiví ndétátú (Mt. 12.1-8; Lc. 6.1-5)*

<sup>23</sup> Te in quiví ndétátu ní yáha Jesús cuahān yā mēhñú nuū cáa trigo. Te tēe cáscuá ha jín yá, cájica de cuahān de, te ni quejé de cátaxín de yoco trigo cáyeji de. <sup>24</sup> Yücuán na te tēe grupo fariseo ni cacahān de jín yá:

Condéhé. ¿Najehé casáha tēe cáscuá ha jín ró súcuan? Chí áchi ley Moisés jeē ma cúu sáha yó ni in jniñu quiví ndétátú. Áchi de.

<sup>25</sup> Te ni cahān máá yá jín de:

¿A tu ní cácahu cuiti rō tutu ndese ni sáha David, in quiví ní cumaní jeē cáji de, te ni jii de sóco jín tēe cáhiin jín de? <sup>26</sup> Te ni quiví

de ini vehe Yaā Dios. Te Abiatar ni cuu sutú cujéhu ga. Te ni yeji de pan i jeē yosó ndijin nuū Yaā Dios. Te tú na ley jeē cáji ni in tēe, chí máá-ni sutú cuu caji. Te suni ni jēhe de ni cayeji tēe cáhiin jín de. Te tú na cuēchi ní iyo siquí de. Áchi yá.

<sup>27</sup> Te suni ni cahān yā jín de jijnáhan de:

Tu ní jéconaa ñayuu jeē ndóho i nuū quiví ndétátú, chí ni jéconaa quiví un jēe ndétátú i. <sup>28</sup> Núu súcuan te ruhú, Yaā ní nduu tēe, máá rí cúu jeē ndácu jniñu siquí ndese sáha ñayuu quiví ndétátú, áchi yá.

*Jeē ní nduváha tēe ni ichi ndaha (Mt. 12.9-14; Lc. 6.6-11)*

### 3

<sup>1</sup> Te ni quiví tucu Jesús ini vehe i sinagoga. Te yúcuan ine in tēe ni ichi in ndaha de.

<sup>2</sup> Te tēe grupo fariseo cájito yuhu de ya núu nasáváha ya tēe un quiví ndétátú, náváha nihin de cuēchi siquí yá. <sup>3</sup> Yücuán na te ni cahān yā jín tēe ni ichi ndaha ún:

Ndocuñi te condichi rō mēhñu yáha, áchi yá.

<sup>4</sup> Te ni cajnuhun yá de jijnáhan de:

¿Ndese cáhan ley siquí quiví ndétátú? ¿A jēe sáha váha yó, chí sáha néé yó? ¿A jēe nasáváha yó ñayuu je yajni cuu, chí sáha yó jēe cúu i? áchi yá.

Te máá de tú na vé ni cacahān de. <sup>5</sup> Te ni quiví ni yá ni jito ya nuū de jijnáhan de, te ni cuculhá ni yá jeē nihni ni de. Te ni cahān yā jín tēe ni ichi ndaha:

Scáá ndaha rō.

Te ni scaá de, te ni nduváha-ni ndaha de. <sup>6</sup> Yücuán na te ni quendacoo tēe grupo fariseo, te ni casquijnáhan de jñuhun jín tēe grupo Herodes siquí yá, ndese cahni de ya.

*Jeē ní quecoo cuehē ñayuu nuū yá yumar*

<sup>7</sup> Te Jesús cuahān yá nde yumar jín tēe cáscuá ha jín yá. Te cuehē ñayuu región Galilea ni candiquin i ya. <sup>8</sup> Te suni ñayuu región Judea, jín ñayuu ñuu Jerusalén, jín ñayuu Idumea, jín ñayuu ichi núu cáne niándii yūte Jordán, jín ñayuu región Tiro jín Sidón, cuehē ndasí ñayuu ni cajini jñuhun i jniñu jéhu ni sáha ya, te ni quecoo i nuū yá.

<sup>9</sup> Te ni cahān yā jín tēe cáscuá ha jín yá jeē na cóo túhva in barco quiví ya, náváha ma chítú nihin ñayuu cuehē ún xiin ya. <sup>10</sup> Chí cuehē ñayuu je ni nasáváha ya, te jeē yúcuan vëjicoo cuehē gā ñayuu cándoho táca núu cuehyí, te chítú nihin i xiin ya jeē quehé i ya cácuni i. <sup>11</sup> Te ñayuu cáñuhun tachí ini, núu ni cajito nuū yá, te cájecuñi yití núu yá, te cácana cóho:

Máá ní cúu Sēhe Yaā Dios, áchi.

<sup>12</sup> Te ni ndacu nihin ya nuū tachí un jēe ma cáhan gā jeē cúu ya Sēhe Yaā Dios.

*Jeē ní nacáji ya uxí uū tēe apóstol (Mt. 10.1-4; Lc. 6.12-16)*

<sup>13</sup> Yūcuán na te ni caa ya cuahān yā ñn yucu. Te ni cana ya tāca tēe jeē cuni maá yá caca jíin yá, te ni quecoo de nuū yā. <sup>14</sup> Te ni jeni ya uxī uū de jeē cuñi de jíin yá, te tají yá de quingoo de nacani de jñuhun. <sup>15</sup> Te ni sāha ya jeē cóndiso jñífu de nasávaha de ñayuu cuhú te quenehen de tachí ini ñayuu. <sup>16</sup> Te yāha cúu ndihúxí uū tēe jeē ní nacáji ya: Simón jeē ní nasnání yá de Pedro. <sup>17</sup> Te Jacobo jíin ñani de Juan, sēhe Zebedeo. Te ni nasnání yá ndíndúú de Boanerges, jeē cuni cahān: Tēe yíhi fuerza nacani jñuhun, nájñuhun yíhi fuerza taja. <sup>18</sup> Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista, <sup>19</sup> jíin Judas Iscariote, tēe jeē ní nastúu de ya.

*Jeē ní cacahān ñayuu jeē jejniñu ya fuerza Satanás*

(Mt. 12.22-32; Lc. 11.14-23; 12.10)

Yūcuán na te ni quívi ya ñn vehe jíin tēe cáscuaha jíin yá un. <sup>20</sup> Te ni ndutútu tucu cuehē ñayuu, te ni tuá ní cúu caji yā staá jíin de. <sup>21</sup> Te tāca jñáhan vehe ya ni cajini jñuhun jeē súcuan cúu. Te ni quecoo de venūquihin de ya. Chí cacahān de jeē ní sana xiní yá.

<sup>22</sup> Te suni tēe cástéen tutu ley Yaā Dios jeē ní quijicoo nde ñuu Jerusalén, ni cacahān de:

Tēe yāha ñuhun Satanás ini de, jeē cujéhu nuū tachí. Te jíin fuerza un quénehen de tachí, achí de.

<sup>23</sup> Te ni cana ya de jíjñáhan de, te ni cahān yā ñn jñuhun yátá jíin de:

¿Ndese cuu quenehen Satanás maá? <sup>24</sup> Chí núu ñn nación sásñn maá te cuajnáhan maá, nación un má cúu ga coyūcu cáhnu. <sup>25</sup> Te núu ñayuu ñn vehe sásñn maá te cuajnáhan maá, ñayuu un má cúu ga coyūcu cáhnu. <sup>26</sup> Te suni súcuan Satanás jíin jñáhan tachí, chí núu sásñn maá te cuajnáhan maá, núu súcuan te ma cóo ga, chí sa suhva naa.

<sup>27</sup> Te ni ñn tēe ma cúu quívi de ini vehe tēe ndacuí jeē quenehen de ndajñífu de. Chí cánuú jeē xíhna gā cuhni de tēe ndacuí ún. Te suni súcuan cúu jeē jíhni rī Satanás te quénehen rī tachí.

<sup>28</sup> Te jendaá cahān rī jíin ró jeē iyó modo coo jñuhun cáhnu ni nuū tāca cuéchi cásaaha ñayuu, te suni nuū tāca jñuhun néé cacahān i. <sup>29</sup> Te núu cahān ndevāha i síquī Espíritu Santo, te ma cóne cáhnu ni Yaā Dios nuū i, chí sa suhva condee cuéchi síquī i níf cáni, achí yá.

<sup>30</sup> Súcuan ni cahān yā, chí ni cacahān i jeē quénehen ya tachí jíin fuerza Satanás.

*Náná yā jíin ñani yā*

(Mt. 12.46-50; Lc. 8.19-21)

<sup>31</sup> Yūcuán na te ni quee naná yā jíin táca ñani yā. Te íin ña nuū quéhe, te ni tají ña jñuhun cuahān nuū yā jeē cána ña ya. <sup>32</sup> Te ñayuu cáyūcu níf xiin ya, ni cacahān i jíin yá:

Náná ni jíin táca ñani ni cáhñn nuū quéhe, te cácuni cahān jíin ní, achí i.

<sup>33</sup> Te ni cahān maá yá:

¿Ndé ñn cúu náná rī jíin ñani rī? achí yá.

<sup>34</sup> Yūcuán na te ni ndacoto ya nuū ñayuu cáyūcú xiin ya ún, te ni cahān yā:

Suni náná rī jíin ñani rī cácuu tāca ñayuu yáha. <sup>35</sup> Chí táca ñayuu casquicu jñífu cúní Yaā Dios, suu cácuu ñani rī, cuāha rī, náná rī, achí yá.

*Jñuhun yátá síquī tēe jéte trigo*  
(Mt. 13.1-9; Lc. 8.4-8)

#### 4

<sup>1</sup> Te yumar ni quejéé tucu Jesús steén yā jñuhun. Te ni cutútu cuehē ndasí ñayuu nuū yā, te jeē yúcuan ní quívi ya ni cucóo ya ini ñn barco nuū mar. Te tāca ñayuu un cáyūcú i yumar. <sup>2</sup> Te jíin jñuhun yátá ní steén yā cuehē jñuhun nuū i, te súcuan ni cahān yā:

<sup>3</sup> Cuni nahín jíjñáhan ró: ñn tēe cate trigo, ni quenda de jeē cáte de. <sup>4</sup> Te ná ni quejéé de jéte de, te jecu trigo ni jité yuhíchi. Te ni quecoo saa, ni cayeji tí. <sup>5</sup> Te jecu gā trigo ni jité nuū ñuhun yuū, nuū tú cuehē ñuhun. Te yachí-ni ní cane, chí tu cóquun ñuhun. <sup>6</sup> Te nuū ní cane niándii, te ni ichí-ni, te ni casun, chí tu ní níhñn nuū quihín yoho. <sup>7</sup> Te jecu gā trigo ni jité nuū náne íñu. Te ni jehnu íñu ún, te ni jesi nuū, te tu ní jéhe nuní. <sup>8</sup> Te jecu ni jité nuū ñuhun váha. Te ni cane, te ni jehnu, te ni jéhe cuehē nuní. Sava ni jéhe ocó uxí jeē ñn ñn nuní, te sava ga ní jéhe uní xico, te sava ga ní jéhe ciento. Achí yá.

<sup>9</sup> Yūcuán na te ni cahān yā jíin de:

Tāca róhó jéé jíni sōho, na chúsohó ró. Achí yá.

*Najehē cahān yā máni jñuhun yátá*  
(Mt. 13.10-17; Lc. 8.9-10)

<sup>10</sup> Yūcuán na te ni quendóo maá na yā, jíin ndihúxí uū tēe cáscuaha jíin yá, jíin jecu gā ñayuu cáhñn jíin de. Te ni cacajñuhun de ya na vé cuni cahān jñuhun yátá un. <sup>11</sup> Te ni cahān yā jíin de:

Róhó, chí sāha Yaā Dios jeē cájecūhun ni ró jñuhun ni yisáhi yāha, ndese quívicoo ñayuu ndaha ya ndacu ya jñífu nuū i. Te ñayuu jeē cáhñn sán síquī, chí máni jíin jñuhun yátá cahān rī tāca jñuhun jíin i. <sup>12</sup> Súcuan cahān rī návaha vésú cájito i, te quendóo i nájñuhun jeé tú na vé ní cájito i. Te vésú cájini sōho i, te ma jécūhun ni i, te ma násāma ini i quívicoo i nuū rī, te ma cóo jñuhun cáhnu ni nuū cuéchi i, achí yá.

*Jeē ní castūhun cájí yá jñuhun yátá tēe jéte trigo*

(Mt. 13.18-23; Lc. 8.11-15)

<sup>13</sup> Te ni cahān gā yā jíin de jíjñáhan de:

Núu tu cájecūhun ni ró jñuhun yátá yáha, ¿te ndese jecūhun ni ró táca gá jñuhun yátá núu súcuan? <sup>14</sup> Tēe jéte trigo cúu tēe scuíte

nú jnūhun Yaā Dios. <sup>15</sup> Te trigo jeē ni jítē yuhíchi cúu nájñūhun ánuá sava ñayuu. Chi cájini nahín i jñūhun ya, te ná ni cajini i, te quíjini-Satanás te quénde-ni jñūhun ini anuá i. <sup>16</sup> Te trigo jeē ni jítē nuū ñūhun yuū, chi cúu nájñūhun ánuá sava ñayuu cájini nahín jñūhun, te yachí-ni cájetáhú i te cácusī ni i jín. <sup>17</sup> Te tu cúcutú jñūhun ún ini anuá i, te jecu-ni quivī cájetáhú i. Te núu ni quejéé jnúndóho, chí jító xeēn ñayuu i siquī jñūhun ún, te quejéé nácani yátá ni i. <sup>18</sup> Te jeē ni jítē nuū náne iñu cúu nájñūhun jecu gā ñayuu. Chi vésu ni cajini sóho i, <sup>19</sup> te cándihví ni i siquī jeē iyó ini ñayivi yáha. Te cácuti i cucúcá i, te stáhú un i jeē cutóo ni i siquī táca ndajñiñu. Te ndihi jeē yáha cácujnéñu i jín, te jési nuū jñūhun ya, te tu ije i jín jñūhun ya. <sup>20</sup> Te trigo jeē ni jítē nuū ñūhun váha cúu nájñūhun ñayuu cájini nahín jñūhun, te cájetáhú i, te cáhije i jín jñūhun ya. Te sava i cúu nájñūhun nuní jeē jéhe ocó uxí jeē ñin ñin, te sava i jéhe uní xico, te sava ga i jéhe ciento. Achí yá.

*Jñūhun yátá siquī lámpara  
(Lc. 8.16-18)*

<sup>21</sup> Suni ni cahān yā jín de:

Núu nástñin ñayuu ñin lámpara, ¿a chúne i chíjini ñin cajón chí chíjini jito? Tuú, chí jéni i nuū sucún návāha cundijin. <sup>22</sup> Te suni súcuan, tu iyó ni ñin jñūhun sáhi jéé ma cúni ñayuu, chí ndihi táca jñūhun natūu ndijin te cuni ñayuu. <sup>23</sup> Táca róho jéé jini sóho, na chúsóho ró, achí yá.

<sup>24</sup> Te suni ni cahān yā jín i:

Cuni sóho váha ró. Chi cūhva jeē chusóho ró jñūhun Yaā Dios, suni cūhva un cuáha ya nuū ró, te víhyá gā cuáha ya nuū máá ró jeē chusóho váha ró. <sup>25</sup> Chí ñayuu je jécūhun ni, stéén gā yā nuū i. Te ñayuu tu cándije, máá jecu jeē jini i ún, sa suhva naa. Achí yá.

*Jñūhun yátá siquī trigo jeē jéhu*

<sup>26</sup> Te ni cahān gā yá:

Súcuan cúu jeē ndácu Yaā Dios jniñu nuū ñayuu: Cúu nájñūhun trigo jeē ní jete ñin tē. <sup>27</sup> Yúcuán na te quíxi de te ndóna de, te súcuan jica quivī cuahēn. Te trigo un cáne te jéhu. Te máá de tu jín de ndese cúu jeē jéhu. <sup>28</sup> Chí máá ñūhun sáha jeē jéhu trigo, xihna gā yucú, sáá te cáne yoco, yúcuán na te ije máá nún. <sup>29</sup> Te núu ni cuan trigo un, te quejéé ñayuu cájehnde i, chí je ni jinū quivī tahndé. Achí yá.

*Jñūhun yátá siquī ndiquin mostaza  
(Mt. 13.31-32; Lc. 13.18-19)*

<sup>30</sup> Te suni ni cahān yá:

Na cahān rī ñin jñūhun yátá návāha cuni ró ndese ndúcuehē ñayuu jeē ndácu Yaā Dios jniñu nuū. <sup>31</sup> Ndúcuehē i nájñūhun jéhu ñin ndiquin mostaza jeē jéquin i nuū ñūhun. Te yúcuan cúu ñin ndiquin lúlí gā vésu táca

ndiquin jeē iyó. <sup>32</sup> Te ná ni jequin i, te cáne te jéhu ga vésu táca gá yucú, te cúnáhu ndaha. Te táca saa chí sáha tí tacā tí nuū cuándahú xiní ún. Achí yá.

*Jeē máni jñūhun yátá cahān yā jín i  
(Mt. 13.34-35)*

<sup>33</sup> Te cuehē jñūhun yátá súcuan ni cahān yā jín ñayuu, núu nasaa cánda i jecūhun ni i. <sup>34</sup> Te táca jéé ni stéén yá, máni máá jñūhun yátá ni cahān yā jín i. Te nuū tēe cáscuáha jín yá chí ni nacastūhun cájini yá jñūhun ún.

*Jeē ní jecuiñi tachí ñihin jín mar ni sáha ya  
(Mt. 8.23-27; Lc. 8.22-25)*

<sup>35</sup> Te jeē cuácuaa quiví ún, te ni cahān yā jín tēe cáscuáha jín yá:

Na yáha yó quíñin yó inga lado mar, achí yá.

<sup>36</sup> Te ni casquéndóo de ñayuu cuehē ún, te ni quívicoo de ini barco nuū je íne Jesús, cuangoo de jín yá. Te suni cuangoo jecu gā barco jín de jínñahan de. <sup>37</sup> Te ni jecuiñi ñin tachí ñihin, te ni stóna ndute mar, te ni quiví ini barco. Te je yajni chitú ndute ini barco. <sup>38</sup> Te Jesús cátu yá yátá de ini barco, quíxi yá te yíhi ñin sahma cástíhi xiní yá. Te ni castóna de ya, te ni cacahān de:

Maestro, ¿á tu sáha ní cuenta jeē quee yó chíjini ndute te cuu yó? achí de.

<sup>39</sup> Te ni ndocuiñi yá, te ni cahān yā nuū tachí ñihin un jín nuū mar:

Jecuiñi te nayúu-ni coo ró, achí yá.

Te ni jecuiñi tachí, te ni cuu nayúu í-ni.

<sup>40</sup> Te ni cahān yā jín de jínñahan de:

¿Naun cáyūhú ndasi ró? ¿Naun tu cácan dije ró jéé cácu ró sáha rí?

<sup>41</sup> Te yóho ni cayuhú de, te ni cacahān de jín jñahan de:

¿Ndé ñin ga cúu tēe yáha jéé nde tachí ñihin jín mar cájetáhú jéé cahān de? achí de.

*Tēe Gadara jeē ndóho tachí  
(Mt. 8.28-34; Lc. 8.26-39)*

## 5

<sup>1</sup> Te ni jinū Jesús jín de jínñahan de inga lado mar, región Gadara. <sup>2</sup> Te ná ni quenda ya ini barco un, te ñin tēe ñūhun tachí ini, ni quenda de nde nuū yándūjini ndíyi, te ni quee de nuū yá. <sup>3</sup> Tēe un ndéé de nuū yándūjini ndíyi. Te tu jéjiniñu jeē jini ñayuu de, ni jín cadena. <sup>4</sup> Chí cuehē jínu ni conuhñi jehé de ndaha de jín cadena. Te táca jínu jéhn de, te sácuechi de. Te tú ni ñin cúndeyí jín de. <sup>5</sup> Te nduú ñuú jica de yucu jín nuū yándūjini ndíyi, te cána cóho de, te stújí de máá de jín yúu. <sup>6</sup> Te náa jicá gá vėjí Jesús, te ni jito de ya. Te jínu de ni quee de nuū yá, te ni jecuiñi yití de nuū yá. <sup>7</sup> Te ni cana cóho de:

¿Naun vėjí ní nuú ná, Jesús Sēhe Yaā Dios, Yaā cujéhu tēy? Cahān ndahú ná jín ní, jini nahín Yaā Dios, ma stóho ní sáña, achí de.

<sup>8</sup> Súcuan ni cahān de, chí je ni cahān Jesús:

Táchĩ, quenda ini tēe yáha quíhĩn rō.

<sup>9</sup> Te ni cajñũhun yá de:

¿Na vé naní ró?

Te ni cahãn de:

Legiõn naní ná, chi cuehē tachĩ ñũhun ini ná, áchĩ de.

<sup>10</sup> Te ni cahãn ndahú ndasí de jíin yá jeé ma táji yá tachĩ quendacoo regiõn ún. <sup>11</sup> Te yajni yucu yúcuan cáhiin cuehē quinĩ cájitu ti. <sup>12</sup> Te tachĩ jeé ñũhun ini tēe un ní cacahãn ndahú jíin yá:

Núu tají ní sañá, te cuãha ní jñũhun quívicoo ná ini quinĩ yúcuán, áchĩ.

<sup>13</sup> Te Jesús ni jēhe ya jñũhun. Te ni quendacoo tachĩ ún ini tēe ún, te ni quívicoo ini quinĩ, te iyó nájñũhun uũ mil tí. Te quinĩ un ní cajinu ti ní ningoo ti ñin yucáva, ní quívicoo ti nuũ mar. Te ni ndaquihĩ ti ndute, ní cajihĩ ti.

<sup>14</sup> Te tēe cándito ti, ní cajinu de cuangoo de jeé ní cayũhú de. Te ní jinũcõo de ní castũhũn de nuũ ñayuu ñuu un jíin ñayuu táca rancho. Te cuangoo ñayuu un cuácondēhé i na vé ní cuu. <sup>15</sup> Te ní jinũcõo i nuũ íne Jesús, te ní cajito i nuũ tēe ní ñũhun cuehē tachĩ ini. Te néne de, te ñũhun de sahma, te je ní nducájí xíní de. Te ní cayũhú ñayuu ún. <sup>16</sup> Te tēe ní cajito, ní canacani de jñũhun nuũ ñayuu, ndese ní nduvãha tēe ní ñũhun tachĩ ini, jíin ndese ní candõho quinĩ ún. <sup>17</sup> Yúcuán na te ní caquejéé i cácahãn ndahú i jíin yá jeé na cújiyo ya regiõn yúcuan quíhĩn yá.

<sup>18</sup> Te ní ndivi ya ini barco. Te tēe ní ñũhun tachĩ ini un ní cahãn ndahú de jíin yá jeé na cuãha ya jñũhun quíhĩn de jíin yá. <sup>19</sup> Te Jesús tu ní jēhe ya jñũhun, chí ní cahãn yá jíin de:

Cuãnhun vehe ró nuũ jñãhan ró, te nacani ró jñũhun nuũ i ndese yõhõ jéñnu jniñũ ní sãha máá Jítoho ró jíin ró, te ndese ní cundáhú ní yá rohó, áchĩ yá.

<sup>20</sup> Te ní quenda de cuahãn de, te ní quejéé de nãcani de jñũhun táca ñuu Decápolis ndese yõhõ jéñnu jniñũ ní sãha Jesús jíin de. Te ndivii ñayuu un ní canaa ní i cájini nahĩn i.

*Jñũhun sēhe síhĩ Jairo jíin ñahan ní quehē yusáhma ya*

(Mt. 9.18-26; Lc. 8.40-56)

<sup>21</sup> Te ní nayãha tucu Jesús cuanhun yá inga lado mar jíin barco. Te ní quecõo cuehē ñayuu nuũ yá, nuũ íne ya yumar. <sup>22</sup> Te ní quee ñin tēe cújéñnu ini vehe ñi sinagoga, naní de Jairo. Te ná ní jito de nuũ yá, te ní jecuiñĩ yití de nuũ jehé yá. <sup>23</sup> Te ní cahãn ndahú ndasí de jíin yá:

Sēhe síhĩ ná je yajni cuu i. Na quíhĩn yõ vehe ná te soó ní ndaha ní síquĩ i nãvãha na ndúvãha i te cotecu i, áchĩ de.

<sup>24</sup> Yúcuán na te cuahãn yá jíin de. Te cuehē ñayuu cándiquĩn i ya, te ní chitú ñihĩn i xiin ya cuangoo i. <sup>25</sup> Te mēñũ ñayuu un cuahãn ñin ñahan cúhú, jeé ní cuu uxĩ uũ cuiyá ndóho

ñã cuehyĩ niñĩ. <sup>26</sup> Te yõhõ ní ndõho ñã, chí ní jexin ñã táca jéé névãha ñã jíin cuehē tēe tájnã, te tu ní jéññũn jeé ndúvãha ñã, chí sa suhva víhyá gã sãha. <sup>27</sup> Te ñahan yáha ná ní nihĩn ñã jñũhun Jesús, te ní quee ñã ichi yátã yá mēñũ ñayuu cuehē ún, te ní quehē ñã yusáhma ya. <sup>28</sup> Chí ní jeni ní ñã: Vēsú maá sahma ya na nihĩn rĩ quehē rĩ, te nduvãha rĩ, jéni ní ñã. <sup>29</sup> Te ní jecuiñĩ-ni niñĩ ñã, te ní jini ñã jeé ní nduvãha ñã cuehyĩ ún. <sup>30</sup> Te Jesús ní jini yá jeé ní nduvãha ñin ñayuu jíin fuerza yá. Te ní ndiõ cóto ya nuũ ñayuu cuehē, te ní cahãn yá:

¿Ndé ñin ní quehē sahma rĩ? Achí yá.

<sup>31</sup> Te tēe cáscuãha jíin yá, ní cacahãn de:

Jito ní jéé ñayuu cuehē yáha ní chitú ñihĩn i xiin ní te cáquĩhĩ i ñihĩn níf cáni ichi, te cájñũhun ní ndé ñin ní quehē sahma ní.

<sup>32</sup> Te máá yá jito ya cháha chúcuan, cúni yá jeé na cáchi ñayuu ní sãha. <sup>33</sup> Te ñahan un yúhú ñã te quisĩ i ñã, te je jíin ñã jeé ní nduvãha ñã. Te ní quee ñã, te ní jecuiñĩ yití ñã nuũ yá, te ní cachi ñã ndihĩ ndese ní cuu jíin ñã. <sup>34</sup> Te ní cahãn yá jíin ñã:

Séhē, ní candíje ró jéé cuu nasávãha rĩ rohó, te jeé yúcuan ní nduvãha ró. Cuahãn te na ndúsñĩ ní ró, chí je ní nduvãha ró cuehyĩ ní ndõho ró, áchĩ yá.

<sup>35</sup> Te níni cáhãn gã yá súcuan, te ní quecõo ñayuu cáyucú vehe tēe cújéñnu ini vehe ñi sinagoga, te ní cacahãn i jíin de:

Je ní jihĩ sēhe síhĩ ní. Te ma sajneñũ ga ní Maestro, achí i.

<sup>36</sup> Te Jesús tu ní sãha ya cuenta jeé súcuan cácahãn i, te ní cahãn yá jíin tēe cújéñnu ini vehe ñi sinagoga:

Ma yũhũ ró, chí candíje ró jéé nastécũ rĩ i, áchĩ yá.

<sup>37</sup> Te tu ní jēhe ga yá jñũhun condiquĩn ñayuu yá, te máá-ni Pedro jíin Jacobo, jíin Juan ñani Jacobo. <sup>38</sup> Te ní jinũ yá vehe tēe cújéñnu ini vehe ñi sinagoga, te ní jito ya ñayuu, cácuvaã i, te cándahyũ i, te cácana cóhó i. <sup>39</sup> Te ní quívi ya, te ní cahãn yá:

¿Najehē yõhõ cásvãã ró te cándahyũ ró? Súchi síhĩ yáha, tu ní jihĩ i, chí quixĩ-ni i, áchĩ yá.

<sup>40</sup> Te ní cajecũ catá i jeé ní cahãn yá. Te ní quenehen ndihĩ ya i cuahãn i nuũ quehe. Te ní cana ya máá-ni tátá jíin nánã súchi síhĩ un, jíin tēe cáhiin jíin yá, te ní quívi ya jíin de nuũ catú súchi síhĩ ní jihĩ ún. <sup>41</sup> Te ní jñã ya ndaha i, te ní cahãn yá jíin i:

Talita cumi, achí yá. Te jñũhun un cúni cahãn: Síhĩ, cáhãn rĩ jíin ró, ndocuiñĩ, achí yá.

<sup>42</sup> Te ní ndocuiñĩ-ni súchi síhĩ un, te ní nacaca i, chí je iyó i uxĩ uũ cuiyá. Te yõhõ ní canaa ní ñayuu cájito i. <sup>43</sup> Te ní ndacu ñihĩn ya jniñũ nuũ i jñãhan i jeé ma cáchi cuiti i nuũ ní ñin. Te ní cahãn yá jeé na cuãha ñã jeé cáji súchi síhĩ.

*Jeē cuánuhun yā ñuu Nazaret  
(Mt. 13.53-58; Lc. 4.16-30)*

## 6

<sup>1</sup> Te ni quenda Jesús yūcuán, te cuanuhun yā ñuu yā. Te tēe cáscuáha jíin yá cuangoo de jíin yá. <sup>2</sup> Te máa quíiví ndétātu ní steén yā jñuhun ini vehe ií sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutúhva tēe yáha tāca jñuhun yáha? ¿Te ndese cúu jeē cahán de jñuhun ndíchí yáha jíin jéé sáha de jñiñu jéhu yáha?

<sup>3</sup> Chí tēe yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yáhá. Achí i.

Te súcan ni cacujéé ni i nuū Jesús. <sup>4</sup> Te ni cahān yā jíin i:

Tāca tēe nácani jñuhun Yaā Dios, iyó yíñúhún ñayuu jíin de, chí máni ñayuu ñuu maá de, jíin jñahan de, jíin ñáyuu vehe de cúu jeé tu iyó yíñúhún jíin de. Achí yá.

<sup>5</sup> Te tu ní cúu sáha ya cuehē jñiñu jéhu yūcuán. Chí jecu-ni ñayuu cácuñi ní soó yá ndaha ya síquí i, te ni nasávaha ya i. <sup>6</sup> Te náa ni yá jito ya jeé tu cácanđje ñayuu jíinánhan i. Yūcuán na te ni jica cuu ya tācá ñuu yajni, ni steén yā jñuhun.

*Jeé ní tají yá ndihúxí uū de cuanacani de jñuhun*

*(Mt. 10.5-15; Lc. 9.1-6)*

<sup>7</sup> Te ni cana ya ndihúxí uū tēe cáscuáha jíin yá, te ni tají yá ndihuū ndihuū de quingoo de. Te ni sáha ya jeé cándiso jñiñu de quenehen de tachí ini ñayuu. <sup>8</sup> Te ni ndacu ya jeé tú na vé condiso de jeé cuajníñu de ichi, ni ñunu, ni staā, ni xúhún. Chí máa vara-ni condahá de. <sup>9</sup> Te quihí de ndijēn, te ma quihín de jíin uū sahma, achí yá. <sup>10</sup> Te suni ni cahān yā jíin de:

Na-ni vehe núu ni quívicoo ró, te yūcuán coyūcu ró ndé quenda tucu ró quihín ró inga ñuu. <sup>11</sup> Te núu ñin ñuu tu cájetáhú i róhó, ni tu cúní i cuni nahín i jñuhun cahān ró, na quéndacoo ró yūcuán, te scóyo ró tícachā jehē ró, te súcan steén ró jeé iyó cuéchi i jeé tu ní cájetáhú i. Jendaá cahán rí jíin ró jeé quíví coo juicio te xeén gā coo castigo síquí ñuu cásáha súcuán vésú síquí ñuu Sodoma jíin ñuu Gomorra nuū ní casáha ndasí ñáyuu cuéchi.

<sup>12</sup> Te ni quendacoo de cuahān de, te ni canacani de jñuhun jeé na nácani ni ñayuu jeé stóo i cuéchi i. <sup>13</sup> Te suni ni caquenehen de cuehē tachí ini ñayuu. Te ni cachihí de aceite cuehē ñayuu cácuñi, te ni canduváha i.

*Jeé ní jíhí Juan tēe scuándute  
(Mt. 14.1-12; Lc. 9.7-9)*

<sup>14</sup> Te rey Herodes ni jíin jñuhun de jñuhun Jesús, chí ni jité núu jñuhun ya níí cáhuu. Te ni cahān de:

Tēe yūcuán cúu Juan tēe ni scuándute, te ni natecu de. Jeé yūcuán iyó poder de sáha de jñiñu jéhu. Achí de.

<sup>15</sup> Te sava ga ñayuu ni cacahān i:

Tēe un cúu Elías jeé ní nacani jñuhun jehahán.

Te sava ga i ni cacahān:

Tuú chí ñin tēe nácani jñuhun Yaā Dios cúu de, nájñuhun tēe ni canacani jñuhun ya nde jehahán, achí i.

<sup>16</sup> Te ná ni jíin Herodes, te ni cahān de:

Tuú chí yūcuán cúu Juan jeé ní ndacu ri jñiñu ni tahndē xiní, te ni natecu de núu súcuán, achí de.

<sup>17</sup> Chí máa Herodes ni ndacu de jñiñu jeé na quíví Juan vecāa, jíin jéé na cónuhni de jíin cadena. Súcuán ni sáha de jeé síquí Herodías, ñasihí ñani de Felipe. Chí Herodes ni quihín de ña jeé cúu tucu ña ñasihí de. <sup>18</sup> Te Juan ni cahān de nuū Herodes:

Tu iyó ley jeé cóndeca ró ñasihí ñani ró, achí de.

<sup>19</sup> Te jeé yūcuán Herodías ni jito uhū ña Juan, te cúní ña jeé na cúu de, te tu ní níhín ña modo. <sup>20</sup> Chí Herodes yúhú de cahni de Juan, chí jíin de jeé tēe ndaā tēe ndoo cúu Juan. Te jeé yūcuán ní jesi de jeé nducú ña jeé cúu Juan. Te nájñahan ni de jíin nahín de jñuhun cahán Juan, vésú tu jécúhun váha ni de. <sup>21</sup> Te ni quee ñin quíví jeé ní cundeyí Herodías. Chí ní sáha Herodes ñin vico quíví ní cacu de, te ni jēhe de jeé ní cacuxini tēe cándiso jñiñu nuū de, jíin tēe cácuu capitán, jíin tēe cácujuhnu región Galilea. <sup>22</sup> Te ni quíví sēhe síhí máa Herodías, ni jita jéhé i nuū chítú un. Te ní cacuxí ni rey Herodes jíin tēe cácuixini jíin de. Te ni cahān de jíin súchi síhí un:

Cacān na vé cuní ró, te cuáha ri nuū ró, achí de.

<sup>23</sup> Te ni cahān teyí de jeé cuáha de núu na vé cuní i cacān i, vésú nde sava región jeé yáhi ndaha de. <sup>24</sup> Te ni quenda i, ni jecajñuhún i náná i:

¿Na vé cacān na núu de? achí i.

Te ni cahān ña:

Xiní Juan tēe scuándute cacān ró nuū de, achí ña.

<sup>25</sup> Yūcuán na te ni ndívi-ni i nuū rey, te ni cahān i:

Cúní na jéé vijná ñuhún-ni cuáha ní xíní Juan tēe scuándute, cone nuū ñin cohó, achí i jíin de.

<sup>26</sup> Yūcuán na te ni cucuíhyá ndasí ni rey un jeé ní cundeyí Herodías jeé cúu Juan. Te síquí jeé ní jéjñuhun téyí de, jíin jéé ní cajini sōho tēe cáyeji staā jíin de, jeé yūcuán tu ní cúní de sásáhán de jeé ní jícān i. <sup>27</sup> Te ni tají-ni de ñin soldado jeé quiquihín de xiní Juan. <sup>28</sup> Te ni jehēn soldado un vecāa, te ni jehnde de xiní Juan. Te ni quee de jíin xíní

Juan, íne nuū ìin cohō. Te ni jēhe de nuū sūchi síhí un, te máá i ni jēhe i nuū naná i.

<sup>29</sup> Te tēe cáscuáha jíin Juan ni canihín de jñuhun, te ni jengoo de, ni candonehen de yiqui cúñu Juan, te ni cachindūji de.

*Jeē ní scáji yā uhūn mil tēe*

*(Mt. 14.13-21; Lc. 9.10-17; Jn. 6.1-14)*

<sup>30</sup> Yūcuán na te tēe cácuu apóstol jeē ní taji yá cuangoo nacani jñuhun, ni ndecoo de nuū Jesús. Te ni canacani de nuū yá táca jñiñu ní casáha de, jíin jñuhun ní castéén de.

<sup>31</sup> Te ni cahān yā jíin de:

Na quíngoo yó ìin lugar nuū tú ñayuu, te ndetātu yó jecu, achí yá.

Chí cuehē ñayuu cuahān i vēji i nuū yā, te ni tu ní nūne ya jeē cáji yā staā jíin de.

<sup>32</sup> Yūcuán na te ni quívi ya ìin barco jíin táca tēe apóstol un, te cuangoo sín ya jíin de ìin lugar nuū tú ñayuu. <sup>33</sup> Te cuehē ñayuu ní cajito i jeē cuahān ya jíin de, te ni canacuni i jeē máá yá cúu. Te nde táca ñuu ní quendacoo i, te yachi cuangoo i, te xihna gā i ní jinūcoo vēsú máá yá. <sup>34</sup> Te nuū ní quenda Jesús ini barco, te ni jito ya ñayuu cuehē ún. Te ni cundáhú ní yā i, chí cúu i nájnūhun lanchi jeē tú jitoho tī. Te ni steén yā cuehē jñuhun nuū i. <sup>35</sup> Te nuū ní ini, te tēe cáscuáha jíin yá, ní quecoo de nuū yā, te ní cacahān de:

Je ní ini, te yāhá chí tú na ñayuu yúcu.

<sup>36</sup> Nūu sūcuān te taji ní ñayuu na quíngoo i táca rancho jíin ñuu yajni, te cuaan i staā caji i, chí tú na vé cándiso i caji i, achí de.

<sup>37</sup> Te ní cahān Jesús jíin de:

Cuāha máá ró jeē cáji i, achí yá.

Te ní cacahān de:

¿Te ndese cuu? Chí ní ma cúu vēsú núu quicuaan ná ndé uū ciento denario staā caji ñayuu, achí de.

<sup>38</sup> Te ní cahān yā jíin de:

¿Nasaa staā cánevāha ró? Cuacondēhe, achí yá.

Te nuū ní cajini de, te ní cacahān de:

Uhūn-ni staā jíin uū chācá iyó, achí de.

<sup>39</sup> Yūcuán na te ní cahān yā jíin ñayuu jeē na cúcoo sín i cuenta grupo nuū íte. <sup>40</sup> Te ní cacucōo sín ciento ciento i, jíin cincuenta cincuenta i. <sup>41</sup> Te ní quihín ya ndihúhún staā jíin uū chācá un, te ní ndacoto ya ichi ándiví, te ní nacuatáhú yá. Te ní tahú cuéché yá staā ún, te ní jēhe ya nuū tēe cáscuáha jíin yá, te máá de ní casaja de nuū ñayuu cuehē ún. Te suni ní jēhe ya ndindúú chācá, ní casaja de nuū i. <sup>42</sup> Te ndivii i ní cayejí, te ní candutú chíji i. <sup>43</sup> Yūcuán na te ní canastútú de pedazo staā jíin chāca jēé ní quendōo, te ní chitú úxi uū jíca. <sup>44</sup> Te tēe ní cayejí, chí uhūn mil de cúu.

*Jeē ní jica jéhé yá nuū mar*

*(Mt. 14.22-27; Jn. 6.16-21)*

<sup>45</sup> Yūcuán na te ní cahān-ni Jesús jíin tēe cáscuáha jíin yá jeē na quívicoo de barco,

te cosnūu de yāha de inga lado mar ñuu Betsaida. Te máá yá chí natajái yá ñayuu quinhun i, te sáá te suni quihín yā. <sup>46</sup> Te nuū ní cuu ní natajái yá i, te ní caa ya yucu cuacacān tahú yā. <sup>47</sup> Te jeē ní cuaa, te barco un je ní cuu sava nuū mar cuahān, te máñúhún-ni ya ní quendōo nuū ñuhun íchi. <sup>48</sup> Te ní jito ya jeē yóhoyo jñundóho cáscaca de barco, chí níhín vēji tachí ichi núu de. Te jeē yínee gā ní quee ya nuū de, jíca jéhé yá nuū mar. Te yāha ya nuū de quihín yā nuú. <sup>49</sup> Te ní cajito de jeē jíca ya nuū mar, te ní cajeni ní de jeē jihná cúu, te ní cacana cohó de. <sup>50</sup> Chí ndihi de ní cajito nuú yá, te ní cayuhú ndasí de. Te ní cahān-ni ya jíin de:

Ndeyí coo ní rō, te ma yūhu ró, chí máá rí cúu, achí yá.

<sup>51</sup> Te ní quívi ya ini barco un, te ní jecuñi-ni tachí. Te yóhoyo ní canaa ní de cájito de. <sup>52</sup> Chí cándāa néé gā jeē níjnūni de, chí ní jíin jñiñu jéhu jeē ní nducuehē staā, tu ní cájecūhun ní de jeē máá yá cúu Yāá ní taji Yāá Dios.

*Jeē ní nasāvāha ya ñayuu cácuñu región Genesaret*

*(Mt. 14.34-36)*

<sup>53</sup> Te ní quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco. <sup>54</sup> Te nuū ní quenda ya jíin de ini barco, te ñayuu yúcuān ní canacuni-ni i ya. <sup>55</sup> Te yachi ní jengoo i táca ndañúú yūcuán, te ní caquindeca i ñayuu cácuñu, cáyosó i nuū camilla, vējicoo ñayuu nuū ní jito i íne ya. <sup>56</sup> Te ndé-ni cúu-ni núu ní quívi ya, núu ñuu lulí, chí ñuu cáhnu, chí rancho, te cájequin i ñayuu cácuñu yuhíchi, te cácahān ndahú i jíin yá jeē na quéhé i vēsú yusáhma ya. Te táca ñayuu jeē ní caquehé sahma ya, ní canduvāha-ni i.

*Siquí ndese cújnéhén ñayuu*

*(Mt. 15.1-20)*

## 7

<sup>1</sup> Yūcuán na te tēe grupo fariseo jíin jecu tēe cástéén tutu ley Yāá Dios, ní quendacoo de ñuu Jerusalén, te ní quecoo de nuū Jesús. <sup>2</sup> Te tēe un ní cajito de jeē sava tēe cáscuáha jíin Jesús, ní cayejí jnehén de staā, chí tu ní cáscuico de costumbre jeē nándahá de nuū Yāá Dios. Te ní cacahān siquí de. <sup>3</sup> Chí tēe fariseo jíin ndihi ñayuu hebree, névāha i costumbre jenahán jēé ma cáji i staā núu tu nándahá váha i xihna gā. <sup>4</sup> Te núu ní ndecoo i jeē ní jéngoo i nuū yáhu, te tu cáyeji i te núu tu nándahá i. Te iyó cuéhé gā costumbre jenahán jeē casquícu i, nájnūhun jeē ndúndoo taza, tindohó, cohó cáa, jíin jito. <sup>5</sup> Te tēe fariseo jíin tēe cástéén tutu ley Yāá Dios, ní cacajñuhún de ya:



Tēe cáscuáha jíin ró, ¿naun tu cáscuicu de costumbre ñayuu jenhán? Chi sa cáyeji jnehén de staā, achí de.

<sup>6</sup> Te ni cahān yā jíin de:

Ndaā ni nacani Isaías jñuhun siquī rō jijnáhan rō jēe tēe stáhú-ni cácuu ró. Chi súcuan ni tee de jñuhun ni cahān Yāā Dios nde jjenahán:

Ñayuu yáha chi máa yuhu-ni i cájetáhú i ruhū,

te nasūu ndé jíin ini jíin ánuá i.

<sup>7</sup> Te cáchiñúhún saá-ni i ruhū, chí jñuhun cástéén i cúu jñiñu ní candacu tēe, te nasūu jēe ní ndacu máa rí cúu.

Achí Yāā Dios. Achí Isaías. <sup>8</sup> Súcuan cácuu ró, chí ni casiáá rō jñiñu ní ndacu Yāā Dios nuū rō, te cáscuicu ró costumbre jēe ní cajequin ñayuu, jēe ndúndoo tindohō jíin taza. Te cuehē gā costumbre súcuan cáscuicu ró, achí yá.

<sup>9</sup> Te suni ni cahān yā:

Cásiáá rō jñiñu ní ndacu Yāā Dios, návāha squicu ró costumbre ni cajequin máa ró.

<sup>10</sup> Chi Moisés ni cahān de: Coó yíñúhún ró jíin tátá rō jíin náná rō. Te núu ndé iñ cahān siquī tátá chí siquī naná, na cúu nahín.

Achí Moisés. <sup>11</sup> Te máa ró chí cácahān rō jēe cuu cahān iñ tēe jíin tátá de náná de: Ma cúu chindéé ñahán ná nihín cuáha na jēe cáji ni jēe cúhun ní, chí ndihi jēe névāha ná, chí Corbán cúu, achí ró. (Te jñuhun Corbán cuní cahān jēe ní sócō nuū Yāā Dios.) <sup>12</sup> Te cácahān rō jēe núu súcuan cahān iñ tēe, te tuá cánuu chindéé ñahán de tátá de náná de. <sup>13</sup> Te súcuan cástívi ró jñiñu ní ndacu Yāā Dios, jēe siquí costumbre ni cajequin ñayuu jjenahán vēji. Te cuehē gā jñiñu súcuan cásaá ró, achí yá.

<sup>14</sup> Te ni cana tucu ya ñayuu cuehē ún, te ni cahān yā jíin i:

Cuní sōho vāha ró jijnáhan ró, te chuhun ni ró: <sup>15</sup> Tāca jēe iyó, te núu ni quívi yuhu ñayuu te tu cújnehén i sáha. Chí jēe quéndá ini anuá ñayuu, yúcuan cúu jēe cújnehén i sáha. <sup>16</sup> Tāca róhó jēe jíni sōho, na chúshóhó ró, achí yá.

<sup>17</sup> Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni cacajñuhún de ya siquí jñuhun yátá yáha jēe ni cáhān yā. <sup>18</sup> Te ni cahān yā jíin de:

¿A máa ró suni ná tu jecūhun ni rō, chí naún? ¿A tu cájini rō jēe tāca jēe quívi ini ñayuu, ma cúu cújnehén i sáha? <sup>19</sup> Chí tu quívi ini anuá i, chí chíji i quívi, te quéndá-ni cuahān, achí yá.

Súcuan ni steén yā jēe tāca jēe yéji ñayuu, tu cújnehén ánuá i sáha. <sup>20</sup> Te ni cahān gā yā:

Jēe quéndá ini anuá ñayuu, yúcuan cúu jēe cújnehén i sáha. <sup>21</sup> Chí nde ini anuá ñayuu quéndá jēe jéni néé ni, jēe casíquí ndéé jñáhan, jēe jica jnéni, jēe jémi ndívi, <sup>22</sup> jēe sacuíhná, jēe ndíyo ni ndajniñu jñáhan, jēe sáha néé, jēe stahú jñáhan, jēe máni cuéchi

sáha, jēe cucuésún ni, jēe cahán yā síquí jñáhan, jēe sandúxi máa, jēe canéé xini. <sup>23</sup> Tācá jñiñu néé yáha, máni ini anuá ñayuu quéndá, te cújnehén i sáha, achí yá.

*Ñahan inga nación jēe ní candíje nihin*  
(Mt. 15.21-28)

<sup>24</sup> Te ni quenda ya yúcuan cuáhān yā región Tiro jíin Sidón. Te ni quívi ya iñ vehe, te cúni yā jēe tú ni iñ ñayuu cuní jēe íne ya yúcuan. Te vésú súcuan, te tu ní cúu cone sáhi yá. <sup>25</sup> Te iñ ñahan iyó sēhe síhi ña jēe ñuhun tachí ini i, ni nihín-ni ña jñuhun jēe íne ya. Te ni quee ña, te ni jecuívi yití ña nuū jehé yá. <sup>26</sup> Te ñahan ñuu jicá cúu ña, chí nde Sirofenicia cúu nación ña. Te ni cahān ndahú ña jíin yá jēe na quénehen ya tachí ini sēhe síhi ña. <sup>27</sup> Te ni cahān Jesús jíin ña:

Nasūu núu máa ní vēji ná, chí máni nuū ñayuu cácuu sēhe Israel. Chí tu iyó vāha jēe quéndé yō staā sēhe te cuáha yó núu ína, achí yá.

<sup>28</sup> Te ni cahān ña:

Jendaá cahán ni Tátá, te chindéé ñahán ní saña vésú cúu ná nájñuhun ina. Chí suni máa tí cáhiin tí chíji mesa, cánihin tí staā cuechí jēe cóyo yuhu súchi lúlú cáyeji tí, achí ña.

<sup>29</sup> Yúcuan na te ni cahān yā jíin ña:

Vāha ni cahān ní. Cuáhān ní núu súcuan, chí je ni quenda tachí ún ini sēhe síhi ní, achí yá.

<sup>30</sup> Te ni najinú ña vehe ña, te ni jito ña jēe catú sēhe síhi ña nuū jito, te je ni quenda tachí ún ini i.

*Jēe ní nasávāha ya iñ tēe sóho cástéte*

<sup>31</sup> Te ni quenda tucu ya región Tiro, ni yáha ya Sidón jíin táca ñuu Decápolis, te ni jinū yā mar Galilea. <sup>32</sup> Te ni caquindeca i iñ tēe sóho cástéte nuū yá, te ni cacahān ndahú i jíin yá jēe na sóo yá ndaha ya siquí de. <sup>33</sup> Te ni quenehen sín ya de nuū ñayuu cuehē ún, te ni chune ya xini ndáha ya sōho de, te ni tesíhi yá, te ni quehé yá yaá de. <sup>34</sup> Te ni ndacoto ya ichi ándiví, te ni jitú ni yá, te ni cahān yā:

Efata, achí yá, jēe cuní cahān: Nanune.

<sup>35</sup> Te ni nanune-ni sōho de, te ni nduvāha yáá de, te ni nacahān vāha de. <sup>36</sup> Te ni ndacu ya jñiñu nuū ñayuu un jēe ma cáchi i nuū ní iñ. Te vésú ni cahān nihin ya jíin i, te víhyá gā ni cajete i jñuhun. <sup>37</sup> Te yōhoyo ni canaa ni i cájito i, te ni cacahān i:

Vāha sáha ya táca jñiñu, chí nde tēe cásohó, cáacuní sōho de, te tēe cándāa ñíhín, cánahān vāha de sáha ya, achí i.

*Jēe ní scáji yá cuñ mil ñayuu*  
(Mt. 15.32-39)

## 8

<sup>1</sup> Te tiempo un ní candutútú cuéhē ndasí ñáyuu, te tuá na vé caji i. Te ni cana Jesús tēe cáscuáha jíin yá, te ni cahān yá:

<sup>2</sup> Cúndáhú ní rī ñayuu yāhá, chí je ni cuu uní quivī cáyūcú i jíin rí, te tuá na vé caji i. <sup>3</sup> Te núu natajǐ rí i quinhun ndite i vehe i, te cuíta íi i sava ichi, chí iyó sava i jeē jíca véjicoo i, áchí yá.

<sup>4</sup> Te tēe cáscuáha un ní cacahān de:

¿Te ndé nuū nihín yō staā caji i jíināhan i? Chí yāhá tú na ñayuu yúcu, áchí de.

<sup>5</sup> Te ni cajnúhun yá de:

¿Nasaa staā cánevāha ró?

Te ni cacahān de:

Uxā-ni, áchí de.

<sup>6</sup> Yūcuán na te ni cahān yā jíin ñáyuu cuéhē un jeē na cúcoo i. Te ni quihín ya ndihúxá staā ún, te ni nacuatáhú yá nuū Yāā Dios. Te ni tahú cuéché yá, te ni jēhe ya nuū tēe cáscuáha jíin yá. Te máa de ni casaja de nuū ñáyuu cuéhē ún. <sup>7</sup> Te suni cándiso de jecu chācá lúli. Te ni nacuatáhú yá siquī, te ni cahān yā jeē suni saja de jíināhan de. <sup>8</sup> Te ndihi i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chítú úxā jíca. <sup>9</sup> Te tēe ni cayeji un, iyó nájnūhun cuūn mil de. Te ni nacuatáhú yá nuū ñáyuu ún, te cuanungoo i. <sup>10</sup> Yūcuán na te ni ndivi-ni ya ini barco jíin tēe cáscuáha jíin yá, te cuahān yā región Dalmanuta.

*Jeē ní cajicān de ñin jniñu jéhnú nuū yā  
(Mt. 16.1-4; Lc. 12.54-56)*

<sup>11</sup> Yūcuán na te ni quecoo tēe grupo fariseo, te ni caquejé de stíchi de Jesús. Te cácumí de coto ndee de ya, te ni cajicān de jeē sáha ya ñin jniñu jéhnú jeē coo ñin seña ichi ándivi. <sup>12</sup> Te ní jítú ní ya siquī jeē tu cáncandije de jíināhan de, te ni cahān yā:

¿Naun cajicān ñayuu yāha ñin jniñu jéhnú nuū rí? Jendaá cahān rí jeē ma stēen rí ní ñin jniñu jéhnú nuū ñayuu yāhá.

<sup>13</sup> Te ní squendōo ya de jíināhan de, te ni ndivi tucu ya ini barco, te cuahān yā inga lado mar.

*Jnúhun levadura tēe fariseo  
(Mt. 16.5-12)*

<sup>14</sup> Te tēe cáscuáha jíin yá ní canaa ní de condiso de jeē caji de, chí ñin-ni pan cánevāha de ini barco. <sup>15</sup> Te ní ndacu ya jniñu nuū de:

Coto má candije ró levadura tēe grupo fariseo jíin levadura Herodes, áchí yá.

<sup>16</sup> Te ní cacahān tēe cáscuáha un jíin táca jnāhan de:

Va siquī jeē tú na staā ndiso yó, jeē yúcuán cahān yā súcuán, áchí de.

<sup>17</sup> Te ní jini Jesús, te ni cahān yá:

¿Najehē cáncandijnūhun ró jeē ní cahān rí súcuán siquī jeē tú na staā cándiso ró? ¿A ná tu cuni rō, á ná tu jecūhun ní rō jeē tu ní cahān rí súcuán siquī jeē tu cándiso ró stáá? ¿A

yóhyo un ní rō candije ró? <sup>18</sup> Iyó tǐnūn ró ¿te á tu cájito ró? Iyó sóho ró ¿te á tu cájini ró? ¿Te á tu cáncūhun ní rō? <sup>19</sup> Chí ná ní tahú cuéché rí uhūn staā ní cayeji uhūn mil tēe, ¿te nasaa jíca ní chítú pedazo staā jeē ní canastútú ró? Achí yá.

Te ni cacahān de:

Uxī uū jíca, áchí de.

<sup>20</sup> Te suni súcuán ná ní tahú cuéché rí uxā staā ní cayeji cuūn mil tēe, ¿te nasaa jíca ní chítú pedazo staā jeē ní canastútú ró? Achí yá.

Te ni cacahān de:

Uxā jíca, áchí de.

<sup>21</sup> Te ní cahān yā jíin de:

Te nde vijna ¿á ná tu jecūhun ní rō jíināhan ró?

Súcuán ní cahān yatá yá jeē ma cándije de jnúhun stáhú cástēen tēe ún.

*Jeē ní nasāvāha ya tēe cuáá ñuu Betsaida*

<sup>22</sup> Yūcuán na te ní jinū yā jíin de ñuu Betsaida. Te ní caquindeca ñayuu ñin tēe cuáá núu yá, te ní cacahān ndahú i jíin yá jeē na tēe ya ndaha ya nuū de. <sup>23</sup> Yūcuán na te ní jniñi ya ndaha tēe cuáá un, te ní quenehen ya de yatá ñūū ún. Te ní tee ya tesíhi yá tinūū de, te ní tee ya ndaha ya siquī. Te ní cajnúhun yá de núu cuu coto de jecu. <sup>24</sup> Te ní ndacoto de, te ni cahān de:

Jito ná ñayuu jeē cájica i, te tu jito cáji ná, chí ná cáa yujnu cáa i, áchí de.

<sup>25</sup> Yūcuán na te ní tee tucu ya ndaha ya siquī tinūū de. Te ní ndacoto vāha de, te ní nduvāha-ni tinūū de, te ní jito cáji de ndihi-ni. <sup>26</sup> Te ní natajǐ yá de quinhun de vehe de, te áchí yá:

Ma quivī ró ñuu, ní ma cáchi cuiti rō nuū ní ñin, áchí yá.

*Jeē ní cahān Pedro jeē Jesús cúu Cristo  
(Mt. 16.13-20; Lc. 9.18-21)*

<sup>27</sup> Yūcuán na te Jesús jíin tēe cáscuáha jíin yá, cuahān yā táca ndañúū Cesarea Filipino. Te ichi un ní cajnúhun yá de:

Ruhū, ¿ndé ñin cúu rí cácahān ñayuu?

<sup>28</sup> Te ní cacahān de:

Sava i cácahān jeē cúu ní Juan tēe ní scuándute. Te sava ga i cácahān jeē cúu ní Elías, tēe ní nacani jnúhun Yāā Dios nde jenahān. Te sava ga i cácahān jeē inga tēe ní nacani jnúhun Yāā Dios cúu ní.

<sup>29</sup> Yūcuán na te ní cajnúhun yá de:

Te máá ró, ¿ndé ñin cúu rí cácahān ró?

Te ní cahān Pedro:

Máá ní cúu Cristo, Yāā ní tajǐ Yāā Dios, áchí de.

<sup>30</sup> Te ní ndacu ya jniñu nuū de jíināhan de jeē ma cáchi de jnúhun yāha nuū ní ñin ñayuu.

*Jeē ní castúhūn Jesús jeē cúu yā  
(Mt. 16.21-28; Lc. 9.22-27)*

<sup>31</sup> Te ní quejéé yá stēen yá nuū de:

Máá rí, Yaa ní nduu tēe, cánuú ndoho xeēn rí. Te táca tēe jéhuu jín sūtú cácujeéhuu jín tēe cástéén tutu ley, squéhichí de ruhū, te cahni de ruhū. Te nuú uní quiví te natecu rí, achí yá.

<sup>32</sup> Te cájí ní cahān yā jñūhun yáha. Yūcuán na te Pedro, ní cana máñúhún de ya, te ní quejéé de cáhān de nuú yā jeē ma cuáha ya jñūhun coo súcuán. <sup>33</sup> Te máá yá ní ndió cóto ya ní jito ya nuú tēe cáscuáha jín yá. Te ní cahān yā nuú Pedro:

Cujiyo quihīn rō, chí cahān rō ná cahān Satanás. Chí tu jéni ní rō nájnūhun jéni ní Yaa Dios, chí sa suhva jéni ní rō nájnūhun cájeni ní ñayuu, achí yá.

<sup>34</sup> Te ní cana ya tēe cáscuáha jín yá jín ñayuu cuehē ún, te ní cahān yā:

Na-ní ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuáha i jñūhun ndoho i jñúndóho jeē siquí rí, vésú na cúu i. <sup>35</sup> Chí núu ndé ñayuu cuní i cácu i nuú jñúndóho quiji nuú i jeē siquí ruhū, núu súcuán te jnahnú ndetú i ní cáni. Te núu ndé ñayuu, vésú na cúu i jeē siquí ruhū jín siquí jeē scáca i jñūhun jeē jnáma rí ñayuu, núu súcuán te cotecu i ní cáni. <sup>36</sup> ¿Chí ndé cuajníñu vésú na cúndeyí ñayuu nihīn i ní ñayíví, te núu quiví i nuú jnahnú ndetú i? <sup>37</sup> Chí tú na jín cuiti chunaa ñayuu jeē cácu ánuá i. <sup>38</sup> Te ñayuu yáha tu cácandíje cuiti i, te máni máá cuéchi cása ha i. Te núu na-ní ñayuu cúcanu i nuú ñayuu yáha jeē siquí ruhū, Yaa ní nduu tēe, jín siquí jñūhun cahān rí, suni súcuán cucanu rí jeē siquí máá i, quiví ndíji rí jín táca ndajéhé ndoo rí. Te quiví ún chí yōhoyo luu cujéhuu rí nájnūhun cújéhuu Tátá rí. Achí yá.

## 9

<sup>1</sup> Te suni ní cahān yā jín de jínáhan de:

Jendaá cahān rí jín ró jeē sava tēe cáhīn yáha, ma cúu de chí nde cuní de jeē ndácu Yaa Dios jniñu jín poder yā, achí yá.

*Jeē tucu ní nduu ya*

(Mt. 17.1-13; Lc. 9.28-36)

<sup>2</sup> Yūcuán na te nuú iñú quiví te Jesús ní jeca ya Pedro jín Jacobo jín Juan, cuahān sīn ya jín de ñn yucu súcún. Te yūcuán, tucu ní nduu ya nuú de. <sup>3</sup> Te sahma ya ní ndindéé, te ní nducujín quiyí, nájnūhun yuhvá volcán. Te tú ní ñn ñayuu ñayíví yáha cuu nacate jeē ndúquiyí ndasí súcuán. <sup>4</sup> Te ní cajito de jeē Elías jín Moisés cándajnūhún de jín yá. <sup>5</sup> Yūcuán na te ní cahān Pedro jín Jesús:

Maestro, nacá jeé váha jeē cáhīn na yáha. Te na sáha ná úní vehe ramada, ñn cuu máá ní, inga cuu Moisés, te inga cuu Elías, achí de.

<sup>6</sup> Chí yōhoyo ní cayūhu tēe cáscuáha ún, te Pedro tu ní sáha de cuenta na vé cúu jeé

cahān de. <sup>7</sup> Te ní quiji vicó ñūhun ní jesi-ni nuú de. Te nuú vicó un ní cahān ñn jñūhun:

Yáha cúu Sēhe rí jeē maní ndasí rí jín. Te na cúni nahín ró jñūhun cahān yā. Achí.

<sup>8</sup> Te ní candacoto-ni de, te tuá tēe un ní cájito de, chí máá ñn na Jesús.

<sup>9</sup> Te ní cananuu de jín yá yucu ún. Te ní ndacu nihin ya jniñu nuú de jeē ma cáchi de nuú ní ñn jeē súcuán ní cajito de, chí nde na nátecu maá yá, Yaa ní nduu tēe, achí yá. <sup>10</sup> Jeé yūcuán ní cachuváha de táca jeé ní cuu ún, te cácajnūhun jnáhan de na jñūhun cúu jeé nátecu yá. <sup>11</sup> Te ní cacajnūhún de ya:

Te tēe cástéén tutu ley Yaa Dios, ¿ñajehé cácahan de jeé cánuú ndíji Elías xīhna gā, te sáá te quiji Yaa cúu Cristo? achí de.

<sup>12</sup> Te ní cahān yā:

Jendaá cúu jeé xīhna gā quiji ñn tēe cúu nájnūhun Elías, te sátūhva de ndíhi, achí tutu. ¿Te ndese cahān tuu tuu ñn siquí ruhū, Yaa ní nduu tēe? Cahān jeē ndoho xeēn rí, te sájéé ní i nuú rí. <sup>13</sup> Te cahān rí jín ró jeé ní quiji tēe ní cuu nájnūhun Elías, te ní casáha ndeváha ñayuu jín de táca jeé ní cacuu ní maá i, nájnūhun cahān jñūhun de nuú tútu, achí yá.

*Jeé ní nasávāha ya ñn sūchi ñūhun tachí ini*  
(Mt. 17.14-21; Lc. 9.37-43)

<sup>14</sup> Te ní najinú yā jín de nuú sava ga tēe cáscuáha jín yá, te ní cajito ya ñayuu cuehē ndasí, ní cajicó ndúu i de. Te suni cáhīn tēe cástéén tutu ley Yaa Dios, cátejnāhan jín de. <sup>15</sup> Te nuú ní cajito táca ñayuu un jée véji ya, te ní canaa ní i. Te cájnu i cuangoo i nuú yā jeé cahān i jín yá. <sup>16</sup> Te ní cajñūhun yá i:

¿Na siquí cátejnāhan ró jín de jínáhan de? achí yá.

<sup>17</sup> Te ní cahān ñn tēe íne yūcuán:

Maestro, vendeca ná séhe ná núu ní, chí ñūhun ñn tachí ini i, te ní cuñhán i ní sáha. <sup>18</sup> Te ndé-ni cúu nuú íne i, te tachí un scótúu i, te jéhi yíhí-ni i. Te jée tíñu yuhu i, te squíhñi jñūhun i. Te cuacuxíí ndasí i sáha. Te ní cahān ndahú ná jín tēe cáscuáha jín ní jeē na quénehen de tachí ún, te tu ní cúu sáha de, achí de.

<sup>19</sup> Te ní cahān yā jín de jínáhan de:

Ñayuu tu cándíje cuiti cácuu ró. ¿Nasaa ga quiví condee rí jín ró? ¿Te nasaa ga quiví cuandeyí ní rí jín ró? Cuáquihin sūchi ún, na quíji i, achí yá.

<sup>20</sup> Te ní caquindeca de i nuú yá. Te nuú ní jito tachí un núu yá, te ní jehni yíhí-ni i. Te ní cotúu i, te cónehén cócáni i, te jée tíñu yuhu i. <sup>21</sup> Te Jesús ní cajñūhun yá tatá i:

¿Nasaa cuiyá ní cuu jeé sáha súcuán jín i?

Te ní cahān de:

Nde lulí i. <sup>22</sup> Te ní cuu cuehē jínu scótúu táchí ún i nuú ñūhún nuú ndúte, jeé cáhni i cúní. Te núu cuu sáha ní, te cundáhú ní ní

chindéé ñáhán ní sãña jéé ndúvãha sêhe ná, áchí de.

<sup>23</sup> Te ni cahãn Jesús jín de:

Núu cuu candíje ró jéé sãha ri, chí ñayuu candíje te cuu tãca jéé cuní i, áchí yã.

<sup>24</sup> Te máá tátã sũchi un ní cahãn jee de:

Cándíje ná, te chindéé ñáhán ní sãña jéé candíje ñihin ga ná, áchí de.

<sup>25</sup> Te ni jito Jesús jéé ní cutútú cuéhê ñayuu nuũ yã. Te ni cahãn yã nuũ tachí:

Tachí jeé sañhín sãsóhó, ruhú ndácu ri jñiñu jeé na quénda ró ini sũchi yãha, te ma ndívi ga rō ini i, áchí yã.

<sup>26</sup> Yũcuán na te ni cana cóhó táchí ún, te ni jehni yíhi tucu i, te ni quenda cuahãn. Te sũchí un ní cuu i nájnũhun ndívi. Te ni cacahãn cuéhê ñayuu jeé jé ní jihí i. <sup>27</sup> Te Jesús ní jñi ya ndaha i, te ni ndonehen ya i, te ni nucuññ-ni i.

<sup>28</sup> Yũcuán na te ni quívi ya ini ñin vehe, te tée cáscuãha jín yã, ní cacajñũhun sãn de ya:

¿Najehê tu ní cúu quenehen ná tachí un jñnãhan ná? áchí de.

<sup>29</sup> Te ni cahãn yã:

Ñin tachí sũcuan chí ma quénda cuiti te núu tú cacãn tahú ró te coo ndite ní ró, áchí yã.

*Jeé ní cahãn tucu ya jeé cúu yã*

(Mt. 17.22-23; Lc. 9.43-45)

<sup>30</sup> Te ni quenda ya yũcuan jín de jñnãhan de, te ni yãha ya ndañúu Galílea cuahãn yã. Te tu ní cuní yã jeé cuní ní ñin ñayuu. <sup>31</sup> Chí stéén yã nuũ tée cáscuãha jín yã, te áchí yã:

Máá rí, Yãá ní nduu tée, nastúu i ruhú nuũ tãca tée xeén. Te cahni de ruhú, te núu ní jihí rí, te nuũ uní quívi te natecu rí, áchí yã.

<sup>32</sup> Te tu ní cájecũhun ní de jñũhun yãha, te cáyũhú de cajñũhun de ya siquí jñũhun ní cahãn yã.

*Nde ñáyuu cúu jeé cujéhu ga*

(Mt. 18.1-5; Lc. 9.46-48)

<sup>33</sup> Te ni jinũ yã jín de ñuu Capernaum, te nuũ ní quívi ya ini vehe, te ni cajñũhun yã de:

¿Na jñũhun ni candajñũhun ró ichi véji yó? áchí yã.

<sup>34</sup> Te tu ní cacahãn cuiti de, chí ichi un ní cacahãn de siquí núu ndé ñin de cújéhu ga.

<sup>35</sup> Yũcuán na te ni cucóo ya, te ni cana ya ndihúxí uũ de, te ni cahãn yã:

Núu ndé ñin ró cuní cujéhu ga, na cúu ró tée núu ga nuũ tãca jñãhan ró, te cuajñiñu ró núu jñãhan ró.

<sup>36</sup> Yũcuán na te ni jñi ya ndaha ñin sũchi lúli, te ni jeni ya i mehñu de jñnãhan de. Te ni nundee yã i, te ni cahãn yã jín de:

<sup>37</sup> Na-ni ñayuu núu jeé siquí ruhú jetáhú i ñin sũchi lúli nájnũhun sũchi yãha, te ruhú jetáhú i. Te ñayuu jetáhú ruhú, nasúu máá ñin-ni ruhú, chí suni Yãá ní tají ruhú jetáhú i, áchí yã.

*Ñayuu tu cahãn siquí yã, ñin i jín yã*

(Mt. 10.42; Lc. 9.49-50)

<sup>38</sup> Yũcuán na te ni cahãn Juan jín yã:

Maestro, ni cajito ná ñin tée jeé jín síhvi ní quénehen de tachí ini ñayuu. Te ni cajesi ná jéé sãha de, chí tu jãca de jín yó, áchí de.

<sup>39</sup> Te ni cahãn Jesús jín de:

Ma cási ró jeé sãha de. Chí ni ñin tée jeé jín síhvi rí sãha de jñiñu jéhu, ma cúu nacahãn de siquí rí. <sup>40</sup> Chí tée tu cahãn siquí yó, ñin de jín yó. <sup>41</sup> Te na-ni ñayuu núu jeé siquí ruhú cuãha i vésú ñin ñajin ndute coho ró, siquí jeé cácaandíje ró ruhú, ndaã ndíje cúu jeé ñihín i tahú i. Áchí yã.

*Xeén coo siquí ñáyuu quívi nuũ cuéchi*

(Mt. 18.6-9; Lc. 17.1-2)

<sup>42</sup> Te núu ñin sũchi lúli yãha cándíje i ruhú, te núu quívi i cuéchi sãha na-ni ñayuu, te vãha ga núu ní conuhñi ñin yóso cáhnu sucũn ñayuu ún, te quée i chíji ndute mar nuũ.

<sup>43</sup> Te núu ndaha ró sãha jeé quívi ró cuéchi, vãha ga cahnde ró na quihín, návãha tuá sãha ró cuéchi. Chí vãha ga jeé cóndee ñin-ni ndaha ró te quívi ró núu cotecu ró níí cáni,

vésú jeé cóndee ndindúú ndaha ró te quívi ró infierno, nuũ cayú ñuhũn jeé ma ndahvá cuiti. <sup>44</sup> Te yũcuán chí tu cájihí tindacú, te tu ndáhvá cuiti ñuhũn.

<sup>45</sup> Te núu jehê ró sãha jeé quívi ró cuéchi, suni vãha ga cahnde ró na quihín, návãha tuá sãha ró cuéchi. Chí vãha ga jeé cóo cúhndu ró te quívi ró núu cotecu ró níí cáni, vésú jeé cóndee ndindúú jehê ró te quívi ró infierno, nuũ cayú ñuhũn jeé ma ndahvá cuiti.

<sup>46</sup> Te yũcuán chí tu cájihí tindacú, te tu ndáhvá cuiti ñuhũn. <sup>47</sup> Te núu tinũu ró sãha jeé quívi ró cuéchi, vãha ga tava ró na quihín, návãha tuá sãha ró cuéchi.

Chí vãha ga jeé quívi ró ñuu nuũ ndácu Yãá Dios jñiñu jín ñin na tinũu ró, vésú jeé cóndee ndindúú tinũu ró te quívi ró infierno. <sup>48</sup> Te yũcuán chí tu cájihí tindacú, te tu ndáhvá cuiti ñuhũn.

<sup>49</sup> Chí nájnũhun quénda vãha oro sãha ñuhũn, sũcuan quénda vãha ñayuu sãha jñũndóho. Te tãca cúñu jeé socó ñayuu nuũ yã, cúhuhvuã sãha ñi. <sup>50</sup> Vãha íyó ñi, te núu ñi ún na nãá jeé uhvuá, zte ndese nduu uhvuá tucu sãha ró? Núu sũcuan te cuu ró ñáyuu vãha, nájnũhun íyó vãha ñi. Te na cóyũcu vãha ró jín jñãhan ró. Áchí yã jín de.

*Siquí jeé ma stóo jñãhan tée jín ñãhan*

(Mt. 19.1-12; Lc. 16.18)

## 10

<sup>1</sup> Te ni quenda ya ñuu Capernaum, te ni jinũ yã región Judea, inga lado yũte Jordán, ichi nuũ cáne niãndii. Te yũcuan ní cutútú tucu ñayuu nuũ yã, te ni steén tucu ya jñũhun nuũ i, nájnũhun sãha ya. <sup>2</sup> Yũcuán na te jecu tée grupo fariseo ni quecoo de nuũ yã, chí cácani de coto ndee de ya núu ndese cahãn

yā. Te ni cacajñuhún de ya núu iyó ley jeé cuu ndusín in tēe jín ñasihí de. <sup>3</sup>Te ni cahān yā jín de:

¿Na jniñu ni ndacu Moisés nuū rō nde jehān?

<sup>4</sup>Te ni cacahān de:

Moisés ni jēhe de jñuhun jeé cuvāha in acta jeé ndusín de jín ña, te ndōo ña, áchí de.

<sup>5</sup>Te ni cahān Jesús jín de:

Siquí jeé nihni ni rō jijnāhan rō, jeé yúcuan ni ndacu de jniñu yāha núu rō. <sup>6</sup>Te nde xihna ñuhún, ná ni sāha Yaā Dios ndihí, chí tēe jín ñahan ni sāha ya. <sup>7</sup>Jeé yúcuan cúu jeé stóo tēe tátá de náná de, te quijnāhan de jín ñasihí de. <sup>8</sup>Te in na cuu ndindúu de, áchí Yaā Dios. Núu súcuan te tuá cúu uñ jnāhan de, chí in na cúu. <sup>9</sup>Jeé yúcuan tu iyó váha jeé stóo jnāhan, chí jeé ni squijnāhan Yaā Dios cúu, áchí yá.

<sup>10</sup>Te tēe cáscuāha ún nuū ni quívicoo de vehe, te ni cacajñuhún tucu de ya siquí jñuhun ún. <sup>11</sup>Te ni cahān yā jín de:

Núu ndé tēe stóo de ñasihí de te condeca de inga ñahan, núu súcuan te cásiquí ndé de ñasihí de. <sup>12</sup>Te núu in ñahan stóo ña yí ña te condeca ña inga tēe, suni cásiquí ndé ña de. Achí yá.

*Jeé ni jicān tahú Jesús jehē sūchi lúli*

*(Mt. 19.13-15; Lc. 18.15-17)*

<sup>13</sup>Yūcuán na te ni quecoo ñayuu jín sūchi lúli, jēe na sóo yá ndaha ya xinī i. Te tēe cáscuāha jín yá, ni cacahān de nuū ñayuu vējicoo jín i. <sup>14</sup>Te ni jito Jesús, te ni quitī ni yā, te ni cahān yā jín de:

Cuāha jñuhun na quíjicoo sūchi lúli jínā nuū rī, te ma cási rō jeé quíjicoo i. Chí ñayuu jeé ndió cóo ni i caní ni i nájñuhun sūchi yāha, suu i quívi ndaha Yaā andiví jeé ndacu ya jniñu nuū i. <sup>15</sup>Te jendaá cahān rī jín rō, núu in ñayuu tú cuatáhú i jeé ndacu Yaā Dios jniñu nuū i, nájñuhun jétáhú in sūchi lúli, ma quívi cuiti i ndaha ya, áchí yá.

<sup>16</sup>Te ni nundee ya i, te ni soó yá ndaha ya xinī i, te ni jicān tahú yā jehē i jijnāhan i.

*Jñuhun tēe cúca*

*(Mt. 19.16-30; Lc. 18.18-30)*

<sup>17</sup>Yūcuán na te ni quihin tucu ya ichi cuahān yā. Te jinu in tēe ni quee de, te ni jecuiñi yíti de nuū yā, ni cajñuhún de ya:

Tēe váha cúu ní Maestro. Te cachi ní, ¿na jniñu váha sāha ná te nihin tahú na cotecu na ní cáni andiví? áchí de.

<sup>18</sup>Te ni cahān yā jín de:

¿Naun cáhān rō jeé tēe váha cúu rí? Tú ni in tēe váha iyó, chí máá in-ni Yaā Dios. <sup>19</sup>Je jín rō táca jniñu ní ndacu Yaā Dios: Ma cosíquí ndé jnāhan rō. Ma cáhni rō ndiyi. Ma sacuíhná rō. Ma sajnühún rō. Ma stahú rō jnāhan rō. Cuatáhú rō nuū tátá rō nuū naná rō. Achí yá.

<sup>20</sup>Te ni cahān tēe un jín yá:

Táca jniñu yāha je ni squícu ná ndé ná lúli ná, Maestro, achí de.

<sup>21</sup>Yūcuán na te ndáhú jito ya nuū de jeé cúsi ní yā jín de. Te ni cahān yā:

In na jniñu cúmaní sāha rō núu súcuan. Cuahān te xico rō ndihí jeé névāha rō, te cuāha rō núu ñayuu ndahú. Te nde andiví cuāha ya jeé váha ndasí núu rō. Yūcuán na te quiji rō condiquín rō ruhū, te cuāha rō jñuhun ndoho rō jnūdóho jeé siquí rī, achí yá.

<sup>22</sup>Te ná ni jini sōho de jñuhun yāha, te ni jnahuhú ni de, te cúcuíhyá ni de cuahān de, chí cúca ndasí de.

<sup>23</sup>Yūcuán na te Jesús ni ndacoto ya ní xiin ya, te ni cahān yā jín tēe cáscuāha jín yá:

Tēe cúca chí yōhoyo yí quívicoo de ndaha Yaā Dios jeé ndacu ya jniñu nuū de, áchí yá.

<sup>24</sup>Te tēe cáscuāha jín yá, yōhoyo ni canaa ni de jeé ní cajini de jñuhun ni cahān yā. Te ni cahān tucu ya jín de:

Séhē, ñayuu tēnuú xūhún, yōhoyo yí quívicoo i ndaha Yaā Dios jeé ndacu ya jniñu nuū i. <sup>25</sup>Yachí gā yāha in camello yaū yutícu, vésú jeé quívi in ñayuu cucá ndaha Yaā Dios jeé ndacu ya jniñu nuū i, áchí yá.

<sup>26</sup>Te víhyá gā ni canaa ni de cájini de, te ni cacajñuhun jnāhan de:

¿Ndé ñayuu cúu jeé cácu núu súcuan?

<sup>27</sup>Te ni ndacoto ya nuū de, te ni cahān yā:

Ñayuu chí ma cúu squívi i máá i ndaha Yaā Dios, te máá yá chí cuu sāha ya, chí ndihí-ni jniñu cuu sāha ya, achí yá.

<sup>28</sup>Yūcuán na te ni cahān Pedro jín yá:

Saña jijnāhan ná, ní castóo ná ndihí jeé cánevāha ná, te cándiquín na nihín, áchí de.

<sup>29</sup>Te ni cahān Jesús:

Jendaá cahān rī jín rō jijnāhan rō, núu na-ni ñayuu stóo i vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, jeé siquí ruhú jín siquí jeé scáca i jñuhun jeé jnáma rī ñayuu. <sup>30</sup>Núu súcuan te nanihín i in ciento gā jeé súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun, te nde jín jé cóto xeēn ñayuu i. Te nde inga vida quiji te cotecu i ní cáni. <sup>31</sup>Te cuehé ñayuu jeé vijna cácujeñhu, nduu i ñayuu núu ga. Te ñayuu jeé núu ga vijna, chí ndujéñhu i, achí yá.

*Jeé ni cahān tucu ya jeé cúu yá*

*(Mt. 20.17-19; Lc. 18.31-34)*

<sup>32</sup>Te cáñuhun de ichi jeé cáca cuahān ñuu Jerusalén. Te Jesús yósnúu yá nuū tēe cáscuāha ún. Te cánaa ni de ni cajini sōho de jñuhun ni cahān yā. Te cáyūhú de cuángoo de jín yá. Yūcuán na te ni cana sán tucu ya ndihúxí uñ tēe cáscuāha, te ni quejé yá cástühún tucu ya nuū de táca jé quiji siquí yá. <sup>33</sup>Achí yá:

Cuni sōho rō, chí je cuángoo yó ñuu Jerusalén vijna, te yūcuán nastúu ñayuu

ruhū, Yaā ní nduu tēe, nuū sutú cácujuhnu jín nuū tēe cástéén tutu ley. Te ndonda de siquī rī jeē cúū rī, te squívi de ruhū nuū tēe nación Roma jeē cáyucú Jerusalén cándacu jniñu. <sup>34</sup> Te tãca tēe un sãcatã de nuū rī, te cani de ruhū, te tesihí de nuū rī, te sãá te cahni de ruhū. Te nuū uní quívi te natecu rī, achí yã.

*Jeē ní jicãn Jacobo jín Juan ñn favor nuū yã*

(Mt. 20.20-28)

<sup>35</sup> Yũcuãn na te Jacobo jín Juan, ndindúú sēhe Zebedeo, ni quecoo de nuū Jesús, te ni cacahãn de:

Maestro, cáconi na jēe sãha ní ñn jeē cacãn na nuū ní, achí de.

<sup>36</sup> Te ni cahãn yã jín de:

¿Ndese cáconi rō jeē sãha ri jín rō? achí yã.

<sup>37</sup> Te ni cacahãn de:

Cuãha ní jnũhun jeē cõnēne ná xiin ní quívi ndujéhu ní, ñn ná lado váha ní, te ñnga ná lado jecó ní, achí de.

<sup>38</sup> Yũcuãn na te ni cahãn Jesús jín de:

Tu cãjini rō na vé cúu jeē cãjicãn rō. ¿A cuu ndoho rō jnũndóho nãjnũhun jeē quíji siquī rī? ¿Te á canda rō ndoho xeēn rō nãjnũhun ndoho rī? achí yã.

<sup>39</sup> Te ni cacahãn de:

Cuu sãha ná.

Te ni cahãn yã jín de:

Jendaá jeē ndoho rō jnũndóho nãjnũhun jeē quíji siquī rī, te ndoho xeēn rō nãjnũhun ndoho rī. <sup>40</sup> Te jeē cõnēne rō lado váha ri jín lado jecó rī, nasũu ruhū cúu jeē cuãha jnũhun. Chi je iyó túhva cuu tãca tēe jeē ní nacãji Tátã rī, te tēe un niñin, achí yã.

<sup>41</sup> Te uxí gã tēe cáscuãha un, ní cajini de jnũhun yãha, te ni caquítí ni de nuū Jacobo jín Juan. <sup>42</sup> Te Jesús ni cana ya de, te ni cahãn yã jín de:

Cãjini rō ndese cãsãha tēe cácujuhnu nuū ñãyuu tãcã nación. Chi cándacu niñin de jniñu nuū i, te máa de cáchí ndese coo. <sup>43</sup> Te máa rō jijnãhan rō, chi ma sãha rō súcuan. Chi núu ndé ñn rō cúni cújuhnu, sa suhva cuajniñu rō núu jnãhan rō. <sup>44</sup> Te núu ndé ñn rō cúni cuu nuū, sa suhva sãha rō máa rō mozo nuū tãca jnãhan rō. <sup>45</sup> Chi suni súcuan sãha ruhū, Yaā ní nduu tēe, chi nasũu jéé véji ri jeē cuajniñu ñãyuu nuū rī, chi sa suhva véji ri jeē cuajniñu rī nuū ñãyuu. Te cuãha ri máa rī cuu rī návãha jnama ri cuehē ñãyuu, achí yã.

*Jeē ní nasávãha ya Bartimeo tēe cuáá*

(Mt. 20.29-34; Lc. 18.35-43)

<sup>46</sup> Yũcuãn na te ni jinũ yã ñuu Jericó jín tēe cáscuãha jín yã. Te sãá te ní quenda ya yũcuãn jín de jín ñãyuu cuehē ndasí. Te Bartimeo tēe cuáá, sēhe Timeo, néne de yuhíchi, jicãn de caridad. <sup>47</sup> Te ni jini de jnũhun jeē Jesús ñuu Nazaret véji ya. Te ni quejéé de cána jee de:

Jesús Sēhe yucũn David, cundáhú ni ní sãña, achí de.

<sup>48</sup> Te cuehē ñãyuu ni cacahãn i nuū de jeē na cãsi de yuhu de. Te máa de vihyã gã ni cana jee de:

Máa ní jeē cúu ní Sēhe yucũn David, cundáhú ni ní sãña víi, achí de.

<sup>49</sup> Yũcuãn na te ni jecuiñi Jesús, te ni cahãn yã:

Canã de na quíji de.

Te ni cacana i tēe cuáá un:

Ndeyí coo ni rō. Ndocuiñi, na quíhín yō, chí cána ya rohó, achí i jín de.

<sup>50</sup> Yũcuãn na te ni scãne de ticãchí de, te yachí ni ndocuiñi de, te ni jinũ de nuū Jesús.

<sup>51</sup> Te ni cahãn yã jín de:

¿Na vé cuni rō jeē sãha ri jín rō?

Te máa de ni cahãn de:

Maestro, jeē na ndũndijin tinũu ná cuni na, achí de.

<sup>52</sup> Te ni cahãn Jesús jín de:

Cuãhãn núu súcuan. Ni candíje rō jeē cuu nasávãha ri rohó, te jeē yũcuãn ní nduvãha rō, achí yã.

Te ni ndũndijin-ni tinũu de, te ni ndiquin de Jesús cuahãn de jín yã ichi ún.

*Jeē ní quívi Jesús ñuu Jerusalén*

(Mt. 21.1-11; Lc. 19.28-40; Jn. 12.12-19)

## 11

<sup>1</sup> Te ni cuyajni ya ñuu Jerusalén, véji ya ñuu Betfagé jín ñuu Betania, jeē ñne jehé yucu Olivos. Te ni tají yã uū tēe cáscuãha jín yã jeē quíngoo de. <sup>2</sup> Te achí yã jín de:

Cuãngoo ñuu luli ñne ichi núu. Te núu ni quívi-ni rō yũcuãn, te niñin rō ñn burro nũhni tí, jeē ní ñn tēe ná tu coso de tí. Te ndají rō tí, quijicoo rō jín tí. <sup>3</sup> Te núu ndé ñn cajnhún naun cándají rō tí, te cachi rō: Máa Jítoho yō jini ñũhún yã tí, te yachí natajía yã tí ndiji tí, achí rō. Achí yã jín de.

<sup>4</sup> Te cuangoo de, te ni canihin de burro un nũhni tí yehyí núu quēhe nuū náquijnãhan ichi. Te ní candají de tí. <sup>5</sup> Te sava ñãyuu cáhĩn yũcuãn ní cacahãn jín de:

¿Na vé cúu jeē casãha rō jeē cándají rō burro jinã? achí i.

<sup>6</sup> Yũcuãn na te ni cacahãn de nãjnũhun ni cachi Jesús. Te ni casiaá i tí véjicoo de jín tí. <sup>7</sup> Te ni ndecoo de jín tí nuū Jesús, te ni casoó de sahma de siquī tí, te ni jecosó yã tí. <sup>8</sup> Te cuehē ñãyuu ni cascãá i sahma i ini ichi. Te sava ga i ni cajehnde i ndaha ñũu, te ni cachucun i ini ichi ún.

<sup>9</sup> Te ñãyuu cuangoo ichi núu jín ñãyuu cuangoo ichi yátã, cácana jee i:

Yõhoyó cújuhnu ya. Yõhoyó váha Yaā cúu Yaā jeē véji jín jniñu máa Jítoho yō Yaā Dios. <sup>10</sup> Te yõhoyó luu coo, chí je yajni ndacu ya jniñu nãjnũhun ni ndacu jii yō rey David. Te yõhoyó cújuhnu máa Yaā Dios. Achí i.

<sup>11</sup> Te ni quiví Jesús ñuu Jerusalén, jín ini templo cáhnu. Te ni jito ya nuū tāca ndajñíñu yúcu ní yúcuán. Te ni quenda ya cuahān yā ñuu Betania jín ndihúxi uū de, chi je ni ini.

*Jeē ni cáhān yā nuū yújnu higo*  
(Mt. 21.18-19)

<sup>12</sup> Te inga quiví ún, nuū ní quenda ya ñuu Betania cuahān yā jín de, te jii yā sōco. <sup>13</sup> Te nde jicá ní jito ya ñn nundēhe higo jeē ñn ndaha. Te ni jecundēhe yā nú sanaa te nihín yā ndehē caji yá. Te tú na vé ní nihín yā, chí máá ndaha-ni ñn. Chí nasūu tiempo ndehē cúu. <sup>14</sup> Yūcuán na te ni cáhān yā nuū yujnu ún:

Tuá na ndehē cuun cuiti xiní rō jeē cáji ñayuu, achí yá.

Te tēe cáscuáha jín yá ni cajini de jeē súcuán ni cáhān yā.

*Jeē ní quenehen ya ñayuu ini templo*  
(Mt. 21.12-17; Lc. 19.45-48; Jn. 2.13-22)

<sup>15</sup> Te ni najinū yā jín de ñuu Jerusalén. Te ni quiví ya ini templo cáhnu, te ni quenehen ya ñayuu cájeen quiti te cánaxico nuū ñayuu jeē socó i. Te ni scotúu ndeyi ya tāca mesa tēe cástáyi xühún, jín silla tēe cáxicó paloma. <sup>16</sup> Te tu ní jéhe ya jñūhun jeē yáha ñayuu ini templo jín ndajñíñu ndiso i. <sup>17</sup> Te ni steén yā jñūhun nuū i, achí yá:

Yósó nuū tútu ii jeē cáhān Yā Dios: Vehe ri chí vehe nuū cájicān tahu ñayuu tācá nación cúu, achí yá. Te máá rō jijnáhan rō chí nájnūhun yaū cava ñacuihna ní canasáha rō, achí yá.

<sup>18</sup> Te tēe cástéén tutu ley Yā Dios jín sūtū cácujeñnu, ni cajini de jñūhun yáha, te ni quejéé de cánducú de modo ndese cahni de ya. Chí cáyühú de jeē ndujéñnu ga maá yá vésú maá de, chí tāca ñayuu yōhgo cácusí ni i cájini i jñūhun steén yā. <sup>19</sup> Te jeē cuácuaa, te ni quenda ya ñuu Jerusalén cuahān yā.

*Jeē ni ichí nundēhe higo*  
(Mt. 21.20-22)

<sup>20</sup> Te jenéhen inga quiví ni nayáha ya jín de cuahān yā. Te ni cajito de jeē nundēhe higo un je ni ichí nde yoho. <sup>21</sup> Yūcuán na te ni nucūhun ni Pedro, te ni cáhān de jín yá:

Maestro, cundēhe ní nundēhe higo jeē ni cáhān ni núu, te vijna je ni ichí caján, achí de.

<sup>22</sup> Te ni cáhān Jesús jín de:

Candíje rō jéē sáha Yā Dios jeē jicán rō. <sup>23</sup> Chí jendaá cáhān ri jín rō, núu ndé ñayuu cáhān i jeē cújiyo yucu yáha quihín nde nuū mar, te núu tú nacani síquí ní i, chí sa suhva candíje i jeē cóo nájnūhun ni cáhān i, yūcuán na te cundaá jeē ní jicán i. <sup>24</sup> Jeē yúcuán cáhān rí jín rō, tāca jéē cacán tahu rō, te núu candíje rō jéē nihín rō, te nihín rō. <sup>25</sup> Te jeē cájicān tahu rō, te cone cáhnu ni rō nuū ñayuu casáha cuéchi síquí rō, náváha máá

Tátá rō jeē ndeé yá andiví, suni cone cáhnu ni yā nuū cuéchi rō. <sup>26</sup> Chí nuū tú cone cáhnu ni rō nuū jnáhan rō, te suni máá Tátá rō jeē ndeé yá andiví, ma cóne cáhnu ni yā nuū cuéchi rō, achí yá.

*Siquí jeē ndiso jñíñu Jesús*  
(Mt. 21.23-27; Lc. 20.1-8)

<sup>27</sup> Yūcuán na te ni najinū tucu ya ñuu Jerusalén. Te jica cuu ya ini templo cáhnu. Te sutū cácujeñnu jín tēe cástéén tutu ley Yā Dios jín tēe jéñnu cándacu jñíñu, ni quecco de nuū yā. <sup>28</sup> Te ni cacajnūhun de ya:

¿Nde ní nihín jñíñu rō jéē sáha rō jñíñu yáha? ¿Te ndé ñn ni tee jñíñu síquí rō jeē sáha rō súcuán? achí de.

<sup>29</sup> Te ni cáhān Jesús:

Suni ruhū, cajñūhun rí rohó ñn jñūhun jijnáhan rō. Te núu cuu stío cuñí rō, yūcuán na te cachi rí nuū rō ndé ní nihín jñíñu ri jeē sáha ri jñíñu yáha. <sup>30</sup> ¿Nde ñn ni tee jñíñu síquí Juan jeē ní scuándute de? ¿A Yā Dios chí táca tēe? Cachi nuū rí, achí yá.

<sup>31</sup> Yūcuán na te ni candajnūhun máá de:

Núu cáhān yō jeē Yā Dios ni tee ya jñíñu un síquí Juan, te cáhān de jín yó: Núu súcuán ¿te najehē tu ní cácandíje rō de? <sup>32</sup> Te núu cáhān yō jeē ñayuu ni catee jñíñu un síquí de, te quiti ní ñayuu nuū yō, achí de cácahān máá de.

Chí cáyühú de jeē quiti ní ñayuu, chí ndivii i cácandíje i jeē tēe ni nacani jñūhun Yā Dios ni cuu ndíje Juan. <sup>33</sup> Jeē yúcuán ní cacahān de jín yá:

Tu cájini rí, achí de.

Yūcuán na te ni cáhān Jesús:

Ni ruhū, suni ma cachi rí nuū rō ndé ñn ni tee jñíñu síquí rí sáha ri jñíñu yáha, achí yá.

*Jñūhun yátá síquí tēe néé cásjñíñu nuū uva*

(Mt. 21.33-46; Lc. 20.9-19)

## 12

<sup>1</sup> Te ni quejéé yá cáhān yā jñūhun yátá jín de jijnáhan de:

Ñn tēe ni nachuhun de cuehē uva, te ni jesi de corral, te ni sáha de ñn nuū cūhun ndehē un táxin. Te ni sáha de ñn vehe súcún náváha cuu coto de ní cáhnu.

Te ni stóo de nuū sava tēe sájníñu nuū, te cuu sava de ndehē jín. Te ni tee de ichi cuahān jicá de. <sup>2</sup> Te máá tiempo ndutútu uva, te ni tají de ñn mozo de cuanuquihín sava uva nuū tēe cásjñíñu ún. <sup>3</sup> Te tēe un ní cajñi de mozo un, te ni cacani de i, te ni canatajái de i cuanuhun i súcuán-ni. <sup>4</sup> Yūcuán na te tēe chí uva un ní tají tucu de inga mozo cuahān. Te tēe cásjñíñu un ní cajéhe de yuū xiní mozo un, te ní castúji de, te ni cacahān ndeváha de nuū. <sup>5</sup> Te tēe chí uva ni tají tucu de inga mozo cuahān. Te ni cajehni de i. Te

suní súcuan ni tají de cuehē gā mozo cuahān, te sava i ni cacani de, te sava i ni cajehni de.

<sup>6</sup> Te tēe chíí uva, íyó iin sēhe de jeē maní ndasí de jíin. Te jeē sándihí na ni tají de sēhe de un cuahān nuū tēe cásájniñu. Te jéni ni de: Tēe ún chíí cuatáhú de jíjnánhan de nuū sēhe ri. <sup>7</sup> Te tēe cásájniñu un ní cacahān maá: Tēe chíí táhū cúu jeē yáha. Na cáhni yō de, te ndōo tahū de cuu maá yó, achí. <sup>8</sup> Te ni cajni de i, ni cajehni de i, te ni cascáne de i inga lado. Achí yá.

<sup>9</sup> Yūcuán na te ni cajnūhun yá de:

Núu súcuan ¿te ndese sáha tēe chíí uva un? Ndjí de te cahni de tēe cásájniñu ún, te cuáha de ñuhun cáá uva un núu inga sava tēe sájniñu nuū.

<sup>10</sup> ¿Te á ná tu cahu ró jnūhun yáha jēe yosó núu tútu íi, jeé ruhū cúu nájñūhun iin yuū? Chíí achí tutu:

Yuū jeē ní casquéhichí tēe cájeni vehe, yuū yáha nduu jeē quítuu vehe.

<sup>11</sup> Máá Jítoho yō Yaā Dios ní sáha ya súcuan, te cánaa ni yō jíto yō jniñu yáha. Achí tutu, achí yá.

<sup>12</sup> Yūcuán na te ni canducú de modo jni de ya. Chíí ni cajecūhun ni de jeē siquī maá de cúu jnūhun yátá ní cahān yā siquī tēe cásájniñu nuū uva jíin tēe cájeni vehe. Te siquī jeē cáyūhú de jeē quítu ní ñayuu, te ni castóo de ya te cuango de.

*Siquī xūhun renta*

(Mt. 22.15-22; Lc. 20.20-26)

<sup>13</sup> Yūcuán na te ni catajé de sava tēe grupo fariseo jíin tēe grupo Herodes cuango de nuū yā, ndúcú de ndese sáha de návāha cahān yā iin jnūhun jeē niñin de cuēchi siquī yá. <sup>14</sup> Te ni quecoo de, te ni cacahān de jíin yá:

Maestro, cájini na jēe tēe cáhán ndaā cúu ní, te tu yúhú ní jeē cahán ní iin ñayuu siquī ní. Chíí tu sáha ní cuenta ndese cúu iin iin i, chíí inuú-ní sáha ní jíin i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chúnua yō renta nuū rey nación Roma jeē jni nación yō, chíí tuú? ¿A chúnua yō, chíí má chúnua yō? Achí de jíin yá.

<sup>15</sup> Te maá yá jíni yá jeē stahú-ní de, te ni cahān yā jíin de:

¿Najehē cájito ndee rō ruhū? Cuāha iin xūhūn na cóto ri, achí yá.

<sup>16</sup> Te ni cajēhe de xūhūn. Te ni jito ya, te ni cajnūhun yá de:

¿Ndeé iin nuū cúu jeē ndeé nuū xūhūn yáha, te ndé síhví cúu jeē ndeé yáhá?

Te ni cacahān de jíin yá:

Nuū jíin síhví rey un cúu, achí de.

<sup>17</sup> Yūcuán na te ni cahān yā jíin de:

Núu súcuan te nacuāha ró núu rey un jéé yíhi cuenta nuū de, te nacuāha ró núu Yaā Dios táca jéé yíhi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

*Jeē ní cacajnūhún de siquī jeē nátecu ndíyí*  
(Mt. 22.23-33; Lc. 20.27-40)

<sup>18</sup> Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiti ndíyí. Te ni cacahān de jíin yá siquī iin jnūhun, achí de:

<sup>19</sup> Maestro, Moisés ní tee de nuū tútu jeē cánevāha yō: Núu iin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñí i nuū ndíyí ñani de, achí tutu. <sup>20</sup> Núu súcuan te ní íyo uxá ñani. Te tēe núu ní quijnánhan de jíin ñahan. Te ní jihí de, te tū sēhe de ní íyo. <sup>21</sup> Te tēe uū ní naquihin de ña, te suni ní jihí de, te tū sēhe de ní íyo. Te suni súcuan tēe uní. <sup>22</sup> Te ndihúxá de ní condeca de ña, te ní iin de tū sēhe de ní íyo. Te jeē sándihí te suni ní jihí ñahan ún. <sup>23</sup> Núu súcuan te núu na nátecu de jíjnánhan de quiví nátecu ndíyí, ¿te ndé iin de cuu ña ñasihí de? Chíí ndihúxá de ní condeca de ña. Achí de jíin yá.

<sup>24</sup> Yūcuán na te ní cahān yā jíin de:

Yōhyo cástívi ró jnūhun siquī jeē tu cájecūhun ní rō jeē cahān tutu íi, ni tu cájini rō jeē íyó poder Yaā Dios jeē nastécu yá ndíyí. <sup>25</sup> Chíí quiví nátecu ndíyí, te tuá na jnūhun quijnánhan tēe jíin ñahan coo. Chíí coo i nájñūhun ndajéhe Yaā Dios andiví. <sup>26</sup> Te siquī jeē nátecu ndíyí, ¿á tu ní cácahu ró tutu ní tee Moisés, ndese ní cahān Yaā Dios jíin de méhñu yúcu jeē cayú yáñuhun? Máá rí cúu Yaā Dios Abraham jíin Isaac jíin Jacob, achí yá jíin Moisés. <sup>27</sup> Chíí vēsú je ní cajihí de, te cátecu de nuū íyó maá yá, chíí cúu ya Yaā sáha jeē técu ñayuu ní cáni. Yōhyo cástívi ró jnūhun núu súcuan. Achí yá jíin de.

*Jniñu cánuú ndasí gá jeē ní ndacu Yaā Dios*

(Mt. 22.34-40)

<sup>28</sup> Te ní quee iin tēe stéén tutu ley Yaā Dios, te ní jini de jeē castichí jnánhan tēe un jíin Jesús. Te ní jini de jeé váha ní nastió cuñí yá jnūhun. Te ni cajnūhún de ya:

¿Ndeé iin cúu jnūhun ndácu jniñu cánuú ndasí gá nuū táca gá jniñu ní ndacu ya jehnahān? achí de.

<sup>29</sup> Te ní cahān Jesús jíin de:

Yáha cúu jniñu jeē cánuú ndasí gá nuū táca gá. Achí tutu: Ñayuu Israel, cuni nahín ró. Máá Jítoho yō Yaā Dios, maá iin-ní ya íyó.

<sup>30</sup> Núu súcuan te coo maní ndasí ró jíin máá Jítoho ró Yaā Dios, nde jnāá ndasí ró sáha ró ndihí jeé cúsí ní yā, nde jíin ini jíin ánuá ró, jíin ní jeé njñūn ró, jíin ní fuerza ró. Yaha cúu jniñu ndácu ya jeé cánuú ndasí gá. <sup>31</sup> Te jniñu uū jeé ní ndacu ya, suni súcuan cáhán: Cundáhú ní ró jnánhan ró nájñūhun cundáhú ní ró maá ró. Tuá inga jnūhun ndácu jniñu



cánuú gá iyó, chi suu máá jéē yáha-ni. Achí yá jín de.

<sup>32</sup> Yūcuán na te ni cahān tēe stéén tutu ley jín yá:

Váha ni cahān ní, Maestro. Chi ndaā chi iyó ñn-ni Yaā Dios, te tuá na inga yá iyó. <sup>33</sup> Te cánuú jéē coo maní ndasí yó jín yá nde jín ini jín ánuá yō, jín ní jéē ñijnūnī yō, jín ní fuerza yō, te cundáhú ni yō jnāhan yó ñajnūhun cundáhú ni yō máá yō. Te cánuú ndasí gá jéē yáha vēsú jéē cáhmu yó quiti jín táca gá jéē socó yō nuū yā. Achí de jín yá.

<sup>34</sup> Yūcuán na te ni jini Jesús jéē váha ni stío cuñí de, te ni cahān yá jín de:

Je yajni cuu quiví ró ndaha Yaā Dios jee ndacu ya jniñu nuū rō, achí yá.

Yūcuán na te ni ñn ga de, tuá ni chūndeyí ni de cajñuhún de ya.

*Siquí jéē cúu Cristo sēhe yucūn David*  
(Mt. 22.41-46; Lc. 20.41-44)

<sup>35</sup> Te stéén Jesús jñūhun ini templo, te ni cahān yá:

¿Ndese cúu jéē cácahān tēe cástéén tutu ley Yaā Dios jéē Cristo cúu sēhe yucūn David?

<sup>36</sup> Chi máá David suhva ni cahān de jñūhun ya ni sáha Espíritu Santo nde jenhán:

Máá Jítoho yō Yaā Dios ni cahān yá jín Jítoho rí, Yaā quiiji:

Cucōo ró lado váha ri nuū cujéhnú ró, te na sáha ri jéē quende ró poder táca jéē cájito uhū rohó.

Achí Yaā Dios. Achí David. <sup>37</sup> Te núu sēhe yucūn David cúu Cristo, ¿te ndese cúu jéē ni cahān de jéē Jítoho de cúu ya? áchí yá.

Te ñayuu cuehē, cánujnahan ni i cájini nahún i táca jñūhun cáhán yá.

*Jéē ni cáhān yá jéē iyó cuéchi de jijnáhan de*  
(Mt. 23.1-36; Lc. 11.37-54; 20.45-47)

<sup>38</sup> Te stéén yá jñūhun, te ni cahān yá jín i:

Coto má candíje ró táca tēe cástéén tutu ley. Chi cácusí ni de cáñuhun de sahna cáni jéē stéén jéē cujéhnú de, cájica cuu de jín. Te cánujnahan ni de jéē cáhán yññuhún ñayuu jín de ini calle. <sup>39</sup> Te cánujnahan ni de cucōo de nuū silla yññuhún gá ini vehe ñi sinagoga, jín silla yññuhún gá nuū víco cáyeji ñayuu. <sup>40</sup> Te cáquende de vehe ñahan ní caquendōo ndáhú. Te nahán cájicān tahú de návaha cani ni ñayuu jéē tú na cuéchi de. Tēe yáha jijnáhan de chi xeēn gá ndoho de castigo. Achí yá.

*Jéē ni sócō ñahan viuda xūhún*  
(Lc. 21.1-4)

<sup>41</sup> Te ñn quiví néne Jesús ini templo ichi núú táca yéjnū nuū casocó i xūhún. Te jito ya ndese cáchuhun ñayuu xūhún ini yéjnū ún. Te cuehē ñayuu cucá ní cachuhun i cuehē xūhún. <sup>42</sup> Te ni quee ñn ñahan viuda jéē ndóho ndáhú. Te ni chuhun ña uū centavo lulí ini yéjnū ún. <sup>43</sup> Yūcuán na te ni cana ya tēe cáscuáha jín yá, te ni cahān yá jín de:

Jendaá cahán rí jín ró jéē cuehē gá cúu jéē ni sócō ñahan viuda ndahú yáha, vēsú jéē ní casocó táca ñayuu cucá. <sup>44</sup> Chi táca i ni casocó i jéē ni ndóo siquí xūhun cuehē i. Te ñahan yáha, vēsú ndahú ndóho ña, te ni chuhun ndihí ña jéē cótecu ña. Achí yá jín de.

*Jéē ní cachi yá jéē nāa templo*  
(Mt. 24.1-2; Lc. 21.5-6)

## 13

<sup>1</sup> Te ni quenda Jesús ini templo cáhnu, te ñn tēe scuáha jín yá ni cahān de:

Maestro, condēhe ní ná luu jito táca vehe yáha jéē cúu templo, jín táca yūu jéē ní cuváha, áchí de.

<sup>2</sup> Te ni cahān yá jín de:

Táca vehe nahnu yáha jéē cájito ró, chi ma cóso jnāhan ga ni ñn yuū, chi ndihí jnanū. Achí yá.

*Na seña coo nuū cuacuyajni ndihí ñayiví*  
(Mt. 24.3-28; Lc. 21.7-24; 17.22-24)

<sup>3</sup> Te ni jehēn yá jín de yucu Olivos jéē ñe ichi núú templo cáhnu. Te ni cucōo ya yūcuán. Te Pedro jín Jacobo jín Juan jín Andrés ni cacajnūhun sñn de ya:

<sup>4</sup> Castūhun ní nuū ná, ¿ndé quiví coo táca jéē ní cachi ní jéē coo? ¿Te na seña coo núu cuacuyajni squícu táca jéē ní cahān ní? áchí de.

<sup>5</sup> Te ni cahān yá jín de:

Coto ró jéē ma stahú ni ñn de róhó. <sup>6</sup> Chi quijicoo cuehē tēe jéē stahú jín shví rí. Máá rí cúu Cristo, achí de. Te súcuan stáhú de cuehē ñayuu.

<sup>7</sup> Te ñññn ró jñūhun jéē táca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jínū quiví ndihí ñayiví. <sup>8</sup> Chi ndonda nación siquí inga nación, te ndonda ñuu siquí inga ñuu jéē cuajnáhan. Te cháha chúcuan jñāa, te coo jnamā, te ndonda ñayuu siquí jñáhan i. Te táca jéē yáha cácuu jñūndóho quejéé xíhna ñññn gá.

<sup>9</sup> Te condito ró máá ró, chí nastúu i róhó núú táca tóhó, te ini táca vehe ñi sinagoga cani i róhó. Te quindecia i sava ró núú táca gobernador jín núú táca rey, te cahān i cuéchi siquí ró siquí jéē cáandíje ró rúhū. Te súcuan te cuu nacani ró jñūhun ri nuū de. <sup>10</sup> Te jini ñññn jéē xíhna gá cuitē núu jñūhun nuū táca nación ndese jñāma ri i, te sáa te ndihí quiví. <sup>11</sup> Te núu ni cajñi de róhó cuángoo de jín ró nuú táca tóhó, te ma nácani ni ró xíhna gá ndese stío cuñí ró nuū de te cácu ró. Chí máá hora un te máá Yaā Dios cuáha ya jñūhun nuū ró ndese cahān ró, te jñūhun ún cahān ró. Chí nastúu máá ró cúu jéē cahān, chí Espíritu Santo cúu jéē cahān. <sup>12</sup> Te ñani jín ñani nastúu jñáhan jéē na cúu. Te tátá nastúu sēhe jéē cúu. Te sēhe ndonda siquí tatá jín náná jéē cahni. <sup>13</sup> Te táca ñayuu

quiti ni i nuū rō jeē siquá ruhū. Te ñayuu cuiñi nihin jín jnúhun ri nde quiví jínu, chí cácu i.

<sup>14</sup> Te Daniel, tē ni nacani jnúhun Yaā Dios, ni tee de jnúhun ñn tē neé jēe quíji. Te rōhó jēe cácahu tutu ún, na jécúhun ni rō. Chi ñn quiví te cuni rō jeē sáha ndeváha de jeē stíví de táca ndajniñu ñi ini templo, te cuiñi de nuū tú na ley cuiñi de. Te núu cuni rō jeē súcuan cúu, te ñayuu cáyūcú región Judea, na cúu i caa i yucu quingoo i. <sup>15</sup> Te ñayuu cáyūcu núu quehe, ma ndívi i ini vehe jeē quénehen i ndajniñu i, chí cánuú cunu yachí i náváha cácu i. <sup>16</sup> Te ñayuu cáhiin nuū ítu, ma ndíji i vehe jeē quíhin i sahma i. <sup>17</sup> Te quiví ún nacá jeē ndahú ñahan cáñuhun sēhe jín ñahan cándeca yiquín, chí ma cúnihin ña cunu yachí ña. <sup>18</sup> Te cacān tahú rō jeē ma quíji jnúndóho un jēe cunu rō máa tiempo cúun yuhvá. <sup>19</sup> Chí jeē quejéé un te coo cuehē jnúndóho xeēn, jeē ná tu coo súcuan nde quiví ní sáha Yaā Dios ñayiví te nde vijna. Te jeē ndíhi jnúndóho ún te ni ma cóo ga jeē súcuan. <sup>20</sup> Te núu tú nastívi máa Jítoho yō Yaā Dios tiempo jnúndóho ún, te ni ñn ñayuu ma cácu cuiñi i. Te jeē siquá ñayuu cácañdije jeē ní nacáji ya, jeē yúcuau nastívi ya tiempo un.

<sup>21</sup> Núu súcuan te núu ñn ñayuu cahān jín rō: Yāhá condēhe rō ñe Cristo, chí: Yūcuán condēhe rō ñe ya, achí i, te ma candíje rō jēe cahān i. <sup>22</sup> Chí canecoo tēe cástáhú te cahān de jeē Cristo cúu de, chí cahān de jeē tēe nácani jnúhun Yaā Dios cúu de. Te sáha de jniñu jēhu jeē naa ni ñayuu coto i, náváha stáhú de nde máa ñayuu ní nacáji ya, te núu na cúu. <sup>23</sup> Te ndito na cóo ni rō, chí je ni castúhun rí nuū rō vijna nde ná tu coo.

*Ndese coo quiví ndiji Yaā ní nduu tēe*  
(Mt. 24.29-35, 42-44; Lc. 21.25-36)

<sup>24</sup> Te quiví ún, núu je ni ndíhi jnúndóho ún, te kujnúú níandii, te yoō ma ndíi gā. <sup>25</sup> Te ningoo quími ñn andiví. Te táca jēe ñn andiví chí quisi i. <sup>26</sup> Yūcuán na te coto ñayuu nuū maá rí, Yaā ní nduu tēe, ndíji rí jín vícō, te condiso rí cuehē poder, te yōhyo luu cujéhu rí. <sup>27</sup> Yūcuán na te tají rí ndajéhe rí quinastútú yá ñayuu ní nacáji rí ndicúún lado ñayiví, nde nuū ndíhi ñayiví te nde nuū ndíhi andiví.

<sup>28</sup> Vijna te scuáha rō ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jhni. <sup>29</sup> Te suni súcuan núu ni cajini rō jeē ní quejéé cúu táca jniñu jeē ní cahān rí, yūcuán na te na jécúhun ni rō jeē ní cuyajni quiví ndíji rí, te yachí coo. <sup>30</sup> Jendaá cahān rí jín rō jeē ma cúu ndíhi ñayuu jeē cóto jnúndóho ún, chí nde squícu ndíhi jniñu ún. <sup>31</sup> Andiví jín ñayiví chí naa, te táca jnúhun cahān rí chí ma náa, chí ndíhi squícu.

<sup>32</sup> Te quiví jín hora jeē ndíji rí, tú ni ñn ñayuu jini, ní máa ndajéhe cáhiyo andiví, ní

maá rí, Sēhe Yaā Dios. Chí máa ñn ni Tátá rí cúu jeé jini.

<sup>33</sup> Núu súcuan te na cócuhun ni rō táca jnúhun yáha, te ndito na cóo ni rō, te cacān tahú rō, chí tu cájini rō na quiví ndíji rí. <sup>34</sup> Chí coo nájñuhun ñn tēe jeē quíhin jicá de, te nde ná tu quenda de vehe de, te ni ndacu de jniñu nuū táca mozo de ndese sáha ñn ñn de. Te ni ndacu de jniñu nuū tēe ndito yéhyí jēe na cóndito de. <sup>35</sup> Te suni súcuan rōhó jínñahan rō, ndito na cóo ni rō. Chí cúu rí nájñuhun jitohe vehe ún, te tu cájini rō na hora ndíji rí, á jēe cuácuua, chí ñuú, chí jēe cána líhli, chí jénéhen. <sup>36</sup> Chí ñn sanaa-ni te ndíji rí, te coto rō jēe ma nánihin rí rohó jēe tu ndito rō. <sup>37</sup> Te jnúhun cahān rí jín rō jínñahan rō, suni cahān rí jín ndívi ñayuu: Ndito na cóo ni rō jínñahan rō. Achí yá.

*Jeē ní casquínñahan de jnúhun jeē jni de Jesús*

(Mt. 26.1-5; Lc. 22.1-2; Jn. 11.45-53)

## 14

<sup>1</sup> Te cúmaní uū gā quiví te quejéé vico pascua jeē cáyeji ñayuu hebreo pan jeé tú na levadura yáhi. Te sutú cácujeñhu jín tēe cásténe tutu ley, ní canducú de modo ndese jni de Jesús jín jnúhun stáhú, te cahni de ya.

<sup>2</sup> Te ni cacahān de:

Ma jni yó de máa quiví vico, chí ndonda ñayuu siquá yō, achí de.

*Jnúhun ñahan jeē ní chuhun perfume xini yá*

(Mt. 26.6-13; Jn. 12.1-8)

<sup>3</sup> Te ñe Jesús ñu Betania vehe Simón, tēe ni ndoho cuehyí stehyú. Te níni yéji yá staá, te ni quee ñn ñahan nuū yá, ndáha ña ñn frasco yuū luu jeē ññuhun aceite perfume, jeé maní ita nardo cúu, te yōhyo yahu ndéé. Te ni tahú ña frasco un, te ni chuhun ña xini yá. <sup>4</sup> Te sava tēe cáhiin yūcuau ní caquiti ni de, te ni cacahān de:

¿Najehē cúu jeē náa saá-ni perfume jniñá?

<sup>5</sup> Chí cuu xicó yahu yó víhyá gā uní ciento denario, te cuáha yo núu ñayuu ndahú núu, achí de.

Te ni cacahān sóo de jín ña.

<sup>6</sup> Te ni cahān Jesús:

Ma stáhān rō ña. ¿Naun casáha rō jēe nácani uhū ní ña? Chí ñn jniñu váha cúu jeē ní sáha ña jín rí. <sup>7</sup> Chí níni coyūcu ñayuu ndahú jín rō, te núu cácuini rō te cuu sáha váha rō jín i. Te ruhú chí tuá condee rí jín rí. <sup>8</sup> Chí ní sáha ña ndíhi jeē cuu sáha ña jeé maní ña jín rí. Chí nde ná tu quindúji rí te je ní sátúhva ña ruhú jeé ní chuhun ña perfume ruhú. <sup>9</sup> Jendaá cahān rí jín rō jeé ní cánu ñayiví ndé-ni cúu nuū cuité núu jnúhun jeé jnáma rí ñayuu, suni nacani i jnúhun jeé ní sáha ñahan yáha, náváha cocuhun ní ñayuu ña, achí yá.

*Jeē ní nastúu Judas yā*  
(Mt. 26.14-16; Lc. 22.3-6)

<sup>10</sup> Yūcuán na te Judas Iscariote, ñin jeē ndihúxí uū tēe cáscuáha un, ní jehēn de nuū sutú cácujeñhu, ní sándaá de jíin jeē nastúu de Jesús nuū jijnáhan. <sup>11</sup> Te nuū ní cajini sōho sutú un jeē cahán de, te ni cacusñ ni, te ni cajejnūhun jeē cuáha xūhun nuū de. Te nde quiví un ní nducú de modo ndese nastúu de ya.

*Jeē ní jequin yā Cena yā*

(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Te ni quee máá quiví jeē quejéé vico pascua jeē cáyeji ñayuu pan jeē tú na levadura yíhi, te suni quiví un cájeñhi i londe nájñūhun ni ndacu Yaā Dios jñiñu jeē sáha i vico pascua un. Te tēe cáscuáha un ní cacajnūhún de ya:

¿Nde nuū cuní ní jeē quisátūhva ná cuxíni ní vico pascua? áchí de.

<sup>13</sup> Te ni tají yá uū tēe cáscuáha ún quingoo de, te áchí yá jíin de:

Cuángoo nde ñuu, te yūcuán najnáhan ró jíin ñin tēe ndíso quiví ndute. Te condiquín ró de quihín ró jíin de. <sup>14</sup> Te vehe jeē ndívi de, yūcuán cáhān ró jíin tēe chíí vehe: Achí máá Maestro: ¿Nde ñin cúu cuarto vehe ní cuáha núu ní nuū cuxíni ya vico pascua jíin tēe cáscuáha jíin yá? áchí ró. <sup>15</sup> Te máá de stéén de ñin cuarto cáhnu nde xiní véhe jeē je íyó túhva. Te yūcuán sátūhva ró jeē cuxíni yó, áchí yá jíin de.

<sup>16</sup> Te quingoo tēe cáscuáha ún, te ni jinūcoo de ñuu, te ni canihín de nájñūhun ní cahān yā jíin de. Te ni casátūhva de jeē cuxíni ya vico pascua.

<sup>17</sup> Te jeē cuácuua, te ni quee ya jíin ndihúxí uū de. <sup>18</sup> Te ni cacucōo de mesa cáyeji de staā, te ni cahān yā:

Jendaá cahān rī jíin ró jeē ñin róhó jēé yéji jíin rī, nastúu ro ruhū, áchí yá.

<sup>19</sup> Yūcuán na te ni cacucuíhyá ni de, te ná ñin ná ñin de ni cacajnūhún de ya:

¿A sáña cúu? áchí ñin de.

Te suni súcuán ñnga de:

¿A sáña cúu? áchí ñin ñin de.

<sup>20</sup> Te ni cahān yā jíin de:

Ñin jeē uxí uū ró jeē cáyeji cáhnu jíin rī ñin cohó, suu nastúu ruhū. <sup>21</sup> Te ruhū, Yaā ní nduu tēe, jendaá cúu jeē quihín rī cuu rī, ndajnūhun yósó jñūhun rī nuū tútu ñi. Te nacā xeēn ndoho tēe nastúu ruhū. Vāha ga núu tu ní cácu tēe un núu, áchí yá.

<sup>22</sup> Te níni cáyeji de jíin yá, te ni quihin ya pan, te ni nacuatáhú yá, te ni tahú cuéché yá, te ni jēhe ya nuū tēe cáscuáha jíin yá. Te ni cahān yā:

Cají ró jijnáhan ró, chí yāha cúu yiqui cúñu rī, áchí yá.

<sup>23</sup> Yūcuán na te ni quihin ya ñin copa ndūxi uva, te ni nacuatáhú yá, te ni jēhe ya ni cajihí ndihí de. <sup>24</sup> Te ni cahān yā jíin de:

Yāha cúu ñiñ rī jeē cuáha rī jeē cúu contrato jeé, te cati jeē ndundo cuéchi cuehē ñayuu. <sup>25</sup> Te jendaá cahān rī jíin ró jeē ndé vijna te ma cóho ga rī ndūxi ndehē uva yāhá, chí nde quiji quiví ndacu Yaā Dios jñiñu ní ñayiví, te sáá te coho tucu rī jíin ró jijnáhan ró. Achí yá.

*Jeē ní cachí yā jeē yūhu Pedro cahān de jeē jíin de ya*

(Mt. 26.30-35; Lc. 22.31-34; Jn. 13.36-38)

<sup>26</sup> Te ni jita ya ñin yaa ñi jíin de jijnáhan de. Te ni quenda ya cuahān yā jíin de nde yucu Olivos. <sup>27</sup> Yūcuán na te ni cahān yā:

Ndivii ró nayūhu ró jeē siquí ruhū jecuáa vijna. Chí suhva je yósó jñūhun rī nuū tútu ñi, ní cahān Yaā Dios: Cuáha rī jñūhun jeē cáhni ñayuu tēe ndíto lanchi, te lanchi un cuíté núu tí jeē yūhu tí, áchí. <sup>28</sup> Te jeē nátecu rī, te xīhna ruhū cosnúu rí quihín rī región Galilea, te sáá te najinūcoo ró, áchí yá.

<sup>29</sup> Yūcuán na te ni cahān Pedro:

Vesú ndihí de na náyūhú de, te máá ná chí ma náyūhú cuiti ná, áchí de jíin yá.

<sup>30</sup> Te ni cahān yā jíin de:

Jendaá cahān rī jíin ró jeē jecuáa vijna, nde ná tu cana líhli uū jínu, te yūhu ró jeē jñii ñayuu rohó, te uní jínu cahān ró jeē tu jíin ró ruhū, áchí yá.

<sup>31</sup> Te ni cahān teyí de jíin yá:

Vesú núu cuu na jíin ní, te ma cahān cuiti na jéé tu jíin na níhín, áchí de.

Te suni súcuán ní cacahān ndihí de.

*Jeē ní jicān tahú yā nuū huerto Getsemaní*  
(Mt. 26.36-46; Lc. 22.39-46)

<sup>32</sup> Yūcuán na te ni jinū Jesús jíin tēe cáscuáha jíin yá ñin lugar nuū naní Getsemaní. Te ni cahān yā jíin de:

Yāhá-ni cucōo ró, te na quihín rī cacān tahú rī, áchí yá.

<sup>33</sup> Te ni jeca ya Pedro jíin Jacobo jíin Juan, cuahān yā jíin de. Te ni quejéé yá cucuíhyá ndasí ní yā te cúxii ní yā jeē quiji jñūdóho siquí yā. <sup>34</sup> Te ni cahān yā jíin de:

Yōhoyo cucuíhyá ní rī, te ndúcú sáha jeē cúu rī. Yāhá condetu ró te condito ró, áchí yá.

<sup>35</sup> Te ni jica ya jecu gā, te ni jecuíñ yití yá ní jequin ya nuū yā nuū ññūhun. Te ni jicān tahú yā nuū Yaā Dios jeē núu cuu te ma ndóho ya jñūdóho jeē quejéé quiji siquí yā. <sup>36</sup> Te suhva ní cahān yā:

Tátá máá ná, ndihí-ni jñiñu cuu sáha máá ní. Te tejiyo ní jñūdóho yāha jéé ma quiji siquí ná. Te nasūu jéé cuní máá ná, chí jeé cuní máá ní na cóo, áchí yá.

<sup>37</sup> Te ni ndee yā nuū ndinúni tēe cáscuáha jíin yá, te ní jito ya jeé cáquixí de. Te ni cahān yā jíin Pedro:

Simón, ¿á quíxí rō? ¿A tu ní cánda ró condito ró jín rí vēsú ñn hora? <sup>38</sup> Coo ndito ní rō te cacān tahú rō jeē chindéé ñáhán yá rohó jeē ma sáha ró cuēchi jeē coto ndee jeneé rōhó. Chi cúní ndije ánuá rō squícu vāha ró, te yiqui cúñu rō chi tu fuerza, achí yá.

<sup>39</sup> Te ní jehēn tucu ya, ní jicān tahú yā, te suni jñūhun yūcuán ní cahān yā. <sup>40</sup> Te ní ndee ya nuū de, te ní jito ya jeē cáquixí tucu de, chí yōhyo cájī de māhná. Te tuá ní cániñ de jñūhun stío cuñí de nuū yā. <sup>41</sup> Te ní ndee yá jeē vuelta unī, te ní cahān yá jín de:

Vijna te cusú rō te ndetātu rō. Te tuú chí je ní cuu, chí je ní quee hora, te ruhū, Yāá ní nduu tēe, natūu rí te jñī tēe cáhīyo cuēchi ruhū. <sup>42</sup> Ndociuñí jijnáhan ró, chí je vēji tēe nastúu ruhū, te quihñ yō jín de. Achí yá.

*Jeē ní cajni de Jesús*

(Mt. 26.47-56; Lc. 22.47-53; Jn. 18.2-11)

<sup>43</sup> Te sá cáhán gā yā súcuán, te ní quee-ni Judas, ñn jñáhan jeē uxí uū tēe cáscuáha jín yá. Te vējicoo cuehē tēe jín de, cándaha de espada jín yujnu. Chi sutū cácujeñhu jín tēe cástéén tutu ley jín tēe jéñhu cándacu jñiñu, ní catajī de tēe ún. <sup>44</sup> Te Judas, tēe nastúu ya ún, je ní jēhe de ñn seña nuū tēe un jijnáhan, chí ní cachi de:

Tēe jeē téchūhu rí un cúu. Te jñī ró jijnáhan ró quihñ rō jín, te ma siaá cuiti rō, achí de.

<sup>45</sup> Te ní quee de nde nuū Jesús, te ní cahān de jín yá:

Maestro, Maestro, achí de.

Te ní techúhú de ya. <sup>46</sup> Te táca gá tēe un ní cajni de ya, te cuango de jín yá.

<sup>47</sup> Te ñn tēe ñe jín yá ní tava de espada de, te ní jehnde de sóho ñn mozo maá sūtū cujeñhu ga. <sup>48</sup> Te ní cahān Jesús jín ñáyyu cuehē ún:

¿Te va tēe cuíhná cúu rí jeē vējicoo ró jín espada jín yujnu jñī ró rúhū jeē súcuán?

<sup>49</sup> Táca quíví ní ñe rí jín ró jijnáhan ró ñi templo cáhnu, ní steén rí jñūhun, te tu ní cájñí ró rúhū. Te súcuán cáháha ró návaha na squícu jeē cahán tutu ñi, achí yá.

<sup>50</sup> Yūcuán na te ndihí tēe cáscuáha jín yá, ní castóo de ya, ní cajinu de cuango de.

*Tēe suchí jeē ní jinu*

<sup>51</sup> Te ñn tēe suchí, ndíquín de ya cuahān de jín yá. Te ndí de maá ñn sahma cuitá. Te ní cajni tēe ún de. <sup>52</sup> Te maá sahma cuitá un ní canihñ. Te ní jinu maá ñi-ni de cuahān de.

*Jeē ní indichi Jesús nuū junta tēe cácujeñhu ga*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Yūcuán na te ní jinūcoo de jín Jesús nuū sutū cujeñhu ga. Te táca sūtū cácujeñhu jín tēe jéñhu cándacu jñiñu jín tēe cástéén tutu ley, ní candutútú de. <sup>54</sup> Te Pedro chí jicá-ni

ndíquín de ya, te ní jinū de nde ñi patio sutū cujeñhu ga. Te ní cucóo de jín táca policia, násaā de ñūhūn.

<sup>55</sup> Te sutū cácujeñhu jín ndihí tēe cáháha junta cujeñhu ga, ní canducu de cuēchi síquí Jesús, chí cahni de ya cácuñi de. Te tu ní cániñ de. <sup>56</sup> Chi cuehē de ní cacahān yaá síquí yā, te tu ní quíjnáhan jñūhun ní cacahān de. <sup>57</sup> Yūcuán na te ní candociuñí sava de, te ní catee de cuēchi síquí yā, achí de:

<sup>58</sup> Máá ná ní cajni ná cáhán de jeē canu de templo yáha jéē ní cuvāha ní casáha tēe, te nuū uní quíví te nacani de ñga jeē násūu jín ndaha tēe cuvāha, achí de. Achí jijnáhan.

<sup>59</sup> Te ní jñūhun yáha tu ní quíjnáhan tucu jeē cacahān de síquí yā.

<sup>60</sup> Yūcuán na te sutū cujeñhu ga ní ndociuñí de nuū ñáyyu cuehē ún, te ní cajnūhún de Jesús:

¿Naun tu cáhán cuiti rō? ¿A iyó ndáá jeē cácahān tēe yáha síquí rō? achí de.

<sup>61</sup> Te maá yá tu ní cáhán cuiti yā, chí tú na vé ní stío cuñí yā. Te sutū cujeñhu ga ní cajnūhún tucu de ya:

¿A maá ró cúu Cristo, Sēhe Yāá vāha jeē cujeñhu? achí de jín yá.

<sup>62</sup> Te ní cahān yá:

Suu rí cúu. Te coto ró jéē ruhū, Yāá ní nduu tēe, condee rí lado vāha Yāá iyó poder, te ndiji rí ichi ándiví jín vícō, achí yá.

<sup>63</sup> Yūcuán na te sutū cujeñhu ga ní jehnde de sahma de jeē quítí ndasí ní de, te ní cahān de:

¿Ndé jini ñūhún gá yō testigo núu súcuán?

<sup>64</sup> Chí je ní cajni ró jéē cahān de jñūhun ndevāha jeē quítí ní Yāá Dios, chí sáha de maá de Sēhe Yāá Dios. ¿Te ndese cájeni ní rō? Achí de.

Te ndihí de ní cacahān jeē na cúu yā.

<sup>65</sup> Te sava de ní catesihí de nuū yā, te ní cajesí de sahma nuū yā, te ní cacani de ya. Te cácahān de jín yá:

Cachi ndé ñn cúu jeē ní cani róhó, achí de.

Te táca tēe policia ní cacani de nuū yā.

*Jeē ní cachi Pedro jeē tu jini de ya*

(Mt. 26.69-75; Lc. 22.56-62; Jn. 18.15-18, 25-29)

<sup>66</sup> Te ñe Pedro ñi patio ichi chíji nuū cáhñ de jín Jesús. Te ní quee ñn ñahan jéjñiñu vehe sutū cujeñhu ga ún. <sup>67</sup> Te ní jito ña nuū de jeē néne de násaā de yuñūhún. Te ní jito vāha ña nuū de, te ní cahān ña:

Róhó chí suni ní jica ró jín Jesús, tēe ñuu Nazaret, achí ña.

<sup>68</sup> Te maá de tu ní cáchi de, chí ní cahān de:

Tu jini rí de, ní tu jini rí na jñūhun cáhán ró, achí de.

Te ní quenda de yéhyí núu quēhe. Te ní cana-ni líhli. <sup>69</sup> Te ñahan jéjñiñu un ní jito tucu ña nuū de, te ní quejéé ña cáhán ña jín ñáyyu cáhñ yūcuán:

Tēe yáha suni jnáhan tāca tée un cúu, áchí ña.

<sup>70</sup> Te máá de tu ní cáchi tucu de. Te ni cunúu jecu gā, te ñayuu cáhīn yūcuan ní cacahān tucu i jín Pedro:

Jendaá ndije jeé suni jnáhan de cúu ró, chí tēe Galilea cúu ró, te inuú-ni cáhān rō jín de jínáhan de. Achí i.

<sup>71</sup> Yūcuan na te ni quejéé de cáhān teyí de jeé na cóndee cuēchi siquí de núu tu cáhān ndaá de:

Tu jíní rī tēe un jéé cacahān rō jnūhun de, achí de.

<sup>72</sup> Yūcuan na te ni cana-ni líhli vuelta uū. Te ni nucūhun ni de jnūhun ni cahān Jesús jín de: Nde ná tu cana líhli uū jínu, te yūhu ró te cahān rō unī jínu jeé tu jíní rō ruhū. Te ni nacani ni de siquí jnūhun ún, te ni ndahyū de.

*Jeé ní indichi Jesús nuū Pilato*

(Mt. 27.1-2, 11-14; Lc. 23.1-5;

Jn. 18.28-38)

## 15

<sup>1</sup> Te jeé ní cundijin, te sutū cácujeñhu ni candutútu de jín tēe jéñhu cándacu jñiñu, jín tēe cástéén tutu ley, jín ndihí tēe casáha junta cujéñhu ga, te ni casquijnáhan de jnūhun. Te ni cajihni de Jesús, te cuango de jín yá nuū Pilato, tēe cúu gobernador. <sup>2</sup> Te Pilato ni cajñuhún de ya:

¿A máá ró cúu Rey ñayuu hebreo? achí de.

Te ni cahān yā:

Suu rī cúu, nájnūhun cáhān rō.

<sup>3</sup> Te sutū cácujeñhu un ní cacahān de cuēhē cuēchi siquí yā. <sup>4</sup> Te Pilato ni cajñuhún tucu de ya:

¿Naun tu cáhān cuiti rō? ¿A tu jíní ró jéé cuēhē cuēchi cacahān de siquí rō? achí de.

<sup>5</sup> Te tu ní cáhān cuiti yā ni ñn jnūhun jín de. Te nahán ní naa ni Pilato ndéhé de nuū yā.

*Jeé ní cundaá jeé cúu yā*

(Mt. 27.15-31; Lc. 23.13-25; Jn. 18.38-19.16)

<sup>6</sup> Te íyó costumbre Pilato jeé quiví víco un siaá de ñn tēe ñe vecāa, núu na-ni tēe cáculni ñayuu. <sup>7</sup> Te íyó ñn tēe nání Barrabás, ñe de vecāa jín táca jnáhan de siquí jeé ní candona de siquí tohō te ni cajéñni de ndryi. <sup>8</sup> Te ni quecoo ñayuu cuēhē, te ni cacahān i jín Pilato jeé na sáha de nájnūhun íyó costumbre de. <sup>9</sup> Te ni cahān Pilato jín i:

¿A tu cáculni rō jeé siaá rī tēe cúu Rey rohó ñayuu hebreo? achí de.

<sup>10</sup> Súcuan ní cahān de, chí cúní de siaá de Jesús. Chí je ni jecūhun ni de jeé ní cacucuésún ní táca sūtū un cájito de ya, te jeé yūcuan ní quijicoo jín yá nuū de. <sup>11</sup> Te sutū cácujeñhu un ní cascáhān de ñayuu cuēhē un jéé váha ga na cácan i jeé siaá Pilato Barrabás. <sup>12</sup> Yūcuan na te ni cajñuhún tucu Pilato:

Núu súcuan ¿te ndese cáculni rō jeé sáha rī jín tēe jeé cacahān rō jeé cúu de Rey rohó ñayuu hebreo? achí de jín i.

<sup>13</sup> Te ni cacana jee i:

Cata caa ní de jicā cruz, na cúu de, achí i.

<sup>14</sup> Te ni cahān Pilato:

¿Na cuēchi ní sáha de núu súcuan?

Te ñayuu un ní cacana jee tucu i:

Cata caa ní de jicā cruz, na cúu de, achí i.

<sup>15</sup> Te Pilato cuní de jeé na cúsiñ ní ñayuu jín de, te ni siaá de Barrabás. Yūcuan na te ni ndacu de jñiñu jeé na cáni táca soldado Jesús, jín jéé cata caa de ya jicā cruz.

<sup>16</sup> Yūcuan na te soldado un cuango de jín yá ini patio palacio, jeé sácatā de nuū yā. Te ni canastútú de ndihí jnáhan de. <sup>17</sup> Te ni cachuhun de ya ñn sahma cuéhé ndihí jéé cúu sahma rey. Te ni casáha de ñn corona ññu, ni cachuhun de xiní yā. <sup>18</sup> Yūcuan na te ni cacana de:

Nacā jeé váha rey cúu Rey ñayuu hebreo, achí de.

<sup>19</sup> Te ni cacani de yujnu xiní yā, te ni catesihí de nuū yā, te ni cajecuiñi yití de nuū yā, casáha de jeé chíñuhún de ya. <sup>20</sup> Te nuū ní cuu ni casácatā de nuū yā, te ni catava de sahma cuéhé ndihí un, te ni canachuhun de ya sahma máá yā. Te ni caquenehen de ya jeé cata caa de ya jicā cruz.

*Jeé ní cacata caa de ya jicā cruz*

(Mt. 27.32-44; Lc. 23.26-43; Jn. 19.17-27)

<sup>21</sup> Te ñn tēe nání Simón ñnu Cirene, tēe cúu tátá Alejandro jín Rufo, vendijí de jeé ní jéhēn de rancho. Te ni yáha de yūcuan, te ni catejññu soldado un de jeé cóndiso de cruz yā.

<sup>22</sup> Te cuango de jín yá ñn lugar nuū nání Gólgota, jeé cuní cahān Lugar Yiquí Xíní. <sup>23</sup> Te ni cajéhe de vino jeé ní sáca núu jín súje uvuā jeé cóho ya, te tu ní jíhi ya. <sup>24</sup> Te ní cacata caa de ya jicā cruz. Te ní casáha de sorteo jeé siquí ndese nihñ ñn ñn de sahma ya.

<sup>25</sup> Te cahān ni cacata caa de ya. <sup>26</sup> Te jnūhun ni catee de xiní cruz cahān na siquí ní jíhi yā: Yáha cúu Rey ñayuu hebreo, achí. <sup>27</sup> Te suni ní cacata caa de uū tēe cuíñá núu uū gā cruz, ñn de lado váha ya, te inga de lado jecó yā. <sup>28</sup> Te ní squícu jnūhun cáhān tutu ñ: Ní casquijnáhan de ya jín tēe casáha neé, achí.

<sup>29</sup> Te ñayuu cáyáha yūcuan cácuíco i xiní i, te cacahān neé i:

Jājañ. Róhó chí cáhān rō jeé cánu rō templo cáñu, te nuū uní quiví te nucondichí sáha ró. <sup>30</sup> Núu súcuan te jnama ró máá ró, te nuu ró jicā cruz viñ, achí i.

<sup>31</sup> Te suni súcuan ní cacahān catá sutū cácujeñhu jín tēe cástéén tutu ley, te achí de cacahān máá de:

Núu inga ñayuu ni jnama de, ¿te naun tu cúu jnama de máa de vijna? <sup>32</sup> Núu na cúni yō jeē Cristo, Rey ñayuu Israel, nuu de jicā cruz vijna, yūcuán na te candíje yó, áchí de jínáhan de.

Te tēe cándita caa jíin yá, suni súcuan ni cacahān neé de.

*Jeē ni jīhī Jesús*

(Mt. 27.45-56; Lc. 23.44-49; Jn. 19.28-30)

<sup>33</sup> Te nuū ní cuu cahuxī uū, te ni cunee niñ cáhnu nde cahuni. <sup>34</sup> Te nuū ní cuu cahuni, te ni cana jee Jesús:

Eloi, Eloi, ¿lama sabstractani? achí yá. Te jñūhun un cúni cahān: Yāā Dios maá ná, Yāā Dios maá ná, ¿naun ni stóo ní sáña?

<sup>35</sup> Te sava ñayuu cáhīn yūcuan, ní cajini i jñūhun ún, te ni cacahān i:

Cuni nahín, chí cána de xinī Elías, tēe ni nacani jñūhun Yāā Dios jenahán, achí i.

<sup>36</sup> Te ni jinu ñin tēe, ni jechundaji de cachī nuū vinagre iyá. Te ni tee de xinī ñin yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnúu de, áchí de.

<sup>37</sup> Te máa Jesús ni cana jee ya, te ni jīhī-ni ya. <sup>38</sup> Yūcuán na te sahma ndita caa jeē ndihyú cuarto ñi ini templo cáhnu, ni ndatā sava sava nde xinī te nde nuū jehé. <sup>39</sup> Te tēe ñuu Roma jeē cúu capitán, índichi de nuū yá, te ni jini de jeē ní cana jee ya te ni jīhī yá. Te ni cahān de:

Jendaá ndije jeē Séhe Yāā Dios cúu tēe yáha, áchí de.

<sup>40</sup> Te suni cáhīn sava ñahan, cándēhe jíca ña. Te unī ña cácuu María ñuu Magdala, jíin María naná José jíin Jacobo suchí, jíin ñahan naní Salomé. <sup>41</sup> Te ñahan yáha ní candiquín ña ya, ni cajejniñu ña nuū yá nde náa jíca ya Galilea. Te suni cáhīn cuehē gā ñahan jeē ní jéngoo jíin yá ñuu Jerusalén.

*Jeē ní quindūji Jesús*

(Mt. 27.57-61; Lc. 23.50-56; Jn. 19.38-42)

<sup>42</sup> Te ni ini quivī ún. Te quivī sātūhva cúu, chí sajnē cúu quivī ndétátú. <sup>43</sup> Te ni quee José, tēe ñuu Arimatea. Te cúu de ñin tēe cújéhuu nuū junta cújéhuu ga. Te suni ñūhun ni de jeē quiji quivī jeē ndacu Yāā Dios jniñu. Te tu yúhú de chí ni quivī de nuū Pilato, ni jícan de yiqui cúñu Jesús. <sup>44</sup> Te Pilato chí náa ni de jeē yachí ni jīhī yá. Te ni cana de capitán, te ni cajñūhún de tēe un núu je ni jīhī yá. <sup>45</sup> Yūcuán na te ni cucáhnu ni de jeē ní cahān capitán jíin de, te ni jēhe de jñūhun jeē quihin José yiqui cúñu yá. <sup>46</sup> Te José ni jeen de ñin sahma cuitá váha. Te ni snúu de yiqui cúñu yá, te ni chusúcún de sahma ún. Te ni chindūji de ya ini ñin yaú jeē quindūji ndiyi, jeē ní caan jíca ñin cava. Te ni jesi de ñin yaú yuhu yaú un. <sup>47</sup> Te María ñuu

Magdala, jíin María naná José, ni cajito ña nuū ní cachindūji de ya.

*Jeē ní natecu Jesús*

(Mt. 28.1-10; Lc. 24.1-12; Jn. 20.1-10)

**16**

<sup>1</sup> Te ni ini quivī ndétátú, te María ñuu Magdala, jíin María naná Jacobo, jíin Salomé, ni cajeen ña táca perfume jeē quíchuhun ña yiqui cúñu yá. <sup>2</sup> Te jenéhen quivī domingo, jeē ní cane niándii, te ni jinūcoo ña nuū ní yindūji ya. <sup>3</sup> Te cácahān ña:

¿Nde níhin yō tēe tejiyo yuū ndihyú yuhu yaú? áchí ña.

<sup>4</sup> Te ni candacoto ña, te ni cajito ña jeē jé ni cujiyo yuū cáhnu un cuahān. <sup>5</sup> Te ni quivícoo ña ini yaú ndiyi. Te ni cajito ña ñin ndajehé Yāā Dios jeē cáa nájñūhun tēe suchí, néne ya ichi lado váha, ñūhun ya ñin sahma cuijín cáni. Te ni cayūhú ña. <sup>6</sup> Te ni cahān yá jíin ña:

Ma yūhu ró jijnáhan ró. Chí vecondēhe ró Jesús ñuu Nazaret, Yāā ni jíhī jíca cruz. Tuá yá yáha, chí je ni natecu yá. Yáha condéhé ró nuū ní cachindūji de ya. <sup>7</sup> Cuánungoo te cachi rō nuū tēe cáscuáha jíin yá, jíin nuū Pedro, jeē xīhna gā maá yá jinū Galilea, te sáa te najinūcoo de. Te yūcuán coto de nuū yá, nájñūhun ni cahān yá jíin de nde saá, áchí yá jíin ña.

<sup>8</sup> Yūcuán na te ñahan un ní quendacoo ña nuū ní yindūji ya, te cájinu ña cuangoo ña. Chí quisi i ña jeé cáyūhú ña. Te tu ní cácahi cuiti ña nuū ní ñin, chí cáyūhú ña.

*Jeē ní nane Jesús nuū María ñuu Magdala*  
(Jn. 20. 11-18)

<sup>9</sup> Te Jesús ní natecu yá jenéhen quivī domingo. Te xīhna gā ní nane ndijin yá nuū María ñuu Magdala, ñahan jeē ní quenehen ya uxá tachí ini. <sup>10</sup> Te cuahān ña cuacastūhún ña nuū táca tēe ní cajica jíin yá jeē ní nane ya nuū ña. Te cácuaihyá ní de te cándahyú de. <sup>11</sup> Te nuū ní cajini de jñūhun jeē ní jito ña nuū yá jeē técu yá, te tu ní cácañdije de jñūhun cáhan ña.

*Jeē ní nane ya nuū uū tēe cáscuáha jíin yá*  
(Lc. 24.13-35)

<sup>12</sup> Yūcuán na te ni quendacoo uū jñáhan tēe ún, cájica de cuahān de ichi rancho, te sñn modo ni nane ndijin yá nuū de. <sup>13</sup> Te ni canandicó de, ni cacastūhún de nuū táca gá jñáhan de. Te ni tu ní cácañdije tucu jñáhan de jeé cácahān ndindúu de.

*Jeē ní tejniñu ya de nacani de jñūhun*

(Mt. 28.16-20; Lc. 24.36-49; Jn. 20.19-23)

<sup>14</sup> Te cúcuéé gá te ni nane ndijin yá nuū ndihúxi ñin de jeé cáyūcú de mesa cáyeji de staá. Te ni cahān yá nuū de, chí níhni ní de jeé tu cácañdije de jeé cácahān jñáhan de un,

jéē ní natecu yā ni cajito de ya. <sup>15</sup>Te ni cahān yā jīn de:

Cuángoo jijnáhan ró ní ñayīví, te nacani ró jnūhun ri nuū tāca ñáyuu ndese jnáma ri i. <sup>16</sup>Te ñayuu candíje te cuandute i, chí cācu i. Te ñayuu tú candíje, chí jnahnū ndetū i. <sup>17</sup>Te ñayuu candíje, sáha i tācá jniñu jéhnū yáha jeē steén jeē iyó rí jīn i: Jīn sáhví rí quenehen i tachī ini ñayuu. Te cahān i tijni yuhu jéé. <sup>18</sup>Te núu ni jnií sanaa i coō, chí núu ni jihi i veneno, te ma sáha daño jīn i. Te suni soó i ndaha i siquī ñáyuu cácuñū, te nduváha. Achí yá jīn de.

*Jeē ní ndaa ya cuanuhun yā andiví  
(Lc. 24.50-53)*

<sup>19</sup>Yūcuán na te nuū ní ndihi ni cahān maá Jítoho yō jīn de jijnáhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéhnū ya. <sup>20</sup>Te máá de ni quendacoo de, ni canacani de jnūhun ya tāca lado ndese jnáma ya ñayuu. Te máá Jítoho yō ni chindéé ñáhán yá de. Te ni jēhe ya fuerza jeē sáha de tācá jniñu jéhnū jeē steén jeē iyó ndáá jnūhun cánacani de. Te ni cuu. Amén.

## JNUHUN VAHA NI TEE SAN LUCAS

<sup>1</sup> Cuehē tēe ni cajicu de ni catee yúcun de historia Jesús, tāca jniñu jeē ni sāha ya ni cajito yó. <sup>2</sup> Te ni catee de tāca jnúhun jeē ní cacastúhun ñáyu nuū yó, jeē ní cajito i jniñu yúcuan nde ná ni quejéé, te ni canacani i jnúhun ya. <sup>3</sup> Te máa ná, suni ni nanducú yúcun ná tāca jnúhun ya, nde nuū ní quejéé. Te ni jeni ni na jéé suni iyó váha jeē tēe cájí ná tāca jnúhun váha nuū ní, amigo Teófilo. <sup>4</sup> Te súcuan te cuni ni jéé iyó ndáa tāca jnúhun jeē ní cacastúhún i nuū ní.

*Jeē ní cachi ndajéhé jeē cacu Juan tēe scuándute*

<sup>5</sup> Tiempo jeē ní cuu Herodes rey región Judea, te ni iyo ñn sutú ñayuu hebreo, naní de Zacarías, te grupo Abías cúu de. Te ñasihí de nání ña Elisabet, te suni sēhe yucún máa sutú Aarón cúu ña. <sup>6</sup> Te ndindúú de cahíyo ndaā de nuū Yaā Dios, te ndaā váha cásquicu de jniñu ndácu ley máa Jítoho yó Yaā Dios, cájito tāca ñayuu. <sup>7</sup> Te tú sēhe de iyó, chí ñahan númá cúu Elisabet, te jeé jéhu ndindúú de.

<sup>8</sup> Te ñn quiví te jéjníñu Zacarías nuū jniñu jeē cúu de sutú nuū Yaā Dios, chí ní quee quiví jeē ndívi grupo de. <sup>9</sup> Te ni casáha de sorteo, nájnúhun iyó costumbre sutú. Te ni sāha tocar Zacarías jeē quiví de ini cuarto ñi templo Jítoho yó Yaā Dios, te cahmu de sūje cútú. <sup>10</sup> Te hora jeē cayú sūje cútú, te tāca ñayuu cuehē cáhín i fuera, cájicān tahu i. <sup>11</sup> Te ni cane ñn ndajéhé máa Jítoho yó nuū de, ñn ya lado váha altar nuū jéhu de sūje cútú. <sup>12</sup> Te ni cunéé ni Zacarías ni jito de nuū yā, te yóho ni yuhú de. <sup>13</sup> Te ni cahān ndajéhé un jíin de:

Zacarías, ma yūhu ró, chí je ní chíhi Yaā Dios cuenta jeē ní jícān tahu ró. Te ñasihí ró Elisabet, scácu ña ñn sēhe yíi, te snání ró i Juan. <sup>14</sup> Te yóho cusíi ní ró. Te cuehē ñayuu cusíi ní jeē cácu i. <sup>15</sup> Chí cujéhu sēhe ró sāha máa Yaā Dios. Te ma cóho i vino ní ndixi cuíi. Te cunuú máa Espíritu Santo jíin i, nde ná tu cacu i. <sup>16</sup> Te sāha i jeē cuehē ñayuu nación ró Israel ndívicoo i nuū Jítoho i Yaā Dios. <sup>17</sup> Te xíhna gā Juan quiji nacani jnúhun Jítoho yó Jesús, te sáa te quiji ya. Te sāha i nájnúhun ní sāha Elías, tēe ní nacani jnúhun Yaā Dios jenahán, te coneváha i poder jeē nácani i jnúhun, nájnúhun ní coneváha Elías. Te sāha i jeē tāca tátá ndumaní de jíin sēhe de. Te suni sāha i jeē ñayuu ñhni ní cuatáhú i nuū Yaā Dios, nduu i ñayuu ndaā. Súcuan sātúhva i ñayuu náváha candíje i máa Jítoho yó jeē quíji ya. Achí ndajéhé.

<sup>18</sup> Te Zacarías ní cajnúhún de ya:

¿Ndese cucáhu ni na núu jendaá cúu? Chí tēe jéhu cúu ná, te suni jéhu ñasihí ná, achí de.

<sup>19</sup> Te ni cahān ndajéhé un jíin de:

Máa rí cúu Gabriel, te ñe rí nuū Yaā Dios, jejniñu rí nuū yā. Te ní tají yá ruhū vēji rí cahān rí jíin ró, te nácani rí jnúhun váha yáha núu ró. <sup>20</sup> Te jeē tu ní candíje ró jnúhun ní cahān rí, te cuñhín ró, te ma cúu cahān ró, chí nde na cácu sēhe ró. Te squicu nahín jnúhun cáhán rí yáha, na quee quiví, achí ndajéhé.

<sup>21</sup> Te ñayuu cáhín ichi fuera, cándetu i Zacarías, te cájeni ní i na vé ní cuu jeē cucuéé de ini cuarto ñi templo. <sup>22</sup> Te nuū ní quenda de, te tuá ní cúu cahān de jíin i. Te ní cajecúhun ní i jeē ini templo ní jito ndijin de ñn jeē ní stéen yá nuū de. Te máa seña na ní sāha de nuū i, chí ní cuñhín de.

<sup>23</sup> Te nuū ní jínu quiví ní jejniñu de ini templo, te cuanuhun de vehe de. <sup>24</sup> Te ní cuu jecu quiví, te ñasihí de Elisabet ní jecúhun sēhe ña. Te ní iyo ña vehe ña uhún yó jeé tuá nde ní jéhen ña. Te jéni ní ña: <sup>25</sup> Súcuan ní sāha máa Jítoho yó jíin rí, te ní tejiyo ya jnúhun jeē cúcanu rí nuū ñayuu jeē tú sēhe rí, jéni ní ña.

*Jeē ní cachi ndajéhé jeē cacu Jesús*

<sup>26</sup> Te nuū iñu yoó, te ní tají Yaā Dios ndajéhé yá Gabriel, ní jéhen yá ñn ñuu naní Nazaret, ndañúú Galilea. <sup>27</sup> Te ní jéhen yá nuū ñn sūchi shí nání María. Te je ní cundaā jeē quijnáhan ña jíin ñn tēe nání José, te sēhe yucún rey David cúu de. <sup>28</sup> Te ní quiví ndajéhé un núu ndeé ña, te ní cahān yá:

Tandii, nacā ndetú cúu ró. Chí máa Jítoho yó Yaā Dios iyó yá jíin ró, te ní sāha ya jeē yóho ndetú gā cúu ró núu tāca gā ñahan, achí yá.

<sup>29</sup> Te nuū ní jito ña nuū yā, te ní cunéé ní ña jeē súcuan cáhán yā, te jéni ní ña naun cáhán yá súcuan jíin ña. <sup>30</sup> Te ní cahān gā ndajéhé un jíin ña:

Ma yūhu ró María, chí ní sāha Yaā Dios jeē váha jíin ró. <sup>31</sup> Te jecúhun sēhe ró te scácu ró ñn sēhe yíi, te snání ró i Jesús. <sup>32</sup> Te cujéhu i, te conani i Sēhe Yaā cujéhu téyí. Te máa yá jeē cúu ya Jítoho yó Yaā Dios, sāha ya jeé cuu i rey, nájnúhun jíi i David ní cuu de rey. <sup>33</sup> Te ní cáni ndacu i jniñu nuū ñayuu nación Israel. Te ma ndíhi cuíti jeē ndácu i jniñu. Achí ndajéhé.

<sup>34</sup> Yúcuan na te ní cajnúhún María:

¿Ndese coo jeē ní cahān ní? Chí ná tu coo yíi ná, achí ña.

<sup>35</sup> Te ní cahān ndajéhé un:

Máa Espíritu Santo quiji squíi ró, te poder máa Yaā cujéhu téyí sāha ñn jniñu jéhu jíin ró. Te jeē yúcuan máa sūchi íi jeé cácu, quíhi cuenta i nuū Yaā Dios, te cahān ñayuu jeé Sēhe Yaā Dios cúu i. <sup>36</sup> Te suni cástúhun rí



nuū rō jeē jnāhan rō Elisabet, suni scācu ña ñn sēhe vēsú je jēhu ña. Te vijna iyó ññū yoō jeē tuá cácahān ñayuu jeē cúu ña ñahan númá. <sup>37</sup> Chi ndihí-ni cuu sáha Yaā Dios, te tu iyó ni ññ jeē ma cúu sáha ya, achí ndajéhé un.

<sup>38</sup> Yūcuán na te ni cahān María:

Cuu núu súcuan, chi sáha ná táca jniñū ndácu Jitoho yō Yaā Dios, te na cóo jíin ná nájnūhun ni cachí ní, áchí ña.

Te máa ndajéhé un cuahān-ni ya.

*Jeē ni jécondēhé María Elisabet*

<sup>39</sup> Te ni cuu jecu quiví, te yachí cuahān María, ni caa ña yucu cuahān ña ññ ñuu región Judea. <sup>40</sup> Te ni jinū ña vehe Zacarías, te ni cahān ña jíin Elisabet. <sup>41</sup> Te nuū ní jini Elisabet jeē cahān María jíin ña, te sūchi ñūhun chíji ña ni canda-ni i. Te ni cunuú Espíritu Santo ini anuá ña. <sup>42</sup> Te ni cahān jee ña:

Ni sáha Yaā Dios jeē yóhoyo ndetū gā cúu rō núū táca gā ñahan, jíin jéē yóhoyo ndetū sēhe rō. <sup>43</sup> ¿Te ndese cúu jeē ní quee naná máa Jitoho rí nuū rí? Chi tu cújēhu cuiti rí. <sup>44</sup> Chi jeē ní jini-ni ri jñūhun ni cahān rō jíin rí, te sūchi ñūhun chíji ri ni canda i jeē cúsí ni i. <sup>45</sup> Te nacā ndetū rō jeē ní candíje rō, chi squícu nahín táca jñūhun ni cahān máa Jitoho yō jíin rō. Achí Elisabet.

<sup>46</sup> Yūcuán na te ni cahān María:

Cahān rí jeē cújēhu ndasí máa Jitoho yō Yaā Dios,

<sup>47</sup> te cúsí ni rí jíin Yaā Dios, Yaā jnáma ruhū.

<sup>48</sup> Chi ní sáha ya cuenta ruhū, vēsú tu cújēhu rí.

Te na squícu rí jniñū ndácu ya.

Te nde vijna te táca ñayuu jeē nácacu, cahān i jeē yóhoyo ndetū rí.

<sup>49</sup> Chi Yaā jñí ndihí poder, ni sáha ya jniñū jéhu jíin rí.

Te Yaā ññ ndoo cúu ya.

<sup>50</sup> Te ní cáni cundáhú ni yā táca ñayuu ndíso iyo nuū yā.

<sup>51</sup> Ni sáha ya jniñū jéhu jíin poder yā,

chí ni scúnu ya ñayuu casandúxi máa,

<sup>52</sup> te ñayuu cácujeñhu, ni quende ya jeē cújēhu i.

Te ñayuu ndahú chí ni sajéhu ya i,

<sup>53</sup> te ñayuu cáji sōco ni jēhe ya jeē cáji váha i.

Te ñayuu cucá ní natajái yá i súcuan-ni.

<sup>54</sup> Te ni chindéé ñahān yá yohó, ñayuu nación Israel, jeē cácuu yó mozo yā, te tu náa ni yā jeē cundáhú ni yā yohó.

<sup>55</sup> Chi súcuan ni jejnūhun ya nuū táca jíi yō, nuū Abraham jíin táca yúcūn de jeē cóo ní cáni.

Achí María.

<sup>56</sup> Te ni condee ña jíin Elisabet nájnūhun uní yoō. Yūcuán na te cuanuhun ña vehe ña.

*Jeē ní cacu Juan tēe scuándute*

<sup>57</sup> Te ni jinū quiví jeē scácu Elisabet sēhe ña, te ni scácu ña ññ sēhe yí. <sup>58</sup> Te táca ñayuu

ndee yajni jíin ña jíin táca jñahan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jñūhun sñí ni jíin ña.

<sup>59</sup> Yūcuán na te nuū uná quiví jeē ní cacu i, te ni jengoo ñayuu ni sáha i circuncidar sūchi yíquín un. (Te yūcuán cúu ññ jñūni nuū yíqui cúñu táca sūchi yí hebreo jeē steén jeē cácuu i ñayuu Yaā Dios.) Te snání i sūchi un sáhví tátá i Zacarías nuú. <sup>60</sup> Te ni cahān naná i:

Ma cúu, chí Juan conaní i, áchí ña.

<sup>61</sup> Te ni cacahān i jíin ña:

¿Te naun? Chi tú ni ññ jñahan rō nání súcuan, áchí i.

<sup>62</sup> Yūcuán na te jíin seña ni cacajñūhún i tátá sūchi un ndese cúní de jeē cónaní i. <sup>63</sup> Te máa de ni jicān ññ tutu, te ni tee de: Juan conaní i. Te táca ñayuu un ní canaa ni i cájito i. <sup>64</sup> Te ni nduváha Zacarías jeē ní cuñíhñ de, te ni quejéé de cáhān de jeē yóhoyo váha Yaā cúu Yaā Dios. <sup>65</sup> Te táca ñayuu ndee yajni jíin de, yóhoyo ni canaa ni i. Te ní yucu región Judea ni jité núu táca jñūhun yáha jeē súcuan ni cuu. <sup>66</sup> Te táca ñayuu jeē ní cajini jñūhun, ni quejéé i cánacani ni i, te cacajñūhun jñahan i:

¿Ndese coo na cuéhu sūchi yáha? áchí i.

Chi máa Jitoho yō yóhoyo ni sáha ya jeē váha jíin i.

*Jñūhun luu jeē ní nacani Zacarías*

<sup>67</sup> Te tátá i Zacarías ni cunuú Espíritu Santo jíin de, te ni nacani de jñūhun ni steén Yaā Dios nuú de:

<sup>68</sup> Yóhoyo váha Yaā cúu máa Jitoho yō, Yaā Dios yohó ñayuu Israel,

chí ni quiji ya nuū yō jeē cácuu yó ñayuu yā, te ni jnama ya yohó.

<sup>69</sup> Te ni jeni ya ññ Yaā iyó poder jeē jnáma ya yohó,

te Yaā ún cacu yucūn mozo yā rey David.

<sup>70</sup> Chi súcuan ni jejnūhun ya, ni cacahān táca té ndoo ánuá jeē ní canacani de jñūhun ya jenahán.

<sup>71</sup> Chi ní cacahān de jeē jnáma ya yohó núu jeē cájito uhú yohó, jíin núu jeē cáquítí ni nuú yō.

<sup>72</sup> Chi ní cundáhú ni yā táca jíi yō jijnáhan,

te tu ní náa ni yā contrato ññ ya.

<sup>73</sup> Chi suu un ní jejnūhun téyí yá nuú jíi yō Abraham,

<sup>74</sup> suu jeē jnáma ya yohó núu ñayuu cájito uhú yohó,

návaha cuajñíu yó núu yā, te ma yūhu yó i.

<sup>75</sup> Te coo ndaa coo ndoo ánuá yō, cuajñíu yó núu yā táca quiví jeē cótecu yō.

<sup>76</sup> Te róhó sūchi lúli, cuu rō té nde nacani jñūhun Yaā cújēhu téyí.

Chi cosnúu rō ichi núu máa Jitoho yō, návaha sātūhva rō ñayuu, te sáa te quiji ya.

<sup>77</sup> Te castūhun rō nuú ñayuu máa yá jeē jnáma ya i,

jíin jéé cóne cáhu ni yā nuú táca cuéchi i.

<sup>78</sup> Chi Yaā Dios maá yó, vāha ni yā te cúndáhú ni yā yohó.

Jeē yúcuan tají yá maá Yaā jeē sáha jeē cúndijin ini anuá yō, quiji ya nde andiví,

<sup>79</sup> návāha jecūhun ni yohó jéē cáyūcu nájñūhun nuū nēē nuū jé yajni cuu yō.

Te chuhun ya yohó ichi nuū cóo ndeyí coo sī ni yō.

Achí Zacarías.

<sup>80</sup> Te sūchi lúli un ní jehnu i te ni ije i jín jñūhun ya. Te ni condee i nde nuū ñūhun téhé ndé quiví ní quenda ndijin i nuū ñáyuu Israel.

*Jeē ní cacu Jesús  
(Mt. 1.18-25)*

## 2

<sup>1</sup> Te ni cuu jecu quiví, te Augusto, tēe cúu rey, ni ndacu de jniñu jeē coo censo jeē nūcosó síhví ndivíi ñáyuu níí cáhnu nuū ndácu de jniñu. <sup>2</sup> Yāha cúu censo xihna ñūhún jéē ní casáha de ná ni cuu Cirenio gobernador nación Siria. <sup>3</sup> Te ndivíi ñáyuu cuanungoo i ná ñuu ná ñuu maá i jeē nácuāha i síhví i. <sup>4</sup> Te suni José ní quenda de ñuu Nazaret, ndañúu Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucún David cúu de. <sup>5</sup> Te ni jehēn de návāha nacūaha de síhví de jín María, chi je yajni quijnáhan ña jín de. Te ñūhun sēhe ña ní sáha Espíritu Santo. <sup>6</sup> Te níni cáhīn de yúcuán te ni jínū quiví jeē cácu sēhe ña. <sup>7</sup> Te ni scácu ña sēhe yí nūú ña, te ni chusúcún ña i sahma cuitá, te ni jequin ña i ini ñi nundoo nūú yéji quiti, chi tuá nūne mesón condee ña.

*Jeē ní canecoo ndajéhé yā nuū pastor*

<sup>8</sup> Te yajni ñuu Belén cáhīn tēe cácuu pastor, te cándito de lanchi de ní ñiñu jecuáa nde yucu ún. <sup>9</sup> Te ñiñu sanaa-ni te ni cane ñiñu ndajéhé maá Jítoho yō nuū de, te nduva maá Jítoho yō ní ndíndēe ní nūú cáhīn de. Te yóhō ni cayúhū de. <sup>10</sup> Te ni cahān ndajéhé un jín de:

Ma yūhu ró jijnáhan ró, chi vēji ri castūhun rí jñūhun vāha nuū rō, te sáha jeē cúsi ndasí ní táca ñáyuu: <sup>11</sup> Chi vijna nde ini ñuu David ní cacu ñiñu Yaā jnama róhó, te maá Jítoho yō Cristo cúu ya. <sup>12</sup> Te sūcuan nacuni rō sūchi yíquín un, chi ñūsúcún i sahma cuitá te catú i ini ñiñu nundoo nūú yéji quiti. Achí yá.

<sup>13</sup> Te ñiñu sanaa-ni te ni canecoo cuehē gā ndajéhé andiví, cáhīn ya jín ndajéhé un, te cácahān yā jeē yóhō vāha Yaā cúu Yaā Dios. Te áchí yá:

<sup>14</sup> Yóhō luu cújēhnu Yaā Dios nde nuū sucún. Te na ndúvāha ní táca ñáyuu ñayiví, sáha ya jeē cúsi ní yā jín i.

Achí táca ndajéhé.

<sup>15</sup> Yúcuán na te cuanungoo ndajéhé un andiví. Te tēe cácuu pastor ní cacahān de jijnáhan de:

Na quihín yō nde ñuu Belén, te cuni yō na vé ní cuu jeē ní castūhun maá Jítoho yō nuū yō, áchí de.

<sup>16</sup> Te yachí cuangoo de, te ni nanihīn de María jín José jín sūchi yíquín un, catú i ini nundoo nūú yéji quiti. <sup>17</sup> Te nuū ní cajini de nuū i, te ni canacani de jñūhun jeē ní cachi ndajéhé yā nuū de siquí sūchi yíquín un. <sup>18</sup> Te ni canaa ní táca ñáyuu cájini nahín i jñūhun cácahān tēe cácuu pastor. <sup>19</sup> Te María, ní quendoo táca jñūhun yāha nuū jeē níjñūni ña, te nácani ní ña siquí. <sup>20</sup> Te tēe cácuu pastor cuanungoo de, te ní cacahān de jeē yóhō vāha Yaā cúu Yaā Dios siquí táca jéē ní cajini sóho de jín jeē ní cajitu de, chí ní squícu nahín nájñūhun ní cahān ndajéhé yā jín de.

*Jeē ní castéén de i nuū Yaā Dios ini templo*

<sup>21</sup> Te ni cuu unā quiví jeē ní cacu ya, te ní casáha de circuncidar sūchi yíquín un. Te ní casnání de i Jesús, chí síhví yúcuan ní cachi ndajéhé yā nuū María nde ná tu jecūhun i.

<sup>22</sup> Te ní jñu quiví jeē casquícu ña costumbre jeē ndúndoo ña nuū Yaā Dios jijnáhan ña, nájñūhun cáhān ley jeē ní jéhe ya nuū Moisés. Te ní jengoo de jín i ñuu Jerusalén jeē nácuāha de i nuū maá Jítoho yō Yaā Dios. <sup>23</sup> Súcuan ní casáha de, chí yósó nūú tútu ley yā: Táca sūchi yí nūú jéē cácuu, quihí cuenta i nuū Jítoho yō Yaā Dios, achí tutu. <sup>24</sup> Te suni cuasocó de nájñūhun cáhān ley maá Jítoho yō: Socó rō uū livi chí uū paloma, achí tutu.

<sup>25</sup> Te ní iyó ñiñu tēe nání Simeón, ndéé de ñuu Jerusalén tiempo un. Te tēe ndaá, tēe chíñūhún vāha nuū Yaā Dios cúu de. Te ñūhun ní de jeē quée maá Yaā jnama ñáyuu nación de Israel. Te maá Espíritu Santo iyó yá jín de. <sup>26</sup> Te je ni castūhun yá nuū de jeē ma cúu cuiti de chí nde coto de nuū Cristo jeē tají maá Jítoho yō Yaā Dios. <sup>27</sup> Te ní steén yā nuū de jeē quihín de templo quiví ún. Te suni tátá naná sūchi yíquín Jesús, ní quívicoo de ini templo jín i, jeē nácuāha de i nuū Yaā Dios nájñūhun cáhān ley Moisés. <sup>28</sup> Te Simeón ní ñunundee de i, te ní cahān de jeē yóhō vāha Yaā cúu Yaā Dios, te áchí de:

<sup>29</sup> Tátá Yaā Dios, vijna te cuu cuāha ní jñūhun jeē cuu ná, chí je ní cusí ní ná.

Chi je ní squícu ní jñūhun ní jejnūhun ní nūú sáña jéé cúu ná mozo ní.

<sup>30</sup> Chi ní jito jínúu na nūú Yaā jnama sáña jijnáhan ná.

<sup>31</sup> Chi ní jeni ní yá jeē jnama ya táca ñáyuu ñayiví.

<sup>32</sup> Te maá yá sáha jeē cúndijin ini anuá ñáyuu táca nación,

návāha jecūhun ní i siquí ní.

Te sáha ya jeē cújēhnu ñáyuu maá ní Israel.

Achí Simeón.

<sup>33</sup> Te José jíin náná i cánaa ni de cájini nahín de jñuhun ni cahán Simeón siquí i. <sup>34</sup> Te ni jicán tahú Simeón jehē de jíjnahan de, te ni cahán de jíin náná i María:

Sūchi yáha vēji i jeē candíje cuehē ñayuu nación yō Israel, te cácu i jíjnahan i. Te sava i ma candíje i, te jnahnū ndetū i. Chi cúu i Yaā ní taji Yaā Dios, te sa squéhichí ni cuehē ñayuu i. <sup>35</sup> Te súcuan te quenda ndijin ndese cájeni ni táca ñáyuu. Te máá ró chi jnahuhū ndasí ni rō coto ró jéē ndóho i. Achí Simeón.

<sup>36</sup> Te suni íne ñin ñahan nácani jñuhun Yaā Dios, naní ña Ana. Te sēhe Fanuel, yucūn Aser cúu ña. Te je jéhu ndasí ña. Te nde ná lulí ña te ni condee ña jíin yí ña uxā cuiyā. <sup>37</sup> Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe íi, chí jéjníñu ña nuū Jítóho yō Yaā Dios nduū ñuū, te ndite ni ña te jicán tahú ña. <sup>38</sup> Te suni hora un ní quee ña, te ni nacuatáhú ña nuū Yaā Dios. Te ni cahán ña jñuhun sūchi yíquán un jíin táca ñáyuu Jerusalén jeē cáñuhun ni i jeē queé Yaā jnama i.

#### *Jeē cuánungoo de ñuu Nazaret*

<sup>39</sup> Te ni jínu ni casquicu de táca jniñu ndácu ley máá Jítóho yō Yaā Dios, te cuanungoo de ñuu de Nazaret, ndañúú Galilea. <sup>40</sup> Te sūchi lulí un ní jehnu i, te ni ije i, te ni cundíchi gá i. Te ni sáha Yaā Dios jeē váha ndasí jíin i.

#### *Jeē íne sūchi lulí Jesús ini templo*

<sup>41</sup> Te ndijnahan cuiyā jéngoo tátá i náná i ñuu Jerusalén, jeē cúu vico pascua. <sup>42</sup> Te nuū ní cuu uxí uū cuiyā i, te cuangoo tucu de Jerusalén, nájñuhun sáha sáha de quiví vico ún. <sup>43</sup> Te ni yáha vico, te cuanungoo de. Te sūchi lulí Jesús, ni quendōo i Jerusalén, te tu ní cájini José jíin náná i. <sup>44</sup> Te cájeni ni de jeē cuahán i mēhñu ñáyuu cájica íchi ún. Te ní cajica de ñin quiví, te sáá te ní cananducú de i mēhñu táca jnahan de jíin ñáyuu cájini jnahan de jíin. <sup>45</sup> Te tu ní cánanihñ de i. Te ni canandicó de cuangoo de Jerusalén, cuananducú de i.

<sup>46</sup> Te nuū uní quiví te ni cananihñ de i ini templo, néne i mēhñu téé cástéén tutu ley Yaā Dios, te jini nahín i jeē cácahan de te cájnñuhun i de siquí jñuhun ún. <sup>47</sup> Te táca ñáyuu cájini jñuhun cáhán i, cánaa ni cájito jeē váha cájí xíní i te váha nástió cuñí i jñuhun. <sup>48</sup> Te nuū ní cajito tátá i náná i nuū i, te ni canaá ni de. Te ni cahán naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhoyo ni canacani ni rí cananducú rí rohó, achí ña.

<sup>49</sup> Yūcuán na te ni cahán i:

¿Naun cananducú ní saña? ¿A tu cájini ní jéé cánuú cocu ná jíin jniñu Tátá na Yaā Dios? Achí i.

<sup>50</sup> Te tu ní cájecūhun ni tátá i náná i jñuhun ni cahán i.

<sup>51</sup> Yūcuán na te cuanuhun i jíin de jíjnahan de ñuu Nazaret, te ni jendije i nuū de. Te náná i, ni quendōo táca jñuhun yáha nuū jeē níjnñu ña. <sup>52</sup> Te Jesús ni jehnu ga i, te ni cundíchi gá i, te cúsu ni Yaā Dios jíin i, te suni súcuan táca ñáyuu.

#### *Jñuhun Juan tēe scuándute*

(Mt. 3.1-12; Mr. 1.1-8; Jn. 1.19-28)

### 3

<sup>1</sup> Te ni cuu xahūn cuiyā jeē ndácu Tiberio jniñu ní nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisantias cúu de gobernador Abilinia. <sup>2</sup> Te sutú cujéhu ga cácuu Anás jíin Caifás. Te ni quee jñuhun Yaā Dios nuū Juan sēhe Zacarías, jeē íne de nuū ñuhun téhé. <sup>3</sup> Te ni jica nuu de táca ñuu jeē iyó yajni yūte Jordán. Te cáhán de jíin ñáyuu jeē ña nácani ni i jeē stóo i cuéchi i te cuandute i, náváha cone cáhnu ni Yaā Dios nuū cuéchi i. <sup>4</sup> Te súcuan ni squícu jñuhun Juan jeē yosó nuū tútu ni tee Isaias, tēe ni nacani jñuhun Yaā Dios nde jenahán:

Coo ñin tēe cana jee nde nuū ñuhun téhe: Sátūhva ró máá ró jíjnahan ró, chí quee máá Jítóho yō.

Te sáha ró jniñu ndaá, chí vēji ya.

<sup>5</sup> Te táca xéhvā na ndúndaá, te táca yucu jíin loma na ndúnduhvā, te na ndúyóhó ichi yácuá, te na ndúli ichi ndáyí.

Te ndihi un cúu jeē ndúvāha ndundaá anuá ñayuu nuū yā.

<sup>6</sup> Te ndihi i cuni i jeē jnáma Yaā Dios i. Súcuan cahán Juan, achí tutu.

<sup>7</sup> Te ni quendacoo cuehē ñayuu, cuahán i nuū de jeē scuándute de i. Te ni cahán de nuū i:

Va sēhe coō cácuu ró, chí xeēn rō nájñuhun coō. ¿A cájeni ni rō jeē cuu cunu ró cácu ró nuū castigo xeēn jeē quíji? <sup>8</sup> Núu súcuan te sáha ró jniñu váha, te súcuan stéén ró jeē ní nacani ndije ni rō jeē stóo ró cuéchi ró. Te ma cáni ni rō cahán ró jeē cuu cácu ró síquí jeē cácuu ró yucūn Abraham. Chí cáhán rí jíin ró jeē cuu sáha Yaā Dios jeē táca yúú yáha nduu sēhe Abraham jeē candíje váha, te núu cúni yā. <sup>9</sup> Te cácuu ró nájñuhun nundéhé jeē tu jéhe ndehé váha. Te vijna je íyó túhva Yaā Dios jeē cuáha ya castigo xeēn, nájñuhun je íyó túhva ñin cāa jeē cahnde nde yoho yujnu. Núu súcuan te sáha ya jíin ró nájñuhun jíin táca yujnu jeē tu cúun ndehé váha, jeē tahndé te cayū nuū ñuhūn. Achí de.

<sup>10</sup> Te ñayuu un ní cacajñuhún i de:

¿Te ndese sáha ná núu súcuan? Achí i.

<sup>11</sup> Te ni cahán de:

Róhó jéé cánevāha uū sahma, na cuáha ró ìn nuū jeē tu névāha. Te róhó jéé cánevāha jeē yéji, suni súcuan na sāha ró, áchí de jíin i.

<sup>12</sup> Te suni jecu tēe cástútú xúhun renta, ni quecoo de jeē cuándute de. Te ni cacajnūhún de Juan:

Maestro, te máá ná, ¿ndese sāha ná jíjnāhan ná?

<sup>13</sup> Te ni cahān Juan jíin de:

Ma scaá ró cácan rō xūhún, chí máá cūhva-ni jeē ní ndacu jniñu nuū rō, achí de.

<sup>14</sup> Te suni ni cacajnūhún jecu soldado:

Te máá ná, ¿ndese sāha ná jíjnāhan ná? áchí de.

Te ni cahān Juan jíin de:

Ma quēnde rō ndajniñu ni ìn jíin jnūhun siúhú ni jíin jnūhun stáú yáhu, te cusī ni rō jíin yáhu ró, áchí de.

<sup>15</sup> Te táca ñáyuú cándetu i jeē quíji Cristo, Yaa jeē tají Yaa Dios, te cájeni ni i jeē sanaa te suu cúu Juan. <sup>16</sup> Te ni cahān Juan jíin i jíjnāhan i:

Ruhú chí jíin ndute scuándute ri rohó. Te véji ìn Yaa jeē nájñuhun scuándute ya rohó cúu jeē cuáha ya Espírítu Santo condee ìni anuá rō, te poder yá cúu nájñuhun ñuhún. Te cújéhu ndasí yá, chí tú na vé jéhu cuiti cúu ri nuū yá, ni jeē cuajniñu ri nuū yá vésú ìn jniñu lúli gá nájñuhun jeē ndají rí vésú correa ndijēn yá. <sup>17</sup> Te sāha ya nájñuhun sāha tēe scánda trigo, chí sásín ya ñayuu vāha jíin ñayuu cunéé, nájñuhun cúndoo trigo jeē quēnda sán paja. Te nastútú yá trigo yá ndiví ìni yacá yá. Te paja chí jnaa yá nuū ñuhún jeē ma ndahvá cuiti. Achí Juan.

<sup>18</sup> Te súcuan te jíin cuéhē gā jñuhun ni stihví ni de ñayuu un, ní nacani de jñuhun vāha Yaa Dios nuū i. <sup>19</sup> Te suni ni cahān xeēn de nuū Herodes, tēe cúu gobernador, chí tēe un ní nacueca de Herodías, ñasihí ñani de Felipe. Te cuéhē gā jniñu néé súcuan ni sāha Herodes. <sup>20</sup> Te sa víhyá gā ni sāha de jeē neé gá, chí ni chune de Juan vecāa.

*Jeē ní jendute Jesús*

(Mt. 3.13-17; Mr. 1.9-11)

<sup>21</sup> Te nde ná tu quívi Juan vecāa, ná ni ine de ni scuándute de táca ñáyuú, te suni ni scuándute de Jesús. Te jícan tahu yá, te ni nune-ni andiví. <sup>22</sup> Te ni cuun Espírítu Santo ni quee xiní yá, te cáa nájñuhun ìn paloma. Te íchi ándiví ní cahān ìn jñuhun:

Máá ró cúu Sēhe ri jeē mani ndasí rí jíin, te yōhyo cúsi ni rí jíin ró, achí.

*Lista ñayuu yucūn ní quíji Jesucristo*

(Mt. 1.1-17)

<sup>23</sup> Te ná ni quejéé Jesús steén yá jñuhun, te iyó yá nájñuhun ocó uxí cuiyā. Te cájeni ni ñayuu jeē sēhe José cúu ya. Te José ni cuu sēhe Elí, <sup>24</sup> te Elí ni cuu sēhe Matat, te Matat ni cuu sēhe Leví, te Leví ni cuu sēhe Melqui, te Melqui ni cuu sēhe Jana, te Jana ni cuu

sēhe José, <sup>25</sup> te José ni cuu sēhe Matatías, te Matatías ni cuu sēhe Amós, te Amós ni cuu sēhe Nahum, te Nahum ni cuu sēhe Esli, te Esli ni cuu sēhe Nagai, <sup>26</sup> te Nagai ni cuu sēhe Maat, te Maat ni cuu sēhe Matatías, te Matatías ni cuu sēhe Semei, te Semei ni cuu sēhe José te José ni cuu sēhe Judá, <sup>27</sup> te Judá ni cuu sēhe Joana, te Joana ni cuu sēhe Resa, te Resa ni cuu sēhe Zorobabel, te Zorobabel ni cuu sēhe Salatiel, te Salatiel ni cuu sēhe Neri, <sup>28</sup> te Neri ni cuu sēhe Melqui, te Melqui ni cuu sēhe Adi, te Adi ni cuu sēhe Cosam, te Cosam ni cuu sēhe Elmodam, te Elmodam ni cuu sēhe Er, <sup>29</sup> te Er ni cuu sēhe Josué, te Josué ni cuu sēhe Eliezer, te Eliezer ni cuu sēhe Jorim, te Jorim ni cuu sēhe Matat, <sup>30</sup> te Matat ni cuu sēhe Leví, te Leví ni cuu sēhe Simeón, te Simeón ni cuu sēhe Judá, te Judá ni cuu sēhe José, te José ni cuu sēhe Jonán, te Jonán ni cuu sēhe Eliaquim, <sup>31</sup> te Eliaquim ni cuu sēhe Melea, te Melea ni cuu sēhe Mainán, te Mainán ni cuu sēhe Matata, te Matata ni cuu sēhe Natán, <sup>32</sup> te Natán ni cuu sēhe David, te David ni cuu sēhe Isai, te Isai ni cuu sēhe Obed, te Obed ni cuu sēhe Booz, te Booz ni cuu sēhe Salmón, te Salmón ni cuu sēhe Naasón, <sup>33</sup> te Naasón ni cuu sēhe Aminadab, te Aminadab ni cuu sēhe Aram, te Aram ni cuu sēhe Esrom, te Esrom ni cuu sēhe Fares, te Fares ni cuu sēhe Judá, <sup>34</sup> te Judá ni cuu sēhe Jacob, te Jacob ni cuu sēhe Isaac, te Isaac ni cuu sēhe Abraham, te Abraham ni cuu sēhe Taré, te Taré ni cuu sēhe Nacor, <sup>35</sup> te Nacor ni cuu sēhe Serug, te Serug ni cuu sēhe Ragau, te Ragau ni cuu sēhe Peleg, te Peleg ni cuu sēhe Heber, te Heber ni cuu sēhe Sala, <sup>36</sup> te Sala ni cuu sēhe Cainán, te Cainán ni cuu sēhe Arfaxad, te Arfaxad ni cuu sēhe Sem, te Sem ni cuu sēhe Noé, te Noé ni cuu sēhe Lamec, <sup>37</sup> te Lamec ni cuu sēhe Matusalén, te Matusalén ni cuu sēhe Enoc, te Enoc ni cuu sēhe Jared, te Jared ni cuu sēhe Mahalaleel, te Mahalaleel ni cuu sēhe Cainán, <sup>38</sup> te Cainán ni cuu sēhe Enós, te Enós ni cuu sēhe Set, te Set ni cuu sēhe Adán, te Adán ni cuu sēhe Yaa Dios, chí ni sāha ya de.

*Jeē ní jito ndee jexeén Jesús*

(Mt. 4.1-11; Mr. 1.12-13)

#### 4

<sup>1</sup> Te Jesús ni cunuú Espírítu Santo ìni yá, te ni quenda ya yūte Jordán cuahān yá. Te ní jinū yá nde nuū ñuhun téhé ní sāha Espírítu Santo. <sup>2</sup> Te ní ine ya yūcuan úú xico quívī, te ní jito ndee jexeén yá, chí cúní jeē sāha ya cuéchi. Te táca quívī ún tu ní yéji cuiti yá, te ná ní yāha quívī ún, te jíi yá sóco. <sup>3</sup> Yūcuán na te ní cahān jexeén un jíin yá:

Núu máá ró cúu Sēhe Yaa Dios, te cahān rō jeē yuú yāha na ndúu staá caji rō, achí.

<sup>4</sup> Te ni cahān Jesús jín:

Tuú chí yósó núú tútu ìi: Nasūu máni máá jín stáá cátecu ñayuu, chí suni jín táca jnúhun cáhān Yaā Dios, achí yá.

<sup>5</sup> Yūcuán na te cuahān jexeén un jín yá nde xinī ìn yucu súcun, te ìn núnúu-ni ní steén nuū yá tǎcá naciún ní cáhnu ñayví. <sup>6</sup> Te ni cahān jín yá:

Nuū maá ró cuāha ri jeé cujehnu ró núú ndivii naciún yáha, chí yōhoy luu cáa. Chí máá rí jnǎi ndihi, te cuu cuāha ri nuū ndé ìn cúní rí. <sup>7</sup> Núú súcuan te núú cuiñi yíti ró chíñúhún ró ruhū, te cuāha ndihi ri nuū rō. Achí jexeén.

<sup>8</sup> Te ni cahān Jesús jín:

Satanás, cujiyo quihín rō, chí yósó núú tútu jeé chíñúhún ñayuu maá Jítoho i Yaā Dios, te nuū maá-ni ya cuajniñu i. Achí yá.

<sup>9</sup> Yūcuán na te cuahān jexeén un jín yá nde ñuu Jerusalén. Te ni jeni ya xinī torre templo. Te ni cahān jín yá:

Te núú Sēhe Yaā Dios cúu ró, te síngava ró máá ró nde nuū ñúhun, chí jnama ya rohó.

<sup>10</sup> Chí yósó núú tútu:

Tejniñu ya ndajéhé yá quijicoo coto rohó.

<sup>11</sup> Te cunundee yá rohó jínáhan ya, návaha ma cáchihí ró jéhé rō nuū yuú.

Achí tutu. Achí jexeén.

<sup>12</sup> Te ni cahān Jesús:

Tuú chí suni yósó núú tútu jeé ma cóto ndee ñayuu Jítoho i Yaā Dios, núu jnama ya i chí tuú, achí yá.

<sup>13</sup> Te tuá ni níhín jexeén modo coto ndee Jesús quiví ún, te ni cujiyo cuahān jecu-ni tiempo.

*Jeé ní quejéé Jesús nácani ya jnúhun región Galilea*

(Mt. 4.12-17; Mr. 1.14-15)

<sup>14</sup> Te ni cunuú fuerza Espiritu Santo ini Jesús, te cuanuhun yá Galilea. Te ní región yajni yūcuan ní jité núu jnúhun ya. <sup>15</sup> Te ni steén yá jnúhun ini tǎcá vehe ìi sinagoga, te ndihi ñayuu ni cajejnúhún i ya.

*Jeé cuánuhun yá ñuu Nazaret*

(Mt. 13.53-58; Mr. 6.1-6)

<sup>16</sup> Te ni najinū yá ñuu Nazaret nuū ní jehnu ya. Te quiví ndétátú ní quiví ya ini vehe ìi sinagoga, nájñuhún sáha sáha ya. Te ni ndocuñi yá jeé cahu ya tutu ìi. <sup>17</sup> Te ni cajēhe de tutu ní tee Isaías, tēe ni nacani jnúhun Yaā Dios nde jenahán. Te ni nune ya tutu ún, te ni nanihín yá nuū yosó jnúhun ní cahu ya:

<sup>18</sup> Espiritu maá Jítoho yō Yaā Dios iyó yá jín rí,

chí ni tejniñu ya ruhū jeé nácani ri jnúhun váha nuū ñayuu ndahú.

Te ni tají yá ruhū vēji ri jín jnúhun jeé ndúvaha ní ñayuu cácuclhyá ní.

Te castúhun rí nuū ñayuu cáyihí ndaha jexeén jeé coo libre i.

Te sáha ri jeé ndúndijin ini anuá ñayuu tu cájecúhun ni,

te jnama ri ñayuu jeé cándoho i sáha jnáhan i.

<sup>19</sup> Te nacani ri jnúhun jeé ní quee tiempo jeé sáha Jítoho yō Yaā Dios jeé váha ñayuu.

Achí tutu ní cahu ya.

<sup>20</sup> Te ni nacasi yá tutu ún, te ni nacuāha ya nuū tēe jéjñiñu ini sinagoga, te ni nucóo ya jeé steén yá jnúhun nuū ñayuu cáhín ini sinagoga. Te tǎcá i cájito váha i nuū yá. <sup>21</sup> Te ní quejéé yá cahān yá jín i:

Vijna te ni squícu jnúhun cáhān tutu ìi yáha ní cajini sóho ró, achí yá.

<sup>22</sup> Te ndivii i ní cacahān jeé váha tēe cúu ya, te cánaa ní i jeé ní cajini i tǎca jnúhun luu ní cahān yá. Te ni cacajnúhun jnáhan i:

¿A násūu séhe José cúu tēe yáha?

<sup>23</sup> Te ni cahān yá jín i:

Jíní váha ri jeé cájeni ní rō cahān rō jnúhun yátá yáha jín rí: Tēe tájna, sátájna ró maá ró núu súcuan. Te jnúhun yáha cúní cahān jeé nájñuhún ní nasávaha ri cuehē ñayuu cácuclhyá ini ñuu Capernaum ní canihín rō jnúhun, suni súcuan na sáha ri ñuu yō yáhá návaha candije ró cájeni ní rō. Achí yá jín i.

<sup>24</sup> Te ni cahān gā yá:

Jendaá cahán rí jín rō, ní ìn tēe nácani jnúhun Yaā Dios, tu cájetáhú ñayuu ñuu maá de nuū de. <sup>25</sup> Te suni jendaá cahán rí jín rō jeé ní iyo cuehē ñahan ní ndóo ndáhú ini naciún yō Israel, tiempo ní cotecu Elías, tēe ni nacani jnúhun Yaā Dios. Te tiempo un tu ní cúun cuiñi saū uní cuiyá yosáva, te ní iyo ìn jnamā xeén ní cáhnu naciún.

<sup>26</sup> Te tu ní tájī Yaā Dios Elías quihín de nuū ní ìn ñahan viuda naciún yō Israel, chí nuū máá ìn-ni ñahan viuda jeé ndeé ñuu Sarepta ndañúú Sidón, ní jehén de ní jito de jeé ní yejī ña.

<sup>27</sup> Te ini naciún yō Israel suni ní iyo cuehē tēe ní candoho cuehyí stehyú, tiempo jeé ní cotecu Eliseo, tēe ni nacani jnúhun Yaā Dios.

Te ní ìn de tu ní cándije jeé ndúvaha de sáha Eliseo, chí sa suhva máñúhún-ni Naamán,

tēe naciún Siria ní nduváha. Achí yá.

<sup>28</sup> Yūcuán na te tǎca ñayuu cáhín ini sinagoga, yōhoy ní caquiti ní i jnúhun ní cahān yá. <sup>29</sup> Te ní candocuñi ìi, te ní caquenehen i ya yatá ñúú ún, cuahān i jín yá xinī yūcu íne ñuu ún, chí cácuñi i chundahá i ya ñinga ya cava ún. <sup>30</sup> Te tu ní cúu sáha i, chí ní yáha-ni ya mēhñú i cuahān yá.

*Jeé ní quenehen ya tachí ini ìn tēe*

(Mr. 1.21-28)

<sup>31</sup> Yūcuán na te cuahān Jesús ñuu Capernaum región Galilea. Te quiví ndétátu ní steén yá jnúhun nuū ñayuu. <sup>32</sup> Te ní canaa ní i cájini i jnúhun steén yá. Chí ní steén váha ya nuū i, chí jíní váha máá yá.

<sup>33</sup> Te ini vehe sinagoga un íne ìn tēe jeé ñúhun tachí xeén ini de. Te tēe un ní cana cóhó de:

<sup>34</sup> Cuijiyo ní. ¿Naun vēji ní núu na jínáhan ná, Jesús ñuu Nazaret? ¿A vēji ní jéē snáá ní sáña, chí naún? Je jíni na ndé ñn cúu ní, chí Sēhe ñi Yaā Dios cúu ní. Achí de.

<sup>35</sup> Te Jesús ni cahān xeēn yā nuū tachī ún: Casi yuhu ró te quenda ró ini tēe yáha, áchí yá.

Te ni cotúú-ni tēe un núu táca ñáyyuu, ni sáha tachī ún. Te ni quenda ini de cuahān, te tú na vé ni sáha ga jíin de. <sup>36</sup> Te ndihi ñayuu un ní cayühú i, te ni cacahān i jíin jnāhan i:

¿Na jñuhun cúu yáha jéē ní cuu súcuan? Chí cūjéhuu tēe yáha jéē ndácu ñihin de jniñuu nuū tachí, te quendacoo-ni, áchí i.

<sup>37</sup> Te jñuhun ya ni jitē núu cuahān ní cáhnu región yūcuán.

*Jeē ní nasávāha ya naná chíso Simón Pedro*

(Mt. 8.14-15; Mr. 1.29-31)

<sup>38</sup> Yūcuán na te ni quenda Jesús ini vehe ñi sinagoga, te cuahān yā te ni jinū yā vehe Simón. Te naná chíso Simón, yñhi xeēn quíji ña, te ni cacahān ndahú de jíin yá jehē ña. <sup>39</sup> Te ni jita ndeyi ya nuū ña, te ni cahān yā jéē na ndíco quíji ún. Te ni nduvāha-ni ña. Te ni ndocuñi-ni ña, te ni sáha ña jéē ní yeji yá jíin de.

*Jeē ní nasávāha ya cuehē ñayuu*

(Mt. 8.16-17; Mr. 1.32-34)

<sup>40</sup> Te jéē ní queē niāndii, te táca ñáyyuu jéē iyó jnāhan i cácuñu ndinuū cuehyi, ni caquindeca i jnāhan i un núu yā. Te ni soó yá ndaha ya siquí ñn ñn i, te súcuan ni nasávāha ya i. <sup>41</sup> Te suni cuehē ñayuu ni quendacoo tachī ini i, te cácana cóhó táchí ún:

Maá ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jñuhun jéē cahán gā súcuan, chí cájini jéē maá yá cúu Cristo, Yaā ní tají Yaā Dios.

*Jeē ní nacani ya jñuhun región Galilea*

(Mr. 1.35-39)

<sup>42</sup> Te nuū ní cundijin, te ni quenda ya cuahān sín ya yatá ñúu nuū tú ñayuu. Te táca ñáyyuu cánanducú i ya, te ni jinūcoo i nuū íne ya. Te cástétu i ya jéē tú cuijiyo ya nuū i. <sup>43</sup> Te ni cahān yā jíin i:

Suni cánuú jéē nacani ri jñuhun vāha nuū táca gā ñuu siquí ndese ndácu Yaā Dios jniñu, chí jéē yúcuani ní tají yá ruhū vēji ri. Achí yá.

<sup>44</sup> Te ní jica cuu ya ní región Galilea, nacani ya jñuhun ini táca vehe ñi sinagoga.

*Jeē ní canihin de cuehē chácá ní sáha ya*

(Mt. 4.18-22; Mr. 1.16-20)

## 5

<sup>1</sup> Te ñn quiví te íne Jesús yumar Genesaret. Te ni quecoo cuehē ñayuu, te ni chitú ñihin i nuū yā, chí cácuni i cuni nahín i jñuhun Yaā Dios. <sup>2</sup> Te ní jito ya jéē yúcu uú barco yajni yumar. Te tēe cájni chácá, je ní quendacoo

de ini barco, te cánacate de ñunu de. <sup>3</sup> Te ní quiví ya ini ñn barco jéē cúu barco Simón. Te ní cahān yā jíin de jéē na scáca yátá de quihín jecu gā nuū ndúte. Te ní cucóo ya, te nde ini barco un ní steén yá jñuhun nuū ñayuu cuehē jéē yúcu i yundúte un. <sup>4</sup> Te nuū ní jínu ní steén yā, te ní cahān yā jíin Simón:

Scáca ró barco na quihín yō nde nuū iyó cúnú ndute, te sínga ró ñunu ró jñi ró chácá, áchí yá.

<sup>5</sup> Te ní cahān Simón:

Maestro, ní niñu ní casínga ná ñunu jéē jñi ná tí, te tu ní ñihín cuñi ná ní ñn tí. Te jéē cahán maá ní súcuan, te na sínga tucu ná ñunu, áchí de.

<sup>6</sup> Te ní casínga de, te ní quivícoo cuehē ndasí chácá, nde nducú táhndé ñunu de. <sup>7</sup> Te ní cacaja ndahá de nuū jnāhan de cáhñi ini inga barco, na quijicoo chindéé ñájñáhan jíin de. Te ní quecoo de, te ní cascútú ndí de tí ndindúú barco, te nde je yajni quee barco. <sup>8</sup> Te ní jito Simón Pedro jéē súcuan ni cuu. Te ní jecuñi yití de nuū Jesús, te ní cahān de:

Cuijiyo ní núu ná, chí tēe iyó cuéchi cúu ná, áchí de.

<sup>9</sup> Chí maá de jíin táca tēe cáhñi jíin de, ní cayühú de jéē ní canihin de cuehē chácá un ní sáha ya. <sup>10</sup> Te suni ní cayühú Jacobo jíin Juan, ndindúú sēhe Zebedeo, chí tēe chindéé ñájñáhan jíin Simón cácuu de. Te ní cahān Jesús jíin Simón:

Ma yūhu ró, chí nde vijna te sáha ri jéē ñihin ró cuehē ñayuu candije ruhú, nájñuhun ní ñihín ró cuehē chácá. Achí yá.

<sup>11</sup> Yūcuán na te nuū ní jinūcoo de jíin barco nuū ñuhun íchi, te ní castóo de ndihi nda-ñiñu de, te ní candiquín de ya cuango de.

*Jeē ní nasávāha ya ñn tēe ndóho cuehyi stehyú*

(Mt. 8.1-4; Mr. 1.40-45)

<sup>12</sup> Yūcuán na te íne Jesús ini ñn ñuu, te ní quee ñn tēe ndóho cuehyi stehyú. Te ní jito de nuū Jesús, te ní jecuñi yití de ní jecuñi de nuū de nde nuū ñuhun, te ní cahān ndahú de jíin yá:

Jíni na jéē cuu sáha ní jéē nduvāha ná, te núu cúní ní, áchí de.

<sup>13</sup> Yūcuán na te ní soó yá ndaha ya siquí de, te ní cahān ya:

Cúní rí. Te na nduvāha ró, áchí yá.

Te ná ní cahān yā súcuan, te ní nduvāha-ni tēe ndóho cuehyi stehyú un. <sup>14</sup> Te ní ndacu ya jniñu nuū de jéē ma cáchi cuñi de nuú ní ñn. Te áchí yá:

Quisteén ró maá ró nuū sutú, te condahá ró jéē socó ró nuū Yaā Dios siquí jéē ndúndoo ró núu yā, nájñuhun ní ndacu Moisés jniñu jenahán. Te súcuan te cuni ñayuu jéē ní nduvāha ró. Achí yá.

<sup>15</sup> Te víhyá gā ní jitē núu jñuhun ya cuahān. Te ní cataca cuehē ñayuu jéē cúní nahín i

jn̄uhun stéén yā, jín jēē nasávāha ya i nuū tāca cuéhyī cándoho i. <sup>16</sup> Te máá yá cuahān s̄ín ya nuū tú ñayuu, te ni jicān tahú yā.

*Jeē ní nasávāha ya ñn tēe ndóho cuéhyī ní j̄in*

(Mt. 9.1-8; Mr. 2.1-12)

<sup>17</sup> Te ñn quiv̄i te stéén yā jn̄uhun, te jecu tēe grupo fariseo jín tēe cástéén tutu ley Yaā Dios, cáyūcú de yūcuán. Te tēe un ní quecoo de nuū yā jeē véjicoo de tāca ndañū Galilea, jín ndañū Judea, jín ñuu Jerusalén. Te poder maá Yaā Dios iyó jín yā jeē nasávāha ya ñayuu cácuñū. <sup>18</sup> Yūcuán na te ni quecoo jecu tēe, cándiso de ñn tēe ndóho cuéhyī ni j̄in, cátu de nuū ñn camilla. Te cánducú de squiv̄i de tēe ún ini vehe, te caquin de nuū íne ya. <sup>19</sup> Te tu ní cániñn de modo quiv̄icoo de jín tēe un, chí cáyūcú chitú ñayuu. Te ni cacoo de siqūi véhe, te ni canune de teja. Te ni cascúun de tēe cúhu un jín camilla de nde nuū íne Jesús mēñū ñayuu. <sup>20</sup> Te ni jini Jesús jeē cáandije de jeē cúu nasávāha ya tēe cúhu un. Te ni cahān yā jín tēe cúhu un:

Róhó, jeé íne cáhnu ni r̄i nuū tāca cuéchi ró, áchí yā.

<sup>21</sup> Yūcuán na te tēe cástéén tutu ley Yaā Dios jín tēe grupo fariseo, ni quejéé de cájeni ni de siqūi yā: ¿Ndé ñn cúu tēe yáha jéé cahān de jn̄uhun ndevāha jeé quiti ní Yaā Dios? Chí nasū Yaā Dios cúu de jeē cóne cáhnu ni de nuū cuéchi.

<sup>22</sup> Te ni jini Jesús jeē súcuan cájeni ni de, te ni cahān yā jín de:

¿Naun cájeni ni rō jeé cahān ndevāha ri? <sup>23</sup> Jeé uú jn̄uhun yáha, ¿ndé ñn yí gá cáa? ¿A jéé cahān r̄i jín tēe cúhu: Je íne cáhnu ni r̄i nuū tāca cuéchi ró? ¿Chí yí gá jeé cahān r̄i: Ndocuiñ̄i te caca ró, chí je ni nduvāha ró, achí ri? <sup>24</sup> Te vijna te na stéén ri jeé maá rí, Yaā ní nduu tēe, ndiso jniñ̄u ri ini ñayiv̄i yáha jéé cóne cáhnu ni r̄i nuū cuéchi.

Yūcuán na te ni cahān yā jín tēe ni j̄in ún: Cáhān r̄i jín ró, ndocuiñ̄i te naquihin ró camilla rō, te quinhun rō vehe ró, áchí yā jín de.

<sup>25</sup> Te ni ndocuiñ̄i-ni tēe ún, jito jínúñ ñayuu. Te ni naquihin de camilla nuū ni cátu de, te cuanhun de vehe de. Te nácuatáhú de nuū Yaā Dios. <sup>26</sup> Te yōhyo ni canaa ni tāca ñayuu cájito i, te ni cacahān i jeé yōhyo vāha Yaā cúu Yaā Dios. Te suni yōhyo cáyūñ i, te cacahān i:

Vijna te ni cajito yó jniñū jéñnu téyí, áchí i.

*Jeē ní cana ya Leví*

(Mt. 9.9-13; Mr. 2.13-17)

<sup>27</sup> Yūcuán na te ni quenda ya cuahān yā, te ni jito ya nuū ñn tēe stútú xúhun renta, naní de Leví, néne de nuū cutútú xúhun renta. Te ni cahān yā jín de:

Condiquin ruhū na quihín yó.

<sup>28</sup> Te ni ndocuiñ̄i de, te ni stóo de ndiñi ndajniñū de, te cuahān de jín yā.

<sup>29</sup> Yūcuán na te ni sáha Leví ñn vico cáhnu vehe de, jeé cúñni de jín Jesús. Te cuéhē tēe cástútú xúhun renta jín sava ga tēe, cáyūcú de mesa cáyeji de staā jín yā. <sup>30</sup> Te tēe grupo fariseo jín tēe cástéén tutu ley Yaā Dios, ni quejéé de cacahān de siqūi tēe cáscuāha jín yā, te ni cacajñūñ de:

¿Najehē cáyeji rō cájhi ró jín tēe cástútú xúhun renta jín tēe cása ha cuéchi? áchí de.

<sup>31</sup> Te ni cahān Jesús:

Ñayuu cáhio vāha, tu jini ñúñn i tēe tájná, chí ñayuu cácuñ cúu jeé jini ñúñn. <sup>32</sup> Te ruhū nasū jéé véji r̄i cana ri ñayuu tú cuéchi, jeé cúu i nájnūñn ñayuu cáhio vāha. Chí sa suhva véji r̄i cana ri ñayuu cáhio cuéchi, jeé na nácani ni i te stóo i cuéchi i. Achí yā.

*Jeē ní cacajñūñ de ya siqūi jeé cóndite ní*  
(Mt. 9.14-17; Mr. 2.18-22)

<sup>33</sup> Yūcuán na te ni cacahān de jín yā:

Tēe cáscuāha jín Juan, jín tēe cáscuāha jín grupo fariseo, cuéhē jinu cáhio ndite ni de te cájicān tahú de. Te tēe cáscuāha jín máá ní, ¿naun tu cása ha de súcuan? Chí cáyeji de cájhi de.

<sup>34</sup> Te ni cahān yā jín de:

¿A cuu condite ni de nini jéé iyó r̄i jín de? ¿A cuu sáha ró jéé condite ni ñayuu cáhñn vico nándāha, te núu nini néne tēe nándāha? <sup>35</sup> Te quee quiv̄i jeé cújiyo tēe ni nandāha, te quiv̄i ún chí condite ni i. Achí yā.

<sup>36</sup> Te suni ni cahān yā uú jn̄uhun yátá siqūi jeé tu quijnáhan jn̄uhun jeé jéé steén yā jín táca jn̄uhun jenahān. Achí yā:

Ni ñn ñayuu tu jéñde i ñn pedazo sahma jéé i, te nachuhun i nuū ñn sahma túhú i. Chí núu súcuan te stívi i sahma jéé i, te suni tu quijnáhan jeé jeé un jín jéé tuhú. <sup>37</sup> Te tú ni ñn chúnun vino jeé ini ññ tuhú. Chí núu súcuan, te vino jeé un ndatá ññ, te naa vino jín ññ. <sup>38</sup> Chí cánúu jéé chúnun vino jeé ini ññ jéé, te súcuan te quéndō vāha ndindúu. <sup>39</sup> Te ñayuu cájhi vino áva, tu cúní i coho i jeé jeé, chí jeé áva cúu jeé vāha ga, achí i. Achí yā.

*Jeē ní cataxín de yoco trigo quiv̄i ndétātu*  
(Mt. 12.1-8; Mr. 2.23-28)

## 6

<sup>1</sup> Te ñn quiv̄i ndétātu ní yáha Jesús cuahān yā mēñū nuū cáa trigo. Te tēe cáscuāha jín yā ni cataxín de yoco trigo, te ni caquin de ini ndaha de, te ni cayeji de. <sup>2</sup> Te sava tēe grupo fariseo ni cacajñūñ de:

¿Najehē casáha ró jniñū jeé tu iyó vāha sáha ró quiv̄i ndétātu?

<sup>3</sup> Te ni cahān Jesús jín de:

¿A tu ní cácahu cuiti rō tutu ndese ni sáha David, ñn quiv̄i jeé ni j̄i de sóco jín tēe cáhñn jín de? <sup>4</sup> Te ni quiv̄i de ini vehe Yaā Dios, te ni quihin de pan ññ jeé yosó ndijin nuū Yaā

Dios. Te ni yeji de, te suni ni jêhe de ni cayeji têe cáhîin jîin de. Te tú na ley jeê cáji ni ìin têe, chi máá-ni sutú cuu caji. Te vēsú sūcuan te tú na cuēchi ní ìyo siquī de. Achí yá.

<sup>5</sup> Te ni cahān gā yā jîin de:

Ruhū, Yāā ní nduu tēe, máá rí cúu jeē ndácu jniñu siquī ndese sáha ñayuu quivī ndétátú, áchí yá.

*Jeē ní nduvāha tēe ni ichī ndaha*  
(Mt. 12.9-14; Mr. 3.1-6)

<sup>6</sup> Te ñga quivī ndétátú, suni ni quivī ya ñni vehe ñi sinagoga, te ni steén yā jñuhun. Te yūcuan ñne ñni tēe ni ichī ndaha váha de. <sup>7</sup> Te tēe cástéén tutu ley jîin tēe grupo fariseo, cájito yuhu de ya núu nasávaha ya tēe un quivī ndétátú, návaha ñihñ de cuēchi siquī yā. <sup>8</sup> Te máá yá je jíní yā ndese cájeni ni de. Te ni cahān yā jîin tēe ni ichī ndaha ún:

Ndocuñī, te condichi rō mēhñu yáha, áchí yá.

Te ni ndocuñī de, te ni jecondichi de mēhñu. <sup>9</sup> Yūcuán na te ni cahān yā jîin de jñánhan de:

Na cájnūhun rí rohó ñni jñuhun: ¿Ndese cáhán ley siquī quivī ndétátú? ¿A jeē sáha váha yó, chí sáha neé yó? ¿A jeē nasávaha yó ñayuu je yajni cuu, chí sáha yó jeē cúu i? Achí yá.

<sup>10</sup> Te ndéhé yá nuū de jeē cáyūcú de ní xiin ya. Te ni cahān yā jîin tēe cúhu un:

Scaá ndaha rō.

Te ni scaá de, te ni nduvāha-ni ndaha de.

<sup>11</sup> Te yōhyo ni caquiti ni táca tēe un, te ni quejé de cándajnūhún de siquī Jesús, ndese cahni de ya.

*Jeē ní nacāji ya uxī uū tēe apóstol*  
(Mt. 10.1-4; Mr. 3.13-19)

<sup>12</sup> Te ni cuu jecu quivī, te ni quenda ya cuacacān tahú yā nde yucu. Te ní niñu ni jicān tahú yā nuū Yāā Dios. <sup>13</sup> Te nuū ní cundijin, te ni cana ya táca tēe cáscuáha jîin yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jñuhun ya. <sup>14</sup> Te yáha cúu síhvi de jñánhan de: Simón jeē ní nasnání yá de Pedro, jîin ñani de Andrés, te suni Jacobo jîin Juan, Felipe jîin Bartolomé, <sup>15</sup> Mateo, Tomás, Jacobo sēhe Alfeo, Simón tēe grupo cananista, <sup>16</sup> Judas ñani Jacobo, jîin Judas Iscariote, tēe jeē ní nastúu de ya.

*Jeē ní stéén yā nuū ñayuu cuehē*  
(Mt. 4.23-25)

<sup>17</sup> Te ni nanuu ya yucu jîin táca tēe un jeē cascuáha jîin yá, te ni jecuñī yā ñni nduhvá jîin de. Te cuehē ñayuu ní región Judea jîin ñuu Jerusalén, jîin ñayuu yumar ñuu Tiro jîin ñuu Sidón, ni quecoo i jeē cúni nahín i jñuhun stéén yá, jîin jeē nduvāha i cuehī cándoho i. <sup>18</sup> Te ñayuu jeē ñuhun tachī ñni i, suni ni canduvāha i ní sáha ya. <sup>19</sup> Te ndivii ñayuu

cáculi i quehé i ya, chi sūcuan nduvāha i sáha ya jîin poder yā.

*Jñuhun ñayuu yōhyo ndetú jîin ñayuu jeē xeēn ndoho*

(Mt. 5.1-12)

<sup>20</sup> Te ni ndacoto ya nuū tēe cáscuáha jîin yá un, te ni cahān yā:

Yōhyo ndetú rohó jeē cándoho ndáhú, chi quivī rō ñuu nuū ndácu Yāā Dios jniñu.

<sup>21</sup> Yōhyo ndetú rohó jeē cájii sōco vijna, chi quiji quivī jeē ndutú chíji rō.

Yōhyo ndetú rohó jeē cándahyū rō vijna, chí quiji quivī jeē cuecú rō.

<sup>22</sup> Yōhyo ndetú rō te núu cáquiti ní ñayuu nuū rō jeē siquī ruhū, Yāā ní nduu tēe, te cáscuéhichi i rohó, te cácahān neé i nuū rō, te cácahān i jeē ñayuu casáha jniñu neé cácuu rō. <sup>23</sup> Te na cóo sñ ní rō quivī sáha i sūcuan, te víhyá gā na cúsi ní rō, chí cáhnu téyí coo tahū rō nde andiví. Chí suni sūcuan ni casáha uhū táca jîi i jîin tēe ni canacani jñuhun Yāā Dios nde jenahán.

<sup>24</sup> Te nacā jeē xeēn ndoho rohó ñayuu cucá, chí vijna-ni cúu jeē cáhíyo sñ ní rō.

<sup>25</sup> Nacā jeē xeēn ndoho rohó ñayuu jeē vijna cáhíyo vetú chíji rō, chí quiji quivī jeē cuu rō sōco.

Nacā jeē xeēn ndoho rohó ñayuu jeē vijna cájecú rō, chí quiji quivī jeē nducuñyá ní rō te ndahyū rō.

<sup>26</sup> Nacā jeē xeēn ndoho táca rō núu cájejnūhún ñayuu rohó, chí suni sūcuan ní cajejnūhún jîi i táca tēe ni canacani jñuhun stáhú ndé jenahán.

*Jñuhun jeē cundáhú ní yō ñayuu cájito uhū yohó*

(Mt. 5.38-48; 7.12)

<sup>27</sup> Te cáhán rí jîin rohó jeē cájini sōho: Cundáhú ní rō ñayuu cájito uhū rohó. Te sáha váha rō jîin ñayuu cáquiti ní nuū rō. <sup>28</sup> Te cacān rō jeē váha coo ñayuu cácahān ndeváha síquī rō. Te cacān tahú rō jehē ñayuu cácahān neé núu rō. <sup>29</sup> Te núu ndé tēe cani de ñni lado yiqui núu rō, te váha ga suni cuāha rō ñga lado cani de, vēsú jeē nacúāha rō jeē ndútahú de. Te núu ndé tēe cúni de quende de ticāchi rō, suni cuāha rō jñuhun jeē na quihñ de jîin ndé camisa rō. <sup>30</sup> Te na-ni ñayuu jicān nuū rō, te cuāha rō núu i. Te ñayuu quihñ ndajnñu rō, ma nāndacān rō. <sup>31</sup> Te nájñuhun cáculi rō jeē sáha váha ñayuu jîin rō, suni sūcuan na sáha váha rō jîin i.

<sup>32</sup> Chí núu ñyo mání rō jîin máá-ni ñayuu jeē maní jîin rō, ¿te na vé jeē váha ga sáha rō núu sūcuan? Chí nde tēe casáha cuēchi, suni maní de jîin tēe maní jîin máá de. <sup>33</sup> Te núu sáha váha rō jîin máá-ni ñayuu jeē casáha váha jîin rō, ¿te na vé jeē váha ga sáha rō núu sūcuan? Chí nde tēe casáha cuēchi, suni sūcuan casáha de. <sup>34</sup> Te núu cuāha núu rō núu máá-ni ñayuu jeē ñuhun ní rō nacúāha



i nuū rō, ¿te na vé jeē váha ga sáha ró núu súcuan? Chi nde tēe cásáha cuēchi, suni jēhe núu de nuū tāca gá tēe cásáha cuēchi, návāha nanihin tucu de. <sup>35</sup> Núu súcuan te cundáhú ni rō ñayuu cájito uhū rohó, te sáha váha ró jíin i, te cuáha núu ró núu i. Te ma cuáha ró máa síquī jeē cani ni rō jeē suni nacuáha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā cujēhnu téyí. Chi máa yá váha ni yá jíin ñayuu tu nácuatáhú núu yá jíin ñayuu casáha néé. <sup>36</sup> Núu súcuan te cundáhú ni rō ñayuu, nájñuhun máa Tátá rō cundáhú ni yá i.

*Ma cahán yō síquī cuēchi jnánhan yō*  
(Mt. 7.1-5)

<sup>37</sup> Ma cahán rō síquī cuēchi ñayuu ndese sáha i, návāha suni mā cahán Yaā Dios cuēchi síquī rō jeē casáha ró súcuan. Ma cahán xeén rō síquī i jeē tú váha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yá nuū rō. <sup>38</sup> Cuáha ró núu ñayuu, te suni súcuan cuáha Yaā Dios nuū rō. Chi váha ndasí cuáha ya nuū rō, nájñuhun jeē chícuáha váha ya, quisi ya, sáníhin ya, te nde scáa ya cuáha ya nuū rō. Chi cūhva jeē cájēhe ró núu ñayuu, suni cūhva un cuáha ya nuū rō. Achí yá.

<sup>39</sup> Te ni cahán yá ñin jñuhun yátá jíin i:

Tēe cástéén jñuhun tú ndaā, cácuu de nájñuhun tēe cuáá. Te ñin tēe cuáá, ¿á cuu stéén de ichi nuū inga tēe cuáá? ¿A tú ningava ndindúú de ini xehvā? <sup>40</sup> ñin tēe scuáha, tu cújēhnu de nuū maestro de. Te tēe scuáha ún, núu je ni cutūhva váha de, te jinū de coo de nájñuhun maestro de.

<sup>41</sup> Te cuēchi jnánhan ró cúu nájñuhun jeē íne ñin yāca lúli tinūú i. ¿Te naun cásáha ró cuenta jeē súcuan, te tu cásáha ró cuenta cuēchi máá ró jeē cúu nájñuhun jeē íne ñin nduhu tinūu máá ró? <sup>42</sup> ¿Te naun cácahán rō jíin jnánhan ró: Condetu, na táva rī yāca íne tinūu ró, te tu cánacani ni rō jeē íne ñin nduhu tinūu máá ró? Tēe stáhú-ni cácuu ró núu súcuan. Xihna gā tinūu máá ró tava rō nduhu, te yūcuán na te cuu condēhe váha ró jēé táva rō yāca tinūu jnánhan ró.

*Jíin jniñu cásáha ñayuu te nácuuni yō ndese ñayuu cácuu i*

(Mt. 7.17-20; 12.34-35)

<sup>43</sup> Tu íyó yujnu váha jeē jēhe ndehē néé, te ni tu íyó yujnu néé jēé jēhe ndehē váha. <sup>44</sup> Chi jíin ndehē jeē jēhe ñin ñin yujnu, te jíin yō núu yujnu váha cúu. Chi tu scóyo yó ndehē higo xiní íñu, ni tu scóyo yó ndehē uva xiní yucú zarza. <sup>45</sup> Te suni súcuan tēe váha, cáhán de jñuhun váha, chi váha ánuá de. Te tēe sáha néé cáhán de jñuhun néé, chi cánéé ánuá de. Chi modo ndese íyó ánuá ñayuu, máni jeē yúcuu cúu jeē cácahán i.

*Siquī uú vehe*  
(Mt. 7.24-27)

<sup>46</sup> ¿Najehē cácahán yíñuhún ró jíin rí: Jitohó ná, áchí ró, te tu cásquicu ró jniñu ndácu rí? <sup>47</sup> Táca ñayuu véji nuū rí te jíin sóho jñuhun cáhán rí te squícu, na stéén rí nuū rō ndese cúu i. <sup>48</sup> Cúu i nájñuhun ñin tēe jeē ní jeni de vehe de, te ni jete cúnú de nde ni níhin de toto, te ni jeni de síquī. Te nuū ní ndaa yūte, te ni chundahá vehe ún, te tu ní cánda cuíti sáha, chí síquī toto íin. <sup>49</sup> Te táca ñayuu jíin sóho jñuhun cáhán rí, te tu squícu i, cúu i nájñuhun ñin tēe ni jeni de vehe de nuū ñuhun, te tu yítuu jehé. Te nuū ní ndaa yūte, te ni chundahá vehe ún, te ni cotúú-ni, te ni naa íi-ni. Achí yá jíin i jíinánhan i.

*Jeē ní nasávāha ya mozo capitán*  
(Mt. 8.5-13)

**7**

<sup>1</sup> Te nuū ní jíinu ni cahán yá ni cajini nahín ñayuu ún, te cuahán yá ñuu Capernaum. <sup>2</sup> Te ñin tēe nación Roma jeē cúu capitán, íyó ñin mozo de jeē maní ndasí de jíin. Te mozo un cūhú i te je yajni cuu i. <sup>3</sup> Te ni jini capitán jñuhun Jesús. Te ni tají de jecu tēe jēhnu cándacu jniñu nuū ñayuu hebreo, cuangoo de nuū yá jeē cahán ndahú de jíin yá jeē na quíji ya sávāha ya mozo de. <sup>4</sup> Te ni jinūcoo tēe un núu Jesús, te ni cacahán ndahú ndasí de jíin yá:

Chindéé ñahán ní tēe cúu capitán, chí tēe váha cúu de. <sup>5</sup> Chí maní de jíin nación yó, te máa de ni ndacu jniñu ni cuvāha ñin vehe sinagoga cuu yó. Achí de.

<sup>6</sup> Yūcuán na te cuahán Jesús jíin de jíinánhan de. Te nuū ní cuyajni ya vehe capitán, te ni tají de jecu amigo de cuajnahán yá. Te ni cacahán de jíin yá:

Achí capitán jeē tu cúní de sájnéñu de níhin, chí tu cújēhnu de jeē quihín ní quíví ní vehe de. <sup>7</sup> Jeē yúcuu tu ní sájéhnu de máa de jeē quíji de nuū ní, áchí de. Te máa jēé cahán-ni ní, te na ndúvāha-ni mozo de, áchí de. <sup>8</sup> Chí máa de suni ndíso jniñu de ní casáha tēe cácujeñnu ga. Te cújēhnu de nuū táca soldado de, áchí de. Te núu cáhán de jíin ñin tēe jeē na quihín de, te cuahán de. Te núu cáhán de jíin inga tēe jeē na quíji de, te quíji de. Te núu ndácu de ñin jniñu nuū mozo de, te sáha i, áchí de. Achí táca tēe un jíin yá.

<sup>9</sup> Te jeē ní jini Jesús jñuhun yáha, te ni naa ni yá. Te ni ndíó cóto ya ní cahán yá jíin ñayuu cuehē cándiquín yatá yá:

Jendaá cahán rí jíin ró jeē ní nación yó Israel tu ní níhin rí ní ñin ñayuu candíje níhin súcuan, nájñuhun cándíje tēe ún, vésú tēe nación tu jíin jñuhun Yaā Dios cúu de. Achí yá.

<sup>10</sup> Te tēe ni tají capitán nuū yā, ni nanjūcoo de vehe, te ni cajito de jeē jé ni nduvāha mozo un.

*Jeē ni nastécu yā sēhe yū ñahan viuda*

<sup>11</sup> Yūcuán na te cuahān yā ñin ñuu nani Nain. Te tēe cáscuaha jíin yá, jíin ñayuu cuehē, suni cuango i jíin yá. <sup>12</sup> Te ná ni cuyajni ya yuñú ùn, te yūcuan ní quenda-coo ñayuu jeē quíchindūji i ñin tēe suchí jéē ni jíhí. Te máñúhún-ni i nuū naná i, te ñahan viuda cúu ña. Te cuehē ñayuu ñuu un véjicoo jíin ña. <sup>13</sup> Te ná ni jito máá Jítóho yō nuū ña, te ni cundáhú ni yā ña, te ni cahān yā jíin ña: Ma ndahyú ni, áchí yá.

<sup>14</sup> Yūcuán na te ni jinú yā nde nuū ndíyí ùn, te ni jñí ya yejnú, te ni cajecuiñí tēe cándiso ùn. Te ni cahān yā jíin sūchi ní jíhí:

Cáhán rí jíin ró, ndocuiñí, áchí yá.

<sup>15</sup> Yūcuán na te ni nucōo sūchi ní jíhí ùn, te ni quejéé i nácahān i. Te ni nacuāha ya i nuū naná i. <sup>16</sup> Te ndivii ñayuu ni cayúhú i jeē ní cajito i, te ni cacahān i jeē yóhyo vāha Yāá cúu Yāá Dios. Te cácahān i:

Mēhñu yó ni quee ñin tēe cújéhu nacani jñūhun Yāá Dios.

Te suni cácahān i:

Máá Yāá Dios ni quejéé yá chindéé ñáhán yá ñayuu yā. Achí i.

<sup>17</sup> Te ni jité núu jñūhun ya ní cáhnu región Judea jíin táca región yajni yūcuán.

*Jeē ní tají Juan uū tēe nuū yā  
(Mt. 11.2-19)*

<sup>18</sup> Te ine Juan vecāa, te tēe cáscuaha jíin de ni cacastūhun núu de jeē súcuan ní cuu táca jñiñu yāha. <sup>19</sup> Te ni cana Juan uū tēe ùn, te ni tají de cuango nuū Jesús, návāha cajñūhún de ya núu máá yá cúu ndije Cristo jeē ní cachí Yāá Dios jeē tají yá, chí núu nasuu yá cúu te condetu de inga. <sup>20</sup> Te ni jinūcoo tēe un núu yā, te ni cacahān de:

Juan tēe scuándute ní tají de sãña véjicoo ná cajñūhun ná nihín núu máá ní cúu Cristo jeē achí tutu jeē quíji, chí condetu yó inga tēe quíji. Achí de.

<sup>21</sup> Te máá hora un ní nasávāha ya cuehē ñayuu cácuñu, jíin ñayuu cándoho cuehyí xeēn, jíin ñayuu ñūhun tachí ini. Te suni cuehē ñayuu cuaa ní ndundijin tinúu i ní sáha ya. <sup>22</sup> Te ni cahān yā jíin de:

Cuango te castūhun ró nuū Juan táca jñiñu ní cajito ró jíin jñūhun ní cajini ró. Te cachí ró nuū de jeē ñayuu cuaa cánanune tinúu i, te ñayuu yacuá cánacaca i, te ñayuu ndóho cuehyí stehyú cánduvāha i, te ñayuu sohó cánanune sōho i, te ñayuu jíhí nátecu i sáha ri. Te suni nacani ri jñūhun nuū ñayuu ndahú jéē jnama Yāá Dios i. <sup>23</sup> Te yóhyo ndetú tēe jeē ma nacani yátá ní de jeē ruhú cúu Cristo. Súcuan cachí ró nuū Juan. Achí yá jíin de.

<sup>24</sup> Te ná cuanuhun ndíndúú tēe ùn, te ni quejéé Jesús cahán yā jñūhun Juan jíin ñayuu:

¿Na vé ni jécondēhe ró jíināhan ró ndé nuū ñūhun tēhé? ¿A ñin tēe jéni ñin jéni uū ní, nájnūhun ite jeē cánda sáha tachí? <sup>25</sup> Te núu tuú, ¿te na vé ni jécondēhe ró núu súcuan? ¿A ñin tēe cúni cújéhu jeē ñūhun sahma lúu? Tuú chí cájini ró jeē tēe cáñuhun sahma lúu te cánducú táca jéē cúsi ní, máni ini vehe rey cáyucú de. <sup>26</sup> ¿Te na vé ni jécondēhe ró núu súcuan? ¿A ñin tēe nacani jñūhun Yāá Dios? Cáhán rí jíin ró jeē suu ní jécondēhe ró. Te cújéhu ga Juan yáha vésú táca gá tēe ní canacani jñūhun Yāá Dios. <sup>27</sup> Chí jñūhun Juan cúu jeē ní cahān Yāá Dios jeē yosó núu tútu íi:

Tají rí tēe nacani jñūhun ri cosnúu de ichi núu Cristo,

návāha coo túhva ñayuu jeē jinú yā.

Achí Yāá Dios, achí tutu. <sup>28</sup> Te cáhán rí jíin ró jeē ini ñayívi yáha cújéhu ga Juan tēe scuándute vésú táca gá tēe jeē ní iyo ini ñayívi. Te vésú súcuan te táca tēe núu ga ini ñuu nuū ndácu Yāá Dios jñiñu, cújéhu ga de vésú Juan. Achí yá.

<sup>29</sup> Te táca ñayuu jíin táca tēe cástútu xūhun renta, ní cajini i jñūhun cáhán yā, te ní ca-jetáhú i jeē Yāá ndaa cúu Yāá Dios, chí je ní cajendute i nuū Juan. <sup>30</sup> Te tēe grupo fariseo jíin tēe cástéén tutu ley, ní casquéhichí de jñūhun jeē cúni Yāá Dios sáha ya jeē váha de, chí tu ní cájendute de nuū Juan. <sup>31</sup> Te ní cahān gá máá Jítóho yó:

Yáhá cachí rí ñin jñūhun yátá návāha na cúni ró ndese cúu ñayuu tiempo vijna. <sup>32</sup> Cúu i nájnūhun sūchi lúli cáhín nuū yáhu cácasíquí i. Te cácana ndee i xiní jñáhan i: Ní cativi rí scuili, te tu ní cájita jéhé ró. Te ní cajita ri yaa jeē cuihyá jíta, te tu ní cándahyú ró, achí i. Te nájnūhun cándāa sūchi lúli un jéé tu ní nújñahan ní i ní ñin, suni súcuan cándāa ró. <sup>33</sup> Chí ní quíji Juan tēe scuándute, te cuehē jíin ní iyo ndite ní de, tu ní yéji de staā ní tu ní jíhí de vino. Te tu ní cánujñahan ní ró, chí ní cacahān ró jeē ñūhun tachí ini de. <sup>34</sup> Yūcuán na te ní quee máá rí, Yāá ní nduu tēe, te yéji rí jíhí ri, te tu cánujñahan ní ró, te chí sóo jñūhun ró cacahān ró jeē máni máá jéé yéji rí jíhí ri vino. Te quíjñahan ri jíin tēe cástútu xūhun renta jíin táca gá tēe cásaá cuéchi, áchí ró. <sup>35</sup> Te núu cúndichí ñin tēe jíin jñūhun Yāá Dios, te jíin jñiñu sáha de te cájini táca gá tēe ndichí jeē ndichí de. Achí yá.

*Jeē ine Jesús vehe Simón tēe fariseo*

<sup>36</sup> Te ñin tēe fariseo ní cana de Jesús jeē cáji yá staá jíin de. Te ní jinú yá vehe de, te ní cucōo ya mesa jeē cáji yá staā. <sup>37</sup> Yūcuán na te ñin ñahan sáha cuéchi, ndéé ña ñuu yūcuan, te ní jini ña jeē ní jinú Jesús vehe tēe fariseo un, yéji yá staā. Te ní quee ña jíin ñin frasco

yuū luu jeē ñuhun chitú aceite perfume.  
<sup>38</sup> Te ín yítí ña nuū jehé yā, te ndáhyú ña. Te ni quejéé ña stáji ña jehé yā jíin ndute tñnúú ña, te ni nasíchi ña jíin íxi xíní ña. Te ni techúhú ña jehé yā, te ni chuhun íxi perfume un. <sup>39</sup> Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jñūhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chí ñahan sáha cuēchi cúu ña, jéni ni de. <sup>40</sup> Yūcuán na te ni cahān Jesús jíin de:

Simón, cúní rí cahān rí jíin ró ñin jñūhun.

Te ni cahān maá de:

Cahān ní, Maestro.

<sup>41</sup> Te ni cahān Jesús:

Íin tēe jéhe núu xūhún, ni íyo uū tēe táu nuū de. Íin de ni cotaū uhūn ciento denario, te inga de ni cotaū uū xico uxí denario. <sup>42</sup> Te tú na vé cánevāha tēe un jéé náchunaa de. Te tēe jéhe núu xūhún ní íne cáhnu ní de nuū ndíndúú tēe ún. Núu súcuan te cachi rō: Jeē ndíndúú tēe ún, ¿ndé ñin de coo maní gā jíin de? Achí yá.

<sup>43</sup> Te ni cahān Simón:

Jéni ni na jéé tēe ni cotaū cuehē gā, achí de.

Te ni cahān yā jíin de:

Ndaā cahān rō, achí yá.

<sup>44</sup> Te jito ya nuū ñahan ún, te ni cahān gā yā jíin Simón:

¿A jito ró na vé sáha ñahan yáha? Jeē ní quee rí vehe ró, te tu ní jéhe ró ndute jeē ndúndoo jehé rí nájñūhun íyo costumbre. Te ñahan yáha ní stáji ña jehé rí jíin ndute tñnúú ña, te ní nasíchi ña jíin íxi xíní ña. <sup>45</sup> Te tu ní téchūhu ró ruhū nájñūhun íyo costumbre. Te ñahan yáha, nde jeē ní quívi rí vehe ró, tu jécuiñí ña jeē téchūhú ña jehé rí. <sup>46</sup> Te tu ní chūhún ró aceite xíní rí nájñūhun íyo costumbre. Te ñahan yáha ní chuhun ña aceite perfume jehé rí. <sup>47</sup> Núu súcuan te cahān rí jíin ró jeē ní stéén ña jeē yóhoo maní ña jíin rí síquí jeē íne cáhnu ní rí nuū táca cuéchi ña, vésú cuehē cúu. Te núu cone cáhnu ní rí nuū ñin ñayuu íyo jecu-ní cuéchi, te jecu-ní stéén i jeē maní i jíin rí, achí yá.

<sup>48</sup> Te ni cahān yā jíin ña:

Je íne cáhnu ní rí nuū táca cuéchi ró, achí yá.

<sup>49</sup> Yūcuán na te ñayuu cáyeji staā jíin yá, ni quejéé i cácahān maá i:

¿Nde ñin ga cúu tēe yáha jéé cahān jeē íne cáhnu ní nuū cuéchi? Achí i.

<sup>50</sup> Te Jesús ní cahān gā yā jíin ñahan ún:

Ní candíje ró rúhú, te jeē yúcuán ní jnama rí rohó. Cuahán te na ndúsíi ní rō. Achí yá.

*Jñūhun ñahan ní cajejñíñu nuū yā*

## 8

<sup>1</sup> Yūcuán na te ni cuu jecu quívi, te ni jica cuu Jesús táca ñuu náhnu jíin ñuu lulí. Te

nácani ya jñūhun vāha te cástūhun yá ndese ndácu Yaā Dios jñíñu. Te ndihúxí uū tēe cácuu apóstol, cájica de jíin yá. <sup>2</sup> Te suni íyó jecu ñahan cájica jíin yá, jeē ní quenehen ya tachí ini sava ña, te ni nasávāha ya sava ña jeē cándoo cuehyí. Te ñin ña cúu María ñuu Magdala, te ini ñahan un ní quenehen ya uxā tachí. <sup>3</sup> Te inga ña cúu Juana, ñasíhi Chuza, tēe ndíso jñíñu ini vehe Herodes. Te inga ña cúu Susana, jíin cuehē gā ñahan jeē cáchindéé ñahán ña, jéhe ña táca jéé jíni ñūhún yá jíin de jíin ñahan de.

*Jñūhun yátá síquí tēe jéte trigo*

(Mt. 13.1-9; Mr. 4.1-9)

<sup>4</sup> Te cuehē ñayuu táca ñuu yūcuán ní jinūcoo i nuū Jesús. Te ni cacutútu cuehē ndasí ñáyuu, te ni cahān yā ñin jñūhun yátá jíin i:

<sup>5</sup> Íin tēe cate trigo, ni quenda de jeē cate de. Te ná ni quejéé de jéte de, te jecu trigo ní jité yuhíchi. Te ni cajejñí ñayuu síquí, te ni cayejí saa. <sup>6</sup> Te jecu gā ní jité nuū ñūhún yuū. Te ni cane, te ni ichí-ní, chí tú cuehē cajín. <sup>7</sup> Te jecu gā ní jité nuū náne íñu. Te ínuú-ní ní canecoo íñu jíin, te ní jesi nuū. <sup>8</sup> Te jecu ní jité nuū ñūhún vāha. Te nuū ní jehnu, te ní jéhe cuehē nuní, chí jeē ñin ñin ní jéhe nde ciento. Achí yá.

Yūcuán na te ni cahān jee ya:

Tāca rōhó jéé jíni sōho, na chúsóhó ró, achí yá.

*Najehé cahān yā máni jñūhun yátá*

(Mt. 13.10-17; Mr. 10-12)

<sup>9</sup> Te tēe cáscuáha jíin yá ní cacajñūhún de ya na vé cuní cahān jñūhun yátá yáha. <sup>10</sup> Te ni cahān yā:

Róhó jíin ñahan ró, chí sáha Yaā Dios jeē cájecūhun ní rō jñūhun ní yisáhi yáha, ndese quívicoo ñayuu ndaha Yaā Dios jeē ndacu ya jñíñu nuū i. Te máni jíin jñūhun yátá cáhán rí jíin sava ga i, návāha vésú cájito i, te quéndoo i nájñūhun jeē tú na vé ní cájito i. Te vésú cájini sōho i, te ma jécūhun ní i.

*Jeē ní castūhun cájí yá jñūhun yátá tēe jéte trigo*

(Mt. 13.18-23; Mr. 4.13-20)

<sup>11</sup> Jñūhun yátá yáha cúní cahān: Trigo un cúu jñūhun Yaā Dios. <sup>12</sup> Te trigo jeē ní jité yuhíchi cúu nájñūhun ñayuu cájini sōho jñūhun, te quíji-ní jexeén te quénde-ní jñūhun ini anuá i, návāha ma candíje i te ma jnáma rí i. <sup>13</sup> Te trigo jeē ní jité nuū ñūhún yuū cúu nájñūhun ñayuu cájini jñūhun, te cájetáhú i te cácusíi ní i jíin. Te tu cúcutú jñūhun ún ini anuá i. Te jecu-ní quívi cácañíje i, te núu ní quejéé jñúndóho, te cájica yátá i. <sup>14</sup> Te trigo jeē ní jité nuū náne íñu cúu nájñūhun ñayuu cájini jñūhun, te cuangoo i te cácuñéñu i jíin jñíñu i jíin jéé cuní i cucúcá i te coo síi ní i. Te tu íje i jíin jñūhun ya. <sup>15</sup> Te trigo jeē ní jité nuū ñūhún

váha cúu nájñuhun ñayuu cájini nahín jñuhun ya, te cájni váha i, chí iyó váha iyó ndáá anuá i. Te cáhije i jíin jñuhun ya, chí cáchandje váha i.

*Jñuhun yátá siquí lámpara*  
(Mr. 4.21-25)

<sup>16</sup> Núu nástñin ñayuu ñin lámpara, te tu jési i ni ñin siquí, ni tu jéni i chíji jito. Chí sa suhva jéni i nuú sucún, náváha cundijin nuú ñáyuu quívicoo vehe. <sup>17</sup> Te suni súcuan tu iyó ni ñin jñuhun sáhi jéé ma cúni ñayuu, chí ndihi táca jñuhun cácahán i nane ndijin te cuni ñayuu.

<sup>18</sup> Núu súcuan te na cúni sóho váha ró, chí ñayuu je jécúhun ni, stéén ga ya nuú i. Te ñayuu tu cándje, máá jecu jeé jéni ni i jeé jiní i, sa suhva naa. Achí ya.

*Naná yá jíin ñani yá*  
(Mt. 12.46-50; Mr. 3.31-35)

<sup>19</sup> Yúcuán na te ni quee naná yá jíin táca ñani yá nuú íne ya. Te tu ní cúu quívicoo ña nuú yá siquí jeé chítú ñayuu. <sup>20</sup> Te ñin ñayuu ni castúhun núu yá:

Naná ní jíin táca ñani ni cáhñin nuú quéhe, te cácuni cahán jíin ní, áchí i.

<sup>21</sup> Te ni cahán maá yá:

Suni naná rí jíin ñani rí cácuu ñayuu cájini sóho jñuhun Yaá Dios te cáscuácu i, áchí yá jíin i.

*Jeé ní jecuiñi tachí ñihin jíin mar ni sáha ya*  
(Mt. 8.23-27; Mr. 4.35-41)

<sup>22</sup> Te ñin quívi ní quívi ya ñin barco jíin téé cáscuáha jíin yá, te ni cahán yá jíin de:

Na yáha yó quíhin yó inga lado mar.

Te ni cáscáca de barco cuangoo de. <sup>23</sup> Te níni cáscáca de barco, te ni quíxi yá. Te ni jequíhi ñin tachí ñihin nuú mar, te je yajni chítú ndute ini barco, te ndúcú quéé barco.

<sup>24</sup> Te ni castóna de ya, te ni cacahán de:

Maestro, Maestro, vijná te queé yó chíji ndute te naa yó, achí de.

Te ni ndociñi-ñi ya, te ni cahán yá nuú tachí ñihin jíin núu mar. Te ni cajecuiñi-ñi, te ni cuu nayúú í-ni. <sup>25</sup> Te ni cahán yá jíin téé cáscuáha jíin yá:

¿Naun tu cáchandje ró?

Te máá de yóhoyo ní cayúhu de, te cánaa ni de, te cácahán de jíin jñahan de:

¿Ndé ñin ga cúu téé yáha jéé nde nuú tachí ñihin jíin núu ndúte ndácu de jñiñu te cájetáhu jéé cahán de? Achí de.

*Téé Gadara jeé ndóho tachí*  
(Mt. 8.28-34; Mr. 5.1-20)

<sup>26</sup> Yúcuán na te ni cane ya jíin de región Galilea, te cuahán yá región Gadara jeé íne inga lado mar Galilea. <sup>27</sup> Te nuú ní nanuu ya nuú ñuhun íchi, te ñin téé ñuu un ní quee de nuú yá. Te je ni cuu cuehē cuiyá ñuhun cuehē tachí ini de. Te tu ñuhun cuiti de sahna, ni tu ndéé de vehe, chí sa suhva nuú cáyindúji ndiyi ndeé de. <sup>28</sup> Te ná ni jito de

nuú Jesús, te ni jecuiñi yití de nuú yá, te ni cana cóhó de:

¿Naun véji ní núu ná, Jesús Sēhe Yaá cujéhu téyí? Cáhán ndahú ná jíin ní jeé ma stóho ní sáña, áchí de.

<sup>29</sup> Súcuan ni cahán de, chí je ni ndacu ya jñiñu nuú tachí un jéé na quéndacoo ini de. Te ni cuu cuehē jínu sáha xeñ tachí jíin de. Te cájhni ñayuu ndaha de jehé de jíin cadena, náváha tú na vé sáha de. Te ndihi-ni jéhnde de, te jínu de jéhén de nde nuú ñuhun téhé sáha tachí ún. <sup>30</sup> Te Jesús ni cajñuhun yá de:

¿Na vé nani ró?

Te ni cahán de:

Legión nani ná.

Súcuan ni cahán de jeé nani de, chí ñuhun cuehē tachí ini de. <sup>31</sup> Te ni cacahán ndahú tachí un jíin yá jeé ma tají yá quíhin ini túhñchi cúnu. <sup>32</sup> Te yucu yúcuan cáhñin cuehē quíni cájitu ti. Te tachí jeé cáñuhun ini téé un ní cacahán ndahú jíin yá jeé na cuáha ya jñuhun quívicoo ini quíni ún. Te ni jéhe ya jñuhun. <sup>33</sup> Te ni quéndacoo tachí ún ini téé ún, te ni quívicoo ini quíni. Te quíni un ní cajinu ti ní ñingoo ti ñin yucáva, ní quívicoo ti nuú mar, te ni ndaquíhi ti ndute, ní cajihí ti.

<sup>34</sup> Te téé cándito ti ní cajito de jeé súcuan ni cuu, te ni cayúhu de. Te ni cajinu de cuacastúhñ de nuú ñayuu ñuu un jíin ñayuu táca rancho. <sup>35</sup> Te cuangoo ñayuu un cuácondéhe i na vé ni cuu. Te ni jinúcoo i nuú íne Jesús. Te ní cajito i nuú téé ní quéndacoo tachí ini, néne de nuú jehé Jesús, te ñuhun de sahna, te je ni nducájí xini de. Te ní cayúhu ñayuu ún. <sup>36</sup> Te téé ní cajito ni canacani de jñuhun nuú ñayuu, ndese ní nduváha téé ní ñuhun tachí ini.

<sup>37</sup> Yúcuán na te táca ñayuu ní región Gadara, ni caquejéé i cácahán ndahú i jíin yá jeé na cújiyo ya quíhin yá, chí yóhoyo cáyúhu i. Te ni ndívi ya ini barco jeé quínuhun yá. <sup>38</sup> Te téé jeé ní quéndacoo tachí ini, ní cahán ndahú de jíin yá jeé na cuáha ya jñuhun quíhin de jíin yá. Te Jesús ní cahán yá jeé na quéndoo de, te áchí yá:

<sup>39</sup> Cuánuhun vehe ró, te nacani ró jñuhun ndese yóhoyo jéhu jñiñu ní sáha Yaá Dios jíin ró, achí yá jíin de.

Te cuahán de, te ni nacani de jñuhun ní ñuu ún, ndese yóhoyo jéhu jñiñu ní sáha Jesús jíin de.

*Jñuhun sēhe síhi Jairo jíin ñahan ní quehé yusáhmayá*

(Mt. 9.18-26; Mr. 5.21-43)

<sup>40</sup> Te nuú ní najinú Jesús inga lado mar, te ñayuu un ní cacuiñi ní i jeé ní najinú yá, chí ndihi i cándetu i ya. <sup>41</sup> Te ni quee ñin téé cujéhu ini vehe íi sinagoga, nani de Jairo. Te ní jecuiñi yití de nuú jehé yá, te ni cahán ndahú de jíin yá jeé na quíhin yá jíin de vehe

de. <sup>42</sup> Chi iyó ñin sêhe síhí de jeê mañúhún-ni i nuú de, te iyó i nájñuhun uxí uú cuiyá. Te sũchí un je yajni cuu i. Te cuahán yá jiín de. Te cuehê ñayuu cándiquín i ya, te ni chitú ñihin i xiin ya cuangoo i.

<sup>43</sup> Te mēhñu ñayuu un cuahán ñin ñahan cùhú jeê ní cuu uxí uú cuiyá ndóho ña cuehyí ñiñí. Te ni jexin ña táca jéé névaha ña jiín téé tájñá, te tu ní ndúvaha ña sáha ni ñin de. <sup>44</sup> Te ni quee ña ichi yátá yá, te ni quehé ña yusáhma ya. Te ni jecuiñí-ni ñiñí ña.

<sup>45</sup> Yücuán na te ni cahán Jesús:

¿Ndé ñin ni quehé sahma ri? achí yá.

Te ndivii i ni cacahán jeê tu ní quehé i. Te Pedro jiín téé cáhñin jiín de, ni cacahán de:

Maestro, jito ní jéé ñayuu cuehê yáha ní chitú ñihin i xiin ní, te cáquiñi i ñihín, te cájnñuhun ní ndé ñin ni quehé sahma ní.

<sup>46</sup> Te ni cahán Jesús:

Tuú chi ñin ñayuu ni quehé sahma ri, chi ni jini ri jeê jiín fuerza ri ni nduváha ñin ñayuu, achí yá.

<sup>47</sup> Te ni jini ñahan un jéé tu ní cúu coo yuhu jeê ní sáha ña. Te quísi i ña ni quee ña, te ni jecuiñí yití ña nuú jehé yá. Te jito jínúú táca ñayuu, te ni cachi caji ña najehé ni quehé ña yusáhma ya, jiín jéé ní nduváha-ni ña. <sup>48</sup> Te ni cahán yá jiín ña:

Séhē, ni candíje ró jéé cuu nasávaha ri rohó, te jeé yúcuan ní nduváha ró. Cuáhán te na ndúsñi ní rō, achí yá.

<sup>49</sup> Te níni cáhán gá yá súcuan, te ni quee ñin téé vēji vehe Jairo, téé cújéhu ini sinagoga, te ni cachi nuú de:

Je ni jihí sêhe síhí ní. Te ma sájnēñu ga ní Maestro, achí de.

<sup>50</sup> Te ni jini Jesús jñuhun yáha, te ni cahán yá jiín Jairo:

Ma yūhu ró, chi candíje-ni ró, te nastécu ri sêhe ró, achí yá.

<sup>51</sup> Te ni jinuú yá vehe, te tu ní jéhe ya jñuhun quívi ñayuu jiín yá, chi máa-ni Pedro jiín Juan jiín Jacobo jiín tátá naná sũchi síhí un. <sup>52</sup> Te cácuquíhyá ni ndihí ñayuu cáyúcú ini vehe, te cándahyū i jehé sũchí un. Te ni cahán yá:

Ma ndahyū ró jijnáhan ró. Tu ní jihí i, chi quixí-ni i, achí yá.

<sup>53</sup> Te ni cajecú catá i jeê ní cahán yá, chi cájini i jeê ní jihí sũchi síhí un. <sup>54</sup> Yücuán na te ni jñi ya ndaha i, te ni cahán jee ya jiín i:

Sihí, ndocuiñí, achí yá.

<sup>55</sup> Te ni natecu i, te ni ndocuiñí-ni i. Te ni ndacu ya jñiñu jeê na cuáha ña jeê cáji i. <sup>56</sup> Te tátá i naná i yóhyo ni canaa ni de cájito de. Te ni ndacu ñihin ya jñiñu nuú de jeê ma cáchi de nuú ni ñin jeê súcuan ni cuu.

*Jeé ní tají yá ndihúxí uú de cuanacani de jñuhun*  
(Mt. 10.5-15; Mr. 6.7-13)

## 9

<sup>1</sup> Te ni nastútú yá ndihúxí uú téé cáscuáha jiín yá, te ni sáha ya jeê cóndiso jñiñu de te coo poder de jeê quénehen de tachí ini ñayuu, jiín jéé nasávaha de ñayuu cácuñu. <sup>2</sup> Te ni tají yá de quingoo de jeê nácani de jñuhun ndese ndácu Yaá Dios jñiñu, jiín jéé nasávaha de ñayuu cácuñu. <sup>3</sup> Te ni cahán yá jiín de:

Ma cóndiso ró jéé cuajñiñu ró ichi, ni vara, ni ñunu, ni staá, ni xühún. Te quihñ rō jiín ñin-ni camisa, te ma cóndiso ró inga. <sup>4</sup> Te na-ni vehe núu ni quívicoo ró, te yücuán coyūcu ró nde quenda tucu ró quihñ rō inga ñuu. <sup>5</sup> Te núu ñin ñuu tu cájetáhú i rohó, na quéndacoo ró yúcuan, te scóyo ró tícachā jehé ró, te súcuan stéén ró jeê iyó cuéchi i jeê tu ní cájetáhú i. Achí yá.

<sup>6</sup> Te ni quendacoo de cuahán de, ni cajica nuu de táca ñuu, ni canacani de jñuhun jnáma Yaá Dios ñayuu. Te táca lado ni canasávaha de ñayuu cácuñu.

*Jeé ni jihí Juan téé scuándute*  
(Mt. 14.1-12; Mr. 6.14-29)

<sup>7</sup> Te Herodes, téé cúu gobernador, ni jini jñuhun de táca jñiñu sáha Jesús. Te ni cunéé ni de, chi cájeni ni sava ñayuu cácahán i jeê Juan ni natecu de. <sup>8</sup> Te sava ga i cácahán jeê ní nane Elías, téé ni nacani jñuhun Yaá Dios nde jenahán. Te sava ga i cácahán jeê inga téé ni nacani jñuhun ya nde jenahán, ni natecu de. <sup>9</sup> Te ni cahán Herodes:

Juan chi ni ndacu ri jñiñu ni tahndé xiní. Núu súcuan ¿te ndé téé cúu téé yáha jeê jini jñuhun ri jeê sáha de jñiñu jéhu? Achí de.

Te ni nducú Herodes modo coto de nuú Jesús.

*Jeé ni scáji yá uhñ mil téé*  
(Mt. 14.13-21; Mr. 6.30-44; Jn. 6.1-14)

<sup>10</sup> Te ni ndecoo téé cácuu apóstol jeê ní tají yá ni canacani jñuhun. Te ni cacachi de nuú yá táca jñiñu ni casáha de. Te ni jeca ya de cuahán sñin ya jiín de ñin lugar nuú tú ñayuu, yajni ñuu Betsaida. <sup>11</sup> Te ni cajini ñayuu, te suni cuangoo i. Te ni jetáhú yá i, te ni nacani ya jñuhun ndese ndácu Yaá Dios jñiñu, te ni nasávaha ya ñayuu cácuñu.

<sup>12</sup> Te nuú cuáhini, te ni quecoo ndihúxí uú téé cáscuáha jiín yá, te ni cacahán de jiín yá:

Tají ní ñayuu cuehē yáha na quingoo i táca ñuu jiín táca rancho yajni yáhá, te nducú i nuú ndóo i te cuaan i jeê cáji i, chi tú na vé iyó yáha, achí de.

<sup>13</sup> Te ni cahán yá jiín de:

Cuáha máa ró jeê cáji i, achí yá.

Te ni cacahán de:

Tú na vé cánevaha ná, chi uhñ-ni staá jiín úu-ni chácá. Te vésú núu quicuaan ná staá caji ndihí ñayuu cuehē yáha, te ni ma cúu, achí de.

<sup>14</sup> Chi iyó nájñuhun uhñ mil téé. Te ni cahán yá jiín téé cáscuáha ún:

Cahān jīn ñāyuu na cúcōo sīn cincuenta cincuenta i, áchí yá.

<sup>15</sup> Te súcuan ní casáha de, te ní cacucōo ndihí ñayuu. <sup>16</sup> Te ní quihín ya ndihúhún stāā jīn úu cháca un, te ní ndacoto ya ichi ándiví, te ní nacuatáhú yá. Te ní tahu cuéché yá stāā ún, te ní jēhe ya nuū tēe cáscuáha jīn yá, te ní casaja de nuū ñāyuu cuehē. <sup>17</sup> Te ndivii i ní cayejí, te ní candutú chíji i. Te ní canastútú de pedazo stāā jeē ní quendōo, te ní chitú úxi uū jīca.

*Jeē ní cahān Pedro jeē Jesús cúu Cristo*  
(Mt. 16.13-19; Mr. 8.27-29)

<sup>18</sup> Te ĩn quiví ní cusūn Jesús, jícan tahu yá, te máá-ní tēe cáscuáha un cáhiin de jīn yá. Te ní cajnúhun yá de:

Ruhū, ¿ndé ĩn cúu ri cácahān ñayuu? achí yá.

<sup>19</sup> Te ní cacahān de:

Sava i cácahān jeē cúu ní Juan tēe ní scuándute. Te sava ga i cácahān jeē cúu ní Elías, tēe ní nacani jnúhun Yaā Dios nde jenahán. Te sava ga i cácahān jeē inga tēe ní nacani jnúhun ya ní natecu de.

<sup>20</sup> Yūcuán na te ní cajnúhun yá de:

Te máá ró, ¿ndé ĩn cúu ri cácahān rō?

Te ní cahān Pedro:

Máá ní cúu Cristo, Yaā ní tají Yaā Dios, achí de.

*Jeē ní castúhún Jesús jeē cúu yá*  
(Mt. 16.20-28; Mr. 8.30-9.1)

<sup>21</sup> Yūcuán na te ní ndacu nihin ya jniñu nuū de jeē ma cáchi de jnúhun yáha núu ní ĩn ñayuu. <sup>22</sup> Te ní cahān ya:

Máá rí, Yaā ní nduu tēe, cánuú ndoho xeēn rí. Te táca tēe jéhu jīn sūtú cácujeñu jīn tēe cástéén tutu ley, squéhichí de ruhū. Te cahni de ruhū, te nuū uní quiví te natecu rí, achí yá.

<sup>23</sup> Yūcuán na te ní cahān yá jīn ndihí de:

Na-ní ñayuu núu cúní i condiquín i ruhū, na cási i jeē cúní maá i, te na cóndiquín i ruhū táca quiví, te cuáha i jnúhun ndoho i jnúndóho jeē siquí rí, vésú na cúu i. <sup>24</sup> Chi núu ndé ñāyuu cuní i cácu i nuū jnúndóho quiji nuū i jeē siquí ruhū, núu súcuan te jnahnū ndetú i ní cáni. Te núu ndé ñāyuu, vésú na cúu i jeē siquí ruhū, te cotecu i ní cáni.

<sup>25</sup> ¿Chi ndé cuajniñu vésú na cūndeyí ñayuu nihín i ní ñāyiví, te núu squiví i máá i nuū jnahnū ndetú i ní cáni? <sup>26</sup> Chi núu na-ní ñayuu cúcanu i jeē siquí ruhū, Yaā ní nduu tēe, jīn síquí jnúhun cáhán rí, suni súcuan cucanu rí jeē siquí máá i, quiví ndíji rí. Te quiví ún chi yōhoyo luu cujéñu rí, nájnūhun cújéñu Tátá rí, te suni cácujeñu ndajéhé ndoo ya sáha ya. <sup>27</sup> Te jendaá cahán rí jīn ró jeē sava tēe cáhiin yáhá, ma cúu de chí nde cuní de jeē ndácu Yaā Dios jniñu jīn poder yá. Achí yá.

*Jeē tucu ní nduu ya*  
(Mt. 17.1-8; Mr. 9.2-8)

<sup>28</sup> Yūcuán na te nájnūhun nuū uná quiví jeē ní cáhān yá jnúhun yáha, te ní caa ya ĩn yucu, cuacacān tahu yá. Te Pedro jīn Jacobo jīn Juan cuango de jīn yá. <sup>29</sup> Te níni jícan tahu yá, te tucu ní nduu nuū yá, te sahma ya ní nducujín quiyí, te ndíndé. <sup>30</sup> Yūcuán na te ní canecoo uū tēe, cándajnūhún de jīn yá. Te cúu de Moisés jīn Elías, tēe ní cahíyo jenahán. <sup>31</sup> Te luu ndíndé de cáhiin de, te ní cacahān de jīn yá siquí jeē ní cuyajni cuu yá ñuu Jerusalén. <sup>32</sup> Te Pedro jīn tēe cáyūcu jīn de, yōhoyo cájií de máhná, te vésú súcuan te tu ní cáquixí de. Te ní cajito de jeē lúu ndíndé yá jīn ndíndúú tēe cáhiin jīn yá. <sup>33</sup> Te nuū ní cacujiyi tēe un núu yá, te ní cahān Pedro jīn yá:

Maestro, nacā jeē váha jeē cáhiin ná yáha. Te na sáha ná uní vehe ramada, ĩn cuu máá ní, inga cuu Moisés, te inga cuu Elías, achí de.

Te tu sáha de cuenta na vé cúu jeē cahán de. <sup>34</sup> Te níni cáhán de súcuan, te ní quee vicō nūhun ní jesí nuū de jíjnáhan de. Te ní cayūhú de jeē cáhiin de chíji vicō ún. <sup>35</sup> Te nuū vicō uní ní cahān ĩn jnúhun:

Yáha cúu Sēhe rí jeē maní ndasí rí jīn. Te na cúni nahín ró jnúhun cáhán yá, achí.

<sup>36</sup> Te nuū ní jīnu ní cahān jnúhun ún, te máá ĩn na Jesús ĩn ya nuū de. Te máá de tu ní cácahān cuiti de, te táca quiví ún tu ní cácachi de nuū ní ĩn jeē súcuan ní cajito de.

*Jeē ní nasávaha ya ĩn sūchi ñúhun tachí ĩni*  
(Mt. 17.14-21; Mr. 9.14-29)

<sup>37</sup> Te inga quiví un ní nanuu ya yucu jīn de. Te cuehē ñayuu ní jejnahan i ya. <sup>38</sup> Te méñu ñayuu cuehē un ní cana jee ĩn tēe:

Maestro, jícan tahu na núu ní jéē condēhe ní sēhe yí ná, chí máñúhún i nuū ná. <sup>39</sup> Te máni jeē sáha xeēn tachí jīn i, te cána cóhó i sáha, te jéni yíhí i, te jéé tiñu yahu i. Te yōhoyo stóho i, te yōhoyo uhú siaá i. <sup>40</sup> Te ní cahān ndahú ná jīn tēe cáscuáha jīn ní jeē na quénehen te tachí ún, te tu ní cúu sáha de, achí de.

<sup>41</sup> Te ní cahān yá jīn de jíjnáhan de:

Ñayuu yōhoyo ñihni ní cácuu ró, chí tu cácandije ró jéē cuu nduváha i. ¿Nasaa ga quiví condee rí jīn ró jeē cuándeyí ní rí jīn ró? Cuáquihin sēhe ró na quíji i, achí yá.

<sup>42</sup> Te níni véji i nuū yá, te ní cotúú i ní sáha tachí, te ní jehni yíhí i. Te Jesús ní cahān xeēn yá nuū tachí un, te ní nasávaha ya sūchí un, te ní nacuáha ya i nuū tatá i. <sup>43</sup> Te ndivii ñayuu nahán ní canaa ní i cájito i jeē yóhoyo jéhu jniñu sáha Yaā Dios.

*Jeē ní cahān tucu ya jeē cúu yá*  
(Mt. 17.22-23; Mr. 9.30-32)

Te níni cánaa ní i cájito i táca jniñu ní sáha Jesús, te ní cahān yá jīn tēe cáscuáha jīn yá:

<sup>44</sup> Chuhun vāha ni rō jnūhun cāhān rī yāhá, te ma nāa ni rō, chi ruhū. Yaa ní nduu tēe, nastúu i ruhū quīvi ri ndaha tāca tée xeēn, achí yá.

<sup>45</sup> Te tu ní cájecūhun ni de jnūhun cāhān yā, chi tu ní cúu cuiiti jecūhun ni de. Te ni cayūhú de cajnūhún de ya siquī jnūhun ni cahān yā.

*Ndé ñáyyu cúu jeē cūjéhu ga  
(Mt. 18.1-5; Mr. 9.33-37)*

<sup>46</sup> Yūcuán na te tēe cáscuáha jíin yá ni caquejéé de cácahān de siquī núu ndé in de cūjéhu ga. <sup>47</sup> Te Jesús ni jíin yā jeē súcuan cájeni ni de. Te ni jnū ya ndaha in sūchi lúli, te ni jeni ya i xiin ya. <sup>48</sup> Te ni cahān yā jíin de:

Na-ni ñayuu núu jeē siquī ruhū jetáhú i sūchi lúli yáha, te ruhū jetáhú i. Te ñayuu jetáhú ruhū, suni jetáhú i Yaa ní taji ruhū vēji ri. Te ñayuu núu ga mēhū rō, máá i cūjéhu ga, achí yá.

*Ñayuu tu cāhān siquī yā, in i jíin yá  
(Mr. 9.38-40)*

<sup>49</sup> Yūcuán na te ni cahān Juan: Maestro, ni cajito ná in tēe jeē jíin síhví ní quēnehen de tachí ini ñayuu. Te ni cajesi na jēé sáha de, chi tu jíca de jíin yó, achí de.

<sup>50</sup> Te ni cahān Jesús jíin de: Ma cási rō jeē sáha de, chi tēe tu cāhān siquī yō, in de jíin yó, achí yá.

*Jeē ni cāhān yā nuū Jacobo jíin Juan*

<sup>51</sup> Te ni cuyajni quīvi jeē quīnūhun yā andiví, te ni tee téyí ni yā jeē quihín yā ñuu Jerusalén. <sup>52</sup> Te ni taji yá sava tēe yósnūu de jíin jnūhun jeē jinú yá. Te cuango de in ñuu Samaria návaha nducú de nuū ndóo ya. <sup>53</sup> Te ñayuu Samaria un tu ní cájēhe i vehe ndóo ya, chi ni cajini i jeē ndé Jerusalén quihín yā. <sup>54</sup> Te Jacobo jíin Juan, tēe cáscuáha jíin yá, ni cajini de jeē súcuan cúu, te ni cacahān de jíin yá:

¿A cúní ni jēé ndácu yó jniñu quiji ñuhūn nde andiví, nájñūhun ní sáha Elías, návaha naa ñayuu yáha? Achí de.

<sup>55</sup> Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnūhun cácahān rō. <sup>56</sup> Chi ruhū, Yaa ní nduu tēe, tú vēji ri jeē snāa rí ñayuu, chí sa suhva jeē jnáma rí ñayuu, achí yá.

Yūcuán na te cuahān yā jíin de inga ñuu.

*Siquī ñáyyu jeē cáculi i condiquín i ya  
(Mt. 8.19-22)*

<sup>57</sup> Te níni jíca ya ichi jíin de, te ni cahān in tēe jíin yá:

Condiquín na níhín quihín yō ndé-ni cúu-ni nuū quihín ní, achí de.

<sup>58</sup> Te ni cahān Jesús jíin de: Tāca núcuui, iyó yáú cava cáñuhun tí. Te suni saa, iyó táca tí. Te ruhū, Yaa ní nduu tēe, tú nuū cusú rí, achí yá.

<sup>59</sup> Te ni cahān yā jíin inga de: Condiquín ruhū na quihín yō.

Te máá tēe un ní cahān de:

Condetu ní ndé na quíchindūji ná tátá na xihna gā. Yūcuán na te condiquín na níhín, achí de.

<sup>60</sup> Te ni cahān Jesús jíin de:

Stóo tāca ndíyí na chindūji jnāhan ndíyí, chí ndíyí cácuu ñayuu tu cácan dije. Te róhó, cuahān te nacani rō jnūhun ndese ndácu Yaa Dios jniñu, achí yá.

<sup>61</sup> Yūcuán na te suni ni cahān inga de:

Cúní na condiquín na níhín, te cuāha ní jnūhun jeē xihna gā quicahān na jíin ñayuu cáyucú vehe ná, achí de.

<sup>62</sup> Te ni cahān Jesús jíin de:

Núu na-ni tēe quejéé de condiquín de ruhū, te núu máni jeē nácani cuihyá ni de siquī tāca jēé ni stóo de, núu súcuan te cúu de nájñūhun in tēe jítu jíin yátá, te jícó cóto de ichi vehe de. Te ma cuajniñu de condiquín de ruhū siquī jniñu ndácu Yaa Dios, achí yá.

*Jeē ní taji yá unī xico uxí de*

## 10

<sup>1</sup> Te ná ni cuu táca jniñu yáha, te máá Jítoho yó ní nacāji ya unī xico uxí gā de. Te ni taji yá ndihuū ndihuū de jeē cósnūu de nuū yā, quingoo de táca ñuu jíin táca lugar nuū jé yajni quihín máá yá. <sup>2</sup> Te ni cahān yā jíin de:

Ñayuu yáha cácuu i nájñūhun trigo jeē tah-ndé, te ndaa jeē cuehē cúu, te tēe cahnde chí jecu-ni de cúu. Núu súcuan te cacān tahú rō nuū máá Jítoho rō Yaa Dios jeē na táji yá cuehē tēe na quingoo de cahnde de trigo, cúu jeē nacani de jnūhun ya nuū ñayuu. <sup>3</sup> Te cuango jñánhan rō, te na cástūhun jeē ní rō jeē táji rí rohó quingoo rō nájñūhun londe mēhū yāh. <sup>4</sup> Te ma cóndiso rō ñuu, ni yijni xūhún, ni ndijēn. Te ichi ma cueuéé rō ndajñūhun rō jíin ni in. <sup>5</sup> Te na-ni vehe núu ni quīvi rō, te xihna gā cahān rō: Na quiji jnūhun ndeyí jnūhun sī ni nuū rohó, ñayuu vehe yáha, achí rō. <sup>6</sup> Te núu vehe yúcuau iyó ñayuu vāha, te jnūhun ndeyí ní cahān rō jinú siquī i. Te núu tuú, te jnūhun ndeyí ní cahān rō ma jinú siquī i. <sup>7</sup> Te suni vehe yúcuau coyūcu rō, te caji rō coho rō jēé cuāha ñayuu nuū rō. Chí siquī jniñu jeē nácani rō jnūhun nuū ñayuu, te cánuú coto i róhó. Ma quéndōo rō tijni vehe, chí in-ni vehe. <sup>8</sup> Te na-ni ñuu núu ni quívicoo rō, te núu cuatáhu i róhó, te caji rō táca jēé cuāha i nuū rō. <sup>9</sup> Te nasávaha rō ñayuu cácuu ñuu yūcuán. Te cachi rō nuū i: Je ni cuyajni Yaa Dios jeē ndacu ya jniñu nuū rō, achí rō. <sup>10</sup> Te na-ni ñuu núu ni quívicoo rō, te núu tu ní cájetáhu i róhó, te quendacoo rō ini calle yūcuán, te cahān rō: <sup>11</sup> Nde ticachā ñuu rō yáha jēé ni jnū jēhé rí, na náscóyo ri jeē cúu seña jeē iyó cuéchi rō jēé tu ní cájetáhu rō. Te na cónahān rō jeē Yaa

Dios je ni cuyajni ya jeē ndacu ya jniñu nuū rō nuū. <sup>12</sup> Te cāhān rī jīn rō jeē quivī juicio te xeēn gā coo castigo siquī ñuu casāha sūcuan vēsū siquī ñuu Sodoma nuū ní casāha ndasī ñāyuu cuēchi.

*Jeē ní cuxeēn yā nuū sava ñuu nīhni ní (Mt. 11.20-24)*

<sup>13</sup> Nacā jeē xeēn ndoho rō, ñāyuu ñuu Corazín. Te nacā jeē xeēn ndoho rō, ñāyuu ñuu Betsaida. Chi núu ini ñuu Tiro jīn ñuu Sidón ní sáha rī jniñu jéhu jeē ní sáha rī ini ñuu maá rō, te yachī nacani ní ñāyuu ñuu un jéē stóo i cuēchi i núu. Te sáha i seña jeē steēn jeē nācani ní i siquī cuēchi i, chi kuhun i sahma jnúu te chuhun i yaā xinī i núu. <sup>14</sup> Núu sūcuan te quivī coo juicio te xeēn gā coo castigo siquī rō jijnánah rō vēsū jeē ní iyo siquī ñuu Tiro jīn ñuu Sidón. <sup>15</sup> Te rōhó ñāyuu ñuu Capernaum, ¿á cájini ní rō jeē cujéhu rō nájñuhun ñn jeē cáa cuahān ichi ándiví? Tuú chi sa nanuu rō ndé lugar nuū cáyūcu ánuá ndiyī. Achí yá.

<sup>16</sup> Te ní cahān gā yā jīn tée jeē tají yá quingoo:

Ñāyuu chusóhó jnúhun cahān rō, nuū maá rī chusóhó i. Te ñāyuu squéhichī rohó, suni ruhū squéhichī i. Te ñāyuu squéhichī ruhū, suni squéhichī i Yaā ní tají ruhū vēji rī. Achí yá.

*Jeē ní ndecoo tēe ní tají yá*

<sup>17</sup> Te ní ndecoo unī xico uxī tēe un, cácusī ní de te cácahān de jīn Jesús:

Nde tachī cájetáhú núu ná jéē jīn síhvī ní, chí quéndacoo ini ñāyuu, achí de.

<sup>18</sup> Te ní cahān yā jīn de:

Sūcuan cúu, chí ní jito rī jeē nájñuhun ñn taja ní ningava Satanás ichi ándiví, chí ní quende rī ndihī poder un. <sup>19</sup> Te vijna te je ní jēhe rī fuerza nuū rō jeē cueñū rō nájñuhun siquī táca cóo jīn tśuhma, te cundeyí rō siquī táca fuerza maá jéē jito uhū yohó, te tú ná vé sáha ga jīn rō. <sup>20</sup> Te ma cúsiñ ní rō maá-ni jeē cájetáhú táchī nuū rō, chí sa cusīñ gā ní rō jeē yosó síhvī rō nde ándiví. Achí yá.

*Jeē ní cusīñ ní Jesús*

*(Mt. 11.25-27; 13.16-17)*

<sup>21</sup> Te suni hora un ní cusīñ ní Jesús, ní sáha Espíritu Santo, te ní cahān yá:

Na cútahū ná núu ní Tátá, Jítoho ándiví jīn ñāyiví. Chí ní jesí ní táca jnúhun ndíchí ní, jéē ma cúni ñāyuu ndíchí jīn ñāyuu túhva cuenta ñāyiví yáha. Te ní steēn ní núu ñāyuu cácuo nájñuhun sūchi lúlí. Chí sūcuan ní nujnahan ní ní Tátá, achí yá.

<sup>22</sup> Te ní cahān gā yá:

Ndivii ní jēhe Tátá rī nuū rī. Te tu cájini ñāyuu ndé ñn cúu ruhū, Séhe Yaā Dios, chí maá-ni Tátá rī cúu jeē jini yá ruhū. Ní tu cájini ñāyuu ndese Yaā cúu maá Tátá, chí maá-ni Séhe cúu jeē jini. Te iyó ñāyuu jeē

cuní maá Séhe steēn yā nuū i ndese Yaā cúu Tátá yá, te maá i suni cuní i. Achí yá.

<sup>23</sup> Yūcuán ná te jito ya nuū tée cáscuáha ún, te ní cahān yā jīn maá-ni de:

Yóhoyo ndetū ñāyuu cájito jniñu jéhu jeē cájito maá rō. <sup>24</sup> Chí cahān rī jīn rō jeē cuehē tēe ní canacani jñuhun Yaā Dios, jīn táca rey, ní cacuni de coto de jeē cájito maá rō, te tu ní cájito de. Te suni ní cacuni de cuní sōho de jeē cájini sōho maá rō, te tu ní cájini de. Achí yá.

*Jñuhun ñn tēe vāha ní nación Samaria*

<sup>25</sup> Yūcuán ná te ñn tēe steēn tutu ley Yaā Dios, ní ndocuiñ de ní jecahān de jīn Jesús, chí cúni de coto ndee de ya. Te ní cajñuhún de:

Maestro, ¿ná vé sáha ná te nihīn tahú ná cotecu ná ní cáni ándiví? achí de.

<sup>26</sup> Te ní cahān yā jīn de:

¿Nde yósó núu tútu ley? ¿Nde se cáhān cáhu rō? Achí yá.

<sup>27</sup> Te maá tée un ní cahān de jeē cahān nuū tútu:

Coo manī ndasí rō jīn maá Jítoho rō Yaā Dios, nde jnāā ndasí rō sáha rō ndihī jeē cúsiñ ní yá, nde jīn ini jīn ánuá rō, jīn ní fuerza rō, jīn ní jéē nijnūni rō. Te cundáhú ní rō jnāhan rō nájñuhun cundáhú ní rō maá rō, achí. Achí de.

<sup>28</sup> Te ní cahān yā jīn de:

Vāha ní cahān rō. Te núu cuu sáha rō sūcuan te nihīn tahú rō cotecu rō ní cáni, achí yá.

<sup>29</sup> Te maá tée un cúni de jeē quéndōo ndaā de nuū yá jīn jñuhun ní cajñuhún de, te ní cahān de:

¿Te ndé ñāyuu cácuo jnāhan ná? achí de.

<sup>30</sup> Te ní cahān Jesús:

Ñn tēe ní quenda de ñuu Jerusalén, ní cuun de cuahān de ñuu Jericó. Te ichi un ní canecoo ñacuñna núu de, te ní caquende ndihī ndajniñu de, te nde sahma ñuhun de. Te ní cacani ndevāha ún de jeē jé yajni cuu de núu. Te ní castóo ún de, te cuango. <sup>31</sup> Te ní cuu jeē ichi un yāha ñn sutū quihñ de, te ní jito de nuū tée ún, te ní síyo-ni de cuahān de. <sup>32</sup> Te suni sūcuan ñn tēe grupo levita jeē cájiejñū ini templo, vēji de ichi ún, te ní jito de nuū tée ún, te ní yāha jicá-ni de cuahān de. <sup>33</sup> Te ñn tēe nación Samaria, suni vēji de ichi ún, te nuū ní jito de, te ní cundáhú ní de tēe ún. <sup>34</sup> Te ní quee de nde nuū catú tēe ún, te ní chuhun de aceite jīn vino nuū ní túji tēe ún, te ní jihni de sahma nuū. Te ní soó de tēe un siquī quití de, te cuahān de jīn tēe un ndé ñn mesón, te ní condito de. <sup>35</sup> Te inga quiví ún, hora jeē quihñ de, te ní tava de uū xūhun cáa, ní jēhe de nuū tēe chíí mesón. Te ní cahān de: Coto ní tēe yáha, te núu caxin gā ní xūhun ní jīn de, te nuū nándicó ná te nachunaa ná núu ní, achí de. <sup>36</sup> Núu sūcuan



¿te ndese jéni ni rō? Jeē ndinúni téé ún, ¿ndé ìn de ni chíhi cuenta jeē jnánhan de cúu tēe ni canecoo ñacuñha núu? Achí yá jíin téé stéén tuu ley.

<sup>37</sup> Te ni cahān de:

Tēe jeē ní cundáhú ni tēe ni tujī, vēsú tēe ñuu jíca cúu de.

Yūcuán na te ni cahān Jesús jíin de:

Cuáhán núu sūcuán, te suni sūcuán cundáhú ni rō táca ñáyyuu, achí yá.

*Jeē ní ìne ya vehe Marta jíin María*

<sup>38</sup> Yūcuán na te ni quihñ tucu ya ichi cuahān yā, te ni jinū yā ìn ñuu lulí. Te ìn ñahan nání Marta, ni cana ña ya ni jehēn yā vehe ña. <sup>39</sup> Te Marta, íyó ìn cuhū ña nání María. Te María ni cucōo ña nuū jehé Jesús, jíni nahñ ña jñūhun cáhán yā. <sup>40</sup> Te Marta chí cúnéé máá ña jíin cuéhē jñiñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñúhún ña sáña núu jñiñu? Te cahān ni jíin ña na chindéé ñahán ña sáña, achí ña.

<sup>41</sup> Te ni cahān Jesús jíin ña:

Marta, yōhoyo ndíhví ní rō jíin cuéhē jñiñu, te yōhoyo stóho ró máá ró jíin. <sup>42</sup> Te íyó ìn-ni jñiñu cánuú. Te María chí ni nacāji ña jñiñu cánuú, suu jeē ndíhví ní ña síquī jñūhun Yāā Dios, te ma quénehen yó ña nuū ún. Achí yá.

*Jeē ní stéén yā ndese cacān tahú yō  
(Mt. 6.9-15; 7.7-11)*

## 11

<sup>1</sup> Te ìn quiví ìne Jesús ìn lugar jíicán tahú yā. Te nuū ní ndíhi ní jíicán tahú yā, te ìn tēe scuáha jíin yá, ni cahān de:

Stéén ní núu ña ndese cacān tahú na jíjnánhan ná, nájñūhun ní steén Juan nuū tēe ni cascuáha jíin de, achí de.

<sup>2</sup> Te ni cahān yā jíin de:

Jeē cacān tahú rō, te suhva cahān rō:

Tátá maá ná jíjnánhan ná jéē ndeé ní andiví, níni na cóo yñúhún ná nuū ní, chí Yāā ìi cúu ní.

Te ñūhun ni na jéé yachí quiji quiví ndacu ní jñiñu ní ñáyiví yáha.

Te na cóo táca jñiñu nájñahan ni ní, nájñūhun íyó ìni andiví, sūcuán na cóo ìni ñáyiví.

<sup>3</sup> Staā jeē cátecu na táca quiví, cuáha ní núu ná vijna.

<sup>4</sup> Te cone cáhnu ní ní núu táca cuéchi cása ha ná núu ní,

nájñūhun cáhine cáhnu ní na núu ñáyyuu casáha cuéchi nuū ná.

Te ma cuáha ní jñūhun jeē coto ndee jexeén sáña,

chí sa suhva jnama ní sáña nuū táca jéé neé. Achí rō jíjnánhan ró. Achí yá.

<sup>5</sup> Te ni cahān gā yā:

Núu ndé ìn rōhó íyó ìn amigo rō, te núu quihñ rō vehe de sava ñuu te cahān rō jíin

de: Amigo, cuáha núu unī staā nuū rī. <sup>6</sup> Chí ìn amigo rī jeē jíca de viaje, ni quee de vehe rī, te tú na vé névāha rī jeē cuáha rī caji de. Achí rō. <sup>7</sup> Te núu cahān tēe ìne ìni vehe: Ma stáhān rō ruhū, chí ndíhyú yehyí rí, te je cáquixí sēhe rī jíin rí, te ma cúu ndonda rī jeē cuáha rī nuū rō, achí de. <sup>8</sup> Te cáhán rī jíin rō, vēsú ma ndón da de cuáha de nuū rō síquī jeē cúu de amigo rō, te jeē yóhoyo stáhān rō de, jeē yúcuán ndonda de cuáha de ndíhi jeē jíni ñúhún rō. <sup>9</sup> Núu sūcuán te cáhán rī jíin rō jíjnánhan ró jeē suni sūcuán cacān tahú rō nuū Yāā Dios, te cuáha ya nuū rō. Te nducú ró táca jéé váha íyó núu yā, te nihñ rō sáha ya. Te cacān tahú rō nde nihñ rō, nájñūhun sáha ñáyyuu cahān yehyí ndé nune quiví i. <sup>10</sup> Chí táca ñáyyuu jíicán, cuáha ya nuū i. Te ñáyyuu nducú, suni nihñ i. Te ñáyyuu cahān, nune ya ichi nihñ i jeē cuní i.

<sup>11</sup> ¿Te ndé ìn ró cúu tátá, te núu sēhe ró jíicán i staā nuū rō, te á cuáha ró ìn yuū nuū í? Te núu jíicán i chācá, ¿te á cuáha ró ìn coō nuū í? <sup>12</sup> Chí núu jíicán i ìn ndiví, ¿te á cuáha ró ìn tisuhma nuū í? Tú cuítí sūcuán. <sup>13</sup> Núu sūcuán te máá ró jíjnánhan ró, vēsú ñáyyuu íyó cuéchi cácuu ró, te cájini ró cuáha ró jéé váha nuū sēhe rō. Te nagā ní cuu máá Tátá rō andiví jéé ma cuáha ya Espíritu Santo nuū ñáyyuu jíicán nuū ya. Achí yá.

*Jeē ní cacahān de jeē jejniñu ya fuerza Satanás*

*(Mt. 12.22-30; Mr. 3.19-27)*

<sup>14</sup> Te quénehen ya ìn tachí ìni ìn tēe, jeē ní cuñhñ de ní sáha. Te nuū ní quenda tachí, te ni nacahān tēe ní cuñhñ un. Te ni canaa ní ñáyyuu cájito i. <sup>15</sup> Te sava ñáyyuu ún chí ní cacahān i:

Jíin fuerza Satanás jeē cujéhnu nuū tachí, quénehen tēe yáha táca tachí ìni ñáyyuu, achí i.

<sup>16</sup> Te sava ga i cúní i coto ndee i ya, te ní cajicán i jeē sáha ya jeē coo ìn seña ichi ándiví. <sup>17</sup> Te máá yá jíni yá jeē sūcuán cájeni ní i, te ni cahān yā:

Táca nación jeē sasñn máá te cuajnáhan máá, núu sūcuán te snáa jeē íyó váha máá. Te núu ñáyyuu ìn vehe sasñn máá te cuajnáhan máá, núu sūcuán te ma cóo ga coyūcu cáhnu.

<sup>18</sup> Te suni sūcuán Satanás, núu sasñn máá jíin jnánhan tachí, ¿te ndese cuiññ nihñ jeē ndácu jñiñu núu sūcuán? Chí cacahān ró jeē jíin fuerza Satanás quénehen rī tachí ìni ñáyyuu.

<sup>19</sup> Te núu sūcuán cúu núu, te ñáyyuu cascuáha jíin máá ró jíjnánhan ró, ¿na jíin fuerza cáquenehen máá i tachí, cájeni ní rō? Núu sūcuán te máá i jíjnánhan i cachi jeē ní castiví ndasí ró ní cacahān ró jeē cáquenehen rī tachí jíin fuerza Satanás.

<sup>20</sup> Te tuú chí sa suhva jíin fuerza Yāā Dios cúu jeē quénehen rī tachí. Núu sūcuán te je ndéé Yāā Dios méhñu ró jéé ndácu ya jñiñu.

21 Te núu ñin tēe ndacuī, ndíto de vehe de jíin nújí de, núu súcuan te tú ni ñin ndajníñu de ndoñíhún. 22 Te núu quiji inga tēe ndacuī gā, te cundeyí jíin tēe ún, núu súcuan te quende nují de jeē ndíto de vehe de, te sáha de ndese cúní maá de jíin ndajníñu jeē quénde de. Te nájnñuhun tēe ndacuī gā ún, súcuan cúu maá rí nuū Satanás.

23 Te ñayuu tu iyó mání jíin rí, núu súcuan te jíto uhú i ruhú. Te ñayuu tu nástútú jíin rí, núu súcuan te sa jéte núu i ñayuu vējicoo nuū rí.

*Tachí jeē nastútú jnánhan ndávi ini ñayuu (Mt. 12.43-45)*

24 Núu ni quenda ñin tachí ini ñin tēe tu cándije, te jíca cuu nuū ññuhun téhé, ndúcu núu ndétátú, te tu níhín, yūcuán na te jéni ni maá: Na quíñuhun rí vehe nuū ní quenda rí. 25 Te núu ni ndee tucu, te jíto jeē tēe tu cándije un cúu de nájnñuhun ñin vehe jeē ní ndundo. 26 Yūcuán na te jéquiñin uxā gā tachí xeén gā vēsú maá. Te quíñicoo ini tēe un jéé cōyūcu yūcuán. Núu súcuan te xeén gā ndoho tēe un jéé sándihí vēsú jeē xíhna ññuhún. Achí yá.

*Yōhyo ndetū ñayuu cájini nahín jñuhun ya*

27 Te níni cáhán yá jñuhun yáha, te ñin ñahan íne mēhñu ñayuu cuehē un, ní cahān jee ña jíin yá:

Yōhyo ndetū ñahan ní scácu níhín te ní scáxin ña níhín, áchí ña.

28 Te ní cahān yá:

Sa suhva yōhyo ga ndetū ñayuu cájini nahín jñuhun Yaā Dios te cásquicu í, áchí yá.

*Jeē ní cajicān ñayuu tu cácandije ñin jñiñu jēhnu*

*(Mt. 12.38-42; Mr. 8.12)*

29 Te ní cataca cuehē gā ñayuu nuū Jesús, te ní quejéé yá cahān yá:

Ñayuu iyó vijna máni cásáha néé i. Te cájicān i ñin jñiñu jēhnu jeē stéén nuū Yaā ní tají Yaā Dios cúu rí. Te tú na inga jñiñu jēhnu stéén rí nuū i, chí maá-ni jñiñu jēhnu nájnñuhun ní cuu jíin Jonás, tēe ní nacani jñuhun Yaā Dios nde jengahán. 30 Chí nájnñuhun ní cajini ñayuu ñuu Nínive jeē ní cuu ñin jñiñu jēhnu jíin Jonás, suni súcuan cuni ñayuu tiempo yáha jeē coo ñin jñiñu jēhnu jíin ruhú, Yaā ní nduu tēe, jeē quíjnahan jíin modo ní ndoho Jonás. 31 Te reina jeē ní cujéhnu nación ichi sur, natecu ña jíin ñayuu tiempo yáha, quiví juicio jeē sándaā yá cuēchi, te cahān ña cuēchi siquí i. Chí nde jíca téyí ní quiji ña ní jini nahín ña jñuhun ndíchí ní cahān rey Salomón. Te vijna chí cújéhnu ga ruhú, Yaā íne yáhá vēsú Salomón, te tu cácandije ró ruhú. 32 Te táca ñayuu ñuu Nínive nuū ní nacani Jonás jñuhun, natecu i jíin ñayuu tiempo yáha, quiví juicio jeē sándaā yá cuēchi, te cahān i cuēchi siquí ñayuu yáha. Chí maá i ní canacani ní i ní castóo i cuēchi i

quiví ní nacani Jonás jñuhun nuū i. Te vijna chí cújéhnu ga ruhú, Yaā íne yáhá vēsú Jonás, te tu cácandije ró ruhú.

*Jñuhun yátá siquí lámpara (Mt. 5.15; 6.22-23)*

33 Núu nástáñ ñayuu ñin lámpara, tu chísháhí i, ní tu chúne i chíji ñin cajón. Chí sa suhva jéni i nuū sucún, náváha cundijin nuū ñayuu quívicoo vehe. 34 Te tinúu ró cúu nájnñuhun lámpara nuū yiquí cúñu ró. Núu súcuan te núu tinúu ró iyó ndijin, te ní-ni yiquí cúñu ró cundijn. Te núu tinúu ró tu iyó ndijin, te ní-ni yiquí cúñu ró iyó nee. 35 Te suni súcuan cúu anuá ró, te coto ró jéé ma cáni néé ní ró, náváha tú coo nee ini anuá ró. 36 Chí núu mání jñiñu váha cásáha ró, te tú na jñiñu néé cásáha ró, núu súcuan te luz yá cundijin váha ini anuá ró, nájnñuhun ñin lámpara jeē sáha jeé cundijin váha. Achí yá.

*Jeē ní cahān yá jeē iyó cuēchi de jíjnahan de (Mt. 23.1-36; Mr. 12.38-40; Lc. 20.45-47)*

37 Te nuū ní cuu ní cahān yá, te ñin tēe grupo fariseo ní cana de ya jeé caji yá staa vehe de. Te ní quívi ya, te ní cucōo ya mesa jeé caji yá staa. 38 Te tēe fariseo un náa ní de jíto de jeē tu squícu ya costumbre jeé nandahá yá te caji yá staa. 39 Te ní cahān maá Jítoho yó jíin de:

Róhó tēe fariseo jíjnahan ró, chí nájnñuhun jeē canacate ró yátá vaso jíin yátá cohó cúu jeé nandahá ró. Te ichi íni ró chí ññuhun máni maá jñuhun cuíñhá jíin jñuhun néé. 40 Tēe cánéé cácuu ró. ¿A tu cájini ró jeé Yaā ní sáha yiquí cúñu ró, suni ní sáha ya anuá ró? 41 Te jeé cájehhe ró caridad nuū ñayuu ndahú, na sáha ró siquí jeé cundahú ndije ní ró i. Te súcuan te coo ndaa anuá ró.

42 Nacā xeén ndoho róhó tēe fariseo, chí cásquicu ró táca jñiñu lúli, te tu cásquicu ró jñiñu cánuú. Chí cásáha ró úxí úxí nuhni tamñu jíin ruda jíin táca yucú, te cásocó ró ñin ñin siquí táca úxí un nuú Yaā Dios. Te tu cásáha cuiti ró jñiñu ndaa, ní tu cáhíyo maní ró jíin Yaā Dios. Táca jéé yáha cánuú sáha ró núu, te suni ma stóo ró jéé socó ró táca yucú ún.

43 Nacā xeén ndoho róhó tēe fariseo, chí máni cánujnahán ní ró cucōo ró núu silla yíñuhún gá ini vehe í sí sinagoga. Te cánujnahán ní ró jeé cahān yíñuhún ñayuu jíin ró nuū calle.

44 Te nacā xeén ndoho róhó tēe cástéén tutu ley Yaā Dios, jíin róhó tēe fariseo, chí tēe stáhú-ni cácuu ró. Chí cándaa ró nájnñuhun yaú ndyí: jeé tú ndijin, chí cásnáa ró anuá ñayuu, te tu jíni i jeé súcuan cásáha ró jíin i. Achí yá jíin de.

45 Yūcuán na te ní cahān ñin tēe stéén tutu ley:

Maestro, jeē ni cāhān ni táca jnūhun yáha, suni nde siquī maá ná jijnáhan ná ní cahān ní, áchí de jín yá.

<sup>46</sup> Te ni cahān yā:

Suni nacā xeēn ndoho róhó tēe cástéén tutu ley. Chi suni cástéén rō táca ley ni catava maá rō jeē yí sáha, te tu cácuendeyí ñayuu squícu i. Te maá rō, chí ni ñin xini ndáha rō tu cáscānda rō jēe squícu rō.

<sup>47</sup> Nacā xeēn ndoho rō jijnáhan rō. Chi cásáha rō vehe siquī nuū yínduji ndryi jii rō, tēe ni canacani jnūhun Yaā Dios nde jehahān. Te suni táca jii rō ni cajehni de tēe ún. <sup>48</sup> Te jeē casáha rō súcuan cúu jeē cáquijnáhan rō jín de siquī jniñu ni casáha de. Chi maá de ni cajehni tēe ún, te maá rō cásáha rō vehe ndryi ún.

<sup>49</sup> Jeē yúcuán nde jehahān ní cahān Yaā Dios ñin jnūhun ndíchi: Tají rí táca tēe nacani jnūhun ri jín táca tēe apóstol quingoo de nuū i. Te sava de cahni i, te sava ga de coto xeēn i, áchí Yaā Dios. <sup>50</sup> Te súcuan te siquī ñayuu tiempo yáha na cóndee cuēchi jeē ní cajehni jii i tēe ni canacani jnūhun Yaā Dios, nde quiví ni jécōo ñayiví te nde vijna, <sup>51</sup> nde Abel xihna gā te nde Zacarías, tēe ni cajehni de ñi templo sava méhñu cuarto ñi jín altar. Núu súcuan te cāhān rí jín rō jeē siquī ñayuu tiempo yáha condee táca cuēchi ún.

<sup>52</sup> Nacā xeēn ndoho róhó jēe cástéén tutu ley, chí cájesi rō ichi jeē jecūhun ni ñayuu jnūhun ya. Chi ni maá rō tu cácuñi rō jecūhun ni rō, ni tu cájēhe rō jnūhun jeē jecūhun ni ñayuu cácuñi. Achí yá.

<sup>53</sup> Te jeē ni cāhān yā jnūhun yáha, te tēe cástéén tutu ley Yaā Dios jín tēe fariseo, yóhoyó ni caquiti ni de nuū yá. Te ni caquejé de cástíchi de ya siquī cuehē gā jnūhun. <sup>54</sup> Chi yuhu-ni cánducú de nuū sana te stívi yá jnūhun cahān yā, návaha niñin de cuēchi siquī yá.

*Siquī jnūhun stáhú cácahān tēe fariseo*

## 12

<sup>1</sup> Te níni súcuan cúu, te ni cacututú cuehē mil ñayuu, chí nde cájeñu i siquī jehé jnāhan i. Te xihna gā ni quejé yá cāhān yā jín tēe cácuáha jín yá:

Coto má candíje rō levadura tēe grupo fariseo, chí suu cúu jnūhun stáhú cácahān de. Chi jíté núu nuū ñayuu, nájñūhun ndécava levadura nuū ñūjen pan. <sup>2</sup> Chí jnūhun stáhú un má quéndōo sáhi cuiti, chí ndíhi natūu ndijin, te cuni ñayuu. <sup>3</sup> Núu súcuan te suni maá rō, táca jnūhun ni cacahān rō jeē tu ní jín ñayuu, ñin quiví te cuni váha i. Te táca jnūhun ni cacahān sáhi rō jeē ndihyú yehyí, ñin quiví te cahān jee ñayuu yatā táca vehe.

*Jeē ní cachi yā ndé ñin cúu jeē yūhu yó (Mt. 10.28-31)*

<sup>4</sup> Cāhān rí jín rō jijnáhan rō, amigo: Ma yūhu rō coto rō ñayuu cahni yiqui cúñu rō, chí núu ni cajehni i róhó, te tuá na vé cúu sáha ga i. <sup>5</sup> Te na cáchi rí nuū rō ndé ñin yūhu rō coto rō: Jeē yūhu rō coto rō cúu Yaā Dios jeē núu sáha ya jeē cúu rō, te iyó poder yā chune ya rohó infierno. Suu maá yá cúu jeē yūhu rō jeē ma stívi rō nuū yá.

<sup>6</sup> Te táca saa chí tú yahu ndéé tí, chí nde uhñ tñ jeē nuū centavo lulí. Te ni ñin ti tu náa ni Yaā Dios jeē tu ndíto ya. <sup>7</sup> Te nagā ni cuu róhó jijnáhan rō, chí nde ndíhi xixini rō je ni cahu ya. Núu súcuan te ma yūhu rō jijnáhan rō, chí cánuu ndasí gā rō nuū yā vesú cuehē táca saa.

*Ñayuu jejnūhún Jesucristo nuū inga ñayuu (Mt. 10.32-33; 12.32; 10.19-20)*

<sup>8</sup> Te cāhān rí jín rō, táca ñayuu jeē cuajñūhún ruhū nuū inga ñayuu, suni súcuan ruhū, Yaa ní nduu tēe, cuajñūhún rí i nuū táca ndajéhe Yaā Dios. <sup>9</sup> Te táca ñayuu jeē ma cuajñūhún ruhū nuū inga ñayuu, suni súcuan ma cuajñūhún rí i nuū táca ndajéhe Yaā Dios.

<sup>10</sup> Te núu ndé ñayuu cahān i siquī ruhū, Yaa ní nduu tēe, cone cáhnu ni Yaā Dios nuū i. Te núu ndé ñayuu cahān ndevāha i siquī Espíritu Santo, ma cóne cáhnu ni Yaā Dios nuū i.

<sup>11</sup> Te núu cuandeca i róhó táca vehe ñi sinagoga nuū tēe cáscānda cuēchi, jín nuū tēe cácuu tohō, te ma nacani ndasí ni rō ndese stío cuñí rō jnūhun nuū de. <sup>12</sup> Chí maá hora un te Espíritu Santo steén yā nuū rō ndese cahān rō. Achí yá.

*Siquī jeē ma tēnuú yō ndajniñu cúca*

<sup>13</sup> Yúcuán na te ñin tēe íne nuū ñayuu cuehē un ní cahān de jín Jesús:

Maestro, cahān ni jín ñani na jéē na táhú sáva de tahū na jín de, áchí de.

<sup>14</sup> Te ni cahān yā jín de:

¿Ndé ñin ni jeni ruhū jeē ndacu ri jniñu tahū sáva tahū rō? Achí yá.

<sup>15</sup> Te ni cahān gā yá:

Condito rō maá rō jijnáhan rō jēe ma ndíyo ni rō xūhun jín táca gā. Chí vesú cuehē ndasí ndajniñu névāha ñin tēe, te nasūu jēe yúcuán sáha jeē quéndōo ndetú de, áchí yá.

<sup>16</sup> Yúcuán na te ni cahān yā ñin jnūhun yatā jín i:

Ni Iyo ñin tēe cúca jeē névāha ñuhun jeē cúu váha ndasí itu. <sup>17</sup> Te tēe cúca un ní nacani ni de: ¿Ndese sáha ri? Chí tuá ndé cuhun niñi ri. Achí de. <sup>18</sup> Te ni jeni ni de: Suhva na sáha ri. Na cánu rí táca yáca rí, te nasáha ri jeē náhnu ga. Te yúcuán chuvāha ndíhi ri niñi ri jín táca ndajniñu ri. <sup>19</sup> Yúcuán na te cahān rí jín ánuá rí: Vijna te cuehē teyí névāha yó jéē canda cuehē cuiyá. Na ndétatu yó te caji yó coho yó, te na cúsi ni yó, ni jeni ni de. <sup>20</sup> Te ni cahān Yaā Dios jín de: Tēe cánéé cúu rō. Chí jecuáa vijna cuu rō, te táca jéē ní chuvāha

ró, ¿ndé tée cuu? Achí Yaa Dios jíin de. <sup>21</sup> Te súcuán ndoho táca tée jeé sacúca de máa de, te tu ndúcu de jeé quendoo ndetū de sáha Yaa Dios. Achí yá.

*Yaa Dios ndito ya yohó*  
(Mt. 6.25-34)

<sup>22</sup> Te ni cahán yá jíin tée cáscuáha jíin yá:

Núu súcuán te cáhán rí jíin ró: Ma nácani ndasí ni ró siquí jeé cótecu rō, núu ndese caji rō, ni siquí sahma, núu ndese cuhun rō. <sup>23</sup> Chi Yaa Dios ni sáha ya jeé técu rō jíin yiqui cúnu rō, te nagá ni cuu jeé máa cuáha ya jeé caji rō jíin jée cūhun rō. <sup>24</sup> Condēhe rō ndese cátecu quiti cácuu nájnūhun cálu, chí tu cátaji tí, ni tu cánaštútú tí jeé chūváha tí, ni tú yacá tí. Te vēsū súcuán te máa Yaa Dios scáji yá tí. Te cánuú ndasí gá rō jijnáhan rō vēsū táca quiti ún. <sup>25</sup> ¿Te ndé iin ró, á cuu scuéhnū rō máá rō sava metro gā, vēsū na nácani ndasí ni ró? <sup>26</sup> Te núu ma cúu sáha rō vēsū iin jniñu lúli súcuán, ¿te najehē cáncani ndasí ni ró siquí jeé caji rō jíin jée cuhun rō?

<sup>27</sup> 'Condēhe jijnáhan rō ndese jée ita táca yúcu. Chí tu sájniñu, ni tu táú. Te cáhán rí jíin ró jeé ni rey Salomón, quiví ní ñūhun de sahma váha ndasí, tu ní ñūhun de sahma lúu súcuán nájnūhun ita ún. <sup>28</sup> Te núu súcuán jéhe Yaa Dios sahma lúu ita un jée jée vijna te sajnē cayū nuū ñuhún, te nagá ni cuu róhó jijnáhan rō jée ma sáha ya jeé nihín rō sahma. ¿Te naun tu cácan dije nihin ró jée ndito ya rohó? <sup>29</sup> Núu súcuán te ma nácani cuihyá ni ró ndese caji rō ndese coho rō. <sup>30</sup> Chi táca ñayuu ñayiví jée tu cácan dije cúu jeé máni siquí jeé yáha cándihví ni i. Te máá rō jijnáhan rō, chí iyó Tátá rō andiví, te jini yá jeé cájini ñuhún ró táca jée yáha. <sup>31</sup> Te sa suhva cánuú gá jeé cóndihví ni ró siquí jniñu jeé ndácu Yaa Dios nuū rō. Yūcuán na te sáha ya jeé nihín rō táca jée yáha.

*Ndese coo cúca yó nde andiví*  
(Mt. 6.19-21)

<sup>32</sup> 'Ma yūhu ró jijnáhan ró chí cácuu ró nájnūhun lanchi rí. Chí vēsū jecu-ni cácuu ró, te máá Tátá rō cúsñ ni yá jeé quívicoo ró ñuu nuū ndácu ya jniñu. <sup>33</sup> Xico ró jeé cáneváha ró, te cuáha ró xūhun un núu ñayuu ndahú. Te súcuán caya ró tahú rō nde andiví núu ma cútúhú, nájnūhun jeé chūváha ró xūhun ini yijni. Chí nde andiví te ma náa jeé váha coneváha ró. Chí yūcuán má quívi ñacuñhá, ni ma cúu stívi tiquixin. <sup>34</sup> Chí nde nuū nihín ró tahú váha ró, yūcuán cúu nuū cóndihví ni ró siquí.

*Jeé na coo tūhva yó jée ndē yā*

<sup>35</sup> 'Coo tūhva ró jijnáhan ró jée ndē Jitoho rō, te coo ró nájnūhun mozo jeé nastán i lámpara i. <sup>36</sup> Chí iyó tūhva i te cándetu i jeé ndē patrón i jeé cuahán de vico nándaha. Chí núu ni ndee de te cáhán de, te nune-ni

i yéhyí jijnáhan i. <sup>37</sup> Te yōhyo ndetū mozo un núu ni ndee patrón i, te cuni de jeé cándito i. Jendaá cáhán rí jíin ró jeé máa patrón sátūhva de máa de, te scúcoo de i mesa te caní de cohó i. <sup>38</sup> Te vēsū cucuée de ndee de nde sava ñuú, chí jée nēē gā, te núu cuni de jeé súcuán cándito mozo de, te yōhyo ndetū i jijnáhan i núu súcuán. <sup>39</sup> Te na jécūhun ni ró jeé cáhán jnūhun yátá yáha: Tēe chíí vehe, núu ni jini de na hora quiji ñacuñhá, te condito de, te ma cuáha de jnūhun jeé sacuiñhá vehe de núu. <sup>40</sup> Te suni súcuán coo tūhva ró jijnáhan rō, chí núu tuú, te máa hora jeé tú na vé cájeni ni ró, te ndee ruhū, Yaa ní nduu tēe. Achí yá jíin de.

*Jnūhun mozo váha jíin mozo tu squicu*  
(Mt. 24.45-51)

<sup>41</sup> Yūcuán na te Pedro ni cajnūhún de ya: ¿A jíin máa-ni ná jijnáhan ná cáhán ni jnūhun yátá yáha, chí suni cáhán ni jíin ndihi ga ñayuu? achí de.

<sup>42</sup> Te ni cahán máa Jitoho yó: Cáhán rí jíin nde-ni ñayuu cúu nájnūhun mozo jeé ndito xini te squicu váha. Te máa patrón sáha de jeé condiso jniñu i coto i ñayuu vehe de, náváha scáji i máa hora. <sup>43</sup> Te yōhyo ndetū mozo un jée núu ni ndee patrón, te cuni de jeé súcuán squicu váha i. <sup>44</sup> Jendaá cáhán rí jíin ró jeé caní de mozo un jée cóto i ndihi ndajniñu de. <sup>45</sup> Te núu jéni ni i jée ma ndíji yachí patrón i, te quejéé i caní i tēe jíin ñahan cácuu jnahan mozo i, te caji i coho i te najini i, <sup>46</sup> núu súcuán te ndee-ni patrón quiví jeé tu ndetu i jíin hora jeé tú na vé jéni ni i. Te stóho xeén de i, te squiví de i ndoho i jíin ñayuu tu cásquicu.

<sup>47</sup> 'Te mozo jeé jini i ndese núnjahan ni patrón i, te núu tu sátūhva i ni tu squicu i jeé cuni de, ndoho xeén i jíin yujnu xí. <sup>48</sup> Te mozo jeé tu jini i ndese núnjahan ni patrón i, te núu sáha i jniñu jeé caní de i, núu súcuán te cūhva-ni caní de i. Chí ñayuu jeé steén cuehé yá nuú i, suni cuehé nandacán yá nuú i. Te ñayuu jeé cuehé gā jniñu téjniñu ya i, suni cuehé gā nandacán yá nuú i.

*Jeé siquí Jesús te cusñ ini ñayuu*  
(Mt. 10.34-36)

<sup>49</sup> 'Ni quee rí jeé nájnūhun jeé scuiquín rí ñuhún ini ñayiví, te suu cuu jeé cusñ ini ñayuu jeé siquí ruhū. Te cúní rí jeé yachí coo súcuán, náváha quívicoo ñayuu ndaha Yaa Dios. <sup>50</sup> Te iyó iin jnūndōho cánuú ndoho rí, te cúcuñhá ndasí ni rí chí nde jinu ndoho rí, te ndusí ni rí. <sup>51</sup> ¿A cájeni ni ró jeé véji rí jeé cóyūcu máni ñayuu ñayiví? Cáhán rí jíin ró jeé tuú, chí sa suhva jeé cusñ ini ñayuu jeé siquí ruhū. <sup>52</sup> Chí nde vijna te quejéé jée uhún ñayuu iin vehe, sásñ máa jijnáhan, uní siquí uú, te uú siquí uní. <sup>53</sup> Chí tátá cusñ ini jíin séhe yí, te séhe yí jíin tátá, te náná jíin séhe shí, te séhe shí jíin náná, te náná chíso jíin

sêhe jênu, te sêhe jênu jíin náná chîso. Achí yá.

*Jeê ni cáhân yâ siquî seña andiví  
(Mt. 16.1-4; Mr. 8.11-13)*

<sup>54</sup> Te suni ni cahân yâ jíin ñáyuu cuehê ún: Núu cájito ró jeê náne vicô ichi núu cáne niándii, te cácahân rō jeê cuun saū, te súcuan cúu. <sup>55</sup> Te núu quée tachí vëji ichi sur te cácahân rō jeê nandii, te súcuan cúu. <sup>56</sup> Têe stáhú-ni cácuu ró. Chi cájecūhun ni rō ndese stéén seña andiví jíin ini ñayiví, ¿te naun tu cájecūhun ni rō ndé ñin cúu ruhū jeê sáha ri táca jniñu jéhnú tiempo yáha?

*Jeê cóndihvî ni yō jeê ma cóndee cuēchi siquî yō  
(Mt. 5.25-26)*

<sup>57</sup> ¿Te najehê tu cáncani ni maá ró ndé ñin cúu jniñu ndaá sáha ró? <sup>58</sup> Te núu ñin ñayuu quihîn i jíin ró nuū tohó jeê cacán i cuēchi siquî rō, núu súcuan te níni cuáhân rō jíin i ichi te condihvî ni rō sándaá rō jíin i. Chi núu tuú, te squívî i róhó núu juez, te juez siáha de róhó núu policía, te policía chune de róhó vecáa. <sup>59</sup> Te jendaá cahán rî jíin ró jeê ma quénda cuiti ró yūcuán chi nde chunaa rō ndihî cuiti xūhun cájicān de. Te suni súcuan condihvî ni rō cahân ndahú ró jíin Yaā Dios, návāha ma ndácunehen ya cuēchi siquî rō. Achí yá jíin de.

*Jeê cánuú nacani ni yō jeê stóo yó cuēchi yó*

## 13

<sup>1</sup> Te ñin quivî yúcuan ní quecoo jecu tēe, ni canacani de jñūhun nuū yá ndese ni candoho jecu tēe Galilea. Chi ná cájehni de quiti jeê socó de, te ni quecoo mozo Pilato ni cajehni tēe ún. <sup>2</sup> Te ni cahân Jesús:

Tēe Galilea un, ¿á cájeni ni rō jeê súcuan ni candoho de siquî jeê xeên gā ni iyo cuēchi de vésú táca gā ñayuu Galilea? <sup>3</sup> Cáhân rî jíin ró jeê tuú. Te róhó jíināhan ró suni jnahnū ndetū ró núu tú nacani ni rō jeê stóo ró cuēchi ró. <sup>4</sup> Te xahūn unî tēe jeê ní cotúú torre Siloé siquî de, te ni cajihî de, ¿á cájeni ni rō jeê ní casáha de cuēchi xeên gā vésú táca gā ñayuu ñuu Jerusalén? <sup>5</sup> Cáhân rî jíin ró jeê tuú. Te maá ró jíināhan ró, suni jnahnū ndetū ró núu tú nacani ni rō jeê stóo ró cuēchi ró.

*Jñūhun yátá nundêhe higo*

<sup>6</sup> Yūcuán na te ni cahân yâ jñūhun yátá yáha jéé steén yá ndese cácuu ñayuu tu squícu jñūhun Yaā Dios:

Cácuu i nájñūhun ñin nundêhe higo jeê ñin nuū ñūhun ñin tēe. Te ni jecundêhé de núu ñin ndehê xinî, te tú na vé ñin. <sup>7</sup> Te ni cahân de jíin mozo sájniñu nuū ñūhun de: Vijna te je iyó únî cuiyā jeê quiji ri nducú rí ndehê xinî yújnu higo yáha, te tú na vé cúun xinî. Núu súcuan te cahnde rō, chi maá jéé sajnêñu nuū

ñūhun, áchí de. <sup>8</sup> Te ni cahân mozo un jíin de: Stóo ní na cuñî ñin na cuiyā, te na nástáyá ná jéhê te chuhun ná jéhen. <sup>9</sup> Te na cóndêhe yó núu tú cuun ndehê inga cuiyā. Te núu tuú, te tahndê, achí mozo. Achí yá.

*Jeê ní nasávāha ya ñin ñahan quivî ndétātú*

<sup>10</sup> Te ñin quivî ndétātú te stéén Jesús jñūhun ini vehe ñi sinagoga. <sup>11</sup> Te iyó ñin ñahan jeé ní cuu xahūn unî cuiyā huhú ña. Chi ñin tachí ni sáha jeê jíca tñî ña, te tuá cúu cuiti caca jnuu ña. <sup>12</sup> Te ni jito Jesús nuū ña, te ni cana ya ña, te ni cahân yâ jíin ña:

Vijna te nduvāha ní jéé huhú ni.

<sup>13</sup> Te ni soó yá ndaha ya siquî ña, te ni nucuiñî jnuu-ni ña, te ni nacuatáhú ña nuū Yaā Dios. <sup>14</sup> Te tēe cújéhnú ini vehe ñi sinagoga, ni quiti ni de nuū Jesús jeé ní nasávāha ya ñahan un quivî ndétātú. Te ni cahân de jíin ñayuu:

Íñu quivî iyó jéé sájniñu yó, te táca quivî ún quijicoo ró nduvāha ró. Te quivî ndétātú chi ma cúu, áchí de.

<sup>15</sup> Yūcuán na te ni cahân maá Jítoho yō jíin de:

Tēe stáhú-ni cácuu ró. Quivî ndétātu ¿á tu cándají ró stiquî rō burro ró jéé quíscoho ró tí ndute? <sup>16</sup> Te ñahan yáha jéé cúu ña ñin sêhe yucūn Abraham, chi nájñūhun ni conuhî ña xahūn unî cuiyā ni sáha Satanás. ¿Te á tu iyó váha jeê nájñūhun nandají rí ña nuū cuehivî ndóho ña quivî ndétātú? Achí yá.

<sup>17</sup> Te jeê ni cáhân yá súcuan, te táca tēe cájito uhú de ya, ni cacucanu de. Te ndihî ñayuu ún chi ni cacusiñî ni i jito i táca jniñu jéhnú sáha ya.

*Jñūhun yátá siquî ndiquin mostaza  
(Mt. 13.31-32; Mr. 4.30-32)*

<sup>18</sup> Te ni cahân yá:

Na cáhân rî ñin jñūhun yátá návāha cuni rō ndese ndúcuehê ñayuu ndácu Yaā Dios jniñu nuū. <sup>19</sup> Ndúcuehê i nájñūhun jéhnú ñin ndiquin mostaza jeê jéquin ñin tēe nuū ñūhun de, te ndúu nájñūhun ñin yujnu. Te cúu cáhnu, te táca saa chí casáha tí tacá tí chíji ndaha ún. Achí yá.

*Jñūhun yátá siquî levadura  
(Mt. 13.33)*

<sup>20</sup> Te ni cahân tucu ya:

Súcuan cúu jeê ndúcuehê ñayuu jeê ndácu Yaā Dios jniñu nuū: <sup>21</sup> Cúu nájñūhun levadura jeé ní quihîn ñin ñahan, te ni saca ña jíin únî kilo harina, te ni ndaa ndihî ñujen ni sáha. Achí yá.

*Siquî jeé quivî yó yéhyî túú  
(Mt. 7.13-14, 21-23)*

<sup>22</sup> Te jíca Jesús jeé cuahán yá ichi ñūú Jerusalén, te yáha ya táca ñuu náhnú jíin ñuu lulí, te stéén yâ jñūhun. <sup>23</sup> Te ñin ñayuu ni cajñūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jín i:

<sup>24</sup> Condiñví ni rō quívicoo ró ndaha Yaā Dios. Chí cúu nájñuhun ñn yéhyí tū. Te cahān rī jín ró jeē ñn quíví te cuehē ñayuu nducú i, te ma cúu ga. <sup>25</sup> Te quíví ún te sáha rī nájñuhun ñn tēe chíí vehe jeē ndocuiñí de te nacasi de yéhyí. Te ichi yátá véhe cuiñí rō jínáhan rō, te scáján rō yéhyí, te cahān rō: Nune ní yéhyí na quívicoo ná. Te cahān de jín ró: ¿Nde nuū véjicoo ró? Chí tu jíní rī rohó, achi de. <sup>26</sup> Yūcuán na te quejeé ró cahān rō jín de: Ni cayeji ná ni cajihi ná jín ní, te iní calle ñuu na ní steén ni jñuhun, achi rō. <sup>27</sup> Te cahān maá de: Cahān rī jín ró jeē tu jíní rī rohó ndé chí véjicoo ró. Cuijyo quingoo ró, chí ñayuu casáha jñíñu néé cácuu ró. Achi de. <sup>28</sup> Te quívicoo ró núu ndahyú rō, te nacayíhí yuhu ró jéē ndoho xeēn rō. Te coto ró núu Abraham jín Isaac jín Jacob jín ndihí tēe ni canacani jñuhun Yaā Dios, cáyūcú de ñuu nuū ndácu ya jñíñu. Te rohó, vēsú cácuu ró yúcūn de, te quívicoo ró núu ndoho ró. <sup>29</sup> Te cuehē ñayuu, vēsú tu cácuu i yucūn de, te quijicoo i ichi núu cáne niāndii jín ichi núu quée niāndii, ichi norte jín ichi sur. Te cucōo i mesa caji i staā ñuu nuū ndácu Yaā Dios jñíñu. <sup>30</sup> Te sava ñayuu jeē vijna cácuu i sandíhí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandíhí. Achí yá.

*Jeē ní cuculhyá ní yā siquí ñayuu ñuu Jerusalem*

(Mt. 23.37-39)

<sup>31</sup> Te maá quíví un ní quecoo jecu tēe fariseo, te ni cacahān de jín yá:

Cuijyo ní quíñn ní inga lado, chí cúní Herodes cahni de níñn, áchí de.

<sup>32</sup> Te ni cahān yá:

Cuángoo te castūhun ró nuū tēe mañoso un jéē ná tu jinú quíví cuu rī, chí vijna jín sáñe quenehen rī tachí iní ñayuu, te nasávaha rī ñayuu cácuñú. Te isá te jínu jñíñu sáha rī, achi rō. <sup>33</sup> Chí cánuú jéē cáca rī quíñn rī vijna jín sáñe jín isá, te jinú rī Jerusalén. Chí tēe canacani jñuhun Yaā Dios, tu cájilhí de inga lado, chí maá-ní iní ñuu Jerusalem cájehni i de. Achí yá.

<sup>34</sup> Rohó ñuu Jerusalem, jéñni rō tēe canacani jñuhun Yaā Dios, te jéhe ró yúu xiní tēe tájij Yaā Dios véjicoo nuu rō. Te cuehē jínu ní cuni rī nastútú rí sēhe ró, nájñuhun ndují jéē nastútú tí sēhe tí chíji ndijēn tí, te tu ní cúní rō. <sup>35</sup> Núu súcuan te vijna te stóo unu na rí rohó jín sēhe ró. Te cahān rī jín ró jéē ndé vijna te ma cóto cuiñi gā rō nuū rī, chí nde quíji quíví jeē cahān sēhe ró: Yohyo váha Yaā cúu Yaā véndijij jín jñíñu maá Jítoho yō Yaā Dios, achi i. Achí yá.

*Jeē ní nasávaha ya ñn tēe chúhí cuehyi cuiñi*

## 14

<sup>1</sup> Te ñn quíví ndétātu ní jehēn yā vehe ñn tēe fariseo cujéñnu, ni jecaji yā staā jín de. Te táca gá tēe fariseo cájito yuhu de ya núu stívi yá. <sup>2</sup> Te yúcuan ñn ñn tēe chúhí de cuehyi cuiñi, índichi de núu yá. <sup>3</sup> Te ni cajñuhun yá tēe cástéén tutu ley Yaā Dios jín táca tēe fariseo:

¿A iyó ley jeē nasávaha rī ñayuu cácuñú quíví ndétātu, chí tuú? áchí yá.

<sup>4</sup> Te maá de tu ní cácahān cuiñi de. Te ni jñú ya tēe chúhí un, te ni nasávaha ya de, te ni cahān yá jeē na núnun de vehe de. <sup>5</sup> Te ni cahān yá jín de jínáhan de:

¿Nde ñn rohó núu burro ró chí stíquí rō ningava tí iní pozo, te á tu yachí natava rō tí vēsú quíví ndétātu cúu, chí naún? Achí yá.

<sup>6</sup> Te tu ní cúu stío cuiñi de ní ñn jñuhun nuū yá jeē súcuan ni cahān yá.

*Jñuhun siquí ñayuu jéngoo vico*

<sup>7</sup> Te ni jito Jesús jeē tēe ni cataca ún, cánacāji de silla yíñuhún gá nuū mesa cucōo de. Te ni cahān yá jñuhun yáha jín de:

<sup>8</sup> Núu ñn tēe cana de jeē quíñn rō ñn vico nándaña, te ma cucōo ró lugar nuū yíñuhún gá. Chí núu súcuan te sanaa te je ni cana de ñn tēe cujéñnu ga vēsú rohó. <sup>9</sup> Te quee tēe ni cana rohó, te cahān de jín ró: Ndonda, te na cucōo tēe yáha jíná. Yúcuan na te cucanu rō jeē quíñn rō cucōo ró ndé sandíhí na. <sup>10</sup> Chí sa suhva núu ni cana ñn tēe rohó, te cucōo ró ndé lugar sandíhí na. Te núu quee tēe ni cana rohó, te cahān de jín ró: Amigo, nehen cucōo ró ñn lugar nuū yíñuhún gá, achi de. Yúcuan na te ñayuu cáyucu mesa jín rō coto i jeē sañéñnu de rohó. <sup>11</sup> Súcuan ní cahān rī jñuhun yáha návaha cuni rō jeē táca ñayuu jeē sañéñnu i maá i, nuu i sáha Yaā Dios. Te ñayuu jeē snúu i maá i, ndujéñnu i sáha ya. Achí yá.

<sup>12</sup> Te suni ní cahān yá jín tēe ni cana ya yéji yá staā:

Núu sáha ró ñn vico cúsamá chí jéē cuxíni, te ma cána ró ñayuu cácuu amigo rō, jín ñani rō, jín jñahan rō, jín ñayuu cucá. Chí núu súcuan te suni maá i nacana i rohó, te súcuan naníñn rō jeē ní jéhe ró. <sup>13</sup> Chí sa suhva núu sáha ró vico, te cana ró ñayuu ndahú, ñayuu cuhndú, ñayuu chacuá, jín ñayuu cuaá. <sup>14</sup> Te súcuan te quendōo ndetú rō, chí ma cúu nacuaña i nuu rō. Te níñn rō tahú rō quíví nátecu ñayuu ndaa, achí yá.

*Jñuhun yátá siquí vico cuxíni*

<sup>15</sup> Te ñn tēe yéji staā jín yá, ní jini de jñuhun yáha, te ni cahān de jín yá:

Yóhyo ndetú ñayuu jeē cáji staā nde ñuu nuū ndácu Yaā Dios jñíñu, áchí de.

<sup>16</sup> Yúcuan na te ni cahān Jesús ñn jñuhun yátá jéē steén yá jeē cána Yaā Dios ñayuu quívicoo i ñuu nuū ndácu ya jñíñu:

ñn tēe ní sáha de ñn vico cáñu cuxíni, te ní taji de mozo ní cana cuehē ñayuu. <sup>17</sup> Te maá

quívī cuxíni, te ni tají de mozo de cuacana ñayuu jeē quíjicoo caji staā: Nehen ní jínánhan ní, chí je iyó túhva ndihi, áchí mozo. <sup>18</sup> Te ndihi i ni cacahān i jeē na cóne cáhnu ni de chí ma quíngoo i. Hn tēe ni cahān de: Sáá ní jeen rí ñin ñuhun te cánuú quícondēhe rí, te na cóne cáhnu ni de chí ma jeé rí. Achí de. <sup>19</sup> Te inga de ni cahān: Ni jeen rí uhūn yunta stiquí, te quihīn rí coto ndee rí tī, te na cóne cáhnu ni de nuūrī chí ma jeé rí, achí de. <sup>20</sup> Te inga de ni cahān de: Sáá ní quijnánhan rí, te jeé yúcuau ma cúu jeé rí, achí de. <sup>21</sup> Te cuanuhun mozo un, te ní castūhūn de nuū patrón de ndese ni cacahān ñayuu. Yūcuán na te ni quiṭī ní patrón, te ni cahān de jíin mozo de: Yachí quihīn rō táca calle náhnu jíin calle lulí, te cana rō ñayuu ndahú, ñayuu cuhdú, ñayuu chacuá, jíin ñayuu cuaá, na quíjicoo i vico, achí de. <sup>22</sup> Te ni jehēn mozo, te ni ndee de, te ni cahān de jíin patrón de: Je ní sáha ná jēé ní cahān ní, te cúmanī gā ñayuu te chítú vehe ní, achí de. <sup>23</sup> Te ni cahān tucu patrón: Quihīn tucu rō táca calle jíin ichí, te cana fuerza rō ñayuu na quíjicoo i, návaha chítú vehe rí. <sup>24</sup> Chí cahān rí jíin rō jeé ní ñin tēe ní cana rí xíhna ñúhūn, ma cuáha cuṭi rí jñuhun jeē cuxíni de vehe rí, achí de. Achí yá.

*Jñuhun jeē cánuú nacani vāha ni yō te condiquīn yō Cristo*

<sup>25</sup> Te cuehē ndasí ñayuu cándiquīn i Jesús cuango i jíin yá, te ni ndió cóto ya nuū i, te ni cahān yá jíin i:

<sup>26</sup> Núu na-ni ñayuu cuní condiquīn ruhū, te núu manī gā i jíin tátá i, náná i, ñasihí i, sēhe i, ñani i, cuáha i, vēsú jíin ruhū, ma cúu cuu i ñayuu scuáha jíin rí. Te núu ndáhvī gā ní i siquī jeē cóo vāha máá i vēsú jeē cóndiquīn i ruhū, te suni ma cúu tucu. <sup>27</sup> Te na-ni ñayuu núu tu jéhe i jñuhun ndoho i jñúndóho vēsú nde cuu i jeē siquī jeē cóndiquīn i ruhū, te ma cúu cuu i ñayuu scuáha jíin rí. <sup>28</sup> Chí núu ndé ñin rō cúní rō sáha rō ñin vehe cáhnu, zá tu cánuú jēé xíhna gā cucōo rō te tava rō cuenta núu canda xūhun jēé sínu rō? <sup>29</sup> Chí núu tuú, te núu je ní jequīn rō cimientó, te tu canda xūhun rō sínu rō, yūcuán na te táca ñayuu sácata i coto i róhó. <sup>30</sup> Te cahān i: Tēe yáha ní quejéé de sáha de vehe, te tu ní canda de sínu de, achí i. <sup>31</sup> Te suni sūcuau núu ñin rey quihīn de cuajnáhan de jíin inga rey jeē vējí siquī de, zá tu cánuú jēé xíhna gā cucōo de te nacani ní de núu canda uxí mil soldado jeē cuajnáhan de jíin inga rey jeē vējí siquī de jíin ócō mil soldado? <sup>32</sup> Chí núu tú canda de, te níni jíicá gā vējí inga rey, te tají de tēe cándiso jñífu, cajnúhūn de na vē cuní inga rey jeē cuáha de nuū, te jecuíñ-ni. <sup>33</sup> Te máá rō jijnánhan rō, suni sūcuau cánuú jēé xíhna gā nacani ní rō cahnde ní rō stóo rō ndihi jeē névaha rō, chí núu tuú te ma cúu cuu rō ñayuu scuáha jíin rí.

*Jñuhun yátá síquī ññ*  
(Mt. 5.13; Mr. 9.50)

<sup>34</sup> Te ñayuu cácanđije cácuu i nájnūhun ññ. Vāha iyó ññ, te núu ññ ún na náá jeē uhvuá, ¿te ndese nduu uhvuá tucu? <sup>35</sup> Tuá cuajníñu cuṭi, ni jeē chūhun ñayuu nuū ítu, ni jeē ndúu jēhen, chí máá cate í-ni i. Táca róhó jēé jíni sóho, na chúsóhó rō. Achí yá.

*Jñuhun yátá síquī lanchi ní sana*  
(Mt. 18.10-14)

## 15

<sup>1</sup> Te táca tēe cástútú xūhun renta jíin táca gá tēe casáha cuēchi, ni quecoo de nuū Jesús jeē cuní sóho de jñuhun cahán yá. <sup>2</sup> Te táca tēe grupo fariseo jíin tēe cástéén tutu ley Yáa Dios, ni cacahān de siquī yá:

Tēe yáha jétáhú de táca tēe casáha cuēchi te yéji de jíin, achí de.

<sup>3</sup> Te ní cahān yá jñuhun yátá yáha jíin de:

<sup>4</sup> ¿Nde ñin rō núu névaha rō ñin ciento lanchi, te núu scuíta rō ñin tī, te á tu stóo rō cúun xico xahūn cuñ gā tī yucu, te quinan-ducú rō quiṭi ní sana ún ndé nanihīn rō tī?

<sup>5</sup> Te núu ní nanihīn rō tī, te coso sūcuu rō tī, te cusī ní rō. <sup>6</sup> Te núu ní ndee rō vehe rō, te nastútú rō táca amigo rō jíin ñayuu yúcu yajni jíin rō, te cahān rō jíin i: Na cusī ní yō, chí ní nanihīn rí lanchi rí jeé ní sana. Achí rō. <sup>7</sup> Te cahán rí jíin rō jeé suni sūcuau cúu nde andiví. Chí cusī gā ní yá jíin ñin ñayuu iyó cuēchi núu nacani ní i jeé stóo i cuēchi i, vēsú jíin cúun xico xahūn cuñ ñayuu iyó ndáá jeé tuá jíni ñúhūn nacani ní i.

*Jñuhun yátá síquī ñahan ní scuíta xūhūn*

<sup>8</sup> Te núu ñin ñahan névaha ña uxí peso cāa, te núu scuíta ña ñin, zá tu nastáñ ña lámpara te nastá ña vehe, te nanducú yúcuu ña nde nanihīn ña? <sup>9</sup> Te núu ní nanihīn ña, te nastútú ña táca amiga ña jíin ñayuu yúcu yajni jíin ña, te cahān ña jíin i: Na cusī ní yō, chí ní nanihīn rí xūhun jēé ní scuíta rí. Achí ña. <sup>10</sup> Te cahán rí jíin rō jeé suni sūcuau cusī ní táca ndajéhé Yáa Dios siquī ñin ñayuu iyó cuēchi núu nacani ní i jeé stóo i cuēchi i. Achí yá.

*Jñuhun yátá síquī sūchi ní jehēn jecó*

<sup>11</sup> Te ní cahān gā yá:

Ñin tēe ní iyo uū sēhe yí de. <sup>12</sup> Te tēe suchí gá ní cahān i jíin tátá i: Tátá, tahu sáva ní ndajníñu ní, te cuáha ní sava cuu tahu ná, achí i. Te ní tahu sáva de tahu ndindúú i. <sup>13</sup> Te ní cuu jecu-ni quívī, te tēe suchí gá un ní stutú ndihi i ndajníñu i. Te ní quenda i cuahān i ñin ñuu jíicá. Te yūcuau ní snáá i tahu i, chí ní jexīn cáhá i. <sup>14</sup> Te ná ní ndihi ní jexīn i, te ní quee ñin jnamá xeén ñin ñuu ún, te ní quejéé cúmanī jeé caji i. <sup>15</sup> Yūcuán na te cuanducú jñífu i nuū ñin tēe ñuu ún. Te ní tají de i cuahān i rancho de jeé cóto i quíñ de. <sup>16</sup> Te cúní i caji i vēsú soō ndúchi jeé cáyeji

quin̄ ún, návāha ndutú chíji i. Te ni ñn ñayuu tú na vé jéhe nuū i. <sup>17</sup> Yūcuán na te ni quejéé i nácani ni i: Tāca mozo casájniñu vehe tátá rī, iyó cuéhē staa cáyeji i. Te ruhū chí jí rī sōco yāhá. <sup>18</sup> Na quínuhun rī nuū tátá rī, te cahān rī jíin de: Tátá, ni sáha ná cuéchi nuū Yaā Dios jíin nuū maá ní. <sup>19</sup> Vijna te nasūu gá tēe vāha cúu ná jéé cónani ná sēhe ní. Te cuāha ní jñuhun cuu ná nájñuhun ñn mozo ni, achi rī. <sup>20</sup> Yūcuán na te ni naquihin i ichi cuanuhun i vehe tátá i.

<sup>21</sup> Te níni jícá gá vēji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de sucūn i, te ni techuhú de i. <sup>21</sup> Yūcuán na te ni cahān i jíin de: Tátá, ni sáha ná cuéchi nuū Yaā Dios jíin nuū maá ní. Vijna te nasūu gá tēe vāha cúu ná jéé cónani ná sēhe ní. Achí i. <sup>22</sup> Te maá tátá i chí sa ni cahān de jíin táca mozo de: Cuáquihin sahma vāha ga te chuhun ró i. Te chuhun ró ñn xehyu ndaha i, te chíhi ró ndíjēn jehē i. <sup>23</sup> Te quiquihin ró becerro xéhen, te cahni ró tí na cáji yō, chí sáha yó vico. <sup>24</sup> Chí sēhe yí rí yāha, nájñuhun je ni jíhi i, te ni natecu i. Chí tu ní jíni rī ndé chí ní jéhēn i, te ni ndee i, achí de. Te ni caquejéé de cása de vico.

<sup>25</sup> <sup>25</sup> Te sūchi jévāha, íne i nde rancho, te vëndiji i, te ni cuyajni i yatā véhe. Te ni jíni i jeé cúu yaa te cájita jéhé ñayuu. <sup>26</sup> Te ni cana i ñn mozo, te ni cajñuhún i na vé cúu jeé cúu. <sup>27</sup> Te ni cachi mozo un nuū i: Ni ndee ñani rō, te tátá rō ni jehni de becerro xéhen, chí ni ndee vāha i nuū de, achí mozo. <sup>28</sup> Yūcuán na te ni quiñiñi sūchi jévāha, te tu ní cúni i ndívi i. Te ni quenda tátá i, te ni cahān ndahú de jíin i jeé na ndívi i. <sup>29</sup> Te ni cahān i jíin tátá i: Níni sáha ná jñiñu ndácu ní, te tu cúniñi cuiñi ni na nuū ní. Te tu jéhe ní vésú ñn lítú nuū ná, jeé sáha ná vico caji na jíin táca amigo na. <sup>30</sup> Te ni ndee sēhe ní yāha jeé ni jéxín cáhá i xuhun ní jíin táca ñahan. Te ni jehni ní becerro xéhen caji i, achí i jíin tátá i. <sup>31</sup> Yūcuán na te ni cahān de jíin i: Séhē, róhó chí níni ndéé ró jíin rí, te ndíhi jeé névāha rí chí suni cuenta maá ró cúu. <sup>32</sup> Te vijna chí iyó vāha jeé sáha yó vico te cusí ni yō. Chí ñani rō yāhá, nájñuhun ni jíhi i, te ni natecu i. Chí tu ní jíni yō ndé chí ní jéhēn i, te ni ndee i, achí de. Achí yá.

*Jñuhun yatá siquī mozo jeé ni stáhú de patrón de*

## 16

<sup>1</sup> Te suni ni cahān Jesús jíin tēe cácuāha jíin yá:

Ñn tēe cúcá ní Iyo ñn mozo de jeé ndiso jñiñu nuū táca gá mozo. Te ni cacahān jíin patrón un jéé mozo un snāá cáhá ndajñiñu de. <sup>2</sup> Te ni cana de mozo un, te ni cahān de jíin: ¿Na jñuhun cúu yāha jéé nihín rī siquī rō? Nacuāha cuenta jñiñu ndiso ró, chí ma

cóndiso jñiñu ga rō nuū mozo rī. Achí de. <sup>3</sup> Yūcuán na te jéni ni maá de: ¿Ndese sáha rí vijna? Chí patrón rī quenehen de jñiñu rí. Te tú ndacuī rī jeé cáte rí ñuhun, te jeé cacān rī caridad chí cūcanu rī. <sup>4</sup> Núu sūcuān te jíni rí ñn jeé sáha rí, návāha ñayuu cájeen nuū patrón rī, cuāha i vehe condee rī núu na queé quiví jeé quénehen de jñiñu rí. <sup>5</sup> Te ni cana de ná ñn ná ñn tēe jeé cátaū nuū patrón de. Te ni cajñuhún de ñn: ¿Nasaa táu rō nuū patrón rī? <sup>6</sup> Te ni cahān tēe ún: ñn ciento barril aceite, achí de. Te ni cahān mozo un: Yāhá na cuāha rí lista rō, te cucōo yachí rō, te na sáha ró inga lista jeé un xico uxí na, achí de. <sup>7</sup> Yūcuán na te ni cajñuhún de inga tēe: Te róhó, ¿nasaa táu rō? Te tēe un ní cahān de: ñn ciento cajón trigo, achí de. Te ni cahān de jíin tēe ún: Yāhá na cuāha rí lista rō, te na sáha ró inga lista jeé cúun xico na, achí de. <sup>8</sup> Yūcuán na te patrón ni cahān de: Nacā jeé ndichí ní sáha tēe cúnéé un, achí de. Te cahān rí jíin ró jeé ñayuu ñayívi yāha, ndichí gá casáha i jeé quendōo vāha i nuū jñahan i, vésú ñayuu cácanñe nuū Yaā Dios.

<sup>9</sup> Núu sūcuān te cahān rí jíin ró jeé ndichí gá na sáha ró vésú jeé ní sáha mozo ndichí un. Chí ini ñayívi yāha nuū yíhi cuéchi, na sáha ró jñiñu vāha jíin xuhun ró, cuāha ró núu ñayuu ndahú, návāha vésú núu ni ndíhi xuhun ró ñayívi yāha, te quiñicoo ró andívi núu coo vehe ró ní cáni.

<sup>10</sup> Tēe jeé squícu vāha jíin ñn jñiñu lúli-ni, suni squícu vāha de jíin jñiñu cáhnu. Te tēe jeé stahú jíin ñn jñiñu lúli-ni, suni stahú de jíin jñiñu cáhnu. <sup>11</sup> Núu sūcuān te núu tu squícu vāha ró jíin xuhun jeé iyó ñayívi yāha nuū yíhi cuéchi, te ma cuāha ya jeé vāha cuu ró ní cáni andívi. <sup>12</sup> Te núu tu squícu vāha ró jíin ndajñiñu jeé ni jéhe núu ya nuū rō ñayívi yāha, te ma cuāha ya tahū cuu ró ní cáni.

<sup>13</sup> Ni ñn mozo ma cúu cuajñiñu de nuū uñ patrón. Chí quiñiñi de nuū ñn te coo maní de jíin inga, chí squícu vāha de nuū ñn te sájéé ni de nuū inga. Te suni sūcuān ma cúu cuajñiñu ró núu Yaā Dios te núu máni siquī xuhun ndíhví ni rō, achí yá.

<sup>14</sup> Te tēe fariseo ni casacatā de nuū yā jeé ní cajini de táca jñuhun cáhān yā, chí tēe cutóo xuhun cácuu de. <sup>15</sup> Te ni cahān yā jíin de:

Maá ró cása ha ró jéé tēe ndaā cácuu ró núu ñayuu. Te Yaā Dios chí jíni yā ndese cáa ini anuá rō. Chí jñiñu cájeni ni ñayuu jeé jñiñu jéhu cúu, te nuū Yaā Dios chí jñiñu néé cúu.

*Siquī ley Yaā Dios jíin siquī jeé ndácu ya jñiñu*

<sup>16</sup> Nde ná tu quiñi Juan tēe scuándute, te ní Iyo ley jeé ní jéhe Yaā Dios nuū Moisés, te suni ní castéén táca tēe cáncani jñuhun ya. Yūcuán na te ná ní quiñi Juan, te ní quejéé jíitē núu jñuhun vāha ndese ndácu Yaā Dios jñiñu.



Te tāca ñáyyuu nducú ndéyí i quíwicoo i ndaha ya.

17<sup>o</sup> Te yí gá cúu jeē náá ñn letra nuū tútu ley yā vēsú jeē náá andiví jíin ñáyiví, chí squícu ndihí jñuhun cáhān.

*Siquí jeē ma stóo jnāhan tēe jíin ñahan*  
(Mt. 19.1-12; Mr. 10.1-12)

18<sup>o</sup> Núu ñn tēe stóo de ñasihí de te quijnāhan de jíin inga ñahan, núu súcuan te cásiquí ndéē de ña. Te núu ñn tēe condeca de ñahan ní ndusñn, suni cásiquí ndéē de ña, áchí yā.

*Jñuhun tēe cúcá jíin Lázaro*

19 Te ni cahān gā yā:

Ni Iyo ñn tēe cúcá, ní ñuhun de sahna lúu váha ndasí. Te ndiquiví ni Iyo váha ndasí jée ní yeji de. 20 Te suni ni Iyo ñn tēe ndáhú, nání de Lázaro, néne de yéhyí tēe cúcá un, te ní cáhnu de ñn ndíhyi. 21 Te máni cúni de jeē ndutú chíji de jíin stāa cuēchi jeē stívi tēe cúcá un. Te quécoco ina te cánayuu ti nuū ndíhyi de. 22 Te ni jihí tēe ndáhú un, te tācá ndajéhé Yāā Dios cuango yá jíin ánuá de nde andiví nuū néne Abraham. Te suni ni jihí tēe cúcá un, te ni quindúji de. 23 Te tēe cúcá un xeēn ndóho de ñe de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jíin de. 24 Yūcuán na te ni cana cóho de: Tātā Abraham, cundáhú ni ní saña, te tají ní Lázaro, na quíchundaji de xini ndáha de nuū ndúte, te quiji de stáji de yáá ná. Chí xeēn ndóho ná nuū yáñuhūn yāhá. Achí de. 25 Te ni cahān Abraham jíin de: Séhē, nucuñun ni rō jeē ni níñn rō ndihí jeē váha ná ní cotecu rō, te Lázaro chí sa suhva jñundóho ni níñn de. Te vijna je ni ndusñ ni de yāhá, te róhó chí ndóho rō jíñá. 26 Te suni íyó ñn jeē cunú téyí, ñe méññu yó jíijnāhan yó. Te ñayuu cáññn yāhá, vēsú cácu ni yāha i jeē i nuū rō, te ma cúu. Te ni ma cúu yāha máá rō quijicoo rō yāha. Achí Abraham. 27 Yūcuán na te ni cahān tēe cúcá: Núu súcuan te cáhān ndahú ná jíin ní, Tātā Abraham, tají ní Lázaro na quíñn de vehe tātá na. 28 Chí íyó úhūn gā ñani ná, te na quícachi de nuū i jeē ñe nacani ni i te stóo i cuēchi i, návāha ma quíwicoo i nuū ndóho ná yāha, áchí de. 29 Te ni cahān Abraham jíin de: Je cánevāha i tutu jeē ní tee Moisés jíin táca tēe ni canacani jñuhun Yāā Dios. Suu yūcuán na chúhun ni i, áchí Abraham. 30 Te ni cahān tucu tēe cúcá: Vēsú súcuan, Tātā Abraham, te núu ñn ñayuu ni jihí quíñn nuū i, yūcuán na te nacani ni i jeē stóo i cuēchi i, áchí de. 31 Te ni cahān Abraham jíin de: Núu tu chúhun ni i jñuhun ni nacani Moisés jíin táca tēe ni canacani jñuhun Yāā Dios, suni ma candíje cuiti i núu natecu ñn ndíyí quíñn nuū i, áchí de.

*Xeēn coo siquí ñáyyuu squívi jnāhan nuū cuēchi*

(Mt. 18.6-7, 21-22; Mr. 9.42)

## 17

1 Te ni cahān Jesús jíin tēe cáscuáha jíin yā: Máni íyó jée nducú squívi ñayuu nuū cuēchi. Te nacā xeēn ndoho ñayuu jeē squívi jnāhan nuū cuēchi. 2 Vāha ga núu ní conuhñ ñn yōso cáhnu sucūn i te quēe i chíji ndute mar, vēsú jeē squívi i ñn sūchi lúli yāha nuū cuēchi. 3 Coto ma sāha rō súcuan jíijnāhan rō.

4 Te núu jnāhan rō sāha de cuēchi siquí rō, te cahān rō nuū de. Te núu nacani ní de, te cone cáhnu ní rō nuū de. 4 Te núu uxā jínu jeē ñn quiví sāha de cuēchi siquí rō, te núu uxā jínu nacani ní de te cahān de jíin rō jeē cone cáhnu ní rō chí ma sāha ga de, te cánuu cone cáhnu ní rō nuū de. Achí yā.

*Jeē yóhoyo cújéñnu jñuhun cándíje*

5 Te tēe cácuu apóstol ni cacahān de jíin Jítoho yō:

Sāha ní jée ñihin ga candíje ná jée sāha Yāā Dios jeē cájicān na núu yā, achí de.

6 Te ni cahān maá Jítoho yó jíin de:

Núu cáncandíje rō vēsú ñn tíhli-ni, nájnūhun ñn ndiquin mostaza jeē tíhli-ni cáa, te cuu cahān rō jeē nuyūñdu yāha na quēnda te nucondichí nde nuū mar, te coo nájnūhun cahān rō.

*Jeē cánuu squícu váhaya yó núu yā*

7<sup>o</sup> Ndé ñn rō íyó mozo rō jeē jitu de chí ndíto de quiti ndéca rō, te núu ní najinū de vehe rō, te tu cahān rō jíin de jeē cúcōo de caji de staā. 8 Chí sa suhva cáhān rō: Sāha rō ndeyu cuxini ri, te cani rō cóho rí. Te núu ni cuu ni yeji rí ni jihí ri, yūcuán na te caji maá rō coho rō, cacahān rō. 9 Te cacahān rō jeē tu cánuu nacuatáhú rō nuū mozo núu ni sāha de jññu ní ndacu rō, chí jeē cánuu sāha de cúu. 10 Te suni súcuan maá rō jíijnāhan rō, cácuu rō mozo Yāā Dios. Te núu ni casquícu rō táca jññu ní ndacu yá nuū rō, te cahān rō: Tu cánuu nacuatáhú yá nuū rí, chí ni sāha rí maá-ni jeē cánuu sāha rí, achí rō. Achí yā.

*Jeē ní nasávāha ya uxí tēe ndóho cuehyí stehyú*

11 Te jica Jesús ichi cuahān yā ñuu Jerusalén, te ni yāha ya cuahān yā méññu región Samaria jíin Galilea. 12 Te ni jinū yā ñn ñuu, te uxí tēe ndóho cuehyí stehyú ni quendacoo de vejnahan de ya, te jicá ní cajecuññ de. 13 Te ni cacana jee de:

Jesús, Maestro, cundáhú ní ní saña, áchí de jíijnāhan de.

14 Te ni jito Jesús nuū de, te ni cahān yā jíin de:

Cuángoo te stéén rō maá rō nuū tāca sūtú jeē ní canduvāha rō, áchí yā.

Te níni cuángoo de te ni canduvāha-ni de. 15 Yūcuán na te ñn-ni de ni nandíó cóo de nuū

Jesús, te cahan jee de, nacuatáhu de nuū Yaā Dios jeē ní nduváha de. <sup>16</sup> Te ni jecuiñi yití de nuū yā, te ni jequin de nuū de nde nuū ñuhun, te ni nacuatáhu de nuū yā. Te tee Samaria cūu de. <sup>17</sup> Te ni cahān Jesús:

¿A násuū ndihúxi de ni canduváha? Te ñn gā de, ¿naun tu ní canandicó de nacuatáhu de? <sup>18</sup> ¿A máñuhún-ni tee ñnu jicá yáha cūu jeē ní nandicó de nacuatáhu de nuū Yaā Dios?

<sup>19</sup> Te ni cahān yā jín tée ún:

Ndocuiñi quinhun rō. Chi ni candije rō jeē cuu nasávaha ri rohó, te jeē yúcuan ní nduváha rō, áchi yá.

*Ndese coo quiví jeē ndiji ya ndacu ya jniñu (Mt. 24.23-28, 36-41)*

<sup>20</sup> Te tee fariseo ni cacajnūhún de Jesús ndé quiví quejéé jeē ndácu Yaā Dios jniñu ini ñayiví. Te ni cahān yā jín de:

Ma queē ndijin jeē ndácu Yaā Dios jniñu. <sup>21</sup> Ni ma cūu cahān ñayuu: Yáha ñe ya ndácu ya jniñu, chí: Yúcuan ñe ya, áchi i. Chi je ndácu Yaā Dios jniñu mehñu rō jijnáhan rō. Achí yá.

<sup>22</sup> Yúcuán na te ni cahān yā jín tée cáscuáha jín yá:

Quee tiempo jeē yóhoyo cūu ni rō coto rō jeē ndiji ruhū, Yaā ní nduu tēe, te ma cóto rō jijnáhan rō. <sup>23</sup> Te cahān ñayuu jín rō: Yáha ñe ya, chí: Yúcuan ñe ya, áchi i. Te ma quingoo rō condēhe rō, ni ma cóndiquin rō i. <sup>24</sup> Chi nájnūhun sáha taja jeē ndíndéé ñn lado andiví te cundijin nde ñe lado, suni súcuan cuu quiví ndiji ruhū, Yaā ní nduu tēe, chi ndihi ñayuu coto. <sup>25</sup> Te jini ñuhún jeē xihna gā ndoho xeēn rí, te ñayuu iyó vijna, squéhichí i ruhū. <sup>26</sup> Chi nájnūhun ni cuu quiví ni iyo Noé, suni súcuan cuu quiví ndiji ruhū, Yaā ní nduu tēe. <sup>27</sup> Chi quiví un ní cayeji i, ni cajihí i, ni canandáha i, ni cajéhe i sehe síhí i jeē nándáha, nde ni jinū quiví jeē ní quiví Noé ini barco cáhnu jeē naní arca. Te ni cuun saū xeēn, te ni ndaa ndute ni cajihí ndihi i. <sup>28</sup> Te suni súcuan ni cuu quiví ni iyo Lot. Ni cayeji i, ni cajihí i, ni cajeen i, ni caxicó i, ni cataji i itu, ni cajeni i vehe. <sup>29</sup> Te quiví jeē ní quenda Lot ini ñnu Sodoma cuahān de, te ni cuun ñuhún jín azufre ichi andiví, te ni snáa ndihi ñayuu. <sup>30</sup> Te suni súcuan coo quiví jeē ndiji ruhū, Yaā ní nduu tēe.

<sup>31</sup> Te quiví ún te ñayuu cáhñn yátá véhe, te ndajniñu i ñuhún ini vehe, cáhñn rí jín i jeē ma ndiví i naquihin i, chí cánuu cunu yachí i jeē cácu i. Te suni súcuan ñayuu casájniñu nuū itu, ma quinhun i vehe i jeē quihin i ndajniñu i. <sup>32</sup> Te nucūhun ni rō ndese ní ndoho ñasihí Lot jeē ní jhí ña. <sup>33</sup> Te núu ndé ñayuu cuní i cácu i nuū jnúndóho quiji nuū i jeē siquí ruhū, núu súcuan te jnahñu ndetú i ní cáni. Te núu ndé ñayuu, vésú na cūu i jeē siquí ruhū, te cotecu i ní cáni.

<sup>34</sup> Te cáhñn rí jín rō jeē quiví ndiji ri te quixí uū tēe ñn jito jecuaā, te ñn de naquihin rí, te inga de ndóo, chí tu ní cándije de. <sup>35</sup> Te coo uū ñahan jeē ndíco cáhnu, te ñn ña naquihin ri, te inga ña ndóo. <sup>36</sup> Te uū tēe sájniñu de nuū itu, te ñn de naquihin ri, te inga de ndóo. Achí yá.

<sup>37</sup> Te jeē ní cajini de jñuhun yáha, te ni cacajnūhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jín de:

Nájnūhun jeē cututú téji ndé-ni cūu nuū catú quiti ní jhí, suni súcuan coo táca jeē ní cáhñn rí ndé-ni cūu-ni nuū cáhño ñayuu.

*Jñuhun yátá siquí juez jín ñahan viuda*

## 18

<sup>1</sup> Te ni cahān yā ñn jñuhun yátá jín de jeē cánuu jeē niní cácan tahú de, te ma ndínuu ni de jín. <sup>2</sup> Te ni cahān yā:

Ni iyo ñn juez ini ñn ñuu. Te ni tu ndíso iyo de nuū Yaā Dios, ni tu yúhu de nuū ní ñn ñayuu. <sup>3</sup> Te suni ñuu un iyó ñn ñahan ní ndóo ndáhú. Te ñahan un jéhén-ni jéhén-ni ña nuū de, jícán ña jeē na sándaā de siquí ñn ñayuu jeē jito uhú i ña. <sup>4</sup> Te cuehé quiví tu ní cuní de sándaā de, te yúcuan na te ni jeni ni de: Vésú tu ndíso iyo ri nuū Yaā Dios, ni tu yúhu ri nuū ní ñn ñayuu, <sup>5</sup> te ñahan viuda yáha, yóhoyo stáhñn ña ruhū, te jeē yúcuan na sándaā ri siquí ñayuu jeē jito uhú i ña. Chi núu tuú, te quejéé rí jnaníni ní rí jeē quíji quíji ña. Achí de. Achí máá Jitoho yó.

<sup>6</sup> Te ni cahān gā yá:

Súcuan cuu jeē ní cahān juez, tēe tú ndaa. <sup>7</sup> Te Yaā Dios, nasúu súcuan cūu ya, chí sándaā yá siquí jniñu ñayuu ní nacáji ya jeē nduu ñuú cácan ndahú i jín yá. Chi jnama ya i nuú táca jeē cájito uhú i. ¿Te á cueé jnama ya i? <sup>8</sup> Cáhñn rí jín rō jeē yachí. Te quiví ndiji ruhū, Yaā ní nduu tēe, ¿á nhñn gā rí ñayuu cácan dije nhñn ini ñayiví? Achí yá.

*Jñuhun yátá siquí tēe fariseo jín tēe stútu xúhun renta*

<sup>9</sup> Te suni ni cahān yā jñuhun yátá yáha jín jecu ñayuu jeē cájeni ni i jeē ñayuu ndaa cácuu i, te cájeni ni i jeē sava ga ñayuu tu cáhño ndaa:

<sup>10</sup> ñn tēe fariseo cuahān de templo jeē cácan tahú de. Te ñn tēe stútu xúhun renta suni cuacacān tahú de templo. <sup>11</sup> Te tēe fariseo, índichi de, te súcuan ni jicān tahú de: Tátá Yaā Dios, na cútahū na núu ní, chí tu cūu ná nájnūhun cándaā sava ga tēe, tēe cuihná, tēe néé, tēe cásiquí ndéé jñahñn cácuu de. Ni tu cūu ná nájnūhun cáca tēe yúcuan jeē stutú xúhun renta jeē scáa ga de jícán de nuū ñayuu. <sup>12</sup> Te uū jínu jeē semana iyó ndite ní na núu ní, te jéhe ná nuū ní ñn ñn siquí táca úxi ndajniñu nhñn na, áchi de. <sup>13</sup> Te tēe stútu

xúhun renta, ni jecuíñi jicá de nuū templo, ni tu ní chúndeyi ní de jeē ndonehen de nuū de, chí sa suhva ni cani de yíqui jicá de jeē cucuíhyá ni de. Te ní cahān de: Tātā Yaā Dios, cundáhú ní ni sáña, chí tēe iyó cuéchi cúu ná, áchí de. <sup>14</sup> Te cahān rī jīn ró jeē tēe stútú xúhun renta, ni jetáhú Yaā Dios de, te cuanuhun de vehe de. Te tēe fariseo chí tu ní jetáhú yá de. Chí ñayuu jeē sajeñnu i máá i, sa ndululí i. Te ñayuu jeē sálulí i máá i, sa ndujéñnu i. Achí yá.

*Jeē ni jicān tahú Jesús jehē sūchi lúli*  
(Mt. 19.13-15; Mr. 10.13-16)

<sup>15</sup> Te ní quecoo ñayuu jīn sūchi lúli núu Jesús, jeē na sóo yá ndaha ya xiní i. Te tēe cáscuáha un ní cajini de jeē sūcuan cúu, te ní cacahān de nuū ñayuu vējicoo jīn i. <sup>16</sup> Te máá Jesús ní cana ya de, te ní cahān yá:

Cuāha jñūhun na quíjicoo sūchi lúli jīñā nuū rī, te ma cási rō jeē quíjicoo i. Chí ñayuu jeē ndió cóo ni i cani ní i nájñūhun sūchi yáha, suu i quívi ndaha Yaā Dios jeē ndacu ya jñiñu nuū i. <sup>17</sup> Te jendaá cahān rī jīn ró, nuū ñin ñayuu tú cuatáhú i jeē ndácu Yaā Dios jñiñu nuū i, nájñūhun jetáhú ñin sūchi lúli, ma quívi cuiñi i ndaha ya, achí yá.

*Jñūhun tēe cúcá*  
(Mt. 19.16-30; Mr. 10.17-31)

<sup>18</sup> Te ñin tēe cújéñnu ní cajñūhún de ya: Tēe vāha cúu ní Maestro. ¿Te na jñiñu vāha sáha ná te níñin tahú na cotecu na ní cāni andiví? Achí de.

<sup>19</sup> Te ní cahān Jesús jīn de: ¿Naun cahān rō jeē tēe vāha cúu rí? Tú ní ñin tēe vāha iyó, chí máá ñin-ni Yaā Dios. <sup>20</sup> Je jini rō táca jñiñu ní ndacu Yaā Dios: Ma cosiquí ndēe jñāhan rō. Ma cáhni rō ndiyi. Ma saculíhā rō. Ma sajnūhún rō. Cuatáhú rō nuū tatá rō nuū naná rō. Achí yá.

<sup>21</sup> Te ní cahān máa de: Tāca jñiñu yáha je ní squícu ná ndé ná lulí ná, achí de.

<sup>22</sup> Te Jesús ní jini ya jñūhun yáha, te ní cahān yá jīn de:

Ñin na jñiñu cúmaní sáha ró núu sūcuan. Xicó ndihi jeē névāha ró, te cuāha ró núu ñayuu ndahú. Te nde andiví cuāha ya jeē vāha ndasí núu rō. Yūcuán na te quiji ró condiquín rō ruhū, achí yá.

<sup>23</sup> Te ná ní jini sōho de jñūhun yáha, te yōhoyó ní cucuíhyá ní de, chí cúcá ndasí de. <sup>24</sup> Te jito Jesús jeē sūcuan cucuíhyá ní de, te ní cahān yá:

Tēe cúcá chí yōhoyó yí quívicoo de ndaha Yaā Dios jeē ndacu ya jñiñu nuū de. <sup>25</sup> Yachí gā yáha ñin camello yaú yutícuí vēsú jeē quívi ñin ñayuu cúcá ndaha Yaā Dios jeē ndacu ya jñiñu nuū i, achí yá.

<sup>26</sup> Te tēe ní cajini jñūhun yáha, ní cacahān de:

¿Ndé ñayuu cúu jeē cácu núu sūcuan? Achí de.

<sup>27</sup> Te ní cahān yá jīn de:

Ñayuu chí ma cúu squívi i máá i ndaha Yaā Dios, te máá yá chí cuu sáha ya, achí yá.

<sup>28</sup> Yūcuán na te ní cahān Pedro:

Sáña jijnāhan ná ní castóo ná ndihi jeē cánevāha ná, te cándiquín na níñin, áchí de.

<sup>29</sup> Te máá yá ní cahān yá jīn de:

Jendaá cahān rī jīn ró jijnāhan ró, núu na-ni ñayuu stóo i vehe, chí tātá, chí ñani, chí ñasihí, chí séhe, jeē squívi jeē scáca i jñūhun jeē ndácu Yaā Dios jñiñu nuū ñayuu, <sup>30</sup> núu sūcuan te naniñin cuehē gā i ñin ñayiví yáha, te tiempo quiji te cotecu i ní cāni, áchí yá.

*Jeē ni cahān tucu ya jeē cúu yá*  
(Mt. 20.17-19; Mr. 10.32-34)

<sup>31</sup> Te ní cana sūn ya ndihúxí uū tēe cáscuáha jīn yá, te ní cahān yá jīn de:

Vijna je cuángoo yó ñuu Jerusalén. Te yūcuan squícu ndihi jñūhun ndese ndoho ruhū, Yaā ní nduu tēe, nájñūhun ní catee tēe ní canacani jñūhun Yaā Dios nde jenahán.

<sup>32</sup> Chí ñayuu nastúu i ruhū nuū tēe nación Roma jeē cáyucú Jerusalén cándacu jñiñu. Te tēe un sácatá de nuū rī, te cahān neé de nuū rī, te tesihí de nuū rī. <sup>33</sup> Te cani de ruhū, te sáa te cahni de ruhū. Te nuū uní quívi te natecu rī. Achí yá.

<sup>34</sup> Te máa de tu ní cájécūhun cuiñi ní de tāca jñūhun yáha. Chí jñūhun yí cúu, te tu ní cúu jecūhun ní de jeē cahān yá.

*Jeē ní nasávāha ya ñin tēe cuáá ñuu Jericó*  
(Mt. 20.29-34; Mr. 10.46-52)

<sup>35</sup> Te ní cuyajni ya cuahān yá ñuu Jericó. Te ñin tēe cuáá néne de yuhíchi, jicān de caridad.

<sup>36</sup> Te ní jini sōho de jeē yáha cuehē ñayuu cuangoo i, te ní cajñūhún de naun cuangoo i. <sup>37</sup> Te ní cacahān i jīn de jeē Jesús, tēe ñuu Nazaret, yáha ya cuahān yá. <sup>38</sup> Yūcuán na te ní cana jee de:

Jesús Séhe yucūn David, cundáhú ní ni sáña, áchí de.

<sup>39</sup> Te ñayuu cuangoo ichi núu yá, ní cacahān i nuū de jeē na cási de yuhu de. Te máa de víhyá gā ní cana jee de:

Máa ní jeē cúu ní Séhe yucūn David, cundáhú ní ni sáña víi, achí de.

<sup>40</sup> Yūcuán na te ní jecuíñi Jesús, te ní cahān yá jeē na quíndeca i de. Te nuū ní cuyajni de nuū yá, te ní cajñūhun yá de:

<sup>41</sup> ¿Na vé cuní rō jeē sáha rí jīn ró? achí yá.

Te ní cahān de:

Jeē na ndúndijin tinūu ná cuní na, achí de.

<sup>42</sup> Te ní cahān Jesús jīn de:

Ndúndijin tinūu ró núu sūcuan. Ní candíje ró jeē cuu nasávāha rí rohó, te jeē yūcuan ní nduvāha ró, achí yá.

<sup>43</sup> Te ní ndúndijin-ni tinūu de, te ní ndiquín de ya, te nácuatáhú de nuū Yaā Dios.

Te ndihí ñayuu jeē ní cajito i, suni ni cacahān i jeē yóhyo vāha Yaā cūu Yaā Dios.

*Jñuhun Zaqueo*

**19**

<sup>1</sup> Te ni quāvi Jesús ini ñuu Jericó, te ni yāha-ni ya cuahān yā. <sup>2</sup> Te yūcuan iyó in tēe cūcá nāni de Zaqueo, te cūjéhu de nuū tēe cástútú xūhun renta. <sup>3</sup> Te cūni de coto de návāha cuni de ndé in cūu Jesús. Te tu ní cūu, chi cuehē ñayuu cuango i jíin yá, te ndiqui-ni cáa de. <sup>4</sup> Te jínu de ni cosnūu de. Te ni caa de xiní in nuyūhndú návāha coto de nuū yā, chi yūcuan yāha ya quihín yā. <sup>5</sup> Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachí nuu ró, chí jíni ñuhún jée ndóo ri vehe ró vijna, achí yá.

<sup>6</sup> Yūcuán na te ni cusí ni de, te yachí ni nanuu de, te ni jeca de ya cuahān de jíin yá vehe de. <sup>7</sup> Te ni cajito ñayuu jeē súcuan ni cuu, te ni cacahān i siquí yā jeē cuahān yā ndóo ya vehe in tēe sáha cuēchi. <sup>8</sup> Yūcuán na te ni ndocuifí Zaqueo, te ni cahān de jíin máá Jítoho yó:

Vijna te sava ndihí ndajniñu ná chi cuāha ná nuū ñayuu ndahú. Te núu ní scáa ga na ní jicān na xūhun nuū ñayuu, te nacuaāha ná úní gā siquí naquihín i, achí de.

<sup>9</sup> Te ni cahān Jesús:

Vijna te vehe yāha je ni cācu in tēe jeē ma jnahnú ndetú de, chi ni candije de nájñuhun ni candije jíi de Abraham. <sup>10</sup> Chi ruhú, Yaā ní nduu tēe, ni quiji ri nducú rí ñayuu jeē jnahnú ndetú, te jnama ri i, achí yá.

*Jñuhun yátá siquí uxí mozo jíin xūhun*

<sup>11</sup> Te nuū ñayuu ní cajini táca jñuhun yāha, ní cahān gā Jesús in jñuhun yátá jéē steén yā ndese coo quiví ndiji ya. Chi je ni cuyajni ya ñuu Jerusalén, te cájeni ni i jeē vijna ñuhún quejéé jéē ndácu ya jniñu sáha Yaā Dios. <sup>12</sup> Te ni cahān yā:

In tēe cūjéhu cuahān jicá de inga nación, návāha nihín jniñu de cuu de rey, te ndiji de ndacu de jniñu. <sup>13</sup> Te nde ná tu quihín de, te ni cana de uxí mozo de, te nuū in in i ni jéhe de in xūhun jéē ndéé yahu ndasí. Te ni cahān de jíin i: Sájniñu ró jéē na ndúcuehē xūhun yāha jíjnāhar ró níni jéē quihín rí te ndee rí, achí de. <sup>14</sup> Te ñayuu nación de cáquiti ni i nuū de, te ni catajái i jecu tēe cándiso jniñu cuango yatá de jeē cahān: Tu cánujnahan ni ñayuu nación na jéē cuāha ní jniñu nuū tēe yāha jéē cuu de rey nuū i, achí. <sup>15</sup> Te vésú súcuan te ni nihín jniñu de cuu de rey, te vendiji de nación de. Te nuū ní ndee de, te ni ndacu de jniñu jeē na quíjicoo mozo jeē ní jéhe de xūhun núu, návāha na cūni de nasaa ní canihín in in i siquí. <sup>16</sup> Te ni quee in mozo un núu de, te ni cahān i: In xūhun jéē ní jéhe ní núu ná, ní nduu uxí, achí i.

<sup>17</sup> Te ni cahān maá rey: Vāha mozo cūu ró, te vāha ní sáha ró. Chi ní squícu vāha ró jíin in jniñu lúli-ni, te vijna te sáha ri jeē cūjéhu ró ndacu ró jniñu nuū uxí ñuu jniñu ri, achí de.

<sup>18</sup> Te ni quee inga mozo, te ni cahān i: In xūhun jéē ní jéhe ní núu ná, ní nduu uhún, achí i. <sup>19</sup> Te suni ni cahān de jíin mozo un: Róhó, cūjéhu ró ndacu ró jniñu nuū uhún ñuu jniñu ri, achí de. <sup>20</sup> Te ni quee inga mozo, ni cahān i: Yāha nácuāha ná xūhun ní, chí ni chuvāha ná ini in pañuelo. <sup>21</sup> Chi ní yūhu ná nihín, chí tēe xeén cūu ní. Chi cuehē gā nándacān ní vésú jeē ní jéhe ní, te cuehē gā cūni ní vésú jeē cūu sáha mozo ní, achí de.

<sup>22</sup> Yūcuán na te ni cahān rey: Mozo neé cūu ró núu súcuan, te jíin jñuhun ni cahān ró te sándaá rí jeē iyó cuéchi ró jéé tu ní sájniñu ró jíin xūhun rí. Chí jéni ní ró jeé tēe xeén cūu ri, te cuehē gā nándacān rí vésú jeē ní jéhe rí, te cuehē gā cūni rí vésú jeé cūu sáha mozo rí. <sup>23</sup> Núu súcuan ¿te naun tu ní chūne ró xūhun rí vésú nuū banco? Te jeé ní ndee rí te naquihín ri xūhun rí nde jíin séhe xūhun núu. Achí de. <sup>24</sup> Te ni cahān de jíin ñayuu cáhlin yūcuán: Quende xūhun jíñá nuū i, te cuāhó ró núu mozo jeé névāha uxí, achí de. <sup>25</sup> Te ñayuu un ní cacahān i jíin de: Te ndese, chí je névāha de uxí, achí i. <sup>26</sup> Te ni cahān tucu rey: Cáhān rí jíin ró jeé ñayuu je névāha, sa quiji ga nuū i, te cnevāha cuehē i. Te ñayuu jeé tu névāha, sa cujiyo-ni vésú jecu jeé névāha i. <sup>27</sup> Te tēe jeé cájito uhú ruhú, jeé tu ní cánujnahan ni de jeé cuu ri rey nuū de, cuáquihín de na quíjicoo de yáha. Te cahni ró de coto ri, achí de. Achí Jesús.

*Jeé ni quiví Jesús ñuu Jerusalén*

(Mt. 21.1-11; Mr. 11.1-11; Jn. 12.12-19)

<sup>28</sup> Te nuū ní ndihí ni cahān yā jñuhun yāha, te ni jica ga yā cuahān yā ñuu Jerusalén. <sup>29</sup> Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu Olivos, te ni tají yá uū tēe cáscuāha jíin yá jeé quíngoo de. <sup>30</sup> Te achí yá jíin de:

Cuáhān ñuu lúli íne ichi núu. Te núu ni quiví ró, te nihín ró in burro núhni tí, jeé ní in tēe ná tu coso de tí. Te ndají ró tí quiji ró jíin tí. <sup>31</sup> Te núu ndé in cajñuhún naun cándají ró tí, te cahān ró jíin: Máá Jítoho yó jíni ñuhún yá tí, achi ró. Achí yá.

<sup>32</sup> Te cuango tēe ni tají yá, te ni canihín de tí nájñuhun ni cahān yá jíin de. <sup>33</sup> Te jeé cándají de tí, te ni cacahān jítoho tí jíin de:

¿Naun cándají ró burro rí? achí.

<sup>34</sup> Te ni cacahān de:

Máá Jítoho yó jíni ñuhún yá tí.

<sup>35</sup> Te ni ndecoo de jíin tí nuū Jesús. Te ni casoó de sahma de siquí tí, te ni casáha de jeé ní jecosó yā siquí tí. <sup>36</sup> Te ná-ni cuahān yā, sáá cáscáá ñayuu sahma i ini ichi. <sup>37</sup> Te nuū ní cuyajni ya nuū cūun ichi yucu Olivos, te ndihí ñayuu cándaje jeé cándiquín i ya, ní

caquejéé i cácuas ni i, te cácana jee i jeé yóhoyo váha Yaā cúu Yaā Dios siquī táca jniñu Jehnu ni sáha ya ni cajito i. <sup>38</sup> Te áchí i:

Yóhoyo váha Yaā cúu Rey jeé véji jíin jniñu máá Jítoho yó Yaā Dios. Te sáha ya jeé cóo maní yó jíin Yaā Dios andiví. Te yóhoyo cújéhu Yaā Dios, achí i jíjnáhan i.

<sup>39</sup> Yūcuán na te jecu tēe fariseo cáhlin mēhñu ñayuu cuehē ún, ní cacahān de jíin yá: Maestro, cahān ni núu ñayuu cándiquān nihin jée na cási i yuhu i, áchí de.

<sup>40</sup> Te ni cahān Jesús:

Cáhan rí jíin ró jeé núu ñayuu yáha na cási i yuhu i, te táca yúu chí cana jee, áchí yá.

<sup>41</sup> Te nuú ní cuyajni ya Jerusalén, te ní jito ya ñuu ún, te ní ndahyú yá siquī. <sup>42</sup> Te ni cahān yá:

Róhó ñayuu Jerusalén, yóhoyo ní cuu ni rí jeé na jécūhun ní ró jeé cuu ndumaní ró jíin Yaā Dios sáha rí. Te siquī jeé tu cácañdije ró, te vijna chí ma cúu ga jecūhun ní ró. <sup>43</sup> Chí quee quiví jeé coo jnūndóho, te ñayuu cájito uhú róhó, cuicó ndúu i ñuu ró, te casi cutú i jíin yúu, te táca lado ndonda i siquī ró. <sup>44</sup> Te ndíhi vehe scótúu i, te cahni i róhó jíjnáhan ró. Te ma stóo i ní ñin vehe jeé cóso jnáhan ga yúu. Chí ní quiji rí nde nuú Yaā Dios jeé jnáma rí róhó, te tu ní cácañdije ró. Achí yá.

*Jeé ní quenehen ya ñayuu ini templo*

(Mt. 21.12-17; Mr. 11.15-19; Jn. 2.13-22)

<sup>45</sup> Te ni quiví ya ini templo cáhnu, te ni quejéé yá quenehen ya táca ñayuu cájeen quití te cánañco núu ñayuu jeé socō i. <sup>46</sup> Te ni cahān yá jíin i:

Yósó núu tútu ñi jeé cahān Yaā Dios: Vehe rí chí vehe nuú cájicān tahú cúu, áchí Yaā Dios. Te máá ró jíjnáhan ró, chí nájñūhun yaū cava ñaculhna ní canasáha ró, áchí yá.

<sup>47</sup> Te ndiquiví ní steén yá jñūhun ini templo. Te sutú cácujeñhu jíin tēe cástéén tutu ley Yaā Dios jíin tēe cácujeñhu nuú ñayuu ñuu ún, cánducú de modo ndese cahni de ya. <sup>48</sup> Te tu cánihin de modo sáha de, chí ndiví ñayuu yóhoyo cájetáhu i cájini nahín i jñūhun cahān yá.

*Siquī jeé ndíso jniñu Jesús*

(Mt. 21.23-27; Mr. 11.27-33)

## 20

<sup>1</sup> Te ñin quiví steén yá jñūhun nuú ñayuu ini templo, te nácani ya jñūhun jeé jnáma Yaā Dios ñayuu. Te ní quecoo sutú cácujeñhu jíin tēe cástéén tutu ley Yaā Dios jíin táca tēe jéhu cándacu jniñu. <sup>2</sup> Te ni cacahān de:

Castúhún, ¿ndé ní nihín jniñu ró jée sáha ró jniñu yáha? ¿Te ndé ñin ní tee jniñu siquī ró jeé sáha ró súcuán? Achí de.

<sup>3</sup> Te ni cahān Jesús jíin de:

Suni ruhū cajñūhun rí róhó ñin jñūhun jíjnáhan ró. Castúhún núu rí: <sup>4</sup> ¿Ndé ñin ní tee

jniñu siquī Juan jeé ní scuándute de? ¿A Yaā Dios chí táca tēe? Achí yá.

<sup>5</sup> Yūcuán na te ni candajnūhun máá de:

¿Ndese cahān yó? Núu cahān yó jeé Yaā Dios ní tee ya jniñu un siquī Juan, te cahān de jíin yó: ¿Najehé tu ní cácañdije ró de núu súcuán? <sup>6</sup> Te núu cahān yó jeé ñayuu ní catee jniñu un siquī de, te ndiví ñayuu cahni i yóhó jíin yúu, chí cácañdije i jeé tēe ní nacani jñūhun Yaā Dios ní cuu ndije Juan, achí de cácañn máá de.

<sup>7</sup> Te ni cacahān de jeé tu cájini de ndé ñin ní tee jniñu siquī Juan jeé ní scuándute de. <sup>8</sup> Yūcuán na te ni cahān Jesús:

Ní ruhū, suni ma cáchi rí nuú ró ndé ñin ní tee jniñu siquī rí sáha rí jniñu yáha, áchí yá.

*Jñūhun yátá siquī tēe néé cásjniñu nuú uva*

(Mt. 21.33-44; Mr. 12.1-11)

<sup>9</sup> Te ni quejéé Jesús cahān yá jñūhun yátá yáha jíin ñayuu ún:

Ñin tēe ní nachuhun de cuehē uva nuú ñūhun de. Te ní stóo de nuú sava tēe sájniñu nuú, te cuu sava de ndehé jíin. Te ní tee de ichí jeé cuahān nahān de inga ñuu. <sup>10</sup> Te máá tiempo ndutútu uva, te ní tají de ñin mozo cuahān nuú tēe cásjniñu ún, návāha naquihín de sava ndehé uva un. Te tēe un ní cacani de mozo, te ni canatají de i cuanuhun i súcuán-ni. <sup>11</sup> Te tēe chíif uva ní tají tucu de inga mozo cuahān. Te tēe cásjniñu ún, suni ní cacahān ndevāha de nuú i, te ni cacani de i, te ni canatají de i cuanuhun i súcuán-ni. <sup>12</sup> Te tēe chíif uva ní tají tucu de inga mozo cuahān. Te tēe cásjniñu ún, suni ní castúj de mozo un, te ní cascúnu de i.

<sup>13</sup> Yūcuán na te ni cahān tēe chíif uva: ¿Ndese sáha rí? Na tají rí sēhe rí jeé maní rí jíin, chí sanaa te núu ní cajito de i te coo yíñūhún de nuú i. Achí de. <sup>14</sup> Te tēe cásjniñu ún, ná ní cajito de jeé véji i, te ni cacahān de: Tēe chíif táhū cúu jeé véji ún. Na cáhni yó de, te ndóo tahū de cuu máá yó, achí. <sup>15</sup> Te ní caquenehen de i inga lado, te ní cajehni de i, achí yá.

Te ni cajñūhun yá de:

Núu súcuán ¿te ndese sáha tēe chíif uva jíin tēe cásjniñu ún? <sup>16</sup> Ndiji de te cahni de tēe un jíjnáhan, te cuāha de ñūhun cáá uva un núu inga sava tēe sájniñu nuú, achí yá.

Te jeé ní cajini ñayuu jñūhun yáha, te ni cacahān i:

Aí, núu ma cóo cuiti súcuán ví, achí i.

<sup>17</sup> Te ndéhé yá nuú i jíjnáhan i, te ni cahān yá:

Núu súcuán ¿te á cájecūhun ní ró jñūhun yáha jée yosó núu tútu ñi jeé cúu rí nájñūhun ñin yuú? Chí áchí tutu:

Yuú jeé ní casquehichí tēe cájeni vehe, yuú yáha nduu jeé quítuu vehe.

Achí. <sup>18</sup> Te ñayuu tu cácanđje, ndoho i nájñuhun ndóho ñayuu jeē cotúú siquí yuú te jñáhnú i. Te quiví sándaā Yaā Dios cuēchi, te ñayuu tu cácanđje, ndoho i nájñuhun ndóho ñayuu jeē nánga yuú siquí i te cundihi i sáha. Achí yá.

*Siquí xúhun renta*

(Mt. 21.45-46; 22.15-22; Mr. 12.12-17)

<sup>19</sup> Yūcuán na te sutú cácujeñhu jíin tée cástéén tutu ley Yaā Dios, ni cacuni de jñá de ya maá hora un. Chi ni cajecūhun ní de jeē siquí maá de cúu jñuhun yátá ní cahān yā siquí tée cásajñiñu nuú uva jíin tée cájeni vehe. Te tu ní cúu, chí cáyūhú de jeē quiti ní ñayuu. <sup>20</sup> Yūcuán na te ní catajái de jecu tée cuacoto yuhu de ya, te tée un cásáha-ni de jeē tée ndaā cácuu de. Te cánducú de sáha de jeē cahān yā ñin jñuhun jeē nihín de cuēchi siquí yā, te quindeca de ya nuú tée cúu gobernador. <sup>21</sup> Te ní cacahān de:

Maestro, cájini na jéē cahān vāha ní, te stéén ndaā ní. Te tu sáha ní cuenta ndese cúu ñin ñin ñayuu, chí inuú-ni sáha ní jíin i. Te stéén ndaā ní ndese squicu ñayuu nuú Yaā Dios. <sup>22</sup> Núu súcuan te cachi ní: ¿A iyó váha jeē chúnaa yō renta nuú rey nación Roma jeē jñá nación yō, chí tuú? áchí de.

<sup>23</sup> Te ní jini yā jeē cáculi de stáhú de ya, te ní cahān yā jíin de:

¿Najehē cájito ndee rō ruhú? <sup>24</sup> Stéén ñin xūhún na cóto ri. ¿Ndé ñin nuú cúu jeē ndeé nuú xūhun yáha, te ndé síhví cúu jeē ndeé yáhá? áchí yá.

Te ní cacahān de jíin yá:

Núu jíin síhví rey un cúu, áchí de.

<sup>25</sup> Yūcuán na te ní cahān yā jíin de:

Núu súcuan te nacuāha ró núu rey un jéē yñi cuenta nuú de, te nacuāha ró núu Yaā Dios táca jéē yñi cuenta nuú maá yá, achí yá.

<sup>26</sup> Te táca tée ún tu ní cúu ñin de cuēchi siquí yā jíin ní ñin jñuhun cahān yā, cájito jñitú ñayuu. Chí sa ní canaa ní de jeē ndichí ní stío cuñí yā jñuhun nuú de, te tuá na vé ní cacahān de.

*Jeē ní cacajñuhún de siquí jeē nátecu ndiyi*  
(Mt. 22.23-33; Mr. 12.18-27)

<sup>27</sup> Yūcuán na te jecu tée grupo saduceo ni quecoo de nuú yā. Te tée un cacahān jeē tu nátecu cuiti ndiyi. Te ní cacahān de jíin yá:

<sup>28</sup> Maestro, Moisés ní tee de nuú tútu jeē cánevāha yó: Núu ñin tée cuu de, te ndóo ñasihí de, te núu tu ní iyó sēhe de jíin ña, núu súcuan te cánuú jeē ñani de naquihín ñasihí de, te sēhe de jeē cácu jíin ña nucuiñí i nuú ndiyi ñani de, áchí tutu. <sup>29</sup> Núu súcuan te ní iyó uxá ñani. Te tée núu ní quijnáhan de jíin ñahan. Te ní jihí de, te tú sēhe de ní iyó. <sup>30</sup> Te tée uú ní naquihín de ña, te suni ní jihí de, te tú na sēhe de ní iyó. <sup>31</sup> Te tée uní ní naquihín de ña. Te suni súcuan ndihúxá de ní condeca de ña, te ní cajihí ndihí de, te ní ñin de tú sēhe

de ní iyó. <sup>32</sup> Te jeē sándihí te suni ní jihí ñahan ún. <sup>33</sup> Núu súcuan te núu na nátecu de jijnáhan de quiví nátecu ndiyi, ¿te ndé ñin de cuu ña ñasihí de? Chí ndihúxá de ní condeca de ña. Achí de jijnáhan de.

<sup>34</sup> Yūcuán na te ní cahān yā jíin de:

Ñayiví yáha chí cáquijnáhan tée jíin ñahan. <sup>35</sup> Te ñayuu váha jeē nátecu i quivicoo i andiví, ma quijnáhan ga i yūcuán, chí tuá na jñuhun quijnáhan tée jíin ñahan coo. <sup>36</sup> Ni ma cúu cuiti gá i, chí coo i nájñuhun ndajehé Yaā Dios. Te sēhe Yaā Dios cuu i, chí je ní canatecu i. <sup>37</sup> Te suni máá Moisés cáhán de jeē nátecu ndiyi, chí ní tee de nuú tútu ndese ní cahān yā jíin de mēñhu yūcú jeē cayú yáñuhún. Chí ní cahān de jeē cúu ya Yaā Dios Abraham jíin Isaac jíin Jacob. <sup>38</sup> Te jeē ní cáhán de súcuan cúu jeē ní cachi de jeē cátecu táca ndiyi. Chí vésu je ní cajihí i, te cátecu i nuú iyó máá yá, chí cúu ya Yaā sáha jeē técu ñayuu ní cáni. Achí yá jíin de.

<sup>39</sup> Te jecu tée cástéén tutu ley Yaā Dios ní cacahān de:

Vāha ní cahān ní Maestro.

<sup>40</sup> Te tuá ní cáchundeyí ní de cajñuhún de ya.

*Siquí jeē cúu Cristo sēhe yucūn David*  
(Mt. 22.41-46; Mr. 12.35-37)

<sup>41</sup> Te ní cahān yā jíin de jijnáhan de:

¿Ndese cúu jeē cacahān ñayuu jeē Cristo cúu sēhe yucūn David? <sup>42</sup> Chí máá David suhva ní cahān de jñuhun ya nuú tútu Salmo:

Máá Jítoho yō Yaā Dios suhva ní cahān yā jíin Jítoho rí, Yaā quiji:

Cucōo ró lado váha ri nuú cujehnu ró,

<sup>43</sup> te na sáha ri jeē quende rō poder táca jéē cájito uhú rohó.

Achí Yaā Dios. Achí David. <sup>44</sup> Te núu sēhe yucūn David cúu Cristo, ¿te ndese cúu jeē ní cahān de jeē Jítoho de cúu ya? áchí yá.

*Jeē ní cahān yā jeē iyó cuēchi de jijnáhan de*  
(Mt. 23.1-36; Mr. 12.38-40; Lc. 11.37-54)

<sup>45</sup> Te ní cahān yā jíin tée cáscuáha jíin yá, te suni ní cajini sōho ndihí ñayuu:

<sup>46</sup> Coto má cándije ró táca tée cástéén tutu ley. Chí cácusíi ní de cáñuhun de sahma cáni jeē steén jeē cujehnu de, cájica cuu de jíin. Te cánujñahan ní de jeē cahān yñitúñhún ñayuu jíin de nuú yáhu. Te cánujñahan ní de cucōo de nuú silla yñitúñhún gá ñi vehe ñi sinagoga, jíin silla yñitúñhún gá nuú víco cáyeji ñayuu. <sup>47</sup> Te cáquende de vehe ñahan ní caquendōo ndáhú. Te nahán cájicān tahú de návāha caní ní ñayuu jeē tú na cuēchi de. Tée yáha jijnáhan de chí xēñ gā ndoho de castigo. Achí yá.

*Jeē ní sócō ñahan viuda xūhún*  
(Mr. 12.41-44)

## 21

<sup>1</sup> Te ná ni iyo ya ini templo, te jito ya nuū ñáyyu cucá jéé cáchuhun i cuehē xūhūn ini táca yéjñū nuū casocō i. <sup>2</sup> Te suni ni jito ya nuū ññahan viuda jeē ndóho ndáhú, te ni chuhun ña uū centavo lullí ini yejnū ún. <sup>3</sup> Te ni cahān yā:

Jendaá cahān rī jīn rō jeē cuehē gā cúu jeē ní sócō ññahan viuda ndahú yáha, vésú jeē ní casocō táca gá ñayuu. <sup>4</sup> Chi táca i ni casocō i jeē ni ndóho siquī xūhun cuéhē i. Te ññahan yáha, vésú ndahú ndóho ña, te ni chuhun ndíhi ña jeē cótecu ña. Achí yá jīn de.

*Jeē ní cachi yā jeē nāa templo*

*(Mt. 24.1-2; Mr. 13.1-2)*

<sup>5</sup> Te sava de ni cacahān de jeē luu cáa templo cáhnu, chi ni cuvāha jīn táca yūu luu jīn táca jéé ni casocō ñayuu. Yūcuán na te ni cahān yā:

<sup>6</sup> Ndhí jeē cájito rō yáha, quee quivī jeē ma cóso jñáhan ga ni ññayū, chi ndíhi jñanū, achí yā.

*Na seña coo nuū cuácuyajni ndíhi ñayiví*

*(Mt. 24.3-28; Mr. 13.3-23)*

<sup>7</sup> Te ni cacajñūhūn de ya:

Maestro, ¿ndé quivī coo táca jéé ní cachi ni jéé coo? ¿Te na seña coo nuū cuácuyajni siquī táca jéé ni cahān ní? áchí de.

<sup>8</sup> Te ni cahān yā:

Coto rō jéé ma stahú i rōhó. Chi quijicoo cuehē tēe jeē stahú jīn síhví rí, te cahān de: Máá rí cúu Cristo. Te suni cahān de: Je ni quee quivī ndíhi ñayiví, achí de. Te ma cóndiquīn rō de. <sup>9</sup> Te núu niññ rō jñūhun jeē táca lado iyó guerra te cándonda ñayuu siquī tohó, te ma yūhu rō, chi cánuú jéé xíhna gā coo súcuán, te ni ma jinú yachí quivī ndíhi ñayiví. Achí yá.

<sup>10</sup> Te ni cahān gā yā:

Ndonda nación siquī inga nación, te ndonda ñuu siquī inga ñuu jeē cuajñáhan. <sup>11</sup> Te cháha chúcuán jñāa téyí, te coo jnamā jīn cuéhyi xeēn. Te coo seña jéhnu ichí ándiví jéé yūhú ndasí ñayuu coto i.

<sup>12</sup> Te nde ná tu coo táca jñiñu yáha, te coto xeēn i rōhó, te jññi i rōhó. Te quindecá i sava rō táca vehe ññ sinagoga jeē cahān i cuéchi siquī rō. Te chune i sava rō vecāa. Te quindecá i sava rō núu táca rey jīn núu táca gobernador, te cahān i cuéchi siquī rō jeē siquī jeē cáandje rō rúhū. <sup>13</sup> Te jeē súcuán coo, te cuité núu ga jñūhun rí, chí nacani ndaa rō núu de jññáhan de. <sup>14</sup> Núu súcuán te cundaá ni rō jeē ma nácani ni rō xíhna gā ndese stíó cuñí rō nuū de te cácu rō. <sup>15</sup> Chi ruhū cuāha rí jñūhun ndíchi cahān rō, návāha ñayuu jeē cájito uhū rohó, ma cūndeyí i jīn rō ní ma cúu cahān i siquī rō. <sup>16</sup> Te nde tatá rō, naná rō, ñani rō, jñáhan rō, jīn amigo rō, nastúu i rōhó núu ñayuu xeēn. Te cahni i sava rō. <sup>17</sup> Te táca ñayuu chí quiti ní i nuū rō

jeē siquī ruhū. <sup>18</sup> Te ni ññixi xíní rō jññáhan rō ma nāa, chí coto ya rohó. <sup>19</sup> Te núu cuiñí ñññin rō jīn jñūhun rí, te cotecu rō ní cáni.

<sup>20</sup> Te núu ni cajito rō jéé ní cajicó ndúu soldado ñuu Jerusalén, te na jécūhun ni rō jeé jé yajni naa ñuu ún. <sup>21</sup> Yūcuán na te ñayuu cáyucú región Judea, na cúnú i caa i yucu quingoo i. Te ñayuu cáyucú Jerusalén, na quéndacoo i quingoo i. Te ñayuu cáhñin nde rancho, ma nándicó i ñuu ún. <sup>22</sup> Chi táca quivī un cuāha Yāa Dios castigo nuū ñayuu jeē siquī cuéchi i, návāha squicu táca jñūhun jeē yosó núu tútu. <sup>23</sup> Te quivī ún nacá jeē ndahú ññahan cáñuhun sehe jīn ññahan cándeca yiquín, chí ma cúnihñ ña cunu yachí ña. Chi yōhyo xeēn coo jññndóho ini ñayiví, te quiji castigo xeēn siquī ñayuu yáha. <sup>24</sup> Te sava i cuu nuū guerra, te sava i quingoo preso nde táca inga nación. Te ñayuu táca gá nación ndacu ñññin i jñññu nuū ñayuu ñuu Jerusalén, nde jññu tiempo jeē jéhe Yāa Dios jññūhun ndacu i jñññu.

*Ndese coo quivī ndíhi Yāa ní nduu tēe*

*(Mt. 24.29-35, 42-44; Mr. 13.24-37)*

<sup>25</sup> Yūcuán na te coo seña nuū níandí jīn núu yóo jīn núu quimí. Te ini ñayiví te quiji jññndóho xeēn siquī ñayuu táca nación. Te cunéé ni i, te yūhú i jeē ñññin xeēn mar te ndóna xeēn ndute mar vėjí nuū ñññūhun. <sup>26</sup> Te cuu sōó sava ñayuu jeē cáyūhú i cándetu i táca jññndóho quiji siquī ñayiví. Te táca jéé ññ andiví chí quisi i. <sup>27</sup> Yūcuán na te coto ñayuu nuū maá rí, Yāa ní nduu tēe, ndíhi rí jīn vícō, te condiso rí cuehē poder, te yōhyo luu cujéhnu rí. <sup>28</sup> Te núu ni quejéé táca jñññu yáha, te ndeyí coo ní rō, te cocunú rō andiví, chí je yajni jnama ya rohó. Achí yá jīn de jññáhan de.

<sup>29</sup> Te suni ni cahān ya jññūhun yátá yáha:

Condéhe jññáhan rō ndese sáha nundéhe higo jīn táca gá yujnu. <sup>30</sup> Núu cájito rō jéé ní quejéé náne numa yújnu ún, te cájini rō jeé jé yajni coo tiempo jñññi. <sup>31</sup> Te suni súcuán núu ni cajito rō jéé ní quejéé cunu táca jñññu jeē ni cahān rí, yūcuán na te na jécūhun ni rō jeé ní cuyajni quiví ndacu Yāa Dios jñññu ini ñayiví.

<sup>32</sup> Jendaá cahān rī jīn rō jeē ma cúu ndíhi ñayuu tiempo un, chí nde squicu ndíhi jñññu ún. <sup>33</sup> Andiví jīn ñayiví chí naa, te táca jññūhun cahān rí chí ma nāa, chí ndíhi squicu.

<sup>34</sup> Te coto ma stíví rō maá rō jññáhan rō jéé sáha rō táca cuéchi, jīn jéé najini rō, jīn jéé cujnéñu rō jīn táca ndajñññu cotecu rō, návāha tú sanaa ni rō te quee quiví un siquī rō. <sup>35</sup> Chi nájññūhun jeē núu ññ trampa, súcuán quee jññndóho siquī ñayuu cáyucú ní cáhnu ñayiví. <sup>36</sup> Núu súcuán te ndito coo ní rō, te níni cácan tahú rō, návāha cuu cácu rō núu táca jññndóho jeé quíji ún, te cuu cuiñí rō núu ruhū, Yāa ní nduu tēe. Achí yá.

<sup>37</sup> Te ndiquiví steén yá jnūhun ini templo, te ndijnahan jecuáá jéndōo ya nde yucu jeé naní Olivos. <sup>38</sup> Te táca jénēhen quécōo ñayuu nuū yá ini templo jeé cúni sōho i jnūhun stéén yá.

*Jeé ní casquijnáhan de jnūhun jni de Jesús*  
(Mt. 26.1-5, 14-16; Mr. 14.1-2, 10-11;  
Jn. 11.45-53)

## 22

<sup>1</sup> Yūcuán na te ni cuyajni vico pascua jeé cáyeji ñayuu hebreo pan jeé tú na levadura yíhi. <sup>2</sup> Te sutú cácujeñnu jín tée cástéén tutu ley, ni canducú yuhu de modo cahni de Jesús, chí cáyūhú de jeé quítí ni ñayuu.

<sup>3</sup> Te ni quiví Satanás ini anuá Judas jeé nastúu de ya. Te suni naní de Iscariote, te cúu de ñin jnāhan jeé ndihúxi uū tēe apóstol. <sup>4</sup> Te ni jehēn de ni candajnūhūn de jín táca sūtú cácujeñnu jín tēe cándiso jniñu ini templo, núu ndese nastúu de ya nuū tēe un jijnāhan. <sup>5</sup> Te tēe un ní cacusī ni de, te ni cajejnūhūn de jeé cuáha de xūhun nuū Judas. <sup>6</sup> Te ni jetáhu Judas, te ni nducú de modo ndese nastúu yuhu de ya hora jeé tú na ñayuu iyó.

*Jeé ní jequin yá Cena yá*  
(Mt. 26.17-29; Mr. 14.12-25; Jn. 13.21-30;  
1 Co. 11.23-26)

<sup>7</sup> Te ni quee maá quiví vico jeé cáyeji ñayuu pan jeé tú na levadura yíhi, te suni quiví un cájeñni i londe najnūhun ni ndacu Yaá Dios jniñu jeé sáha i vico pascua un. <sup>8</sup> Te Jesús ni tají yá Pedro jín Juan quingoo de, te áchí yá jín de:

Cuangoo te sátūhva ró jéé cuxíni yó vico pascua, achí yá.

<sup>9</sup> Te ni cacajnūhūn de ya:

¿Ndé nuū cuní ni jéé quisátūhva ná? áchí de.

<sup>10</sup> Te ni cahān yá jín de:

Cuangoo ñuu yūcuán, te núu ni quivicoo ró te najnāhan ró jín ñin tēe ndiso quiví ndute. Te condiquin ró de quihin ró jín de nde vehe nuū ndiví de. <sup>11</sup> Te cahān ró jín tēe chí vehe ún: Achí máa Maestro: ¿Ndé ñin cúu cuarto vehe ní cuáha núu ní nuū cuxíni ya vico pascua jín tēe cácuáha jín yá, achí ró. <sup>12</sup> Yūcuán na te stéén de ñin cuarto cáhnu nde xiní vehe jeé je iyó túhva, te yūcuan sátūhva ró jéé cuxíni yó, achí yá.

<sup>13</sup> Te cuangoo de, te ni canihin de najnūhun ni cahān yá. Te ni casátūhva de jeé cuxíni ya vico pascua.

<sup>14</sup> Yūcuán na te ni jinū hora jeé cuxíni, te ni quee Jesús, te ni cucōo ya mesa jín tēe cácuu apóstol. <sup>15</sup> Te ni cahān yá jín de:

Yōhō ni cuu ni rī cuxíni rī jín ró jijnāhan ró vico pascua yáha, vijna nde ná tu cuu rī. <sup>16</sup> Chí cáhān rī jín ró jeé ma cáji cuiti gā rī vico pascua, chí nde quiji quiví ndacu Yaá

Dios jniñu ní ñayiví, te sáá te caji tucu ri, achí yá.

<sup>17</sup> Te ni quihin ya ñin copa ndūxi uva, te ni nacuatáhu yá, te ni cahān yá:

Quihin copa yáha, te coho ró jín jnāhan ró. <sup>18</sup> Chí cáhān rī jín ró jeé ndé vijna te ma cóho ga rī ndūxi uva, chí nde quiji quiví ndacu Yaá Dios jniñu ní ñayiví, te sáá te coho tucu ri. Achí yá.

<sup>19</sup> Te ni quihin ya pan, te ni nacuatáhu yá, te ni tahú cuéchi yá, te ni jēhe ya nuū de jijnāhan de. Te ni cahān yá:

Yáha cúu yiqui cúñu rī jeé socō rī jeé chuna rī cuéchi ró jijnāhan ró. Te níní caji ró súcuan jeé cáñuhun ní ró ruhū jeé ní jihí rī jehē ró. Achí yá.

<sup>20</sup> Te suni súcuan ní sáha ya jín copa ndūxi uva, ná ni cuu ni cuxíni ya. Te ni cahān yá jín de:

Yáha cúu niñí rī jeé cuáha rī jeé cúu contrato jeé, te cati jeé ndundoo cuéchi ró jijnāhan ró.

<sup>21</sup> Te vijna chí tēe nastúu ruhū, néne de jín rī nuū mesa yáha. <sup>22</sup> Chí ruhū, Yaá ní nduu tēe, jendaá cúu jeé quihin rī cuu rī najnūhun je ní sándaá Yaá Dios jeé súcuan coo. Te nacá xeēn ndoho tēe jeé nastúu ruhū, achí yá.

<sup>23</sup> Yūcuán na te ni caquejeé de cacajnūhun jnāhan de ndé ñin de cúu jeé nastúu de ya.

*Jeé ní cacahān de siquí ndé ñin de cújēhnu ga*

<sup>24</sup> Yūcuán na te yōhō ni cacahān de siquí ndé ñin de cújēhnu ga nuū jnāhan de. <sup>25</sup> Te ni cahān Jesús jín de:

Rey táca nación chí cándacu nīhin de jniñu nuū ñayuu cájni de, te cacahān i jeé tēe cásáha vāha cúu jeé cácujeñnu nuū i. <sup>26</sup> Te róhó jijnāhan ró, ma cóo ró súcuan. Chí núu ndé ñin ró cújēhnu ga, te sa nasáha lulí ró maá ró. Te núu ndé ñin ró ndácu jniñu, te sa nasáha ró máá ró tēe jéjniñu nuū jnāhan. <sup>27</sup> ¿Te ndé ñin cúu jeé cújēhnu ga, á tēe yéji nuū mesa, chí tēe jéni cohō? ¿A násūu tēe jeé yéji nuū mesa cúu jeé cújēhnu ga? Te ruhū násūu súcuan cúu rī, chí ní nasáha rī maá rī najnūhun tēe jéjniñu nuū ró, chí véji rī sáha rī jeé nihín tahú ró.

<sup>28</sup> Te máá ró cácuu tēe jeé níní cáhiin jín rī táca quiví jeé ndóho rī jnūndóho. <sup>29</sup> Núu súcuan te najnūhun ní sáha Tátá rī jeé ndácu rī jniñu, suni súcuan sáha rī jeé ndacu ró jniñu jijnāhan ró. <sup>30</sup> Te caji ró coho ró jín rī ini ñuu nuū ndacu rī jniñu. Te cucōo ró ñin ñin mesa jeé sándaá ró jniñu ndihúxi uū yucūn Israel. Achí yá.

*Jeé ní cachi yá jeé yūhu Pedro cahān de jeé jini de ya*

(Mt. 26.31-35; Mr. 14.27-31; Jn. 13.36-38)

<sup>31</sup> Te suni ni cahān maá Jítoho yō jín Simón Pedro:



Simón, cuni sôho ró, chi ni jicān Sa-tanás rohó jijnáhan ró jéé coto ndee rohó nájñuhun jeé sijn trigo, te stúu ndé ñin ró cácuu nájñuhun paja jeé nayũhu ró, te ndé ñin ró cácuu nájñuhun trigo jeé candije nihin ró. <sup>32</sup> Te ni jicān tahú rī jehē rō návaha ma náyũhu ró jeé ma cándije ga rō. Te jeé nácandije tucu ró, te sáha ró jéé ije tāca jnāhan ró jijn jñuhun rī. Achí yá.

<sup>33</sup> Te ni cahān de jijn yá:

Je iyó túhva ná quhñin na jijn ní vecāa te vésú na cuu na jijn ní, achí de.

<sup>34</sup> Te ni cahān yá:

Pedro, cáhān rī jijn ró jeé nde ná tu cana líhli vijna, te yũhu ró jeé jññi ñayuu rohó, te uní jinu cahān rō jeé tu jíní rō ruhū, achí yá.

*Jeé ní cuyajni coto ya jññódóho*

<sup>35</sup> Yũcuán na te ni cajñuhun yá de jijnáhan de:

Ná ni tají rí rohó ní jengoo ró jéé tu ní cóndiso ró ñunu ni yijni xũhún ni ndijēn, ¿te á ní iyo ñin jeé ní cumani nuū rō? Achí yá.

Te ni cacahān de:

Tú ni ñin ní cúmaní.

<sup>36</sup> Te ni cahān yá:

Nde vijna sa cáhān rī jeé cóndiso ró ñunu ró, te suni yijni xũhún. Te tēe jeé tu névaha espada jeé coto de máá de, na xíco de ticāchí de te na cuāan de. <sup>37</sup> Chi cáhān rī jijn ró jeé quee quiví ndoho yó jññódóho, chí cánuú squícu jññuhun yáha jéé cahān nuū tútu siquí rī: Sáha ñayuu jijn yá nájñuhun cása ha i jijn tēe sáha cuéchi xeēn, achí tutu. Chi tāca jññuhun un jéé yosó cáhān siquí rī, chí squícu nahñ, achí yá.

<sup>38</sup> Yũcuán na te ni cacahān de:

Yáha iyó úu espada, achí de.

Te ni cahān yá jijn de:

Jijn jéé yáha-ni, achí yá.

*Jeé ni jicān tahú yá nuū huerto Getsemani*  
(Mt. 26.36-46; Mr. 14.32-42)

<sup>39</sup> Te ni quenda ya cuahān yá yucau Olivos nájñuhun sáha sáha yá. Te tēe cáscuaha jijn yá ní candiquin de ya cuango de jijn yá. <sup>40</sup> Te nuū ní jínū yá yũcuán, te ni cahān yá jijn de:

Cacān tahú rō jijnáhan ró jéé chindéé ñahán yá rohó jéé ma sáha ró cuéchi núu coto ndee jeneé rohó, achí yá.

<sup>41</sup> Te ni jica ya jecu, cũhva jeé jicá jínū yuū jeé squíñ. Te ní jecuññi yití yá, te suhva ní jicān tahú yá:

<sup>42</sup> Tātá, núu cúní ni te tejiyo ní jññódóho yáha jéé ma quíji siquí ná. Te nasūu jéé cuní maá ná, chí jeé cuní maá ní na cóo, achí yá.

<sup>43</sup> Te ní cane ñin ndajéhé andiví núu yá, te ní jēhe fuerza nuū yá. <sup>44</sup> Te cúcuhyá ndasí ni yá jeé quiji jññódóho siquí yá, te ní nducú ndeyí gá yá ní jicān tahú yá. Te ní cane jñañū yá, te too nuū ññuhun nájñuhun yúyú nahnu niññ.

<sup>45</sup> Te ná ni ndocuiñi yá jeé ní jicān tahú yá, te ní ndee yá nuū tēe cáscuaha jijn yá. Te ní jito ya jeé cáquixí de, chí tuá cáhīyo ndeyí ni de cacān tahú de jeé cácuuhyá ndasí ni de.

<sup>46</sup> Te ni cahān yá jijn de:

¿Naun cáquixí rō? Ndonga te cacān tahú rō jeé chindéé ñahán yá rohó jéé ma sáha ró cuéchi jeé coto ndee jeneé rohó. Achí yá.

*Jeé ní cajññi de Jesús*

(Mt. 26.47-56; Mr. 14.43-50; Jn. 18.2-11)

<sup>47</sup> Te sá cáhān gā yá súcuan, te ní quecoo cuehē ñayuu. Te tēe nání Judas, ñin jnāhan jeé uxí uū tēe scuáha jijn yá, yósnúu de nuū ñayuu un véji de. Te ní quee de nde nuū Jesús, te ní techũhú de ya, te súcuan ní nastúu de ya. <sup>48</sup> Te ní cahān Jesús jijn de:

Judas, ¿á jijn jéé téchũhu ró ruhū cúu jeé nastúu ró ruhū, Yaá ní nduu tēe? Achí yá.

<sup>49</sup> Te tēe cáhñin jijn yá, ní cajito de jeé ní quejéé cúu, te ní cacajññuhñ de ya:

¿A ndonga ná jijnáhan ná síquí de jijn espada? achí de.

<sup>50</sup> Te ñin de ní stuji de mozo sutú cujéñnu ga, chí ní jehnde de sôho lado váha. <sup>51</sup> Te ní cahān Jesús:

Siáá, na jecuññi, achí yá.

Te ní tee ya ndaha ya sôho mozo un, te ní nasávaha ya de. <sup>52</sup> Te ní cahān yá jijn sutú cácujeñnu jijn tēe cándiso jñññu iní templo jijn táca tēe jéñnu jeé ní quecoo de jeé jññi de ya:

¿Te va tēe cuihná cúu rí jeé véjicoo ró jijn espada jijn yujnu jeé jññi ró ruhū jeé súcuan?

<sup>53</sup> Tāca quiví ní ine rí jijn ró jijnáhan ró iní templo cáñnu, te tu ní cajññi ró ruhū. Te vijna te ní quee hora jeé jññi ró ruhū jijn jéé sáha ró táca jñññu jeé ndácu jeneé jéé ndee núu néé. Achí yá.

*Jeé ní cachi Pedro jeé tu jíní de ya*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Te ní cajññi de ya cuango de ya jijn yá vehe sutú cujéñnu ga. Te Pedro chí jicá-ni ndiquín de ya. <sup>55</sup> Te táca policía ní cascáyú de ññuhñ iní patio, te ní condúu de yuññuhñ un cáyúcú de. Te suni ní cucōo Pedro jijn de. <sup>56</sup> Te ñin ñahan jéjñññu iní vehe un, ní jito ña nuū de jeé néne de yuññuhñ. Te ní jito váha ña nuū de, te ní cahān ña:

Tēe yáha suni ní jica de jijn tēe ún, achí ña.

<sup>57</sup> Te máá de tu ní cáchi de, chí ní cahān de:

Tu jíní rí tēe ún, achí de.

<sup>58</sup> Te ní cunúu jecu gā, te ní jito tucu inga ñayuu nuū Pedro, te ní cahān:

Róhó, suni jnāhan táca tēe un cúu ró, achí.

Te ní cahān Pedro:

Nasūu cúu rí, hombre, achí de.

<sup>59</sup> Te ní cunúu nájñuhun ñin hora gā, te ní cahān ññin inga de:

Jendaá ndije jeé tēe yáha ní jica de jijn tēe ún, chí suni tēe región Galilea cúu de, achí de.

<sup>60</sup> Te ní cahān Pedro:

Hombre, tu jíní rí na jñuhun cáhán rō.

Te sá súcuan cáhán gā de, te ni cana-ni líhli. <sup>61</sup> Yūcuán na te ni ndió coto máá Jítóho yō, te ni jito ya nuū Pedro. Te ni nucuhun ni de jñuhun ni cahān yā jíin de: Nde ná tu cana líhli, te yūhu ró te cahān rō uní jíinu jeē tu jíiní rō ruhū. <sup>62</sup> Te ni quenda de cuahān de, te yōhyo ni ndahyū de jeē ní cachi de jeē tu jíiní de ya.

*Jeē ní casacatā de nuū yā*

(Mt. 26.67-68; Mr. 14.65)

<sup>63</sup> Te tāca tēe cándito Jesús, ni casacatā de nuū yā, te ni cacani de ya. <sup>64</sup> Te ni cajesi de sahma nuū yā, te ni cacani de nuū yā, te ni cacahān de:

Cachi ndé ñn cúu jeē ní cani róhó, áchí de.

<sup>65</sup> Te cuehē gā jñuhun súcuan ni cacahān neé de jíin yá.

*Jeē ní indichi Jesús nuū junta tēe cácujeñnu ga*

(Mt. 26.59-66; Mr. 14.55-64; Jn. 18.19-24)

<sup>66</sup> Te jeē ní cundiin, te ni candutútú táca tēe jéñnu cándacu jñiñu nuū ñayuu hebreo, jíin sūtú cácujeñnu, jíin tēe cástéén tutu ley Yaā Dios. Te cuango de jíin yá nuū junta tēe cácujeñnu ga, te yūcuan ní cacajñuhún de ya:

<sup>67</sup> Cachi, ¿á máá ró cúu Cristo jeē ní tají Yaā Dios? Achí de.

Te ni cahān yā jíin de:

Vēsú na cáhán rí jeē suu ri cúu, te ni ma candíje cuiti rō. <sup>68</sup> Te suni núu cajñuhun máá rí rohó jíinánan ró, te suni ma stíó cuíñí rō nuū rí, ni ma siaá ró ruhū. <sup>69</sup> Te ruhū, Yaā ní nduu tēe, táca quívi jeē quíji conene ri lado váha máá Yaā iyó poder, achí yá.

<sup>70</sup> Yūcuán na te ndihi de ni cacajñuhún de ya:

¿A máá ró cúu Sēhe Yaā Dios núu súcuan?

Te ni cahān yā jíin de:

Suu ri cúu, nájnūhun cáhān rō, achí yá.

<sup>71</sup> Yūcuán na te ni cacahān de:

¿Na testigo gā jíiní ñuhún yó núu súcuan? Chi ni cajini sōho yó jíin yuhu máá de jeē cahān ndevāha de jeē cúu de Sēhe Yaā Dios. Achí de jíinánan de.

*Jeē ní indichi Jesús nuū Pilato*

(Mt. 27.1-2, 11-14; Mr. 15.1-5;

Jn. 18.28-38)

## 23

<sup>1</sup> Yūcuán na te ni candocuíñí ndihi de, te cuango de jíin yá nuū Pilato. <sup>2</sup> Te yūcuan ní caquejé de cáhān de cuēchi siquí yā:

Ni canihñ na tēe yáha jéé stóna de ñayuu siquí tohō. Te cáhán de jeē tú váha jeē cuāha ná xuhun renta nuū rey nación Roma jeē ndácu jñiñu nuū nación na. Te suni cáhán de jeē máá de cúu Cristo, Rey jeē ní tají Yaā Dios. Achí de jíinánan de.

<sup>3</sup> Yūcuán na te Pilato ni cajñuhún de ya:

¿A máá ró cúu Rey ñayuu hebreo?

Te ni cahān yā:

Suu ri cúu, nájnūhun cáhán rō, achí yá.

<sup>4</sup> Te ni cahān Pilato jíin sūtú cácujeñnu jíin ñayuu cuehē ún:

Tú ni ñn jñuhun stívi cáhán tēe yáha jéé nihñ rí cuēchi siquí de, achí de.

<sup>5</sup> Te máá de víhyá gā ni cacahān de:

Tēe yáha stóna ndasí de ñayuu siquí tohō jíin jñuhun stéén de nú Judea. Chi ní quejéé de stéén de nde Galilea, te vijna te nde yáha, achí de.

*Jeē ní indichi Jesús nuū Herodes*

<sup>6</sup> Te nuū ní jini sōho Pilato jeē Galilea cáhān, te ni cajñuhún de ñayuu núu tēe región Galilea cúu ya. <sup>7</sup> Te nuū ní cacahān ñayuu jeē cúu ya tēe Galilea, te ni ndacu de jñiñu jeē na quíngoo de jíin yá nuū Herodes, tēe cúu gobernador Galilea. Chi quívi ún suni íne Herodes ñuu Jerusalén. <sup>8</sup> Te nuū ní jito de nuū Jesús, te yōhyo ni cusí ni de, chi je ni cuu cuehē tiempo jeē cuní de coto de nuū yā. Chi ni nihñ de jñuhun ya, te ñuhun ni de jeē sáha ya ñn jñiñu jéñnu coto de. <sup>9</sup> Te ni cajñuhún de ya cuehē jñuhun, te tu ní stíó cuíñí yā ni ñn jñuhun nuū de. <sup>10</sup> Te suni cáhñn táca sūtú cácujeñnu jíin tēe cástéén tutu ley, te nihñ ni cacahān de cuēchi siquí yā. <sup>11</sup> Yūcuán na te Herodes jíin táca soldado de ni cacahān neé de jíin yá, te ni casacatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jñiñu jeē na quíndeca de ya nuū Pilato. <sup>12</sup> Te máá quívi un ní candumaní jñáhan Pilato jíin Herodes, chi ichi yátá ni caquítí jñáhan ni de.

*Jeē ní cundaā jeē cúu yā*

(Mt. 27.15-26; Mr. 15.6-15; Jn. 18.39-19.16)

<sup>13</sup> Yūcuán na te ni cana Pilato táca sūtú cácujeñnu jíin táca tēe cándiso jñiñu jíin táca gá ñayuu, ni candutútú. <sup>14</sup> Te ni cahān de:

Ni caquindeca ró tēe yáha núu rí, jeē cáhān rō jeē stóna de ñayuu siquí tohō. Te je ni stíchí rí de, ni cajito jíinú rō. Te tu ní nihñ rí ni ñn cuēchi siquí de nájnūhun jeē cáhān rō. <sup>15</sup> Te ni Herodes, tu ní nihñ de, chi ní natají tucu de tēe yáha núu rí. Te tú cuiti ni ñn cuēchi ní sáha de jeē cúu de. <sup>16</sup> Núu súcuan te na cuáha ri castigo de, te siáá rí de quíñn de, achí Pilato.

<sup>17</sup> Te iyó costumbre jeē táca vico pascua siaá Pilato ñn preso jeé cuní ñayuu. <sup>18</sup> Te ñayuu cuehē ún, inuú-ni ni cacana jee i:

Na cúu tēe jíin, te siáá ní Barrabás, achí i.

<sup>19</sup> Te Barrabás íne de vecaá siquí jeē ní stóna de ñayuu siquí tohō ñn ñuu ún, te ni jehni de ndíyi. <sup>20</sup> Te Pilato cuní de siáá de Jesús, te ni cahān tucu de jíin ñayuu. <sup>21</sup> Te máá i víhyá gā ni cacana jee i:

Cata caa ní de jicá cruz, na cúu de, achí i.

<sup>22</sup> Te ni cahān tucu de jíin i vuelta uní:

¿Na cuēchi ni sáha de núu súcuan? Tu ní nihín cuiti rí ni ìn cuēchi siquĩ de jeē cúu de. Núu súcuan te na cuáha ri castigo de, te siáá rí de quihín de, áchí Pilato.

<sup>23</sup> Te víhyá gā ni cacana jee ñayuu un, ní cacahān nihín i jeē na cúu yā jicā cruz. Te máá i jíin táca sūtū cácujuhnu, ní cacana jee ndasí i. Te ni cacundeyí i ni cacahān i Pilato jeē na cúu yā. <sup>24</sup> Yūcuán na te ni ndacu Pilato jniñu jeē na cóo nájñuhun cácuñi i. <sup>25</sup> Te ni siaá de tēe jeē ní cajicān i, tēe jeē íne vecāa jeē ní stóna de ñayuu siquĩ tohó te ni jehni de ndíyí. Te ni jēhe de jñuhun jeē na cúu Jesús nájñuhun cácuñi i.

*Jeē ní cacata caa de ya jicā cruz*

(Mt. 27.32-44; Mr. 15.21-32; Jn. 19.17-27)

<sup>26</sup> Te cuango tǎcá soldado jíin yá jeē cahni de ya jicā cruz. Te ni canihín de ìn tēe ñuu Cirene, nání de Simón, vendiji de jeē ní jēhēn de rancho. Te ni catejniñu de tēe un jéé cóndiso de cruz yā quihín de yatā yā.

<sup>27</sup> Te cuehē ndasi ñayuu ndíquín i yatā yā cuango i. Te suni cuehē ñahan cuango ña, te cándahyū cohó ña jeē cácuculhyá ni ña jehē yā. <sup>28</sup> Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyū ró jehē rí, chí sa suhva ndahyū ró jehē máá ró jíin jehē sēhe ró jijnáhan i. <sup>29</sup> Chi quee quiví jeē coo jñúndóho xeēn siquĩ ró, te cahān ró: Yóhoyo ndetū tǎcá ñahan nómá, jíin jéé tu ní scácu sēhe, jíin jéé tu ní cóndeca yiquín, chí tú sēhe ña jeē jnahuhú ni ña jee ndóho i, áchí ró jijnáhan ró. <sup>30</sup> Quiví ún te quejéé ñayuu cahān i jíin táca yucu: Cotúú siquĩ rí jijnáhan ri návaha cuu rí. Te suni jíin táca loma: Casi siquĩ rí jijnáhan ri, áchí i. <sup>31</sup> Chí núu casáha xeēn i jíin rúhú jeē tú na cuēchi ri, te nagá ni cuu jeē ma cóo xeēn siquĩ ndihí ñayuu chí íyó cuēchi i. Áchí yá.

<sup>32</sup> Te suni cuango de jíin úu tēe ni casáha cuēchi xeēn, jeē suni cuu de jíin yá. <sup>33</sup> Te ni jinúcoo de lugar nuū naní Yiqui Xíní, te yūcan ni cacata caa de ya jicā cruz. Te suni ní cacata caa de ndindúú tēe ni casáha cuēchi xeēn un núu uū gā cruz, ìn de lado váha ya, te ìnga de lado jecó yá. <sup>34</sup> Te níni jéé súcuan cúu, te ni cahān Jesús:

Tátá, cone cáhnu ní ni núu de jíináhan de, chí tu cájini de na vé casáha de, áchí yá.

Te soldado ní casáha de sorteo jeē siquĩ ndese nihín ìn ìn de sahma ya. <sup>35</sup> Te cáhñin ñayuu yūcuau, cájito i nuū yá. Te suni nde tēe cándiso jniñu, cácahān catá de cájito de ya:

Núu ìnga ñayuu ní jnama de, te na jnáma de máá de vijna, te núu ndaā jeē Cristo jeē ní nacáji Yaā Dios cúu de, áchí.

<sup>36</sup> Te tǎcá soldado suni ní casácatá de nuū yá, chí ní quecoo de nde nuū yá, te ní cajēhe de vinagre iyá coho ya. <sup>37</sup> Te cácahān de jíin yá:

Núu máá ró cúu Rey ñayuu hebreo, te na jnáma ró máá ró, áchí de.

<sup>38</sup> Te suni ní íyo jñuhun jeē ndeé xiní cruz yā jeē cahān na siquĩ ní jhí yā, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, áchí.

<sup>39</sup> Te ìn jeē ndindúú tēe ni casáha cuēchi xeēn, jeē cándita caa, ni cahān neé de nuū yá:

Núu máá ró cúu Cristo, te na jnáma ró máá ró te suni jnama ró ndindúú rí, áchí de.

<sup>40</sup> Te ìnga de ni cahān de nuū jnáhan de:

¿A tu yúhú ró Yaā Dios naún? Chí inuú cándoho yó jíin Yaā yáha. <sup>41</sup> Te máá yó chí vetū-ni cándoho yó, chí yāha cánihín yó castigo siquĩ jniñu neé ní casáha yó. Te Yaā yáha chí tú ni ìn cuēchi ní sáha ya, áchí de.

<sup>42</sup> Te ni cahān de jíin yá:

Jesús, nucūhun ní ní sáña jéé quejéé ní ndacu ní jniñu, áchí de.

<sup>43</sup> Yūcuán na te ni cahān Jesús jíin de:

Jendaá cahān rí jíin ró jeē víjna te condee ró jíin rí nuū jardín andiví, áchí yá.

*Jeē ní jhí Jesús*

(Mt. 27.45-56; Mr. 15.33-41; Jn. 19.28-30)

<sup>44</sup> Te nuū ní cuu nájñuhun cahuxí uū, te ní cunee ní cáhnu nde cahuní. <sup>45</sup> Te ní cujñúú níandii. Te sahma ndíta caa jeē ndihyū cuarto ì ìni templo cáhnu, ní ndatā-ni sava sava. <sup>46</sup> Yūcuán na te ni cana jee Jesús:

Tátá, naquihín ní ánuá na, áchí yá.

Te súcuan ni cahān yā, te ní jhí-ni ya.

<sup>47</sup> Te tēe nación Roma jeē cúu capitán ni jito de jeē súcuan ni cuu, te ni cahān de jeē yóhoyo cújéhu Yaā Dios, te áchí de:

Jendaá ndije jeē tēe tú na cuēchi cúu tēe yáha, áchí de.

<sup>48</sup> Te ndávii ñayuu cáhñin yūcuau ní cajito i táca jéé ní cuu, te cácani i yiqui jicā i jeē cájnahuhú ni i, te ní nandío cóo i cuanungoo i. <sup>49</sup> Te táca ñayuu cájini jnáhan jíin yá, jíin táca ñahan Galilea jeē ní cajica ña jíin yá, cáhñin jicā ña cájito ña táca jéé ní cuu.

*Jeē ní quindúji Jesús*

(Mt. 27.57-61; Mr. 15.42-47; Jn. 19.38-42)

<sup>50</sup> Te ní íyo ìn tēe váha tēe ndaā, nání de José. Te tēe ñuu Arimatea ndañúú Judea cúu de. Te cúu de jnáhan táca tēe hebreo cácujuhnu ga jeē casáha junta. <sup>51</sup> Te ñuhun ní de jeē quiji quiví jeē ndacu Yaā Dios jniñu, te suni tu ní núnjahan ní de jeē ní casándaā junta un jéé cúu Jesús. <sup>52</sup> Te tēe un ní jehēn de nuū Pilato, ní jicān de yiqui cúu Jesús. <sup>53</sup> Te ní snúu de ya jicā cruz, te ní chuscúcn de ya ìn sahma cuitá. Te ní chindúji de ya ìni ìn yaū jeē ní caan jicā ìn cava, nuū ná tu quindúji ndíyí. <sup>54</sup> Te quiví un cúu quiví casátuhva ñayuu, chí jehíni un quejéé quiví ndétátú.

<sup>55</sup> Te ñahan ní quijicoo jíin yá nde Galilea, ní jengoo ña jíin José, te ní cajito váha ña yaū ún, jíin ndese ní cachindúji de ya. <sup>56</sup> Te

cuanungoo ña vehe ña, te ni casátuhva ña táca perfume jiin aceite yucū jeén asñ. Te ni candetátú ña quiví ndétátú, nájñuhun ndácu ley Yaā Dios jñiñu.

*Jeē ní natecu Jesús*

(Mt. 28.1-10; Mr. 16.1-8; Jn. 20.1-10)

## 24

<sup>1</sup> Te jenéhen ndasí quiví domingo, te ni jinūcoo tucu ñahan un núu ní yindūji Jesús, te cándahá ña táca perfume jiin aceite ni casátuhva ña. Te suni cuangoo sava ga ñahan jiin ña. <sup>2</sup> Te nuū ní jinūcoo ña, te ni cajito ña jeē ní cujiyo yuū ndihyú yuyáú ndiyi. <sup>3</sup> Te ni quivicoo ña yaū ún, te tuá yiqui cūñu Jitoho yō Jesús ni cajito ña. <sup>4</sup> Te ni cacunéé ni ña cájito ña jeē tuá ndiyi. Sáa te ni cajito ña uū ndajéhé Yaā Dios jeē cáa nájñuhun tēe, cáhiin ya xiin ña, te cáñuhun ya sahma ndindéé. <sup>5</sup> Te yōhyo ni cayūhū ña, te ni cajexin ña nuū ña nde nuū ñuhun. Te ni cacahān ndajéhé un jiin ña:

¿Naun sa nuū cáyindūji ndiyi cánanducú ró Yaā tēcu? <sup>6</sup> Tuá yā yehá, chi je ni natecu yā. Te nucūhun ni rō ndese ni cahān yā jiin ró ná íne ga yā región Galilea. <sup>7</sup> Chi ni cachi ya jeē maá yā, Yaā ní nduu tēe, cánuú natūu ya nuū táca tēe cáhiyo cuēchi, jeē jñi de ya cahni de ya jicā cruz, te nuū uní quiví te natecu yā. Achí ndajéhé un.

<sup>8</sup> Yūcuán na te ni canucūhun ni ña táca jñuhun ni cahān Jesús. <sup>9</sup> Te ni quendacoo ña nuū ní yindūji ya, te te cuangoo ña. Te ni canacani ña táca jñuhun yáha nuū ndihúxi iin apóstol jiin núu táca gá de. <sup>10</sup> Te ñahan ní canacani jñuhun yáha nuū tēe cácuu apóstol, cúu ña María ñuu Magdala, jiin Juana, jiin María naná Jacobo, jiin sava ga ña. <sup>11</sup> Te táca apóstol chí cájeni ni de jeē jñuhun cánéé cáñúú cácahān ña, te tu ní cácañdije de.

<sup>12</sup> Te vēsú súcuau, te Pedro ní quenda de, te jinu de cuacondéhé de nuū ní yindūji ya. Te ni jito nihni de ini yaū, te ni jito de jeē sahma cuitá un cáyūcu máa na. Te cuanuhun de vehe de, te nahān náa ni de jeē ní jito de jeē tuá yā.

*Jeē ní ndajñuhun yá jiin úu de ichi cuáhán Emaús*

(Mr. 16.12-13)

<sup>13</sup> Te suu quiví un cuángoo uū jñáhan de iin ñuu naní Emaús, jeē jicá nájñuhun uxí iin kilómetro jiin ñuu Jerusalén. <sup>14</sup> Te cándajñuhún de siquí táca jñiñu jeē ní cuu ún. <sup>15</sup> Te níni cándajñuhún de te cácaññuhun jñáhan de, te máa Jesús ni cuyajni ya yatá de, te jica ya cuahān yā jiin de. <sup>16</sup> Te ni sáha jiin de jeē tu ní cácanuni de ya, vēsú cájito de nuū yā. <sup>17</sup> Te ni cajñuhun yá de:

¿Na jñuhun cándajñuhun ró cájica ró? ¿Te najehé cácuulhyá ní ró? Achí yá.

<sup>18</sup> Te iin de jeē naní Cleofas ni cahān de jiin yá:

Ndihí cuiti ñayuu cájini i táca jñiñu ní cuu ini ñuu Jerusalén táca quiví yáha. ¿Te á máñuhún-ni nihín cúu jeē ní quee ní ñuu un jeē tu jíni ní na vé ni cuu? Achí de.

<sup>19</sup> Te ni cajñuhun yá de:

¿Te na vé ni cuu? Achí yá.

Te ni cacahān de jiin yá:

Jeē ní ndoho Jesús ñuu Nazaret, Yaā ní nacani jñuhun Yaā Dios. Te jiin poder Yaā Dios ni sáha ya táca jñiñu jéhu te ni nacani ya jñuhun, jito jínúu Yaā Dios jiin táca ñayuu. <sup>20</sup> Te sutú cácuñéhu jiin tēe cándiso jñiñu nuū ná, ni canastúu de ya nuū táca tēe Roma, te tēe un ní casándaá de jeē cúu yā jicā cruz. <sup>21</sup> Te máa ná ní cañuhun ni na jeē maá yá jnama ya nación na Israel nuū ñayuu Roma nuū. Te siquí táca jñiñu yáha, te ni cane inga jñuhun. Chí vijna je iyo ún quiví jeē ní cuu ún. <sup>22</sup> Te sava ñahan cájini jñáhan ná jiin, ni canacani ña iin jñuhun jeē yóhyo cánaa ni na sáha, chí cácahān ña jeē ní natecu yá. Chí jenéhen ndasí ní jengoo ña yaū ndiyi ún. <sup>23</sup> Te tuá ní cájito ña yiqui cūñu yā. Te ni ndecoo ña nuū na jñáhan ná, te cácahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús. <sup>24</sup> Te ni jengoo sava jñáhan ná ndé yaū ndiyi ún, te ni cajito de jeē súcuau íyó, nájñuhun ni cacahān ñahan ún, te tu ní cájito cuiti de nuū yā.

<sup>25</sup> Yūcuán na te ni cahān maá yá jiin de:

Tēe tu cájecūhun cuiti ni cácuu ró. Yóhyo uhū cácañdije ró táca jñuhun Cristo ní cacahān tēe ni canacani jñuhun Yaā Dios nde jenahān. <sup>26</sup> ¿Te á tu súcuau ní jini ñuhun ndoho Cristo táca jñúndóho yáha, te sáa te quinhun yá nuū lúu cuñéhu ya? Achí yá.

<sup>27</sup> Te ni nacani cáji yá táca jñuhun jeē yosó núu tútu íi jeē cahān siquí maá yá. Te ni quejéé yá jiin jñuhun ni tee Moisés, te ni cahān gā yā táca jñuhun jeē ní catee tēe ni canacani jñuhun ya nde jenahān.

<sup>28</sup> Te nuū ní jinūcoo de ñuu nuū cuángoo de ún, te Jesús ni sáha ya jeē cáca ga yā quihín yā. <sup>29</sup> Te máa de ní castétu de ya, ni cacahān de jiin yá:

Ndōo ní vehe ná, chi je ni ini te je yajni cuaa, achí de.

Yūcuán na te ni quiví ya jeē quéndōo ya jiin de. <sup>30</sup> Te nuū ní cucōo ya mesa jeē cáji yá jiin de jijnáhan de, te ni quihín ya staa, te ni jicān tahú yá, te ni tahú cuéchi yá, te ni jēhe ya nuū de. <sup>31</sup> Te jeē sáha ya súcuau, te nájñuhun ni cananune tinúú de, te ni canacani de ya. Te ni ndoñuhún-ni ya nuū de cuahān yā. <sup>32</sup> Te ni cacahān maá de:

Jendaá jeē yóhyo ni cacusiñ ni yō ná ni nacani ya jñuhun nuū yō ichi ún te ni castūhun cáji yá jñuhun cahān tutu íi. Achí de.

<sup>33</sup> Yūcuán na te yachī ni canaquihin de ichi, ni canandico de cuanungoo de ñuu Jerusalén. Te ni canajnáhan de jíin ndihúxi ñin ga apóstol, cáyūcu tūtú de jíin sava ga jnáhan de. <sup>34</sup> Te ni cacahān tēe cáyūcu tūtú un:

Jendaá ndije jeē ní natecu maá Jítoho yō, te ni nane ndijin yā nuū Simón, achí de jíinánhan de.

<sup>35</sup> Yūcuán na te ndindúú tēe un ní canacani de jñuhun ndese ni najnáhan ya jíin de ichi, jíin ndese ni canacuni de ya ná ni tahú cuéchi yá staa.

*Jeē ní nane ya nuū tēe cáscuáha jíin yá  
(Mt. 28.16-20; Mr. 16.14-18; Jn. 20.19-23)*

<sup>36</sup> Te sá cacahān gā de tāca jñuhun yáha, te ni jecuññi-ni Jesús mēhñú de jíinánhan de. Te ni cahān yā jíin de:

Ndeyí sñ coo ni rō jijnánhan rō, áchí yá.

<sup>37</sup> Te ni candacoto Iyo de, ni cayūhú ndasí de, chí ni cajeni ni de jeē ñin ánuá cúu ya.

<sup>38</sup> Te ni cahān yā jíin de:

¿Naun cáyūhu rō, te naun cájeni siquí ni rō súcuan? <sup>39</sup> Condéhé ndaha ri jíin jéhē rī, te cuni rō jeē maá rí cúu. Jñii ruhū te cuni rō, chí ñin ánuá tu névāha cūñu ni yiqui najñuhun cájito rō jēé névāha maá rí, achí yá.

<sup>40</sup> Te jeē ni cahān yā súcuan, te ni steén yā ndaha ya jehē yā nuū ni yñi ndūyu cāa. <sup>41</sup> Te yōhyo ni cacusiñ ni de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíin de:

¿A cánevāha rō jecu jeē cáji rī yāhá? áchí yá.

<sup>42</sup> Yūcuán na te ni cajēhe de ñin pedazo chācá ní tau nuū yā, jíin ñin pedazo ñahmā ndūxi yocō. <sup>43</sup> Te ni quihin ya, te ni yeji yā nuū de jíinánhan de. <sup>44</sup> Te ni cahān yā jíin de:

Tāca jēé ní cuu jíin rí cúu jeē ni cahān rī ná ni ine ri jíin rō jíinánhan rō ndé saá, jeē cánuú squícu tāca jñuhun ri jeē yosó núu tūtú ley Moisés, jíin núu tācá tutu tēe ni canacani jñuhun Yaā Dios, jíin núu tūtú salmo, achí yá.

<sup>45</sup> Te ni nune ya jeē nijññí de, návāha cuu jecuhun ni de tāca jēé cahán tutu ñi. <sup>46</sup> Te ni cahān yā:

Súcuan cáhán nuū tūtú jeē ruhū Cristo, cánuú cuu rī, te nuū uní quiví natecu rī. <sup>47</sup> Te cuitē núu jñuhun ri jeē cánuú nacani ni ñayuu jeē stóo i cuéchi i, te cone cáhnu ni Yaā Dios nuū i. Te ñuu Jerusalén quejéé cuitē núu jñuhun yáha, te quihin nuū ñayuu tācá nación. <sup>48</sup> Te maá rō cácuu tēe nacani jñuhun tācá jñiñu ní cajito rō. <sup>49</sup> Te tají rí Espiritu Santo quiji ya nuū rō jijnánhan rō, najñuhun ni jejnuhun Tátá rī. Te na quéndōo rō ñuu Jerusalén condetu rō ndé nihñ rō poder Espiritu Santo jeē quiji nde andiví. Achí yá.

*Jeē ní ndaa ya cuanuhun yā andiví  
(Mr. 16.19-20)*

<sup>50</sup> Yūcuán na te ni quenda ya ñuu Jerusalén, cuahān yā nde ñuu Betania jíin de jíinánhan de. Te ni ndonehen ya ndindúú ndaha ya, te ni jicān tahú yā jehē de. <sup>51</sup> Te ní ní jíicān tahú yā jehē de, te ni cujiyo-ni ya nuū de, ni ndaa ya cuanuhun yā andiví. <sup>52</sup> Te maá de ni cachiññuhún de ya. Te saá te cuanungoo de ñuu Jerusalén, te yōhyo cácusíñ ni de. <sup>53</sup> Te ní ní cáhñin de ini templo cáhnu, cáacuatahú de nuū Yaā Dios. Te ni cuu. Amén.

## JNUHUN VAHA NI TEE SAN JUAN

*Yaā nani Jnúhun Yaā Dios ni nduu ya tēe*

<sup>1</sup> Nde xihna ñúhún ná ni jecōo ndihi jeē iyó, te je iyó Yaā nani Jnúhun Yaā Dios, chí stéén yá ndihi jnúhun ndese Yaā cúu Yaā Dios. Te Yaā nani Jnúhun un ndéé yá jín Yaā Dios, te Yaā Dios cúu ya. <sup>2</sup> Máá yá ndeé yá nde jeē xihna ñúhún jín Yaā Dios. <sup>3</sup> Te ni sáha Yaā Dios jeē jín máá yá ni jecōo ndihi táca jéé iyó. Te ma jecōo ni iin jeē iyó núu tu ní sáha máá yá. <sup>4</sup> Máá yá sáha jeē técu ndihi-ni, te máá yá cúu luz jeē steén ini anuá ñayuu, cúu jeē sáha ya jeē jécúhun ni i siquí Yaā Dios. <sup>5</sup> Te Yaā cúu luz ún ndíndee núu ñayuu tu cájica ndaā, jeē nájnúhun cáhíyo i nuú néé. Te ñayuu cáhíyo nuú néé tu cúu ndahva i luz yá.

<sup>6</sup> Te ni iyo iin tēe jeē ní tají Yaā Dios, nani de Juan. <sup>7</sup> Tēe un ní quiji de jeē nacani cájic de jnúhun máá Yaā cúu luz, návaha candije táca ñayuu jeē jín jnúhun cáhán de. <sup>8</sup> Nasúu máá Juan cúu luz ún, chí cúu de iin jeē ní nacani cájic jnúhun máá luz un. <sup>9</sup> Te máá Yaā cúu luz ndije jeē steén ini anuá táca ñayuu, nde saá ní quiji ya ini ñayiví.

<sup>10</sup> Te Yaā cúu Jnúhun Yaā Dios ni condee yá ini ñayiví, te vésú jeē jín máá yá ní sáha Yaā Dios ñayiví, te ñayuu ñayiví tu ní cácuni i cuatáhu i jeē máá yá cúu. <sup>11</sup> Ni quiji ya nuú ñayuu máá yá nación hebreo, te ñayuu ún tu ní cájetáhu i ya. <sup>12</sup> Te vésú súcuán te sava ñayuu chí ni cajetáhu i ya, te ni cacandije i jeē sáha ya jehé i. Te nuú máá i ni jēhe ya jnúhun jeē ndúu i sēhe Yaā Dios. <sup>13</sup> Te jeē ndúu i sēhe Yaā Dios, nasúu jín modo jeē cácacu ñayuu ini ñayiví, ni nasúu síquí jeē cácuni tēe, chí máá Yaā Dios sáha ya jeē ndúu i sēhe ya.

<sup>14</sup> Te máá Yaā cúu Jnúhun Yaā Dios ni nduu ya tēe, te ni condee yá jín yó. Te ni cajito yó jéé yóhoyo luu cújéhu ya, chí máñúhún-ni ya cúu Sēhe Tátá yá, Yaā cújéhu súcuán. Te máni máá jéé sáha ya jeē váha yóhó, te máni máá jnúhun ndaā cáhán yá. <sup>15</sup> Te Juan ni nacani de jnúhun ya, te ni cahán de:

Yaā váha cúu jeē ní cahán rí náa áchí rí jeē Yaā quiji chí cújéhu ga yá vésú ruhú, chí je iyó yá nde ná tu cacu rí, áchí de.

<sup>16</sup> Te ndihi yó ní canihín yó cuehē ndasí jeē váha íyó núu yá, chí máni jeē váha sáha sáha ya jín yó. <sup>17</sup> Moisés ni steén de ley Yaā Dios nuú ñayuu jenahán, te Jesucristo chí sáha ya jeē váha yóhó te steén yá táca jnúhun ndaā Yaā Dios nuú yó. <sup>18</sup> Tú ní iin ñayuu ní jito cuiti nuú Yaā Dios. Te máñúhún-ni Sēhe ya jeē ndeé yá jín Tátá yá, suu ya ní steén nuú yó ndese Yaā cúu Yaā Dios.

*Jnúhun Jesús jeē ní cahán Juan tēe scuándute*

(Mt. 3.11-12; Mr. 1.7-8; Lc. 3.15-17)

<sup>19</sup> Te ñayuu hebreo ñuu Jerusalén, ní catajic i jecu sutú jín tēe grupo levita jeē cájicniñú ini templo, ní jengoo de nuú Juan, návaha cajnúhún de ndé iin cúu Juan te na jniñú ndíso de. <sup>20</sup> Te Juan cájic ní cachí de:

Nasúu ruhú cúu Cristo, áchí de.

<sup>21</sup> Te ni cacajnúhún tucu de:

Núu súcuán ¿te ndé iin cúu ró? ¿A cúu ró Elías, tēe ní nacani jnúhun Yaā Dios nde jenahán, chí naún?

Te ni cahán Juan:

Nasúu de cúu rí.

Te ni cacajnúhún tucu de:

Núu súcuán ¿te á cúu ró tēe nacani jnúhun Yaā Dios jeē achí tutu i jeē quiji?

Tuú, áchí tucu Juan.

<sup>22</sup> Te ni cacahán tucu jín de:

¿Te ndé iin cúu ró núu súcuán? Cachí nuú rí jijnáhan rí, chí jini ñúhún castúhun rí nuú táca tēe ní catajic ruhú vējicoo rí. Cachí na jniñú ndíso ró ví.

<sup>23</sup> Te ni cahán Juan:

Máá rí cúu tēe jeē ní cahán Isaías, tēe ní nacani jnúhun Yaā Dios nde jenahán, jeē quiji rí cana jee rí nde nuú ñuhun téhé. Te cahán rí jín ñayuu jeē na sátúhva i máá i, chí quiji máá Jítoho yó. Achí Juan.

<sup>24</sup> Te tēe grupo fariseo cácuu jeē ní catajic tēe ní quijicoo ún. <sup>25</sup> Te ni cacajnúhún de Juan:

Núu súcuán ¿te naun scuándute ró te núu nasúu Cristo ní Elías ní máá tēe quiji nacani jnúhun Yaā Dios cúu ró?

<sup>26</sup> Te ni cahán Juan:

Ruhú chí jín ndute scuándute rí. Te méhú ró jijnáhan ró íne iin Yaā jeē tu cájini ró. <sup>27</sup> Te Yaā un cúu jeē ní cahán rí jeē quiji ya te cújéhu ga yá vésú ruhú. Chí tú na vé jéhu cuiti cúu rí nuú yá, ní jeē cuajniñú rí nuú yá vésú iin jniñú lúli gá nájnúhun jeē ndají rí correa ndijén yá. Achí de.

<sup>28</sup> Súcuán ni cuu jeē ní candajnúhún de jín Juan nde Betábara jee íne ichi núu cáne niándii yúte Jordán, nuú scuándute Juan.

*Siquí jeē cúu ya Londe Yaā Dios*

<sup>29</sup> Te inga quiví un ní jito Juan nuú Jesús jeē véji ya nuú de. Te ni cahán de jín ñayuu:

Condēhe jijnáhan ró, chí yáha véji Yaā cúu Londe jeē ní tají Yaā Dios, te cuu yá jeē sándoo ya cuēchi ñayuu ñayiví. <sup>30</sup> Yaā váha cúu jeē ní cahán rí jeē quiji iin Yaā cújéhu ndasí, chí je iyó yá nde ná tu cacu rí. <sup>31</sup> Te nde saá te tu ní jini rí jeē váha cúu Yaā ní tají Yaā Dios. Te ni quiji rí jeē scuándute rí ñayuu ñuu yó Israel jín ndute, návaha steén rí nuú i jeē suu ya cúu, áchí Juan.

<sup>32</sup> Te suni ní cahán gá de jnúhun ya:

Ni jito ri Espíritu Santo, ni cuun ya ichi ándiví, cáa ya nájñuhun paloma, te ni quee ya xiní Jesús. <sup>33</sup> Te nde saá te ná tu cuni rí jeé Jesús cúu. Te máá Yaa Dios jeé ní taji yá ruhū jeé scuándute ri jíin ndute, ni cahān yā jíin rí: Núu ni jito rō jéé cúun Espíritu Santo te quendōo xiní ñin tēe, yūcuan cúu Yaa jeé cuáha Espíritu Santo condee ñi anuá ñayuu, achí Yaa Dios. <sup>34</sup> Te je ni jito ri ún, te nācani cáji rí jñuhun jeé maá yá cúu Sēhe Yaa Dios. Achí Juan.

*Uū tēe jeé ní cana ya xihna gā*

<sup>35</sup> Te inga quiví ún te Juan ñe tucu de yūcuan jíin úu tēe cájica jíin de. <sup>36</sup> Te ni jito de nuū Jesús jeé jica ya yūcuán. Te ni cahān de:

Condēhe jíjnāhan ró, chí yūcuan cúu Yaa cúu Londe jeé ní taji Yaa Dios.

<sup>37</sup> Te ndindúú tēe cájica jíin Juan ni cajini sōho de jñuhun yāha, te ni candiquín de Jesús. <sup>38</sup> Te ni ndió cóto Jesús, te ni jito ya jeé cándiquín de yatā yā. Te ni cahān yā jíin de:

¿Na vé cánanducú ró?

Te ni cacahān de jíin yā:

Maestro, ¿ndé nuū ndéé ní?

<sup>39</sup> Te ni cahān yā jíin de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jíin yá quiví ún, chí nájñuhun cacuñ jehíni cúu.

<sup>40</sup> Te Andrés, ñani Simón Pedro, cúu ñin jeé ndindúú tēe un jéé ní cajini sōho jñuhun ni cahān Juan, te ni candiquín Jesús. <sup>41</sup> Te Andrés, yachí ni jenanducú de ñani de Simón, te ni cahān de jíin:

Ni caquijnāhan ri jíin Mesías, achí de. Te jñuhun un cúní cahān Cristo, Yaa ní taji Yaa Dios.

<sup>42</sup> Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jñuhun un cúní cahān Pedro, jeé cuni cahān yuū.

*Jeé ní cana ya Felipe jíin Natanael*

<sup>43</sup> Te inga quiví un cúní Jesús quihñ yā región Galilea. Te ni nihñ jñāhan ya jíin Felipe, te ni cahān yā jíin de:

Condiquín ruhū na quihñ yō.

<sup>44</sup> Te Felipe cúu tēe ñuu Betsaida, jeé cúu ñuu Andrés jíin Pedro. <sup>45</sup> Te ni jenanducú de Natanael, te ni cahān de jíin:

Ni canihñ jñāhan ri jíin Yaa jeé yosó jñuhun ya nuū tútu ley jeé ní tee Moisés, jíin núu tútu ni catee tēe ni canacani jñuhun Yaa Dios nde jenahán. Te Jesús sēhe José ñuu Nazaret cúu ya. Achí de.

<sup>46</sup> Te ni cahān Natanael jíin de:

¿Te ndese cúu cujéñu ñin tēe jeé ní cacu ñuu ndahú Nazaret?

Te ni cahān Felipe:

Quihñ yō de cuni rō, achí de.

<sup>47</sup> Te ní jito Jesús jeé véji Natanael, te ni cahān yā:

Yāha véji ñin tēe ndaá jeé cúu ndije yucūn Israel, chí tu stáhú cuiti de, achí yá.

<sup>48</sup> Te ni cahān Natanael jíin yá:

¿Ndese jíin ní sáña?

Te ni cahān Jesús:

Je ni jito ri rohó ndé ná tu cana Felipe xiní rō, ná ñe ró jéhē nundéhe higo, achí yá.

<sup>49</sup> Yūcuán na te ni cahān Natanael jíin yá:

Maestro, máá ní cúu Sēhe Yaa Dios, máá ní cúu Rey ñuu yō Israel, achí de.

<sup>50</sup> Te ni cahān Jesús:

¿A máá jéé ní cahān rí jeé ní jito ri rohó ná ñe ró jéhē nundéhe higo, te jeé yūcuan cándije ró ruhū naún? Tuú chí coo jñiñu jéñu ga coto ró vēsú jeé yāha, achí yá jíin de.

<sup>51</sup> Te ni cahān gā yā:

Jendaá cahān rí jíin rō jijnāhan ró jéé nde vijna te coto ró jéé núne andiví, te táca ndajéhé Yaa Dios cánda cánuu nuū ruhū, Yaa ní nduu tēe, achí yá.

*Jeé ní jéhēn yā ñin vico nándāha ñuu Caná*

## 2

<sup>1</sup> Te ni yāha uní quiví, te ni íyo ñin vico nándāha ñuu Caná ndañū Galilea. Te yūcuan ñe náná Jesús. <sup>2</sup> Te suni ni cacana i Jesús jíin tēe cáscuáha jíin yá, ni jehēn yā vico un jíin de. <sup>3</sup> Te ni ndoco vino. Te náná Jesús ni cahān ña jíin yá:

Ni ndoco vino i, achí ña.

<sup>4</sup> Te ni cahān Jesús jíin ña:

¿Naun cáhān ní súcuan jíin ná náná? Chí ná tu quee quiví jeé sáha ná jñiñu jéñu, achí yá.

<sup>5</sup> Te náná yā chí ni cahān ña jíin ñayuu cájeni cohō:

Sáha ró jíjnāhan ró táca jéé cahān yā jíin ró. Achí ña.

<sup>6</sup> Te yūcuan íyó ññu tenéjā yuū jeé ññuhun ndute cájichi ñayuu hebreo jeé ndúndoo i nuū Yaa Dios. Te ñin ñin tenéjā un cánda cuhun cuñ xico chí ciento litro ndute. <sup>7</sup> Te ni cahān Jesús jíin ñayuu cájeni cohō:

Scútú ndā rō táca tenéjā yāha.

Te ni cascútú ndā i. <sup>8</sup> Te ni cahān yā jíin i:

Vijna te quēen ró jecu te quindeca ró coto ndee tēe ndíto vico, achí yá.

Te ni cajendeca i nuū de. <sup>9</sup> Te ni séyuhú de ndute jeé ní nduu vino, te tu jíni de ndé ní canihñ i. Chí máni mozo un cúu jeé cájini, chí máá i ni caquēen ndute ún. Yūcuán na te tēe ndíto vico ní cana de tēe nándāha. <sup>10</sup> Te ni cahān de jíin:

Tāca ñayuu chí xihna gā vino váha cájēhe i, te núu je ni cajihí vāha ñayuu cáhñin vico, yūcuán na te jēhe de vino ndahú na. Te máá ró tucu ni sáha ró, chí nde jeé sándihí te jēhe ró vino jeé yóhyo váha ga jíhi, achí de.

<sup>11</sup>Jniñu yáha jéé ni sáha Jesús ini ñuu Caná ndañúú Galilea cúu jniñu jéhu xihna ñúhún jéé ni sáha ya jeé steén yá poder yá. Te súcuan ni steén yá jeé yóhoyo cújéhu ya. Te tēe cáscuáha jíin yá ni cacandíje de ya.

<sup>12</sup>Te ná ni yáha jniñu yáha, te cuahán yá ñuu Capernaum jíin náná yá jíin táca ñani yá jíin tēe cáscuáha jíin yá. Te ni coyūcu yá yūcuán jecu quiví.

*Jeé ní quenehen ya ñayuu ini templo*

(Mt. 21.12-13; Mr. 11.15-18; Lc. 19.45-46)

<sup>13</sup>Te jeé cuácuyajni vico pascua casáha jnánhan ñuu yá hebreo, te cuahán yá ñuu Jerusalén. <sup>14</sup>Te ini templo cáhnu ni jito ya ñayuu cáxicó stiquí jíin lanchi jíin paloma, jíin ñayuu castáyí xúhún, cáyūcú i nuú mesa i. <sup>15</sup>Te jeé súcuan ni jito ya, te ni sáha ya ñin cuarta ññ. Te ni scúnu ya táca i ini templo, nde jíin lanchi jíin stiquí. Te ni jete yá xúhún ñayuu castáyí. Te ni scotúú yá táca mesa i. <sup>16</sup>Te ni cahán yá jíin ñayuu cáxicó paloma:

Tava táca quiti yáha. Te ma sáha ró yáhu ini vehe Tátá rí. Achí yá.

<sup>17</sup>Yūcuán na te tēe cáscuáha jíin yá, ni canucúhun ni de jnūhun yósó nuú tútu ñi: Je yajni cuu na jéé yóhoyo ndáñví ni na síquí vehe ní, achí yá jíin Tátá yá, achí tutu.

<sup>18</sup>Te tēe ñuu yá hebreo ni cacajñúhún de ya:

¿Na jniñu jéhu sáha ró jéé steén ró poder ró, te cucáhnu ni rí jeé ndiso jniñu ró sáha ró súcuan? achí de jíin yá.

<sup>19</sup>Te ni cahán yatá Jesús:

Canu ró templo yáha, te nuú uní quiví te nuondichi sáha rí, achí yá.

<sup>20</sup>Yūcuán na te ni cacahán tēe hebreo un:

Uú xico iñu cuiyá te ni jínu ni cuváha templo yáha. Te róhó, ¿á nuú uní-ni quiví te nuondichi sáha ró naún? Achí de.

<sup>21</sup>Te templo jeé cahán Jesús cúu máa yiqui cúnu yá, chí cahni ñayuu yá te natecu yá nuú uní quiví. <sup>22</sup>Jeé yúcuán cúu jeé ná ni natecu yá jeé ni jíhí yá, te tēe cáscuáha jíin yá ni canucúhun ni de jeé ni cahán yá jnūhun yáha. Te ni cacandíje de jnūhun jeé yósó nuú tútu ñi, jíin jnūhun yáha jéé ni cahán Jesús.

*Jeé jíni Jesús ndese cáa ini anuá ñayuu*

<sup>23</sup>Te ná ine Jesús ñuu Jerusalén máa vico pascua, te cuehē ñayuu ni cacandíje i jeé cúu ya Cristo, chí ni cajito i táca jniñu jéhu sáha ya jeé steén yá poder yá. <sup>24</sup>Te máa Jesús chí tu ní jétáhú yá i, chí je jíni yá ndese cáa ini anuá i jíjnánhan i. <sup>25</sup>Te tu jíni ñúhún yá jeé cáchi ni ñin ñayuu nuú yá ndese íyó táca ñayuu, chí máa yá je jíni yá ndese cáa ini anuá i.

*Jeé ní candajñúhún Jesús jíin Nicodemo*

### 3

<sup>1</sup>Te ni íyo ñin tēe grupo fariseo, naní de Nicodemo, te cújéhu de nuú ñayuu ñuu de

hebreo. <sup>2</sup>Tēe yáha ní quiji de nuú Jesús ñin jecuáa, te ni cahán de jíin yá:

Maestro, je cájini na jéé maá Yaá Dios ni tají yá nihín jéé steén ni jnūhun ya nuú na jíjnánhan ná. Chí núu tu íyó Yaá Dios jíin ní, te ma cúu sáha ní ni ñin jniñu jéhu nájñúhun sáha máa ní jeé steén ni poder ní, achí de.

<sup>3</sup>Te ni cahán Jesús:

Jendaá cahán rí jíin ró jeé núu tu nacacu jeé ñin ñayuu, te ma cúu quiví i ndaha Yaá Dios jeé ndacu ya jniñu nuú i, achí yá jíin de.

<sup>4</sup>Te ni cahán Nicodemo jíin yá:

¿Te ndese cuu nacacu ñin tēe te núu je ni jéhu de? ¿A cuu nucúhun tucu de chíjé náná de te nacacu tucu de? achí de.

<sup>5</sup>Te ni cahán Jesús:

Jendaá cahán rí jíin ró jeé núu tú nacacu ñin ñayuu, te ma cúu quiví i ndaha Yaá Dios jeé ndacu ya jniñu nuú i. Te jeé nácacu i cúu jeé ndúndoo cuēchi i nájñúhun jíin ndute, te condee Espiritu Santo ini anuá i. <sup>6</sup>Jeé cácu sáha ñayuu, chí sēhe ñayuu cúu. Te jeé cácu sáha Espiritu yá, chí sēhe ya cúu. <sup>7</sup>Ma náa ní ró caní ní ró ndese cúu jnūhun ni cahán rí jíin ró jeé cánuú jéé nacacu jeé ró jíjnánhan ró. <sup>8</sup>Te tachí chí quēe cuahán ndé-ni cúu nuú cuní maá, te jíni sóho ró jéé cácu, te tu jíni ró ndé nuú véji ní ndé nuú quihín. Te suni súcuan cúu táca ñayuu jeé nácacu sáha Espiritu, chí tu jíni ró ndese sáha ya jniñu ún, achí yá.

<sup>9</sup>Te ni cahán tucu Nicodemo:

¿Ndesé ga cúu núu súcuan?

<sup>10</sup>Te ni cahán Jesús:

Máa ró cúu ñin maestro jeé cújéhu nuú ñayuu ñuu yó Israel, te ¿á tu jécúhun ní ró jnūhun yáha naún? <sup>11</sup>Jendaá cahán rí jíin ró jeé jnūhun cájécúhun ní rí cúu jeé cácahán rí jíin ró. Te cáncani cájé rí jnūhun jniñu ní cajito rí. Te tu cacandíje ró jnūhun cácahán rí. <sup>12</sup>Chí ni cahán rí jnūhun ndese sáha Yaá Dios ini ñayví, te tu cacandíje ró. Núu súcuan ¿te ndese candíje ró núu cahán rí jnūhun táca ndese sáha ya nde andiví?

<sup>13</sup>Chí ni ñin tu ní cáa andiví jeé cúni ndese íyó yúcuán, chí máñúhún-ni ruhú, Yaá ní nduu tēe. Chí andiví ndéé rí, te ni cuun rí véji rí. <sup>14</sup>Te nájñúhun ní cata caa Moisés ñin coó cáa nuú ñin yujnu, ná ni cajica ñayuu nuú ñúhún tēhé, suni súcuan máa rí, Yaá ní nduu tēe, cánuú jéé cóndita caa rí jicá cruz. <sup>15</sup>Te súcuan cánuú náváha táca ñayuu jeé candíje i jeé jnáma rí i, ma jnahnú ndetú i, chí sa suhva cotecu i ní cáni andiví.

*Yóhoyo ni cundáhú ní yá ñayuu ñayví*

<sup>16</sup>Chí Yaá Dios yóhoyo ni cundáhú ní yá ñayuu ñayví. Jeé yúcuán ní tají yá Sēhe ya ní quiji, vēsú mañúhún-ni ya íyó, náváha táca ñayuu jeé candíje i jeé jnáma ya i, ma jnahnú ndetú, chí sa suhva cotecu i ní cáni andiví. <sup>17</sup>Chí tu ní tají Yaá Dios Sēhe ya ini ñayví



jéé snahnú ndetú yá ñayuu, chi sa suhva jeé jnáma ya ñayuu.

<sup>18</sup> Ñayuu jeé candije i jeé jnáma ya i, ma jnahnú ndetú i. Te ñayuu tu cándije, je ni jnahnú ndetú i, chi tu ní cándije i máá Séhe Yaá Dios, te máá ñin-ni ya iyó. <sup>19</sup> Máá Yaá jeé stíndéé ini anuá ñayuu, je ni quee ya ini ñayívi. Te cánujnahán gá ni ñayuu caca i nájnúhun nuú néé vesú nuú luz yá, chi jniñú cásáha i cúu jniñú néé. Jeé yúcuán cúu jeé jnahnú ndetú ñayuu tu cándije ún. <sup>20</sup> Chi táca ñayuu casáha jniñú néé, tu núnjahan cuíti ni i luz yá. Te tu jéhe i jnúhun jeé stíndéé yá ini anuá i, chi tu cúni i jeé natúu jniñú néé cásáha i. <sup>21</sup> Te ñayuu jeé cájica jíin jniñú ndaa, jéhe i jnúhun jeé stíndéé yá ini anuá i, náváha natúu ndíjin jeé táca jniñú cásáha i cúu jniñú cúni Yaá Dios. Achí yá jíin de.

#### *Jeé ní cáhán tucu Juan jnúhun Jesús*

<sup>22</sup> Yúcuán na te Jesús jíin téé cáscuáha jíin yá, cuahán yá región Judea. Te ni condee yá yúcuán jecu tiempo jíin de, te cáscuándute de ñayuu. <sup>23</sup> Te suni scúándute Juan, íne de lugar jeé naní Enón yajni ñuu Salim, chi yúcuán iyó cuéhé ndute. Te ni quijicoo ñayuu nuú de, te ni scúándute de i. <sup>24</sup> Súcuán ní sáha Juan nde ná tu quívi de vecáa.

<sup>25</sup> Yúcuán na te sava téé cáscuáha jíin Juan yóhoyo ní cacahán de jíin sava jnáhan de hebreo siquí núu ndé ñin cúu modo váha ga jeé cúchi ñayuu ndundoo i nuú Yaá Dios. <sup>26</sup> Te ni queeco de nuú Juan, te ni cacahán de:

Maestro, téé ní ine jíin ní yúte Jordán ichi núu cáne niándii, jeé ní nacani ní jnúhun de nuú ná, vijna te scúándute máá de, te ndívii ñayuu cuangoó i nuú de.

<sup>27</sup> Te ni cahán Juan:

Ni ñin téé ma cúu sáha de jniñú Yaá Dios te núu ma tejniñú ya de. <sup>28</sup> Máá ró jijnáhan ró chí ní cajini sóho ró jéé ní cahán cají rí jeé násúu máá rí cúu Cristo, chi cúu rí ñin jeé ní tají Yaá Dios jeé cósnúu nacani jnúhun jeé quíji ya. <sup>29</sup> Te núu cásáha vico quíjnáhan, te máá yíi cúu jeé ndéca ñasíhí. Te amigo yíi un íne jíin de, te jíni sóho jnúhun cáhán de. Te yóhoyo cúsi ní jíni sóho jnúhun cáhán yíi ún. Te suni súcuán ruhú, chí cúu rí nájnúhun amigo yíi, chí ní quee maá Cristo, te yóhoyo cúsi ní rí jíni sóho rí jnúhun cáhán yá. <sup>30</sup> Te jíni ñúhún jéé ndujéhu ga maá yá te ndululí gá maá rí, achí Juan.

#### *Jeé ní quíji ya nde nuú sucún*

<sup>31</sup> Te Yaá jeé véji nde andíví, cújéhu ya nuú ndíhi. Chi táca jéé ní cacu ini ñayívi yáha, séhe ñayívi cúu, te máni jnúhun ñayívi cáhán. Te Yaá jeé véji ichi andíví, chí cújéhu ya nuú ndíhi ñayuu. <sup>32</sup> Te nacani ya jnúhun jeé ní jito ya jíin jéé ní jíni sóho ya. Te ñayuu chí tu cándije i jnúhun cáhán yá. <sup>33</sup> Te núu ñin ñayuu candije i jnúhun cáhán yá, suu cúu jeé jejnúhún i jeé Yaá ndaa cúu Yaá Dios. <sup>34</sup> Chi

Yaá ní tají Yaá Dios véji, máni máá jnúhun Yaá Dios cahán yá. Chi Yaá Dios tu yícuáha jéhe ya Espíritu yá nuú Yaá ní tají yá. <sup>35</sup> Máá yá jeé cúu ya Tatá, yóhoyo maní yá jíin Séhe ya, te ndívii ní jéhe ya ndaha Séhe ya jeé ndacu ya jniñú nuú. <sup>36</sup> Nayuu jeé candije máá Séhe ya jeé jnáma ya i, cotecu i ní cáni andíví. Te ñayuu tu cúni candije Séhe ya, ma cótecu i ní cáni andíví, chí sa suhva cuáha Yaá Dios castigo jeé ndoho i ní cáni.

#### *Jeé ní cáhán Jesús jíin ñahan ñúu Samaria*

## 4

<sup>1</sup> Te téé grupo fariseo, ni canihín de jnúhun jeé iyó cuéhé gá téé cáscuáha jíin Jesús vesú jíin Juan, jíin jéé cuéhé gá ñayuu scúándute ya vesú Juan. <sup>2</sup> Te nasúu jéé scúándute máá yá, chí téé cáscuáha jíin yá cúu jeé cascuándute. <sup>3</sup> Te ná ní jíni Jesús jeé súcuán ní canihín de jnúhun, te ní quenda ya región Judea, te cuanuhun yá región Galilea.

<sup>4</sup> Te ichi jeé nuhún yá chí yáha región Samaria. <sup>5</sup> Te ní jinú yá ñin ñuu región Samaria jeé naní Sicar, yajni ñuhun jeé ní jéhe Jacob nuú séhe de José nde jenanán. <sup>6</sup> Te yúcuán íne pozo jeé naní pozo Jacob. Te ní cucóo Jesús xiin pozo un, chí ní cuíta yá jeé cuahán yá ichi. Te nájnúhun cahuxí uú cúu. <sup>7</sup> Te ní quee ñin ñahan Samaria, véji ña vequihín ña ndute. Te ní cahán Jesús jíin ña:

Cuáha ní ndute coho ná, áchí yá.

<sup>8</sup> Te téé cáscuáha jíin yá, chí je cuangoó de nde ñuu, cuacuaan de jeé cáji de jíin yá. <sup>9</sup> Te ñahan Samaria un ní cahán ña jíin yá:

¿Ndesé cúu jeé jíicán ní ndute nuú ná coho ní? Chí téé hebreo cúu ní, te ñahan Samaria cúu ná, áchí ña.

Súcuán ní cahán ña, chí ñayuu hebreo tu cácahán i jíin ñayuu Samaria. <sup>10</sup> Te ní cahán Jesús:

Núu jeé jíini ní ndese cúni Yaá Dios sáha ya jeé váha níhín, jíin ndé ñin cúu sáña jéé jíicán na ndute nuú ní, yúcuán na te máá ní cacán ní núu ná, te cuáha ná ndute jeé cótecu ní ní cáni sáha, áchí yá.

<sup>11</sup> Te ní cahán ña jíin yá:

Tátá, yóhoyo cúu pozo yáha, te tú na vé ndahá ní jéé táva ní ndute. Núu súcuán ¿te ndé nuú níhín ní ndute jeé cótecu na sáha? <sup>12</sup> ¿Te á cújéhu ga maá ní vesú jíi yó Jacob, chí naún? Chí máá de ní stóo de pozo yáha nuú yó. Te yáha ní cajihí máá de ndute, jíin táca séhe de, jíin quiti ndéca de. Achí ña.

<sup>13</sup> Te ní cahán Jesús:

Táca ñayuu jeé jíhi ndute yáha, chí jíichí tucu i. <sup>14</sup> Te ñayuu coho ndute jeé cuáha na núu i, chí ma jíichí cuíti gá i. Chí ndute jeé cuáha ná un, cane ini i nájnúhun ndute jeé cáne ñuhún, te sáha jeé cotecu i ní cáni, áchí yá jíin ña.

<sup>15</sup> Te máá ña tu ní jécūhun ni ña, te ni cahān ña jíin yá:

Tátá, cuāha ní ndute ún coho ná, návāha ma jichí cuiṭi gā ná, ni tuá jíni ñūhun quiqui-hin ná ndute pozo yáha, áchí ña.

<sup>16</sup> Te ni cahān Jesús jíin ña:

Cuácana ní yíi ní te quiji ní jíin de, áchí yá.

<sup>17</sup> Te ni cahān ña:

Tú yíi ná iyó.

Te ni cahān Jesús:

Ndaā cahān ni jée tú yíi ní iyó. <sup>18</sup> Chi je ni cuu uhūn yíi ní, te tēe ndéca ní vijna chi nasūú yíi ní cúu de. Yāha cúu jeē ní cáhān ndaā ní, áchí yá.

<sup>19</sup> Te jeē súcuan ni cahān yā, te ni cahān ña:

Tátá, ñn tēe nácani jñūhun Yāā Dios cúu ní, jéni ní ná. <sup>20</sup> Tāca jíi na ñáyuu Samaria, yucu yáha ní cachíñūhún i Yāā Dios. Te máá ní ñáyuu hebreo, cácahān ni jée ñuu Jerusalén cúu nuū cánuú chíñūhún yó yā, achí ña.

<sup>21</sup> Te ni cahān Jesús jíin ña:

Nánā, candíje ní jñūhun cáhān na, chi quee quiví jeē ni nasūú yucu yáha ni nasūú ñuu Jerusalén cúu nuū chíñūhún ní máá Yāā cúu Tátá, chi ndihi-ni lugar te cuu chíñūhún ní yá. <sup>22</sup> Máá ní ñáyuu Samaria tu cájini ní ndé ñn cúu jeē cáchiñūhún ní. Te máá ná jijnáhan ná chi cájini na ndé ñn cúu jeē cáchiñūhún ná. Chi nde nuū máá ná jijnáhan ná ñáyuu hebreo cúu nuū véji Yāā jnama ñáyuu. <sup>23</sup> Te je ni quee quiví jeē ñáyuu cáchiñūhún ndāā, vijna te chíñūhún ndije i Yāā cúu Tátá nde jíin ini jíin ánuá i. Chi máá Tátá cúni yā jeē súcuan chíñūhún ñáyuu yā. <sup>24</sup> Yāā Dios cúu Espíritu, te ñáyuu jeē cuní i chíñūhún i ya, cánuú jée chíñūhún ndije i ya jíin ini jíin ánuá i, áchí yá.

<sup>25</sup> Te ni cahān ñahan ún:

Jíni na jée quiji Mesías jeē cúu Cristo, Yāā jeē tají Yāā Dios. Te núu ni quee máá yá, te stéén cají yá tāca jñūhun nuū yó.

<sup>26</sup> Te ni cahān Jesús:

Máá ná jeē cahān jíin ní, suu ná cúu Yāā ún.

<sup>27</sup> Te sá cáhān gā yā súcuan, te ni ndecoo-ni tēe cáscuāha jíin yá. Te ni canaa ni de cájito de jeē ndájñūhun yá jíin ñahan yúcuan. Te ni ñn de tu ní cájñūhún de ya núu na vé cájñūhun yá ña chí na vé ndájñūhun yá jíin ña. <sup>28</sup> Yūcuán na te ñahan un ní stóo ña quíyí ña, te cuahān ña nde ñuu. Te ni cahān ña jíin ñáyuu ún:

<sup>29</sup> Nehen na quíngoo yó te coto ró ñn tēe jeē ní cachí ndihi tāca jée ní sáha ri. Sanaa te máá yá cúu Cristo, jeē cándetu yó quiji, áchí ña.

<sup>30</sup> Yūcuán na te ni quendacoo i ñuu ún, te cuangoo i nuū íne Jesús. <sup>31</sup> Te nde ná tu jinūcoco i, te tēe cáscuāha jíin yá ni cacahān ndahú de jíin yá:

Maestro, cají ní stāā víi, achí de.

<sup>32</sup> Te ni cahān yá jíin de:

Iyó stāā cají rí jeē tu cájini rō ndese cúu.

<sup>33</sup> Yūcuán na te tēe cáscuāha jíin yá, ni cacajñūhun jñahan de:

¿A ní quindeca ñn ñáyuu jeē ní yeji yā, chí naún? áchí de.

<sup>34</sup> Te ni cahān Jesús:

Jeē ní cachí rí jeē iyó jée cáji rí cúu jeē cúsiñ ní rí sáha ri jniñu cúni Yāā ní tají ruhū véji rí, jíin jée sínu ri jniñu ún. <sup>35</sup> Te cácahān rō jeē cúmaní cuñ gā yoō te tahndé trigo. Te ruhū chí cáhān rí jíin ró: Condēhe jijnáhan ró, chí ñáyuu cuehē cácuu i nájnūhun trigo jeē jé ni cuaan jeē tahndé, chí je cáhiyo túhva i candíje i ruhū. <sup>36</sup> Te tēe scándíje ñáyuu cácuu de nájnūhun tēe cájehnde trigo, te niñin de yāhu de. Te jeē cánaštútú de ñáyuu cúu jeē cótecu i níí cáni andiví. Te tēe cáscuíté núu jñūhun ri, inuú-ni cusíi ní de jíin tēe cástéén gā jñūhun ri. <sup>37</sup> Chi ndaā cúu jñūhun jeē cahān: ñn tēe jéte, te inga tēe náštútú, áchí. <sup>38</sup> Te suu cúu jeē ní tají rí rohó jijnáhan ró jée scándíje ró ñáyuu jeē jé ní canihñ jñūhun ya ni casáha inga tēe. Chi inga tēe je ni canacani de jñūhun nuū ñáyuu, te máá ró chí nájnūhun cánaštútú ró i cúu jeē scándíje ró i.

<sup>39</sup> Te cuehē ñáyuu Samaria jeē cáyūcú ñuu ún, ni cacandíje i Jesús jée ní jini sóho i jñūhun ni cahān ñahan ún. Chi ni cahān ña: Ni cachí ya ndihi tāca jée ní sáha ri. <sup>40</sup> Te jeē yúcuan cúu jeē ñáyuu Samaria un ní jinūcoco i nuū yā, te ni cacahān ndahú i jíin yá jee na quéndōo ya ñuu i. Te ni ndōo ya yúcuan úú quiví. <sup>41</sup> Te cuehē gā i ni cacandíje i ya jíin jñūhun cáhān máá yá. <sup>42</sup> Te ni cacahān i jíin ñahan ún:

Tuá niní jée cahān máá ró te candíje ri yā, chí je ni cajini sóho ri jñūhun cáhān máá yá. Te cájini yó jeē máá yá cúu ndije Cristo, Yāā jnama ñáyuu ñayiví. Achí i.

*Jeē ní nasávāha ya sēhe tēe ndíso jñūñu nuū rey*

<sup>43</sup> Te nuū ni yáha uū quiví ún, te Jesús ni quenda ya Samaria, te ni quihñ tucu ya ichi cuanuhun yā región Galilea. <sup>44</sup> Chi je ni cahān máá yá jeē tēe cácanani jñūhun Yāā Dios, tu cáhiyo yíñūhún ñáyuu ñuu de jíin de, te suni súcuan ní cuu jíin máá yá. <sup>45</sup> Te ná ní najinú yá Galilea, te ñáyuu un ní cajetahú i ya, chí suni máá i ní jengoo i vico pascua ñuu Jerusalén, te ni cajito i tācá jniñu ní sáha ya quiví ní iyo vico ún.

<sup>46</sup> Yūcuán na te ni jehēn tucu ya ñuu Caná ndañū Galilea, nuū ní sáha ya jeē ndúte ní nduu vino. Te ini ñuu Capernaum ní iyo ñn tēe cújéhuu jeē ndíso jniñu nuū rey. Te cúhú sēhe de. <sup>47</sup> Tēe un ní jini jñūhun de jeē ní najinú Jesús región Galilea jeē ní jéhen yā región Judea. Te ni jecondéhe de ya, te ni cahān ndahú de jíin yá jeē na quihñ yá jíin de vehe de, te nasávāha ya sēhe de, chí je yajni cuu i. <sup>48</sup> Te ni cahān Jesús jíin de:

Núu tú coto ró jniñu jéhu jeē nāā ni rō sáha, te ma candíje cuiti rō jijnáhan ró, áchí yá.

<sup>49</sup> Te tēe ndíso jniñu nuū rey, ni cahān de: Cava váha ni ní na quíhñ yō, chí núu cucuéeé ní te cuu sēhe ná, áchí de.

<sup>50</sup> Yūcuán na te ni cahān Jesús:

Cuanuhun vehe ró, chí cotecu sēhe ró.

Te tēe un ní candíje de jñuhun ni cahān Jesús, te cuanuhun-ni de. <sup>51</sup> Te níni jíca de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduváha sēhe ní, áchí i.

<sup>52</sup> Te ni cajñuhún de na hora ni quejéé nduváha i. Te ni cacahān i jíin de:

Cahñin jeē ícu ni quenda quíji i.

<sup>53</sup> Yūcuán na te máá tátá i ni sáha de cuenta jeē hora un cúu jeē ni cahān Jesús jíin de jeē cótecu sēhe de. Te ni candíje de jíin ní vehe de jeē cúu ya Yaā ní taji Yaā Dios.

<sup>54</sup> Yáha cúu vuelta uū jeē ni sáha Jesús jniñu jéhu jeē ni stéén yā poder yā región Galilea, jeē ní najinū yā jeē ni jéhēn yā región Judea.

*Jeē ní nasávaha ya ñin tēe catú yuhu pila Betesda*

## 5

<sup>1</sup> Yūcuán na te cuahān tucu Jesús ñuu Jerusalén, chí íyó tucu vico cásaha jnánhan ñuu yā hebreo. <sup>2</sup> Te Jerusalén íyó ñin pila ndute yajni yéhyí jeē naní yéhyí lanchi. Te yuhu hebreo naní Betesda. Te nuū íne pila un íyó úhñ corredor. <sup>3</sup> Te ini táca corredor un cácaā cuehē ñayuu cácuñh, jeē cuaá, jeē chacuá, jeē ní jíin. Te cándetu i jeē canda ndute ún. <sup>4</sup> Chí íyó quívi jeē cúun ñin ndajéhé yā ini pila un, te scánda ya ndute. Te ñayuu quívi xíhna gā ini pila un ná scánda ya ndute, te nduváha i na-ni cuehyí ndóho i. <sup>5</sup> Te yūcuán íyó ñin tēe jeē ní cuu ocó xahūn uní cuiyā huhú de. <sup>6</sup> Te ni jito Jesús jeē catú de, te ni jini yā jeē ní cuu cuehē cuiyā huhú de. Te ni cahān yā jíin de:

¿A cuní rō nduváha ró? áchí yá.

<sup>7</sup> Te ni cahān tēe huhú un jíin yá:

Tu níhñ na ni ñin tēe squívi sáñá ini pila hora jeē canda ndute. Chí táca jínu jeē cuní na quívi ná, te quívi-ni inga ñayuu xíhna gā. Achí de.

<sup>8</sup> Te ni cahān Jesús:

Ndocuñi te naquihin ró camilla ró te caca ró, áchí yá.

<sup>9</sup> Te tēe un ní nduváha-ni de. Te ni naquihin de camilla de, te ni quejéé de jíca de. Te quívi ndétātu cúu quívi ún. <sup>10</sup> Yūcuán na te jnánhan de tēe hebreo un ní cacahān jíin de:

Quívi ndétātu cúu vijna. Te áchí ley jeē ma cúu condiso ró camilla ró.

<sup>11</sup> Te ni cahān tēe ni nduváha ún:

Tēe ní nasávaha ruhū, ni cahān de jíin rí jeē náquihin rí camilla rí te caca rí, áchí de.

<sup>12</sup> Yūcuán na te ni cacajñuhún un de:

¿Ndé tēe ni cahān jíin ró jeē náquihin ró camilla ró te caca ró?

<sup>13</sup> Te tēe ni nduváha ún, tu jíni de ndé ñin cúu jeē ní nasávaha de. Chí cahñin cuehe ñayuu yūcuán, te Jesús je cuahān yā. <sup>14</sup> Te cúcuéeé gā te ni najnánhan Jesús jíin de ini templo cáhnu. Te ni cahān yā:

Vijna chí je ni nduváha ró. Ma sáha ga ró cuéchi, chí núu tuú, te quíji ñin jñundóho xeēn gā siquí ró, áchí yá.

<sup>15</sup> Yūcuán na te cuahān tēe ún, te ni castühún de nuū jnánhan de hebreo un jeē Jesús cúu jeē ní nasávaha ya de. <sup>16</sup> Te siquí jeē ní sáha Jesús jniñu yáha quívi ndétátú, jeē yūcuán cúu jeē tēe hebreo un cájito xeēn de ya, te cácuni de cahni de ya. <sup>17</sup> Te ni cahān Jesús jíin de:

Máá Tátá rí chí ní cáni te nde vijna sáha ya jniñu váha, te suni súcuán ruhū sáha rí jniñu váha.

<sup>18</sup> Te siquí jeē ni cahān yā súcuán, te tēe hebreo un víhyá gā cácuni de cahni de ya. Chí nasūu máá ñin-ni jeē tu squícu ya jeē cahán ley siquí quívi ndétátú, chí suni jeē ni cahān yā jeē Tátá yá cúu Yaā Dios, te súcuán sáha inuú yá máá yá jíin Yaā Dios.

*Siquí jeē ndíso jniñu Sēhe Yaā Dios*

<sup>19</sup> Te ni cahān Jesús:

Jendaá cahán rí jíin ró jijnáhan ró: Ruhū jeē cúu Sēhe Yaā Dios, tú na vé cúu sáha rí jeē máá rí, chí máni sáha rí jeē jíto rí sáha Tátá rí. Chí táca jeē sáha Tátá rí, suni sáha ruhū jeē cúu rí Sēhe ya. <sup>20</sup> Chí máá Tátá rí, maní yā jíin ruhū jeē cúu rí Sēhe ya, te stéén yā nuū rí ndihi jeē sáha ya. Te jéhu ga jniñu stéén yā vésú jeē ní cuu vijna, jeē naa ní ró coto ró jijnáhan ró. <sup>21</sup> Te najñuhun jeē nastécu máá Tátá rí ndíyi te cotecu tucu i, suni súcuán ruhū jeē cúu rí Sēhe ya, nástécu rí ndé-ni cúu jeē cuní máá rí. <sup>22</sup> Te máá Tátá rí, tu sándaā yā siquí ni ñin ñayuu, chí ni jēhe ya jñuhun jeē sándaā máá rí siquí táca ñayuu, chí Sēhe ya cúu rí. <sup>23</sup> Te súcuán te coo yíñuhún ndihi ñayuu nuū rí, najñuhun yíñuhún i nuū Tátá rí. Te ñayuu tu íyó yíñuhún nuū rí, núu súcuán te suni tu yíñuhún i nuū máá Tátá rí jeē ní taji yá ruhū vēji rí.

<sup>24</sup> Jendaá cahán rí jíin ró: Núu ñin ñayuu chuhun ni i jñuhun cahán rí, te candíje i jeē Yaā ndaā cúu Yaā ní taji ruhū vēji rí, ñayuu ún cotecu i ní cáni andívi, te ma jnahnú ndetú i. Chí ma cúu ga i najñuhun ndíyi, chí sa suhva cotecu i ní cáni. <sup>25</sup> Jendaá cahán rí jíin ró jeē quíji quívi, te vijna je ni quejéé, jeē táca ñayuu cácu najñuhun ndíyi, cuní nahín i jñuhun cahán ruhū, Sēhe Yaā Dios. Te ñayuu cuatáhú, chí cotecu i ní cáni. <sup>26</sup> Chí najñuhun íyó poder máá Tátá rí jeē sáha ya jeē técu ndihí-ni, suni súcuán ni jēhe ya poder nuū ruhū jeē sáha rí jeē cotecu ndihí-ni. <sup>27</sup> Te

suní ni sáha ya jeé ndíso jniñu ri sándaá rí siquí ñayuu, chí cúu ri Yaá ní nduu tée. <sup>28</sup> Ma náá ni rō caní ni rō siquí jñuhun cáhán rí. Chí quee quiví jeé táca ndiyi cuní sōho i jñuhun cáhán rí, <sup>29</sup> te quendacoo i nuú yíndūji i. Te ndiyi jeé ní casáha jniñu váha, natecu i jeé cótecu i ní cáni. Te ndiyi jeé ní casáha jniñu néé, natecu i te quívicoo i nuú jñahnú ndetú i.

*Ndé vé cúu jeé steén jeé ní tají Yaá Dios yá*

<sup>30</sup> "Tú na vé cúu sáha ri jeé maá rí. Chí nájnūhun ndácu Yaá Dios jniñu nuú rí, súcuan sándaá rí jniñu. Te ndaa sándaá rí, chí tu sáha ri jeé cuní maá rí, chí sáha ri jeé cuní maá Tátá rí, Yaá ní tají rúhū vēji rí. <sup>31</sup> Núu ruhū cáhán rí jeé cúu ri Sēhe Yaá Dios, te cachi ñayuu jeé tu jéjñiñu jñuhun cáhán rí. <sup>32</sup> Te iyó inga jeé cáhán jeé cúu ri Sēhe ya. Te jini rí jeé jñuhun un jéé cáhán yá, chí níhín jniñu. <sup>33</sup> Máá rō ní catají rō tēe ní cacajñuhún de Juan. Te Juan chí ndaa ní cáhán de jñuhun rí. <sup>34</sup> Te vēsú súcuan te nasūu rúhū cúu jeé jini ñuhún jeé steén in tēe jeé Sēhe Yaá Dios cúu rí. Chí máá rō cúu jeé jini ñuhún návaha candíje rō te cácu rō jijnáhan rō. Jeé yúcuan ní cáhán rí jeé iyó ndaa jñuhun rí jeé ní nacani Juan. <sup>35</sup> Máá Juan ní cuu de nájnūhun in lámpara jeé cayú te cundijin, cúu jeé ní nacani de jñuhun rí. Te máá rō, jecu-ni quiví ní canujnahan ní rō jeé ní steén de nuú rō. <sup>36</sup> Te iyó jéé steén caji gá jeé kujéhnū rí vēsú jeé ní cáhán Juan. Suu jniñu sáha rí, jniñu jeé ní tejñiñu Tátá rí ruhū jeé sáha rí, jniñu un steén ndije jeé maá yá ní tají rúhū vēji rí. <sup>37</sup> Te Tátá rí jeé ní tají yá ruhū vēji rí, suní máá yá cáhán nuú tútu i jeé kujéhnū rí, vēsú tu ní cájini sōho cuiti rō jeé cáhán yá, ní tu ní cajito rō yá. <sup>38</sup> Te tu ní cáchuhun ní rō jñuhun un jéé ní cáhán Tátá rí, chí tu cácandíje rō rúhū. Yaá ní tají yá vēji. <sup>39</sup> Cánanducú vii rō táca jñuhun cáhán tutu i, chí cájeni ní rō jeé yúcuan níhín rō jñuhun jeé cótecu rō ní cáni sáha. Te jñuhun siquí maá rí cúu jeé cáhán tutu ún. <sup>40</sup> Te vēsú súcuan te tu cácuni rō cuatáhú rō ruhū quívicoo rō ndaha rí návaha cotecu rō ní cáni.

<sup>41</sup> "Tu chíhi ri cuenta jñuhun jeé cácahán ñayuu jeé kujéhnū rí. <sup>42</sup> Chí je jini rí ndese cándaá ánuá rō jeé tu cáhiyo maní rō jini Yaá Dios. <sup>43</sup> Ruhū vēji rí jini jniñu cuní Tátá rí, te tu cájetáhú rō ruhū. Te núu inga tēe quee de jini jniñu cuní maá de, sa tēe un yáchí cuatáhú rō de. <sup>44</sup> ¿Ndehe cuu candíje rō jijnáhan rō? Chí máni cácuni rō jeé kujéhnū rō sáha jñahan rō, te tu cánducú rō jeé kujéhnū rō sáha Yaá Dios, jeé maá in-ni ya iyó. <sup>45</sup> Ma cáni ní rō jeé cáquin rí cuéchi siquí rō nuú Tátá rí. Chí iyó in jeé cáquin cuéchi siquí rō, suu Moisés, tēe jeé cáñuhun ní rō jeé quendōo ndaa rō jini ley jeé ní tee de. <sup>46</sup> Chí núu ní cácandíje rō jéé ní tee Moisés, te suní

candíje rō rúhū nuú, chí jñuhun maá rí ní tee de. <sup>47</sup> Te núu tu cácandíje rō jñuhun rí jeé ní tee de, ¿te ndese candíje rō jñuhun cáhán maá rí núu súcuan? Achí yá jini de.

*Jeé ní scáji yá uhún mil tēe*

(Mt. 14.13-21; Mr. 6.30-44; Lc. 9.10-17)

## 6

<sup>1</sup> Yúcuán na te cuahán Jesús inga lado mar Galilea, jeé cúu mar Tiberias. <sup>2</sup> Te yōhyo cuéhé ñayuu ní candiquín i ya, chí ní cajito i táca jniñu jéhnū jeé steén yá poder yá jeé ní nasávaha ya ñayuu cácuñu. <sup>3</sup> Te ní caa ya in yucu, te ní cucōo ya yúcuan jini tēe cáscuáha jini yá. <sup>4</sup> Te ní cuyajni vícoo pascua jeé cáncucūhun ní jñahan ñuu yá hebreo jeé ní cacācu i nuú ñayuu nación Egipto. <sup>5</sup> Te ní ndacoto ya, te ní jito ya jeé vējicoo cuéhé ndasí ñayuu. Te ní cáhán yá jini Felipe:

¿Nde nuú cuaan yó jéé caji ñayuu yáha jijnáhan i?

<sup>6</sup> Te súcuan ní cáhán yá jeé jito ndee yá de núu ndese cáhán de. Chí je jini maá yá ndese sáha ya. <sup>7</sup> Te ní cáhán Felipe jini yá:

Te ní ma cánda uú ciento denario staa, ní vēsú jeé caji i jecu jecu jijnáhan i, áchí de.

<sup>8</sup> Yúcuán na te ní cáhán Andrés, ñani Simón Pedro, inga tēe scuáha jini yá un:

<sup>9</sup> Yáha ine in sūchi yí jéé ndíso i uhún staa cebada jini úu chácá. ¿Te ndé canda cuiti ún, chí ñayuu cuéhé ndasí cúu?

<sup>10</sup> Yúcuán na te ní cáhán Jesús:

Cáhán jini ñayuu na cucōo i, áchí yá.

Te yúcuan cáa cuéhé ite, te ní cacucōo i, te nájnūhun uhún mil tēe cúu. <sup>11</sup> Te ní quihin Jesús staa ún, te ní nacuatáhú yá nuú Yaá Dios. Te ní jēhe ya nuú tēe cáscuáha jini yá, te máa de ní casaja de nuú ñayuu ní cacucōo ún. Te suní súcuan ní sáha ya jini chácá, te ní cayejí i nasaa cácuni maá i. <sup>12</sup> Te nuú ní candutú chíji i, te ní cáhán yá jini tēe cáscuáha ún:

Nastútú rō táca pedazo jeé ní ndóo, návaha tu stívi cuiti yó.

<sup>13</sup> Te ní canastútú de, te ní chítú úxí uú jica pedazo jeé ní ndóo siquí ndihuhún staa cebada un jeé tuá ní ndíhi caji ñayuu. <sup>14</sup> Te ñayuu un ní cajito i jniñu jéhnū ní sáha Jesús jeé ní steén yá poder yá. Te ní cacahán i:

Jendaá ndije jeé tēe yáha cúu jeé cáhán tutu jeé quíji iní ñayiví jéé nacani jñuhun Yaá Dios. Achí i.

<sup>15</sup> Te ní jini Jesús jeé cácuni i sáfuerza i ya jeé cuu ya rey i núu. Te ní cujiyo tucu máá in-ni ya, ní caa ya cuahán yá nuú sucún gá yucu.

*Jeé ní jica jéhé yá nuú mar*

(Mt. 14.22-27; Mr. 6.45-52)

<sup>16</sup> Te nuú cuácuaa, te tēe cáscuáha jini yá ní nanuu de cuango de nde mar. <sup>17</sup> Te ní ndívicoo de ini barco, te ní cascáca de

jeé quíngoo de nde inga lado mar nde ñuu Capernaum. Te je ni cunee, te ná tu ndee Jesús nuú de. <sup>18</sup> Yūcuán na te ni jequihí ñin tachí ñihin, te sáha jeé ndóna ndute mar un. <sup>19</sup> Te jeé ní cuu nájnūhun uhūn chí íñū kilómetro cájica de jíin barco, te ní cajito de jeé jíca Jesús nuú mar, te ni cuyajni ya vēji ya nuú barco. Te ni cayūhú de. <sup>20</sup> Te máá yá ni cahān yā jíin de:

Máá rí cúu. Ma yūhu ró jíjnāhan ró.

<sup>21</sup> Te ni cacusī ni de jeé na quívi ya ini barco. Te ni sáha ya jeé yachí-ni ní jinūcoo-ni de ñuhun ichi núu cuángoo de ún.

*Jeé cánanducú ñayuu Jesús*

<sup>22</sup> Te inga quívi ún, te ñayuu jeé ní caque-ndoo inga lado mar, ni cajini i jeé tée cáscuáha jíin yá cuangoo de jíin máñūhún-ni barco ni ine yūcuán, jíin jéé tu ní quívi Jesús quihīn yā jíin de jíjnāhan de. <sup>23</sup> Te sava ga barco jeé vējicoo ichi ñuu Tiberias, ni quecoo yajni lugar nuú ní cayeji i staā jeé ní nacuatáhu máá Jítóho yō jehe. <sup>24</sup> Te jeé ní cajito ñayuu un jéé tuá Jesús ine ya yūcuán, ní tée cáscuáha jíin yá, te ní quívicoo i táca barco un, te cuangoo i ñuu Capernaum cuananducú i ya.

*Jesús cúu staā jeé cótecu yō ní cáni*

<sup>25</sup> Te nuú ní jinūcoo i nde inga lado mar, te ni nanihin jnāhan i jíin Jesús. Te ni cacajñūhún i ya:

Maestro, ¿na hora ni quee ni yáha?

<sup>26</sup> Te ni cahān Jesús:

Jendaá cahān rī jíin ró jeé cánanducú ró ruhū siquī jeé ní cayeji ró nde ni candutú chíjí ró, te nasūu siquī jeé ní cajito ró táca jniñū jéhu jeé steén rī poder rī. <sup>27</sup> Ma cóndihví ní ró máá siquī jeé cají ró jeé yachí nataxīn, chí sa suhva cóndihví ní ró siquī jeé nihín ró jeé cótecu ró ní cáni sáha. Te máá rí, Yāá ní nduu tée, cuāha rī nájnūhun staā jeé cótecu ró ní cáni sáha. Chí Tátá rī Yāá Dios ní jeni ya ruhū jeé sáha rī súcuan. Achí yá jíin i.

<sup>28</sup> Yūcuán na te ni cacajñūhún i ya:

¿Ndeee sáha ná návāha squícu ná jniñū cúni Yāá Dios?

<sup>29</sup> Te ni cahān Jesús:

Jniñū jeé cuní Yāá Dios cúu jeé candíje ró ruhū, Yāá ní tají yá vēji.

<sup>30</sup> Yūcuán na te ni cacahān i:

Núu súcuan ¿te na jniñū jéhu sáha ní coto ná jíjnāhan ná te candíje ná jéé ní tají yá nihín? ¿Na jniñū cúu jeé sáha ní? <sup>31</sup> Chí táca jíi yō jenhān ní cayeji de maná jeé ní cuun ichi ándiví ndé nuú ñūhun téhé, nájnūhun yósó núu tútu: Yāá Dios ní jéhe ya staā ní cuun ichi ándiví, ní cayeji i, áchí tutu. Achí i jíin yá.

<sup>32</sup> Te ni cahān Jesús:

Jendaá cahān rī jíin ró: Nasūú Moisés ní jéhe staā un núu de jíjnāhan de jeé ní cuun ichi ándiví, chí máá Tátá rī ni jéhe. Te máá

yá jéhe staā ándiví jéé cótecu ró ní cáni sáha. <sup>33</sup> Chí staā jéhe Yāá Dios cúu máá Yāá ní quíji ichi ándiví, te sáha ya jeé ñayuu ñayiví cótecu i ní cáni ándiví. Achí yá.

<sup>34</sup> Te ni cacahān i jíin yá:

Níní cuāha ní staā ún cají na núu súcuan.

<sup>35</sup> Te ni cahān Jesús:

Máá rí cúu máá staā jeé cótecu ró ní cáni sáha. Ndé vé quívi ndaha rí, ma cúu cuiti gā sōco. Te ndé vé candíje ruhū, ma jíchí cuiti gā. <sup>36</sup> Te nájnūhun je ni cahān rī jíin ró, tu cáccandíje ró ruhū, vesú ní cajito ró núu rí. <sup>37</sup> Táca ñayuu jeé sáha Tátá rī jeé candíje i ruhū, máá i quívicoo ndaha rí. Te jétáhu rí táca jéé cuní quívi ndaha rí, chí ma squéhichí cuiti rí quihīn. <sup>38</sup> Chí ní quíji rí ichi ándiví návāha sáha rí jniñū jeé cuní Yāá ní tají ruhū, te nasūu jéé sáha rí jeé cuní máá rí. <sup>39</sup> Te jniñū jeé cuní Tátá rí, Yāá ní tají ruhū, cúu jeé ma scuíta rí ní ñin ñayuu ní jéhe ya nuú rí, chí condito rí i te nastécu rí i quívi jínu ñayiví. <sup>40</sup> Te Yāá ní tají ruhū, cuní yá jeé táca ñayuu jeé nihín i jñūhun ruhū, Sēhe Yāá Dios, te candíje i ruhū, cótecu i ní cáni ándiví. Chí nastécu rí i quívi jínu ñayiví. Achí yá.

<sup>41</sup> Yūcuán na te ni caquejéé jnāhan ñuu yā hebreo cácahan de siquī yá, chí ni cahān yā jeé máá yá cúu staā ní quíji ichi ándiví. <sup>42</sup> Te ni cacahān de:

¿A násūu téé yáha cúu Jesús, sēhe José? Te cájini yō tatá de náná de. ¿Te ndese cúu jeé cahān de jeé ní quíji de ichi ándiví núu súcuan?

<sup>43</sup> Te ni cahān Jesús jíin de:

Ma cahān ró siquī rī jíjnāhan ró. <sup>44</sup> Ní ñin ñayuu ma cúu quívi i ndaha rí núu ma sáha Tátá rí jeé cúu ní i quívi i, chí máá yá ní tají ruhū vēji rí. Te nastécu rí i quívi jínu ñayiví. <sup>45</sup> Te suhva yósó núu tútu ní catee téé ní canacani jñūhun Yāá Dios: Tácá i chí steén Yāá Dios nuú i, áchí. Núu súcuan te táca ñayuu jíni sōho jñūhun cáhān Tátá rí, te jétáhu i jeé steén yá nuú i, ñayuu ún chí quívicoo i ndaha rí.

<sup>46</sup> Te tu ní jito ní ñin ñayuu nuú máá Tátá rí. Chí máñūhún-ni ruhū ní jito rí nuú yá, chí nde nuú máá yá vēji rí. <sup>47</sup> Jendaá cahān rī jíin ró jíjnāhan ró jéé ñayuu jeé candíje i jeé jnāma rí i, máá i cótecu i ní cáni. <sup>48</sup> Máá rí cúu staā jeé cótecu ró ní cáni sáha. <sup>49</sup> Táca jíi ró jenhān, ní cayeji de staā maná jeé ní cuun ichi ándiví ndé nuú ñūhun téhé, te tu ní sáha jeé cótecu de nuú cáni ándiví. <sup>50</sup> Te staā jeé cahān rī jeé vēji ichi ándiví, chí na-ni ñayuu cají, te cótecu i ní cáni ándiví. <sup>51</sup> Te suu máá rí cúu staā un jéé ní quíji ichi ándiví jéé sáha jeé cótecu ró ní cáni. Te ñayuu jeé cáji staā yáha, cótecu i ní cáni ándiví. Te staā jeé cuāha rí un cúu yiqui cúu rí, te cuāha rí návāha ñayuu ñayiví cótecu i ní cáni ándiví. Achí yá.

<sup>52</sup> Yūcuán na te jnāhan ñuu yā hebreo ni cacahān de jín táca jnāhan de:

¿Ndese cuu cuāha tēe yāha yiqui cúñu de caji yō? achí de.

<sup>53</sup> Te ni cahān Jesús jín de:

Jendaá cahān rī jín ró: Núu tú candíje ró jeē yiqui cúñu ruhū. Yāā ní nduu tēe, cúu nájñūhun staā, te ñiñi rī cúu nájñūhun ndute, núu súcuan te ma cótecu ró ñí cáni ándiví.

<sup>54</sup> Chi ñayuu cácandíje jeē yiqui cúñu rī cúu nájñūhun staā te ñiñi rī cúu nájñūhun ndute, máá i cotecu i ñí cáni. Te nastécu rī i quiví jñu ñayiví. <sup>55</sup> Chi yiqui cúñu rī jín ñiñi rī cúu ndíje jeē sáha jeē cótecu i ñí cáni. <sup>56</sup> Te ñayuu cácandíje jeē yiqui cúñu rī jín ñiñi rī cúu nájñūhun staā jín ndute jeē cótecu i ñí cáni sáha, máá i níni ndúú i jín rí, te ndúú rí jín i. <sup>57</sup> Máá Tátá rī, Yāā técu, ni tají yá ruhū vēji rí, te técu rī sáha máá yá. Te suni súcuan, ñayuu cácandíje jeē cúu rī nájñūhun staā i ndute i, suni súcuan cotecu i ñí cáni sáha rí. <sup>58</sup> Máá rí cúu staā ní quiji ichi ándiví. Te staā jeē cahān rī tu cúu nájñūhun staā maná jeē ní cayejí táca jín ró jenhán, chi tu ní sáha jeē cótecu de ñí cáni. Te staā jeē cahān rí, chi ñayuu caji, cotecu i ñí cáni sáha, achí yá.

<sup>59</sup> Táca jñūhun yāha ní steén Jesús nuū ñayuu ní candutútú ini vehe ñi sinagoga ñuu Capernaum.

#### *Jñūhun cotecu yō ñí cáni*

<sup>60</sup> Te cuehē ñayuu cascuáha jín yá, ni cajini sōho i jñūhun yāha jéé ní steén yā. Te ni cacahān máá i:

Yōhoyo yí jñūhun cáhān yā yāhá. ¿Ndese cuu cuatáhú yō?

<sup>61</sup> Te ni jini Jesús jeē cácahān i jeē yí cúu jñūhun yāhá, te ni cahān yā jín i:

¿A yí sáha jñūhun yāha jín ró jijnáhan ró? <sup>62</sup> ¿Te ndese sáha ró núu coto ró jéé ruhū, Yāā ní nduu tēe, ndaa rí nuhun rí nuū ní cóndee rí Xihna ñúhún? <sup>63</sup> Máá ánuá ñayuu cúu jeē sáha jeē técu i. Chi yiqui cúñu i tu jéjñiñu cuítí súcuan. Te táca jñūhun ni cahān rī jín ró cúu jeé quéndōo vāha ánuá ró, te cotecu ró ní cáni sáha. <sup>64</sup> Te sava ró chi tu cácandíje ró. Achí yá.

Chi nde xihna ñúhún je jíní Jesús ndé-ni cúu ñayuu jeē ma cándíje, jín ndé ñi de cuu jeé nastúu de ya. <sup>65</sup> Te ni cahān gā yā:

Jeē yúcuan ní cahān rī jín ró jeē ma cúu quiví ni ñi ñayuu ndaha rí, te núu tu sáha Tátá rí jeē cúu ní i quiví i, achí yá.

<sup>66</sup> Te nde quiví ún te cuehē ñayuu cascuáha jín yá, ni castóo i ya, te tuá ní cájica i jín yá. <sup>67</sup> Yūcuán na te ni cahān yā jín máá ndihúxí uū tēe cáscuáha jín yá:

¿A suni cáculi máá ró quingoo ró, chí naún?

<sup>68</sup> Te ni cahān Simón Pedro:

¿Ndé núu gā quingoo ná? Chi máá ní cúu jeē nácani jñūhun jeē cótecu na ñí cáni sáha.

<sup>69</sup> Te ni cacandíje ná te cájini na jéé máá ní cúu Cristo, Sēhe Yāā Dios, Yāā técu, achí de.

<sup>70</sup> Te ni cahān Jesús:

Te vesú ni nacáji rí ndihúxí uū ró, te íyó ñi ró jeé ní quiví jexeén ini. Achí yá.

<sup>71</sup> Te súcuan ni cahān yā siquí Judas Iscariote, sēhe Simón. Chi máá de nastúu de ya, vesú ñi jnāhan jeē uxí uū tēe cáscuáha jín yá cúu de.

#### *Jeē tu ní cácandíje ñani Jesús*

## 7

<sup>1</sup> Yūcuán na te jíca cuu Jesús región Galilea. Chi tu cúni yā caca cuu ya región Judea, chí jnāhan ñuu yā hebreo jeē cáyūcu yúcuan, cáculi de cahni de ya. <sup>2</sup> Te cuacuyajni vico jeē casáha ñayuu yā hebreo vehe ramadá, cáyūcú i chíji. <sup>3</sup> Te ñani yā ni cacahān de jín yá:

¿Naun máá yāha-ni íne ró? ¿Naun tú quihín ró región Judea, návāha tēe yúcuan jéé cácandíje de róhó, suni coto de ñiñu jéñu sáha ró. <sup>4</sup> Chi núu cúni ñi tēe jeé cuítí núu jñūhun de, te tu sáha yuhu de jñiñu. Te núu sáha nde ró táca jñiñu jéñu, vāha ga na sáha ró jéé cúni ndiví ñayuu.

<sup>5</sup> Súcuan ni cacahān ñani yā jín yá, chí ni máá de tu cácandíje de ya. <sup>6</sup> Yūcuán na te ni cahān Jesús:

Ná tu quee máá quiví jeē quihín rí. Te máá ró jijnáhan ró chí na-ni quiví-ni te cuu quingoo ró. <sup>7</sup> Chi ma quití ni ñayuu ñayiví núu ró, te máá rí chí quití ni i jito i ruhū, chí cahān rí jeé jíní rí jeé máni jñiñu néé casáha i. <sup>8</sup> Cuángoo máá ró vico ún. Te máá rí chí ma quihín rí vijna, chí ná tu quee máá quiví cánuú quihín rí. Achí yá.

<sup>9</sup> Súcuan ni cahān yā jñūhun yāha jín de, te ni quéndōo ya Galilea.

#### *Jeē ni jéñen Jesús vico vehe ramadá*

<sup>10</sup> Te nuū ní yāha ñani yā cuangoo de vico ún, te sáá te suni cuahān máá yá. Te tú cuahān ndíjin yā, chí tu ní steén yā máá yá.

<sup>11</sup> Te jnāhan ñuu yā hebreo cánuuducú i ya nuū vico ún, te cácahān i:

¿Ndé núu íne tēe ún? achí i.

<sup>12</sup> Te yōhoyo ni cacahān ñayuu jeē siquí yā, chí sava i cácahān: Tēe vāha cúu de. Te sava ga i cácahān: Tuú chí stáhú de ñayuu.

<sup>13</sup> Te yuhu-ni ni cacahān i jñūhun ya, chí cáyūhú i jeé quití ni jnāhan i tēe hebreo.

<sup>14</sup> Te jeé ní cuu sava vico, te ni quee Jesús, ni quiví ya templo cáhnu, te ni quejéé yá steén yā jñūhun. <sup>15</sup> Te ni canaa ni jnāhan ñuu yā hebreo cájini sōho i, te ni cacahān i:

¿Ndese jíní tēe yāha cuehē jñūhun ndichí, chí tu ní jíca de escuela? achí i.

<sup>16</sup> Yūcuán na te ni cahān Jesús:

Jñuhun steén rī chi nasūu jñuhun máa rí cúu, chí jñuhun jeé ni jéhe máa Yaā ní tají rúhū cúu. <sup>17</sup> Nūu ññayuu cuní i sáha i jñiñu cuní Yaā Dios, ñayuu ún chí jecuhun ni i nūu nde nuū Yaā Dios vēji jñuhun steén rī, chí jñuhun jeé jéni ni maá-ni rí cúu. <sup>18</sup> Tēe cáhán jñuhun jéni ni maá de, tēe un ndúcú de jeé na sájéhnu ñayuu de. Te nūu ññ tēe ndúcú de jeé sajéhnu de Yaā ní tají de, tēe un cúu tēe ndaā, te tú na jñuhun stáhú íyó jíin de.

<sup>19</sup> ¿A násūu jéé ni jéhe Moisés ley yā nuū rō jeé squícu rō? Te ni ññ rō tu cásquícu. Chí sa jeé cácu ni rō cahni rō ruhū, ¿te najehē cúu? Achí yá.

<sup>20</sup> Te ni cacahān ñayuu cuehē ún:

Tachí ndóhō rō. ¿Nde ññ cuní cahni rohó?

<sup>21</sup> Te ni cahān Jesús:

Ni nasávāha rī ññ tēe quivī ndétátú, te ndivíi rō ni canaa ni rō ni cajito rō jéé quivī ndétátú ni sáha rí jñiñu ún. <sup>22</sup> Te Moisés ni jéhe de ley jeé cúu circuncidar nuū rō. Te cásáha rō circuncidar sūchi yí nūu uná quivī jeé ní cacu i, vésú quivī ndétátu cúu. (Te nasūu máa Moisés ní jéquin ley un, chí je ni iyo nuū táca jíi de.) <sup>23</sup> Nūu súcuān te nūu cásáha rō circuncidar vésú quivī ndétátu cúu, návāha squícu rō ley Moisés, ¿te najehē cáquiti ni rō jeé ní nasávāha ndihi rī ññ tēe quivī ndétátú? <sup>24</sup> Ma yachí cani ni rō jeé cuéchi cúu jeé sáha rí. Chí sa cani vāha ni rō siquī táca jñiñu vāha. Achí yá.

*Jeé ní cachi Jesús ndé nuū vēji ya*

<sup>25</sup> Yūcuán na te sava ñayuu ññu Jerusalén ni cacajñuhun jñáhan i:

¿A násūu tēe yáha cúu jeé cánanducú tēe cácujeñhu jeé cáhni de, chí naún? <sup>26</sup> Te yāha cáhán ndijin de nuū chítú, te tú na jñuhun cácahān jíin de. ¿A sanaa te ni cacundaā ni tēe cácujeñhu jeé tēe yáha cúu Cristo jeé achí tutu jeé quíji, chí naún? <sup>27</sup> Te tuú chí je cájini yō nuū vēji tēe yáha. Te jeé quíji Cristo, chí ni ññ yó má cuní ndé chí quíji ya. Achí i.

<sup>28</sup> Yūcuán na te ni cahān jee Jesús jeé steén yā jñuhun ini templo:

Cájini rō ruhū, te cájini rō ndé ññu vēji rí. Te vésú súcuān te máa Yaā ndaā cúu jeé ní tají rúhū vēji rí, te tú vēji rí jeé cuní máa rí. Te tu cájini rō ndese Yaā cúu ya. <sup>29</sup> Te máa rí chí jíni rí yā, chí nde nuū máa yā vēji rí, te máa yā ní tají rúhū, achí yá.

<sup>30</sup> Yūcuán na te ni canducú de jñi de ya. Te ni ññ de tu ní cúu jñi de ya, chí ná tu quee máa quivī jeé jñi de ya. <sup>31</sup> Te cuehē ñayuu chí ni cacandíje i ya, te ni cacahān i:

¿A násūu tēe yáha cúu Cristo, Yaā ndétu yó jeé quíji? Chí cuehē ndasí jñiñu jéhnu sáha ya jeé steén yā poder yā. Achí i.

*Jeé ní catají de policía jeé jñi de Jesús*

<sup>32</sup> Te ni cajini tēe fariseo jeé súcuān cacahān ñayuu jñuhun ya. Te máa de jíin sūtú

cácujeñhu, ni catají de policía cándito templo jeé jñi de ya. <sup>33</sup> Te ni cahān Jesús:

Jecu na quivī condee rí jíin rō jijnáhan rō. Yūcuán na te nuhun rí nuū Yaā ní tají rúhū vēji rí. <sup>34</sup> Te nanducú rō ruhū, te ma nánihin rō ruhū. Chí ma cúu jinūcoo rō nūu cōndee rí. Achí yá.

<sup>35</sup> Yūcuán na te máa tēe un ní cacajñuhun jñáhan de:

¿Te ndé nuū quihín tēe yáha jeé ma nánihin yō de? ¿A quihín de nuū jñáhan yó hebreo jeé ní cajitē nūu cáyūcu ndé nación Grecia? ¿Te á stéén de jñuhun nuū ñayuu Grecia, chí naún?

<sup>36</sup> ¿Te na jñuhun cúu jeé ní cáhán de jíin yó jeé nanducú yó de te ma nánihin yō de, chí ma cúu jinūcoo yó nūu cōndee de? Achí tēe un jíijnáhan de.

*Siquī ndute jeé cótecu yō ní cáni sáha*

<sup>37</sup> Te quivī sándihí vico ún te cúu vico cáhnu ga. Te quivī un ní ndocuññ Jesús, te ni cahān jee ya:

Nūu ndé ñayuu jnáa ndasí i táca jéé vāha jeé sáha rí jehē i, nájñuhun jeé jíichí i ndute, nūu súcuān te na quiví i ndaha rí te coho i ndute, cúu jeé nihín i jeé vāha ún. <sup>38</sup> Te ñayuu jeé candíje jeé jnáma rí i, chí ini anuá i condee Espíritu Santo, te cuu ya nájñuhun yūte cáne ñuhún jeé sáha ya jeé cótecu i ní cáni, nájñuhun cáhán tutu íi. Achí yá.

<sup>39</sup> Te súcuān ni cahān yā jeé ñayuu candíje jeé jnáma ya i, nihín i Espíritu Santo. Chí ná tu quee Espíritu ún, chí ná tu ndaa Jesús quinhun yā nuū ndujéhnu ya.

*Jeé ní cacusññ ñayuu siquī yā*

<sup>40</sup> Te sava ñayuu cuehē ún, ná ni cajini sóho i jñuhun yáha, te ni cacahān i:

Jendaá jeé tēe yáha cúu jeé achí tutu jeé quíji de nacani de jñuhun Yaā Dios, achí i.

<sup>41</sup> Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chí ni cacahān i:

Tuú chí nasúu Galilea quíji Cristo. <sup>42</sup> Chí cáhán tutu íi jeé ndé yucūn rey David cacu Cristo, te cacu ya ññu Belén, ññu nuū ní cacu máa David. Achí i.

<sup>43</sup> Te súcuān te ni cacusññ ñayuu jeé siquí yā. <sup>44</sup> Te sava i cácu ni i jñi i ya, te ni ññ i tu ní jñi i ya.

*Jeé tu ní cácuandíje tēe cácujeñhu*

<sup>45</sup> Yūcuán na te policía cándito templo tu ní cájini de Jesús, te cuanungoo de nuū táca tēe fariseo jíin nuū sutú cácujeñhu. Te tēe ún ni cacajñuhún de policía:

¿Najehē tu ní quécóo rō jíin de? áchí.

<sup>46</sup> Te ni cacahān policía un:

Tú cuiti ni ññ tēe cáhán vāha ndasí nájñuhun cáhán tēe yūcuān, áchí.

<sup>47</sup> Te ni cacahān tēe fariseo:

¿Te á suni nde máa rō jíijnáhan rō ní stáhú de naún? <sup>48</sup> Ni ññ jñáhan ruhū tēe cácujeñhu

jín tée fariseo, tu cá candije ri jñuhun cáhán tée ún, ¿te naun cá candije máá ró? <sup>49</sup>Te ñayuu cuéhē yāhá jēé tu cájēcūhun ni i ley Moisés, chí jñahnū ndetū i jeé cá candije i tēe ún, áchí de jínáhan de.

<sup>50</sup>Te ni cahān Nicodemo, tēe ni jēhēn nuū yā ñn jecuāá, te suni ñn tēe fariseo cúu de:

<sup>51</sup>Cáhán ley yō jeé ma cúu tee yó cuēchi siquī ñn tēe, te núu tú xihna gā cuni sōho yó ndese cáhán de, návāha cucáhu ni yō na cuēchi ni sáha de. Achí de.

<sup>52</sup>Te ni cacahān jín de:

Te róhó, ¿á suni nde Galilea vēji ró jeé cahān rō jehē tēe ún? Nanducú váha ró núu tútu ñi te cuni rō jeé nde Galilea tu quēnda cuiti ni ñn tēe nácani jñuhun Yāá Dios. Achí jín de. <sup>53</sup>Te cuanungoo de ná vehe ná vehe de.

*Jñuhun ñahan ní casiquí ndeé jñahan*

## 8

<sup>1</sup>Te ni caa Jesús cahān yā yucu Olivos. <sup>2</sup>Te jeé cácuandijín inga quiví, te ni ndee tucu ya templo. Te ndihi ñayuu ni quecoo i nuū yā. Te ni cucōo ya, te ni steén yā jñuhun nuū ñ. <sup>3</sup>Yūcuán na te tēe cástēén tutu ley Yāá Dios jín tēe grupo fariseo, ni quecoo de jín ñn ñahan jeé ní canihín de ña jeé casiquí ndeé ña. Te ni cajeni de ña mēhñū. <sup>4</sup>Te ni cacahān de jín yá:

Maestro, ni canihín ná ñahan yáha jeé casiquí ndeé ña. <sup>5</sup>Te ley Moisés ndácu jñíñu nuū yō jeé cuáha yó yūú xiní ñahan cásaáha súcuan návāha cuu ña. Te máá ní, ¿ndese cáhán ní?

<sup>6</sup>Te súcuan ni cacahān de jeé cájito ndee de ya núu cuatáhu yá jeé cahān ley un, chí núu tuú te caquin de cuēchi siquī yā. Te Jesús ni jita ndeyi ya, te ni tee ya nuū ññuhun jín xiní ndáha ya. <sup>7</sup>Te jeé cácajnūhun cácajnūhún de ya, te ni ndonehen ya máá yá, te ni cahān yā jín de:

Núu ndeé ñn máá ró tú na cuēchi ró, te xihna gā máá ró cuáha yūú xiní ña núu súcuan, áchí yá.

<sup>8</sup>Te ni jita ndeyi tucu ya, te ni tee tucu ya nuū ññuhun. <sup>9</sup>Te nuū ní cajini de jeé súcuan ni cahān yā, te ni cájēcūhun ni de jeé suni cáhīyo cuēchi de. Te ná ñn ná ñn de ni quendacoo de cuahān de, xihna gā tēe jéhu ga te nde nuū ní ndihi na. Te ni ndōo máá ñn na Jesús jín ñahan índichi mēhñū un. <sup>10</sup>Te ni ndonehen tucu ya máá yá, te tuá ní ñn tēe un ní jito ya, chí máá na ñahan ún. Te ni cahān yā jín ña:

¿Ndeé chí cuángoo tēe cájequin cuēchi siquī rō? ¿A tú ni ñn de ní ndóna cahān gā cuēchi siquī rō?

<sup>11</sup>Te ni cahān ña:

Tú ni ñn de, áchí ña.

Yūcuán na te ni cahān Jesús jín ña:

Ni ruhū, ma cahān rī cuēchi siquī rō. Cuáhán te ma sáha ga rō cuēchi, áchí yá.

*Jesús cúu máá luz jeé steén ini anuá ñayuu*

<sup>12</sup>Te inga jínu ni cahān Jesús jín ñayuu:

Máá rí cúu nájnūhun luz jeé steén ini anuá ñayuu ñayiví, jeé sáha jeé jécūhun ni i siquī Yāá Dios. Ñayuu candije ruhū chí ma cáca i nájnūhun nuū née, chí sa suhva coneváha i luz ini anuá i jeé sáha jeé cótecu i ní cáni.

<sup>13</sup>Yūcuán na te ni cacahān tēe fariseo jín yá:

Róhó chí cáhán rō jñuhun jehē máá ró, te tu jéjnñu jñuhun cáhán rō.

<sup>14</sup>Te ni cahān Jesús jín de jínáhan de:

Vesú cáhán rī jehē máá rí, te iyó ndáá jñuhun cáhán rī. Chí jini rī ndé nuū vēji rī jín ndé nuū quihín rī. Te róhó tu cájini rō ndé nuū vēji rī ni ndé nuū quihín rī. <sup>15</sup>Máá ró chí cuenta ñayuu ñayiví cásaáha rō siquī jñuhun cáhán rī. Te ruhū chí tu sándaá mañuhún rí siquī ni ñn ñayuu. <sup>16</sup>Te núu sándaá rí siquī i, te ndáá sáha rí, chí tu sáha mañuhún rí, chí sándaá rí nde jñu máá Tátá rí, Yāá ní tají ruhū vēji rí. <sup>17</sup>Te yósó núu tútu ley cáneváha rō jeé núu ñnuú cácahān uū testigo, te jini ññuhún cuatáhu ró jeé cácahān, chí iyó ndáá jñuhun ún. <sup>18</sup>Núu súcuan te ruhū cúu ñn jeé cahān ndáá rí jehē rí. Te inga jeé cahān ndáá jehē rí cúu máá Tátá rí, Yāá ní tají ruhū. Achí yá.

<sup>19</sup>Te ni cacahān de jín yá:

¿Ndeé nuū ndeé Tátá ró?

Te ni cahān Jesús:

Tu cájini rō ruhū ni Tátá rí. Te núu jeé cájini rō ruhū, suni cuni rō Tátá rí nuū.

<sup>20</sup>Tāca jñuhun yáha ní cahān Jesús jeé steén yā ñi templo nuū cáyucu yéjnū jeé cáscōo i xūhún. Te tú ni ñn de ní jññ de ya, chí ná tu quee máá quiví jeé jññ de ya.

*Jeé ni cahān yā jeé ma cúu jinūcoo de nuū cóndee yā*

<sup>21</sup>Te ni cahān tucu Jesús jín de:

Ruhū chí quihín rí, te nanducú ró ruhū, te ma nánihn rō ruhū, chí quendōo cuéchi ró siquī rō quiví cúu rō. Te jeé yúcuán má cúu jinūcoo rō núu quihín rí, achí yá.

<sup>22</sup>Yūcuán na te tēe hebreo un ní cacahān máá de:

¿A cahni tēe yáha máá de, te jeé yúcuán cáhán de jeé ma cúu jinūcoo yó núu quihín de, chí naún? Achí de.

<sup>23</sup>Te ni cahān yá:

Máá ró jijnáhan ró chí ñayiví yáha véjicoo ró, te ruhū chí nde andiví vēji rí. Máá ró cácuu ñayuu ñayiví yáha, te ruhū chí nasūu tēe ñayiví yáha cúu rí. <sup>24</sup>Jeé yúcuán ní cahān rí jeé quendōo cuēchi ró siquī rō quiví cúu rō. Chí núu ma candije ró jeé máá rí cúu Cristo, te quendōo nahín cuēchi ró siquī rō quiví cúu rō. Achí yá.

<sup>25</sup>Te ni cacajnūhún de ya:

Núu súcuan ¿te ndé ñn cúu ró?



Te ni cahān yā:

Je ni cachi ri nuū rō nde xīhna ñūhún ndé ñn cúu ri. <sup>26</sup> Te iyó cuéhe gā jñuhun cuu cahān rī jīn rō te sándaā rī siquī rō. Te ma cahān rī, chí ini ñayivi yáha cahān rī maá-ni jñuhun jeé ní jini ri ni cahān Yaā ní tají ruhū vēji rī. Te máni jñuhun ndaā cahān yā. Achí yá.

<sup>27</sup> Te tu ní cájecūhun ni de jeé cahān yā jñuhun Tátá yā andiví jīn de. <sup>28</sup> Jeé yúcuan ni cahān gā yā:

Nde na yáha jeé cáta caa rō ruhū, Yaā ní nduu tēe, jicá cruz, yūcuán na te cuni rō ndé ñn cúu ri. Te cuni rō jeé tú na vé sáha ri jeé maá rī, chí cahān rī maá-ni jñuhun ni steén Tátá rī nuū rī. <sup>29</sup> Chí maá Tátá rī, Yaā ní tají ruhū, ndéé yá jīn rī. Te tu stóo máñúhún yá ruhū, chí níni sáha ri jniñu jeé núnahan ni maá yá. Achí yá.

<sup>30</sup> Te jeé ni cahān yā jñuhun yáha, te cuéhe ñayuu ni cacandje i ya.

*Siquī ndé-ni cúu sēhe Yaā Dios jīn sēhe jexeén*

<sup>31</sup> Yūcuán na te ni cahān Jesús yā jñáhan ñuu yá hebreo jeé ní cacandje i ya:

Te núu cuiñi ñihin rō jīn jñuhun steén rī nuū rō, te cuu ndije rō ñayuu scuáha jīn rī. <sup>32</sup> Te jecūhun ni rō jñuhun ndaā, te jñuhun ndaā un sáha jeé nduu libre rō nuū jeé yáhi rō ndaha.

<sup>33</sup> Te ni cacahān i jīn yá:

Sēhe yucūn Abraham cácuu rī, te tu cáyihí cuiñi rī ndaha ni ñn. ¿Te ndese cúu jeé cahān rō jeé nduu libre rī núu súcuan?

<sup>34</sup> Te ni cahān Jesús:

Jendaá cahān rī jīn rō jeé táca ñayuu casáha cuéchi, tu iyó libre i, chí yáhi i chíji cuéchi jeé jejniñu cáha i nuū. <sup>35</sup> Te ñayuu jejniñu cáha, chí tu cúu i ñn jñáhan ñayuu vehe nuū jejniñu i. Te ñn sēhe chí sa suhva cúu ndije i jñáhan ñayuu vehe ún. <sup>36</sup> Núu súcuan te maá rī jeé cúu Sēhe Yaā Dios, núu sáha ri jeé tuá cuajniñu cáhā rō nuū cuéchi, núu súcuan te nduu libre ndije rō jñáhan rō, te cuu rō sēhe ya. <sup>37</sup> Te jini rī jeé sēhe yucūn Abraham cácuu rō, te vēsú súcuan te cácuni rō cahni rō ruhū, chí tu cájetáhú rō jñuhun cahān rī. <sup>38</sup> Ruhū chí cahān rī jñuhun jeé ní steén Tátá rī nuū rī. Te maá rō chí casáha rō jniñu jeé ní cahān tatá maá rō jijnáhan rō. Achí yá.

<sup>39</sup> Te ni cacahān i:

Sēhe yucūn Abraham cácuu rī.

Te ni cahān Jesús:

Núu jeé candje rō nájñuhun ni candje Abraham návaha cuu ndije rō yucūn de, yūcuán na te jniñu váha ni sáha de suni sáha maá rō nuū. <sup>40</sup> Te vijna chí cácuni rō cahni rō ruhū, vēsú ni cahān rī jīn rō táca jñuhun ndaā ni steén Tátá rī nuū rī. Te Abraham chí

tu ní sáha cuiñi de súcuan. <sup>41</sup> Máá rō chí ñuu casáha rō jīn tatá maá rō. Achí yá jīn i.

Yūcuán na te ni cacahān i:

Máá rī chí tu cácuu rī sēhe ndáhú jeé tu tátá. Chí iyó ñn-ni tátá rī, te Yaā Dios cúu ya.

<sup>42</sup> Te ni cahān Jesús:

Núu Yaā Dios cúu ndije tátá rō, te coo maní rō jīn rī nuū. Chí nde nuū Yaā Dios ni quenda rī vēji rī. Te tú vēji rī jeé cuni maá rī, chí maá yá ní tají ruhū. <sup>43</sup> ¿Te najehé tu cájecūhun ni rō jñuhun cáhān rī núu súcuan? Suu siquī jeé tu cácuni rō chusóhó rō jñuhun nácani rī. <sup>44</sup> Máá rō jijnáhan rō chí tátá rō cúu jexeén. Te cácuni rō sáha rō maá jeé cuni tátá rō ún. Máá jexeén ni jehni ndiyi nde jeé xīhna ñūhún. Te tu ní ñn cuiñi jīn jñuhun ndaā, te tú cuiñi na jñuhun ndaā cahān. Te jeé cahān jexeén jñuhun stáhú cúu jeé súcuan cá maá. Chí maá un cúu jeé ndiso jñuhun stáhú, te maá un cúu jeé ní squéjeé ndihí jñuhun stáhú. <sup>45</sup> Te ruhū chí cahān rī jñuhun ndaā, te jeé yúcuan cúu jeé tu cácadje rō ruhū. <sup>46</sup> Te ni ñn rō ma ñihín rō cuéchi siquī rī, chí tú cuiñi na cuéchi rī. Te máni jñuhun ndaā cahān rī, ¿te naun tu cácadje rō ruhū? <sup>47</sup> Ñayuu cácuu sēhe Yaā Dios, chí cáchusóhó i jñuhun Yaā Dios. Te nastú sēhe Yaā Dios cácuu rō, te jeé yúcuan tu cácuni rō chusóhó rō. Achí yá jīn de.

*Iyó Jesús nde ná tu coo Abraham*

<sup>48</sup> Yūcuán na te ni cacahān jñáhan ñuu yá hebreo un:

Ndaā cacahān rī jeé canéé rō nájñuhun ñayuu Samaria, te ñuhun tachí ini rō.

<sup>49</sup> Te ni cahān Jesús:

Tu ñuhun tachí ini rī, chí yáñūhún rī jīn Tátá rī. Te maá rō jijnáhan rō chí tu cáhiyo yáñūhún rō jīn rī. <sup>50</sup> Máá rī tu ndúcú rī jeé cujéhu rī. Iyó ñn jeé sáha jeé cujéhu rī, te maá yá sándaā siquī jñuhun cácahān rō. <sup>51</sup> Jendaá cahān rī jīn rō, núu ndé ñayuu squícu jñuhun cáhān rī, ma cúu cuiñi i. Achí yá.

<sup>52</sup> Te tēe hebreo un tu ní cájecūhun ni de, te ni cacahān de:

Vijna te ni cacacáhu ni rī jeé ñuhun ndije tachí ini rō. Chí Abraham jīn táca tēe ni canacani jñuhun Yaā Dios nde jenahán, ní cajihí de. Te rōhó cáhān rō, núu ndé vé squícu jñuhun cáhān rō, te ma cúu cuiñi i, achí rō. <sup>53</sup> ¿Te chí jéhu ga rō vēsú jii yó Abraham naún? Chí ní jihí de, te suni ní cajihí táca tēe ni canacani jñuhun ya. ¿Te ndé ñn ga sáha rō maá rō núu súcuan? Achí de.

<sup>54</sup> Te ni cahān Jesús:

Núu ruhū sajeñu rī maá rī, te tu ñihín jniñu. Máá Tátá rī cúu jeé sajeñu ruhū. Te cácahān rō jeé maá yá cúu Yaā Dios maá rō. <sup>55</sup> Te vēsú súcuan te tu cájini rō ndese Yaā cúu ya. Te ruhū chí jini rī yá. Te núu cahān rī jeé tu jini rī yá, te cuu rī tēe stáhú nájñuhun

maá ró jijnáhan ró. Te tuú chi jíní ndije ri yá, te squícu ri jnūhun cáhán yá. <sup>56</sup> Te jíní ró Abraham ni cusī ni de jeē coto de quivī quée rī. Te je ni jito de, te ni jito ri jeē ní cusī ndasí ni de. Achí yá.

<sup>57</sup> Yūcuán na te ni cacahān tēe hebreo un jíní yá:

Ni ná tu coo ró uū xico uxī cuiyá, ¿te ndese cúu jeē cahán ró jeē ní jito ró nuū Abraham? achí de.

<sup>58</sup> Te ni cahān Jesús:

Jendaá cahán rī jíní ró jeē nde ná tu cacu Abraham te je íyó rī, achí yá.

<sup>59</sup> Yūcuán na te ni caquihin de yuū jeē cuáha de xiní yá. Te Jesús chi ní quenda sāhi yá ni yāha ya mēhñū de, ni quenda ya ini templo cuahān yá.

*Jeē ní nasávaha ya ñin tēe ni cacu cuáá*

## 9

<sup>1</sup> Te jeē jíca Jesús cuahān yá, te ni jito ya nuū ñin tēe ni cacu cuáá. <sup>2</sup> Te tēe cáscuáha jíní yá ni cacajnūhún de ya:

Maestro, ¿naun ni cacu cuáá tēe yáha? ¿A cuéchi tátá de náná de cúu, chí cuéchi máá de cúu, chí naún?

<sup>3</sup> Te ni cahān Jesús:

Nasūu cuéchi máá de, ni nasūu cuéchi tátá de náná de cúu jeē ní cacu de súcuán, chí sa suhva návaha cuni ñayuu jniñū jéhnū sāha Yaā Dios jíní de. <sup>4</sup> Níní jéē cúu nájnūhun nduú ñi ñayiví, te cánuú sāha ri jniñū Yaā ní tají rúhū. Chí quee tiempo jeē coo nájnūhun jecuáá, jeē tuá cuu sájniñū ni ñin. <sup>5</sup> Níní jéē íyó rī ñi ñayiví te cúu ri luz jeē cúndijin ñi anuá ñayuu ñayiví, návaha jecūhun ni í siquī Yaā Dios. Achí yá.

<sup>6</sup> Te ná ni cahān yá súcuán, te ni tesíhi yá nuū ñūhun, te ni sāha ya ndehyū jíní tesíhi yá un, te ni tee ya siquī tñūu tēe cuáá un. <sup>7</sup> Te ni cahān yá jíní de:

Cuáhán nuū pila Siloé te nacate ró tñūu ró, achí yá. Te jnūhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tñūu de, te ni ndundijin-ni, te ni nandicó de vēji de. <sup>8</sup> Yūcuán na te ñayuu yúcu yajni jíní de, jíní ñayuu jeē ní cajito jeē cúu de tēe cuáá, ni cacajnūhun jnāhan í:

¿A násūu tēe yáha cúu jeē ndeé-ni yāhá te jicān caridad?

<sup>9</sup> Te sava í ni cacahān:

Suu de cúu.

Te sava ga í ni cacahān:

Nasūu de cúu, te súcuán cúni coto de.

Te máá de chí ni cahān de:

Suu ri cúu.

<sup>10</sup> Yūcuán na te ni cacajnūhún í de:

¿Te ndese cúu jeē ní nanune tñūu ró núu súcuán?

<sup>11</sup> Te ni cahān de:

Tēe nání Jesús ni sāha de ndehyū, te ni tee de tñūu rī, te ni cahān de jíní rī: Cuáhán nuū pila Siloé te nacate ró tñūu ró. Te ni jehēn rī, te ni nacate rī, te ni nanune-ni tñūu rī, achí de.

<sup>12</sup> Yūcuán na te ni cacajnūhún í de:

¿Nde nuū ñne tēe ún? achí í.

Tu jíní rī, achí de.

*Jeē ní castíchi tēe fariseo tēe ni cacu cuáá*

<sup>13</sup> Yūcuán na te ni cajendeca í tēe ni iyo cuáá un nuū tēe grupo fariseo. <sup>14</sup> Te quivī ndetātu cúu jeē ní sāha Jesús ndehyū jeē ní nanune ya tñūu de. <sup>15</sup> Te tēe fariseo un ní cacajnūhún tucu de tēe ún ndese ni nanune tñūu de. Te ni cahān de:

Ni tee de ndehyū siquī tñūu ná, te ni nacate ná, te ni ndundijin-ni tñūu ná, achí de.

<sup>16</sup> Yūcuán na te ni cacahān sava tēe fariseo: Tēe ún chí nasūu ndé nuū Yaā Dios vēji de, chí tu nēe ñi de quivī ndetātu.

Te sava ga de chí ni cacahān:

¿Nde cuu sāha tēe un táca jniñū jéhnū yáha te núu tēe íyó cuéchi cúu de?

Te ni cacusín de siquī yá. <sup>17</sup> Te ni cacajnūhún tucu de tēe ni iyo cuáá un:

Róhó, ¿ndese cáhán ró siquī tēe ni nanune tñūu ró núu súcuán?

Te máá de ni cahān de:

Ñin tēe nácani jnūhun Yaā Dios cúu de, achí de.

<sup>18</sup> Te tēe hebreo un chí tu ní cá candije de jeē ní iyo cuáá tēe ún te ni ndundijin tñūu de. Te ni cacana xiní tátá de náná de. <sup>19</sup> Te ni cacajnūhún de:

¿A yáha cúu sēhe ro jéē ní cacu cuáá cácahán ró? Núu súcuán ¿te ndese ni ndundijin tñūu de vijna? achí.

<sup>20</sup> Te ni cacahān tátá de náná de:

Suu sēhe rī cúu tēe yáha jéē ní cacu cuáá.

<sup>21</sup> Te tu cájini rī ndese ni ndundijin tñūu de vijna, ni tu cájini rī ndé tēe ni nanune tñūu de. Cajnūhun ró maá de, chí je jéhnū de, te na cáchi máá de.

<sup>22</sup> Súcuán ni cacahān tátá de náná de, chí cáyūhú de cájito de jnāhan de tēe hebreo. Chí je ní casándaá tēe un jéē núu ndé ñayuu cachi í jeē Jesús cúu Cristo, Yaā ní tají Yaā Dios, te quenehen de í jeē ma cúu ga quiví í ñi vehe ñi sinagoga. <sup>23</sup> Jeē yúcuán ní cacahān tátá de náná de: Cajnūhun ró maá de, chí je jéhnū de.

<sup>24</sup> Yūcuán na te tēe hebreo un ní cacana tucu de tēe ni iyo cuáá un. Te ni cacahān de jíní:

Cachi cají ró nuū rī, jito jíní nuū Yaā Dios. Chí cájini rī jeē tēe íyó cuéchi cúu tēe ni nanune tñūu ró.

<sup>25</sup> Yūcuán na te ni cahān de:

Tu jíní na núu íyó cuéchi de, chí naún. Te íyó ñin jeē jíní ná, cúu jeē tēe cuáá ní cuu ná, te vijna chí ni ndundijin tñūu ná. Achí de.

<sup>26</sup> Te ni cacajñuhún tucu de:

¿Nde se ni sáha de jín ró? ¿Nde se ni nanune de tinūu ró núu súcuan?

<sup>27</sup> Te ni cahān de:

Je ni cuu ni castūhun ná nuū ní, te tu ní cáculni ní cuatáhú ní. ¿Te najehē cáculni ní jéé cáchi tucu ná nuū ní? ¿Te chí suni cáculni ní jijnáhan ní candíje ní yá naún?

<sup>28</sup> Yūcuán na te ni cacahān neé jín de, te áhí:

Máá ró chí cándíje ró téé ún, te máá rí chí cáculni rí Moisés. <sup>29</sup> Te cájini rí jeé ni cáhān Yāá Dios jín Moisés. Te téé yūcuán, ni tu cájini rí ndé nuū véji de.

<sup>30</sup> Te ni cahān téé ni iyo cuáá:

Nāá ni na jéé cáculni ní jéé tu cájini ní jeé véji de nuū Yāá Dios, vésú ni nanune de tinūu ná. <sup>31</sup> Te cájini yō jeé Yāá Dios tu jini nahín yá jeé cájicān ñayuu iyó cuéchi. Chí jini nahín yá nuū maá-ni ñayuu jeé cáchínūhún i ya te casáha i jeé cuní yá. <sup>32</sup> Te ní véji yó te tu ní jini sōho cuiti yō jeé ñn téé nanune de tinūu inga téé ni cacu cuáá. <sup>33</sup> Te núu nasūu ndé nuū Yāá Dios véji téé ún, te ma cúu cuiti sáha de ñn jniñu súcuan. Achí de.

<sup>34</sup> Te ni cacahān téé hebreo un:

Róhó chí iyó ndasí cuéchi ró ndé quiví ní cacu ró, ¿te á máá ró steén nuū rí naún? áhí.

Te ni caquenehen téé un yátá vehe ñ sinagoga.

*Siquí ñayuu cáhīyo cuáá ánuá*

<sup>35</sup> Te ni jini jñūhun Jesús jeé ní caquenehen de téé ún. Te ni nihín jñáhan ya jín de, te ni cahān yā jín de:

¿A cándíje ró Séhe Yāá Dios?

<sup>36</sup> Te ni cahān de:

¿Nde ñn cúu ya návāha candíje ná yá?

<sup>37</sup> Te ni cahān Jesús:

Je ni jito ró núu yā, te suu cúu ruhū jeé cahān jín ró, achí yá.

<sup>38</sup> Yūcuán na te ni jecuiñi yití de nuū yá, te ni cahān de:

Cándíje ná jéé nihín cúu Jitoho ná.

<sup>39</sup> Te ni cahān Jesús:

Véji rí ini ñayivi yáha jéé sándaá rí siquí ñayuu. Chí ñayuu jeé nájñūhun cáculni ánuá, ndundijin ini anuá i jeé jécūhun ni i siquí rí. Te ñayuu jeé jéni ni i jeé cájécūhun ni i, nájñūhun nducuaá ánuá i. Achí yá.

<sup>40</sup> Te sava téé fariseo jeé cáhīn jín yá, ná ni cajini de jñūhun yáha, te ni cacahān de jín yá:

¿Te chí jéni ní rō jeé suni téé tu cájécūhun ní cáculni máá rí naún?

<sup>41</sup> Te ni cahān Jesús:

Núu jeé cáculni ró téé tu jécūhun ni nuú, te ma cóo cuéchi ró. Te siquí jeé ní cacahān rō jeé cájécūhun ní rō, te tu cájécūhú ró, jeé yūcuán condee cuéchi siquí rō.

*Jñūhun yátá siquí lanchi*

## 10

<sup>1</sup> Jendaá cahān rí jín ró, núu yíhi lanchi ini corral cánevāha cáhnu ñayuu, te núu ndé téé tu quiví de ichi yéhyí corral un, chí sa suhva inga lado cáa de quiví de, téé un cúu ñacuñhá, chí véji jeé sacuiñhá. <sup>2</sup> Te téé quiví ichi yéhyí, chí téé un cúu pastor ndíto lanchi. <sup>3</sup> Te téé ndíto yéhyí, núne de te quiví téé ún. Te lanchi de cáculni tí tachí de. Te cána de síhví lanchi máá de, te táva de tí. <sup>4</sup> Te núu ni tava de ndíhi lanchi máá de, te yósnuú de nuú tí cuahān de. Te lanchi un cándiquín tí de, chí náculni tí tachí de. <sup>5</sup> Te ma cóndiquín tí yatá inga téé, chí sa suhva cunu tí coto tí de, chí náculni tí jeé nasūu jítoto tí cúu.

<sup>6</sup> Jñūhun yátá yáha ní cahān Jesús jín ñayuu, te tu ní cájécūhun ni i na jñūhun cúu jeé ni cahān yá.

*Jesús cúu máá pastor vāha*

<sup>7</sup> Yūcuán na te ni cahān gā Jesús jín i:

Jendaá cahān rí jín ró: Máá rí cúu nájñūhun yéhyí corral nuú quivícoo ñayuu cáculni nájñūhun lanchi rí. <sup>8</sup> Táca téé jeé tu ní táji Yāá Dios, jeé ní quivícoo de ndé ná tu quee rí, cáculni de nájñūhun ñacuñhá, chí tu ní cástéén de jñūhun ndaá. Te ñayuu cáculni nájñūhun lanchi rí, tu ní cájécūhú i de. <sup>9</sup> Máá rí cúu nájñūhun yéhyí. Te ñayuu jeé jín máá rí quivícoo, jnama rí i. Te cuu i nájñūhun lanchi jeé ndívícoo tí nuú yíhi vāha tí, te quéndacoo tí nuú cáji vāha tí.

<sup>10</sup> Téé cuñhá chí máni véji de jeé sacuiñhá de lanchi, te cahni de, te snáá de. Te ruhū chí véji rí návāha cotecu ñayuu cáculni lanchi rí, te nde yōhō vāha ndetū coo i. <sup>11</sup> Máá rí cúu máá pastor vāha. Te pastor vāha chí ndíto vāha de lanchi de, vésú nde cuu de jeé siquí tí. <sup>12</sup> Te ñn téé yíyāhu, nasūu pastor tí cúu de, chí nasūu lanchi máá de cúu tí. Te núu jito de jeé véji yíhi, te stóo de lanchi, te jinu de cuahān de. Te yíhi chí jñá tí lanchi, te sáha tí jeé jíté núu lanchi. <sup>13</sup> Te téé yíyāhu ún chí jinu de cuahān de siquí jeé lanchi tátú cúu jeé ndíto de, te jeé yūcuán tu cundáhú ní de tí.

<sup>14</sup> Máá rí cúu máá pastor vāha. Te jini rí táca ñayuu cáculni nájñūhun lanchi rí, te máá i cájini i ruhū. <sup>15</sup> Te yáha cúu nájñūhun jeé Tatá rí jini yā ruhū, te máá rí jini rí Tatá rí. Te cuu rí jeé siquí ñayuu cáculni lanchi rí. <sup>16</sup> Te suni iyó gā ñayuu jeé cáculni lanchi rí, te sín sín ñayuu cáculni i. Te cáculni jéé suni condeca rí ñayuu ún. Te cuatáhú i jñūhun cáhān rí. Te coyūcu cáhnu-ni ndíhi ñayuu candíje, te coo ñn-ni pastor i.

<sup>17</sup> Te Tatá rí maní ndasí yá jín rí siquí jeé jéhe rí máá rí jeé cúu rí jéhe ñayuu, te natecu tucu rí. <sup>18</sup> Ni ñn ma cúu cahni ruhū, chí máá rí cúu jeé jéhe jñūhun cuu rí. Jeé cachí máá rí te cuu rí, te jeé cachí máá rí te natecu rí, chí súcuan iyó poder rí. Súcuan ni cahān Tatá rí jeé sáha rí. Achí yá.

<sup>19</sup> Te jeē ní cajini jnáhan ñuu yā hebreo jñūhun yáha, te ni cacusñin tucu i. <sup>20</sup> Te cuehē i ni cacahān:

¿Naun cáchusóhó ró jeē cahán de? Chi ñūhun tachī ini de, te ni tñvi xini de.

<sup>21</sup> Te sava ga i ni cacahān:

Tu súcuan cáhán tēe ñūhun tachī ini, nájnūhun cáhán tēe yáha. Te tēe ñūhun tachī ini, ¿á cuu nanune de tinūu tēe cuáá naún? Achí.

*Jeē ní casquéhichī i Jesús*

<sup>22</sup> Te tiempo mñin cúu, te ñuu Jerusalén cánasáha ñayuu vico jeē cánucūhun ni i quivī ní cuhīi templo cáhnu. <sup>23</sup> Te jica cuu Jesús ini templo, ini corredor jeē naní Salomón. <sup>24</sup> Te jnáhan ñuu yā hebreo ni cacutútú i nuū yā, te ni cacahān i:

¿Nasaa ga quivī sáha ró jēe ma cucáhnu ni rí? Cachí cají nuū rí jijnáhan ri núu máá ró cúu Cristo.

<sup>25</sup> Te ni cahān Jesús:

Je ni castūhun rí nuū rō, te tu ní cácadñje ró. Táca jñiñu jeē ní tejñiñu Tátá rí ruhū sáha ri, yūcuan stéen cají jēe maá yá ni tají ruhū.

<sup>26</sup> Te tu cácadñje ró, chi nasūú lanchi ri cácuu ró, nájnūhun je ni cahān rí jijn ró. <sup>27</sup> Ñayuu cácuu lanchi ri, chi nácuuni i jeē maá rí cúu jeē cahán jijn i. Te jini rí i, te cándiquin i ruhū. <sup>28</sup> Te cotecu i ní cáni sáha rí, te ma jnahnú ndetū cuiti i. Te ni ñin ma cúu quende i ndaha rí. <sup>29</sup> Máá Tátá rí ni squivī ya i ndaha rí. Te cújéhnu ga maá yá vésú táca gá. Te ni ñin ma cúu quende i ndaha ya. <sup>30</sup> Máá rí jijn Tátá rí, chí ñin-ni cúu ri, achí yá.

<sup>31</sup> Yūcuán na te jnáhan ñuu yā hebreo ni caquihñin tucu de yuū jeē cuáha de xini yā. <sup>32</sup> Te ni cahān yā jijn de:

Ni stéen rí cuehē jniñu váha nuū rō jeē ni sáha ri jijn poder Tátá rí. ¿Te á siquī jeē ni sáha ri jniñu váha cúu jeē cuáha ró yúu xini rí núu súcuan? Achí yá.

<sup>33</sup> Te ni cacahān de jijn yá:

Nasūu siquī jeē ni sáha ró jniñu váha cúu jeē cuáha rí yuū xini rō, chí siquī jeē cahán ndeváharó jēe achí ró jeē inuú cúu ró jijn Yaā Dios. Chi tēe-ni cúu ró, te sáha ró jēe inuú cúu ró jijn Yaā Dios. Achí de jijn yá.

<sup>34</sup> Te ni cahān Jesús:

Yósó nuū tútu ley cáneváha ró jēe ni cahān Yaā Dios: Nájnūhun yaā cácuu ró, achí Yaā Dios, achí tútu. <sup>35</sup> Chi ñayuu jeē ní cajetáhú jñūhun ya, ni cahān yá jeē cácuu i nájnūhun yaā. Te cájini yō jeē ma cúu cahān yō jeē tú ndaā jñūhun cáhán tútu i. <sup>36</sup> Núu súcuan ¿te naun cacahān ró jeē jñūhun ndeváha cúu jeē ni cahān rí jeē Séhe Yaā Dios cúu rí? Chí máá Yaā Dios ni jeni ya ruhū siquī jniñu i, te ni tají yá ruhū vēji ri ini ñayivī. <sup>37</sup> Núu tu sáha ri jniñu sáha Tátá rí, núu súcuan te ma candñje ró ruhū. <sup>38</sup> Te núu sáha rí, te vésú tu cácadñje ró ruhū, te na cádnñje ró siquī jniñu sáha rí ún.

Te súcuan te cucáhnu ni rō jeē ñin-ni cúu Tátá rí jijn rí, te ñin-ni cúu rí jijn Tátá rí. Achí yá.

<sup>39</sup> Yūcuán na te cánducú tucu de jniñ de ya. Te ni ndoñūhún-ni ya cuahān yā.

<sup>40</sup> Te cuanuhun yā yūte Jordán ichi núu cáne niándii, nuū ni íne Juan ni scuándute de. Te ni condee yā yūcuán. <sup>41</sup> Te ni quijicoo cuehē ñayuu nuū yā, te ni cacahān i jijn táca jnáhan i:

Ndaā chí vésú tu ní sáha Juan ni ñin jniñu jéhnu, te ni cundaā ndiñi jñūhun ni cahān de siquī ndese sáha tēe yáha. Achí i.

<sup>42</sup> Te cuehē ñayuu jeē ni jéngoo nuū yā yūcuán, ni cacandñje i ya.

*Jeē ni jihī Lázaro*

## 11

<sup>1</sup> Te ni iyo ñin tēe cúhú, nání de Lázaro. Te máá de jijn cuáha de María jijn Marta, cácuu de ñayuu ñuu Betania. <sup>2</sup> Te María un jéé cúu cuáha Lázaro, suu ña cúu jeē ní chíhi aceite perfume jehē jitoho yō, te ni nasichí ña jijn ixi xini ña. <sup>3</sup> Te ndándúu cuáha de un ní catají ña jñūhun cuahān nuū Jesús:

Tēe jeē maní ni jijn, cúhú de, achí ña, achí mozo.

<sup>4</sup> Te ná ni jini Jesús jñūhun, te ni cahān yā:

Cuehyī yáha chí nasūu cuehyi jeē ví cuu de cúu. Chí sa suhva sáha Yaā Dios jeē cuni ñayuu ndese cújéhnu ya. Chí ruhū. Séhe Yaā Dios, jijn cuehyī yáha te stéen rí jeē suni cújéhnu máá rí. Achí yá.

<sup>5</sup> Te maní Jesús jijn Marta jijn cúhú ña jijn Lázaro. <sup>6</sup> Te vésú súcuan te nuū ni ñihñ yā jñūhun jeē cúhú de, te ni quendō ya uū gā quivī nuū ndee yá un. <sup>7</sup> Yūcuán na te ni cahān yā jijn tēe cáscuáha jijn yá:

Na quihñin tucu yó región Judea.

<sup>8</sup> Te tēe cáscuáha un ní cacahān de jijn yá:

Maestro, ná tu cuu quivī jeē ní canducú jnáhan yó hebreo cuáha de yuū xini ní. ¿Te cúní ni quihñin tucu ní yūcuan naún? Achí de.

<sup>9</sup> Te ni cahān Jesús:

Ma cúu cahni ñayuu ruhū núu ná tu quee maá quivī cuu rí. Chí jeē iyó rí ñayivī yáha cúu nájnūhun jeē iyó úxi uū hora ñin nduú. Te jeē sáha rí jeē cuni Yaā Dios, cúu rí nájnūhun tēe jeē jica nduú, te tu cáchihí de jehē de, chí cundñjin nuū de ñayivī yáha. <sup>10</sup> Te tēe jeē tu sáha jeē cuni Yaā Dios, chí nájnūhun jica de jecuáá, te nájnūhun cáchihí de jehē de, chí tu cundñjin ini anuá de. Achí yá.

<sup>11</sup> Yūcuán na te ni cahān tucu ya:

Amigo yō Lázaro quixí de, te quihñin rí sáha ri jeē nátahū ni de. Achí yá.

<sup>12</sup> Yūcuán na te tēe cáscuáha un ní cacahān de:

Núu quixí de te jini yō jeē nduváha de.

<sup>13</sup> Te Jesús chí súcuan ni cahān yā jeē jé ni jihī de. Te cájeni ni tēe cáscuáha jeē quixí ndije de. <sup>14</sup> Yūcuán na te ni cahān cají yá:

Je ni jihī Lázaro. <sup>15</sup> Te cúsī ni rī jeē tu ní cōyūcu yó yūcuán, návāha váha ga candije ró jeē coto ró jniñu jéhnū sáha ri. Núu súcuau te na quíngoo yó nuū ndíyī ún. Achí yá.

<sup>16</sup> Yūcuán na te Tomás, tēe cúu cuatí, ni cahān de jíin jnāhan de jeē cascuāha jíin yá:

Suni na quíngoo yó návāha cuu yó jíin yá, achí de.

*Jesús cúu jeē sáha jeē nátecu te cotecu ní cáni*

<sup>17</sup> Te nuū ní quee Jesús, te jíiní yā jeē ní cuu cuñ quivī yíndūji Lázaro. <sup>18</sup> Te yajni-ni íne ñuu Betania jíin ñuu Jerusalén, nájñūhun uū kilómetro yosáva. <sup>19</sup> Te Marta jíin María, ni quecoo cuehē jnāhan ña hebreo jeē cahān i jñūhun ndeyí ni jíin ña jeē siquí jeē ni jihī cuāha ña. <sup>20</sup> Te nuū ní jini Marta jeē véji Jesús, te ni quenda ña cuajnahān ña ya. Te María chí ni ndōo ña vehe. <sup>21</sup> Te ni cahān Marta jíin Jesús:

Núu ní íyo ní yáha, te ma cúu cuāha ná núu. <sup>22</sup> Te vesú súcuau te jíiní na jéē táca jéē cacán ni núu Yaā Dios, te sáha ya, achí ña.

<sup>23</sup> Te ni cahān Jesús jíin ña:

Natecu cuāha ró.

<sup>24</sup> Te ni cahān Marta:

Jíiní na jéē nátecu de quivī nátecu táca ndíyī nde quivī jíinú ñayiví.

<sup>25</sup> Te ni cahān Jesús:

Máá rí cúu Yaā sáha jeē nátecu jíin jéē cótecu ní cáni. Ñayuu candije jeē jnāma ri i, vesú na cúu i, te natecu i. <sup>26</sup> Te ñayuu cátecu te cándije i ruhū, cotecu i ní cáni andiví. ¿A cándije ró jñūhun yáha? Achí yá.

<sup>27</sup> Te ni cahān ña:

Cándije ná jéē maá ní cúu Cristo, Sēhe Yaā Dios, jeē achí tutu jeē quíji ini ñayiví, achí ña.

*Jeē ní ndáhyū Jesús nuū yíndūji Lázaro*

<sup>28</sup> Te ná ni cahān ña súcuau, te cuahān-ni ña, cuacana yuhu ña cuhū ña María:

Máá Maestro ni quee yā, te cána ya rohó, achí ña.

<sup>29</sup> Te jeē ní jini María jñūhun yáha, te yachí ni ndocuñí ña, cuahān ña nuū yá. <sup>30</sup> Te ná tu quiví Jesús ñuu, chí ni ndōo-ni ya nuū ni jéjnahan Marta yá. <sup>31</sup> Te ñayuu hebreo un jéē cáyūcu ini vehe jíin María, jeē cacāhan i jñūhun ndeyí ni jíin ña, ni cajito i jeē yachí ni ndocuñí ña cuahān ña. Te ni candiquin i ña cuangoo i, chí cájeni ni i jeē cuándahyū ña nde nuū yíndūji ndíyī.

<sup>32</sup> Yūcuán na te ni jíin María nuū íne Jesús, te ni jecuñí yití ña nuū jehé yá, te ni cahān ña:

Núu ní íyo ní yáha, te ma cúu cuāha ná núu, achí ña.

<sup>33</sup> Te ni jito Jesús jeē ndahyū ña jíin jéē cándahyū ñayuu vējicoo jíin ña. Te yóhyo ni ndocuñiyá ní yá, te ni jnahuhū ní yá jeē cundáhú ní yá i. <sup>34</sup> Te ni cajñūhun yá ña:

¿Nde mí ní cachindūji ró de?

Te ni cacāhan ña jíin yá:

Quíhín yó te cuni ní, achí ña.

<sup>35</sup> Te ni ndahyū Jesús. <sup>36</sup> Yūcuán na te ni cacāhan ñayuu hebreo un:

Condēhe náa yóhyo maní de jíin ndíyī ún.

<sup>37</sup> Te sava i chí ni cacāhan i:

Tēe yáha jeē ní nanune de tñūnu tēe cuáá, ¿á tu ní cúu sáha de jeē ma cúu Lázaro nuú? achí i.

*Jeē ní natecu Lázaro*

<sup>38</sup> Te yóhyo ni jnahuhū ni tucu Jesús, te ni quee yā nde nuū yíndūji ndíyī. Te ñin yaū cava cúu, te yuyáú un ndíhyū ñin yuū. <sup>39</sup> Te ni cahān yā:

Tejiyo yuū un jíināhan ró, achí yá.

Te Marta, cuāha ndíyī un, ní cahān ña:

Je jéén xicō de, chí je ní cuu cuñ quiví yíndūji de.

<sup>40</sup> Te ni cahān Jesús jíin ña:

¿A násūú je ní cahān rī jíin ró jeē núu candije ró te coto ró jéē yóhyo cújéhnū Yaā Dios jíin poder yá? achí yá.

<sup>41</sup> Yūcuán na te ni catejiyo i yuū jeē ndési yuyáú ndíyī ún. Te ni ndacoto-ni Jesús ichi andiví, te ní cahān yā:

Tátā, na cútahū na núu ní jéē sáha ní jéē jicán na. <sup>42</sup> Te jíiní na jéē níni sáha ní jéē jicán na. Te jeē váha ñayuu cáhñin yáha cúu jeē súcuau cáhān na, návāha na cándije i jeē maá ní ní tají saña.

<sup>43</sup> Te ná ni cahān yā súcuau, te ni cahān jee ya:

Lázaro, quenda quíji ró, achí yá.

<sup>44</sup> Te ni quenda-ni tēe ní jihí ún, te ñúsúcún ndaha de síhñ de jíin tira sahma. Te nuū de ñúsúcún ñin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, achí yá. Te ni canandají i.

*Jeē ní casquijñahan de jñūhun jeē cáhni de Jesús*

(Mt. 26.1-5; Mr. 14.1-2; Lc. 22.1-2)

<sup>45</sup> Yūcuán na te cuehē ñayuu hebreo jeē ní quijicoo nuū María, ni cacandije i Jesús, chí ní cajito i jniñu ní sáha ya. <sup>46</sup> Te sava i chí cuangoo i nuū tēe grupo fariseo, te ni cacastühún i ndese ní sáha Jesús. <sup>47</sup> Yūcuán na te tēe fariseo un jíin sūtú cácujeñnu ni candutútú de junta jíin táca gá tēe cácujeñnu. Te ni cacāhan de:

¿Ndese sáha yó? Chí tēe ún yóhyo cuehē jniñu jéhnū sáha de. <sup>48</sup> Te núu condēhé-ni yó, te ndivíi ñayuu candije i de. Te quijicoo táca tēe nación Roma jeē cácujeñnu, te canu de templo cáhnu yó, te scuíté núu de ñayuu nación yó, achí de jíināhan de.

<sup>49</sup> Te ñin jnāhan de jeē naní Caifás, jeē cúu máá sūtú cujeñnu ga cuiyá ún, ni cahān de:

Róhó chí tu cájini cuií ró, <sup>50</sup> ni tu cájecūhun ní ró jeē váha ga jeē cúu ñin tēe jehé ñayuu nación yó vesú jeē náa ndivíi i, achí de.

<sup>51</sup> Te tu ní cáhán de jñuhun yáha jée jéni ní maá de. Chi siquí jeé cúu de sutú cujéhu ga cuiyá ún, te ní sáha Yaá Dios jíin de jeé ní nacani de jñuhun jeé cúu Jesús jehé ñayuu nación hebreo. <sup>52</sup> Te nasūu maá ñn-ni jehé nación hebreo, chi suni jehé ndivii ñayuu cácuu sêhe Yaá Dios jeé ní cajitē núu táca nación, návaha ñn na cuu i jíjnáhan i. <sup>53</sup> Yūcuán na te nde quiví ún te táca tée hebreo cácujeñhu un, ní casquijnáhan de jñuhun jeé cáhni de Jesús.

<sup>54</sup> Jeé yūcuán tuá ní jica ndijin yá nuú jnáhan ñuu yá hebreo un, chi ní quenda ya región Judea, te cuahán yá ñn ñuu naní Efraín, nuú iyó yajni ñuhun téhé. Te ní condee yá yūcuán jíin tée cácuáha jíin yá.

<sup>55</sup> Te ní cuyajni vico pascua jeé cánasáha ñayuu hebreo. Te cuehē ñayuu táca ñuu yūcuán cuángoo i ñuu Jerusalén, návaha squícu i jeé cahán ley jeé cúchi i ndundoo i nuú Yaá Dios, te sáá te quejéé vico pascua. <sup>56</sup> Te cánanducú i Jesús, te cácajnñuhun jnáhan i ini templo:

¿Ndesé cájeni ní rō? ¿A quiji de vico, chí tutú? Achí i.

<sup>57</sup> Te sutú cácujeñhu jíin tée fariseo ní candacu de jniñu jeé núu ndé ñn ñayuu jiní ndé nuú íne ya, te na cástühún i, návaha jñi de ya.

*Jeé ní chuhun María perfume jehé Jesús  
(Mt. 26.6-13; Mr. 14.3-9)*

## 12

<sup>1</sup> Te cúmani iñú gá quiví te coo vico pascua. Te ní jehén tucu Jesús ñuu Betania nuú ndeé Lázaro, tée ní jihí te ní nastécú yá de. <sup>2</sup> Te ní casáha i ñn vico xíni jeé yíñühún i jíin yá. Te Marta ní jeni ña cohō. Te Lázaro yéji de staá jíin yá nuú mesa jíin táca gá ñayuu. <sup>3</sup> Yūcuán na te María ní quee ña jíin nájnñuhun sava litro aceite perfume jeé máni ita nardo cúu, te yōhō yahu ndeé. Te ní chuhun ña jehé Jesús, te ní nasichí ña jíin xixi ña. Te ní ini vehe un ní chítú xícō perfume un. <sup>4</sup> Yūcuán na te ní cahán Judas Iscariote sêhe Simón, ñn tée scuáha jíin yá un, te suu de cúu jeé nastúu de ya:

<sup>5</sup> ¿Najehē tu ní cúyáhu perfume yáha jée uní ciento denario, te cuáha yó núu ñayuu ndahú núu. Achí de.

<sup>6</sup> Súcuán ní cahán de, nasūu jée cundáhú ndije ní de ñayuu ndahú, chí sa suhva jeé cúu de tée cuíhná. Chí máa de ndíso yijni xühún, te quíhin cuíhná de jeé cájequin táca tée ún. <sup>7</sup> Yūcuán na te ní cahán Jesús:

Ma stáhán rō ña. Chí jeé ní sáha ña yáha cúu jeé ní sátühva ña ruhū nde quiví jeé quíndūji ri. <sup>8</sup> Chí níni cáyūcu ñayuu ndahú jíin ró, te ruhū chí tuá condee rí jíin ró. Achí yá.

*Jeé ní casquijnáhan de jñuhun jeé cahni de Lázaro*

<sup>9</sup> Te cuehē ñayuu hebreo ní cajini jñuhun i jeé néne ya ñuu Betania. Te ní jinūcoo i, te nasūu maá ñn jeé cuní i coto i nuú Jesús, chí suni jeé cuní i coto i nuú Lázaro, tée jeé ní nastécú yá. <sup>10</sup> Yūcuán na te sutú cácujeñhu ní casquijnáhan de jñuhun jeé suni cahni de Lázaro. <sup>11</sup> Chí jeé siquí Lázaro te ní cujiyo cuehē jnáhan ñuu de hebreo nuú de, te cácañdije i Jesús.

*Jeé ní quiví Jesús Jerusalén*

*(Mt. 21.1-11; Mr. 11.1-11; Lc. 19.28-40)*

<sup>12</sup> Te inga quiví ún, te ñayuu cuehē jeé ní quecoo vico pascua un, ní cajini jñuhun i jeé véji Jesús ñuu Jerusalén. <sup>13</sup> Te ní cajehnde i ndaha ñúu, te ní quendacoo i cuajnahán i ya. Te cácana jee i:

Yōhō cújéhu Yaá Dios. Yōhō vāha Yaá cúu Yaá jeé véji jíin jniñu maá Jítoho yō Yaá Dios. Yōhō vāha Yaá cúu Rey nación yō Israel. Achí i.

<sup>14</sup> Te ní nihín Jesús ñn burro, te ní jecosō yá tí, nájnñuhun cáhán tutu íi:

<sup>15</sup> Ñayuu ñuu Jerusalén jeé naní ñuu Sion, ma yūhu ró jíjnáhan ró.

Yáha condēhe ró jeé véji Rey rō, te yósó yá ñn burro.

Achí tutu.

<sup>16</sup> Te quiví ún te tée cácuáha jíin yá, tu ní cájecūhun ní de jeé súcuán squícu táca jée yosó núu tútu íi. Te nde ná ní ndujéhu Jesús jeé cuánuhun yá andiví, te sáá te ní canucūhun ní de táca jñuhun yósó síquí yá, jíin jée ní casáha de súcuán jíin yá.

<sup>17</sup> Te ñayuu ní cahín jíin yá ná ní cana ya xini Lázaro nuú ní yindūji de, te ní nastécú yá de, ní canacani i jñuhun ndese ní sáha ya. <sup>18</sup> Jeé yūcuán ní quendacoo ñayuu cuehē un, ní jejnahan i ya, chí ní cajini jñuhun i jeé ní sáha ya jniñu jéhu un jée ní steén yá poder ya. <sup>19</sup> Yūcuán na te ní cacahán maá tée fariseo:

Vijna te je ní cajito yó jée ma cúu cuiti gá casi yō. Chí jíto yó jée ndivii cuiti ñayuu cuangoo i jíin de. Achí de jíjnáhan de.

*Ñayuu nación Grecia nánducú i Jesús*

<sup>20</sup> Te sava ñayuu nación Grecia, suni ní quijicoo i ñuu Jerusalén vico pascua un jée chíñühún i Yaá Dios. <sup>21</sup> Te ní quecoo i nuú Felipe, tée ñuu Betsaida ndañúu Galilea. Te ní cacahán i jíin de:

Tátá, cácuani ná cahán na jíin Jesús, achí i.

<sup>22</sup> Te ní jehén Felipe, ní castühún de nuú Andrés. Te ndindúu de cuacastühún de nuú Jesús. <sup>23</sup> Te ní cahán Jesús jíin de:

Je ní quee quiví jeé ndujéhu Yaá ní nduu tée. <sup>24</sup> Te jendaá cahán rí jíin ró, ñn nuní trigo núu tú ñingava nuú ñuhun te quíndūji, núu súcuán te quendōo maá ñn-ni. Te núu quíndūji, te nacayá cuehē ndasí. Te suni súcuán cánúu cuu rí quíndūji rí, návaha coo cuehē ñayuu jeé ndúu i sêhe Yaá Dios. <sup>25</sup> Te

na-ni ñayuu núu tu jéhe i jñuhun ndoho i jeé siquí ruhū, te jñahnū ndetū i. Te ñayuu jeé jéhe i jñuhun ndoho i jeé siquí ruhū ini ñayiví yáha, cotecu i ní cáni andiví. <sup>26</sup> Núu ndé ñayuu cuní i cuajniñū i nuū rī, na cóndiquin i ruhū. Te nuū cóndee rī, suni yūcuán condee ñayuu jejniñū nuū rī. Te ñayuu jejniñū nuū rī, chí sáha Tátá rī jeé cujéhnū i.

*Jeé ni cáhān Jesús jeé cuu yā*

<sup>27</sup> Te vijna te cúcuhyá ndasí ní rī sáha jñúndóho quiji siquí rī. ¿Te ndese cahān rī? ¿A cáhān rī jiin Tátá rī: Jnama ní sáña núu jñúndóho jeé quíji siquí ná, achi rī? Ma cúu, chí jeé siquí yūcuan cúu jeé véji rī. <sup>28</sup> Tátá, steén ní jeé cujéhnū ndasí ní jiin poder ní, áchí yá.

Yūcuán na te ichi ándiví ní cahān iin jñuhun:

Je ni steén rī jeé cujéhnū rī, te sáha tucu rī inga jínu, áchí yá.

<sup>29</sup> Te ni cajini ñayuu cáhiin yūcuán, te ni cacahān i jeé taja cáhān. Te sava ga i ni cacahān:

ñn ndajéhé Yā Dios ni cahān jiin yá.

<sup>30</sup> Te ni cahān Jesús jiin i:

Tu ní cáhān jñuhun yáha jeé siquí ruhū, chí sa suhva návāha cuní rō siquí jñuhun jeé ní cáhān yā jiin rī. <sup>31</sup> Vijna cúu jeé sándaá Yā Dios siquí cuéchi ñayuu ñayiví yáha. Vijna cúu jeé scúnu ya jexeén jeé ndácu jniñū ini ñayiví yáha. <sup>32</sup> Te ruhū, núu na jínu condita caa rī cuu rī ini ñayiví, te sáha rī jeé jnáá táca ñayuu quivicoo i ndaha rī, áchí yá.

<sup>33</sup> Súcuán ni cahān yā jeé steén yā ndese modo cuu yā. <sup>34</sup> Te ni cacahān ñayuu jiin yá:

Ni cajini sōho ná jeé cahān tutu ley Yā Dios cánevāha yó, jeé Cristo cotecu yā níf cáni. ¿Te naun cáhān ní jeé Yaa ní nduu tēe, cánuú condita caa ya cuu yā? ¿Nde iin cúu máá Yáa ní nduu tēe núu súcuán? Achí i.

<sup>35</sup> Yūcuán na te ní cahān Jesús:

Máa jecu na quiví condee rī jiin ró jeé cúu rī luz cundijin ini anuá rō. Núu súcuán te vijna jeé iyó gá luz rī jiin ró, te caa ró jiin, chí sanaa ní rō te cuahān rī, te nájñuhun quendōo ró núu néé. Chí ñayuu cájica nájñuhun nuū néé, tu cajini i ndé nuū cuángoo i. <sup>36</sup> Núu súcuán te níni ndéé gá rī jiin ró, te candije ró ruhū jeé cúu rī luz, návāha nduu ró ñayuu cájica jín luz, áchí yá.

Súcuán ni cahān Jesús táca jñuhun yáha, te cuahān-ni ya, te tuá ní steén yā maá yá nuū i.

*Jeé tu ní cácandje ñayuu hebreo jeé cúu ya Cristo*

<sup>37</sup> Te vésú cuehē jniñū jéhnū ní sáha Jesús jeé steén yā poder yā nuū i, te tu ní cácandje i ya. <sup>38</sup> Chí squícu nahín jñuhun ní cahān Isaiás, tēe ní nacani jñuhun Yā Dios nde jenahān:

Tátá Yā Dios, tu ní cácandje ñayuu jñuhun ní canacani ná,

te tu ní cácandje i jniñū jéhnū jeé ní steén ní poder ní núu i.

Achí Isaiás. <sup>39</sup> Jeé yūcuan tu ní cúu candje i, chí ni cahān tucu Isaiás:

<sup>40</sup> Ní sáha ya jeé nájñuhun cáhiyo cuáá ánuá i, jiin jeé cácuñhni ní i,

návāha coo nájñuhun jeé tu cájito i,

te ní ma jécūhun ní i,

ní ma násāma ini i quivicoo i nuū rī,

jeé nasávāha rī anuá i nuū cuéchi i.

Achí Cristo, achí tutu. <sup>41</sup> Jñuhun yáha ní cahān Isaiás, chí je ní jito de ndese yōhyo cújéhnū Jesús, te ní cahān de ndese coo quiví jeé quíji ya.

<sup>42</sup> Te vésú súcuán te cuehē ñayuu hebreo chí ní cacandje i ya, te suni nde jiin sava tēe cándacu jniñū. Te tu ní cácahi de jeé cácandje de ya, chí siquí jeé cáyūhú de táca tēe fariseo. Chí núu súcuán te quenehen ún de ini vehe i sinagoga jeé ma cuáha ga jñuhun quivicoo de. <sup>43</sup> Chí cácusí gā ní de jeé cujéhnū de sáha ñayuu, vésú jeé cujéhnū de sáha Yā Dios.

*Jñuhun cáhān Jesús cúu jeé sándaá siquí ñayuu*

<sup>44</sup> Te ní cahān jee Jesús:

Ñayuu cácandje ruhū, nasūu máñúhún-ni ruhū cácandje i, chí suni cácandje i nde maá Tátá rī, Yāa ní tají ruhū. <sup>45</sup> Te ñayuu cájito nuū rī, suni cájito i nuū Yāa ní tají ruhū. <sup>46</sup> Máá rī jeé cúu rī luz cundijin ini anuá ñayuu, ní quiji rī ini ñayiví návāha táca ñayuu cácandje ruhū, ma cáca i nájñuhun nuū néé. <sup>47</sup> Te núu iin ñayuu jini sōho i jñuhun cáhān rī, te núu tu jétáhú i, te nasūu ruhū sándaá siquí i. Chí tú véji rī jeé ndénehen rī cuéchi siquí ñayuu ñayiví, chí sa suhva jeé jnáma rī i. <sup>48</sup> Te ñayuu jeé casquéhichí i ruhū te tu cájjetáhú i jñuhun cáhān rī, iyó iin jeé sándaá siquí i. Suu táca jñuhun jeé ní cáhān rī, jñuhun un cúu jeé ndenehen cuéchi siquí i quiví jínu ñayiví.

<sup>49</sup> Chí tu cáhān rī jeé cúu ní maá rī, chí Tátá rī, Yāa ní tají ruhū, máá yá ní ndacu jniñū nuū rī ndese cahān rī jiin ndese steén rī. <sup>50</sup> Te jini rī jeé jniñū ndácu Tátá rī sáha jeé cótecu ñayuu níf cáni. Núu súcuán te jñuhun cáhān rī, chí máni jñuhun jeé ní cachí Tátá rī cúu, áchí yá.

*Jeé ní nacate ya jehē tēe cáscúha*

## 13

<sup>1</sup> Te jehíni inga quiví te quejéé vico pascua. Te je jini Jesús jeé ní quee quiví jeé quénda ya ñayiví yáha quínuhun yā nuū Tátá yā. Te níni cundáhú ní yā ñayuu maá yá jeé cáyūcú ini ñayiví. Te vijna jeé jínu jeé ine ya ñayiví, te sáha ya iin jniñū jeé steén cají yá jeé cundáhú ní yā i.

<sup>2</sup> Te jexeén je ni squívi ini anuá Judas Iscariote sêhe Simón, jeé vjna nastúu de ya.  
<sup>3</sup> Te jíní Jesús jeé véji ya nuú Yaá Dios, te nuhún yá nuú Yaá Dios, jíní jeé ni sáha Tátá yá jeé cújéhu ya siquí ndihí-ni. <sup>4</sup> Te cúxíni ya jíní tée cáscuáha jíní yá, te ni ndocuíñi yá. Te ni stáa ya sahma ndú ya, te ni jihni yá ñn toalla chíji ya. <sup>5</sup> Te ni chuhun ya ndute ini ñn tijehēn. Te ni quejéé yá nácate ya jehē tée cáscuáha. Te násíchí yá jíní toalla jeé nuhni chíji ya.

<sup>6</sup> Te ni jínú yá nuú Simón Pedro. Te ni cahān Pedro jíní yá:

¿Sa máá ní nacate jehē ná naún?

<sup>7</sup> Te ni cahān Jesús:

Tu jécūhun ni rō jeé sáha ri vjna, te cúcuéé gá te jécūhun ni rō.

<sup>8</sup> Te ni cahān Pedro jíní yá:

Ma nácate cuítí ni jehē ná.

Te ni cahān Jesús:

Núu tú nacate ri jehē rō, te ma cúu cundúú rō jíní rí.

<sup>9</sup> Te ni cahān Simón Pedro:

Núu súcuan cúu te nasúu máá jehē-ni ná, chí suni nacate ní ndaha ná jíní xíní ná, áchí de.

<sup>10</sup> Te ni cahān Jesús jíní de:

Tēe jeé sa ní jichí, tu jíní ñúhún ndundoo ní cáhu de, chí máá jehē-ni de, chí je íyó ndoo ní cáhu de. Te máá rō chí je ni candundoo rō. Te tú ndihí rō cáhíyo ndoo.

<sup>11</sup> Chí je jíní yá ndé ñn de cúu jeé nastúu de ya, te jeé yúcuán ní cahān yá: Tú ndihí rō cáhíyo ndoo.

<sup>12</sup> Te nuú ni jínú ni nacate ya jehē de jijnáhan de, te ni naquihín ya sahma ndú ya, te ní nucōo tucu ya nuú mesa. Te ni cahān yá:

¿A cájecūhun ni rō na vé cuní cahān jeé ni sáha ri jíní rō? <sup>13</sup> Cácahān rō jeé Maestro jíní Jítoho rō cúu ri, te ndaaí cácahān rō, chí suu ndije cúu ri. <sup>14</sup> Núu súcuan te vēsú Maestro rō jíní Jítoho rō cúu ri, te ni nacate ri jehē rō jijnáhan rō, te suni súcuan cánuú jéé nacate máá rō jehē jnāhan rō. <sup>15</sup> Chí jniñu yáha ni sáha ri jeé stéén rí nuú rō jeé suni súcuan sa cuajniñu rō núu jnāhan rō, nájñuhun sa máá rí ni jejniñu rí nuú rō. <sup>16</sup> Jendaá cahán rí jíní rō jeé ñn mozo tu cújéhu de nuú patrón de, te tēe jíca jniñu táhu nuú de, te cújéhu de nuú tēe ni tají de. Te máá rō cácuu mozo rí, te na cuajniñu rō núu jnāhan rō nájñuhun ní stéén rí nuú rō. <sup>17</sup> Te núu ni cájecūhun ni rō jñuhun yáha, te yōhyo ndetú rō te núu squícu rō.

<sup>18</sup> Te nasúu jéé cahán rí jeé ndihí rō ndétú, chí je jíní rí táca róhó jéé ní nacáji ri. Te cánuú squícu jñuhun yáha jeé cahán tutu ñ: Tēe yéji staa jíní rí, ní ndió cuñí de siquí rí, achí tutu. <sup>19</sup> Te vjna te je cástūhun rí táca jéé yáha núu rō nde ná tu coo, návāha núu na cóo, te candíje rō jéé máá rí cúu Yaá ní tají

Yaá Dios. <sup>20</sup> Jendaá cahán rí jíní rō jeé na-ni ñayuu jeé cuatáhu i táca jéé tají rí, te ruhū jetáhu i. Te ñayuu jetáhu rúhū, suni jétáhu i Yaá ní tají rúhū véji ri, achí yá.

*Jeé ní cachi yá jeé nastúu Judas yá*

(Mt. 26.20-25; Mr. 14.17-21; Lc. 22.21-23)

<sup>21</sup> Te ná ni cahān Jesús táca jñuhun yáha, te ni cucuíhyá ndasí ni yá. Te ní cahān cají yá:

Jendaá cahán rí jíní rō jijnáhan rō jéé ñn máá rō nastúu ruhū, achí yá.

<sup>22</sup> Yúcuán na te tēe cáscuáha jíní yá, ní candacáo de nuú jnāhan de, cájeni ní de ndé ñn de cúu jeé ní cahān yá. <sup>23</sup> Te ñn máá tēe scuáha jeé maní gá yá jíní, néne de xiin ya mesa jeé cáxúni de jíní yá. <sup>24</sup> Te ní sáha Simón Pedro seña nuú de jeé na cájnūhún de ya ndé ñn de cúu jeé ní cahān yá. <sup>25</sup> Yúcuán na te tēe un ní scáyi de máá de nuú Jesús, te ní cajñūhún de ya:

¿Ndé ñn de cúu? áchí de jíní yá.

<sup>26</sup> Te ni cahān Jesús:

Na chúndaji rí staa te cuáha rí nuú ñn de, te suu tēe un cúu, áchí yá.

Te ní chundaji ya staa, te ní jēhe ya nuú Judas Iscariote sēhe Simón. <sup>27</sup> Te jeé ní quihín de staa ún, te ní quívi-ni Satanás ini anuá de. Yúcuán na te ní cahān Jesús jíní de: Jniñu jeé sáha rō, na sáha yachí rō.

<sup>28</sup> Te ní ñn tēe cáyeji staa jíní yá, tu ní cájecūhun ni de naun ní cahān yá súcuan jíní de. <sup>29</sup> Chí sava de cájeni ní de jeé ní cahān Jesús jíní Judas jeé cájan de jéé jíní ñúhún yá vico ún, chí jéé cuáha de jecu xūhun núu ñayuu ndahú. Chí máá de ndiso yijni xūhún. <sup>30</sup> Te jeé ní yeji de staa ún, te ní quenda-ni de cuahān de. Te je ni cuaa.

*Jeé ní ndacu ya jniñu jéé*

<sup>31</sup> Yúcuán na te jeé cuahán Judas te ní cahān Jesús:

Vjna te ruhū, Yaá ní nduu tēe, stéén rí ndese cújéhu rí, te suni jíní rúhū te cuní ñayuu ndese cújéhu Yaá Dios. <sup>32</sup> Te núu jíní rúhū cuní ñayuu ndese cújéhu Yaá Dios, núu súcuan te suni stéén Yaá Dios ndese cújéhu ruhū jeé cúu rí Sēhe ya. Te yachí-ni stéén yá. <sup>33</sup> Sēhé, tuá nahān condee rí jíní rō jijnáhan rō. Te nanducú rō ruhū, te nájñuhun ní cahān rí jíní táca jnāhan yó hebreo, suni súcuan cahán rí jíní rō vjna, jeé ma cúu jinúcoo rō núu quihín rí. <sup>34</sup> Te vjna te ndácu rí ñn jniñu jéé núu rō, jeé na cundáhu ní rō jnāhan rō. Nájñuhun cundáhu ní rí rohó, suni súcuan na cundáhu ní rō jnāhan rō. <sup>35</sup> Te núu cundáhu ní rō jnāhan rō, súcuan te cuní táca ñayuu jeé cácuu rō tēe cáscuáha jíní rí, achí yá.

*Jeé ní cachi yá jeé yūhu Pedro cahān de jeé jini de ya*

(Mt. 26.31-35; Mr. 14.27-31; Lc. 22.31-34)

<sup>36</sup> Te ni cahān Simón Pedro jíní yá:

¿Ndé nuú quihín ní núu súcuan?



Te ni cahān Jesús:

Nuū quihín rī chi ma cúu condiquin rō ruhū vijna, te cúcuéé gá te jinū rō.

<sup>37</sup> Te ni cahān Pedro:

¿Najehē ma cúu condiquin na níhín vijna? Tu yuhú ná cuu na jéé siquí ní.

<sup>38</sup> Te ni cahān Jesús:

¿A jéni ni rō jeē tu yuhú ró cuu rō jeē siquí rī? Jendaá cahán rī jín rō jeē nde ná tu cana líhli, te uní jínu yuhu ró te cahān rō jeē tu jíní rō ruhū. Achí yá.

*Jesús cúu ichi jeē jinú yō nuū Tatá yá*

## 14

<sup>1</sup> Te ni cahān gā yá:

Ma cuculhyá ni rō siquí tāca jnūndóho. Na cándije ró jéé sāha Yaā Dios jehē rō, te suni na cándije ró jéé sāha ri jehē rō. <sup>2</sup> Chi nuū ndeé Tátá rī, iyó cuéhē vehe condee rō jijnáhan rō. Te núu jeē tu súcuan iyó, te je ni castūhun rī nuū rō nuū. Núu súcuan te quihín rī quisátuhva ri nuū cóyūcu rō. <sup>3</sup> Te jeē quihín rī sātúhva ri nuū cóyūcu ró, te ndiji ri quinaquihin ri rohó quihín yō, návaha suni cóyūcu ró nuū cóndee máá rī. <sup>4</sup> Te je cájini rō ndé nuū quihín rī, te cájini rō ndese jinū rō yūcuán. Achí yá.

<sup>5</sup> Te ni cahān Tomás jín yá:

Tu cájini na ndé nuū quihín ni, ¿te ndese cuni ná ichi jínú yūcuan níu súcuan?

<sup>6</sup> Te ni cahān Jesús jín de:

Máá rí cúu ichi jinū rō andiví, te máá rí cúu jnūhun ndaā jín jnūhun cotecu rō ní cáni. Te ni in ma jinú nuū Tatá rī te núu tú ruhū. <sup>7</sup> Te nuū je ni cajini rō ruhū, te suni je ni cajini rō Tatá rī núu súcuan. Te ndé vijna je cájini rō yá, chi je ni cajito ró nuū rī, achí yá.

<sup>8</sup> Te ni cahān Felipe jín yá:

Stéén ni Tátá ni núu ná, te na cúvaha ni na jijnáhan ná, áchí de.

<sup>9</sup> Te ni cahān Jesús:

Felipe, je ni cuu cuehē quiví jica ri jín rō jijnáhan rō, ¿te á ná tu cuni rō ndé in cúu ri naun? Tēe jeē jito ruhū, suu Tátá rī jito de. Núu súcuan ¿te najehē cahán rō jeē steén rī Tatá rī nuū rō? <sup>10</sup> ¿A tu cándije ró jéé in-ni cúu ri jín Tatá rī, te Tátá rī in-ni cúu ya jín rī? Tāca jnūhun cáhán rī jín rō, nasūu jnūhun máá rí cúu. Chi Tátá rī jeē in-ni cúu ya jín rī, máá yá sāha tācá jniñu jeē sāha rī. <sup>11</sup> Candije ró jijnáhan rō jéé in-ni cúu ri jín máá Tátá rī, te Tátá rī in-ni cúu ya jín rī. Te núu tu cájēcūhun ni rō, te cándije ró ruhū siquí tācá jniñu sāha rī. <sup>12</sup> Jendaá cahán rī jín rō, núu ndé ñayuu candije ruhū, jniñu jéhu jeē sāha ri yáhá, suni sāha i. Te jéhu ga jniñu sāha i vésú yáhá, chi quinhun rī nuū ndeé Tátá rī. <sup>13</sup> Te tācá na-ni vé cacán rō nuū Tatá rī siquí jeē cándije ró jéé cúu ri Sēhe ya, te sāha ri jeē cacán rō, te súcuan steén rī jeē yóhyo

cújéhu Tátá rī. <sup>14</sup> Chi tācá na-ni vé cacán rō siquí jeē cándije ró ruhū, te sāha nahín rī.

*Jeē ni jéñuhun ya jeē tají yá Espiritu Santo*

<sup>15</sup> Te núu maní rō jín rī jijnáhan rō, te na squícu ró jniñu ndácu ri nuū rō. <sup>16</sup> Te cacán tahú rī nuū Tatá rī, te tají yá inga Yaā chindéé ñáhán rohó, te sāha ya jeē cóo sī ni rō jijnáhan rō. Te Yaā un cúu máá Espiritu jeē steén jnūhun ndaā, te condee yá jín rō ní cáni. <sup>17</sup> Te ñayuu ñayiví má cúu cuatáhú i ya, chi tu cúu coto i nuū yá, ni tu cúu cuni i ndese Yaā cúu ya. Te máá rō chi je cájini rō ndese Yaā cúu ya, chi ndeé yá jín rō, te condee yá iní anuá rō ní cáni. <sup>18</sup> Ma stóo un ri rohó, chi ndiji ri nuū rō. <sup>19</sup> Jecu na quiví te ma cóto ga ñayuu ñayiví núu rī. Te máá rō jijnáhan rō chi coto ró núu rī, chi cotecu rī ní cáni, te jeē yúcuau suni cotecu máá rō. <sup>20</sup> Te quiví un te cuni rō jeē in-ni cúu ri jín Tatá rī, te máá rō in-ni cúu ró jín rī jeē ndeé rí iní anuá rō jijnáhan rō. <sup>21</sup> Te na-ni ñayuu núu ñūhun ni i jniñu ní ndacu ri, te squícu i, ñayuu un cúu jeē maní ndije jín rī. Te ñayuu jeē maní jín rī, suni coo maní Tatá rī jín rī. Te suni ruhū coo maní rī jín i, te steén rī nuū i jeē nduú rí jín i. Achí yá.

<sup>22</sup> Te ni cahān Judas jín yá (te nasūu téé cúu Iscariote):

Najehé cúu jeē steén ni máá ní nuū ná, te nuū ñayuu ñayiví chi tuú?

<sup>23</sup> Te ni cahān Jesús:

Ñayuu jeē maní jín rī, chi cásquicu i jeē cahán rī. Te coo maní Tatá rī jín i. Te Tátá rī jín máá rí quijicoo ri cundúu rí jín i. <sup>24</sup> Te ñayuu jeē tú maní jín rī, tu cásquicu i jeē cahán rī. Te jnūhun cájini sōho ró cáhán rī, nasūu jnūhun máá rí cúu, chi jnūhun máá Tátá rī jeē ní tají ruhū cúu.

<sup>25</sup> Tāca jnūhun yáha cáhán rī jín rō ní níne ga rī jín rō. <sup>26</sup> Te Tátá rī chi tají yá Espiritu Santo, quiji nucuiñi nuū rī. Te máá yá chindéé ñáhán yá rohó, te sāha ya jeē cóo sī ni rō. Te steén yá tāca jnūhun nuū rō, te nacachi tucu ya tāca jéé ni cahán rī jín rō.

<sup>27</sup> Te jeē quihín rī, te sāha ri jeē cóo ndeyí coo sī ni rō. Nájñuhun iyó ndeyí sī ni máá rí, suni súcuan coo ndeyí sī ni rō sāha rī. Te jeē sāha ri jeē cóo ndeyí sī ni rō, tu quijnáhan jín jnūhun ndeyí cáhán ñayuu ñayiví. Ma cuculhyá ni rō siquí tāca jnūndóho, te ni ma yuhu ró. <sup>28</sup> Je ni cajini sōho ró jéé ni cáhán rī jeē quihín rī, te ndiji ri cundúu rí jín rō. Te núu cáhíyo maní vaha ró jín rī, te cusí ni rō jeē ni cáhán rī jeē nuhún rī nuū Tatá rī. Chi cújéhu ga Tatá rí vijna vésú ruhū. <sup>29</sup> Je ni castūhun rí nuū rō tāca jnūhun yáha nde ná tu coo, návaha núu je ni cuu, te cándije ró ruhū jijnáhan rō.

<sup>30</sup> Ma cahán rī cuehē gā jnūhun jín rō, chi je vėjí jexeén jeē ndácu jniñu iní ñayiví yáha. Te tú na vé cúu sāha siquí rí nuú. <sup>31</sup> Te na

cóo nájñuhun ni ndacu Tátá rí jñiñu nuú rí, náváha cuni ñayuu ñayivi jéé maní rí jín Tátá rí, te sáha ri jñiñu ní ndacu ya. Ndocuifí jijnáhan ró na quíngoo yó. Achí yá.

*Jesús cúu nájñuhun yoyúcu uva*

## 15

<sup>1</sup> Maa rí cúu nájñuhun yoyúcu uva váha ndaa, te Tátá rí cúu nájñuhun tēe ndito yoyúcu uva un. <sup>2</sup> Te maa ró chi cácuu ró nájñuhun ndaha, te núu tu jéhe ró ndehē te quende yá rohó. Te núu cácuu ró nájñuhun ndaha jéé jéhe ndehē, te nasándooy ya cacahnde yá rohó nájñuhun jéé cúu ró ndaha ún, náváha cuáha ró cuéhē gā ndehē. <sup>3</sup> Te maa ró chi je ni candundoo ánuá ró jín jñuhun ni steén rí nuú rō, nájñuhun ndúndoo ndaha uva. <sup>4</sup> Na cundúu ró jín rí, te suni maa rí cundúu rí jín rí. ñin ndaha uva ma cúu cuáha ndehē jéé maa, te núu tu yjññi jicá yóho. Te suni súcuan maa ró, ma cúu sáha ró jñiñu váha te núu tu cundúu ró jín rí.

<sup>5</sup> Maa rí cúu yoyúcu un, te maa ró cácuu ndaha rí. Ñayuu jéé nduú jín rí, te ruhú ndúu rí jín i, maa i cúu nájñuhun ndaha jéé jéhe cuéhē ndehē. Chi núu tú cundúu ró jín rí, te tú cuiti na jñiñu váha cuu sáha ró.

<sup>6</sup> Ñayuu jéé tu cundúu jín rí, quende yá i nájñuhun ñin ndaha uva, te ichí. Te ndoho i nájñuhun ndaha uva un jéé ndutútú te cayú nuú ñuhún.

<sup>7</sup> Núu ndúu ró jín rí, te cañuhun ni ró jñuhun cáhán rí, yúcuán na te cacán ró na-ní vé cácuu ró, te sáha ri jéé cacahán rō. <sup>8</sup> Te núu cásaáha ró cuéhē jñiñu váha, súcuan cástéén ró jéé cúu ndije ró ñayuu cascuáha jín rí, te súcuan nácuu ñayuu jéé yóhoo cújéhu Tátá rí. <sup>9</sup> Nájñuhun maní Tátá rí jín rí, suni súcuan maní rí jín ró jijnáhan ró. Núu súcuan te ma siaá ró jñuhun maní rí jín ró. <sup>10</sup> Núu squícu ró jñiñu ní ndacu rí nuú rō, te níni coo maní rí jín ró, nájñuhun maa rí squícu rí jñiñu ní ndacu Tátá rí nuú rí, te níni iyó máni yá jín rí.

<sup>11</sup> Súcuan ni cahán rí jín ró náváha coo sñi ni ró nájñuhun iyó sñi ní rí, chi nde cusñi teyí ní ró. <sup>12</sup> Te yáha cúu jñiñu ndácu rí nuú ró jijnáhan ró: jéé na cundáhu ní ró jñáhan ró nájñuhun cundáhu ní rí rohó. <sup>13</sup> Núu ñin tēe cuu de jehē amigo de, te tuá na vé cúmani gā sáha de jéé cundáhu ní de amigo de. <sup>14</sup> Te maa ró cácuu amigo rí núu squícu ró jñiñu ndácu rí nuú rō. <sup>15</sup> Ma cahán gā rí mozo jín ró, chi ñin mozo tu cástühún patrón nuú i ndese jéni ni de sáha de. Chi sa suhva amigo cahán rí jín ró, chi je ni castühun rí nuú ró táca jñuhun ni cahán Tátá rí jín rí. <sup>16</sup> Maa rí ni nacáji rohó jéé jnáma rí rohó, te nasúu maa ró ní cáncani ni xihna gā jéé cóndiquín ró ruhú. Te ni jeni rí rohó jéé caca ndaa ró te scándije ró cuéhē ñayuu jéé cuu i sēhe rí ní

cáni. Te súcuan te ndáhi jéé cacán ró nuú Tátá rí squícu jéé cácuu rí rohó, sáha ya jéé jicán ró. <sup>17</sup> Te yáha cúu jñiñu ndácu rí nuú ró: jéé na cundáhu ní ró jñáhan ró.

*Jéé cácuu ní ñayuu ñayivi núu Jesús jín núu ñayuu cácuu*

<sup>18</sup> Te núu cácuu ní ñayuu ñayivi núu ró jijnáhan ró, te je cájini ró jéé xihna gā nuú maa rí ni caquiti ní i. <sup>19</sup> Te núu jéé iyó gá ró jín modo ñayuu ñayivi, te coo maní ñayuu ñayivi jín ró nuú, nájñuhun maní i jín jñáhan i. Te ni nacáji rí rohó jéé tuá coo ró jín modo ñayuu ñayivi. Te jéé yúcuan cácuu ní i nuú ró, chí tuá cácuu ró cuenta ñayivi. <sup>20</sup> Nucúhun ni ró jñuhun ni cahán rí jín ró: Núu tu iyó yñíñuhun ñayuu nuú patrón, te naga ni cuu nuú mozo de. Núu ni cajito xeén i ruhú, te suni súcuan coto xeén i rohó jéé cácuu ró mozo rí. Te núu jéé ní cájetáhu i jñuhun ni steén rí, te suni cuatáhu i jñuhun cástéén ró. <sup>21</sup> Te táca jñiñu yáha sáha i jín ró jéé squícu ruhú, chí tu cájini i Yaa ní tají ruhú véji rí.

<sup>22</sup> Núu jéé tu ní quíji rí nacani rí jñuhun nuú i, te ma cóo cuéchi i núu. Te vijna chí ma cúu ga cahán i jéé tu jín i jéé iyó cuéchi i.

<sup>23</sup> Ñayuu jéé cácuu ní nuú rí, suni nuú Tátá rí cácuu ní i. <sup>24</sup> Núu jéé tu ní sáha rí jñiñu jéhu nuú i jéé ní ñin tēe tu ní sáha de súcuan, te ma cóo cuéchi i núu. Te vijna je ni cajito i jñiñu ún, te vésú súcuan te cácuu ní i nuú rí jín núu Tátá rí. <sup>25</sup> Te súcuan cásaáha i náváha squícu jñuhun yósó núu tútu ley Yaa Dios jéé cáneváha i: Ni caquiti ní i nuú rí, vésú tú na cuéchi rí, achí.

<sup>26</sup> Te tají rí maa Yaa chindéé ñáhan róhó te sáha ya jéé cóo sñi ní ró. Te Yaa un cúu maa Espiritu jéé steén jñuhun ndaa, te quíji ya nde nuú Tátá rí, te nacani cáji yá jñuhun rí. <sup>27</sup> Te suni maa ró nacani ró jñuhun rí, chí je cáhín ró jín rí nde ná ní quejéé rí nacani rí jñuhun.

## 16

<sup>1</sup> Táca jñuhun yáha ní cahán rí jín ró náváha ma náyūhu ró jéé quíji jñúndóho. <sup>2</sup> Chi quenehen i róhó jéé ma cuáha ga i jñuhun cone ró táca vehe ñi sinagoga. Te quee quiví jéé cahni i róhó, te cani ní i jéé ñin jñiñu váha ní sáha i nuú Yaa Dios. <sup>3</sup> Te súcuan sáha i jín ró, chí tu cájini cuiti i maa Tátá rí ní maa rí. <sup>4</sup> Te ni cahán rí jñuhun yáha jín ró náváha núu je ni quee quiví jéé súcuan coo, te nucúhun ni ró jéé jé ní cahán rí jín ró.

*Jñiñu sáha Espiritu Santo*

<sup>5</sup> Te ní cahán rí jñuhun yáha jín ró nde xihna ñuhún, chí ñe maa rí jín ró jijnáhan ró. <sup>6</sup> Te vijna chí nuhún rí condee rí jín Yaa ní tají ruhú véji rí. Te ni ñin ró tu cájñuhun ró ndé nuú quihún rí. <sup>7</sup> Chi maa jéé cácuuñhyá ndasí ní ró jéé ní cahán rí súcuan jín ró. <sup>8</sup> Jendaá cahán rí jín ró: Jéé váha maa ró

jijnáhan ró cúu jeē quihín rī. Chi núu tú quihín rī, te ma quiji Yaā chindéé ñáhan róhó te sáha ya jeē cóo sīi ni rō. Te núu cuahān rī, te tají rī yā quiji ya nuū rō. <sup>8</sup> Te jeē quée yā, te stéén yā nuū ñayuu ñayivi jée iyó cuéchi i, jín ndese quívicoo i ichi ndaā, jín jée sándaā Yaā Dios siquī cuéchi i. <sup>9</sup> Stéén yā jeē iyó cuéchi i, chi tu cácanđe i ruhū. <sup>10</sup> Te stéén yā siquī ichi ndaā, chi máá rī nuhūn rī nuū Tatá rī, te ma cóto ga rō nuū rī. <sup>11</sup> Te stéén yā siquī jeē sándaā Yaā Dios cuéchi ñayuu, chi je ni cundaā jeē jnahnú ndetū máá jéxeén jeē cujéhu ini ñayivi yáha.

<sup>12</sup> Te iyó cuéhē gā jñūhun cúní rī cahān rī jín ró, te ma cúu jecūhun ni rō vijna. <sup>13</sup> Te jeē quée máá Espiritu jeē stéén jñūhun ndaā, te máá yā stéén táca jñūhun ndaā un núu rō. Chi ma cahān yā jeē máá yā, chi cahān yā táca jée jíní sōho ya cahān Yaā Dios. Te stéén yā siquī táca jñūhu jeē coo. <sup>14</sup> Te stéén yā jeē cujéhu rī, chi nacastūhun yā nuū rō táca jñūhun jeē jé ni cahān rī, te sáha ya jeē jécūhun ni rō. <sup>15</sup> Ndihi ndese cújéhu Tatá rī, suni súcuan cújéhu máá rī. Jeē yúcuan ní cahān rī jeē Espiritu Santo nacastūhun yā nuū rō táca jñūhun jeē jé ni cahān rī, te sáha ya jeē jécūhun ni rō jijnáhan ró.

#### *Vēsú cácuulhyá ni rō, te ndusī ni rō*

<sup>16</sup> Jecu na te ma cóto ga rō nuū rī. Te jecu tucu quivī te coto tucu ró núu rī, chi quínuhun rī nuū ndeé Tatá rī. Achí yá.

<sup>17</sup> Yúcuan na te sava tēe cácuáha jín yá, ni cacajnūhun jñahan de:

¿Na jñūhun cúu jeē yáha jeē cahān yā jín yó? Chi achí yá jeē jecu na te ma cóto ga yó nuū yā, te jecu tucu quivī te coto tucu yó núu yá, chi siquī jeē quínuhun ya nuū ndeé Tatá yā. <sup>18</sup> ¿Na jñūhun cúu jeē yáha jeē cahān yā, jecu na? Tu cájécūhun ni yó na vé cúu jeē cahān yā. Achí de.

<sup>19</sup> Te ni jíní Jesús jeē cáconi de cajnúhún de ya. Te ni cahān yā jín de:

¿A cácajnūhun jñahan ró na vé cúu jeē ni cahān rī jín ró jeē jecu na te ma cóto ga rō nuū rī, te jecu tucu quivī te coto tucu ró núu rī? <sup>20</sup> Jendaá cahān rī jín ró jeē ndahyū rō jijnáhan ró te cucuíhyá ni rō, te ñayuu ñayivi chi sa cusī ni i. Te vēsú cucuíhyá ni rō, te sa ndusī ni rō jeē cóto tucu ró núu rī. <sup>21</sup> In ñahan núu cuacuyajni scácu ña, te jéhnde chíji ña, chi je ni quee hora jeē scácu ña. Te núu je ni scácu ña sūchi lúlí, te tuá nahān ña jeē ní ndoho ña, chi cusī ni ña jeē ní cacu sēhe ña. <sup>22</sup> Te suni súcuan cúu jeē cándoho ró vijna, chi cácuulhyá ni rō jín rī. Te jecu-ni quivī te coto jñahan tucu yó, te cusī ndasí ni rō. Te ni in ma cúu casi jeē jéxéén ni rō.

<sup>23</sup> Te quivī ún chi tú na vé cacān gā rō nuū rī. Chi jendaá cahān rī jín ró jeē nuū máá Tatá rī cacān rō, te sáha ya ndihi jeē cájicān

rō, siquī jeē cácanđe ró rúhū. <sup>24</sup> Nde vijna te ná tu cacān rō nuū Tatá rī jeē jín síhvi rī. Te vijna te na quéjéé ró cacān rō jín síhvi rī, te nihín rō, náváha cusī ndasí ni rō.

#### *Je ni quende yā poder ndihi jeneé cáhiyo ini ñayivi*

<sup>25</sup> Táca jñūhun yáha ní cahān yatá rī jín ró. Te quee quivī jeē ma cahān yatá gá rī jín ró, chi sa suhva castūhun cáji rī nuū rō siquī Tatá rī. <sup>26</sup> Te quivī ún chi cacān rō nuū Tatá rī siquī jeē cácanđe ró rúhū. Te tu cahān rī jín ró jeē cacān tahú rī jehe rō nuū Tatá rī. <sup>27</sup> Chi máá Tatá rī je cundáhú ni yā rohó siquī jeē cáhiyo maní rō jín rī, te ni cacandje ró jée ndé nuū máá yā véji rī. <sup>28</sup> Ni quenda ri nde nuū Tatá rī, te ni quee rī ini ñayivi. Te vijna te quenda rī ini ñayivi, te nuhūn tucu rī nuū Tatá rī. Achí yá.

<sup>29</sup> Te ni cacāhān tēe cácuáha jín yá:

Vijna te cahān caji ní, te tuá cahān yatá ní.

<sup>30</sup> Vijna te cájini na jée jíní ni ndivii cuiti, te tuá jíní nūhún jée cájnūhún ni in ná nihín. Jeē yúcuan cácanđe ná jée véji ní ndé nuū Yaā Dios. Achí de.

<sup>31</sup> Te ni cahān Jesús jín de:

¿A ndé vijna te cácanđe ró naún? <sup>32</sup> Te quiji quivī, te je ni quee, jeē cuité núu ró quínungoo ró ná vehe ná vehe rō, te stóo máñúhún ró ruhū. Te nasūu jée quéndóo máñúhún rī, chi Tatá rī ine ya jín rī. <sup>33</sup> Táca jñūhun yáha ní cahān rī jín ró náváha coo ndeyí coo sīi ni rō siquī jeē cácanđe ró rúhū. Ini ñayivi chi cánuú coto ró jnúndóho. Te vēsú súcuan te na cóo sīi ni rō, chi je ni quende rī poder táca jeneé cáhiyo ini ñayivi. Achí yá.

#### *Jeé ni jicān tahú Jesús jehē ñayuu cácanđe*

## 17

<sup>1</sup> Te ná ni cahān Jesús táca jñūhun yáha, te ni ndacoto ya ichi ándiví, te ni cahān yā:

Tatá, je ni quee quivī jeē ndóho ná. Vijna te stéén ní jée cujéhu máá ná jeé cúu ná Sēhe ní, náváha suni máá ná stéén na jée cujéhu máá ní. <sup>2</sup> Chi ní sáha ní jée ndéso jñūhu ná siquī táca ñayuu, náváha táca ñayuu jeē ní jéhe ní núu ná, cotecu i níf cáni sáha ná. <sup>3</sup> Te suhva cúu jñūhun cotecu i níf cáni: suu jeé na cúní i nihín jée mañúhún-ni ní cúu Yaā ndaā, jín jée cúní i sáñá jeé cúu ná Jesucristo, Yaā ní tají ní.

<sup>4</sup> Je ni stéén na núu ñayuu ñayivi jée cujéhu ní, te je sinu ná jñūhu ní ndacu ní núu ná. <sup>5</sup> Te vijna, Tatá, sáha ní jée ndujéhu tucu ná ndé nuū néne ní, nájñūhun cújéhu ná jín ní nde ná tu jecóo ñayivi.

<sup>6</sup> Ñayuu jeé ní nacáji ní ini ñayivi, ni jéhe ní i nuū ná, te ni stéén na núu i ndese Yaā cúu ní. Cuenta máá ní cúu i, te ni jéhe ní i nuū ná. Te ni cajetáhú i jñūhun ní, te ni casquíc i. <sup>7</sup> Te vijna te cájini i jeé ndé nuū máá ní véji

tāca jēē iyó jíin ná. <sup>8</sup> Chi tāca jnúhun ni cahān ni jíin ná, ní castúhun ná núu i, te ni cajetáhu i. Te ni cajini i jeē ní quenda ndije ná ndé nuū maá ní, te ni cacandíje i jeē maá ní ni tají sáña.

<sup>9</sup> Te jícan tahu na jéhē maá i jíjnáhan i. Tu jícan tahu na jéhē ñayuu ñayívi jēē tu cácan díje, chí sa jehē maá ñayuu ni jéhe ni núu ná, chí cuenta maá ní cácuu i. <sup>10</sup> Te tācá i jeē yíhi i ndaha maá ná, suni cuenta maá ní cúu. Te tācá i jeē cúu i cuenta maá ní, suni cuenta maá ná cúu i. Te cástéén i ndese cújéhu ná.

<sup>11</sup> Te tuá condee ná ini ñayívi. Te maá i chí quendōo i ini ñayívi, te maá ná chí najeē ná condee na jíin ní. Yaá ñi Yaá ndoo cúu ní, Tátá. Te jíin poder ní condito ní tāca ñayuu ni jéhe ni núu ná, návaha inuú na cóo ni i jíjnáhan i, nájñuhun cúu maá yó. <sup>12</sup> Te jeē ní condee na jíin i ini ñayívi, te jíin poder ni ní condito ná i. Tāca ñayuu ni jéhe ni núu ná, ni condito yúcún ná i. Te tu ní jéhe na jnúhun naa i jíjnáhan i, chí maá ñi-ni tēe jeē je cúu de tēe jnahñū ndetū, návaha squícu jnúhun yósó núu tútu ñi.

<sup>13</sup> Te vijna te najeē na núu ní, te cáhán na tāca jnúhun yáha jíin i níni jēē íne ga ná ini ñayívi, návaha na cóo sñi ndasí ni i nájñuhun cúsu ni maá ná. <sup>14</sup> Ni castúhun ná jnúhun ní núu i. Te ni caquití ni ñayuu ñayívi núu i, chí tuá cácuu i cuenta ñayívi, nájñuhun maá ná tu cúu ná cuenta ñayívi. <sup>15</sup> Te tu jícan tahu na jēē quénehen ní i ini ñayívi, chí sa suhva jēē cóndito ní i nuū jexeén. <sup>16</sup> Nasūu cuenta ñayívi cácuu i, nájñuhun maá ná jēē násūu cuenta ñayívi cúu ná. <sup>17</sup> Jíin jnúhun ndaá ní te sáha ní jēē coo ndoo coo ñi i nuū ní. Tāca jnúhun cáhán maá ní cúu jnúhun ndaá. <sup>18</sup> Te nájñuhun ni tají ní sáña ní quiiji ná ini ñayívi, suni súcuu tají ná i nacani i jnúhun ní núu ñayuu ñayívi. <sup>19</sup> Te jehē maá i cúu jeē jéhe ná maá ná cuu ná, návaha suni maá i coo ndoo coo ñi i nuū ní jēē jíin jnúhun ndaá.

<sup>20</sup> Te nasūu maá ñi-ni jehē ñayuu yáha jícan tahu na, chí suni jehē tāca gá ñayuu jēē candíje i sáña núu na cúni sōho i jnúhun jēē nácani maá i jíjnáhan i. <sup>21</sup> Te jícan tahu na jēē inuú na cóo ni i jíjnáhan i. Nájñuhun ñi-ni cúu ní jíin ná, Tátá, te ñi-ni cúu ná jíin maá ní, suni súcuu na cóo inuú i jíin yó. Te cúni na jēē inuú na cóo ni i, návaha na cándíje ñayuu ñayívi jēē maá ní ni tají ní sáña. <sup>22</sup> Ni sajhéhu ná i nájñuhun ni sajhéhu ní sáña, návaha inuú na cóo ni i, nájñuhun inuú-ni cúu yó. <sup>23</sup> Te ndúú ná jíin i, te ndúú ní jíin ná, te súcuu te inuú cuiti coo ni i jíjnáhan i. Yúcuán na te cuni ñayuu ñayívi jēē maá ní ni tají ní sáña, jíin jēē maní ndasí ní jíin i nájñuhun maní ni jíin ná.

<sup>24</sup> Tátá, maá ní ni jéhe ní i nuū ná. Te cúni na jēē cóyúcu i jíin ná nuū cóndee ná, návaha coto i ndese luu cújéhu ná ni sáha ní. Chí iyó

maní ndasí ní jíin ná nde ná tu jecōo ñayívi te nde vijna. <sup>25</sup> Yaá ndaá cúu ní, Tátá, te ñayuu ñayívi tu jíin i níhín, te maá ná chí jíin na níhín. Te ñayuu yáha chí cájini i jeē maá ní ni tají sáña. <sup>26</sup> Ni steén na núu i jíjnáhan i ndese Yaá cúu ní. Te steén gā na súcuu nuū i, návaha na cóo maní ndasí i jíin jnúhan i, nájñuhun iyó maní ndasí ní jíin ná, te návaha condee ná ini anuá i. Achí yá.

*Jeē ní cajñi de Jesús*

*(Mt. 26.47-56; Mr. 14.43-50; Lc. 22.47-53)*

## 18

<sup>1</sup> Te nuū ní cuu ni cahān Jesús tāca jnúhun yáha, te ni quenda ya jíin tēe cáscuáha jíin yá, cuahān yā inga lado yuu Cedrón. Te yūcuu ñi-yó ñi huerto nuū ní quívi ya jíin tēe cáscuáha jíin yá. <sup>2</sup> Te Judas, tēe jeē nastúu de ya, suni jíin de lugar un, chí cuehē jíin ni nataca Jesús yūcuu jíin tēe cáscuáha jíin yá. <sup>3</sup> Te ni jíin de yūcuu jíin ñi grupo soldado jíin jecu policía cándito templo, jēē ní catají sutū cácujehu jíin tēe grupo fariseo. Te cándiso de machete, te cájñi de linterna jíin yiti. <sup>4</sup> Te Jesús je jíin yá tāca jnúndóho jēē véji siquí yá. Te ni quenda ya ichi núu de, te ni cahān yá:

¿Ndé ñi cánanducú ró?

<sup>5</sup> Te ni cacahān de jíin yá:

Jesús tēe ñuu Nazaret cánanducú rí.

Te ni cahān yá:

Maá rí cúu.

Te Judas, tēe jeē nastúu de ya, suni íne de jíin tēe ún. <sup>6</sup> Te jeē súcuu ni cahān yá, maá rí cúu, te ni cajica yátá de, te ni cacotúu-ni de.

<sup>7</sup> Yúcuán na te ni cajñuhún tucu ya de:

¿Ndé ñi cánanducú ró?

Te ni cacahān de:

Jesús tēe ñuu Nazaret.

<sup>8</sup> Te ni cahān Jesús:

Je ni cachi rí jeē maá rí cúu. Te núu ruhū cánanducú ró, te maá-ni rí jñi ró, te tēe yáha na quíngoo de. Achí yá.

<sup>9</sup> Súcuu ni cuu návaha na squícu jnúhun jēē ní cahān yá jíin Tátá yá: Tu ní jéhe na jnúhun naa ni ñi tēe jeē ní jéhe ni núu na, achí yá. <sup>10</sup> Te Simón Pedro ndiso de ñi espada. Te ni tava de, te ni jehnde de sōho lado váha ñi tēe nání Malco. Te tēe un cúu de mozo maá sūtū cújéhu. <sup>11</sup> Te ni cahān Jesús jíin Pedro:

Nachuváha espada rō ini cubierta. ¿A tu cánuú jēē ndóho rí jnúndóho yáha jēē ní sándaá Tátá rí jēē ndóho rí? Achí yá.

*Jeē ní indichi Jesús nuū sutū cújéhu*

*(Mt. 26.57-58; Mr. 14.53-54; Lc. 22.54)*

<sup>12</sup> Yúcuán na te tācá soldado un, jíin capitán de, jíin tāca policía tēe hebreo un, ni cajñi de Jesús, te ni cajihni de ya. <sup>13</sup> Te xihna gā vehe Anás cuangoo de jíin yá. Te tátá chíso Caifás cúu Anás. Te Caifás cúu maá sūtū cújéhu ga cuiyá ún. <sup>14</sup> Te suu de ni

cachi nuū jnāhan de hebreo jeē cānuū jéē cūū ñn tēe jehē nación de.

*Jeē ní cachi Pedro jeē tu jíní de ya*  
(Mt. 26.69-70; Mr. 14.66-68; Lc. 22.55-57)

15 Te Simón Pedro jín inga tēe scuáha, cándiquín de Jesús cuangoo de yatā yā. Te inga tēe scuáha ùn chí jíní jnāhan de jín sūtū cujéhnū. Jeē yúcuan ní quívi de jín Jesús ini patio vehe sūtū cujéhnū ún. 16 Te Pedro ni quendōo de yatā yehyí. Te máá tēe scuáha jéē jíní jnāhan jín sūtū cujéhnū ún, ni quenda de ni cahān de jín ñahan ndító yehyí, te ni squívi de Pedro ini patio. 17 Yūcuán na te ñahan ndító yehyí un ní cajnúhún ña Pedro:

¿A násūū ñn tēe scuáha jín tēe índichi nuū sūtū un cūū ró?

Te ni cahān de:

Nasūu cūu ri, achí de.

18 Te tāca mozo jín policia un ní cascáyú de ñuhún jín tícayi, chí mijin sāha. Te cáhūn de cánasaā de. Te suní índichi Pedro, násaā de jín tāca tēe ún.

*Jeē ní stíchí sūtū cujéhnū ún Jesús*  
(Mt. 26.59-66; Mr. 14.55-64; Lc. 22.66-71)

19 Te sūtū cujéhnū un ní stíchí de Jesús ndé-ní cūū tēe cáscuáha jín yā, jín na jnúhun cūū jeē steén yā. 20 Te ni cahān Jesús:

Níní ní cahān rī nuū chíti ñayuu, ni cajini sōho ndihi ñayuu. Te níní ní steén rī jnúhun ini tācá vehe ñi sinagoga jín ini templo cáhnu nuū ndutútú ndivii jnāhan yó hebreo. Te tú ni ñn jnúhun ní cáhán sáhi rí. 21 ¿Te naun cájnūhun ró ruhū? Cajnúhun ñayuu ní cajini sōho jnúhun ní cahān rī. Te máá i cachi ndese ni cahān rī. Chí cajini i ndese ni cahān rī.

22 Te jeē ní cahān Jesús súcuan, te ñn policia ndító templo jeē índichi de yūcuán, ní caní-ni de nuū yā. Te ni cahān de jín yā:

¿A súcuan cáhán rō jín sūtū cujéhnū naún?

23 Te ni cahān Jesús:

Núu ní cahān rī ñn jnúhun néé, cachi na jnúhun néé ní cahān rī. Te núu tu ní cáhán rī ñn jnúhun néé, ¿te naun cání ró ruhū? achí yā.

24 Yūcuán na te Anás, sūtū cujéhnū un, ní taji de ya, núhni yā cuahān yā nuū Caifás, tēe cūū máá sūtū cujéhnū ga.

*Jeē ní cachi tucu Pedro jeē tu jíní de ya*  
(Mt. 26.71-75; Mr. 14.69-72; Lc. 22.58-62)

25 Te níní jéē súcuan cūū, te índichi-ni Pedro, násaā de yuñúhún. Te ni cacahān jín de:

¿A násūū ñn tēe scuáha jín tēe un cūū ró, chí naún?

Te máá de tu ní cáchi de:

Nasūu cūu ri, achí de.

26 Yūcuán na te ñn mozo sūtū cujéhnū, jnāhan tēe jeē ní jehnde Pedro sōho, ni cahān jín de:

¿A násūu máá ró cūū jeē ní jito ri jín de ini huerto?

27 Te Pedro tu ní cáchi tucu de. Te ni cana-ni líhli.

*Jeē ní índichi Jesús nuū Pilato*  
(Mt. 27.1-2, 11-14; Mr. 15.1-5; Lc. 23.1-5)

28 Yūcuán na te ni quendacoo de jín Jesús vehe Caifás, cuangoo de jín yā nde palacio tēe nación Roma jeē cūū gobernador. Te je cuacundijin. Te ñayuu hebreo tu ni quívicoo i ini palacio, návaha tu stívi i ley i jeē cahán jeē ma quívi i ini vehe ñn ñayuu jeē násūū hebreo cūū. Chí núu súcuan te ma cūū cuxíní i víco pascua jeē cóo inga quívi ún. 29 Yūcuán na te ni quenda Pilato, tēe cūū gobernador, ni cahān de jín i jínjāhan i:

¿Na cuēchi cájicān rō síquí tēe yáha?

30 Te ni cacahān i:

Núu jeē násūu tēe cúnéé cūū tēe yáha, te ma jnái ná de jeē quíndeca ná de nuū ní núú, achí i.

31 Te ni cahān Pilato:

Cuángoo jínjāhan ró, te sándaā rō síquí de jín ley cánevāha máá ró.

Te ni cacahān ñayuu hebreo un:

Máá ná jeē cácuu ná ñayuu hebreo, tú na permiso cánevāha ná jéē cáhni ná ni ñn ñayuu.

32 Súcuan ni cacahān i návaha squícu jnúhun jeē ní cachi Jesús jeē quívi ya ndaha tēe Roma te cahni de ya jicā cruz. 33 Te ni ndívi Pilato ini palacio, te ni cana de jeē na quíji Jesús. Te ni cajnúhún de ya:

¿A máá ró cūū Rey ñayuu hebreo naún?

34 Te ni cahān Jesús jín de:

¿A cájnūhun ró ruhū jeē súcuan jéni ni máá ró, chí jéē ní castatūhun ñayuu hebreo nuū ró?

35 Te ni cahān Pilato:

¿Chí tēe hebreo cūu ri jeē cūni rí? Ñayuu nación máá ró jín sūtū cácujehnū ni cachihi rōhó ndaha rí. ¿Na vé ní sāha ró núu súcuan? Achí de.

36 Te ni cahān Jesús:

Nasūu jéē ndácu ri jniñu nájnūhun cándacu tāca rey ñayivi yáha. Chí núu jeē ñayuu ñayivi ní casáha jeē cūu ri rey, yūcuán na te tēe cándiquín ruhū, cuajnáhan de návaha ma quívi ri ndaha jnāhan ri hebreo nuū. Te nasūu núu ñayivi yáha cūu jeē ndácu ri jniñu vijna. Achí yā.

37 Yūcuán na te ni cahān Pilato jín yā:

¿Te á ñn rey cūu ró jéē súcuan?

Te ni cahān Jesús:

Rey cūu ri, nájnūhun cáhán rō. Ni quiji ri ni cacu ri ini ñayivi yáha návaha nacani ri jnúhun ndaa. Te ndihi ñayuu cájetáhu jnúhun ndaa, cajini nahín i jnúhun cáhán rí. Achí yā.

38 Te ni cahān Pilato:

¿Ndese cuni yō ndé ñn cūu máá jnúhun ndaa?

*Jeē ní cundaā jeē cūū yā*

(Mt. 27.15-31; Mr. 15.6-20; Lc. 23.13-25)

Te jeē ni cāhān de jnūhun yáha, te ni quenda tucu de nuū ñayuu hebreo. Te ni cāhān de jíin i:

Tú cuiti na cuēchi níhín rī siquī de. <sup>39</sup> Te iyó costumbre maá ró jijnáhan ró jée vico pascua te siaá rī ñin tēe ñe vecāa nuū rō. ¿Te á tu cáculi rō jeē siaá rī Rey rō nuū rō? Achí de.

<sup>40</sup> Yūcuán na te ndivii i ni cacana jee tucu i:

Ma siaá ni tēe jíinā, chí Barrabás siaá ni, achí i.

Te tēe cuihná cūu Barrabás.

## 19

<sup>1</sup> Yūcuán na te ni cāhān Pilato jeē na jnā soldado Jesús, te caní de ya jíin cuarta ñii.

<sup>2</sup> Te ni casáha de ñin corona iñu, ni cachuhun de xinī yā. Te ni cachuhun de ya ñin sahma cuehé ndíhí jée cūu sahma rey. <sup>3</sup> Te ni jecandichi de nuū yā, te ni cacahān catá de:

Nacā jeē váha rey cūu Rey ñayuu hebreo. Te ni cacani de nuū yā.

<sup>4</sup> Yūcuán na te ni quenda Pilato inga jínu, te ni cāhān de jíin ñayuu:

Yāhá condēhe ró tava rī de, návāha na cūni rō jeē tú na cuēchi níhín rī siquī de.

<sup>5</sup> Te ni quenda Jesús, ñūhun ya corona iñu jíin sahma cuehé ndíhí un. Te ni cāhān Pilato jíin i:

Yāhá condēhe ró de jíináhan ró.

<sup>6</sup> Te nuū ní cajito sutū cáculéhu jíin táca policia nuū yā, te ni cacana jee de:

Cata caa ní de jicā cruz, na cūu de.

Te ni cāhān Pilato:

Nūu sūcuan te najni máá ró de te cahni rō de. Chí ruhū, tú na cuēchi níhín rī siquī de.

<sup>7</sup> Te ni cacahān ñayuu hebreo un:

Cānevāha ná ñin ley, te jeē siquī ley un cānuū jée cūu de, chí sáha de máá de jeē Séhe Yā Dios cūu de.

<sup>8</sup> Te jeē ní jini sōho Pilato jnūhun yáha, te víhyá gā ni yūhú de. <sup>9</sup> Te ni ndivicoo tucu de ñin palacio, te ni cajnūhūn de Jesús:

¿Ndé nuū véji ró?

Te tu ní cāhān cuiti Jesús jíin de. <sup>10</sup> Yūcuán na te ni cāhān de jíin yá:

¿Naun tu cāhān rō jeē cāhān rī? ¿A tu jíin rō jeē ndíso jniñu rī jeē cāhni rī rohó jicā cruz, te suni ndíso jniñu rī jeē siaá rī rohó quíhín rō?

<sup>11</sup> Te ni cāhān Jesús:

Nūu tu ní sáha Yā Dios jeē ndíso jniñu ró, te tú na vé cūu sáha ró siquī rī. Jeé yūcuan tēe jeē ní nacūāha ruhū ndaha ró, cuēchi xeēn gā condee siquī de vesú maá ró. Achí yá.

<sup>12</sup> Yūcuán na te nde hora un ndúcú ndéyí Pilato ndese siaá de ya. Te ñayuu hebreo chí cácana jee i:

Nūu siaá ní tēe jíinā, te tu cūu ní amigo rey Roma jeē cujéhu ndácu jniñu nūu sūcuan. Chí táca tēe jeē sáha de rey maá de, nūu

sūcuan te cūu de enemigo siquī rey un. Achí i.

<sup>13</sup> Te jeē ní jini sōho Pilato jnūhun yáha, te ni ndacu de jniñu jeē na quēnda Jesús ñin vehe quiji ya. Te ni cucōo de silla nuū cūndaá jniñu, nuū máni máá yūu ní jecāva, te lugar un nání Gabata nuū yūhu hebreo. <sup>14</sup> Te cuacuca cahuxí uū, te jehíni quiví ún quejéé vico pascua. Te ni cāhān Pilato jíin ñayuu hebreo:

Yāha índichi maá rey rō.

<sup>15</sup> Te ni cacana jee i:

Na cūu de. Cata caa ní de jicā cruz, achí i.

Te ni cāhān Pilato jíin i:

¿A jée cata caa rī rey rō jicā cruz naún?

Te sutū cáculéhu un ní cacahān de:

Tuá na inga rey cānevāha ná jíináhan ná, chí máa-ni rey Roma jeē cujéhu ndácu jniñu nuū ná.

<sup>16</sup> Yūcuán na te Pilato ni nacūāha de ya nuū i jeē na cūu yā jicā cruz. Te ni cajni i ya cuangoo i jíin yá.

*Jeē ní cacata caa de ya jicā cruz*

(Mt. 27.32-44; Mr. 15.21-32; Lc. 23.26-43)

<sup>17</sup> Te ní quenda Jesús, ndíso ya cruz yā, cuangoo de jíin yá ñin lugar nuū naní Yiqui Xiní, te nuū yūhu hebreo naní Gólgota. <sup>18</sup> Te yūcuan ní cacata caa de ya jicā cruz. Te suni ní cacata caa de uū tēe nuū uū gā cruz, ñin ñin de ñin lado yā, te máá Jesús mēhñú. <sup>19</sup> Te suni ní ndacu Pilato jniñu jeē na cōndee jnūhun xiní cruz yā, jeē cāhān: Tēe yáha cūu Jesús ñuu Nazaret, Rey ñayuu hebreo, achí. <sup>20</sup> Te cuehé ñayuu hebreo ni cacahu i jnūhun yáha, chí máá yajni yuñú cūu nuú ní cacata caa de ya. Te jnūhun un yósó jíin yuhu hebreo jíin griego jíin latín. <sup>21</sup> Te táca sutū cáculéhu nuū ñayuu hebreo, ni cacahān de jíin Pilato:

Ma tēe ní jée cūu de Rey ñayuu hebreo, chí sa suhva tēe ní jée maá de ni cāhān jeē cūu de Rey ñayuu hebreo.

<sup>22</sup> Te ni cāhān Pilato:

Ma násama rī jeē jé ni ndacu rī jniñu ni jecondee.

<sup>23</sup> Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuñ parte, te ñin ñin parte ni cuu ñin ñin soldado un. Te suni ní caquihin de camisa yā. Te camisa un tu ní quícu, chí ni cunu ní. <sup>24</sup> Te ni cacahān maá de:

Ma cāhnde yō, chí váha ga na sáha yó sorteo, te na cōndēhe yó ndé ñin yó níhín, achí de.

Te sūcuan ní squícu jnūhun yósó nūu tútu ñi nde jenahán jée cāhān Jesús: Ni caquihin de sahma rī cuu maá de. Te ní casáha de sorteo siquī camisa rī. Achí. Sūcuan ní casáha soldado un.

<sup>25</sup> Te yajni cruz nuū ndíta caa Jesús ñe náná yā, jíin cūhú ña María ñasihí Cleofas,

jiin María ñuu Magdala. <sup>26</sup> Te ni jito Jesús nuū naná yā jiin nuū tée scuáha jeē maní gā yā jiin, suni índichi de yūcuán. Te ni cahān yā jiin náná yā:

Náná, nde vijna te maa de nucuiñi de cuu de sehe ní.

<sup>27</sup> Yūcuán na te ni cahān yā jiin tée scuáha ún:

Nde vijna te cuu ña nájñuhun náná rō, achí yá.

Te nde hora un ní cana de ña cuacondee ña vehe de condito de ña.

*Jeē ní jihí Jesús*

(Mt. 27.45-56; Mr. 15.33-41; Lc. 23.44-49)

<sup>28</sup> Yūcuán na te ni jini Jesús jeē je ní jinu táca jniñu jeē cánuu ndoho ya. Te návaha squícu jñuhun cáhán tutu ii, te ni cahān yā:

Jichí rí ndute, achí yá.

<sup>29</sup> Te yucuan ún in tindohō ñuhun chitú vinagre iyá. Te ni cachundaji de in cachí nuū vinagre un, te ni catee de xini in ndaha yújnu hisopo, te ni catee de yuhu ya jeē cóho ya. <sup>30</sup> Te ná ni jihí ya vinagre un, te ni cahān yā:

Je ní jinu, achí yá.

Te ní cáy-ni xini yā, te ní jihí-ni ya.

*Jeē ní cují soldado lanza xiin ya*

<sup>31</sup> Te inga quiví ún coo vico pascua. Te tēe hebreo tu cácu ni de jeē cóndita caa ndíyí ún jíca cruz quiví ndétátú un. Chi quiví ndétátú jeē cúu vico pascua, ii ndasí gá vésú táca gá quiví ndétátú. Te ni cacahān de jiin Pilato jeē na ndácu de jniñu jeē jnahnú síhin tēe cándita caa, te na cújiyo de jíca cruz. <sup>32</sup> Te ni quecoo soldado, te ni cajehnú de síhin in tēe jeē ndíta caa jiin yá, te suni súcuán inga de. <sup>33</sup> Te nuū ní quecoo de nuū Jesús, te ni cajito de jeē je ní jihí yā. Jeē yucuan tu ní cájehnú de síhin ya.

<sup>34</sup> Te in soldado chi ní cují de lanza xiin ya, te ní cane-ni niñí jiin ndute. <sup>35</sup> Te maa rí jeē tēe tutu yáha, ni jito rí jeē súcuán ni cuu, te nácani ndáá rí jñuhun ndese ni cuu. Te jini rí jeē iyó ndáá jñuhun cáhán rí, návaha suni candíje maa ró jijnahn ró. <sup>36</sup> Chi súcuán ni cuu návaha squícu jñuhun cáhán tutu ii: Ma cahnú de ni in yiquí ya, achí. <sup>37</sup> Te suni inga jñuhun cáhán tutu ii: In quiví te coto i nuū Yaá jeē ní cují i lanza, achí.

*Jeē ní quindúji Jesús*

(Mt. 27.57-61; Mr. 15.42-47; Lc. 23.50-56)

<sup>38</sup> Te ní cuu táca jeē yáha. Te iyó in tēe ñuu Arimatea jeē naní José, te cúu de tēe cándíje Jesús. Te yuhu-ni cándíje de, chí yuhú de jñáhan de hebreo. Te ni cahān ndahú de jiin Pilato jeē na cuáha jñuhun quihin de yiquí cúñu Jesús. Te ní jēhe Pilato jñuhun. Yūcuán na te cuahān José, ní snúu de yiquí cúñu Jesús. <sup>39</sup> Te suni ní jinū Nicodemo, tēe ní quiji nuū Jesús in jecuáá. Te ndíso

de nájñuhun ocō uxí kilo sūje uvuā jeē ní saca jñáhan jiin yúcú áloe. <sup>40</sup> Te ndindúú de ní caquihin de yiquí cúñu Jesús, te ni cachusúcún de jiin tira sahma jeē ní quiví yucú jeē jeén asin ún, nájñuhun iyó costum-bre maa ñáyuu hebreo jeē cachindúji i ndíyí. <sup>41</sup> Te yajni nuū ní jihí Jesús iyó in huerto. Te nuū huerto un ndéé in yaú jeē ní caan jeé jíca in cava, nuū ná tu quindúji ndíyí. <sup>42</sup> Te yucuan ní cachindúji de Jesús, chí ine yajni yaú ndíyí ún. Chí je yajni quejéé quiví ndétátú de jeē cácuu de ñáyuu hebreo, te tú na ley chindúji de ndíyí núu je ní quejéé quiví ún.

*Jeē ní natecu Jesús*

(Mt. 28.1-10; Mr. 16.1-8; Lc. 24.1-12)

## 20

<sup>1</sup> Te jenéhen quiví domingo ni jinū María ñuu Magdala nuū ní yindúji Jesús, te yínee gā cúu. Te ní jito ña jeē ní cujiyo yuū ndihyú yuyáú ndíyí. <sup>2</sup> Yūcuán na te jinu ña cuahān ña nuū Simón Pedro jinū inga tēe scuáha ún jeē maní gā Jesús jiin. Te ni cahān ña jiin de:

Ní catava de Jitoho yō nuū ní yindúji ya, te tu cájini yō ndé nuū ní cachune de ya, achí ña.

<sup>3</sup> Te ní quendacoo Pedro jinū inga tēe scuáha ún, cuácondéhé de yaú ndíyí. <sup>4</sup> Te cájino tayí ndindúú de. Te inga tēe scuáha ún, nihin ga ní jinu de vésú Pedro. Te xihna gā de ní jinū yaú ndíyí. <sup>5</sup> Te ní scáyí de maa de, te ní jito nihni de ini yaú. Te ní jito de jeē tira sahma un cáyūcu maa ná. Te tu ní quiví de. <sup>6</sup> Te sáá te ní jinū Simón Pedro jeē ndiquín jñáhan de vēji de jiin inga tēe ún. Te ní quiví de nuū ní yindúji Jesús. Te suni ní jito de jeē tira sahma cáyūcu maa ná. <sup>7</sup> Te ní jito de sahma jeē ní ñúsúcun xini Jesús, tu cátu jiin tira sahma, chí ní natuu te cátu síin. <sup>8</sup> Yūcuán na te suni ní quiví inga tēe scuáha jeē ní jinū xihna gā nuū ní yindúji ya. Te ní jito de ndese iyó, te ní candíje de jeē ní natecu yā. <sup>9</sup> Chí nde ná tu jinūcoo de yaú ndíyí, te tu ní jécūhun ní de jñuhun cáhán tutu ii, jeē jini ñuhún natecu yā núu je ní jihí yā. <sup>10</sup> Yūcuán na te ndindúú tēe cáscuáha ún cuanungoo de vehe de.

*Jeē ní nane ya nuū María ñuu Magdala*

(Mr. 16.9-11)

<sup>11</sup> Te María índichi ña ndáhyú ña nuū ní yindúji ya. Te ní ní ndáhyú ña, te ní scáyí ña maa ña, ní jito nihni ña ini yaú ún. <sup>12</sup> Te ní jito ña uū ndajéhé andiví, cáñuhun ya sahma cuijín. Te in ya néne ichi xini, te inga ya néne ichi núu jehé nuū ní cátu yiquí cúñu Jesús. <sup>13</sup> Te ní cacahān yā jinū ña:

¿Najehē ndahyú rō?

Te ní cahān ña:

Ní catava de Jitoho ná, te tu jini ná ndé nuū ní cachune de ya.

<sup>14</sup> Te jeē ni cāhān ña súcuan, te ni ndiío coto ña, te ni jito ña nuū Jesús jeē índichi yā yūcuán. Te tu ní nacuni ña jeē maá yá cúu.

<sup>15</sup> Te ni cahān yā jíin ña:

¿Najehē ndahyú rō? ¿Nde ñn nānducú rō? achí yá.

Te maá ña jéni ni ña jeē tée ndíto huerto cúu ya. Te ni cahān ña jíin yá:

Núu maá ní ni quenehen ní yá, te cachi ní ndé nuū ní jéchune ní yá, te na quínuquihin ná yá, achí ña.

<sup>16</sup> Te ni cahān Jesús jíin ña:

María, achí yá.

Te jeē ni cāhān yā súcuan, te ni nacuni ña ya, te ni ndiío coto ña, te ni cahān ña jíin yuhu hebreo:

Raboni, achí ña. Te jnūhun un cúní cahān, Maestro.

<sup>17</sup> Te ni cahān Jesús jíin ña:

Ma quehé rō rúhū, chí ná tu ndaa ri quinuuhun ri nuū Tatá rī. Te cuáhān núu táca hermano rī, tēe ni cascuáha jíin rī, te cachi rō nuū de jeē ndaa ri quinuuhun ri nuū Tatá rī, jeē suni Tátá maá rō jíinñahan rō cúu. Te cúu ya Yāā Dios maá rī jíin Yāā Dios maá rō jíinñahan rō. Achí yá.

<sup>18</sup> Yūcuán na te María ñuu Magdala un, cuáhān ña, te ni castūhūn ña nuū tēe cascuáha un jēe ní jito ña nuū maá Jítoho yō jíin jēe ní cahān yā jnūhun yáha jíin ña.

*Jeē ní nane ya nuū tēe cascuáha jíin yá*

(Mt. 28.16-20; Mr. 16.14-18; Lc. 24.36-49)

<sup>19</sup> Te jeē ní cuaa maá quívī domingo un, te cáhiin tútu tēe cascuáha ún ini ñn vehe. Te cándihyū yehyí, chí cáyūhú de jnāhan de hebreo jeē coto xeēn i de. Te ni quee-ni Jesús, ní jecuiñi yā mēhñú de vēsū ndihyú yehyí, te ni cahān yā jíin de:

Ndeyí sñ coo ní rō jíinñahan rō, achí yá.

<sup>20</sup> Te ná ní cahān yā súcuan, te ni steén yā ndaha ya jíin xiin ya nuū de. Te ni cacusñ ní tēe cascuáha un jēe ní cajito de nuū maá Jítoho yō. <sup>21</sup> Yūcuán na te ni cahān tucu Jesús:

Ndeyí sñ coo ní rō jíinñahan rō. Te nájñūhun ní tají Tátá rī ruhū ini ñayiví, suni súcuan tájí rī rohó nacani rō jnūhun ri nuū ñayuu. Achí yá.

<sup>22</sup> Yūcuán na te ni tñvī tachí yā nuū de jíinñahan de. Te ni cahān yā:

Vijna te ni canihñ rō Espíritu Santo. <sup>23</sup> Te táca ñayuu jeē cone cáhnu ní rō nuū cuéchi i, núu súcuan te coo jnūhun cáhnu ní nuū cuéchi i. Te núu tú cone cáhnu ní rō nuū cuéchi i, te ma cóo jnūhun cáhnu ní nuū cuéchi i. Achí yá.

*Jeē ní nane ya nuū Tomás*

<sup>24</sup> Te Tomás, tēe ní cacu cuatí, ñn jnāhan jeē uxí uū tēe cascuáha jíin yá, tu ní íne de quívī jeē ní nane Jesús nuū táca gá tēe cascuáha.

<sup>25</sup> Yūcuán na te sava ga tēe cascuáha un, ní cacahān de jíin Tomás:

Ni cajito ri nuū maá Jítoho yō.

Te ni cahān Tomás:

Núu tú coto ri nuū ní túji ndaha ya ní sáha ndūyu cāa, te núu tú chune ri xiní ndáha ri nuū ní íne ndūyu cāa, te núu tú chune ri ndaha ri xiin ya, te ma candije cuiti rī, achí de.

<sup>26</sup> Te nuū uná quiví, te tēe cascuáha un cáhiin tútu tucu de ini ñn vehe. Te íne Tomás jíin de. Yūcuán na te ní quee-ni tucu Jesús, ní jecuiñi yā mēhñú de, vēsū cándihyū yehyí. Te ni cahān yā jíin de:

Ndeyí sñ coo ní rō jíinñahan rō.

<sup>27</sup> Te ni cahān-ni ya jíin Tomás:

Chune xiní ndáha rō ini ndaha ri yāhá te coto rō. Te scáá ndaha rō, te chune rō xiin ri nuū ní tújī. Te ma cáni siquí gá ní rō, chí sa suhva na cándije rō.

<sup>28</sup> Yūcuán na te ni cahān Tomás jíin yá:

Aí, Jítoho maá ná jíin Yāā Dios maá ná cúu ní, achí de.

<sup>29</sup> Te ni cahān Jesús jíin de:

Tomás, nde ní jito rō núu rī, te ni candije rō. Te yōhyo ndetū táca ñayuu jeē candije ruhū vēsū tu ní jito i nuū rī, achí yá.

*Najehē ni tee Juan libro yáha*

<sup>30</sup> Te suni ní sáha Jesús cuehē gā jniñū jēhnu jeē ní steén yā poder yā nuū tēe cascuáha jíin yá, jeē tu yósó núu tútu yáha.

<sup>31</sup> Te táca jniñū yáha ní tee ri návāha candije rō jíinñahan rō jēe Jesús cúu Cristo, maá Séhe Yāā Dios. Chí jeē candije rō yá, te cotecu rō ní cáni sáha ya.

*Jeē ní nane ya nuū uxá tēe cascuáha jíin yá*

## 21

<sup>1</sup> Te ni cuu jecu quiví, te inga jínu ní nane Jesús nuū tēe cascuáha jíin yá, jeē cáhiin de yumar Tiberias. Te suhva ní steén yā maá yá nuū de: <sup>2</sup> Cáhiin tútu Simón Pedro, jíin Tomás, tēe ní cacu cuatí, jíin Natanael, tēe ñuu Caná ndañū Galilea, jíin ndindúú séhe Zebedeo, jíin uū gá tēe cascuáha. <sup>3</sup> Te ni cahān Simón Pedro jíin de jíinñahan de:

Quíjñi rī chácá.

Te ni cacahān de:

Suni quingoo ri jíin rō.

Te cuangoo de, te ni quívicoo de ñn barco. Te tu ní cániñi cuiti de tí jecuaá yūcuán. <sup>4</sup> Te jeē cuácundijin, te íne Jesús yumar. Te tēe cascuáha ún, tu ní cánacuni de jeē maá yá cúu.

<sup>5</sup> Yūcuán na te ni cahān yā jíin de:

Aá rō jíinñahan rō, ¿á ní canihñ rō chácá caji yō?

Te ni cacahān de:

Tú cuiti, achí de.

<sup>6</sup> Yūcuán na te ni cahān yā jíin de:

Síngava ñunu rō ichi lado váha barco, te nihñ rō tí.

Te ni casingava de ñunu, te tuá ní cúu cuiti natava de, jeē ní quívicoo cuehē ndasi chácá.



7 Yūcuán na te tēe scuáha jeē maní gā Jesús jíin, ní cahān de jíin Pedro:

Máá Jítóho yō cúu, áchí de.

Te jeē ní jíin sóho Simón Pedro jeē maá Jítóho yō cúu, te ni nachuhun de sahma de, chí ni tava de jeē sájniñu de. Te ni ndava-ni de nuū mar cuahān de nuū yā. 8 Te tāca gá tēe cáscuáha ún, vendicoo de jíin barco yundúte, cástaa de ñunu ñúhun chítú cháca. Chí tu jíicá cáhlin de jíin ñuhun íchi, chí nájnūhun ciento-ni metro cúu. 9 Te nuū ní quendacoo de ini barco, te ni cajito de jeē nduhvá tūca ñuhūn, te íne staa jíin ñin chācá chíhyó. 10 Te ni cahān Jesús jíin de:

Cuáquihin jecu chācá jéé sa ní cajniñi ró, na táu yó, áchí yá.

11 Te ni quivi Simón Pedro ini barco, te ni staa de ñunu, ni quee de jíin ndé nuū ñúhun íchi. Te ñúhun chítú cháca náhnu, ñin ciento uū xico uxí uní tī cúu. Te vēsú ñin súcuan tí ñúhun, te tu ní táhndé ñunu. 12 Te ni cahān Jesús jíin de:

Nehen jijnáhan ró na cási ni yō.

Te ni ñin tēe cáscuáha ún tu ní cūndeyí ni de cajnūhún de ya núu ndé ñin cúu ya. Chí je cájini de jeē maá Jítóho yō cúu ya. 13 Te ni quindēhe Jesús yuñúhún, te ni quihin ya staa ún, te ni jēhe ya nuū de, te suni súcuan chācá un.

14 Yāha cúu vuelta uní jeē ní nane Jesús nuū tēe cáscuáha jíin yá, ná ni natecu yá.

*Jeē ní ndajnūhún Jesús jíin Simón Pedro*

15 Te nuū ní cuu ní cajesi ni de, te Jesús ni cajnūhun yá Simón Pedro:

Simón sēhe Jonás, ¿á mánī gā rō jíin rí vēsú tāca gá tēe yāha?

Te ni cahān de:

Je jíiní ní jeē maní na jíin ní, achí de.

Te ni cahān yā jíin de:

Núu súcuan te stéén rō jnūhun ri nuū ñáyuu cácuu nájnūhun londe ri.

16 Te ni cajnūhun yá de vuelta uní:

Simón sēhe Jonás, ¿á mánī rō jíin rí?

Te ni cahān de jíin yá:

Je jíiní ní jeē maní na jíin ní, achí de.

Te ni cahān yā:

Condito ró ñáyuu cácuu nájnūhun lanchi ri núu súcuan.

17 Te ni cajnūhún tucu ya de vuelta uní:

Simón sēhe Jonás, ¿á mánī rō jíin rí?

Te ni cucuihyá ni Pedro jeē ní cajnūhun yá de vuelta uní núu maní de jíin yá. Te ni cahān de:

Máá ní jíiní ni ndihi, te jíiní ní jeē maní na jíin ní.

Te ni cahān yā:

Núu súcuan te stéén rō jnūhun ri nuū ñáyuu cácuu nájnūhun lanchi ri. 18 Te jendaá cahān ri jíin ró jeē nde ná suchí ró, te ni quihin máá ró sahma ró, te ni jica ró ndé nuū cuní maá ró. Te núu na yáí ró, te nasūu jéé cuní maá ró,

chí inga ñáyuu quindēca i róhó nuū tu cuní rō quihin rō. Te scáá rō ndindúú ndaha ró jéé cuu rō.

19 Jnūhun yáha ní cahān yā jeē ní stéén yā jeē cóndita caa de jíicá cruz cuu de, te jeē súcuan cuatáhu de cúu jeē stéén de jeē yóhyo cújéhnu Yaa Dios. Yūcuán na te ni cahān gā yā:

Condiquin rō ruhū jeē sáha ró jniñu ní ndacu ri nuū rō, achí yá.

*Jnūhun tēe scuáha jeē maní gā yā jíin*

20 Te ni ndió cóto Pedro, te ní jito de tēe scuáha jeē maní gā Jesús jíin, ndíquín de vēji de yatá. Tēe un cúu jeē ní conene xiin Jesús ná ni cacuxíni de jíin yá, te ni cajnūhún de ya: ¿Ndé ñin de cúu jeē nastúu nihín? 21 Te jeē ní jito Pedro nuū tēe ún, te ni cajnūhún de Jesús:

Te tēe yáha, ¿ndese coo jíin de?

22 Te ni cahān Jesús:

Núu cuní rí jeē cótecu de nde quivi ndíji ri, ¿te naun ndíhví ni rō? Máá ró chí condiquin rō ruhū jeē sáha ró jniñu ní ndacu ri nuū rō, achí yá.

23 Yūcuán na te jnūhun yáha ní jitē núu nuū tācá hermano, jeē tēe scuáha un má cūú de. Te tu ní cáhán Jesús jeē ma cūú de, chí sa suhva ni cahān yā: Núu cuní rí jeē cótecu de nde quivi ndíji ri, ¿te naun ndíhví ni rō?

24 Te tēe scuáha un jéé maní gā Jesús jíin, suu cúu ruhū jeē nácani jnūhun tācá jniñu yáha, te suu ri tēe tāca jnūhun yáha. Te cájini rō jijnáhan ró jéé iyó ndáá jnūhun nácani ri.

25 Te suni íyó cuéhē ndasí gá jniñu ní sáha Jesús. Te núu tee yó ná ñin ná ñin, te ma cánda ní ñáyiví cuhun tutu jeē cóso jnūhun ún, jéni ní rí. Te ni cuu. Amén.

## JNIÑU JEHNU JEE NI CASAHA TEE APOSTOL

*Jeē ní jéjnūhun ya quiji Espíritu Santo*

<sup>1</sup> Amigo Teófilo, nuū tūtu jeē ní tee ná xihna gā ni castūhun ná nuū ní táca jniñu ní sáha Jesús, jiín táca jnūhun ní steén yā nde quiví ní quejéé yá ní sáha ya <sup>2</sup> te nde quiví ní ndaa ya cuanuhun yā andiví. Te nde ná tu ndaa ya quihñ yā, te ní sáha Espíritu Santo jeē ní ndacu ya jniñu nuū táca apóstol, tēe ní nacāji ya. <sup>3</sup> Te nuū ní jinu ní ndoho ya jeē ní jíhí yā, te uū xico quiví te tijni jinu ní steén ndijin yā maá yá nuū tēe un jijnáhan de, te súcuan ní cajini de jeē iyó ndaa jeē ní natecu yā. Te ní cahān yā jiín de siquí ndese ndácu Yāa Dios jniñu.

<sup>4</sup> Te ná cáhiin tūtú de jiín yá, te ní cahān yā jiín ndihí de jeē ma quéndaco de ini ñuu Jerusalén, chí áchí yá:

Condetu ró ndé quee Espíritu Santo jeē ní jéjnūhun máa Tátá rí Yāa Dios. Chí je ní cachi rí nuū ró jeē ní jéjnūhun ya quiji Espíritu Santo. <sup>5</sup> Chí Juan, jendaá jeē maá ndute-ni ní scuándute de ñayuu. Te róhó jijnáhan ró, jecu na quiví te nájñūhun cuandute ró jiín Espíritu Santo, cúu jeē condee yā ini anuá ró, achí yá.

*Jeē ní ndaa Jesús cuanuhun yā andiví*

<sup>6</sup> Yūcuán na te tēe cáhiin tūtú jiín yá, ní cacajñūhún de ya:

¿A vijna te nasáha ní jéē ñayuu ñuu yó Israel ndujéhu ní ndacu i jniñu nuū nación yó chí naún? áchí de.

<sup>7</sup> Te ní cahān yā:

Ma cúu cuni ró quiví chí cuiyā jeē cóo jeē ní sándaá maá Tátá rí, chí maá iin-ni máa yá jini yā na quiví sáha ya. <sup>8</sup> Te jeē cúni ró cúu jeē quee Espíritu Santo te condee yā ini anuá ró jijnáhan ró. Yūcuán na te nihñ rō poder te nacani ró jnūhun rí ní ini ñuu Jerusalén, ní Judea, ní Samaria, nde ní cáhnu ñayiví, áchí yá jiín de.

<sup>9</sup> Te ní ndihí ní cahān yā táca jnūhun yáha. Te níni cájito de nuū yā, te ní ndaa-ni ya cuanuhun yā andiví. Te ní quee vicō ní jesi-ni nuū cuahān yā, te tuá ní cájito de ya. <sup>10</sup> Te níni cáhiin de cájito ndaa de ichi ándiví núu ní ndaa ya cuahān yā, te uū jnāhan ndajéhé yā cáñūhun ya sahma cuijín ní cajecuñi yā xiin de jijnáhan de, te cájito ya nájñūhun tēe. <sup>11</sup> Te ní cacahān yā jiín de:

Róhó tēe Galilea, ¿nájehé cájito ndaa ró ichi ándiví? Chí máa Yāa Dios ní naquihin ya Jesús cuanuhun yā andiví, te suni súcuan ndiji ya nájñūhun cájito ró cuahān yā andiví, achí yá.

*Jeē ní canacāji de Matías jeē nucuiñi de nuū Judas*

<sup>12</sup> Yūcuán na te ní nanungoo de yucu jeē nani Olivos, cuanungoo de ñuu Jerusalén. Te yajni-ni íne yucu un jiín ñuu Jerusalén, nájñūhun iin kilómetro-ni, cūhva jeē ní jéhe ley permiso caca ñayuu quiví ndétátú. <sup>13</sup> Te ní ndivico de ini ñuu. Te ní ndacoo de cuarto xiní véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnāhan grupo cananista, jiín Judas ñani Jacobo. <sup>14</sup> Táca tēe yáha, níni cándututú inuu de cájicān tahu de jiín táca ñani Jesús jiín náná yā María jiín sava ga ñahan.

<sup>15</sup> Te iin quiví te ní jecondichi Pedro nuū táca hermano cáandije. Te cáhiin nájñūhun ciento ocō ñayuu. Te ní cahān de:

<sup>16</sup> Hermano jijnáhan ní, ní squícu nahín jnūhun cáhan tutu ií jeē ní cahān David nde jenahán ní sáha Espíritu Santo. Te jnūhun un ní cuu siquí Judas jeē ní yosnúu núu tēe ní cajnií Jitoho yó Jesús. <sup>17</sup> Te suu tēe un ní jica de jiín yó, te ní chindéé ñáhan jnāhan de jiín yó siquí jniñu ní jeni ya yohó. <sup>18</sup> Te ní cajeen iin ñuhun jiín xūhun ní nihñ tēe un siquí jniñu neé ní sáha de. Te ní ninga ndeyi de, te ní ndatā sáva chíji de, te ndihí yiti de ní jite. <sup>19</sup> Te ní jite jnūhun yáha núu táca ñayuu cáyūcú ñuu Jerusalén, te jeē yúcuán cúu jeē ní casnání i ñuhun ún Acéldama nuū yúhu máa i, jeē cuni cahān ñuhun jeē cúu cuenta niñi. <sup>20</sup> Chí súcuan je yósó núu tūtu Salmo siquí Judas:

Vehe de na quéndōo iyú,

te ma cóndee ní iin ga ñayuu ini vehe ún.

Te suni cáhan:

Jniñu ní condiso de na cóndiso inga tēe.

Achí.

<sup>21</sup> Núu súcuan te jini ñūhún jéē núcuñi iin tēe lugar maá de jiín yó. Te tēe nucuiñi jiín yó un, nacāji yó de mēhñu táca tēe ní cajica jiín yó táca quiví jeē ní jica máa Jitoho yó Jesús jiín yó. <sup>22</sup> Te tēe nacāji yó un cúu tēe jeē ní iyo de jiín yó nde quiví ní jendute ya ní sáha Juan, te nde quiví ní ndaa ya cuanuhun yā andiví. Te tēe nucuiñi jiín yó na cúu de testigo jiín yó jeē ní natecu yā, achí de.

<sup>23</sup> Te ní catee nuū de uū jnāhan tēe: Matías jiín José jeē nani de Barsabás te suni nání de Justo. <sup>24</sup> Te ní cajicān tahu de:

Tátá Yāa Dios, máa ní chí jini ní ndese cáa ánuá táca ñayuu. Núu súcuan te jeē ndindúú tēe yáha, stéén ní ndé iin de cúu jeē ní nacāji ní. <sup>25</sup> Te condiso jniñu de cuu de apóstol. Te naquihin de jniñu ní stóo Judas, chí ní sáha de cuēhi te cuahān de lugar xeēn nuū cánuú quihñ de, áchí de.

<sup>26</sup> Yūcuán na te ní casáha de iin sorteo te ní jinū Matías, te ní nucuiñi de ní nduu de jnāhan ndihúxi iin apóstol.

*Jeē ní quee Espiritu Santo***2**

<sup>1</sup> Te máá quiví vico Pentecostés ni cahĩn tútú ñáyuu cácanđje ñuu Jerusalén. <sup>2</sup> Te sanaa-ni te ni quejee níhin véji nde andiví nájñuhun tachí níhin queé, te táca ñáyuu jeé cáyũcú ini vehe un ní cajini sōho i jeē níhin ún. <sup>3</sup> Te ni cajito i nájñuhun yáñuhun jeē ní cajitē núu te ni cacucōo xiní ná ñn ná ñn i. <sup>4</sup> Te ndihí i, ni cunuú Espiritu Santo jĩn i, te ni quejee i cácahān i sñn sñn yuhu, ndese ni steén máá Espiritu nuú ná ñn ná ñn i cahān i.

<sup>5</sup> Te ñuu Jerusalén, suni cáhĩn ñayuu hebreo, yiñúhún núu Yáá Dios, jeē ní quijicoo i nde táca naciōn ní cáhnu ñayiví. <sup>6</sup> Te jeē ni níhin súcuan te ni cacutútú cuéhē ñayuu ún. Te ni cunéé í ni i jíñáhan i, chí ná ñn ná ñn i ni cajini sōho i jeē téé ni canihĩn Espiritu Santo cácahān de jñuhun yuhu ñúú jicá nuú véji i. <sup>7</sup> Te ni canaa ni i cajito i te ni cacahān i:

¿A násũu téé Galilea cácuu táca téé yáha jeé cácahān de táca yuhu ñúú nuú véjicoo yó? <sup>8</sup> ¿Na vé ni cuu yáha núu súcuan? Chí ná ñn ná ñn yó cajini sōho yó cácahān de jñuhun yuhu ñúú nuú ní cacacu yó. <sup>9</sup> Chí véjicoo yó ndé táca ñuu jicá. Sava yó véji nde Partia jĩn Media jĩn Elam. Te sava ga yó véji yó ndé Mesopotamia jĩn Judea jĩn Capadocia jĩn Ponto jĩn Asia. <sup>10</sup> Suni nde Frigia jĩn Panfilia jĩn Egipto jĩn tjini ñuu jeē íne nde yatā gā ñuu Cirene ñuhun Africa véjicoo yó. Te sava ga yó nde ñuu Roma véjicoo yó, te cáyũcú jĩn-ni yó yáha. Te máá yó jeé véjicoo ñuu Roma, sava yó cácuu máá ñáyuu hebreo te sava ga yó cácuu ñayuu sñn ñuu, ni cacandje yó ndiquín yó ley ñayuu hebreo. <sup>11</sup> Suni nde Creta jĩn Arabia véjicoo sava yó. Te cajini sōho yó jéé jĩn jñuhun yuhu ñúú ná ñn ná ñn máá yó cácahān de táca jniñu jéhu ní sáha Yáá Dios, achí i.

<sup>12</sup> Te ndihí i chí ni canaa í ni i cajini nahín i. Te ni candajñuhún i jĩn jñáhan i:

¿Na vé cúu jeē ní cuu núu súcuan jeé cácahān de yuhu ñúú yó? achí i.

<sup>13</sup> Te sava i ni cacahān catá i:

Tuú chí jeé cánajĩni de, áchí i.

*Jeē ní nacani Pedro jñuhun nuú ñáyuu*

<sup>14</sup> Yũcuán na te ni candocuiñi Pedro jĩn ndihúxí ñn ga apóstol, te ni cahān jee Pedro jĩn ñáyuu ún:

Nihín jñáhan ñuu yó hebreo, jĩn ndihí níhin jéé cáyũcú ní Jerusalén, jñuhun yáha na chũhun ni ni jíñáhan ní, chí cuni nahín ní cahān na jĩn ní. <sup>15</sup> Chí máá ná jíñáhan ná, nasũu jéé cajini ná nájñuhun cájeni ní ní, chí sáá cahĩn jenéhen cúu, te nasũu hora cánajini ñayuu cúu. <sup>16</sup> Chí sa suhva squícu jniñu yáha nájñuhun ni cahān Joel, téé ni

nacani jñuhun Yáá Dios nde jenahán, chí súcuan ni cahān de:

<sup>17</sup> Achí Yáá Dios: Quiví sándihí na

te tají rí Espiritu rí cunuú yá jĩn táca ñáyuu, te sēhe yí ró jĩn sēhe síhí ró, nacani i jñuhun rí,

te táca téé lulí chí coto ndijin de jeē steén rí nuú de,

te táca téé jéhu chí sáha rí jeé scóto jēni de.

<sup>18</sup> Te quiví ún chí tají rí Espiritu rí cunuú yá jĩn táca mozo rí, cúu téé cúu ñahan,

te nacani i jñuhun rí.

<sup>19</sup> Te ichi ándiví sáha rí jniñu jéhu jeē náá ni ñayuu coto i,

te sáha rí jniñu jéhu ini ñayiví jéé steén jeé cujéhu rí,

chí coo niñi jĩn ñuhún jĩn ñúhmā nájñuhun vicó.

Yũcuán cúu jeé sáha rí jeé cóo jñũndóho xeēn.

<sup>20</sup> Te nduu jnúú níandii te ma cundijin ga,

te yoó coto cuéhé nájñuhun niñi.

Yũcuán na te quee quiví jeē ndíji máá Jítho rō Jesús.

Quiví ún coo cuéhé jniñu jéhu, te cuni ndihí ñayuu jeé quiví máá Jítho rō cúu.

<sup>21</sup> Te táca ñáyuu jeé cahān ndahú i jĩn yá te jnama ya i, áchí Yáá Dios.

Achí Joel ní nacani de jñuhun ya.

<sup>22</sup> Jeé yũcuán níhin téé ñuu yó Israel, cuni nahín gá ni jñuhun yáha jíñáhan ní. Ni steén Yáá Dios jeé ní tají yá máá Jesús, Yáá ní jehnu ñuu Nazaret, chí máá Yáá Dios ní jēhe ya jeē ní sáha Jesús jniñu jéhu mēhñu máá ní, jĩn jniñu jeé steén jeé cujéhu ya, te jniñu un ní canaa ni ní ní cajito ní. Te je cajini vāha ní jéé súcuan ní cuu. <sup>23</sup> Te máá ní ni cajini ní yá, te ni cajendēca ní yá nuú téé xeēn ni cajehni de ya jicá cruz ní casáha ní. Te nde jĩn tiempo je ni jini Yáá Dios jeé súcuan sáha ní jíñáhan ní, chí súcuan je ní sándaá yá. <sup>24</sup> Te ní nastécu Yáá Dios Jesús te tuá ní cúu ya ndíyí, chí jñuhun xeēn jeé jihí ñayuu, tuá na vé cúu ga sáha jĩn yá. <sup>25</sup> Chí nde jenahán suhva ni tee David jñuhun ndese ni cahān Jesús jĩn Yáá Dios:

Jini na núu máá ní jeé cúu ní Jítho ná, chí ní cáni ndéé ní jĩn ná,

chí ndéé ní ichi ndáváha ná, cúu jeé chindéé ñáhan ní sãña náváha coo ndeyí ní ná.

<sup>26</sup> Jeé yũcuán cúsiñ ní ná te cáhān na jñuhun sñi ní.

Jeé yũcuán ma nácani uhú ní na síquí jñuhun cuu ná.

<sup>27</sup> Chí ma cuáha ni jñuhun quendōo ánuá na lugar nuú cáyũcú ánuá ndíyí,

ni ma cuáha ní jñuhun tehyú ná, chí jéniñu ná núu ní te maní ní jĩn ná.

<sup>28</sup> Te ní steén ní núu na jéé nátecu ná,

te sáha ní jéé cusí teyí ní ná condee na jĩn ní ní cáni.

Achí Jesús, ni achi David.

29 <sup>29</sup> Tāca nihín jijnáhan ní, na cástūhun cáji ná nuū ni jnūhun jii yō David, chi tu ní cáhán de jnūhun yáha síquī maá de. Chi ní jihí de te ní quindūji de, te jini yō nuū yindūji de nde vijna. <sup>30</sup> Chi ní cuu de tēe ní nacani jnūhun Yaā Dios nde jenahán. Te ní jini de jeē váha ní jejnūhun ya nuū de jeē chíji yucūn maá de quiji Cristo, te condee yā mesa de ndacu ya jniū nájnūhun ní ndacu de jniū jeē ní cuu de rey. <sup>31</sup> Te nde jini tiempo ní jini de jeē nátecu Cristo, te ní cahān de jeē anuá yā, ma ndóo lugar nuū cáyūcu ánuá ndiyi, ní yiqui cúnu yā ma tehyú. <sup>32</sup> Chi Yaā Dios ní nastécu yā Jesús, te maá ná cácuu ná testigo jeē ní natecu yā. <sup>33</sup> Te ní ndujéhu tucu ya ní sáha Yaā Dios jini poder yā. Te nde nuū maá Yāā Dios, Yāā cúu Tátá yā, ní nihín Jesús Espiritu Santo, chí súcuu ní jejnūhun ya. Te ní tají Jesús Espiritu Santo, te suu ya sáha jniū jeē cájito ní te cájini sōho ní vijna. <sup>34</sup> Te David, nasū síquī maá de ní cáhán de tāca jnūhun yáha, chí tu ní ndáa yiqui cúnu de andiví. Chí síquī Cristo cúu jeē ní cáhán de suhva:

Maá Yāā Dios ní cahān yā jini Jitoho rī Cristo: Cucōo ró ichi ndávaha ri jeē steén jeē cujéhu ró.

<sup>35</sup> Te na sáha ri jeē quende rō poder tāca jéé cájito uhú rohó, áchí yá.

Achí David.

<sup>36</sup> Nú súcuu te ndihí ní jéé cácuu yó ñayuu Israel, na cúni váha ní jéé vesú ní cajehni ní yá jicá cruz, te Yaā Dios ní jeni ya maá Jesús jeē cúu ya Jitoho yō te suni cúu ya Cristo, Yāā jnáma yóhó, áchí Pedro jini i.

<sup>37</sup> Te jeē súcuu ní cajini sōho i jnūhun yáha, te ní cajnahuhú ní anuá i. Te ní cacajnúhún i Pedro jini tāca gá apóstol:

¿Te ndese sáha ná jijnáhan ná nuū súcuu? áchí i.

<sup>38</sup> Te ní cahān Pedro jini i:

Nacani ní ní jéé stóo ní cuéchi ní jijnáhan ní, te cuandute ní jéé ní cacandije ní Jesucristo, návaha cone cáhnu ní Yaā Dios nuū cuéchi ní, te cuāha Yaā Dios Espiritu Santo yā condee yā ini anuá ní. <sup>39</sup> Chí súcuu ní jejnūhun maá Tátá yō Yaā Dios nuū yō jini nū séhe yó, te suni súcuu ní jejnūhun ya nuū ñayuu tāca gá nación, tācá i jeē cána ya i candije i.

<sup>40</sup> Te jini cuéhé gā jnūhun súcuu ní cahān cají Pedro, te ní stihví ní de i:

Nducú ndéyí ní jeē na cácu ní, chí jnahnū ndetú ñayuu casáha jniū neé, áchí de.

<sup>41</sup> Yūcuán na te tācá i jeē ní cajetáhú jnūhun ní cahān de, ní cajendute i. Te quiví un ní nducuehé gā ñayuu cácadije, nájnūhun uní mil gā ñayuu. <sup>42</sup> Te ní cahān nihín i síquī jnūhun cástéén apóstol. Te inuú-ni cándajnúhun mání i te cájicān tahú i, te in cáhnu-ni cáyeji i pan, nájnūhun ní steén maá Jitoho yó jeē núcūhun ní yō síquī yá.

*Ndese ní coyūcu ñáyuu jeē ní cacandije jeē xlnha ñúhún*

<sup>43</sup> Te ndihí ñayuu ní cayúhú i ní cajito i, chí cuéhé jniū jéhu jeē steén jeē cujéhu ya ní casáha tēe apóstol. <sup>44</sup> Te inuú ní cahíyo ní ñayuu cácadije, te ní cacuu inuú i tāca jéé cánevāha i. <sup>45</sup> Te ní caxicó i na-ni na vé cánevāha i, te ní casaja i xūhún un nū tāca jnáhan i, nú ndese jini ñúhún in in i. <sup>46</sup> Te ndijnahan quiví ní candutútu i ini templo. Te maní ní cayeji cáhnu i pan tācá vehe jnáhan i nájnūhun ní steén yā, te ní cahíyo sī ní i. <sup>47</sup> Te ní cacahān i jeē yóhio cujéhu Yaā Dios. Te ndihí ñayuu ñuu ní cajejnúhún i ñayuu cácadije. Te ndijnahan quiví ní jnama Jitoho yō sava ga ñayuu, te ní nduu inuú i jini ñayuu cácadije.

*Jeē ní nduvāha tēe ríngo*

### 3

<sup>1</sup> Te in quiví te maá cáhuni jehini ní caa Pedro jini Juan cuango de templo, chí hora un cájicān tahú jnáhan de hebreo. <sup>2</sup> Te cájendēca ñayuu in tēe cáringo nde quiví ní cacu de. Te tēe un ndéé de ndijnahan quiví yehyí templo jeē naní Hermosa, jicān de caridad nuū tāca ñayuu quívicoo ini templo. <sup>3</sup> Te tēe un ní jito de nuū Pedro jini Juan jeé véji de quívicoo de ini templo, te ní jicān de caridad nuū Pedro jini Juan. <sup>4</sup> Te Pedro jini Juan ní cajito váha de nuū tēe un. Te ní cahān Pedro jini de:

Condehe nū rī jijnáhan ri, achí de.

<sup>5</sup> Te maá tēe un ndétu túhva de, ní jeni ní de jeé cuāha Pedro jini Juan jecu xūhun nū de. <sup>6</sup> Te ní cahān Pedro:

Tú na xūhun plata ní xūhun oro cánevāha ri. Te iyó in jeé váha ga sáha ri jini ró: jini poder maá Jesucristo, Yāā ní jehnu ñuu Nazaret, cáhán rī jini ró, ndocuñí te caca ró, áchí de.

<sup>7</sup> Te ní jni de ndavāha tēe ún, te ní ndonehen de. Te jehé de jini súcūn jehé de ní nduvāha-ní. <sup>8</sup> Te in ní scānda de maá de ní ndocuñí de, te ní quejéé de jica de. Te ní quiví de jini Pedro jini Juan ini templo, jica de, cānda de, te nácuatáhú de nuū Yaā Dios. <sup>9</sup> Te ní cajini tāca ñayuu jeé jica de te nácuatáhú de nuū yā. <sup>10</sup> Te ní canacuni i de jeé maá de cúu tēe ní condee yehyí templo jeé naní Hermosa, ní jicān de caridad. Te ní canaa ní i ní cajito i, te ní cayúhú i cájito i jeé ní nduvāha tēe ún.

*Jeē ní nacani Pedro jnūhun ini corredor jeé naní Salomón*

<sup>11</sup> Te tēe ní nduvāha ún, tu siáá de Pedro jini Juan. Te ní cacutútu-ni cuéhé ñayuu nuū de ini corredor jeé naní Salomón, te ní canaa ní i cájito i. <sup>12</sup> Te ní jito Pedro jeé ní cutútu ñayuu ún, te ní cahān de jini i:

Nihín tēe ñuu yō Israel jijnáhan ní, ¿zajehé cánaa ní ní cájito ní jniū yáha? ¿Najehé cájito

ní núú ná te cájini ní ni jéē maá ná jijnáhan ná iyó poder na jéē sáha ná jéē nácaca tēe yáha? ¿Chí ní nduváha de siquī jeē tēe cájica ndaá cácuu ná cájini ní ní? <sup>13</sup> Tuú chi máá Yáa Dios jíí yō Abraham jíín Isaac jíín Jacob jíín táca gá jíí yō, ní sáha ya jniñu yáha náváha cuni ñayuu jeē cujéhu Sēhe ya Jesús, Yáa jeē ní cajendēca ní núú tēe cácujeñu. Te ná ni cuni Pilato jeē siaá de ya, te tu ní cájēhe ni jñuhun. <sup>14</sup> Te ni casquéhichí ní yá vēsú cūu ya Yáa ndaá, Yáa íi. Te sa suhva ñn tēe jéñni ndiyi ní cacahān ni jíín Pilato jeē na siaá de. <sup>15</sup> Te ni cacahān ni jéē na cūú Yáa jeē sáha jeē tēcu ndihí-ni. Te Yáa Dios ní nastēcu yá Jesús jeē ní cuu ya ndiyi, te máá ná cácuu testigo jeē ní natecu yá. <sup>16</sup> Te tēe yáha jéē cájito ní te cánacani ní de, ni candíje de jíín ná jeē iyó poder Jesús nasáváha ya de, te jeē yúcuu ní nasáváha ya de. Te jeē súcuu ni cacandíje ná ní sáha ya, jeē yúcuu ní nduváha váha de nájñuhun cájito ndihí ní.

<sup>17</sup> Te na cástūhun ná núú ní jíínáhan ní, je jíni ná jéē maá ní jíínáhan ní jíín tēe cácujeñu nuú yō, tu ní cájecūhun ni ní, te jeē yúcuu ní cajehni ní yá. <sup>18</sup> Te súcuu ní squícu jñuhun ní cahān Yáa Dios nde jehanáñ jéē cánuú ndoho Cristo siquī cuéchi ñayuu, chí ní sáha ya jeē súcuu ní cacahān tēe ní canacani jñuhun ya nde jehanáñ. <sup>19</sup> Te na nácani ní ní jéē stóo ní cuéchi ní, te nasāma ini ní, te quívicoo ní ndaha Yáa Dios náváha ndahva yá cuéchi ní. Te quee quiví jeē ndúsí ní ní sáha máá Jítho yō. <sup>20</sup> Te natají yá Jesús ndíji ya, chí cūu ya Cristo, Yáa ní jeni Yáa Dios jeē jnáma ya yohó. <sup>21</sup> Te jíni ññuhún jéē cóo ya andiví ndé nasájéé yá táca jéē iyó, nájñuhun ní cacahān tēe ndoo ní canacani jñuhun nde jehanáñ ní sáha Yáa Dios. <sup>22</sup> Chi suhva ní nacani jíí yō Moisés jñuhun nuú táca jíí yō: Máá Jítho yō Yáa Dios cani ya Yáa nacani jñuhun nuú rō jíijnáhan ró, nájñuhun ní jeni ya ruhū. Te cuu ya ñn jnáhan ñuu yō. Te na chúhun ní rō táca jñuhun jeē nácani ya ún. <sup>23</sup> Te nuú ndé tēe tú chuhun de te de jñuhun cahān yá, jñahnú ndetú de, te ma cūu ga de jnáhan ñayuu yá Israel, áchí Moisés.

<sup>24</sup> Te táca tēe ní canacani jñuhun nde jehanáñ, nde tiempo ni quíji Samuel te ní gá nde vijna, suni ní canacani de jñuhun siquī táca jniñu cūu quiví yáha. <sup>25</sup> Yucūn maá tēe ní canacani jñuhun ya nde jehanáñ cácuu yó, te suni siquī maá yó jíijnáhan yó cūu jeē ní sáha Yáa Dios contrato jíín jíí yō. Chí ní cahān yá jíín Abraham: Yucūn maá ró cane Yáa sáha jeē quéndōo ndetú táca ñayuu níí cáhnu ñayiví, áchí yá. <sup>26</sup> Te jeē ní nastēcu Yáa Dios Sēhe ya, te ní quíji ya nuú maá yó xíhna gá, náváha quéndōo ndetú yō sáha ya, chí sama ya anuá yō jeē ma sáha ga yō jniñu neé, áchí Pedro.

*Jeē ní cajendēca de Pedro jíín Juan nuú tēe*

*cácujeñu*

## 4

<sup>1</sup> Te Pedro jíín Juan níni cácahān gā de jíín ñayuu ún te ní quecoo táca sūtū jíín tēe grupo saduceo, jíín tēe cácujeñu nuú tēe cándito templo. <sup>2</sup> Te yōhyo ni caquítí ní de siquī jeē castéén Pedro jíín Juan nuú ñayuu, jíín jéē cánacani de jñuhun jeē nátecu ndiyi chí je ní natecu Jesús. <sup>3</sup> Te ní cajnií ún de, te ní cachuhun ún de vecāa cone de nde cundijin inga quiví, chí je ní ini. <sup>4</sup> Te cuehē ñayuu jeē ní cajini sōho jñuhun ní cacahān Pedro jíín Juan ní candíje i. Te ní nduu nájñuhun uhūn mil jeē maá nene tēe jeē ní cacandíje.

<sup>5</sup> Te jeē ní cundijin inga quiví ún, te tēe cácujeñu nuú ñayuu hebreo jíín tēe jéhu cándiso jniñu jíín tēe castéén jñuhun tutu ley yá, ni candutútú de ini ñuu Jerusalén. <sup>6</sup> Te suni ní candutútú de jíín Anás jeē cūu sūtū cujéhu ga, jíín Caifás jíín Juan jíín Alejandro jíín táca gá jeē cácuu jnáhan sūtū cujéhu ga ún. <sup>7</sup> Te ní candacu jniñu jeē na quíjicoo Pedro jíín Juan condichi de mēhñú, te ní cacajñuhún de:

¿Ndé ñn ni tejniñu róhó te ndese ní nihín jniñu ró ní sáha ró jéē nduváha tēe yáha? áchí.

<sup>8</sup> Yucúan na te Pedro chí ní cunuú maá Espíritu Santo jíín de, te jíín poder yá ní cahān de jíín táca tēe ún:

Tāca níhín tēe cácujeñu nuú núú yō Israel jíín táca níhín tēe jéhu cándiso jniñu, <sup>9</sup> vijna te cástíchi ní sáña siquī ñn jniñu váha ní casáha ná jéē ní nduváha tēe cūhú yáhá. <sup>10</sup> Te na cástūhun ná nuú níhín jéē cácujeñu ní, náváha suni cuni ndihí jnáhan ñuu yō Israel jeē jíín poder maá Jesucristo, Yáa ní jehnu ñuu Nazaret, ní nduváha tēe índichi nuú ní yáha. Te suu ya cūu Yáa jeē ní cajehni ní jíca cruz, te ní sáha Yáa Dios jeē ní natecu yá. <sup>11</sup> Jesús cūu nájñuhun yūu cimientu jeē quítuu vehe. Te máá ní jíijnáhan ní cácuu nájñuhun tēe casáha vehe, te ní casquéhichí ní yá nájñuhun jeē cátejiyo ní yúú, chí tu ní cácaníje ní yá. Te ní sáha Yáa Dios jeē cūu ya nájñuhun yūu cánuú gá jeē quítuu vehe. <sup>12</sup> Te tú cuítí inga jeē cūu jnama yóhó, chí tuá na inga jeē cujéhu ní jeni Yáa Dios ini ñayiví yáha jéē cūu jnama yóhó, áchí Pedro.

<sup>13</sup> Yucúan na te ní cajini un jéé Pedro jíín Juan jéñu-ni cácahān de. Te je cájini jeē tú tūhva de, chí tēe súcuu-ni cácuu de. Te ní canaa ní cájito nuú de, te ní casáha cuenta jeē ní cajica de jíín Jesús. <sup>14</sup> Te cándēhe núú tēe ní nduváha un, índichi de jíín Pedro jíín Juan, te tu ní cániñ gā modo ndese ga cahān. <sup>15</sup> Yucúan na te ní candacu jniñu jeē na quéndacoo sán de yatá véhe juzgado te ndajñuhun máá jíijnáhan. <sup>16</sup> Te ní cacahān:

¿Ndese sáha yó jíín tēe yáha núu súcuu? Chí ní jité jñuhun yáha núú táca ñayuu ñuu Jerusalén jeē súcuu ní casáha de ñn jniñu

jéhnú, te ma cúu cahán yō jeē tu iyó ndáa.  
 17 Te návāha ma cuité ga jñūhun yáha, na cúxeēn yō nuū de jeē ma cahán cuité gā de jñūhun Jesús nuū ní ñn ñayuu, áchí.

18 Te ni cacana ún de, te ni cacahān ñihin jín de jeē ma cahán cuité gā de jñūhun Jesús ni ma steén gā de jñūhun un núu ní ñn ñayuu.

19 Yūcuán na te ni cacahān Pedro jín Juan:

Cani vāha ni ní te núu núnjahan ni Yaā Dios jeē stóo ná jñiñu ní ndacu ya jeē sáha ná te cuandije ná máa na jñiñu nándacu ní. 20 Chi ma cúu stóo ná jñiñu jeē nácani ná jñūhun ní cajini sōho ná jín jñiñu ní cajito ná, áchí de.

21 Yūcuán na te tēe ni cacutútu un ní cacuxeēn tucu de nuū Pedro jín Juan. Te ni casiaá de cuango de, chi tú cuité na modo stóho de chí cáyūhu cájito ñayuu, chí siquī jñiñu jéhnú ni cuu ún te ndíhi i cacahān i jeē yóhyo cújéhnú Yaā Dios. 22 Chi tēe jeē ní sáha ya jñiñu jéhnú jín de jeē ní nduvāha de, víhyá gā uū xico cuiyā de.

*Jeē ní cajicān tahú ñayuu cácadje*

23 Te ná ni casiaá un Pedro jín Juan cuango de, te ni najinūcoo de nuū táca gá jñáhan de, te ni cacachi de ndese ni cacahān sutū cácujeñu jín tēe jéhnú cándiso jñiñu. 24 Te jeē ní cajini sōho de jñūhun yúcuán, te inuú-ni ni cajicān tahú de nuū Yaā Dios:

Tátā Yaā Dios jeē cújéhnú ní núu ndíhi, máá ní cúu Yaā Dios ni sáha andiví jín ñáyivi jín mar jín táca ndíhi jeē iyó. 25 Te jeē jín Espírítu Santo te ni sáha ní jéē ní cáhān mozo ní David nde jehán:

¿Najehē cáquití ndevāha ni ñayuu sín nació? ¿Te najehē cájeni sáa ní i jeē ndóna i siquī ní?

26 Ni cacutútu jéē cácuu rey ñáyivi jínjahan, te tēe cácujeñu ni cacutútu de, te inuú-ni ni candonda de siquī máa ní jee cúu ní Jitoho ná,

jín siquī Cristo, Yaā jeē ní jeni ní. Achí David.

27 Te jendaá chí Herodes jín Poncio Pilato jín táca tēe ñuu yō Israel jín tēe táca gá nació, ni cacutútu de ini ñuu yáha ní candonda de siquī Séhe ñi ní Jesús, Yaā ní jeni ní. 28 Te súcuán ni cuu návāha squícu táca jñiñu jeē jín poder ní ní cundaā ni ní ndé jehán jéē súcuán coo. 29 Te vijna, Tátā, coto ní ndese cacahān xeēn de nuū na jínjahan ná, te cuāha ni fuerza ni núu na jéē cácuu ná mozo ni, návāha jéhnú-ni nacani ná jñūhun máa ní. 30 Te jín poder ni nasávāha ni ñayuu cácuñu, te sáha ní jñiñu jéhnú jeē steén jeē cújéhnú ní. Te táca jéē yáha sáha ní jín poder Séhe ñi ní Jesús, áchí i jínjahan i.

31 Te nuū ní ndíhi ní cajicān tahú i, te nuū cáyūcu tútu i un ní sáha ya jeē ni jnáa. Te ndíhi i ni cunuú Espírítu Santo jín i, te ni jéhe ya fuerza te jéhnú-ni ni canacani i jñūhun Yaā Dios.

*Jeē ní caneñāha cáhnu i ndajniñu*

32 Te ñayuu cuehē jeē ní cacandje chí inuú cáhīyo ni i jínjahan i. Te tú ni ñn i ní cáhān jeē ndajniñu jeē névāha máa i cuu máa-ni i, chí táca ndajniñu ni caneñāha cáhnu i. 33 Te ñihin cácani apóstol jñūhun jeē ní cajito de jeē ní natecu Jitoho yō Jesús. Te yóhyo ni chindéé ñáhān yá ñayuu cácadje. 34 Chí tú cuité ni ñn i ní ndóho jeē cumaní nuū i, chí táca ñayuu caneñāha cuehē ñūhun chí vehe, ni caxícó i sava te ni caquindeca i xūhún un. 35 Te ni cajéhe i xūhún un núu tēe apóstol, te ni casaja tēe apóstol nuū ñayuu cácadje núu ndese jini ñūhún ñn i. 36 Te iyó ñn tēe nání José jeē cúu yucūn Leví, ni cacu de Chipre, ñūhun jeē ñe sín nuū ndúte. Te tēe apóstol ni casnání de tēe ún Bernabé, jeē cuní cahān: tēe cáhān jñūhun ndeyí ni. 37 Te ni xicó de ñn ñūhun de, te ndáhá de xūhún un ní jéhe de nuū tēe apóstol.

*Siquī cuēchi jeē ní casáha Ananías jín Safira*

## 5

1 Te suni inga tēe nání Ananías jín ñasihí de Safira, ni caxícó de ñn ñūhun de. 2 Te ni chuvāha de sava xūhún un cuu máa de jín ña, chí súcuán ni candajñūhun de jín ña, te ndáhá de inga sava nájnūhun jeē ndíhi cúu, te ni jéhe de nuū tēe cácuu apóstol. 3 Te ni cahān Pedro:

Ananías, ¿naun ni jéhe ro jñūhun jeē quívi jexeén, jeē cúu Satanás, ini anuá ró te stáhú ró Espírítu Santo cuní ró? Chí jeē ní caxícó ró ñūhun ró te cuēchi ró cúu jeé tu ní cáchi ndaā ró jeē ní squendōo ró jecu xūhún un cuajniñu máa ró, chí ni sáha ró nájnūhun jeē ndíhi xūhún ní jéhe ró. 4 ¿Te á násūu cuenta máa ró cúu ñūhun un ndé ná tu xico ró? Te ná ni xico ró ¿te á násūu cuenta máa ró cúu xūhún jéē cuajniñu ró ndé nuū cuní máa ró? ¿Te naun ni jeni ní ró jeē stáhú ró súcuán? Te nasūu máni máa tēe cúu jeē jicu ró stáhú ró, chí suni Yaā Dios, áchí Pedro.

5 Te ná ni jini sōho Ananías táca jñūhun yáha, te ni cotútu-ni de ni jihí de. Te táca ñayuu ní canihñ jñūhun ún, yóhyo ni cayūhú i. 6 Te ni candocuiñi tēe suchí, te ni cachusúcún de ndíyi un cuáchindūji de.

7 Te ni cunduú nájnūhun uní hora. Te ni jinú ñasihí ndíyi un ní quívi ña ini vehe ún, te tú na vé jini cuité ña. 8 Te Pedro ni cajñūhún de ña:

Cachi nuū rí, ¿á ñn súcuán-ni ni caxícó ró ñūhun ró chí tuú? áchí de.

Te ni cachi ña:

Suu súcuán-ni ni caxícó ná, áchí ña.

9 Te ni cahān Pedro jín ña:

¿Naun ni casquíñahan jñūhun ró jéē cóto ndee ró Espírítu Santo máa Jitoho yō? Chí ni nducú ró stáhú ró yá. Cuni nahín jéē

cáhna nanecoo tēe cuachindūji yī rō, te suni súcuan quichindūji de rōhó, áchí de.

<sup>10</sup> Te ni cotúú-ni ña nuū jehé Pedro te ni jihí-ni ña. Te ni ndivicoo tēe suchí un te ni cajito de jeé jé ni jihí ña, te ni caquenehen de ña, te ni jechindūji de ña xiin yá ña. <sup>11</sup> Te yōhoyo ni cayūhū ndiviū ñayuu cácadnje jíin táca gá ñayuu jeé ní cajini jñūhun jeé súcuan ni cuu.

*Cuehē jniñu jéhu ni casáha apóstol*

<sup>12</sup> Te cuehē jniñu jéhu jeé steén jeé cújéhu Yaā Dios ni casáha tēe apóstol nuū ñayuu. Te táca ñayuu cácadnje, inuū-ni cándutúú i ini corredor jeé nani Salomón. <sup>13</sup> Te tu ní cáchundeyí ni inga ñayuu quijnáhan jíin i. Te cájejnūhūn i ñayuu cácadnje. <sup>14</sup> Te ni nducuehē gā i, chí cúu tēe cúu ñahan ni cacandje i máá Jitoho yō. <sup>15</sup> Te cáquindeca ñayuu jnahan i jeé cácuū, te cájequin i ini calle cácaa i nuū camilla jíin nuū yúu, chí cácumi i vēsū ste cuándahū Pedro na yáha siquī i te nduváha i. <sup>16</sup> Te suni cuehē ñayuu táca ñuu cáhiyo yajni yūcuan ní quijicoo i ñuu Jerusalén ni caquindeca i jnahan i jeé cácuū jíin jéé cándoho tachí, te ndihi i ni canduváha i.

*Jeé ní cajito xeēn i tēe cácuu apóstol*

<sup>17</sup> Yūcuán na te sutū cújéhu ga jíin táca gá jnahan jeé cácadnje sahan saduceo, ni cacucuéśun ni jeé siquī tēe cácuu apóstol. <sup>18</sup> Te ni cajni de tēe cácuu apóstol ni cachuhun de vecāa. <sup>19</sup> Te in ndajéhé máá Jitoho yō ni nune ya yehyí vecāa ún jecuaá, te ni quenehen ya de jíjnahan de. Te ni cahān yā jíin de:

<sup>20</sup> Cuáhān te cuīñi rō ini templo, te yūcuán nacani cájī rō jñūhun nuū ñayuu siquī ndese nihin tahū i cotecu i ní cáni, áchí ndajéhé yā.

<sup>21</sup> Te ni cajini sōho de jñūhun yáha. Te nuū ní cundijin te nehen ni quivicoo de ini templo, te cástéén de jñūhun ya nuū ñayuu.

Te níni cástéén de te sutū cújéhu ga jíin táca jnahan de ni canastútú de tēe junta cújéhu ga, jeé cúu ndihi tēe jéhu cándiso jniñu nuū ñayuu nación Israel. Te ni catajī de policía cuaquenehen tēe apóstol ini vecāa. <sup>22</sup> Te nuū ní jíinūcoo te tuá gā tēe apóstol. Te ni canandió cóo te ni cacachi:

<sup>23</sup> Jendaá cúu jeé ní cajito ná ndési vāha vecāa, te cáhiin tēe cándito yehyí un. Te nuū ní canune ná, te tú cuiti gā tēe un cáhiin ini vecāa ún, áchí de.

<sup>24</sup> Te sutū cújéhu ga jíin tēe cújéhu nuū tēe cándito templo jíin sūtū cácujehu, nuū ní cajini sōho de jñūhun yáha, te ni cajeni ni de ndese ga cúu un núu súcuan. <sup>25</sup> Te ni quee-ni in tēe te ni cachi:

Tēe jeé ní cachuhun ní vecāa, cáhiin de ini templo, te cástéén de jñūhun nuū ñayuu, áchí de.

<sup>26</sup> Yūcuán na te tēe cácujehu nuū tēe cándito templo, jíin tēe cácuu policía de, ni

jeogoo de, te yúcuun ní nacueca de táca tēe apóstol vendicoo de jíin, chí cáyūhū de jeé sanaa te cuāha ñayuu yuū xinī de núu sáha xeēn de jíin táca tēe apóstol. <sup>27</sup> Te nuū ní najinūcoo de jíin tēe apóstol, te ni cajecuiñi de nuū tēe casáha junta. Te sutū cújéhu ga ni cahān:

<sup>28</sup> Ni cacahān nihin ri jíin rō jeé ma steén cuiti gā rō jñūhun tēe nání Jesús. ¿Te naun ni casáha rō jéé ní ndecāva jñūhun un ní ñuu Jerusalén yāhá? Te cácumi rō staú yáhu rō rúhū jíjnahan ri siquī jeé ni jihí tēe ún, áchí.

<sup>29</sup> Te Pedro jíin táca gá apóstol ni cacahān de:

Cánuū jéé squícu ná jniñu ní ndacu Yaā Dios nuū ná te nasūú jniñu nándacu tēe. <sup>30</sup> Máá Yáā Dios jíi yō ní nastecu yā Jesús, Yaā ní cajehni má ní jeé ní cata caa ní yá jicá cruz. <sup>31</sup> Te ní sáha Yaā Dios jeé ní ndujéhu tucu Jesús néne ya ichi ndáváha Yaā Dios, te cúu ya Yaā ndacu jniñu, Yaā jnáma ñayuu. Te súcuan ni sáha Yaā Dios náváha yóhó, jéé cácuu yó ñayuu Israel, na nácani ni yō jeé stóo yó cuéchi yó, te cone cáhu ni yā nuū táca cuéchi yó. <sup>32</sup> Te máá ná ni cajito ná táca jniñu yáha, te suni máá Espírítu Santo steén cají yá jeé súcuan cúu, chí jéhe Yaā Dios Espírítu Santo yā condee ini anuá táca ñayuu jeé cájendetū nuū yā, achí de.

<sup>33</sup> Te ná ni cajini sōho un jñūhun yáha, te yōhoyo ni caquīñi ni, te cahni de cácumi nuū.

<sup>34</sup> Te mēhñū un jíjnahan néne in tēe grupo fariseo nání de Gamaliel, te cúu de maestro jeé steén ley yā, te táca ñayuu cájejnūhūn i de. Te ni ndocuiñi de, te ni ndacu de jniñu jeé na cújiyo núu tēe apóstol. <sup>35</sup> Te ni cahān de:

Róhó jnahan ñuu yō Israel, cani vāha ni rō núu na vé cácumi rō sáha rō jíin táca tēe yáha. <sup>36</sup> Chí nucūhun ni rō jeé in cuiyā ni ndonda Teudas siquī gobierno, te ni cahān de jeé tēe téyí cúu de, te ni cacutútú nájnūhun cuūn ciento tēe jíin de. Yūcuán na te ni cajehni ñayuu Teudas, te táca jéé ní caqui-jnahan jíin de ni cajitē núu cuangoo sáa-ni, te ni jecuiñi-ni jniñu ún. <sup>37</sup> Yūcuán na te quiví ni iyo censo te Judas, in tēe Galilea, ni ndonda de siquī gobierno, te ni cacutútú cuéhé tēe jíin de. Te suni ni cajehni ñayuu Judas, te táca tēe jeé ní caqui-jnahan jíin de ní cajitē núu cuangoo. <sup>38</sup> Te vjina na cuáha ri consejo rohó. Ma stáhān gā rō tēe yáha. Siáá de na quíngoo de. Chí núu ñayuu-ni ní squejéé jniñu yáha, te jecuiñi in. <sup>39</sup> Te núu Yaā Dios ni squejéé, te ma cúu casi rō, chí sanaa te siquī Yaā Dios cándonda rō, áchí de.

<sup>40</sup> Te ni cachusóhó jéé ní cahān Gamaliel. Te ni canacana tēe cácuu apóstol, te ni cacani de jíin cuarta ñi te ni cacahān xeēn jíin de jeé ma cahān gā de jñūhun Jesús, te ni casiáá de cuangoo de. <sup>41</sup> Te máá apóstol ni quendacoo de nuū junta cuangoo de, cácusñi ni de jeé ni jéhe ya jñūhun ndoho de jeé cuáha ñayuu

jnūhun canu de siquī jeē cácanđje de ya.  
<sup>42</sup> Te ndíquivī castéén de jnūhun vāha Jesu-  
 cristo, te cácanani de jnūhun ún ini templo  
 jín táca-ni vehe.

*Jeē ní cajeni de uxā tēe cuajniñu mēhñu  
 ñāyuu cácanđje*

## 6

<sup>1</sup> Te ni cucuehē ñayuu cácanđje. Te tiempo  
 un te tēe hebreo jeē cácahān yuhu griego,  
 ni quejéé de cácahñu de nuū jnāhan he-  
 breo de, áchí de jeē ñahan viuda jeē cácahān  
 yuhu griego tu cániññ vāha ña staā jeē  
 cásaja de táca quivī cuu ña. <sup>2</sup> Yūcuán na te  
 máá ndihúxí uū apóstol ni canastútú de táca  
 ñāyuu cácanđje, te ni cacahān de:

Tú vāha jeē jécuiñī jniñu jeē cácanani ri  
 jnūhun Yaā Dios siquī jeē cásaja rī staā.  
<sup>3</sup> Núu súcuan te róhó, hermano, nacāji ró uxā  
 jnāhan máá yó, te na cóndiso jniñu de saja de  
 staā. Te nacāji ró tēe jeē cájejnūhún ñāyuu de,  
 tēe ndíchí jeē ní cunuú Espíritu Santo jín de.  
<sup>4</sup> Te ruhū jijnāhan ri, máni cacān tahu rī jín  
 jeē nácani ri jnūhun ya, achí de.

<sup>5</sup> Te ndíhi ñayuu ní canujnahan ni i jnūhun  
 ni cacahān de. Te ni canacāji i Esteban, tēe  
 cándje vāha jeē ní cunuú Espíritu Santo jín  
 de. Te suni ni canacāji i Felipe jín Prócoro  
 jín Nicanor jín Timón jín Parmenas jín  
 Nicolás. Te Nicolás cūo tēe ñuu Antioquía, te  
 ni nduu de tēe cándje sahan ñayuu hebreo  
 nde ná tu candje de jnūhun Cristo. <sup>6</sup> Te ni  
 cajeni i táca tēe yāha nuū tēe cácuu apóstol, te  
 tēe apóstol un ni casoó de ndaha de xinī táca  
 tēe un ní cajicān tahu de nuū Yaā Dios siquī  
 jniñu cóndiso de.

<sup>7</sup> Te jnūhun Yaā Dios ni jitē gā cuahān, te  
 ni nducuehē teyī ñayuu cácanđje i jnūhun  
 ya ini ñuu Jerusalén. Te suni cuehē sutū ni  
 cacandje de jnūhun ya.

*Jeē ní cajni de Esteban*

<sup>8</sup> Te ni chindéé ñahān yá Esteban ni jēhe ya  
 poder nuū de, te ni sáha de táca jniñu jēhnu  
 nuū ñāyuu, jniñu jeē steén jeē cūjēhnu Yaā  
 Dios. <sup>9</sup> Te ñayuu hebreo jeē ní cacuyāhu i  
 te ni canduu libre i, iyó vehe i sinagoga i.  
 Te tēe un cácuu tēe ñuu Cirene jín tēe ñuu  
 Alejandria jín tēe Cilicia jín tēe Asia. Te  
 sava tēe un ní caquejéé de cástāhān jnāhan  
 de jín Esteban. <sup>10</sup> Te tu ní cácuñdeyí jín de,  
 chí ndíchí ní cahān de ni sáha máá Espíritu  
 Santo. <sup>11</sup> Yūcuán na te ni cascāhān sava  
 tēe jeē na cáhān jnūhun stáhú siquī Este-  
 ban. Te ni cacahān jeē ní cajini sōho cáhān  
 ndevāha Esteban siquī Moisés jín siquī Yaā  
 Dios. <sup>12</sup> Te jeē súcuan ni cacahān te ni caquiti  
 ni táca ñayuu jín tēe jēhnu cándiso jniñu jín  
 tēe cástéén jnūhun tutu ley yā. Te ndíhi de  
 ni candonda siquī Esteban, te ni cajni de  
 cuango jín de nde nuū junta cūjēhnu ga.

<sup>13</sup> Te ni cajeni de tēe cahān jnūhun yáá siquī  
 Esteban, te suhva ni cacahān:

Tēe yāha tu ndé jécuiñī de jeē cahān  
 ndevāha de siquī templo i yāha jín siquī ley  
 yā. <sup>14</sup> Chí ni cajini sōho ná cáhān de jeē Jesús,  
 tēe ni jehnu ñuu Nazaret, canu de templo  
 yāha te nasama de jeē tajnúni ley yā jeē ni  
 jēhe Moisés nuū yō, áchí.

<sup>15</sup> Yūcuán na te ndíhi tēe cáyucu nuū junta  
 un ní candacoto vāha nuū Esteban, te ni  
 cajini jeē jito nuū de ná jito nuū iñ ndajéhe  
 Yaā Dios.

*Jnūhun ni nacani Esteban*

## 7

<sup>1</sup> Te máá sūtū cūjēhnu ga ni cajnūhún Este-  
 ban:

¿A ndāá jeē súcuan ni sáha ró nájñūhun  
 cácahān de yāhá? áchí.

<sup>2</sup> Te ni cahān Esteban:

Ndíhi níhín jēé cácuu ní jnāhan ñuu yō, jín  
 ndíhi níhín jēé cácuujēhnu ní nuū ñūū yō, cuni  
 nahín ní jnūhun cahān ná: Máá Yāā Dios jeē  
 yóhoyo cūjēhnu ya, ni steén yā máá yā nuū  
 jii yó Abraham nde na néne ga de región  
 Mesopotamia, nde ná tu quihñ de condee  
 de ñuu Harán. <sup>3</sup> Te ni cahān yā jín de: Stóo  
 ñuu ró jín táca jnāhan ró te quihñ ró nuū  
 cuāhi ri condee ró, chí máá ri steén ichi nuū  
 quihñ ró, achí yā. <sup>4</sup> Yūcuán na te ni quenda  
 de región Caldea, te ni jinū de ni condee de  
 ñuu Harán. Te yūcuan ní jihí tatá de. Yūcuán  
 na te ni sáha Yāā Dios jeē ní quee de ñuu yāha  
 nuū cáyūcu yó vijna. <sup>5</sup> Te tu ní jēhe ya ni iñ  
 tíhli ñuhun yāha cuu tahu de. Te vēsú súcuan  
 te ni jejnūhun ya jeē cuāha ya ñuhun un nuū  
 de nde jín nuū táca sēhe de, vēsú ná tu coo  
 sēhe de sáá. <sup>6</sup> Te súcuan ni cahān Yaā Dios  
 jín de: Sēhe ró coyūcu jicá i inga ñuu, te cūñ  
 ciento cuiyā sājniñu sáá-ni i te stóho ñayuu  
 yūcuan i. <sup>7</sup> Te siquī jeē súcuan sáha i jín sēhe  
 ró, te máá rí chí stóho ri ñayuu ñuu ún. Te sáá  
 te quendacoo sēhe ró yūcuan, te nucoyūcú i  
 yāhá chíñhún i ruhū, achí yā. <sup>8</sup> Te ni cahān  
 yā jín Abraham jeē na chú de circuncidar,  
 jeē cúu iñ jnuñi jeē ni sáha ya contrato jín  
 de. Te ná ni cacu sēhe de Isaac te ni sáha de  
 circuncidar i nuū uná quivī. Te suni súcuan  
 ni sáha Isaac jín sēhe de Jacob, te Jacob jín  
 sēhe yí de jeē cácuu ndihúxí uū yucūn ñayuu  
 Israel.

<sup>9</sup> Te táca sēhe Jacob ni cacucuésun ni de  
 jín ñani máá de José, te ni caxicó de i nuū tēe  
 jeē ní cajendēca i nde nación Egipto. Te Yaā  
 Dios chí ni ndito ya José. <sup>10</sup> Te ni jnama ya i  
 nuū táca jnūndóho ní jito i, te ni cundíchí i ni  
 sáha ya. Te Faraón, tēe cúu rey nación Egipto,  
 ni cusñ ni de jín i ni sáha ya, te ni tejniñu  
 de José jeē cúu de gobernador te ndacu de  
 jniñu nación Egipto jín nuū ñayuu cáyūcú  
 vehe Faraón.



<sup>11</sup> Te ni quiji quiv̄i jeē ni iyo ñn jnamā xeēn, te ni ndoho ñayuu n̄i cáhnu nación Egipto jíin ndé ñuu Canaán. Te tāca jíi yō ún, tuá ní cánih̄n de jeē cáji de. <sup>12</sup> Te ni nih̄n Jacob jñuhun jeē iyó trigo nde nación Egipto, te ni taji de sēhe de ní jengoo de ni cajeen de trigo vuelta ñn. <sup>13</sup> Te jeē cuángoo de vuelta uū te ni nastúu José jeē maá de cúu ñani de jíjnahan de. Yūcuán na te ni jini rey Faraón ndé ñn jnahan cúu José. <sup>14</sup> Te ni cahān José jíin tāca ñani de jeē na cóndeca de tátá de Jacob jíin nd̄hi jnahan vehe de. Te ni iyo un̄i xico xahūn i. <sup>15</sup> Te súcuan ni cuu jeē ni jínu Jacob ni condee de nación Egipto nde ni jih̄i de. Te suni yūcuan ní coyūcu sēhe de jeē cácuu jíi yō un ndé ni cajih̄i maá de. <sup>16</sup> Te ná ni quee quiv̄i jeē ndénehen ya tāca yūcūn de jeē cáyūcu tátú de nación Egipto, te ni cacondiso de yiqui ndihúxi uū nd̄iyi jíi un jéē nd̄iji ñuu Siquem, te ni cachindūji de ini yaū nd̄iyi ndeé jíca cáva jeē ní jeen jíi yō Abraham nuū tāca sēhe Hamor ñuu Siquem.

<sup>17</sup> Te nde ná cáyūcu gá de nación Egipto, te cuacuyajni quiv̄i jeē squicu jñuhun ni cahān Yaā Dios jíin Abraham jeē quéndacoo sēhe de nucoyūcú i ñuu ni jéjnūhun ya nuū i, te ñayuu un ní tahū cuehē i ini nación Egipto. <sup>18</sup> Yūcuán na te ni nucuiñ̄i inga rey ñuu Egipto jeē tu ní jíni de jeē váha ni sáha nd̄iyi José. <sup>19</sup> Te rey un ní stahú de tāca jíi yō te ní sáha ndeváha de jíin i, chi ní sáha fuerza de i jeē ma cóto ga i sēhe yiquín i te na cúu. <sup>20</sup> Te tiempo un ní cacu Moisés, te ni cus̄i ní Yaā Dios jíin i. Te un̄i yoó ní condito sáhi náná i tátá i. <sup>21</sup> Te tuá ní cúu condito sáhi de i, te ni cachune de i nuū nanih̄n sēhe s̄h̄i Faraón i, te ni naquih̄n sēhe ña i ni scūh̄nu ña i nájnūhun sēhe maá ña. <sup>22</sup> Te ni cutūhva Moisés tāca jñuhun ndíchí ñuu Egipto, te ni cujéhnu de jíin jñuhun cáhán de jíin jñiñu sáha de.

<sup>23</sup> Te nuū uú xico cuiyá de te ni jecondēhé de jnahan de jeē cácuu ñayuu Israel. <sup>24</sup> Te ni jito de nuū ñn tēe nación Egipto jeē sáha ndeváha jíin ñn tēe Israel. Te Moisés ni jnama de jnahan de Israel ún, chi ní jehni de tēe Egipto un. Te súcuan ni ndutahū jeē ní sáha ndeváha jíin jnahan de ún. <sup>25</sup> Te máá Moisés jéni ni de jeē jécūhun ni tāca jnahan de jeē Yaā Dios ni taji yá de jeē jnáma de jnahan de ún ini nación Egipto nuú, te tu ní cájécūhun cuiñ̄i ní jnahan de ún. <sup>26</sup> Te inga quiv̄i suni ní jito de nuū uú tēe Israel jeē cájénahan, te cuní de jeē na jécuiñ̄i. Te jeē yūcuan ní cahān de jíin: ¿Najehē casáha ndeváha ró jíin jnahan ró? Chi nájnūhun ñn ñani-ni cácuu ró, áchí de. <sup>27</sup> Te máá tēe cáni tahū jnahan un ní chundahá de Moisés te ní cahān de: ¿Ndé ñn ni jeni róhó jéē cujéhnu ró núu r̄i te sándaa ró jñiñu ri jíjnahan ri? <sup>28</sup> ¿Chí suni cuní ró cahni ró ruhū nájnūhun ni jehni ró tēe Egipto icu chí naún? áchí de

jíin Moisés. <sup>29</sup> Te nuū ní jini sōho Moisés jñuhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jíca Madián, te yūcuan ní scácu ñasih̄i de uū sēhe yíi de.

<sup>30</sup> Te ní jinu uū xico cuiyá jeē néne de yūcuán. Yūcuán na te ñn ndajéhé Yaā Dios ni quenda ya nuū de nde nuū ññuhun téhé nuū ñn yucu súcún Sinaí. Te ni quenda ya nuū de xin̄i ñn yucū cuí cáhnu cándahá yáñuhūn, te tu ní cáyú yucū ún. <sup>31</sup> Yūcuán na te Moisés ni naa ni de jíto de ún, te ni jehēn de nde nuū, náváha coto váha de. Te ni jini sōho de jeē cahán maá jítoho yō jíin de: <sup>32</sup> Máá r̄i cúu Yaā Dios tāca jíi ró jenahán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yūcuan tuá ní cūndeyí ní de coto de nuū. <sup>33</sup> Te máá jítoho yō ní cahān yá jíin de: Quenehen ndijēn ró chí nuū ñn ró, ñuhun íi cúu. <sup>34</sup> Je ni jini r̄i ñayuu maá r̄i jeē yóhoyo cándoho i nación Egipto, te suni jíni sōho ri jeē cájnana uhū i, te ní cuun r̄i vej̄i ri jeē jnáma ri i jíjnahan i. Núu súcuan te vijna chí taji r̄i rohó ndicó ró quih̄n ró nde nación Egipto, achí yá jíin de.

<sup>35</sup> Te nde ná tu quenda Moisés Egipto, te tāca jnahan de ní casquéhichí i de jeē ní cacahān i jíin de: ¿Ndé ñn ni jeni róhó jéē cujéhnu ró núu r̄i te sándaa ró jñiñu ri? ní cacahān i jíin de. Te vesú súcuan te máá ndajéhé Yaā Dios ni quenda nuū Moisés un jéē cándahá cáyú yucū cuí ún. Te súcuan ni cuu jeē ní nataj̄i yá de cuanuhun de nde Egipto jeē ndácu de jñiñu nuū i te jnama de i. <sup>36</sup> Te máá Moisés ní sáha de jeē ní quendacoo jnahan ñuu de ini nación yūcuan, te ni cayáha de Mar Rojo, te ní cajica cuu de ñuhun téhé uū xico cuiyá. Te ní tiempo un ní sáha de cuehē jñiñu jéhnu jeē steén jeē cujéhnu Yaā Dios. <sup>37</sup> Te máá Moisés cúu jeē suhva ni cahān de jñuhun yáha jíin jnahan ñuu yō Israel: Máá Yaā Dios cani ya Yaā nacani jñuhun nuū ró jíjnahan ró nájnūhun ní jeni ya ruhū. Te cuu ya ñn jnahan ñuu yō. Te na chúhun ní ró jñuhun cahān Yaā ún, áchí. <sup>38</sup> Te suni nde ná ní cajica cuu jíi yō nde nuū ññuhun téhé, te ní cahān ndajéhé yá jíin Moisés xin̄i yūcu súcún Sinaí, te ní nih̄n de jñuhun jeē cahān ndese nih̄n tahú yō cotecu yō, te ní nacani de jñuhun un núu tāca jíi yō, te ní quendōo jñuhun un núu yō.

<sup>39</sup> Te tāca jíi yō ún tu ní cácuñi de cuandetu de nuū Moisés, chí sa suhva ní cacuní de squéhichí ní de Moisés, te ní cacuní de nandicó de nungoo de Egipto nuú. <sup>40</sup> Te ni cacahān de jíin Aarón: Sáha ní tijni yaā na cósnūu núu yō. Chí Moisés, jeē ní quenehen de yóhó Egipto vej̄icoo yō, tu cájini yō na vé ní ndoho de jeē tú de ndeé jeē cuahán de xin̄i yucu Sinaí, achí. <sup>41</sup> Yūcuán na te ní cajéhe de oro ní cuváha ñn becerro oro, te nuū becerro ídolo un ní casocó de quiti, te

ni cacusi ni de jín ídolo ni casáha de ún.  
 42 Te Yaā Dios ni cujiyo ya cuahān yā, te ni stóo ya de na chíñúhún de nuū tāca jéē jito yó ín andíví, nájñuhun yósó nuū tútu tēe ni canacani jñuhun Yaā Dios nde jenahán:

Ni cahān yā: Róhó ñayuu Israel,  
 ¿á cájeni ni rō jeē nuū ruhú ni casocō rō quitu ná ni cajica cuu ró úu xico cuiyā nde nuū ñuhun téhé?

43 Tuú, chí sa suhva ni cacondiso ró nicho jeē íne ídolo jeē naní Moloc

jín figura quimi jeē naní Renfán,  
 ídolo jeē ní casáha máá ró ni cachíñúhún ró. Jeē yúcuau cúu jeē síaha ri rohó quhín jicá ró nde yatá ñúu Babilonia, achí yá.

44 'Te ni ndacu ya jñíñu nuū Moisés jeē na sáha de vehe ñí nuū chíñúhún de ya, nájñuhun cáa jeē ní steén yā nuū de. Te tāca jíí yō, nde nuū ñuhun téhé ní canevāha de vehe íi un núu ní cachuvāha de tabla yuū jeē yosó jñuhun ley yā. 45 Te ni castóo de vehe un núu ndíhi sēhe de jeē cúu jíí yō. Te ni quívi Josué jíin jíí yō iní nación yáha, te ni sáha ya jeē ní cacundeyí de jíin tāca ñayuu jeē ní cacoyūcu yáha ní cajinu i cuangoo i. Te ni quívicoo de tācá ñuu i jíin vehe íi ún, te ni quendōo nde quívi ní cuu David rey. 46 Te ni cusí ni Yaā Dios jíin rey David. Te ni jicān de nuū yā jeē sáha de ñn vehe íi yā nuú, chí máá yá cúu Yaā Dios jíi de Jacob. 47 Te ni cuu jeē nde sēhe yíi de Salomón ni sáha vehe íi yā. 48 Te vesú súcuau ní cuu te Yaā cujéñhu téyí, tu ndéé yá máá vehe jeē casáha ñayuu, nájñuhun ní cahān tēe ni nacani jñuhun ya nde jenahán:

49 Ní cahān yā:

Andíví cúu nájñuhun mesa nuū ndácu ri jñíñu

te ñayívi cúu nájñuhun ñn nuū yítuu jehé rí.  
 Núu súcuau ¿te ndese cuu sáha ró vehe jeé cóndee rí,

te ndese cuu sáha ró nuú ndétātu rí?

50 ¿A násūu máá rí ní sáha ndíhi jeé iyó?

achí máá Jítoho yō Yaā Dios.

51 Te cáhán gā Esteban:

Yōho cácuñhni ní ní, te tu cácuu ní nájñuhun ñayuu tācá nación jeē tu cájini i jñuhun ya ni tu cácuandje i ya. Chí níni cájesi ní nuū Espíritu Santo, te nájñuhun ní casáha jíí yō jenahán, suni súcuau casáha ní vjna. 52 ¿A ní Iyo tēe nácani jñuhun ya nde jenahán jeē tu ní sáha ndevāha jíí yō jíin de? Chí jíí yō ní cajehni de tēe ní canacani jñuhun jeé quíji máá Yáa ndaā. Te je ni quíji Yaā ún, te máá ní ni canastúu ní yá nuū tēe ní cajehni de ya. 53 Te vesú nde jíin tāca ndajéhé yā ní jēhe ya ley yā nuū yō, te máá ní chí tu cáscuicu ní, achí Esteban.

*Jeē ní cajehni de Esteban*

54 Tāca jñuhun yáha ní cajini sōho, te yōhyo ní caquítí ní, te cáncayíhí yuhu cájito nuū Esteban. 55 Te máá Esteban chí ní cunuú Espíritu Santo jíin de. Te ní jito de ichi andíví, te ní jini de jeē ndíndēe nuú néne Yaā Dios, te índichi Jesús ichi ndávāha ya. 56 Te ní cahān de:

Vjina te jito ri jeē núne andíví, te jito ri nuū máá Yáa ní nduu tēe, índichi yā nuū cujéñhu ya lado vāha Yaā Dios, achí de.

57 Yūcuán na te ní cajesi un sóho, te ní cacana cóhó, te ñuu-ni ní candonda siquí Esteban. 58 Te ní caquenehen Esteban cuangoo jíin de nde yatá ñúu. Te tēe ní cacahān yaā un jíin ndíhi jñahan de ní cachucú de ticāhí de ndíto ñn tēe suchí nání Saulo, te ní cacani de yuū xiní Esteban. 59 Te níni jéē cácani tāca tēe un yúu xiní de te ní jicān tahú de nuū yā:

Tátá Jesús jeé cúu ní Jítoho ná, naquihín ní ánuu na vjna, achí de.

60 Te ní jecuíñi yítí de te ní cahān jee de:

Tátá Yaā Dios, ma quénehen ní cuéchi siquí i jeé casáha i jíin ná, achí de.

Súcuau ní cahān de te ní jihí-ni de.

*Jeē ní jito xeēn Saulo ñayuu cácuandje*

## 8

1 Te Saulo, ní nujnahan ní de jeē ní jíhi Esteban.

Te quívi un ní caquejéé de cájito xeēn ndasí de ñayuu cácuandje Jesús iní ñuu Jerusalén, te jeé yúcuau cúu jeé ní cajitē núu ñayuu cácuandje cuangoo i ní Judea jíin ní Samaria. Te tēe apóstol chí tu ní cájité núu de. 2 Te sava tēe yíñúhún nuū Yaā Dios, ní cachindūji de Esteban. Te yōhyo ní candahyū de jeé ní jíhi Esteban. 3 Te Saulo chí jito xeēn de ñayuu cácuandje, te quívi de ndijnahan vehe te jñí de tēe, ñahan, chūhun de i vecāa.

*Jeē ní canacani i jñuhun Yaā Dios ndaíñúu Samaria*

4 Te tācá ñuu nuū cuangoo tāca ñayuu ní cajitē núu un ní canacani i jñuhun ndese jnáma Yaā Dios ñayuu. 5 Te ní jinū Felipe ñn ñuu ndaíñúu Samaria, te nuū ñayuu yúcuau ní nacani de jñuhun Cristo, Yaā ní jeni Yaā Dios jeé jnáma ya yohó. 6 Te tāca ñayuu ní cacutútú un ní cajini nahín vāha i tāca jñuhun ní nacani Felipe, te ní cajito i tācá jñíñu jéñhu ní sáha de. 7 Chí cuehē ñayuu cándoho tachí ní canduvāha i, te cácana cóhó táhí un ní caquendacoo. Te cuehē ñayuu ní íjin jíin ñayuu ringo ní canduvāha. 8 Te jeé yúcuau ní cacusi teyí ní ñayuu ñuu ún.

9 Te iní ñuu un néne ñn tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ní ñayuu ñuu un cájito i jeé sáha Simón, te ní stahú de i ní cahān de jeé ñn tēe cujéñhu téyí cúu máá de.

10 Te nde tēe cácujuhnu jíin ndivii cuiti ñayuu, cájetáhú ndasí i jñuhun cáhán de, te ni cajeni ni maá i te ni cacahán i:

Tēe yáha ní jēhe Yaā Dios cuehē poder nuū de, áchí i.

11 Te cájetáhú váha i jñuhun cáhán de, chi cuehē tiempo ni sáha de jñiñu stáhú ní canaa ni i ni cajito i. 12 Te nuū ni jíin Felipe, ni nacani de jñuhun váha ndese ndácu Yaā Dios jñiñu, jíin jñuhun Jesucristo, te ni cacandíje i te ni cajendute i, cúu tēe cúu ñahan. 13 Te suni maá Simón ni candíje de te ni jendute de, te ni jica cuu de jíin Felipe. Te ni naa ni de jito de táca jñiñu jéhu jeē sáha Felipe jeē steen jeē júehnu Yaā Dios.

14 Te cáyūcu tēe apóstol ñuu Jerusalén, te ni canihín de jñuhun jeē ñayuu Samaria ni cacandíje i jñuhun Yaā Dios. Te ni catajé de Pedro jíin Juan cuangoo de yūcuán. 15 Te ni jinūcoo de, te ni cajicān tahú de jēhē ñayuu un návāha na quívi Espíritu Santo ini anuá i jíinánhan i. 16 Chi ná tu quívi ya ini anuá ni ñin i, chí maá-ni jeē ní cajendute i jeē ní cacandíje i Jitoho yō Jesús. 17 Yūcuán na te Pedro jíin Juan ni casoó de ndaha de xiní i jíinánhan i, te ni quívi Espíritu Santo ini anuá i.

18 Te ni jito Simón jeē súcuan casoó apóstol ndaha de xiní ñayuu ún te súcuan quívi Espíritu Santo ini anuá i, te cúni de cuāha de xūhun nuū tēe apóstol návāha nihín de poder un núu. 19 Chi ní cahán de:

Cúni na jēe cuāha ní poder yáha núu na, návāha nuū ndé ñayuu soó ná ndaha ná xiní i te quívi Espíritu Santo ini anuá i, áchí de.

20 Yūcuán na te ni cahán Pedro jíin de:

Na náá xūhun ró je jnahnū ndetū rō siquí jeē jéni ní rō jeé jíin xūhun te cuu cuaan ró tahú jeē véji nuū Yaā Dios. 21 Ma nihín tahú rō jeé sáha rō jñiñu yáha, chi tu íyó ndáá anuá rō nuū Yaā Dios. 22 Núu súcuan te jíni ñúhún jeé stóo rō jñuhun jeé jéni neé ní rō súcuan te cahán ndahú rō jíin Yáa Dios, te maá yá sanaa te cone cáhu ni yá siquí jeé jéni neé ní rō súcuan. 23 Chi jíni rí jeé cucuésún ni rō siquí jeé sáha ri jñiñu yáha. Te táca jéé neé jéni ní rō ni cunuú un jíin ró, achí Pedro jíin de.

24 Yūcuán na te ni cahán Simón jíin de:

Cacān tahú ní jēhē na jíinánhan ní núu maá Jitoho yō návāha tú jnahnū ndetū na nájñuhun ní cahán ní, áchí de.

25 Te Pedro jíin Juan ni cacahán cají de ndese cácandíje de jñuhun Yaā Dios. Te jeé cuánungoo de ichi únú Jerusalén, te tijni ndañúu Samaria ni canacani de jñuhun jeé jnáma ya ñayuu.

*Felipe jíin tēe nación Etiopía*

26 Yūcuán na te ni cahán ndajéhé maá Jitoho yō jíin Felipe:

Quihin ichi te quihín rō ichi sur, ichi jeé quéndé Jerusalén cuahán nde ñuu Gaza, áchí yá.

Te ichi chúcuan chí maá ñuhun tēhé cúu. 27 Te ní quihin Felipe ichi cuahán de. Te nde nación Etiopía ní quiji ñin tēe eunuco jeé ndíso jñiñu de cúu de tesorero nuū ñahan cúu reina ndácu jñiñu nación Etiopía, nání ña Candace. Tēe un ní quichiñúhún de Yaā Dios ñuu Jerusalén. 28 Te cuanuhun de néne de nuū carreta de, te cáhu de tutu jeé ní tee Isaías, tēe ní nacani jñuhun Yaā Dios nde jenahán. 29 Te maá Espíritu ní cahán yá jíin Felipe:

Cuahán quíjnahan rō tēe cuahán jíin carreta un.

30 Te ní jejnahan Felipe carreta un, te ní jini sōho de jeé cáhu tēe ún tutu jeé ní tee Isaías. Te ní cajñuhún de tēe ún:

¿A jécūhun ní ní jñuhun jeé cáhu ní chí tú? áchí de.

31 Te ní cahán maá tēe un jíin Felipe:

¿Te ndese jecūhun ní ná? Chí tú na tēe castūhun núu ná ndese cúu ún, áchí de.

Te ní cahán de jíin Felipe jeé na cáa de conēne ndúu de jíin de ini carreta.

32 Te jñuhun cáhu de tutu ñi un cáhán suhva:

Nájñuhun lanchi jeé cuahán tí nuū cúu tí, súcuan ní casáha ñayuu jíin yá.

Te nájñuhun ñin londe quíti sáte jéé tu ndáhyú tí, súcuan ní sáha ya,

chí tú na vé ní cahán cuíti yá ná ní cajicān i cuēchi siquí yá.

33 Te hora jeé ní cajēhe i jñuhun canu yá, tu ní casáha ndaa i siquí yá jíin jñuhun ndaa,

te ní cajehni i ya ini ñayívi yáha.

Te coo cuehē ñayuu candíje nuū yá jeé ma cánda ní ñin ñayuu cahu i ñayuu ún.

Achí.

34 Yūcuán na te ni cahán tēe Etiopía un:

Cava váha ní ní cachi ní núu ná, ¿ndé siquí cahán tēe ní nacani jñuhun yáha? ¿A siquí maá de chí siquí ñnga tēe? áchí de jíin Felipe.

35 Yūcuán na te ní nacani Felipe jñuhun váha Jesús nuū tēe ún, chí ní quejéé de ní castūhún de jñuhun jeé ní cahú tēe ún, jíin táca gá jñuhun jeé yosó núu tútu yá. 36 Te níni cuángoo de ichi ún te ní jinūcoo de nuū ñúhún ndute, te ní cahán tēe Etiopía:

Yáha ñúhún ndute ¿te á tú cuu cuandute ná? áchí de.

37 Te ní cahán Felipe:

Cuu te núu cándíje níhin ní ndé jíin ini jíin ánuá ní táca jéé ní sáha Jitoho yō Jesús jēhē yō, áchí de.

Te ní cahán tēe Etiopía:

Cándíje ná jéé Jesucristo cúu maá Séhe Yaā Dios, achí de.

38 Te ní sáha de jeé na jécuiñi carreta de, te ní nuu ndindúu de cuangoo de ichi véyí

núu ñúhun ndute ún, te ni scuándute Felipe tée Etiopía. <sup>39</sup> Te nuú ní quendacoo de nuú ndúte, te Espíritu maá Jítoho yō ni sáha ya jeē ní ndoñúhún-ni Felipe. Te tée Etiopía vésú tuá ni jító de nuú Felipe, te cúsi ni de cuahān de. <sup>40</sup> Te ni nane Felipe ñuu Azoto. Te nácani de jñuhun ndese jnáma ya ñayuu, cuahān de táca ñuu nde ni jinú de Cesarea.

*Jeē ní nasāma ini Saulo ní sáha Jesucristo (Hch. 22.6-16; 26.12-18)*

## 9

<sup>1</sup> Te Saulo chí máni cáhán de jeē cáhni de táca ñayuu cácanđije i máá Jítoho yō, te jeē yúcuán ní jehēn de nuú sutú cujéhnú ga. <sup>2</sup> Te ni jicān de carta jeē cahān jeē quihín de táca vehe i sinagoga ñuu Damasco te cuhni de tée ñahan jeē cácanđije i Jesús, quiji de jín i ñuu Jerusalén nuú. <sup>3</sup> Te ni quihín de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēé in luz nuú de. <sup>4</sup> Te ni cotúú-ni de nuú ñuhun, te ni jini sōho de in jñuhun cáhán jín de:

Saulo, Saulo, ¿najeheé jító xeēn rō ruhū? achí.

<sup>5</sup> Te ni cahān maá de:

¿Na nihín cúu jeē cahān, Tátā?

Te ni cahān yā jín de:

Máá rí cúu Jesús, te jeē jító xeēn rō ñayuu cácanđije i ruhū cúu jeē jító xeēn rō ruhū. Te jeē sáha ró súcuán cúu nájnūhun stiquí jeē tu jéñdije ti te jéñú yatá tí xiní pulla, te súcuán stóho ti maá tí, achí yá.

<sup>6</sup> Te máá de chí quisi i de jeē yuhú de, te ni cahān de:

Tátā, ¿na vé cuní ni jéé sáha ná núu súcuán? achí de.

Te ni cahān maá Jítoho yō jín de:

Ndocuñí, quiví ró ini ñuu, te yúcuán íyó in tée jeē cachi nuú rō na vé cúu jeē cánuú sáha ró, achí yá.

<sup>7</sup> Te tée cuango jín Saulo, ni canaa ndasi ni de cajini sōho de ndusu jeē cahān, te tu ní cájito cuiti de nuú jeē cahān un. <sup>8</sup> Yúcuán na te ni ndocuñí Saulo. Te ni nducú de coto de, te tuá cúu coto de, te ni cajni tée ún ndaha de ni jinúcoo jín de nde ini ñuu Damasco. <sup>9</sup> Te yúcuán ní condee de uní quiví. Te tu ní cúu cuiti coto de, ni tú na vé ni yéji de, ni tú na vé ni jlhi de.

<sup>10</sup> Te ñuu Damasco néne in tée cándije, nání de Ananías. Te máá Jítoho yō ni steén ndijin ya maá yá nuú de te ni cahān yā jín de:

Ananías, achí yá.

Te máá de ni cahān de jín yá:

Naun ní sáña, Tátā, achí de.

<sup>11</sup> Te ni cahān maá Jítoho yō jín de:

Quihín ichi te quihín rō calle jeē naní Calle Derecha, te vehe Judas cajñuhun ró in tée nání Saulo ñuu Tarso, chí jicān tahú de.

<sup>12</sup> Te nájnūhun ni jító ndijin de jeē maá ró, Ananías, ni jinú rō, te ni soó ró ndaha ró xiní de, te ni nanune tinú de, achí yá.

<sup>13</sup> Yúcuán na te ni cahān Ananías:

Tátā, cuehē ñayuu cácahān jeē tée yúcuán yōhyo jító xeēn de ñayuu cácanđije i nihín ñuu Jerusalén. <sup>14</sup> Te vijna ni quee de yáhá, chí sutú cácujehnú ni catejñú de véji de jni de táca ñayuu cácahān ndahú i jín ní, achí de.

<sup>15</sup> Te ni cahān maá Jítoho yō jín de:

Cuahān, chí máá rí ni nacāji tée un jéé quihín de nacani de jñuhun ri nuú táca ñayuu nación Israel jín nuú ñayuu táca gá nación nde jín nuú táca rey. <sup>16</sup> Chí steén rí nuú de jeē cánuú ndoho de cuehē jñúndóho jeē siquí rí, achí yá.

<sup>17</sup> Yúcuán na te cuahān Ananías. Te ni quiví de ini vehe nuú néne Saulo, te ni soó de ndaha de xiní Saulo, te ni cahān de:

Hermano Saulo, máá Jítoho yō Jesús, Yāá ní quenda ndijin nuú ní ichi jeē véji ní, ní taji yá sáña véji ná núu ní návaha na nánune tinú ní, te návaha na cúnuú Espíritu Santo yā jín ní, achí de.

<sup>18</sup> Te ni nanune-ni tinú Saulo, chí ni nungoo-ni nájnūhun soó chácá ní condihyú tinú de ún. Te ni ndocuñí de ni jendute de. <sup>19</sup> Yúcuán na te ni nacaji de staá, te ni nanihin ni de. Te ni condee de jecu quiví jín tée cácanđije jeē cáyúcú ini ñuu Damasco.

*Jeē ní nacani Saulo jñuhun ini ñuu Damasco*

<sup>20</sup> Te ni quejéé-ni de nácani de jñuhun Jesús ini táca vehe i sinagoga, achí de jeē Jesús cúu Sēhe Yāá Dios. <sup>21</sup> Te táca ñayuu ni cajini sōho jñuhun cáhán de ni canaa ni i, te ni cacahān i:

¿A násūu tée yáha cúu jeē yōhyo jító xeēn de táca ñayuu Jerusalén jeē cájicān tahú nuú Jesús? Te siquí yúcuán ní quee de yáha jéé cúhni de ñayuu cácanđije, te quihín de jín i nuú sutú cácujehnú nuú, achí i.

<sup>22</sup> Te víhyá gā ni nacani Saulo jñuhun ya, te ni steén cají de jeē Jesús cúu Cristo, Yāá ní jeni Yāá Dios jeē jnáma ya yohó. Te tée hebreo jeē cáyúcú ñuu Damasco, tu ní cánihín de modo cahān de jeē tu íyó ndāá jeē cahān Saulo.

*Jeē ní cácu Saulo nuú jñahan de hebreo*

<sup>23</sup> Te ni yáha cuehē quiví. Te jñahan de hebreo ni casquínahan jñuhun de jeē cáhni de Saulo. <sup>24</sup> Te ni nihín Saulo jñuhun jeē cándito de nduú ñuu táca yéhyi pared jeē ní condúu ndihyú ñuu ún. <sup>25</sup> Yúcuán na te in jecuáá te tée cácanđije ni caquihín de Saulo, te ini in jica cáhnu ni cascúun de Saulo jicá pared ún, te súcuán ni cācu de.

*Jeē ní najinú Saulo ñuu Jerusalén*

<sup>26</sup> Te nuú ní najinú de ñuu Jerusalén, te cúní de najnahan de jín tée cácanđije. Te

ni cayūhu tēe un ní cajito de Saulo, chí tu ní cácdánje de jeē ní nduu Saulo tēe cácdije nuū Jesús. <sup>27</sup> Te Bernabé cuahān de jín Saulo nuū cáyūcu tēe apóstol, te ní nacani de jñūhun nuū tēe ún ndese ní jini Saulo nuū máá Jítoho yō ichi nuū cuahān de, jín jeē ní cáhān yā jín de, jín jeē jéhu-ni ní nacani de jñūhun Jesús ini űuu Damasco. <sup>28</sup> Te ní condee Saulo űuu Jerusalén ní jica de jín táca tēe apóstol. <sup>29</sup> Te jéhu-ni ní nacani de jñūhun máá Jítoho yō. Te jnáhan űuu de hebreo jeē cácahān yuhu griego, ní castáhān jnáhan jín de, te máá tēe un cácu ni de cahni de Saulo. <sup>30</sup> Te ní cajini táca hermano cácdánje, te ní cajendēca de Saulo nde űuu Cesarea. Te yūcuan ní canatajǐ de Saulo cuanuhun de nde űuu de Tarso.

<sup>31</sup> Te űayuu cácdánje Jesús jeē cáyūcú Judea jín Galilea jín Samaria, tuá ní cájito xeēn űayuu i. Te ní ije ga i jín jñūhun ya, te cácdiso Iyo i nuū máá Jítoho yō. Te Espiritu Santo ní chindéé űáhān yá i te ní nducuehē gā i.

#### *Jeē ní nduvāha Eneas*

<sup>32</sup> Te táca lado jécondēhe Pedro űayuu cácdánje, te suni ní jecondēhé de űayuu cácdánje cáyūcú űuu Lida. <sup>33</sup> Te yūcuan ní jini de nuū űin tēe nání Eneas jeē ní cuu unā cuiyā cáa de chí ní ijin de. <sup>34</sup> Te ní cahān Pedro jín de:

Eneas, Jesucristo cúu Yaā nasāvāha ya rohó. Ndocuñi te natuu ró yuu ró, áchí de.

Te ní ndocuñi-ni tēe ún. <sup>35</sup> Te táca űayuu cáyūcú űuu Lida jín ndúhvā Sarón ní cajito i jeē ní nacaca Eneas, te ní casquéndōo i táca jñūhun jeē tu Iyó ndāá te ní cacandije i máá Jítoho yō.

#### *Jeē ní natecu Dorcas*

<sup>36</sup> Te nde űuu Jope ní Iyo űin űahan cácdije, nání űa Tabita, te nuū yūhu griego nání űa Dorcas. Te űahan yáha máni jniū yáha ní sáha űa, te ní sáha űa caridad ní chindéé űáhān űa űayuu cúmanǐ nuū. <sup>37</sup> Te tiempo yūcuan ní quejéé cuéhǐ jín űa, te ní jihǐ űa. Te ní casqúchi i ndǐyi ún, te ní cajequin i ndǐyi un ndé ini cuarto xinǐ véhe. <sup>38</sup> Te yajni íne űuu Lida jín űuu Jope, te tēe cácdánje űuu Jope ní cajini jñūhun de jeē néne Pedro űuu Lida, te ní catajǐ de uū tēe cuacana de Pedro, te ní cacahān de:

Ma cucuéé ní na quhín yachǐ yō űuu Jope, áchí de.

<sup>39</sup> Yūcuán na te ní quihin Pedro ichi cuahān de jín tēe ún. Te nuū ní jínū de, te ní cacao tēe un jín de nde xinǐ véhe nuū catú ndǐyi ún. Te táca űahan viuda ní candicó ndúū űa de cándahyū űa, te cástéén űa táca sahma jín tícachi jeē ní sáha Dorcas te ní saja űa nde na técu űa. <sup>40</sup> Yūcuán na te ní ndacu Pedro jniū jeē na quéndacoo ndihi űayuu ún quingoo i nde yatá véhe. Te ní jecuiñǐ yitǐ

de ní jicān tahú de, te ní nandió cóto de nuū catú ndǐyi ún, te ní cahān de:

Tabita, ndocuñi ní, áchí de.

Te máá űa ní ndacoto-ni űa te ní jito űa nuū Pedro, te ní nucōō-ni űa. <sup>41</sup> Te ní jniū de ndaha űa, te ní ndōnehen de űa. Yūcuán na te ní nacana de xinǐ űayuu cácdánje nde jín űahan viuda ní ndǐvicoo i, te ní steén de űa nuū i jeē ní natecu űa. <sup>42</sup> Te ní jite jñūhun jniū yáha ní űuu Jope cuahān, te cuehē űayuu ní cacandije i jñūhun máá Jítoho yō. <sup>43</sup> Te cuehē quivǐ ní ndōo Pedro ini űuu Jope, néne de vehe űin tēe sáha curtir űi, nání de Simón.

#### *Pedro jín Cornelio*

## 10

<sup>1</sup> Te ini űuu Cesarea ní Iyo űin tēe nání Cornelio, ní cuu de capitán grupo soldado jeē nání Italiano. <sup>2</sup> Te cúu de tēe ndiso Iyo nuū Yaā Dios nde jín ndihi űayuu vehe de, te yōhoyo caridad ní tēe cúu de, chí jéhe de xūhun núū űayuu hebreo cándoho ndáhú, vēsú nasúu tēe hebreo cúu de. Te ní ní jicān tahú de nuū Yaā Dios. <sup>3</sup> Te űin quivǐ ní steén ndǐjin yā nuū tēe yáha nájñūhun cahunǐ jehini, te ní jito de jeē űin ndajéhé máá Yāā Dios ní quivǐ ya nuū néne de. Te ní cahān yā jín de:

Cornelio, áchí yá.

<sup>4</sup> Te máá de ní ndacoto vāha de nuū yā, te ní yūhú de. Te ní cahān de:

¿Na vé cuni ní, Tátá? áchí de.

Te ní cahān yā jín de:

Je chíhi Yaā Dios cuenta jeē jicān tahú ró jín jeē sáha ró caridad. <sup>5</sup> Vijn te tajǐ ró jecu tēe na quingoo de nde űuu Jope, quicana de Simón jeē suni nání de Pedro, na quǐji de. <sup>6</sup> Chí néne núu de vehe tocayo de Simón, tēe sáha curtir űi, te ndéé vehe ún yajni yumar. Te máá de castūhun núu ró na vé cúu inga jeē cánuú sáha ró, áchí ndajéhé yā.

<sup>7</sup> Te ndajéhé yā jeē ní cáhān jín Cornelio, cuahān-ni ya. Te ní cana de uū mozo de jín űin soldado jeē yñúhún núu Yaā Dios, chí cúcáhu ni de jeē squícu vāha tēe ún. <sup>8</sup> Te ní nacani ndihi de jñūhun nuū táca tēe ún, te ní tajǐ de cuangoo nde űuu Jope.

<sup>9</sup> Te inga quivǐ un cájica de ichi cuangoo de, te cuacuyajni de űuu Jope. Te je yajni cahuxǐ uū cúu, te suu hora un ní caa Pedro siquǐ véhe chí cándaá, te yūcuan cácan tahú de. <sup>10</sup> Te ní quee sōco chíji de, te ní cuni de caji de staā. Te sáá casáha űa ndeyu te ní steén ndǐjin yā nuū de. <sup>11</sup> Te ní jito de jeē núne andǐví. Te ní jito de nájñūhun űin sahma manta jité cáhu te núhni jnáhan ndicúún punta, te ní cuun vēji nuū de. <sup>12</sup> Te chíji un cáñūhun ndinuū quiti, táca quiti cúún ndaha jín táca cóo jín táca quiti cándava. <sup>13</sup> Te ní jini sōho de űin jñūhun ní cahān:

Pedro, ndocuifñi te cahni rō tācá quiti jiñā, te caji rō tī, áchí.

<sup>14</sup> Te ni cahān Pedro:

Ma caji na, Tātā, chí tu yéji cuiti na táca quiti jeé cahān ley ni jéé tú vāha caji na tí, chí nájñūhun jeé tu cáhiyo ndoo ti nuū ní, áchí de.

<sup>15</sup> Te ni cahān tucu jñūhun un jíin de:

Achí rí jeé iyó vāha caji rō tācá quiti jiñā, chí ni sándoo rí, te ma cahān maá rō jeé tu cáhiyo ndoo ti, áchí. Te súcuan ni steén caji yá nuū de jeé cúu quihñ de nuū ñáyyuu vēsú násū jñāhan ñuu de hebreo cúu.

<sup>16</sup> Te uní jínu ni cahān súcuan jíin de. Te sahma un ní ndaa cuanuhun andiví. <sup>17</sup> Te níni nácani ndasí ní Pedro na vé cuní cahān jeé ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún. <sup>18</sup> Te cácahān jee de cácajnūhún de núu yūcuan ndéé Simón jeé suni nání de Pedro. <sup>19</sup> Te níni nácani ga ní Pedro siquí jeé ní jito ndijin de ún, te Espíritu Santo ni cahān yá jíin de:

Ni quecoo uní tēe cánanducú róhó. <sup>20</sup> Ndocuifñi te nanuu ró, te ma cáni ni rō jeé tú vāha quihñ rō jíin de, vēsú násū jñāhan ñuu rō hebreo cácuu de, chí maá rí ní tají rí de vējicoo de, áchí yá.

<sup>21</sup> Yūcuán na te ni nanuu Pedro nuū tēe ni tají Cornelio, te ni cahān de:

Maá ná cúu tēe cánanducú ní. ¿Te na siquí vējicoo ní núu na núu súcuan? áchí de.

<sup>22</sup> Te ni cacahān mozo un:

Cornelio, tēe cūu capitán, ní tají de saña. Te tēe ndaá, tēe ndiso iyo nuū Yaā Dios cúu de, te táca ñáyyuu hebreo suni cácahān i jeé tēe vāha cúu de. Te ni cahān ñin ndajéhé yá jíin de jeé na cána de níhñ jéé ní vehe de te chusóhó de jñūhun cahān ní jíin de.

<sup>23</sup> Yūcuán na te ni cahān Pedro jíin mozo un jéé na cúcōo de ñin vehe ún, te ni candōo de yūcuán. Te nuū ní cundijin, te ni quihñ Pedro ichi cuahān de jíin mozo un. Te suni cuango jecu hermano cácañje ñuu Jope jíin de.

<sup>24</sup> Te nde inga quiví ní jinūcoo de ñuu Cesarea. Te Cornelio ndétu de jinūcoo Pedro, chí ní nastútú de táca jñāhan de jíin táca amigo de jeé quijnāhan vāha ga de jíin. <sup>25</sup> Te nuū ní jíin Pedro jijnāhan de, te ní quenda Cornelio ni cahān de jíin Pedro, te ní jecuifñi yití de jeé chíñūhún de Pedro nuū. <sup>26</sup> Te Pedro ní ndonehen de Cornelio, te ni cahān de:

Ndocuifñi ní, chí saña suni ñin tēe-ni cúu ná, áchí de.

<sup>27</sup> Te cándajnūhún de ní quivícoo de ñin vehe. Te ní jito Pedro jeé cáyūcu cuéhē ñáyyuu ñin vehe de. <sup>28</sup> Te ni cahān Pedro jíin ñáyyuu ún:

Je cájini vāha ní jíināhan ní jéé ley jeé cánevāha saña ñáyyuu hebreo, cahān jeé tú vāha jeé quijnāhan ná jíin ní quivícoo ná

vehe ní siquí jeé cúu ní ñáyyuu sñn nación. Te Yaā Dios chí ní steén yá nuū na jéé ma cujéé ni na núu ní ñin ñáyyuu. <sup>29</sup> Jeé yūcuan cúu jeé vēji-ni ná, chí ní cana ní saña, te tu ní sájéé ní ná. Te na cájnūhun ná níhñ, ¿na siquí ní cana ní saña? áchí Pedro.

<sup>30</sup> Yūcuán na te ni cahān Cornelio:

Vijna iyó cúun quiví nájñūhun maá hora yāha jéé cúu cahuní jehñi, te ndite ní ná chí súcuan chíñūhún ná nuū yá, te jícan tahú na ñin vehe ná. Te ní quiji ñin ndajéhé yá nuū ná, te ndíndéé sahma ñūhun ya. <sup>31</sup> Te ni cahān yá jíin ná: Cornelio, je ní jini sóho Yaā Dios jeé jícan tahú rō, te chíhi ya cuenta jeé sáha ró caridad. <sup>32</sup> Núu súcuan te tají rō mozo na quíngoo de ñuu Jope quicana de Simón jeé suni nání de Pedro, na quíji de nuū rō. Chí tēe un néne de vehe tocayo de Simón, tēe sáha curtir ñi, te yajni yumar ndeé vehe de. Te quee tēe ún te castūhún de nuū rō jñūhun cánuú, áchí yá jíin ná. <sup>33</sup> Súcuan ní cuu te ní tají-ni ná mozo na cuajécoo de cana de níhñ, te na cutahú ná, chí vāha ní sáha ní jéé vēji ní. Te vijna ní candutútú ná yāha návāha táca ná cuni sóho ná ndihí jñūhun jítoho yó Yaā Dios jeé ní jéhe ya cahān ní, áchí de.

*Jeé ní nacani Pedro jñūhun ya vehe Cornelio*

<sup>34</sup> Yūcuán na te ni cahān Pedro:

Vijna te ní jini vāha ná jéé Yaā Dios ñinuú-ni sáha ya jíin táca ñáyyuu, cúu ñáyyuu hebreo jíin ñáyyuu táca ga nación. <sup>35</sup> Chí cúsi ní yá jíin ñáyyuu táca-ni nación núu cándiso iyo i núu ya te casáha i jñiñu ndaá. <sup>36</sup> Chí ní cahān yá jíin ñáyyuu Israel jeé ndivícoo táca ñáyyuu nuū jñūhun maní yá jíin i sáha Jesucristo. Te maá yá cúu jítoho táca yóhó. <sup>37</sup> Maá ní je cájini ní ndese ni cuu. Chí ná ní jínu ní nacani Juan jñūhun jíin jéé ní scuándute de ñáyyuu, te ní quejéé Jesús nácani ya jñūhun nde Galilea, te ní jitē jñūhun un ní cánuu Judea. <sup>38</sup> Te cájini ní jéé Yaā Dios ní jéhe ya Espíritu Santo jíin poder nuū Jesús, Yaā ní jehnu ñuu Nazaret. Te cájini ní jéé ní jica cuu ya ní sáha ya jñiñu vāha, te ní nasávāha ya táca ñáyyuu jeé cándoho i sáha jexeén, chí Yaā Dios ní chindéé ñāhán yá Jesús. <sup>39</sup> Chí maá ná cáncani cáji ná jñūhun táca jíin ní cajito ná ní sáha ya ní cánuu Judea jíin ñin ñuu Jerusalén. Yūcuán na te ní cajehni i ya, chí ní cata caa i ya jíca cruz. <sup>40</sup> Te Yaā Dios ní nastécu yá maá Jesús nuū uní quiví, te ní ndiji ya nuū na ní cajito ná nuū yá ní sáha Yaā Dios. <sup>41</sup> Te tu ní quíji ya nuū táca inga ñáyyuu, chí nuū maá-ni táca ná jeé jí ní nacāji Yaā Dios saña jéé nácani ná jñūhun táca jíin jeé ní cajito ná. Chí ní cayeji na stáa ní cajihí ná ndute jíin yá ná ní nane ya jeé ní natecu yá. <sup>42</sup> Te ní ndacu ya jñiñu nuū na jíināhan ná jéé na nácani ná jñūhun ya nuū táca ñáyyuu te cahān cáji ná jeé maá Yaā Dios ní jeni ya

Jesús jeë sándaá yá jniñu ñayuu cátecu jíin ñáyuu ní cándjé. <sup>43</sup> Chi jñuhun Jesús cúu jeë ní cacahān tāca téé ní canacani jñuhun Yaā Dios nde jenahān. Chi ní cacahān de jeë tāca ñáyuu jeë candíje i Jesús, cone cáhnu ní yá nuū cuéchi i, áchí Pedro.

*Jeë ní quívi Espiritu Santo ini anuá ñayuu jeë násíuú hebreo cácuu*

<sup>44</sup> Te níni cáhān gā Pedro tāca jñuhun yáha te ní quívi-ni Espiritu Santo ini anuá tāca ñáyuu cájini nahín jñuhun ya jeë cahān de.

<sup>45</sup> Te téé hebreo jeë ní jímúcoo jíin Pedro jeë suni cácandíje de Jesús, nahān ní canaa ní de ní cajito de jeë suni ní quívi Espiritu Santo ini anuá ñayuu jeë násíuú hebreo cácuu. <sup>46</sup> Chi ní cajini sóho de cácahān ñayuu un sñín yuhu, te cácahān i jeë yóhoyo cújéhnu Yaā Dios. <sup>47</sup> Yúcuán na te ní cahān Pedro:

¿Ndé ín casí jeë ma cuándute ñayuu yáha? Chi ní quívi Espiritu Santo ini anuá maá i, nájnñuhun ní quívi ya ini anuá maá yó, áchí de.

<sup>48</sup> Te ní cahān de jíin i jeë na cuándute i síquí jeë ní cacandíje i Jesucristo. Yúcuán na te ní cacahān ndahú i jíin Pedro jeë na quéndoo de jecu quívi jíin i.

*Jeë ní nacuaña Pedro cuenta nuū ñáyuu cácandíje ini ñuu Jerusalén*

## 11

<sup>1</sup> Te téé apóstol jíin tāca hermano cáyúcu Judea, ní canihín de jñuhun jeë súni ñayuu sñín naciún ní cacandíje i jñuhun Yaā Dios.

<sup>2</sup> Te cuanuhun Pedro ñuu Jerusalén. Te sava téé hebreo jeë cácandíje de ya ní cacahān de nuū Pedro:

<sup>3</sup> ¿Najehē ní condee ní vehe ñayuu jeë násíuú ñáyuu naciún yó cúu? Te ní yeji ní jíin i, áchí.

<sup>4</sup> Yúcuán na te ní nacani cáji Pedro jñuhun nuū téé ún ndihí ndese ní cuu síquí téé sñín naciún:

<sup>5</sup> Néne ná ñuu Jope. Te níni jíicán tahú na, te ní steén ndíjin yá nuū ná, te ní jito ná nájnñuhun ñin sahma manā jité cáhnu jeë nuhní jñáhan ndicúún punta, te nde ichi ándiví ní cuun ní quíji nuū ná. <sup>6</sup> Te ní jito vāha ná, te ní jini ná jéé chíji un cáñuhun quíti cúun ndaha jíin quíti xéén jíin cóo jíin quíti cándava. <sup>7</sup> Te ní jini sóho ná ñin jñuhun ní cahān jíin ná: Pedro, ndocuñi te cahni ró tāca quíti jíin, te caji ró tí, áchí jíni ná. <sup>8</sup> Te ní cahān ná: Ma cáji na, Tātā, chí tu yéji cuiti na tāca quíti jeë cahān ley ní jéé tu cáhíyo ndoo tí nuū ní, áchí ná. <sup>9</sup> Yúcuán na te jñuhun jeë véji nde ándiví ní cahān tucu jíin ná: Ní sándoo maá rí tí, te ma cahān gā ró jeë tu cáhíyo ndoo tí, áchí jíni ná. <sup>10</sup> Te uní jíinu ní cahān súcuán. Yúcuán na te ní ndaa sahma un cuánuhun ándiví. <sup>11</sup> Te hora un ní jinúcoo uní téé vehe nuū ní cóndee ná un, cánanducú

de sáñá, te ñin jñáhan ñuu de Cesarea ní tají de vejícoo de. <sup>12</sup> Te maá Espiritu ní cahān yá jíin ná jeë ma cáni ní na jéé tú vāha quihín na jíin de. Te suni íñu hermano yáha ní jengoo jíin ná, te ní quívicoo ná ini vehe téé nání Cornelio. <sup>13</sup> Te téé un ní nacani de jñuhun nuū na jíināhan ná jéé ní jito de ñin ndajehé Yaā Dios, índichi yá ini vehe de, te ní cahān yá jíin de: Tají ró jecu téé na quíngoo de ñuu Jope, quicana de Simón jeë suni nání de Pedro, na quíji de. <sup>14</sup> Te téé ún cachí de nuū ró ndese jnama Yaā Dios rohó jíin ndihí ñayuu cáyúcu vehe ró, áchí yá. Achí Cornelio jíin ná. <sup>15</sup> Te suni ní quejéé ná cahān na, te ní quívi-ni Espiritu Santo ini anuá i jíināhan i, nájnñuhun ní quívi ya ini anuá maá yó xihna gā. <sup>16</sup> Yúcuán na te ní nucūhun ní na jñuhun ní cahān maá Jítoho yó: Jendaá jeë maá ndute-ni ní scuándute Juan ñayuu. Te rohó jíināhan ró chí nájnñuhun cuandute ró jíin Espiritu Santo, cúu jeë cóndee yá ini anuá ró, áchí yá. <sup>17</sup> Te suni ní jéhe Yaā Dios Espiritu yá nuū maá i nájnñuhun ní jéhe ya nuū maá yó jeë cácandíje yó Jítoho yó Jesucristo. Núu súcuán çte ndé ñin cúu ná jéé casí ná jniñu jeë sáha Yaā Dios? áchí Pedro.

<sup>18</sup> Súcuán ní cajini sóho de jñuhun yáha, te tuá ní cacahān de nuū Pedro, chí sa suhva ní cacahān de jeë yóhoyo cújéhnu Yaā Dios. Te ní cacahān de:

Suni ní jéhe Yaā Dios jñuhun jeë na nácani ní ñayuu tāca gá naciún jeë stóo i cuéchi i návāha cotecu i ní cáni núu súcuán, áchí de.

*Ñayuu cácandíje ini ñuu Antioquia*

<sup>19</sup> Te quívi ní cajehni de Esteban ní quejéé de cájito xéén de ñayuu cácandíje, te jeë yúcuán ní cajitē núu ñayuu un tāca ñuu cuangoo i, te ní jinúcoo i Fenicia jíin Chipre jíin ñuu Antioquia. Te ní canacani i jñuhun vāha ya nuū máni jñáhan hebreo i jeë cáyúcu yúcuán, te tu ní canacani i jñuhun ya nuū ínga ñayuu. <sup>20</sup> Te jecu téé cácandíje jeë cáyúcu Chipre jíin ñuu Cirene ní jinúcoo de ñuu Antioquia, te suni nuū ñáyuu tāca naciún jeë tu cájini i jñuhun ya ní canacani de jñuhun maá Jítoho yó Jesús jeë jnama ya i. <sup>21</sup> Te maá Jítoho yó ní chindéé ñáhan yá de, te cuehē ñayuu ní castóo i jniñu jeë tu íyo ndáa te ní cacandíje i maá Jítoho yó.

<sup>22</sup> Te ñayuu cácandíje ini ñuu Jerusalén ní cajini jñuhun i, te ní catajái i Bernabé cuahān de nde ñuu Antioquia. <sup>23</sup> Te nuū ní jinú Bernabé yúcuán, te ní jini de jeë yóhoyo vāha ní sáha Yaā Dios jíin i, te ní cusí ndasí ní de. Te ní stihví ní de tāca ñáyuu un jéé jíin ini jíin ánuá i na cóndihví ní i squícu vāha i nuū maá Jítoho yó, te ma náyhúhí i. <sup>24</sup> Chi téé vāha cúu Bernabé, te ní cunuú Espiritu Santo jíin de, te cándíje nihin de. Te ní cacandíje cuehē ñayuu nuū maá Jítoho yó ní sáha de.

<sup>25</sup> Yūcuán na te cuahān de nde ñuu Tarso cuananducú de Saulo. Te ni nanihñ jnāhan de jín Saulo, te ndéca de tēe un ní ndee de ñuu Antioquía. <sup>26</sup> Te ní ñi cuiyā ni candutú de jín ñāyuu cácanđje yūcuán, te ni castéén de jñūhun ya nuū cuehē ñayuu. Te ñuu Antioquía cúu nuū xíhna ñūhún gá ni caconani ñayuu cristiano siquí jeē ní cacandje i Cristo.

<sup>27</sup> Te suni tiempo un ní quendacoo tēe cánacani jñūhun Yaā Dios ñuu Jerusalén cuangoo de nde ñuu Antioquía. <sup>28</sup> Te ñi jnāhan de jeē nani Agabo ní ndocuíñ nuū hermano cácanđje. Te ni stéén Espiritu Santo nuū de, te ni castūhún de jeē cóo ñi jnamā xeēn ní cáhnu. Te ni cuu jnamā ún ñi parte tiempo jeē ní ndacu Claudio jniñu jeē ní cuu de rey. <sup>29</sup> Yūcuán na te ni candajñūhun tēe cácanđje ñuu Antioquía jeē cuáha ñi ñi de nasaa canda de cuáha de te tají de quihñ cotecu hermano cáyūcú Judea. <sup>30</sup> Te súcuani ni casáha de. Te ni catajé de Bernabé jín Saulo ni cajendéca de nuū tēe jéhu cándiso jniñu nuū ñāyuu cácanđje cáyūcú Judea.

*Jeē ní jehni Herodes Jacobo, te ni chune de Pedro vecāa*

## 12

<sup>1</sup> Te suu tiempo un ní quejéé rey Herodes jito xeēn de sava ñayuu cácanđje. <sup>2</sup> Te ni ndacu de jniñu jeē jín espada na cáhni i Jacobo ñani Juan. <sup>3</sup> Te ni jini de jeē ní cacusiñ ni tēe hebreo jeē ní sáha de súcuani, te jeē yúcuani suni ni jniñ de Pedro. Te máá quiví un ní cuu vico jeē yéji ñayuu pan jeē tu yñi levadura. <sup>4</sup> Te nuū ní jniñ de Pedro, te ni chune de vecāa, te ni jeni de cuñ grupo soldado jeē cóndito Pedro, cuñ cuñ soldado cúu jeē ñi ñi grupo. Chi cúni Herodes jeē na yáha vico un jéé cúu vico pascua te quenehen de Pedro vecāa un stéén de nuū ñāyuu cuehē. <sup>5</sup> Te súcuani ñe Pedro vecāa, te cándito soldado un de. Te ñayuu cácanđje chi ñihni ni cajicān tahu i jehē Pedro nuū Yaā Dios jeē na cácu de.

*Jeē ní quenehen Yaā Dios Pedro vecāa*

<sup>6</sup> Te jeni ni Herodes jeē na cúndijin inga quiví te quenehen de Pedro vecāa, te stéén de nuū ñāyuu un núú. Te núhni Pedro jín úu cadena, cátu de quixí de mehñu úu soldado jecuáá ún, te suni cáhñ ga soldado cándito yéhyí vecāa ún. <sup>7</sup> Te suu jecuáá ún te sanaa-ni te ni jinú ñi ndajehé máá Jítoho yō, te ni ndindeé ñi vecāa. Te ni squñi ya Pedro, te ni natahú ni de. Te ni cahān ya:

Yachi ndocuíñ ró, achí yá.

Te cadena nuhñi ndaha de un ní canandají-ni. <sup>8</sup> Te ni cahān ndajehé yá jin de:

Nacuhni ñihni chíji ró, te nuquñi ró ndijēn ró, achí yá.

Te súcuani ní sáha de. Te ni cahān tuu ndajehé yá jin de:

Condií ticāchi ró, te condiquñ ró ruhū na quihñ yō, achí yá.

<sup>9</sup> Te ni quenda de ndíquini de ya cuahān de jín yá, te jeni ni de jeē násuu jendaá cúu jeē sáha ndajehé yá jin de, chi jeni ni de jeē ñi jeē ní stéén yá jito ndijin de cúu. <sup>10</sup> Te ni yáha ya jin de uū nuū cándito soldado. Te ni jinú yá jin de yéhyí cáa nuū quenda de caca de calle, te yéhyí un ní nune ñi-ni máá. Te ni quenda ya jin de, te ni yáha de ñi calle cuahān de. Yūcuán na te ni cujiyo-ni ndajehé yá nuū de cuahān yá. <sup>11</sup> Te ni nducájí ni Pedro te ni cahān máá ní cahān ñi de:

Vijna te ni jini ndaá rí jeē ní tají máá Jítoho rí ndajehé yá ni quiji, te ni jnama ya ruhū nuū Herodes jinú táca ñāyuu hebreo jeē cácuni i sáha xeēn i jín rí nuū, achí de.

<sup>12</sup> Te nuū ní jini de jeē ní cácu ndije de, te ni quihni de ichi cuahān de vehe Maria naná Juan jeē suni nani de Marcos. Te yúcuani cáhñi tutú cuehē ñayuu cajicān tahu i jehē Pedro. <sup>13</sup> Te cáhñ Pedro ni jinú de yéhyí fuera, te ñi sūchi síhñi nani Rode cuahān i jeē cúni i núu ndé ñi cúu jeē cahān. <sup>14</sup> Te ni nacuni i tachi Pedro, te jeē ní cusñi ni i te tu ní nune i yéhyí un, chi ni nandió cóo i te jinu i ni ndivi i ñi cuarto. Te ni castūhún i jeē ní quee Pedro índichi de yéhyí fuera. <sup>15</sup> Te ni cacahān jin i:

Jeē cahān neé ró, achí.

Te máá i ñihni cáhñ i jeē máá de cúu. Yūcuán na te ni cacahān:

Ndajehé yá jeē ndíto Pedro cúu nuū súcuani, achí.

<sup>16</sup> Te víhyá gā cahān Pedro. Yūcuán na te ni canane i yéhyí, te ni canacuni i nuū de, te nahān ni canaa ni i cájito i. <sup>17</sup> Te máá de ní sáha de ndaha de jeē ma cúvaá gā i, te ni castūhún de ndese ni quenehen máá Jítoho yō de vecāa. Te ni cahān de:

Castūhun nuū Jacobo jinú táca gá hermano jeē ní quenehen ya ruhū vecāa, achí de.

Te ni quenda de cuahān de inga lugar.

<sup>18</sup> Te nuū ní cundijin, te ni cacavaá teyí soldado jeē tuá Pedro. <sup>19</sup> Te ni ndacu Herodes jniñu jeē na nanducú váha i Pedro. Te tu ní cananihñ i de, te nuū ní cuu ni stichí de soldado jijnāhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

*Jeē ní jihñ Herodes*

<sup>20</sup> Te yōhno ni quítí ni rey Herodes nuū ñāyuu ñuu Tiro jinú ñuu Sidón. Te ñayuu un ní candajñūhñ i jeē inuú-ni quivicoo ndihi i nuū rey un. Te ni casáha i amigo i jinú Blasto, tēe cújehñu jéjñiñu nuū rey un. Te ni cacahān ndahú i jin de jeē na cáhñ ndahú de jin



rey un jéē na ndéē ni de jíin i. Chi nde ñuu maá rey un cájeen i jeē cáyeji i. <sup>21</sup> Te ni jeni Herodes ñn quiví. Te ni nucúhun de sahma yíñúhún de, te ni cucóo de mesa nuū ndácu de jniñu, te ni cahān de ñn jñuhun jehú de cajini sôho i. <sup>22</sup> Te ñayuu un ní caquejeé i cácahān jee i jñuhun yíñúhún jíin de:

Nasúu téē-ni cúu ní, chí ñn yaā cúu ní, áchí i jíjnāhan i.

<sup>23</sup> Te maá hora un ní sáha-ni ñn ndajéhe maá Jítoho yō jeē ní jñi ñn cuehyí xeēn rey Herodes, te ni cayejí tindácú de, te ni jihí de, chí ni sandúxi-ni de maá de te tu ní cáhān de jeē Yaā Dios cúu jeē cújéhu.

<sup>24</sup> Te ni jitē gā jñuhun maá Jítoho yō, te cuehē ndasí ñayuu ni cacandíje i táca-ni lugar.

<sup>25</sup> Te ni jínu jniñu jeē ní quindeca Bernabé jíin Saulo jeē cótecu ñayuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

*Jeē ní caquejeé Bernabé jíin Saulo caca cuu de nacani de jñuhun ya*

### 13

<sup>1</sup> Te mēññu grupo ñayuu cácaandíje ini ñuu Antioquía ní cahiyó téē cástéēn jíin téē cánacani jñuhun Yaā Dios, te cánani de Bernabé, Simón jee suni nání de Negro, Lucio ñuu Cirene, Saulo, jíin Manaén téē ni jehnu jíin inga Herodes jeē ní cuu gobernador Galilea. <sup>2</sup> Te ñn quiví jeē cáhiyo ndite ní téē yáha cáchiñúhún de nuū maá Jítoho yō, te ní cahān maá Espíritu Santo jíin de:

Cúni rí jeē sasín ró Bernabé jíin Saulo na quíngoo de jniñu jeē ní jeni ri de, áchí yá.

<sup>3</sup> Yūcuán na te ní cajicān tahú ndite ní de, te ní casoó de ndaha de xiní Bernabé jíin Saulo, te súcuān ní catajé de ndindúú téē ún cuanacani de jñuhun nuū táca ñayuu.

*Jeē ní canacani Bernabé jíin Saulo jñuhun ya nde Chipre*

<sup>4</sup> Te ní sáha Espíritu Santo jeē íchi ñúú Seleucia cuangoo de. Te yūcuān ní quívicoo de ñn barco cuangoo de nde Chipre, ñuhun jeē íne sán nuū ndúte. <sup>5</sup> Te ní jinúcoo de ñuu Salamina nuū cájecuñí barco, te ní canacani de jñuhun Yaā Dios ini táca vehe íi sinagoga jñāhan hebreo de. Te suni cuahān Juan chindéé ñāhān jíin de. <sup>6</sup> Te ní cajica nuu de ñi-ni Chipre nde ní jinúcoo de ñuu Pafos jeē suni íne nuū Chipre. Te yūcuān ní cajini de nuū ñn téē hebreo nání Barjesús. Te téē tásí cúu de, te cáhān stahú de jeē ñn téē nácani jñuhun Yaā Dios cúu de. <sup>7</sup> Te téē tásí un jéjníñu de nuū gobernador Sergio Paulo, te téē ndíchí cúu gobernador ún. Te ní cana de Bernabé jíin Saulo jeē cúni nahín de jñuhun Yaā Dios. <sup>8</sup> Te téē tásí un suni nání de Elimas. Te ndúcú ndéyí de casi de jeē ma cándíje

gobernador ún. <sup>9</sup> Te Saulo jeē suni nání de Pablo, ní cunuú Espíritu Santo jíin de, te ní ndacoto vāha de nuū téē tásí un. <sup>10</sup> Te ní cahān de:

Tēē sáha jniñu néé stahú ñāhān cúu ró, chí sēhe jexeén cúu ró te jési ró nuū táca jniñu ndaā. Te tu jécucñí ró jeē sáca núu ró síquí jñuhun ndaā maá Jítoho yō návāha ma candíje ñayuu nuū yā. <sup>11</sup> Te maá Jítoho yō stóho ya rohó vijna, te cucuáá ró jeē ma cóto ga ró niāndíi jecu quiví, achí Pablo.

Te ní cunee-ni nuū téē tásí un, te quéndāha quéhiyú de cuahān de ndúcú de ndé vé jñi ndaha de stéēn íchi nuū de quinhun de. <sup>12</sup> Yūcuán na te ní jini gobernador jeē súcuān ní cuu, te ní candíje de jñuhun maá Jítoho yō, te náā ní de jíni sôho de jñuhun ya.

*Jeē ní coyūcu Pablo jíin Bernabé Antioquía ndañúú Pisidia*

<sup>13</sup> Yūcuán na te ní quendacoo Pablo jíin Bernabé jíin Juan ñuu Pafos, te ní quívicoo de barco te cuangoo de ñuu Perge ndañúú Panfilia. Te yūcuān ní cusán Juan, te cuanuhun de ñuu Jerusalén. <sup>14</sup> Te ní quendacoo Pablo jíin Bernabé ñuu Perge cuangoo de, te ní jinúcoo de ñuu Antioquía ndañúú Pisidia. Te quiví ndétatu ní quívicoo de ini vehe íi sinagoga, te ní cacucóo de. <sup>15</sup> Te ní cahu tutu ley yā jíin tutu ní catee téē ní canacani jñuhun ya nde jenahān. Yūcuán na te téē cácujeñu ini vehe íi sinagoga, vi-ni ní catajé de téē cahān jíin Pablo jíin Bernabé:

Amigo, núu iyó jñuhun cahān ní jéē stihví ní ní ñayuu yáha, te cahān ní na cúni nahín i núu súcuān, áchí de.

<sup>16</sup> Yūcuán na te ní ndocuiñí Pablo te ní sáha de seña jíin ndaha de jeē nahín-ni coo ñayuu ún, te ní cahān de:

Nihín jñāhan ñuu yō Israel jíin nihín téē jeē suni cáchiñúhún ní Yaā Dios, cuni nahín ní jíjnāhan ní. <sup>17</sup> Maá Yāā Dios yohó ñayuu Israel, ní nacāji ya jíi yō jíjnāhan de. Te ní ní jéē cáyūcu tátú de ñuu Egipto, te ní sáha ya jeē ní nducuehē de. Yūcuān na te jíin poder maá yá ní quenehen ya de nación Egipto. <sup>18</sup> Te uū xico cuiyā ní cajica de nuū ñuhun téhé, te ní jendeyí ní yā jíin de jeē ní castívi de. <sup>19</sup> Te ní snáá yā uxā nación Canaán, te ní jēhe ya ñuhun un núu táca jíi yō cúu tahú de. <sup>20</sup> Yūcuán na te ní jeni ya táca téē ní candacu jniñu nuū de nájñuhun cuñn ciento uū xico uxí cuiyā, nde quiví ní cotecu Samuel, téē ní nacani jñuhun ya. <sup>21</sup> Yūcuán na te maá ñayuu un ní cajicān i ñn rey, te ní jeni Yaā Dios Saúl ní ndacu de jniñu nuū i uū xico cuiyā. Te yucūn Benjamín sēhe Cis ní cuu Saúl. <sup>22</sup> Te ní quenehen ya jniñu Saúl, te ní jeni ya David ní cuu de rey nuū i. Te ní cahān cají yá jñuhun de: Cúsi ní rí jíin David sēhe Isaí, chí sáha de táca jéē cuni rí, achí yá.

<sup>23</sup> Te cáhān gā Pablo:

Te sêhe yucûn David ni cacu Jesús, Yaã ní jeni Yaã Dios jeê jnâma ya yohó ñâyuu Israel, chí súcuan ni jejnûhun ya. <sup>24</sup> Te nde ná tu quejéé Jesús nacani ya jnûhun nuû ñâyuu, te ni nacani Juan jnûhun nuû tâca jnâhan ñuu yô Israel jeê na nacani ni i jeê stóo i cuêchi i, te cuandute i. <sup>25</sup> Te nuû cuácuyajni jeê cúu Juan, te ni cahân de: Cándetu ró jéé quiji Cristo, te jéni ni rô jeê ruhû cúu, te nasûu rí cúu. Chí quiji ya, te cújêhnu ndasí yá jeê ni ndijên yâ tu cújêhnu ri tava rî, achí de.

<sup>26</sup> Amigo jijnâhan ní, tâca nihín jéé cácuu yó sêhe yucûn Abraham jíin tâca nihín jéé suni cándiso iyo ní nuû Yaã Dios, chí cúní Yaã Dios jeê na cúní yô jnûhun yâha jeê cáhân ndese jnâma ya yohó. <sup>27</sup> Chí tâca ñâyuu ñuu Jerusalén jíin tâca téé cácujuhnu nuû i, tu ní cájecûhun ni i jeê Jesús cúu Cristo, Yaã ní jeni Yaã Dios jeê jnâma ya yohó. Te ndijnahan quiví ndétátu ní cajini sôho i jnûhun ni cacahu jeê ní catee têe ni canacani jnûhun Yaã Dios nde jenhán. Te vêsú súcuan te tu ní cájecûhun ni i, te ni candonda i ni cacahân i jeê na cúu yâ. Te súcuan ni casquícú i siquí tâca jnûhun jeê ní cacahân têe ni canacani jnûhun ya nde jenhán. <sup>28</sup> Vêsú tu ní cánihín i ni ñin cuêchi siquí yâ jeê cúu yâ, te ni cacahân ñihin i jíin Pilato jeê na cúu yâ. <sup>29</sup> Te ná ni jînu ní squícú siquí yâ tâca jnûhun cáhân nuû tútu ñi, te ni casnúu de ya jicâ cruz, te ni cachindûji de ya ñin yaû ní jete jicâ cáva. <sup>30</sup> Te ní sáha Yaã Dios jeê ní natecu yâ. <sup>31</sup> Te ñayuu Galilea jeê ní jéngoo jíin yá nde Jerusalén nde na técu yâ, nuû maá i ní steén ndijin yâ maá yá cuehê quiví ná ni natecu yâ, te ñayuu un cácuu jeê cánacani cáji jnûhun ya nuû tâca gá jnâhan yô hebreo vijna.

<sup>32</sup> Te maá ná jijnâhan ná cánacani ná jnûhun vâha yâha nuû ní jijnâhan ní jéé súcuan ni jejnûhun ya nuû tâca jíi yô. <sup>33</sup> Te jnûhun yâha ní squícú Yaã Dios nuû maá yó jeê cácuu yó sêhe yucûn de, chí ni nastécu yâ Jesús. Chí suhva cáhân salmo uû jeê cahân yâ jíin Séhe ya Jesús: Máá ró cúu Séhe ri, te vijna ní sajêhnu ri rohó jéé cúu ri Tatá rô, achí yá. <sup>34</sup> Te ní nastécu yâ Séhe ya Jesús návâha ma tehyú cuiti yâ, chí suhva cáhân tutu ñi jeê ní cahân Yaã Dios nde jenhán: Te nihín maá ró tâca jéé vâha ní jejnûhun ri nuû David, achí. <sup>35</sup> Te suni súcuan cáhân inga salmo jeê ní tee David jnûhun jeê cahân Jesús jíin Yaã Dios: Ma cuâha ni jnûhun tehyú ná, chí jéjníñu ná nuû ní te maní ni jíin ná, achí. <sup>36</sup> Te David chí jíni yô jeê ní jejníñu de nuû ñâyuu ní cotecu de jíin, nájñûhun ni cuni Yaã Dios. Te ni jíih de, te ni quindûji de nájñûhun ni quindûji tâca jíi yô, te ní tehyú de. <sup>37</sup> Te Jesús, Yaã ní nastécu Yaã Dios, chí tu ní téhyú cuiti yâ. <sup>38</sup> Jeê yúcuan jíni ñúhún jecûhun ni ní, amigo, jeê Jesús cúu Yaã cóne cáhnu ni nuû tâca cuêchi yó. <sup>39</sup> Chí ni canducú ní ndahva ni cuêchi ní jéé squícú

ní ley jeê ní jêhe ya nuû Moisés, te tu ní cúu ndahvâ cuêchi ní súcuan. Te Jesús cúu Yaã ndáhva ndíhi cuêchi ñâyuu jeê cácandíje i tâca jéé ní sáha ya jehê i. <sup>40</sup> Núu súcuan te coto ní jíjnâhan ní jéé ma ndóho ní tâca castigo jeê ní cacahân têe ni canacani jnûhun Yaã Dios nde jenhán, chí suhva ni cahân Yaã Dios:

<sup>41</sup> Tâca róho ñâyuu jeê casacatâ, na cóto ró na castigo xeên quiji siquí rô, te naa ni rô coto ró, te cuu rô.

Chí tiempo maá ró te sáha ri jniñu xeên jeê ma cándíje cuiti rô jeê súcuan sáha ri vêsú nacani ñayuu jnûhun un núu rô, achí yá.

Achí Pablo.

<sup>42</sup> Te ni quendacoo Pablo jíin tâca jnâhan de vehe ñi sinagoga jnâhan hebreo de. Te ñayuu sîn nación ni cacahân ndahú i jíin de jeê inga quiví ndétátu nacani tucu de jnûhun yâha nuû i. <sup>43</sup> Te ni jíitê ñayuu un cuángoo i. Te cuehê ñayuu hebreo jíin ñâyuu sîn nación jeê ní candutútu sahan hebreo te cáchiñúhún i nuû Yaã Dios, cuangoo i jíin Pablo jíin Bernabé. Te ni cacahân ñihin de jíin i jeê na cuñfi ñihin i jíin jnûhun jeê maní Yaã Dios jíin i.

<sup>44</sup> Te quiví ndétátu inga semana te je yajni ndíhi ñayuu ñuu un ní candutútu i jeê cúní nahín i jnûhun Yaã Dios. <sup>45</sup> Te nuû ní cajini têe hebreo jeê ní candutútu cuehê ñayuu, te ni cacucuéstún ni de, te ni cacahân de jeê násûu jnûhun vâha cúu jeê steén Pablo, te ni cacahân neé de nuû Pablo. <sup>46</sup> Yúcuán na te jêhnu-ni ni cacahân Pablo jíin Bernabé, achí de:

Cánuu jéé xihna gâ nuû maá ní jeê cácuu ní jnâhan ñuu yô hebreo nacani ná jnûhun Yaã Dios, te tu ní cájetáhú ñi. Núu súcuan te cuêchi maá ní cúu jeê ma nihín tahú ni cotecu ni ní cáni. Te vijna te quincacani ná jnûhun ya nuû ñâyuu tâca nación jeê tu cajini i jnûhun ya. <sup>47</sup> Chí suhva ní ndacu maá jítoho yô jniñu nuû na jíjnâhan ná:

Ni jeni ri rohó jéé cúu ró nájñûhun luz jeê steén ñi anuá ñayuu tâca nación, chí ní ñayiví steén rô jnûhun ri nuû ñayuu jeê jnâma ri i, achí yá.

Achí de.

<sup>48</sup> Te ñayuu sîn nación, nuû ní cajini sôho i jnûhun yâha te ni cacusí teyí ní i. Te ni cacahân i jeê yôhvo vâha jnûhun cúu jnûhun maá jítoho yô, te tâca ñâyuu jeê ní nacáji Yaã Dios i jeê cótecu i ní cáni, ní cacandíje i. <sup>49</sup> Te ni jíitê jnûhun maá jítoho yô cuahân níi región yúcuán. <sup>50</sup> Te ñuu Antioquía cáyucú ñahan cácuu nuû te cáchiñúhún ña Yaã Dios. Te têe hebreo ní cascáhân de ña, te suni ní cascáhân de têe cácujuhnu ñuu ún, te ni cajito xeên i Pablo jíin Bernabé te nde ni cascúnu i de cuangoo de. <sup>51</sup> Te ní cascóyo de ticachâ jehê de jeê steén de jeê iyó cuêchi i. Te ní jinúcoo de ñuu Iconio. <sup>52</sup> Te vêsú súcuan te

ñayuu cácanđje un ní cunuú Espíritu Santo jíin í, te cácusí teyí ní í.

*Jeé ní coyücu Pablo jíin Bernabé ñuu Iconio*

## 14

<sup>1</sup>Te ñuu Iconio ní quívicoo Pablo jíin Bernabé ini vehe íi sinagoga jnahan de hebreo. Te jíin jnahun jeé ní canacani de te ní cacandje cuehē jnahan de hebreo, te suni súcuan cuehē ñayuu sín naciön ní cacandje í. <sup>2</sup>Te jnahan de hebreo jeé tu ní cácanđje, ní cascáhan de ñayuu sín naciön, te ní cajeni ní í jeé násüu ñayuu váha cácuu ñayuu cácanđje. <sup>3</sup>Te ní caquendōo Pablo jíin Bernabé yücuan cuehē gā quiví. Te jéhu-ni ní canacani de jnahun Jitoho yō, chí cácuáhnü ní de ya jeé váha quihín jniñu un sáha ya. Te máá yá chí ní steén ya jeé iyó ndáá jnahun jeé yóhyo váha ní yá jíin í jeé cánacani de, chí ní jéhe ya jeé sáha de jniñu jéhu jeé steén jeé kujéhu ya. <sup>4</sup>Te ñayuu ñuu un ní cacusín ní í jíinahan í, sava í jíin tée hebreo jeé tu cácanđje de Jesús, te sava ga í jíin tée apóstol. <sup>5</sup>Te ñayuu hebreo jíin ñayuu sín naciön jíin tée cácuu tohō ní casquijnahan jnahun jeé sáha xeén jíin Pablo jíin Bernabé, jíin jéé cuáha yuñ xini de núú. <sup>6</sup>Te ní cajini de jeé súcuan cácani sáha, te ní cajinu de cuango de nde ñuu Lистра jíin ñuu Derbe ndañú Licaonia jíin táca ñuu yajni yücuan. <sup>7</sup>Te yücuan ní canacani de jnahun jeé jnáma ya yohó.

*Jeé ní cajéhe í yuñ xini Pablo ini ñuu Lистра*

<sup>8</sup>Te ñuu Lистра néne íin tée jeé tu cúu caca, te tu jica cuiti de chí nde quiví ní cacu de cácójó de. <sup>9</sup>Tée un ní jini sóho de jnahun jeé cahán Pablo, te ní jito váha Pablo nuú de, te ní jini de jeé candje váha tée un jéé ndúváha de. <sup>10</sup>Te ní cahán jeé Pablo jíin de:

Ndocuiñí, condichi rō, achí de.

Te ní scánda tée un máá de ní nucōndichi-ni de, te ní quejéé de caca de. <sup>11</sup>Te ní cajini ñayuu ún jniñu jéhu jeé ní sáha Pablo, te ní cacahán jee í jíin yuhu máá í jeé cúu yuhu Licaonia:

Ní cuun yaá ní quecoo nuú yō, te cájica najnūhun cájica tée, achí í.

<sup>12</sup>Te ní cacahán í jeé Bernabé cúu yaá Júpiter, te Pablo cúu yaá Mercurio chí Pablo cúu tée nácani jnahun. <sup>13</sup>Te yajni yuñú un néne veñūhun yaá Júpiter. Te máá sūtū jejniñu ini veñūhun un ní quihín de stiquí jijnahan tí te ní scutú de tí ita te vēji de nde nuú quiví í yuñú, te máá de jíin ñayuu ñuu un cácani de cahni de stiquí un sócō de nuú Bernabé jíin Pablo nuú. <sup>14</sup>Te Bernabé jíin Pablo, tée cácuu apóstol, ní cajito de jeé súcuan cácani ñayuu un sáha í, te ní candatá de sahna de jeé steén de jeé castívi ndasí í jeé casáha í súcuan. Te ní quenendava de

ní quívicoo de mēhñu ñayuu cuehē ún, te ní cacana jee de:

<sup>15</sup>Tátá jijnahan ní, ma sáha cuiti ní súcuan, chí sáhá suni tée-ni cácuu ná najnūhun máá ní jijnahan ní. Te vējicoo ná nacani ná jnahun váha Yaá Dios nuú ní, chí cahán na jíin ní jeé ma sáha ga ní táca jniñu váha jeé tu ndé jéjniñu cuiti, chí sa suhva na chíñúhún ní máá Yáa Dios, Yaá técu, Yaá ní sáha andiví jíin ñáyiví jíin ndute mar jíin táca gá jeé iyó ní cáhnü. <sup>16</sup>Te nde jenahán ní jéhe ya jnahun jeé na sáha táca ñayuu modo cácani máá í. <sup>17</sup>Te vēsü súcuan te ní ní stéén yá ndese Yaá cúu ya, chí máni sáha ya jniñu váha jíin yō, chí scūun ya saū, te sáha ya jeé cúu váha itu yō, te jéhe ya jeé jíni ñúhún yó návaha caji yō te coo síi ní yō, achí ndindúú de.

<sup>18</sup>Te vēsü súcuan ní cacahán de, te yōhyo uhū ní cajesi de nuú ñayuu un návaha tú socō í stiquí un núú de jeé chíñúhún í ndindúú de.

<sup>19</sup>Yücuan na te ní quecoo jecu tée hebreo ñuu Antioquia jíin ñuu Iconio, te ní cascáhan de ñayuu cuehē ún, te ní cajéhe í yuñ xini Pablo. Te ní caquenehen í de yatá ñúú ún, chí ní cajeni ní í jeé jé ní jíhi de. <sup>20</sup>Te tée cácanđje ní cacondúu de Pablo, te ní ndonda Pablo, te ní ndiví de ini ñuu. Te inga quiví ní quihín de ichi cuahán de jíin Bernabé nde ñuu Derbe.

<sup>21</sup>Te ini ñuu un ní canacani de jnahun jeé jnáma ya ñayuu, te ní cacandje cuehē ñayuu ní casáha de. Te ní canandicó de cuanuhun de ñuu Lистра jíin ñuu Iconio jíin ñuu Antioquia. <sup>22</sup>Te ní cahije ga ní ñayuu cácanđje yücuan ní casáha de. Te ní castívi ní de í jeé na cuñí nihín í jíin jnahun ya, chí ní cacahán de jeé níni quiji cuehē jñundóho siqui yō te yücuan na te jinū yō ñuu nuú ndácu Yaá Dios jniñu. <sup>23</sup>Te táca ñuu ní cajeni de tée jéhu cándiso jniñu condito de ñayuu cácanđje. Te ní cahíyo ndite ní Pablo jíin Bernabé nuú yá, te ní cajican tahú de, te ní cacahán de jíin máá Jitoho yō jeé na cóto ya ñayuu ún chí cácanđje í máá yá.

*Jeé cuánuhun tucu Pablo jíin Bernabé ñuu Antioquia ndañú Siria*

<sup>24</sup>Te ní cayáha de cuango de región Písidia, te ní najinūcoo de región Panfilia. <sup>25</sup>Te ní canacani de jnahun ya ini ñuu Perge región Panfilia, te sáá te cuango de ñuu Atalia. <sup>26</sup>Te yücuan ní quívicoo de barco, te ní najinūcoo de ñuu Antioquia. Te ñuu yücuan cúu nuú ní cajican tahú ñayuu nuú Yaá Dios jehē de jeé na chindéé ñáhan yá de jeé quíngo de nacani de jnahun. Te ní jinu jniñu, te ní najinūcoo de ñuu ún. <sup>27</sup>Te nuú ní najinūcoo de yücuan, te ní casáha de junta jíin ñayuu cácanđje, te ní canacani de jnahun táca ndese cuehē jeé váha ní sáha Yaá Dios jíin de, chí ní jéhe ya jnahun jeé suni candje ñayuu táca naciön jeé tu ní cájini í jnahun ya.

28 Te ni caquendōo de yūcuan cuéhē quivī jīn ñayuu cácadnje.

*Siqui junta ñuu Jerusalén*

## 15

1 Yūcuán na te jecu tēe Judea ni quijicoo de ñuu Antioquia, te ni castéén de nuū tācá hermano jeē nuu tu sāha i circuncidar, nájñuhun cáhán ley jeē ni jēhe ya nuū Moisés, te tú na modo cácu i. <sup>2</sup> Te Pablo jīn Bernabé ni catejnáhan de jīn tēe ún, te tu ní cūndaá. Te jeē yūcuan ní candajnūhún de jeē quíngoo Pablo jīn Bernabé jīn jecu gā tēe cácadnje un ndé ñuu Jerusalén, te yūcuán ndajnūhún de siquī jñuhun yáha jīn tēe cácuu apóstol jīn tēe jēhu cándiso jñiñu nuū ñayuu cácadnje yūcuán.

<sup>3</sup> Te ñayuu cácadnje un ní canachuhun íchí i de. Te ni cayáha de ichi Fenicia jīn Samaria, te cánacani de jñuhun jeē suni ñayuu tāca gā nación jeē tu ní cájini i jñuhun ya, ni castóo i jñiñu jeē tu íyó ndáá te ni cacandje i Yaa Dios. Te yóhoyo ni cacusī ni tācá hermano jeē ní canihín de jñuhun jeē sūcuan ni cacandje ñayuu ún.

<sup>4</sup> Te ni najinūcoo de ñuu Jerusalén, te ñayuu cácadnje yūcuan jīn tēe apóstol jīn tēe jēhu cándiso jñiñu nuū ñayuu un, ní cacusī ni de jeē ní najinūcoo jñáhan de ún. Te Pablo jīn Bernabé ni canacani de tāca jñuhun ndese cuehē jeē vāha ni sāha ya siquī jñiñu jeē ní canacani de jñuhun ya. <sup>5</sup> Te sava tēe grupo fariseo jeē cácadnje ni candocuiñi te ni cacahān:

Ñayuu sīn nación jeē cácadnje i Jesús, jīni ññuhún jēe sāha i circuncidar nájñuhun cása máa yó, te cánuu ndacu yó jñiñu nuū i jeē na squícu i ley jeē ni jēhe ya nuū Moisés, áchí.

<sup>6</sup> Te tāca tēe apóstol jīn tāca tēe jēhu cándiso jñiñu nuū ñayuu cácadnje, ni candutútú de junta návāha ndajnūhún de te sándaá de siquī jñuhun yáha. <sup>7</sup> Te tācá de ni cacahān de ndese cájini de ní. Yūcuán na te ni ndocuiñi Pedro, te ni cahān de:

Hermano jijnáhan ní, je cájini vāha ni jēe je íyó tiempo jeē ní nacáji Yaa Dios saña jēe quihín na nuū ñayuu sīn nación te nacani ná jñuhun nuū i jeē jñáma ya i, návāha candje i Jesucristo. <sup>8</sup> Te Yaa Dios chí jīni yā ndese cáa ánuá ndihí ñayuu, te ni steén yā jeē jetáhu yá i, chí suni ní jēhe ya Espiritu Santo nuū i jijnáhan i, nájñuhun ní jēhe ya nuū máa yó. <sup>9</sup> Te inuū-ni sāha ya jīn yó jīn máa i, chí siquī jeē suni ní cacandje i jñuhun jeē jñáma ya i, te jeē yūcuan ní sándoo ya anuá i nuū tāca cuéchi i. <sup>10</sup> Te vijna zñaun cácuni ní ndacu ní jñiñu jeē na squícu i ley un? Chí tu núnjahan ní Yaa Dios jeē sūcuan. Chí cácuni ní tee ní jñiñu yí yáha siquī ñayuu cácadnje ún, te ní tāca jí yó tu ní cácuendeyí de squícu

de, te ní máa yó. <sup>11</sup> Chí sa suhva cácadnje yó jēe jñáma ya yohó sūcuan-ni siquī jeē yóhoyo vāha ni máa Jítoho yó Jesús jīn yó, te suni sūcuan-ni jñáma ya máa i, nasūu siquī jeē squícu i ley un, áchí de.

<sup>12</sup> Yūcuán na te tēe cuehē un ní cacuu nayúu de, te ní cajini nahín de jñuhun cácahān Bernabé jīn Pablo. Chí ni cacastūhún de jeē ní jēhe ya poder jeē ní casáha de tācá jñiñu jēhu jeē steén jeē cujēhu ya, ni cajito ñayuu tācá nación jeē tu cájini i jñuhun ya. <sup>13</sup> Te nuū ní jīnu ní cacahān Pablo jīn Bernabé, te ni cahān Jacobo:

Hermano jijnáhan ní, cuni sōho ní na cáhán na. <sup>14</sup> Ní nacani Simón Pedro jñuhun ndese ní quejéé nuū jñiñu jeē jñáma Yaa Dios ñayuu tācá nación jeē tu cájini i jñuhun ya, chí suni mēñu máa i nacáji ya ñayuu jeē ndúu i ñayuu máa yá. <sup>15</sup> Te quíjnáhan jñuhun ní cahān de yáha jīn jñuhun ní catee tēe ní canacani jñuhun Yaa Dios nde jenahán jeē yosó nuū tútu i:

<sup>16</sup> Achí Yaa Dios:

Nájñuhun ní cotúu vehe David cúu jeē tuá ndácu sēhe yucūn de jñiñu, nájñuhun ní ndacu máa de jñiñu nde jenahán.

Te in quivī te ndee ri

te jeē nasáha ri vehe de cúu jeē sāha ri jeē nandacu Sēhe yucūn de jñiñu.

<sup>17</sup> Sūcuan sāha ri návāha tāca gā ñayuu na nánducú i ruhū

nde jīn ñayuu tācá nación jeē tu cájini jñuhun ri, tācá i jeē cána ri i candje i ruhū.

<sup>18</sup> Sūcuan cáhán máa Jítoho yó, te nde jenahán ní steén yā jñuhun yáha nuū ñayuu.

Achí tutu i.

<sup>19</sup> Jeē yūcuan jéni ní na jēe ñayuu tāca gā nación jeē ní castóo i jñiñu jeē tu íyó ndáá te ni cacandje i máa Yaa Dios, ma stáhán yó i jeē ndácu yó jñiñu jeē squícu i ley Moisés.

<sup>20</sup> Chí sa suhva na tēe yó carta quihín nuū i jeē ma cáji i ndeyu jeē ní sócō nuū ídolo, te ma cáca jnéni i, te ma cáji i cūñu quití jeē jíhí jeē tu jéti niñi tī, te ní ma cáji i niñi. <sup>21</sup> Jñuhun yáha-ni tee yó quihín nuū i nájñuhun je cástéén nde jenahán. Chí nde jenahán je íyó tēe cástéén jñuhun ley jeē ní jēhe ya nuū Moisés, te ndijnahan quiví ndétātu cácahu de ley un ini vehe i sinagoga tācá ñuu, áchí Jacobo.

<sup>22</sup> Yūcuán na te tēe apóstol, jīn tēe jēhu cándiso jñiñu, jīn ndivií ñayuu cácadnje, ní cacundaá ní de jeē nacáji de tēe quingoo jīn Pablo jīn Bernabé nde ñuu Antioquia. Te tēe ní canacáji de un cácuu Silas jīn Judas, te inga sīhví de cúu Barsabás. Te cándiso jñiñu de nuū tācá hermano cácadnje. <sup>23</sup> Te ní cajendeca de carta jeē cahān suhva:

Máa ná cácuu tēe apóstol, jīn tāca tēe jēhu cándiso jñiñu nuū ñayuu cácadnje, jīn tāca gā

hermano yō. Te cátee ná carta yáha cuájeē nuū ní jínáhan ní, hermano, jeē cácuu ní ñáyyuu sáin nación jeē cáyūcu ní ñuu Antioquía jín Siria jín Cilicia. Cuandeyí ní ní jínáhan ní. <sup>24</sup> Ni cajini jnūhun ná jée ní quendacoo sava jnāhan ná yáha ní jengoo nuū ní, te jín jnūhun jeē ní cacahān de te ni casáha jeē ní canacani ndasí ní ní, te ni cacuxí ní ní, chí cándacu de jniñu jeē sáha ní circuncidar jín jeē squícu ní jniñu cáhān ley jenahán jée ní jéhe ya nuū Moisés. Te nasūu sáña ní cátaji tée un jée jeē de nuū ní. <sup>25</sup> Jeē yūcuan ní cajeni ní ná, te inuú-ní ni cacundaā ní ná, te ní nacāji ná tée cuajecoo nuū ní jín úu hermano yō jeē maní yō jín, cúu Bernabé jín Pablo. <sup>26</sup> Te ndindúú de je ni catana de máa de nuū jnūdóho vēsú na cúu de jeē siquí jnūhun Jitoho yō Jesucristo. <sup>27</sup> Núu súcuan te cátaji ná Judas jín Silas jeē nuū ní, te suni nájnūhun cáhān carta yáha suni súcuan castūhún de nuū ní jínáhan ní. <sup>28</sup> Chí máa Espíritu Santo ní steen yā iin modo jeē ní cacundaā ni na jée ma tée ná táca jniñu yí ley Moisés siquí ní, chí máa-ni jniñu yáha jée cánuu gá: <sup>29</sup> Ma cáji ní táca jée ní casocó nuū ídolo, ní ma cáji ní níñi ní quiti jeē jíhi jeē tu jéti níñi tí, te ma cáca jnéni ní. Te vāha squícu ní núu tuá sáha ní táca jée yáha. Súcuan na cóo te sándeiy ní ní, áchi carta.

<sup>30</sup> Yūcuán na te tēe quingoo un cuángoo de nde ñuu Antioquía. Te ni cacana de xini ñáyyuu cáandije ni candutútu de junta, te ni cajéhe de carta un núu i. <sup>31</sup> Te ni cacahu i, te ni candusí ni i jeē ní níhín i jnūhun ndeyí ni nuū carta ún. <sup>32</sup> Te suni tēe cánacani jnūhun Yáa Dios cácuu Judas jín Silas, te jín cuéhē jnūhun ní cacahān de te ni candundeiy ní táca hermano un, te ni cahije ga ni i jín jnūhun ya. <sup>33</sup> Te ni coyūcú de yūcuán jecu quiví. Yūcuán na te hermano yūcuan ní canacuátáhu i nuū de jeē quinuuhun de nuū tēe jeē ní cataji de. <sup>34</sup> Te Silas ni nujnahan ni de ni quendóo de yūcuán. <sup>35</sup> Te suni ni caquendóo Pablo jín Bernabé ñuu Antioquía, te máa de jín sava ga tēe ni castéen de te ni canacani de jnūhun vāha máa Jítoho yō.

*Jeē quihín Pablo inga jínu nacani de jnūhun ya*

<sup>36</sup> Te ni cuu ga quiví, te ni cahān Pablo jín Bernabé:

Vijna te na quícondēhe yó táca hermano yō ndijnahan ñuu nuū ní nacani yó jnūhun máa Jítoho yō, na cóndēhe yó ndese cáhiyo i, áchi de.

<sup>37</sup> Te Juan jeē suni nání de Marcos, cúni Bernabé jeē quihín tēe un jín de. <sup>38</sup> Te tu ní cúni Pablo jeē quihín tēe un jín de, chí nde Panfilia ní cusín Marcos nuū Pablo jín Bernabé, chí tuá ní chindéé ñáhan de ndindúú tēe un siquí jniñu ya nde saá. <sup>39</sup> Te

náhan ní candajnūhun Pablo jín Bernabé, te tu ní cácuadaā ní de siquí Marcos, te ní cacusín de. Te Bernabé ni jeca de Marcos, te ni quivícoo de barco cuangoo de nde Chipre, ñuhun jeē íne sáin nuū ndúte. <sup>40</sup> Te Pablo ní nacāji de Silas quihín jín de. Te táca hermano cáandije ní cajicān tahú de nuū máa Jítoho yō jeē siquí jeē vāha ni yā te na chindéé ñáhan yá Pablo. Te cuahān Silas jín Pablo. <sup>41</sup> Te ní cajica cuu de ní Siria jín Cilicia. Te táca grupo ñáyyuu cáandije ní cahije ga ni i jín jnūhun ya ní casáha de.

*Jeē cuahán Timoteo jín Pablo jín Silas*

## 16

<sup>1</sup> Yūcuán na te sáa te ni jinū Pablo jín Silas ñuu Derbe jín ñuu Listra. Te yūcuan néne iin tēe suchí cándije, nání i Timoteo. Sēhe yí iin ñahan hebreá cúu i, te ñahan cándije cúu ña. Te tátá i chí tēe griego cúu de. <sup>2</sup> Te táca hermano ñuu Listra jín ñuu Iconio cájejnūhún de Timoteo. <sup>3</sup> Te cúni Pablo condeca de Timoteo quihín de jín i. Te ní cahān Pablo jeē quihín i cuu i circuncidar, chí tu cúni Pablo jeē cahān ñáyyuu hebreo jeē tu ní squícu Timoteo costumbre un, chí ndihi ñáyyuu cájini i jeē tēe griego cúu tátá i. <sup>4</sup> Te táca ñuu nuū cuángoo de te ni cacastūhún de nuū ñáyyuu cáandije jeē na squícu i máa jniñu jeē ní casándaā tēe apóstol jín táca tēe jéhu cáyūcú ñuu Jerusalén jeē cándiso jniñu nuū ñáyyuu cáandije. <sup>5</sup> Te ñáyyuu cáandije ni cahije ga ni i. Te ndijnahan quiví ní cacandije cuehé gā ñáyyuu.

*Jeē ní jito ndijin Pablo iin tēe ñuu Macedonia*

<sup>6</sup> Te tu ní jéhe Espíritu Santo yā jnūhun jeē nácani de jnūhun ya ní Asia. Jeē yūcuan ní cayāha de ichi Frigia jín Galacia cuangoo de. <sup>7</sup> Te ní jinūcoo de nuū quijnáhan Misia jín Bitinia. Te cácumi de quingoo de Bitinia, te máa Espíritu Jesús tu ní jéhe ya jnūhun quingoo de. <sup>8</sup> Te ní cayāha de iin lado Misia cuangoo de ñuu Troas jeē íne yajni yumar. <sup>9</sup> Te iin jecuáa te nájnūhun iin jēni ní jito ndijin Pablo, te ní jito de jeē índichi iin tēe ñuu Macedonia nuū de cáhān ndahú jín de: Nehen ní ñuu ná Macedonia te chindéé ñáhan ní sáña jijnáhan ná, áchi. <sup>10</sup> Te súcuan ní jito ndijin de. Yūcuán na te sáña, Lucas, ní quijnáhan ná jín de. Te ní casátūhva ná jín de jijnáhan de jeē quingoo ná Macedonia, chí ní cajini cají ná jeē máa Yáa Dios táji yá sáña jijnáhan ná jée castūhun ná nuū ñáyyuu yūcuan jnūhun jnama ya i.

*Jeē ní coyūcu Pablo jín Silas ñuu Filipos*

<sup>11</sup> Te jín barco ní quendacoo ná ñuu Troas, te cuangoo ndaā-ni ná ndé Samotracia, ñuhun jeē íne sáin nuū ndúte. Te inga quiví ní jinūcoo ná ñuu Neápolis. <sup>12</sup> Te yūcuan ní quendacoo ná, te ní jinūcoo ná ñuu Filipos

jeē cūu ñuu cujéñnu ga íne Macedonia, chi máá ñáyyuu ñuu Roma ni casáha i ñuu i ún. Te ni coyūcu ná ñuu Filipos jecu quiví. <sup>13</sup> Te ñn quiví ndétātu ní quendacoo ná ñuu ún, te ni jengoo ná ñn yuyúte, chi yūcuan cūu ñn lugar nuū cájicān tahú ñayuu. Te ni cacucōo ná, te ni canacani ná jñūhun ya nuū tācā ñahan ní canataca yūcuán. <sup>14</sup> Te ñn ña nání Lidia jeē véji ña ñuu Tiatira, xíco ña sahma ndihí jeē yáhu ga ndeé. Te máá ña níni chíñúhún ña Yaā Dios. Te ni jini sōho ña jñūhun canacani ná, te máá Jítoho yō Jesús ni sáha ya jeē ní candíje ña jñūhun jnáma ya ña jeē ní cáhān Pablo. <sup>15</sup> Te ni jendute ña nde jín ñayuu cáyūcu vehe ña, te ni cahān ndahú ña jín ná:

Núu cácuahnu ni ni jéé candíje ndije ná máá Jítoho yō, te cuajeé ní coyūcu ní vehe ná, áchí ña.

Te ni cana fuerza ña sãña jínáhan ná.

<sup>16</sup> Te ñn quiví te cuangoo tucu ná suu lugar nuū jéngoo ñayuu cájicān tahú. Te ni canajnáhan ná jín ñn sūchi síhí jéé ñūhun tachí ini i, te máá un sáha jeē cahán i tācā ndese coo te cūndaā jeē cahán i. Te sūchí un ní cajeen patrón i, návaha nihín de cuehē xūhun síquī jeē cástūhún i nuū ñn ñn ñayuu ndese coo ichi núu. <sup>17</sup> Te sūchí un ndíquín i sãña jínáhan ná cána jee i:

Tēe yáha cájejníñu de nuū Yaā Dios, Yaā cujéñnu téyí, te cácastūhún de ndese cácu ní núu cuéchi ní jínáhan ní, áchí i.

<sup>18</sup> Te cuehē quiví ni cuu súcuan te nde ni jnanini ni Pablo. Te ni ndió cóto de nuū i, te ni cahān de jín táchí ún:

Jín poder máá Jesucristo ndácu ri jniñu nuū rō jeé na quénda rō ini i quihín rō, áchí de.

Te hora un ní quenda-ni cuahān.

<sup>19</sup> Yūcuán na te ni cajini patrón i jeē ma nihín gā i xūhún cuu de, te jeé yúcuán ní cajni de Pablo jín Silas cuangoo jín de nde vehe juzgado nuū cáyūcu tóhō. <sup>20</sup> Te ni cajeni ún de nuū juez, tēe cásándaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i. <sup>21</sup> Te cájequin de inga costumbre jeē ma cūu cuatáhú cuiti yō, ni ma cūu sáha yō, chí tu jéhe ley nación yō jñūhun, chí ñayuu nación Roma cácuu yō, áchí.

<sup>22</sup> Te suni ni candonda ñayuu síquī Pablo jín Silas. Te tēe cácuu juez ni canduca de jniñu jeē na quénda sahma ndindúú de te cani yujnu síquī de. <sup>23</sup> Te nuū ni jínu ni cacani téyí un de, te ni casquíví de vecāa. Te ni canduca jniñu nuū tēe ndíto vecāa jeē na cóndito ndasi de jeē ma cácu ndindúú tēe ún. <sup>24</sup> Te jeē súcuan ni tahú jniñu nuū tēe ndíto vecāa te ni squíví de Pablo jín Silas nde ichi íni gā, te ni squíví jehé de t̄sin yujnu ndéé yaú te ni cajihni de.

<sup>25</sup> Te nuū ní cuu sava ñuú, te cájicān tahú Pablo jín Silas, te cájita de yaa í nuū máá Yáa Dios. Te ñayuu cáhīn jín de vecāa un ní cajini nahín i. <sup>26</sup> Te sanaa-ni te ni jnaā nihin téyí, te nde nuū cimiento vecāa un ní canda. Te ni canune-ni yéhyí vecāa ún, te ni canandají-ni cadena jeē cánuhni tāca ñayuu ún. <sup>27</sup> Te ni natahū ni tēe ndíto vecāa, te ni jito de jeē núne yéhyí vecāa ún. Te ni tava de espada jeē cáhni de máá de nuū, chí ni jeni ní de jeē ndívii cuiti ñayuu cáhīn vecāa un cuángoo i. <sup>28</sup> Te ni cana jee Pablo:

Ma cáhni ní máá ní, chí cáhīn ndihí ná, áchí de.

<sup>29</sup> Yūcuán na te máá tēe ndíto vecāa ni cana de jeē na quíndeca i ñuhún, te yachí ní quíví de ini vecāa. Te ni jecuiñí yití de nuū Pablo jín Silas, te quísi i de jeé yūhú de. <sup>30</sup> Te ni quenehen de Pablo jín Silas, te ni cajnūhún de:

Tátā, ¿na vé cánuú sáha ná te jnama ya sãñá? áchí de.

<sup>31</sup> Te ni cacahān de jín tēe ún:

Candíje ní táca jéé ní sáha Jítoho yō Jesucristo jehé ní te cácu ní, te suni súcuan cácu ndihí ñayuu cáyūcu vehe ní, áchí de.

<sup>32</sup> Te ni canacani de jñūhun máá Jítoho yō nuū tēe un jín núu táca ñayuu cáyūcu vehe de. <sup>33</sup> Te suu máá jecuáa yúcuán ní nacate tēe ndíto vecāa un núu ní catují Pablo jín Silas jeé ní cacani yujnu síquī de. Yūcuán na te ni jendute de jín ndihí ñayuu cáyūcu vehe de. <sup>34</sup> Te ni jeca de Pablo jín Silas cuahān de jín vehe de, te ni jéhe de staā ni cayejí de, te cácusí ni ndihí de vehe de jeé ní cacandíje de Yaā Dios.

<sup>35</sup> Te nuū ní cundijin, te tēe cácuu juez ni catají de policía cuangoo jín jñūhun jeé na siáá tēe ndíto vecāa un Pablo jín Silas quingoo de. <sup>36</sup> Te tēe ndíto vecāa un ní castūhún de jñūhun yáha núu Pablo:

Tēe cácuu juez ni catají de jñūhun véji jeé na siáá na nihín quíngoo ní. Núu súcuan te quendacoo ní quihín ní, te cuandeyí ni ní, áchí de.

<sup>37</sup> Te ni cahān Pablo jín policía:

Cuehē ñayuu ni cajito i jeé ní cacani de sãñá, te ni tu ní cásándaā de x̄hna gā núu ndaā jeé iyó cuéchi ná. Te ni cachuhun de sãñá vecāa, vesú cácuu ná séhe nación Roma, te iyó ley jeé ma cūu sáha súcuan jín ñayuu cácuu séhe nación Roma. Te vijna zá quenehen sáhi de sãña cácuu de naún? Ma cūu cuiti. Na quícoo máá de quenehen de sãña jínáhan ná, áchí Pablo.

<sup>38</sup> Te ni canandió cóo policía ni castūhún de jñūhun yáha núu tēe cácuu juez, te ni cayūhú de jeé ní cajini sōho de jñūhun jeé séhe nación Roma cácuu Pablo jín Silas. <sup>39</sup> Te ni quecoo tēe cácuu juez ún, te yōhō ni cacahān ndahú jín Pablo jín Silas jeé na cóne cáhu ni de. Te ni caquenehen de vecāa ún,

te ni cacahān ndahū jín de jeē na quéndacoo de ñuu un quíngoo de. <sup>40</sup> Yūcuán na te ni quendacoo de vecāa, te ni jengoo tucu de vehe Lidia, te ni cacahān de jñūhun ndeyí ni jín táca hermano. Te ni caquihin de ichi cuangoo de.

*Jeē ní cacuvaā ñayuu Tesalónica*

## 17

<sup>1</sup> Te Pablo jín Silas ni cayāha de ñuu Anfípolis jín ñuu Apolonia cuangoo de, te ni jinūcoo de ñuu Tesalónica nuū iyó in vehe i sinagoga jñáhan de hebreo. <sup>2</sup> Te ni coyūcú de yūcuan ún semana, te táca quiví ndétatu jéhen Pablo vehe i sinagoga, nájñūhun sáha sáha de, te ni nacani de jñūhun ya nuū té un. <sup>3</sup> Te jín jñūhun cáhán tutu i ni steén de jeē súcuan ni jini ññūhun ndoho Cristo jeē cúu yá te natecu yá. Te ni cahān de:

Jñūhun nácani ná nuū ni cúu jñūhun Jesús, te máa yá cúu Cristo, Yáa ní jeni Yáa Dios jeē jñāma ya yohó, áchí de.

<sup>4</sup> Te ni cacandije sava jñáhan de hebreo jín cuéhē ñayuu griego jeē cáchiñūhún i Yáa Dios, jín cuéhē ñahan cácuu nuū, te ni nduu inuú ni i jín Pablo jín Silas. <sup>5</sup> Yūcuán na te yóho ni cacucuesún ni jñáhan de hebreo jeē tu cácadije, te ni castítú té cunéé jéé cájica cúxí-ni, te ni quejéé cácana ndee cuangoo. Te súcuan ni casaca núu de xini ñayuu ñuu ún. Te ni jengoo de vehe Jasón cánanducú de Pablo jín Silas jeē jñí de té un quíndeca de nuū ñayuu cuéhē. <sup>6</sup> Te tu ní cánanihín de, te ni cañūhun de Jasón jín sava ga hermano cuangoo de jín nuū tohó ñuu ún. Te jeē siquí Pablo jín Silas ni cacana jee de:

Té jeē castívi xini ñayuu ní ñáyiví, je ni quecoo de nde yahá. <sup>7</sup> Te máa Jasón ni jéhe núu vehe cáyūcu té un. Te té un tu cájetáhú de ley maá rey yohó ñayuu Roma, chí sa suhva cácahān de jeē cájetáhú de nuū inga rey jeē nani Jesús, áchí de jñáhan de.

<sup>8</sup> Te ñayuu jín té cácuu tohó ni cajini sōho i jñūhun yáha, te ni cacuvaā i siquí. <sup>9</sup> Te Jasón jín táca gá hermano ni castóo de xūhún de, chí ni cacahān tohó un jín de jeē nde núu tají de Pablo jín Silas quíngoo de inga ñuu, yūcuán na te nacuaħa tohó un xūhún de. Te súcuan te ni casiáa de Jasón jín táca gá hermano cuangoo de.

*Jeē ní coyūcu Pablo jín Silas ñuu Berea*

<sup>10</sup> Yūcuán na te táca hermano un, yachí-ni ni cascáca de Pablo jín Silas jecuáa un, cuángoo de nde ñuu Berea. Te nuū ni jinūcoo de yūcuán, te ni quivicoo de vehe i sinagoga jñáhan ñuu de hebreo. <sup>11</sup> Te jñáhan ñuu de hebreo cáyūcu yūcuan, vāha ga ni maá de vesú jñáhan ñuu de hebreo cáyūcú ñuu Tesalónica, chí vāha ni cacusí ni de jín jñūhun ni cacahān Pablo jín Silas. Te ndijnahan quiví cánanducú yúcun de nuū tútu i núu súcuan

cáhán chí tuú. <sup>12</sup> Jeē yūcuan ní cacandije cuéhē jñáhan ñuu de hebreo te suni nde jín cuéhē ñayuu griego, cúu té cúu ñahan cácuu nuū. <sup>13</sup> Te jñáhan ñuu de hebreo cáyūcú ñuu Tesalónica ni cajini jñūhun de jeē suni nde ñuu Berea nácani Pablo jñūhun Yáa Dios, te ni caquihin de ichi cuangoo de Berea, te suni yūcuan ní castónca de ñayuu siquí Pablo. <sup>14</sup> Yūcuán na te táca hermano ni catají-ni de Pablo cuahān de nde yumar. Te ni ndōo Silas jín Timoteo ñuu Berea. <sup>15</sup> Te jecu hermano ni cajendēca de Pablo nde ñuu Atenas. Te ni cahān Pablo jín de jeē cahān de jín Silas jín Timoteo jeē na quíngoo yachí de nuū Pablo. Te vendicoo de ñuu Berea.

*Jeē ní ñne Pablo ñuu Atenas*

<sup>16</sup> Te níni ndétu Pablo jeē jinūcoo Silas jín Timoteo nuū de ñuu Atenas, te ni jini de jeē ñayuu ñuu ún yóho cáchiñūhún i idolo, te ni nacani cuíhýa ní de. <sup>17</sup> Te ini vehe i sinagoga ni cahān de jñūhun ya jín jñáhan ñuu de hebreo jín táca gá té cáchiñūhún Yáa Dios. Te suni táca quiví ni nacani de jñūhun ya nuū táca ñayuu cáhín nuū yáhu. <sup>18</sup> Te sava té cácuáha jñūhun jeē castéén grupo epicúreo, jín inga sava té cácuáha jñūhun jeē castéén grupo estoico, ni caquejéé cácahān jín Pablo. Te sava ni cacahān:

¿Na jñūhun cáhán té tlóhlé yāha? áchí.

Te sava ga de ni cacahān:

Té nácani jñūhun táca yáa jeē tu cánevāha yó cúu de, áchí.

Súcuan ni cacahān de, chí nácani Pablo jñūhun vāha Jesús jeē ní natecu yá mehñu ndíyi. <sup>19</sup> Te ni cajeca de Pablo cuangoo de, te ni jinūcoo de nde lugar nuū nani Areópago nuū cándutútú ñayuu cándacu jññu, te ni cacahān de:

Cácu ni cáchi ni núu na jñūhun jeé jéé steén ni. <sup>20</sup> Chí cáhán ni jñūhun jeé ná tu cuni cuiti na jñáhan ná, te jeé yūcuan cácu ni jecūhun ni na siquí táca jñūhun yáha, áchí jín de.

<sup>21</sup> Chí táca ñayuu ñuu Atenas jín táca ñayuu inga ñuu jeé cáyūcu núu i yūcuán, tuá na inga jññu cácusí gá ni i jín chí máa-ni jeé cuni nahún i jñūhun jeé chí jéé cahān i jñūhun jeé.

<sup>22</sup> Te índichi Pablo mehñu ñayuu ní cándutútú núu nani Areópago, te ni cahān de:

Té ñuu Atenas jijnáhan ní, jito ná jéé yóho cáchiñūhún ní yaá maá ní. <sup>23</sup> Chí ni jica nuu ná, te ni jecondéhe ná nuū jeé cáchiñūhún ní, te ni jito ná in altar jeé yosó jñūhun yáha: Yáha cúu altar yaá jeé ná tu cuni yó jñūhun ya, áchí. Te máa Yáa un jéé cáchiñūhún ní, vesú ná tu cuni ni jñūhun ya, suu jñūhun Yáa un cúu jeé nácani ná núu ní vjna.

<sup>24</sup> Chí Yáa un cúu Yáa jeé ni sáha ñáyiví jín táca ndíhi jeé iyó, te máa yá cúu jitoħo andiví jín ñáyiví, te tu ndéé yá ini veñūhun cáśáha ñayuu. <sup>25</sup> Te ni tu cúmani ní in nuū yá

jeē cuáha ñayuu nuū yā, chi máá yá sáha jeē técu ñayuu, jín jeē stáa i tachi i, jín jeē nihín i ndihi jeē jini ñuhún i.

<sup>26</sup> Te ni sáha ya jeē chíji ñn-ni yucún ni tahū táca ñayuu jeē ní nduu táca nación, návaha coyúcú i ní cáhnu ñayiví, te ni tana yā cuiyā cotecu ñayuu jín lugar coyúcú i jínáhan i. <sup>27</sup> Te súcuan ni sáha ya chí cúní yā jeē nanducú yó yā, chi núu nanducú yó yā te cuni yó jeē iyó yá, chi yajni-ni cúu ya jín ñn ñn yó. <sup>28</sup> Chi máá yá sáha jeē iyó yó jín jeē cátecu yó jín jeē cácata yó. Chi suni súcuan ni cacahán sava tēe ñuu ni jēe cáta yaa: Suni nde yucún máá yá cácuu yó, áchí. <sup>29</sup> Te núu yucún Yaā Dios cácuu yó, te ma cáni ni yó jeē idolo oro chí plata chí yúu cúu ya, chí cájeni ni ñayuu jeē súcuan cáa ya, te súcuan cásváha i idolo. <sup>30</sup> Te ni jendeyí ni yá siquī jeē tu ní cájecūhun ni i ní ndé saá, te vjna chi ndácu ya jniñu jeē ñayuu ní cáhnu ñayiví na nácani ni i jeē stóo i cuēchi i. <sup>31</sup> Chi Yaā Dios, je ni jeni ya quiví jeē ndaā sándaā yā siquī ñayuu ñayiví, te ni jeni ya Jesús jeē máá yá sándaā. Te je ni steén cáji Yaā Dios nuū táca ñayuu jeē máá yá ni jeni Jesús, chí ni nastécu yá Jesús, áchí Pablo.

<sup>32</sup> Te jeē ní cajini sōho i jñūhun jeē nátecu ndiyi te sava i ni cacahán catá i, te sava ga i ni cacahán i:

Váha te núu cuu cuni sōho na jñūhun cáhán ni ndé inga jñu, áchí i.

<sup>33</sup> Te ni quenda Pablo mēhñu ñayuu un cuahán de. <sup>34</sup> Te cuahán jecu ñayuu jín Pablo, te ni cacandje. Te ñn de cúu Dionisio, tēe ndútútú jín tēe cácujeñnu cásváha junta nuū naní Areópago, jín ñn ñahan naní Dámaris, jín jecu gā i.

*Jeē ní ñne Pablo ñuu Corinto*

## 18

<sup>1</sup> Yūcuán na te ni quenda Pablo ñuu Ateñas, te cuahán de nde ñuu Corinto. <sup>2</sup> Te yūcuán ní jito de nuū ñn jñáhan ñuu de hebreo, naní Aquila, te tēe región Ponto cúu de. Te sáá jecu-ni tiempo ni quee de jín ñasihí de Priscila jeē ní quenda de Italia, chí rey Claudio ni ndacu de jniñu jeē na quéndacoo táca ñayuu hebreo ñuu Roma, jeē cúu capital Italia. Te ni jinū Pablo vehe Aquila jín Priscila jeē cáyúcú de ñuu Corinto. <sup>3</sup> Te suni jniñu sáha tēe un sáha Pablo, chí cáquicu de ññi cuu vehe. Te ni quendō Pablo jín tēe ún, te ni casájniñu de. <sup>4</sup> Te táca quiví ndétátu ní jehēn Pablo vehe ñn sinagoga ni nacani de jñūhun ya, te ni nducú ndéyí de jeē na cándje ñayuu jñūhun Jesús, cúu jñáhan ñuu de hebreo jín ñayuu táca nación jeē tu ní cájini i jñūhun ya.

<sup>5</sup> Te ni jinūcōo Silas jín Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chí

máni jñūhun ya nácani cáji de nuū ñayuu cácuu jñáhan de hebreo, jeē máá Jesús cúu ya Cristo, Yaā jeē cáñūhun ni i quiji ya. <sup>6</sup> Te ni caquejéé i ni cacahán i siquī jñūhun ún, te ni cacahán xeēn i nuū Pablo. Te máá de ni caja de sahna de jeē cúu seña jeē stóo de i jín cuēchi i, te ni cahán de jín i:

Cuēchi máá ní cúu jeē jñahnū ndetū ni núu súcuan, te nasūu cuēchi máá ná cúu. Nde vjna te quihín na núu ñayuu táca nación jeē tu cájini i jñūhun ya, te nacani ná jñūhun ya nuū i, áchí de.

<sup>7</sup> Te ni quenda de ini vehe ñn sinagoga, te ni jinū de vehe ñn tēe naní Justo ni condee de. Te chíñuhún tēe un Yaā Dios, te vehe tēe un néne yajni xiin véhe ñn sinagoga. <sup>8</sup> Te Crispo, tēe cújéñu ñn vehe ñn sinagoga, ni cándje de máá Jítoho yó nde jín ndihi ñayuu vehe de. Te cuehē ñayuu ñuu Corinto ni cajini nahín i jñūhun nácani Pablo, te ni cacandje i, te ni cajendute i. <sup>9</sup> Te ñn jecuáá ni sáha máá Jítoho yó jeē ní jito ndijin Pablo yá ni cahán yá jín de:

Ma yūhu ró ni ma cási rō yuhu ró, chí níni nacani ró jñūhun ri. <sup>10</sup> Chi ndíto ri rohó, te ma cúu sáha xeēn ni ñn ñayuu jín ró. Nacani ró jñūhun ri, chí coo cuehē ñayuu cándje jñūhun ri ñuu yáha, áchí yá.

<sup>11</sup> Te ni condee Pablo yūcuán ñn cuiyā yosáva ni steén de jñūhun Yaā Dios nuū ñayuu ún.

<sup>12</sup> Te ná cúu Galión gobernador Acaya, te ñayuu hebreo jeē cúu jñáhan ñuu Pablo, ñn cáhnu-ni ni candonda i siquī Pablo. Te ni cajeca i de cuango i jín de nde vehe juzgado. <sup>13</sup> Te ni cacahán i jín Galión:

Tēe yáha yōhyo scáhan de táca ñayuu jeē inga modo chíñuhún i Yaā Dios, suu ñn modo jeē cúu contra siquī ley, áchí i.

<sup>14</sup> Te quejéé Pablo cahán de núu, te ni cahán-ni Galión jín ñayuu hebreo un:

Ñayuu hebreo jijnáhan ró, núu ñn cuēchi xeēn cúu, te cánuú cuni nahín ri jñūhun cácahán rō núu. <sup>15</sup> Te tuú, chí máni siquī jñūhun-ni jín siquī ley máá ró jín siquī tēe cástéén cúu. Te na sándaā máá ró siquī jniñu yáha, chí tu sándaā rí siquī máá ñn jeē súcuan-ni, áchí de.

<sup>16</sup> Te ni cahán de nuū i jeē na quíngoo i fuera. <sup>17</sup> Yūcuán na te ñayuu griego ni cajniñi i Sóstenes, tēe cújéñu ñn vehe ñn sinagoga, te máá fuera yehyí vehe juzgado ni cacani i de, te Galión chí tu ní sáha cuiti de cuenta.

*Jeē ní najinū Pablo ñuu Antioquia, te cuahán de vuelta uní jeē nacani de jñūhun ya*

<sup>18</sup> Te cuehē gā quiví ni condee Pablo ñuu Corinto. Yūcuán na te ni nacuatáhu de nuū táca hermano yūcuán, te Aquila jín ñasihí de Priscila cuango de jín Pablo, te ni jinūcōo de ñuu Cencrea. Te yūcuán ní saté líi Pablo xiní de, te súcuan steén de jeē squicu de nuū



Yaā Dios jeē ní jéjnūhun de. Te ní quíwicoo de barco jíin Aquila jíin Priscila quihín de región Siria. <sup>19</sup> Te ní jinūcco de ñuu Efeso, te yūcuan ní caquendōo Aquila jíin Priscila. Te ní jehēn-ni Pablo vehe ñi sinagoga, te ní cahān de jnūhun ya jíin jnāhan ñuu de hebreo jeē cándutútu yūcuan. <sup>20</sup> Te ní cacahān ndahú i jíin de jeē na cōnēne de jecu gā quiví jíin i, te tu ní jéhe de jnūhun. <sup>21</sup> Chi ní nacuatáhú de nuū i, te ní cahān de:

Cánuú jéē nuhūn ná ñuu Jerusalén cone ná vico. Te núu cúní Yaā Dios te ndee tucu ná nuū ní, áchí de.

Te ní quenda de ñuu Efeso, te ní quívi de barco cuahān de. <sup>22</sup> Te ní jinū de ñuu Cesarea, te ní jehēn de ñuu Jerusalén. Te nuū ní ndihí ní cahān de jíin grupo ñayuu cácañdije yūcuán, te cuanuhun de ñuu Antioquía. <sup>23</sup> Te ní coyūcú de yūcuán jecu quiví, te sáa te ní quenda tucu de cuahān de ní jica cuu de de ní Galacia jíin Frigia. Te ñayuu cácañdije ní cahije ga ní i jíin jnūhun ya ní sáha de.

*Jeē ní nacani Apolos jnūhun Jesús ñuu Efeso*

<sup>24</sup> Te ñuu Efeso ní quee ñiñ tēe hebreo nání Apolos, te tēe ñuu Alejandría cúu de. Te vāha nācani de jnūhun ya, chí vāha jíin de jnūhun jeē cahān tutu ñi. <sup>25</sup> Te je ní cutūhva vāha tēe un jíin jnūhun máá Jítoho yō Jesús, vēsú jíin de máni máá jnūhun ya jeē ní stēén Juan ná ní scuándute de ñayuu, te ndhívi ní de stēén cají de jnūhun ya nuū ñayuu. <sup>26</sup> Te jéhnū-ni ní nacani de jnūhun ya ñi vehe ñi sinagoga. Te ní cajini sōho Aquila jíin Priscila jnūhun nācani de, te ní cajeca de Apolos cuangoo sñin de, te ní cacastūhun yúcn ndindúú de jnūhun ya jeē ná tu cuni Apolos. <sup>27</sup> Te cúní Apolos quihín de nde región Acaya. Te je cácañdije sava ñayuu yūcuan ní sáha Yaā Dios siquī jeē vāha ní yā. Te táca hermano ñuu Efeso ní cachindéé ñāhán i de, chí ní catee i carta quihín de jíin nuū ñayuu cácañdije cáyūcú Acaya jeē na cuatáhú i Apolos. Te nuū ní jíin de yūcuán, te vāha ní chindéé ñāhán de táca ñayuu cácañdije un jíin jnūhun ya. <sup>28</sup> Te nuū táca ñayuu ñuu un ndé jíin jnāhan ñuu de hebreo jeē cáyūcú yūcuan, ní stēén cají de ndese cástívi táca jnāhan hebreo de siquī jnūhun ya. Te tu ní cánihín jnāhan de un jnūhun cahān siquī jeē ní stēén de, chí jíin jéē cahān tutu ñi ní stēén de jeē Jesús cúu Cristo, Yaā jeē cáñūhun ní de quiji ya.

*Jeē ní íne Pablo ñuu Efeso*

## 19

<sup>1</sup> Te ní ní nēne Apolos ñuu Corinto, te ní yāha Pablo ichi síquī ñuu Efeso, te ní nanuu de ní jinū de máá ñuu ún. Te yūcuan ní níjnāhan de jíin tjini tēe cácañdije. <sup>2</sup> Te ní cajnūhún de tēe ún:

¿A ní canihín ní Espírítu Santo ná ní cacandije ní, chí ná tuú? áchí de.

Te ní cacahān de jíin Pablo:

Tuú, chí ní ná tu nihín na jnūhun jeē iyó Espírítu Santo, achí de.

<sup>3</sup> Yūcuán na te ní cahān Pablo:

¿Na siquī ní cajendute ní núu súcuan? áchí de.

Te ní cacahān de:

Ni cajendute ná siquī jnūhun ní steén Juan, achí de.

<sup>4</sup> Te ní cahān Pablo:

Jeē ní scuándute Juan ñayuu cúu jeē ní stēén de jeē na nācani ní i jeē stóo i cuēchi i, te ní cahān de jeē na cándije i máá Yáa quiji jeē cúu Cristo Jesús, áchí Pablo.

<sup>5</sup> Te nuū ní cajini sōho tēe un jnūhun yāha, te ní cajendute de jeē ní cacandije de máá Jítoho yō Jesús. <sup>6</sup> Te ní soó Pablo ndindúú ndaha de xiní táca tēe ún, te ní quívi ní Espírítu Santo ñi anuá de jíināhan de, te ní cacahān de sñin sñin yuhu te ní canacani de jnūhun ya. <sup>7</sup> Te ní ñyo nájñūhun uxí uū jnāhan tēe.

<sup>8</sup> Te uní yoō ní jehēn jehēn Pablo vehe ñi sinagoga. Te jéhnū ní nacani de jnūhun ya, te ní nducú ndéyí de jeē na cándije ñayuu jnūhun ndese ndácu Yaā Dios jniñu. <sup>9</sup> Yūcuán na te sava i ní cacunihni ní i te tu ní cácañdije i, chí sa ní cacahān neé i siquī jnūhun vāha Yaā Dios jíin ñayuu cánataca. Jeē yūcuan ní cujiyo-ni Pablo nuū ñayuu ún, te ñayuu cácañdije cuangoo i jíin de. Te ndijnahan quiví ní stēén de nuū ñayuu ún ñi escuela ñiñ tēe nání Tiranno. <sup>10</sup> Te súcuan ní sáha de uū cuiyā, te táca ñayuu cáyūcú Asia, cúu ñayuu hebreo cúu ñayuu táca gā nación, ní cajini sōho i jnūhun máá Jítoho yō Jesús. <sup>11</sup> Te ní jéhe Yaā Dios poder nuū Pablo jeē sáha de cuehē jniñu jéhnū téyí. <sup>12</sup> Te nde pañú jíin sahma jeē ní jni de ní cajengoo jíin nuū ñayuu cácuñh, te ní canduvāha-ni i cuehí cándoho i, te ní quendacoo tachí ñi i cuangoo.

<sup>13</sup> Te jecu tēe hebreo cájica cuu de jeē quēnehen de tachí ñi ñayuu, te ní cajini siquī ní de jeē suni jíin poder máá Jítoho yō Jesús quēnehen de tachí, te suhva ní cacahān de jíin táca táchi:

Jíin poder Jesús jeē nācani Pablo jnūhun ya, cáhán nihín rí jíin ró jeē na quēnda ró quihín ró, achí de.

<sup>14</sup> Te súcuan ní casáha uxā sēhe yú ñiñ tēe hebreo nání Esceva, cúu de ñiñ sutú cujéhnū.

<sup>15</sup> Te ná ní casáha de, te ní cahān-ni tachí ún:

Je jíin rí Jesús, te suni jíin rí Pablo. Te róhó jíināhan ró ¿ndé tēe cácu ró jéē cuatáhú rí rohó? áchí jíin de.

<sup>16</sup> Te tēe ndóho tachí un ní ndonda de, te ní cundeyí de siquī ndihúxá tēe ún. Te ní sáha xeēn ndasí de jíin ndé ní catuji te ní cacuvichí lí ní quendacoo vehe un ní cajinu cuangoo. <sup>17</sup> Te jnūhun yāha ní cajini

tāca ñáyyu cáyúcú ini ñuu Efeso, cúu ñayuu hebreo cúu ñayuu tāca gá nación, te yóhoyo ni cayúhú i, te ni cacahān i jeē yóhoyo cújéhnú máá Jítoho yó Jesús.

<sup>18</sup> Te cuehē ñayuu jeē ní cacandíje ni qui-jicoo i nuū Pablo ní nacani ndaā i jñuhun tāca jniñu neé ní casáha i. <sup>19</sup> Te cuehē i jeē ní casáha jniñu tásí ní jinúcoo i cándiso i tutu i, te ni cajehmu i tutu un jító nuū tāca ñáyyu. Te ni catava i cuenta nasaa ndéé tutu ni cáyū ún, te ni cajini i jeē uú xico uxī mil xūhun plata cúu. <sup>20</sup> Te ni jitē jñuhun máá Jítoho yó cuahān, te ndihí ñayuu ni cajini i jeē cujéhnú ndasí jñuhun ya.

<sup>21</sup> Te nuū ní ndihí tāca jniñu yáha, te jéni téyí ni Pablo jeē quihín de Macedonia jíin Acaya, te sáa te najinū de ñuu Jerusalén. Te ni cahān de jeē na nájinū de ñuu Jerusalén, yūcuán na te jíni ñúhún quihín de nde ñuu Roma. <sup>22</sup> Te uū tēe jeē cáchindéé ñahán jíin Pablo cúu Timoteo jíin Erasto, te ni scāndu de ndindúú tēe yáhá cuángoo de nde Macedonia, te ni quendō máa de Asia jecu gā quiví.

### *Jeē ní cacuvaā ñayuu ñuu Efeso*

<sup>23</sup> Te suu quiví ún yóhoyo ni candonda ñayuu siquí jñuhun ya. <sup>24</sup> Chi ní Iyo iin tēe sájinū siquí plata, nání de Demetrio. Te máa de jíin ndihí tēe cásajniñu jíin de, cánihín de cuehē xūhún, chi jíin plata casáha de vehe lulí jéé modo veñuhun ídolo i jeē cúu yaā Diana. <sup>25</sup> Te Demetrio ní nastútú de tēe cásajniñu jíin de jíin tāca gá tēe jeē suni jniñu yūcuán casáha, te ni cahān de:

Tátá, cájini ní jéé siquí jniñu casáha yó yáha váha cánihín yó xūhún. <sup>26</sup> Te cájito ní te cájini sōho ní jéé iin tēe nání Pablo chí cáhān de jeē násū yaā cácuu jeé casáha ñayuu. Te je ni scandíje de cuehē ñayuu, nasūu máá iin-ni ñuu Efeso yáhá chí ní cáhnu Asia. <sup>27</sup> Te quiyúhú ní na jéé cahān ñayuu jeē tu ndé jéjiniñu jeé casáha yó. Te sanaa te suni sūcuán cahān i coto i máá veñuhun yaā síhí Diana jeē cujéhnú, te suni sájéé ni i nuū yaā Diana, te ma cúu ga cujéhnú ya vésū ndivii ñayuu Asia jíin ñayuu ní cáhnu ñayiví cáchíñúhún i ya vijna, áchí de.

<sup>28</sup> Sūcuán ni cajini sōho de jñuhun yáha te yóhoyo ni caquití ni de, te ni cacana jee de:

Cújéhnú téyí Diana, yaā cúu patrona ñuu yó Efeso, achí de.

<sup>29</sup> Te ñayuu ñuu Efeso ní cacuvaā i, te iin cáhnu-ni ní candonda i ni cajni i Gayo jíin Aristarco cuangoo i jíin de nde vehe nuū cándutútú ñayuu casáha i junta. Te ndindúú tēe un cácuu tēe Macedonia, te cájica de jíin Pablo. <sup>30</sup> Te cúni Pablo quiví de nuū ñayuu cuehē un cahān de jíin i, te ñayuu cácadíje tu ní cájéhe i jñuhun quihín de. <sup>31</sup> Te suni sava tohō jeé cácuu amígo de cáyūcu Asia, ní cataj jñuhun cuahān nuū de, cácahān ndahú jíin de jeé ma quihín de nuū ní cacutútú

ñáyyu ún. <sup>32</sup> Te ñayuu ní cacutútú un, sava i ní cacana jee i iin jñuhun te sava ga i inga jñuhun, te sūcuán ni cacuvaā teyí i, te cuehē i ní tu cájini cuiti i na siquí cúu jeē ní cacutútú i. <sup>33</sup> Te sava tēe hebreo ní cajeni de iin jñáhan de jeé nani Alejandro nuū ñayuu cuehē ún, te ni cacastúhún de nuū tēe ún na siquí cúu jeé cácuvaā i. Yūcuán na te Alejandro ní sáha de seña jíin ndaha de jeē na cúnayúú ñayuu, chí cúni de cahān de jíin i jeē násūu cuéchi tāca ñayuu hebreo cúu. <sup>34</sup> Te ni canacuni ñayuu un jéé tēe hebreo cúu de, te jeé yūcuán ní cacana jee téyí gá i nájnuhun uū hora:

Cújéhnú téyí Diana, yaā cúu patrona ñuu yó Efeso, achí i.

<sup>35</sup> Yūcuán na te ni cacunahín ñayuu ní sáha tēe cúu secretario ñuu ún, te ni cahān de:

Nihín ñayuu ñuu yó Efeso, ndihí ñayuu chí je cájini i jeé cándito váha yó veñuhun yaā Diana jíin imagen Diana jeē ní ñinga nde andiví. <sup>36</sup> Te ni iin chí ma cúu cahān jeé tú ndaā jñuhun yáha. Núu sūcuán te váha ga na cási ní yuhu ní, te ma sáha yachí ní iin jeē tu ní nacani váha ni ní siquí. <sup>37</sup> Chí tēe yáha ní caquindeca ní de yáhá vésú tu ní casáha de ní iin cuéchi siquí Diana yó, ní tu ní cácahān ndeváha de ní iin jñuhun siquí. <sup>38</sup> Te Demetrio jíin tāca gá tēe jeē iin-ni jniñu casáha jíin de, núu cácuu de cahān de cuéchi siquí iin tēe, te na quíngoo de nde vehe juzgado nuū cáyūcu juez, tēe cásandaá jniñu, te yūcuán cundaā siquí de jíin ahān de. <sup>39</sup> Te núu iyó jñuhun jeé ma cúu cundaā yūcuán, te jíni ñúhún cundaā nuū iin junta nájnuhun tájniní ley. <sup>40</sup> Chí yúhú ná jeé sanaa te cahān tāca tóhō Roma jeé siquí gobierno de ní candonda yó, chí ma nihín yó jñuhun castúhún yó na siquí cúu jeé ní cacutútú yó ní cacuvaā yó vijna, áchí de.

<sup>41</sup> Te nuū ní ndihí ni cahān secretario jñuhun yáha, te ni cajitē ñayuu un cuángoo.

### *Jeē ní jéhen Pablo Macedonia jíin Grecia*

## 20

<sup>1</sup> Te ná ni yáha jéé ní cacuvaā ñayuu, te ni cana Pablo ñayuu cácadíje, te ni jeni ichí de i. Te ni cañunundee jñáhan de jíin Pablo jeé ní nacuatáhu de, te cuahān de Macedonia.

<sup>2</sup> Te ní jaca cúu de tācá ñuu yūcuán. Te jíin cuehē jñuhun ní stihví ní de tācá hermano cácadíje. Te ní jinū de Grecia. <sup>3</sup> Te ní condee de yūcuán úní yoō. Te je yajni quihín de jíin barco nde Siria nuú, te máá quiví ún te ní nihín de jñuhun jeé jñáhan ñuu de hebreo ní casquíñáhan jñuhun jeé ndonda siquí de ichi nuú quihín de, te jeé yūcuán ní nacani ní de te cuahān tucu de ichi Macedonia. <sup>4</sup> Te ní cahíyo sava tēe cájica jíin Pablo, te cánaní de Sópater ñuu Berea, Aristarco jíin tēe nání Segundo nde ñuu Tesalónica, Gayo ñuu Derbe, Tíquico jíin Tróximo nde Asia, jíin

Timoteo. <sup>5</sup> Te ni cacandu tēe yáha, te cándētu de Pablo jíin sáña, Lucas, nde ñuu Troas. <sup>6</sup> Te nuū ni yáha vico jeē cáyeji i pan jeē tu yíhi levadura, te jíin barco ni quendacoo ná ñuu Filipos, te nde nuū uhún quiví te ni canajnáhan ná jíin de nde ñuu Troas. Te ñuu yúcuán ní coyūcu ná uxā quiví.

*Jeē ni íne Pablo ñuu Troas*

<sup>7</sup> Te máá quiví domingo ni candutútu ñayuu cáandíje jeē cáji i pan, nájnūhun ní steén máá Jítóho yō jeē núcūhun ní yō siquí yā. Te ní steén Pablo jnūhun nuū ñayuu ún. Te siquí jeē inga quiví un jíni ñūhún quenda de quihín de, te nahán ní nacani de jnūhun nde ni cuñú. <sup>8</sup> Te vehe yósó jnáhan cúu vehe ún. Te nde cuarto xiní nuū ní candutútu ná un ní íyo cuehē lámpara ni cundijin. <sup>9</sup> Te ñin sūchi yí nání i Eutico, néne i yuhu ventana. Te jeē ní cunahán nacani Pablo jnūhun, te yōhyo jíi i máhná, te ní quixi-ni i. Te nde piso uní un ní ñinga i nde nuū ñūhun. Te je ní jihí i ní candonehen de i. <sup>10</sup> Yúcuán na te ní nuu Pablo te ní jita ndeyi de ní canehen de i ní ñununde de i, te ní cahān de:

Ma yūhu ní jijnáhan ní, chí ni natecu i, áchi de.

<sup>11</sup> Te ní ndaa Pablo, te ní yeji de pan jíin i jijnáhan i jeē cáncūhun ní de siquí yā. Te nahán gá ní nacani de jnūhun nde cuacundijin. Yúcuán na te ní quenda de cuahān de. <sup>12</sup> Te Eutico chí íyó vāha i cuanuhun i jíin de jijnáhan de, te ndivii ñayuu ún yōhyo cácusí ní i.

*Jeē ní quenda Pablo ñuu Troas cuahān de ñuu Mileto*

<sup>13</sup> Te ní quívicoo ná ini barco cuangooná. Te Pablo chí cúní de caca jéhé de, te ní cundaā jeē najnáhan ná jíin de nde ñuu Asón. <sup>14</sup> Te nuū ní canajnáhan ná jíin de ñuu Asón, te ní quiví de barco te cuangooná jíin de nde ñuu Mitilene. <sup>15</sup> Te yúcuán ní quendacoo tucu ná jíin barco te inga quiví ní jinúcoo ná xiin Quío, ñuhun jeē íne sán nuū ndúte. Te quiví uní ní jinúcoo ná Samos jeē súni nuū ndúte íne, te ní caquendōo ná Trogilio. Te quiví cuán ní jinúcoo ná ñuu Mileto. <sup>16</sup> Te tu ní jéngoo ná ñuu Efeso, chí jéni ní Pablo jeē yáha-ni de ñuu un quíhín de, návāha ma cucuéé de Asia te naa tiempo nuú, chí núu de jinú yachí de ñuu Jerusalén cone de máá quiví Pentecostés núu ná cúu.

*Jeē ní jeni ichí Pablo tēe jéhnú cándiso jnūñu nuū ñayuu cáandíje ñuu Efeso*

<sup>17</sup> Te ná íne ga Pablo ñuu Mileto, te ní tají de jnūhun cuahān nde ñuu Efeso jeē na quíjicoo tēe jéhnú cándiso jnūñu nuū ñayuu cáandíje yúcuán. <sup>18</sup> Te nuū ní quecoo tēe ún, te ní cahān de:

Je cájini vāha ní ndese ní jica ndaa ná ndé ná ní quee nuú ná Asia te nde vijna.

<sup>19</sup> Chí ní tiempo jeē ní íne ná jíin ní te nde vijna, jéjníñu vāha ná siquí jnūhun máá Jítóho yō, te tu ní sándúxí ná maá ná. Te íyó jínu ní ndahyū ná jéhé ñayuu. Te ní ndoho ná jnūdóho ní casáha jnáhan ñuu ná hebreo, chí ní casquijnáhan jnūhun i siquí ná. <sup>20</sup> Te cájini ní jéé tu ní táñūhún ná ní ñin, vésú ndese ga cácahān ñayuu siquí ná, chí ní nacani ná ndihi jnūhun ya jeē quéndōo vāha ní sáha. Te ní steén na jnūhun ya nuū ní jijnáhan ní, cúu nuū chítú cúu táca vehe ní. <sup>21</sup> Te inuú-ni jnūhun ní nacani ná nuū ndihi ní, cúu jnáhan ñuu ná hebreo cúu ñayuu táca gá naciún, chí ní cahān na jéé na nacani ní ní jéé stóo ní cuéchi ní te na cándíje ní máá Jítóho yō Jesucristo. <sup>22</sup> Te vijna chí ñūhun ichí ná quihín ná ñuu Jerusalén, chí stáhví ní Espírítu Santo sáña quihín ná. Te tu jíni ná ndese ga coo jíin ná yúcuán. <sup>23</sup> Te íyó ñin jeē jíni na, cúu jeē chune i sáñá vecāa te quíji jnūdóho siquí ná, chí Espírítu Santo súcuán cáhán jíin ná ndijnáhan ñuu nuú jica ná. <sup>24</sup> Te ní tu sáha ná cuenta vésú na cáhni i sáñá, chí jeē cuní na cúu jeē na sínu vāha ná jnūñu jeē ní tee máá Jítóho yō Jesús siquí ná, te súcuán cusí ní ná. Te jnūñu un cúu jeē nacani ná jnūñun vāha ya nuú táca ñayuu ndese vāha ní Yāā Dios jíin yó.

<sup>25</sup> Te je ní jica cuu ná, ní nacani ná jnūñun ya nuú ní ndese ndácu Yāā Dios jnūñu. Te vijna chí jíni na jéé ní ñin ní ma najnáhan ga yō nuú ñayiví yáha. <sup>26</sup> Jeē yúcuán cástūhun cáji ná nuū ní jijnáhan ní vijna jeē násū cuéchi ná cúu núu ndé ñin ní stíví. <sup>27</sup> Chí ní nacani ná nuú ní ndihi jnūñun Yāā Dios jeē ní sándaā yā ndese coo, te tu ní quéndōo ní ñin jnūñun. <sup>28</sup> Núu súcuán te coto vāha ní máá ní jíin ndihi ñayuu cáandíje, chí Espírítu Santo ní jeni ya nihín jéé cóndito ní ñayuu máá Jítóho yō, chí ní nacuaan ya i jíin ññi yā. <sup>29</sup> Chí jeē quíhín na te jíni na jéé quíjicoo tēe cástáhu quívicoo méhñu ní, te nducú de snáa de jnūñun ní cajetáhu ñayuu cáandíje, te xeén sáha jnūñun stáhu de nájnūñun xeén sáha yíhi jeē cájehni t̄lanchi. <sup>30</sup> Te suni nuū grupo máá ní quejéé sava de cahān de jnūñun stáhu, te stáhu de sava ñayuu cáandíje jeē na cóndiquín i jnūñun stáhu stéén de. <sup>31</sup> Jeē yúcuán condito ní jéé ma cóo súcuán. Te ma náá ní ní jéé uní cuiyā ndiquiví ndíñu ní condihví ndasí ní na ndé ndahyú na jéhé ní, ní jeni ichí ná ñin ñin ní jijnáhan ní.

<sup>32</sup> Te vijna, hermano, jícan tahú na nuú Yāā Dios jeé coto ya nihín. Chí jnūñun jeé vāha ní yā ndíso poder sáha jeé íje ga ní jíin, te suu sáha jeé ñin quiví te cuāha ya tahú jeé ndujéhnú luu ní ndé jíin ndihi ñayuu ní nacáji ya jeé cóo ndoo coo íi i nuú yā. <sup>33</sup> Tu ní ndúcú ná jeé nihín na xúhun chí sahma nuú ní ñin i. <sup>34</sup> Chí je cájini vāha ní jéé sa suhva ní sájniñu nihín ná návāha nihín na jéé cótecu na ndé jíin táca tēe cájica jíin ná. <sup>35</sup> Te

níní ní steén na núú ní jéé súcuan jíni ñúhún sájniñu yó návaha nihín yó jeé cuáha yó núú ñayuu cúmaní nuú. Te ma náa ní ni jnúhun jeé ní cahán maá Jítho yó Jesús, chí suhva ní cahán yá: Ndetú gá quendóo yó jeé cuáha yó vesú jeé nihín yó, achí yá. Achí Pablo.

<sup>36</sup> Te ní ndihi ní cahán de táca jnúhun yáha, te ni jecuiñí yití de, te ni jicán tahú de jíin ndihi tée ún. <sup>37</sup> Yúcuán na te ndihi de ní cajecunundee jnáhan de jíin Pablo ní catechuhú de jeé cánacuatahú de, te ní candahyú de. <sup>38</sup> Chí cácuclhyá ndasí ní de jíin jnúhun ní cahán Pablo jeé ma ndácoto jnáhan ga de. Te cuangoo-ni de jíin Pablo nde núú íin barco.

*Jeé cuánuhun Pablo ñuu Jerusalem*

## 21

<sup>1</sup> Yúcuán na te ni caquendóo táca hermano ñuu Efeso, te ni quívicoo ná barco, te cuangoo ndaa-ni ná ndé Cos. Te inga quiví ní jinúcoo ná Rodas, te yúcuán ní quendacoo ná te ní jinúcoo ná ñuu Pátara. <sup>2</sup> Te ni cane ñin barco jeé quihín Fenicia, te ni quívicoo ná cuángoo ná. <sup>3</sup> Te nuú ní cajito ná núú Chipre jeé íne sáin nuú ndúte, te ni quendóo ichi lado jecó barco, chí ni cayáha ná cuángoo ná nde Siria. Te ní jinúcoo ná ñuu Tiro, chí yúcuán ndóo jeé ndíso barco ún. <sup>4</sup> Te ni jenducú ná ñayuu cácan díje, te ni caquendóo ná jíin i uxá quiví. Te maá Espíritu Santo ní steén nuú i jeé quiji jnúndóho siquí Pablo ñuu Jerusalem, te jeé yúcuán ní cacahán i jíin de jeé ma quihín de. <sup>5</sup> Te ní yáha uxá quiví ún, te ní quendacoo ná. Te táca tée cácan díje jíin ñasíhí de jíin sêhe de ní cachuhun íchí de sáña ní jengoo de jíin ná nde yatá ñúú, te ni cajecuiñí yití ná jíin de yumar te ni cajicán tahú na. <sup>6</sup> Te ní cañunundee jnáhan ná ní canacuatahú ná yúcuán, te ní quívicoo ná barco cuangoo ná. Te ni canandió cóo de cuanungoo de vehe de.

<sup>7</sup> Te ní quendacoo ná ñuu Tiro cuangoo ná jíin barco, te ní jinúcoo ná ñuu Tolemaida ní quendacoo ná ñin barco. Te yúcuán ní jengoo ná ní cacahán na jíin táca hermano, te ní caquendóo ná jíin de ñin quiví. <sup>8</sup> Te inga quiví un ní cajica jéhé ná jíin Pablo, te ní jinúcoo ná ñuu Cesarea, te ní quívicoo ná vehe Felipe, tée nácani jnúhun váha ya. Tée un cúu jnáhan jeé ndihuxá tée jeé ní casaja staa nuú ñáhan viuda. Te ní caquendóo ná jíin de. <sup>9</sup> Te tée un íyó cúun sêhe síhí de jeé cáhíyo máá i, te cáncani i jnúhun Yáa Dios. <sup>10</sup> Te ní coyúcu ná yúcuán tijni quiví. Te ichi Judea ní quiji ñin tée nácani jnúhun Yáa Dios, nání de Agabo. <sup>11</sup> Te ní quee de nuú ná. Te ní quihín de sanchú Pablo, te ní jihni de ndaha de jíin jéhé de, te ní cahán de:

Suhva cáhán Espíritu Santo. Jnáhan yó hebreo súcuan cuhni i tée chíí sanchú yáha

ini ñuu Jerusalem, te nastúu i de nuú ñayuu sáin nación, achí de.

<sup>12</sup> Te jeé ní cajini sôho na jnúhun yáha te máá ná jíin táca tée cácan díje cáyúcu ñuu Cesarea ní cacahán ndahú ná jíin Pablo jeé ma quihín de ñuu Jerusalem. <sup>13</sup> Yúcuán na te ní cahán Pablo:

¿Najehé cándahyú ní jíinán ní, te cásaha ní jeé cuculhyá ní ná? Chí saña je íyó túhva ná jeé násúu máá jeé cónuhni ná ini ñuu Jerusalem, chí suni jeé vesú na cúu na jeé siquí máá Jítho yó Jesús, achí de.

<sup>14</sup> Te jeé tu ní cúu cuiti casicoo ná, yúcuán na te sa suhva ní cacahán ná:

Na cóo ndese cúni máá Jítho yó nuu súcuan, achí ná.

<sup>15</sup> Yúcuán na te sáa te ní casátúhva ná, te cuangoo ná ñuu Jerusalem. <sup>16</sup> Te suni jecu tée ñuu Cesarea jeé cácan díje cuangoo de jíin ná. Suni cuahán ñin tée Chipre nání de Mnasón, te je ní cuu cuehē cuiyá candíje de. Te ná ní jinúcoo ná ñuu Jerusalem, te ní cacoyúcu ná vehe de.

*Jeé ní jécondêhe Pablo Jacobo*

<sup>17</sup> Te nuú ní jinúcoo ná ñuu Jerusalem, te hermano cáyúcu ñuu ún yóhíyo ní cacusi ní de jeé ní jinúcoo ná. <sup>18</sup> Te inga quiví un ní cajengoo ná jíinán na jíin Pablo vehe Jacobo, te yúcuán ní candutútu táca tée jéhu cándiso jniñu nuú ñayuu cácan díje. <sup>19</sup> Te Pablo ní sáha de saludar tée ún jíinán de. Yúcuán na te ní castúhún de ndihi jniñu ní sáha Yáa Dios ná ní nacani de jnúhun ya nuú ñayuu táca nación jeé tu cajini i jnúhun ya. <sup>20</sup> Te ní cajini sôho de jnúhun yáha, te ní cacahán de jeé yóhíyo cújéhu Yáa Dios. Te ní cacahán de jíin Pablo:

Hermano, vijna te jíni ní náa cuehē mil jnáhan ñuu yó hebreo ní cacandíje i Jesús, te cácan ñihin i jeé cánuú squicu yó ley jeé ní jéhe ya nuú Moisés. <sup>21</sup> Te ní canihín i jnúhun cácan ñin jeé stívi ní steén ní núú táca jnáhan yó ñayuu hebreo cáyúcu jíca i táca gá nación, chí ní steén ní núú i jeé ma cuatáhú gá i nuú ley Moisés, ní ma sáha ga i circuncidar sêhe i, ní ma cuatáhú gá i táca gá jeé tajnúni jengahán. <sup>22</sup> ¿Ndeese sáha ní núu súcuan? Chí cuni ñayuu un jéé ní ndee ní te cutútu cuehē i. <sup>23</sup> Suhva sáha ní núu súcuan. Yáha íyó cúun tée jeé ní cajejnúhun de ñin jeé squicu de nuú Yáa Dios. <sup>24</sup> Cueva ní tée yáha quihín ní jíin de templo, te cuchi ní nasándoo ní máá ní jíin de nuú yá, te cuaan ní jeé sóco de nuú Yáa Dios jíinán de. Yúcuán na te cuu saté de xiní de, te suu steén jeé ní casquicu de ndihi jeé ní cajejnúhun de nuú yá. Yúcuán na te cuni ndihi ñayuu jeé tú ndaa táca jnúhun ní cajini sôho i siquí ní, chí coto i jeé suni máá ní sa squicu ní ley yá. <sup>25</sup> Te ñayuu táca nación jeé násúu ñayuu hebreo cácuu i te ní cacandíje i ya, je ní catee ná carta cuahán nuú i jeé tu

cánuú squícu i ley un, chi máá-ni jeé ma cáji i cūñu jeé ni sóco nuú ídolo ni niñi ni quiti jeé jihí jeé tu jéti niñi tī, te ni ma cáca jnéni í, áchi de.

*Jeé ní cajni de Pablo ini templo*

<sup>26</sup> Yūcuán na te ni jeca Pablo tēe ún, te inga quiví un ní cajichi de ni canasándo de máá de nuú yā. Te ni quiví Pablo ini templo ni cachi de nuú sutú na quiví jinu jeé nasándo tēe un máá de nuú yā, te quindeca de quiti jeé socó de nuú yā.

<sup>27</sup> Yūcuán na te cácuu de jeé sínu de ndihúxá quiví jeé cándundo de nuú yā, te sava jnáhan hebreo de jeé véjicoo Asia ni cajini de jeé íne Pablo ini templo, te ni cascáhan de ndihi ñayuu, te ni cajni i Pablo. <sup>28</sup> Te ni cacana jee i:

Tēe ñuu yō Israel, cuáha núú ní ndaha jijnáhan ní na jni yó tēe yáha. Chi máá de cúu tēe jica cuu ní cáhnu stéen de nuú táca ñayuu, te cáhán de siquí nación yō jín siquí ley jeé ni jéhe ya nuú Moisés jín siquí templo yáha. Te suni je ni quivicoo de jín jecu tēe griego ini templo i yáha, te súcuu stívi de jnūhun i jeé cáhán jeé ma cúu quiví ñayuu ini templo te núu nasū ñayuu hebreo cúu i, áchi.

<sup>29</sup> Chi nde na íne Pablo ini ñuu un ní cajini tēe hebreo jeé jica de jín Trófimo, tēe ñuu Efeso jeé násúu hebreo cúu de, te cájeni ní de jeé ni quiví tēe un jín Pablo ini templo.

<sup>30</sup> Te ndihi ñayuu ñuu un ní cuvaá, te ni cacutú-ni i, te ni cajni i Pablo, te ni castáa i de ni quenehen i de ini templo un, te ni canacasi-ni i yéhyí. <sup>31</sup> Te ni cacuni i cahni i de núú. Te general, tēe cújéhu nuú ndíhi soldado, ni nihin de jnūhun jeé ndihi ñayuu ñuu Jerusalén ni candonda i cácuvaá i. <sup>32</sup> Te ni jeca general táca soldado jín capitán, te cájnu de cuango de nde nuú cáhín ñayuu cuehé ún. Te ná ni cajito ñayuu jeé ni jínūcoo general jín soldado, te ni cajecuñi i jeé cácani i Pablo. <sup>33</sup> Yūcuán na te ni quiví general mēñu ñayuu, te ni jni de Pablo, te ni ndacu de jniñu jeé conuhní de jín úu cadena. Yūcuán na te ni cajnūhūn general ndé tēe cúu Pablo te na cuéchi ni sáha de. <sup>34</sup> Te ni cacana ñayuu cuehé ún, sava i ñn jnūhun te sava ga i inga jnūhun, te tu ní cúu cuni de na cuéchi ni sáha Pablo, chi cácuvaá i. Te ni ndacu de jniñu cuahán Pablo nde cuartel. <sup>35</sup> Te nuú ni jínū Pablo escalera cuartel ún, te soldado ni cajni de Pablo cándiso de siquí jeé cácani ñayuu ún jni i Pablo sáha xeñ i jín de. <sup>36</sup> Chi ndihi i véjicoo i ichi yátá soldado, te cácana jee i:

Cahni ni tēe jijná, áchi i.

*Jeé ní cáhán Pablo jehé maá de nuú ñayuu*

<sup>37</sup> Te cásquivi de Pablo ini cuartel nuú, te jín jnūhun griego ni cáhán Pablo jín general:

¿A cuáha ni jnūhun cahán ná ñn jnūhun jín ní? áchi de.

Te ni cáhán general jín de:

Te jini rō cahán rō yuhu griego jeé súcuu. <sup>38</sup> Núu súcuu te nastu róhó cúu tēe Egípto jeé jeé ni cuu quiví ni ndonda siquí gobierno te ni quenehen cuñ mil tēe jéhi ndiyi cuango jín de nde nuú ñūhun tēhé, áchi.

<sup>39</sup> Yūcuán na te ni cáhán Pablo:

Tuú, chi tēe hebreo cúu ná, te ni cacu ná ñuu Tarso, ñn ñuu jeé cújéhu ndañúu Cilicia. Te quíñūhun ni ni cuáha ní jnūhun na cáhán na jín ñayuu yáha jijnáhan i, áchi de.

<sup>40</sup> Te general ni jéhe de jnūhun jeé cáhán de. Te ni jecondichi Pablo nuú escalera, te ni sáha de seña jín ndaha de jeé na cúu nayúu ñayuu ún. Te nuú ní cuu nayúu-ni i, te jín jnūhun yuhu ñúu de hebreo ni cáhán de:

## 22

<sup>1</sup> Ndihi níhín jeé cácuu ní jnáhan ñuu yō jín ndihi níhín jeé cácujeñu ní núu ñúu yō, cuni sōho ní jnūhun cahán na jéhe maá ná, áchi de.

<sup>2</sup> Te ni cajini sōho i jeé cáhán Pablo yuhu hebreo jeé cúu yuhu ñúu i, te vilyá gā ni cacunahín i. Te ni cáhán Pablo:

<sup>3</sup> Máá ná cúu jnáhan ñuu yō hebreo, te ni cacu ná ini ñuu Tarso ndañúu Cilicia. Te ini ñuu Jerusalén yáha ní jehnu ná, te ni cutúhva ná núu Gamaliel, te ní stéen de ñayuu cáandje i jnūhun Jesús te nde cuni na jéé na cúu ndíhi i núú. Chi cúu tēe cúu ñahan ni jni ná ni chuhun ná vecáa. <sup>5</sup> Te sutú cújéhu ga jín táca tēe jéhu cándiso jniñu nuú ñúu yō, cácuu de testigo jeé súcuu ni sáha ná, te suni máá de ni cajéhe de tjini carta cuahán na jín jéé cuáha na núu táca jnáhan yó cáyucú ñuu Damasco. Chi cuahán ná ñuu un jéé jni ná ñayuu cáandje i Jesús te quindeca ná i ñuu Jerusalén yáha, náváha ndoho i núú.

*Jeé ní cachi Pablo ndese ni sama ya de (Hch. 9.1-19; 26.12-18)*

<sup>6</sup> Te ni quihin ná ichi cuahán ná, te cuacuyajni ná ñuu Damasco, te nájnūhun caxū cúu. Te ichi ándiví ní quiji ñn nduva ní ndindéé ndaxín núu ná. <sup>7</sup> Te ni cotúu-ni ná núu ñūhun, te ni jini sōho ná ñn jnūhun cáhán jín ná: Saulo, Saulo, ¿najehe jito xeñ rō ruhū? áchi. <sup>8</sup> Yūcuán na te ni cáhán ná: ¿Na níhín cúu jeé cáhán, Tátá? áchi ná. Te ni cáhán yá jín ná: Máá rí cúu Jesús jeé ní jehnu ñuu Nazaret, te jeé jito xeñ rō ñayuu cáandje i ruhū cúu jeé jito xeñ rō ruhū, áchi yá. <sup>9</sup> Te tēe cuango jín ná ni cajini ndije de jeé ndindéé, te ni cayuhú de, te tu ní cájini sōho de ndese ni cáhán yá jín ná.

10 Yūcuán na te ni cahān ná: Tātá, ¿na vé cuni ni jéé sáha ná? áchí ná. Te ni cahān máá Jítóho yō jíin ná: Ndocuñí te quihñin rō ñuu Damasco, te yūcuan iyó ñin tēe jeē cachi nuū rō na vé cūu jeē cánuu sáha rō, áchí yá jíin ná. 11 Te jeé ní ndindéé un ní sacuaá nuū ná, te tēe cuangoo jíin ná un ní cajnií de ndaha ná cuángoo de jíin ná ní jinūcoo ná ndé ñuu Damasco.

12 Te yūcuan ní condee ñin tēe nání Ananías, te táca jnāhan yó hebreo yūcuan cácahān jeē tēe váha cúu Ananías, chí váha squícu de ley jeē ní jéhe ya nuū Moisés. 13 Te ní quee tēe un nuū néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndúndijin-ni tinūu ná, te ní jito ná nuū de. 14 Te ni cahān Ananías: Máá Yáá Dios táca jíi yō, je ni nacāji ya nihín návāha cuni ní na vé cuni yá jeē sáha ní, te coto ní nuū máá Cristo, Yáá ndaa, te cuni sōho ni jnūhun jeē cahán yá. 15 Te nacani ní jnūhun ya nuū ndivií ñayuu táca jéé ní jito ní jíin jéé ní jini sōho ní. 16 Ma cúhuun ni ní nuū súcuan. Ndocuñí ní, te cuandute ní te cahān ndahú ní jíin máá Jítóho yō, návāha nacate ya anuá ní nuū cuéchi, áchí de jíin ná.

*Jeé ní cachi Pablo ndese ní tají Yáá Dios de nuū ñayuu táca gá nación*

17 Te ní nandió cóo na ní ndee ná ñuu Jerusalén. Te jícan tahú na ini templo, te ní sáha máá Jítóho yō jeé ní jito ndijin ná. 18 Te ní jini na nuū yá ni cahān yá jíin ná: Yachí quenda rō ñuu Jerusalén yāhá, chí ma cuatáhu ñayuu yáha jéé nacani rō jnūhun ri nuū i, áchí yá. 19 Te ni cahān na jíin yá: Tuú, chí cuatáhu i, Tātá, chí je cájini i jeé ní quiví ná ndijnahan vehe i sinagoga ni jnií ná táca ñayuu cácañdije i nihín, te ni cani ná i, te ni chuhun ná i vecāa. 20 Te je cájini i jeé quiví ní cajehni i Esteban, tēe ni nacani cáj jnūhun ní, suni ni indichi na yúcuán, te ní jejnúhún ná jeé na cúu de, chí ní condito ná sahma tēe ni cajehni Esteban, áchí ná jíin yá. 21 Te ni cahān yá jíin ná: Cuáhán, chí máá rí tají rí rohó quihñin jíca rō nde nuū ñayuu táca nación jeé tu cájini i jnūhun ri, achí yá jíin ná. Achí Pablo.

*Jeé ní íne Pablo nuū general*

22 Te táca ñayuu ún váha-ni ní cajini sōho i te nde jnūhun sandiñi yáha jéé ní tají yá de nuū ñayuu táca gá nación. Yūcuán na te ni cacuvaá i, te ni cacahān jee i:

Na cúu tēe jíiná, chí tú váha jeé cótecu gá de, áchí i.

23 Te súcuan cácana jee i, te ní cascándoó i ticáchí i, te ní cascánda i ticachá. Te súcuan cástéén i jeé cáquiti xeén ni i. 24 Te ní ndacu general jniñu jeé na quiví Pablo ini cuartel, te ni cahān de jeé na stichí soldado Pablo nde jíin cuarta ñii, návāha cujnúni ní general na siquí cúu jeé ní candonda ñayuu un siquí

de. 25 Te ni cajihni de Pablo návāha súcuan te cani de. Te ni cahān Pablo jíin capitán jeé índichi túhva:

¿A jéhe ley jnūhun jeé cani ní cuarta tēe cúu sēhe nación Roma núu ná tu sándaá ní nuū iyó cuéchi de? áchí de.

26 Te ní jini sōho capitán jnūhun yáha, te ni jecahān jíin general:

Coto váha ní jéé ma stívi ní sáha ní jíin tēe yáha, chí cúu de sēhe nación Roma, achí.

27 Yūcuán na te ní jinú general nuū Pablo, te ni cajnūhún de:

Cachi núu jendaá cúu jeé sēhe nación Roma cúu rō, áchí.

Te ni cahān Pablo:

Suu cúu ndije ná, áchí de.

28 Te ni cahān general:

Ruhú chí nde jeé ní jéhe ri cuehē xūhún te ní nduu ri sēhe nación Roma, áchí.

Te ni cahān Pablo:

Te sãñá chí nde quiví ní cacu ná cúu ná sēhe nación yō Roma, achí de.

29 Yūcuán na te táca tēe jeé cáculi cani Pablo nuú, ni cacujiyó-ni cuangoo, te suni nde general ni yūhú de, chí ní stívi de jeé ní jihni de Pablo, chí tu iyó váha sáha súcuan jíin sēhe nación Roma.

*Jeé ní indichi Pablo nuū junta cujéhu ga jnāhan ñuu de hebreo*

30 Te inga quiví un cúní general cundaá váha ní de na siquí cúu jeé ní candonda tēe hebreo siquí Pablo. Te ni ndají de cadena jeé nuhni Pablo, te ni ndacu de jniñu ni cacutútú táca sūtú cujéhu jíin táca tēe casáha junta cujéhu ga, te ní quenehen de Pablo, te ní jeni de nuū tēe ni candutútú un.

## 23

1 Yūcuán na te ní ndacoto Pablo nuū tēe ni candutútú junta un, te ni cahān de:

Tātá jijnāhan ní, ní ndé vijna váha iyó ní anuá na jéé tú na cuéchi ná, jito jínúu Yáá Dios, áchí de.

2 Yūcuán na te Ananías, sūtú cujéhu ga, ni cahān jíin tēe cáhñin yajni nuū de jeé na cátu máá yuhu de. 3 Te ni cahān Pablo jíin sūtú cujéhu ga ún:

Yáá Dios stóho ya nihín chí tēe stáhú-ni cúu ní, chí néne ní jéé sándaá ní nuū ní stívi ná ley yá, ¿te naun stívi máá ní ley jeé ndácu ní jniñu jeé cáni de sãñá? áchí de.

4 Te ní cacahān tēe cáhñin nuū de ún:

¿Naun cáhán rō súcuan jíin sūtú cujéhu ga? Chí nuū Yáá Dios jejnñu de, áchí jíin de.

5 Te ni cahān Pablo:

Tātá jijnāhan ní, tu ní jíni na jéé sūtú cujéhu ga cúu de, chí núu ní jíni na te ma cáhán na súcuan núu, chí yósó nuū tútu i jeé ní cáhán yá jeé ma cáhán neé yó coto yó táca tēe cácujehu nuū yó, áchí Pablo.

<sup>6</sup> Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátá jijnáhan ní, máá ná cúu ñn jnáhan grupo fariseo, te suni súcuan ni iyo tátá na. Chí suni máá ná ñūhun ni na jéē nastécu yā ndīyí, te siquī yūcuan cúu jeē cácahān ni cuēchi siquī ná, áchí de.

<sup>7</sup> Te jeē súcuan ni cahān de te ni cacusān ni tēe junta jeē cácuu grupo fariseo jīn grupo saduceo, te ni cacahān ñihin. <sup>8</sup> Chí cácahān tēe grupo saduceo jeē ma nátecu ndīyí, ni tu cáhiyo ndajéhé yā ni ánuá, te tēe grupo fariseo cácejnūhún de ndinúní jnūhun yáha. <sup>9</sup> Te yōhyo ni cuvaā. Te sava tēe cástéén jnūhun cáhán tutu ley yā jeē cácuu jnáhan grupo fariseo, ni candocuñi de, te ni cacahān de:

Tú ni ñn cuēchi cánihn na siquī tēe yáha. Sanaa te ni cahān ndije ñn ánuá jīn de chí ñn ndajéhé yā. Ma sáníhni ni yō nuū Yaā Dios nuu súcuan, áchí.

<sup>10</sup> Te yōhyo ni catejnáhan, te yūhú general jeē quende i chiyó Pablo, te ni ndacu de jniñu jeē na quívi soldado te quenehen de Pablo sava mēhñú i, te na ndívi de ini cuartel.

<sup>11</sup> Te jecuáā un ní quee-ni máá Jítoho yō nuū de, te ni cahān yā jīn de:

Pablo, cuandeyí ni rō, chí nájñūhun ni nacani rō jnūhun ri ini ñuu Jerusalén yáha, suni súcuan nacani nahín rō jnūhun ri ini ñuu Roma, achí yá.

#### *Jeē ní casquijnáhan jnūhun cahni Pablo*

<sup>12</sup> Te nuū ní cundijin te ni cacutútú sava ñayuu hebreo, te ni casquijnáhan jnūhun, te ni cacahān teyí i jeē ma cáji cuíti i ni ñn ni ma cóho cuíti i nde núu tu cahni i Pablo. <sup>13</sup> Te vihyá gā uū xico tēe hebreo ni cacahān teyí jnūhun yáha. <sup>14</sup> Te ni jengoo nuū sutú cácujeñhu jīn núu tēe jēhnu cándiso jniñu nuū ñayuu hebreo, te ni cacahān jīn tēe ún:

Ni cacahān teyí ná jeē ma cáji cuíti ná ni ñn níni nde ná tu cahni na Pablo. <sup>15</sup> Núu súcuan te máá ni jijnáhan ni jīn táca gā tēe cáháha junta cujeñhu ga, cuacáhān ni jīn general jeē quenehen de Pablo na jéé de nuū junta sajnē, chí cachi ni jéé cáconi ni stíchi vāha ga ní de. Te máá ná jijnáhan ná cotūhva ná cahni ná de nde ná tu quee de nuū cáhñn tútú ní, achí.

<sup>16</sup> Te sēhe yí cuáha Pablo ni nihñn i jnūhun jeē súcuan ni cacahān, te ni jehēn i cuartel, te ni castūhún i nuū Pablo. <sup>17</sup> Te ni cana Pablo xiní ñn jnáhan capitán, te ni cahān de:

Condeca ní súchi yáha quihñn ni jīn i nuū general, chí iyó ñn jnūhun castūhún i nuū de, áchí de.

<sup>18</sup> Te capitán un ní jeca de i cuahān i jīn de nuū general, te ni cahān de:

Pablo, tēe íne vecāa, ni cana de sñáa, te ni cahān de jīn ná jeē quíndeca ná súchi yáha núu ní, chí iyó ñn jnūhun cahān i jīn ní, áchí de.

<sup>19</sup> Te ni jñi general ndaha i cuahān de jīn i ñn lado, te yuhu-ni ni cajñūhún de i:

Na jnūhun cúní rō cahān rō jīn rí, áchí de.

<sup>20</sup> Te ni cahān i:

Tēe hebreo ni casquijnáhan jnūhun de jeē cahān ndahú de jīn ní quenehen ní Pablo sajnē quihñn de nuū táca tēe cáháha junta cujeñhu ga, chí cahān-ni de jīn ní jeē cáconi de jeē stíchi vāha ga de Pablo. <sup>21</sup> Te ma cuáha ni jnūhun, chí vihyá gā uū xico de cándētu sáhi de ichi, te ni cacahān teyí de jeē ma cáji cuíti de ni ñn ni ma cóho cuíti de nde núu tú cahni de Pablo, te vijna je cándētu túhva de jeē cuáha ni jnūhun quihñn Pablo nuū junta, áchí i.

<sup>22</sup> Te ni cahān general jīn i jeē ma cáchi i nuū ní ñn ñayuu jeē ni cahān i jnūhun yáha jīn de, te ni tají de i cuanuhun i.

#### *Jeē ní tají general Pablo cuahān de nuū Félix, tēe cúu gobernador*

<sup>23</sup> Yūcuán na te ni cana general uū capitán de, te ni ndacu de jniñu jeē sátūhva de uū ciento soldado cájica jéhe jīn úní xico uxí jeē cáyosó caballo jīn úu ciento jeē cándáha lanza, chí cahñn jecuáā ún quendacoo de jīn Pablo quingoo de nde ñuu Cesarea. <sup>24</sup> Te suni ni ndacu de jniñu jeē coo túhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador. <sup>25</sup> Te ni tee de ñn carta jeē cahān jnūhun yáha:

<sup>26</sup> Máá ná cúu Claudio Lisias, te tēe ná carta yáha cuajeē nuū ní, señor Félix, gobernador cujeñhu. Ndese tahū cúu ní. <sup>27</sup> Ñayuu hebreo ni cajñi i tēe yáha, te je yajni cahni i de núu, te ni jnama ná de jīn soldado, chí ni jini na jéé sēhe nación Roma cúu de. <sup>28</sup> Te ni jendeca ná de nuū junta máá i jijnáhan i jeē sándaā i núu na cuēchi ni sáha de. <sup>29</sup> Te ni jini na jéé siquí ley máá i cúu cuēchi cácahān i siquí de, te tu ñhñn na ni ñn cuēchi siquí de jeē cúu de ni jeé cóne de vecāa. <sup>30</sup> Te ni ñhñn na jnūhun jeē sava tēe hebreo ni casquijnáhan jnūhun de jeé cahni de tēe yáha, te jeé yúcuhan cúu jeé yachí ni tají ná de cuajeē de nuū ní. Te suni je ni cahān na jīn ñayuu cájicān cuēchi siquí de jecoo i nuū ní, te jiñá cahān i jīn ní na cuēchi ni sáha de. Je ni cahān yō, achí carta.

<sup>31</sup> Te ni cajeca ñuu-ni soldado Pablo cuangoo jīn de nde ñuu Antípatris, nájñūhun ni tahū jniñu nuū de. <sup>32</sup> Te inga quívi ni canandió cóo-ni soldado cájica jéhe cuánungoo nde cuartel, te soldado cáyosó caballo cuangoo de jīn Pablo. <sup>33</sup> Te ni jinūcoo ñuu Cesarea, te ni cachihi carta ndaha gobernador, te suni ni cajeni Pablo

nuū de. <sup>34</sup> Te ni cahu gobernador carta un. Te ni cajñuhún de ndé ñuu cúu Pablo, te ni jini de jeē té ndañúú Cilicia cúu Pablo. <sup>35</sup> Te ni cahān de:

Nde na quécoo tēe cájequin cuēchi siquī rō te cuni nahín rí jñuhun cahān rō, áchí de.

Te ni cahān de jeē na quíndihyū Pablo ini palacio ndiŷi Herodes.

*Jeē ni cahān Pablo jehē maá de nuū Félix*

## 24

<sup>1</sup> Te nuū uhún quivī te Ananías, sutū cujéhnu ga, ni quee de ñuu ún. Te suni ni quecoo sava tēe jéhnu cándiso jniñu nuū jñahan ñuu de hebreo jiín iin tēe cúu abogado, nání de Tértulo. Te ni quívicoo de nuū gobernador jeē cahān de cuēchi siquī Pablo. <sup>2</sup> Te ni cana gobernador Pablo ni quee de. Te ni quejéé Tértulo cahān de cuēchi siquī Pablo, chí suhva ni cahān de jiín Félix:

Tátá gobernador, siquī jeē cúu ní tóhō jeē váha ndíchí ndácu ní jniñu, te jeē yúcuán tú na jñuhun cájejnahan iyó, chí cáyūcu váha yó. <sup>3</sup> Te na cátañú ná, chí táca quivī váha cúu táca nuū ndácu ní jniñu jeē váha sáha ní, tátá Félix. <sup>4</sup> Te tu cúní na snáa na cuéhē tiempo ni, te cahán ndahú ná jiín ní cuni nahín ní jecu-ni jñuhun cahān na jiín ní. <sup>5</sup> Chí ni cajini na tēe yáha jéé cúu de iin tēe tíxín, te sáha de jeé cánacuajñahan máá jñahan ñuu ná hebreo ní cáhnu-ni táca lado, te cúu de tēe cujéhnu nuū ñáyuu cascuáha jñuhun tēe nání Jesús jeē ní jéhnu ñuu Nazaret. <sup>6</sup> Te suni je ndúcú de jeé stíví de táca jniñu ini templo ii, te ni cajni ná de. Te cácuni na sándaā na siquī de núú, nájnñuhun cahán ley ñuu ná. <sup>7</sup> Te ni jinū-ni general Lisias, te ni quende fuerza de tēe yáha nuū na jññahan ná. <sup>8</sup> Te ni ndacu de jniñu jeē táca ná jeē cácahān na cuēchi siquī tēe yáha quijicoo ná ndé nuū ní. Te vijna cuu stíchí maá ní de, te jiín jñuhun cahān maá de te cuni ní jéé ní sáha de cuēchi jeē cácahān na jiín ní, áchí Tértulo.

<sup>9</sup> Te suni ni cacahān tēe hebreo jeē ní jinūcoo jiín de jeé iyó ndáá jeé súcuán cúu cuēchi Pablo. <sup>10</sup> Yúcuán na te ni sáha gobernador seña nuū Pablo jeē na cahán de, te ni cahān Pablo:

Je jini na jéé cuéhē cuiyā cúu ní gobernador ñuu yáha, te jeé yúcuán núnñahan ni na jéé sándaā ni siquī ná. <sup>11</sup> Chí maá ní cuu nanducú ní te cuni ní jéé sáá maá úxí uū quivī ni cuu jeé ní jéhen ná ñuu Jerusalén jeé chiñuhún ná Yaā Dios. <sup>12</sup> Te tu ní stáhān jñahan ná jiín ní iin ñayuu, ni tu ní stóna ná ñáyuu ini templo ni ini vehe ii sinagoga ni ini maá ñuu. <sup>13</sup> Ní tú na jiín stéén de jeé iyó ndáá jñuhun cácahān de siquī ná. <sup>14</sup> Te jñuhun cahán cají ná jiín ní cúu jeé chiñuhún ná Yaā Dios táca jíi na, te suu cúu jeé chiñuhún ná maá Jesucristo, te maá

jñuhun yáha-ni cúu jeé cácahān de jeé stíví ná. Te cándije ná táca jñuhun yósó nuū tútu ley yā jiín nuū tútu jeé ní catee tēe ni canacani jñuhun ya nde jenahán. <sup>15</sup> Te inuū ñuhun ni na jiín de jeé sáha Yaā Dios jeé nátecu táca ndiŷi, cúu ñayuu ní casáha váha jiín ñáyuu ní casáha néé. <sup>16</sup> Te jeé yúcuán máni jeé váha ndhví ní na sáha ná. Súcuán te váha iyó ní anuá na jéé tú na cuēchi ndéé siquī na nuū Yaā Dios ni nuū ñáyuu.

<sup>17</sup> Te ni jica cuu ná táca ñuu jicá jecu cuiyā, te sáá te ni ndee na jiín xuhun jéé ní cajéhe táca ñayuu jeé chindéé ñáhán i jñahan ñuu na cáyūcú Jerusalén. Te suni ní ndee na jéé socó na quiti nuū Yaā Dios. <sup>18</sup> Te íne ná ini templo siquī jeé cuchi ná ndundoo ná nuū Yaā Dios te socó ná. Te jecu jñahan ñuu ná hebreo jeé véjicoo Asia ní cajito de sáñá ini templo, te tú na ñayuu cuéhē ní cóyūcu jiín ná jeé sávaā i. <sup>19</sup> Te núu ni stíví ná ¿te naun tu ní quijicoo tēe Asia un návaha suni cahān de ndese ni stíví ná? <sup>20</sup> Chí tēe ní quecoo yáha na cahán maá de núu na cuēchi ni canihín de siquī na ná ni indichi na nuū junta tēe cácujeñnu ini ñuu ná. <sup>21</sup> ¿Te chí cájequin de cuēchi siquī na jéé ní cahān jee ná suhva ná ní iyo ná nuū junta naún? Chí ní achi na jéé cándije ná jéé nátecu táca ndiŷi, te jeé yúcuán cájequin ní cuēchi siquī ná, ní achi na jiín de. Achí Pablo.

<sup>22</sup> Te Félix chí je jini váha de ndese cácañdije ñayuu Cristo. Te jeé ní jini sōho de jñuhun yáha te ni stétu de un jññahan, te ni cahān de:

Nde na quée general Lisias te cajñuhun gá rí siquī jniñu yáha, áchí de.

<sup>23</sup> Te ni ndacu de jniñu nuū capitán jeē na cóne ga Pablo vecāa, te ma cási jeé sáha de jeé cuni de, te ni ma cási jeé quijicoo jñahan de jeé chindéé ñáhán i de.

<sup>24</sup> Te ni cuu jecu quivī, te ni quiji tucu Félix jiín ñasihí de Drusila, te ñahan hebreo cúu ña. Te ni ndacu de jniñu jeé na quiji Pablo návaha nacani de jñuhun ndese cándije yó Jesucristo. <sup>25</sup> Te ni cahān Pablo jiín de jeé cánuú sáha yó jniñu ndaā, te cánuú coto yó maá yó jeé ma sáha yó jniñu stíví, chí quivī sándihí te sándaā Yaā Dios jniñu ndiŷi ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivī jeé núne ri te cana ri rohó quiji ró, áchí de.

<sup>26</sup> Te ñuhun ni de jeé cuáha Pablo xuhun núu de te siáá de quenda de vecāa. Jeé yúcuán tijni jinu ni cana de Pablo ni canda-jñuhún de. <sup>27</sup> Te súcuán ni cuu uū cuiyā, te sáá te ni nucuiñi Porcio Festo nuū Félix. Te cúní Félix jeé na cúsñ ní ñayuu hebreo jiín de, te jeé yúcuán ní squéndō de Pablo vecāa.

*Jeē ní indichi Pablo nuū Festo*



## 25

<sup>1</sup> Te sáá únī quivī jeē ni quivī Festo cuu de gobernador Judea, te ni quenda de ñuu Cesarea cuahān de ñuu Jerusalén. <sup>2</sup> Te tāca sūtū cácujeñnu jín tee cácujeñnu nuū ñáyyuu hebreo ni jinūcoo nuū Festo, te ni cajicān cuēchi siquī Pablo. <sup>3</sup> Te ni cacahān ndahú jín Festo jeē núu vāha ni de te na nátají de Pablo ndiji ñuu Jerusalén. Súcuān ni cacahān, chí je ni casquínāhan jñūhun jeē cahni Pablo ichi. <sup>4</sup> Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quivī te nuhūn maá de ñuu Cesarea. <sup>5</sup> Te jeé yúcuān ní cahān de jín tāca téé ún:

Tāca níhín jeē cándiso jníñu, na quíngoo yó nde Cesarea, te yúcuān cácan ni cuēchi siquī de te núu iyó cuēchi de, áchí de.

<sup>6</sup> Te ni ine de yúcuān únā chí úxi-ni quivī, te ni ndee de ñuu Cesarea, te inga quivī ni cucōo de mesa nuū sándaā de jniñu, te ni cahān de jeē na quíji Pablo. <sup>7</sup> Te je cáhīn tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndūu nuū de, te ni caquejé-ni cásájnūhūn téyí siquī de, te tú na jín ní cástéén jeē iyó ndāā jñūhun cacahān. <sup>8</sup> Te ni cahān Pablo jehē maá de:

Tu ní sáha ná ní ñn cuēchi siquī ley ñuu na jéé cácuu ná ñayuu hebreo, ni siquī templo, ni siquī rey nación Roma, achí de.

<sup>9</sup> Te Festo chí cúní de jeē cusī ni ñayuu hebreo jín de, te ni cajnūhūn de Pablo:

¿A tu cúní rō quinhun rō Jerusalén te yúcuān sándaā rī siquī rō? achí de.

<sup>10</sup> Te ni cahān Pablo:

Je índichi na núu cúndaā jniñu jeē ndácu maá téé cúu rey nación Roma, te yāha cúu nuū cánuú cúndaā jniñu ná. Máá ní je jíní vāha ni jéé tú na cuēchi ní sáha ná siquī tāca jñāhan ñuu ná hebreo. <sup>11</sup> Chí núu ní sáha ná ñn cuēchi xeēn jeē jíní ñūhūn cuu ná, te iyó vāha jeē cúu na núu súcuān. Te núu tu iyó ndāā jñūhun jeē casájnūhūn téé yāha siquī ná, te ni ñn tēe ma cúu chíhi de sáñá ndaha tēe yāha jínāhan de. Núu súcuān te cúní na quihīn na núu maá rey nación Roma sándaā de siquī na, áchí de.

<sup>12</sup> Te ni cajnūhūn Festo ndese cájeni ni tēe cándiso jníñu jín de. Yúcuān na te ni cahān de jín Pablo:

Je ni cahān rō jeē cúní rō quihīn rō nuū maá rey nación Roma sándaā de siquī rō. Núu súcuān te quihīn nahín ró nuū de, áchí de.

*Jeē ní índichi Pablo nuū rey Agripa*

<sup>13</sup> Te ni cuu jecu quivī, te rey Agripa jín Berenice ní jecóndéhé de Festo nde ñuu Cesarea. <sup>14</sup> Te tijni quivī ní coyúcú de yúcuān. Te ni nacani Festo jñūhun siquī Pablo nuū rey un. Te suhva ni cahān de:

Félix jeē ní cuu de gobernador, ní stóo de ñn tēe ine vecāā yāhá. <sup>15</sup> Te ná ní jehēn ná ñuu

Jerusalén, te sūtū cácujeñnu jín ñáyyuu jéñnu cándiso jniñu nuū ñáyyuu hebreo ni jinūcoo i nuū na cájequin i cuēchi siquī téé ún, te cácuñi i jeē na cúu de. <sup>16</sup> Te ni cahān na jín i jeē tu iyó costumbre tāca tóhō Roma jeē cahni de ñn tēe súcuān-ni, chí jíní ñūhūn condichi de jín ñáyyuu cájequin cuēchi siquī de, návāha cahān de jehē maá de te cúndaā núu iyó cuēchi de. <sup>17</sup> Yúcuān na te ni quecoo tútú i yāhá. Te inga quivī ún tu ní cúcuéé ná, chí ni cucōo na mesa nuū sándaā na siquī cuēchi, te ni ndacu ná jniñu jeē na quíji tēe ún. <sup>18</sup> Te cáhīn ñayuu cájequin cuēchi siquī de. Te ni jeni ní na jéé iyó cuēchi xeēn cahān de siquī tēe un núu, te tú cuiti. <sup>19</sup> Chí jeē cacahān de cúu máni siquī jñūhun cácañje-ni maá de, jín siquī ñn tēe nání Jesús jeē jé ní jihí de, te Pablo cahān níhín de jeē ní natecu ndije tēe ún. <sup>20</sup> Te tu ní cújnúní cuiti ní ná ndese sándaā ná, te ni cajnūhūn ná de núu cúní de quihīn de ñuu Jerusalén te yúcuān cúndaā siquī de. <sup>21</sup> Te maá Pablo ni cahān de jeē cúní de quihīn de nuū Augusto, rey yō nación Roma, te yúcuān sándaā rey cuēchi de, ni achí de. Te ni cahān na jéē na cóne de vecāā nde tají ná de quihīn de nuū rey un, áchí Festo.

<sup>22</sup> Yúcuān na te ni cahān Agripa jín Festo:

Suni cúní maá ná cuni sōho ná jéé cahān tēe un, áchí de.

Te ni cahān Festo:

Sajnē te cuni sōho ní jéé cahān de núu súcuān, áchí de.

<sup>23</sup> Te inga quivī un ní quecoo Agripa jín Berenice. Te cáñūhun de sahma cújéñnu de, ni quivicoo de ini vehe juzgado jín táca general jín tēe cácujeñnu ini ñuu ún. Te ni ndacu Festo jniñu jeē na quíji Pablo. <sup>24</sup> Te ni cahān Festo:

Cáhān na jín ní, tátā rey Agripa, jín ndihi níhín jéé cáyūcu jín yó yāhá vijna. Yāha cúu tēe jeē siquī de ní candonda ndivii jñāhan de hebreo ñuu Jerusalén jín ndé ñuu Cesarea yāhá, te máni cacahān i jeē tú vāha jeē cótecu gā de. <sup>25</sup> Te jéni ní maá ná jéé tú na cuēchi xeēn ní sáha de jeē cúu de. Te je ní cahān de jeē cúní de quihīn de nuū rey Augusto jeē sándaā rey un siquī de, te jeé yúcuān ní cahān na jéē tají ná de quihīn de nuū rey un. <sup>26</sup> Te tu cúcáñnu ní ná na jñūhun tee ná núu tútú quihīn jín de nuū rey yō. Jeé yúcuān ní ndacu ná jniñu ní quee de nuū yó jínāhan yó, te cánuú gá nuū maá ní, tátā rey Agripa. Te stíchí ní de návāha níhín na jñūhun tee ná siquī de, te quihīn jñūhun un jín de nuū rey. <sup>27</sup> Chí tu jéjnínú cuiti jeē tají ná ñn preso quihīn te núu tú castūhun ná nuū tútú na cuēchi ní sáha de, áchí Festo.

*Jeē ní cahān Pablo jehē maá de nuū rey Agripa*

## 26

<sup>1</sup> Yūcuán na te ni cahān rey Agripa jín Pablo:

Vijna te jéhe ri jnūhun cahān rō jehē maá rō, achí de.

Te Pablo ni sāha de ndaha de jeē ní quejéé de cáhān de, te suhva ni cahān de:

<sup>2</sup> Tātā rey Agripa, cúsi ni ná vijna jeē cúu cahān na jín ní siquī ndíhi jeē casájnūhún ñayuu ñuu yō hebreo siquī ná. <sup>3</sup> Chi je jíní vāha maá ní tāca jéé ní tajnúni ñayuu ñuu yō hebreo jín tāca jnūhun jeē tu cáhīn inuú i jín. Jeē yūcuán cáhān ndahú ná jín ní jeē coo paciencia ni cuni sōho ní jnūhun cahān na jín ní.

*Jeē ní cachi Pablo ndese ni sāha de nde ná tu sama ya ini de*

<sup>4</sup> Je cájini tāca jnāhan ñuu yō hebreo ndese ni sāha ná ini ñuu nuú ní cacu ná jín ini ñuu Jerusalén nde ná lulí ná. <sup>5</sup> Te núu cácuni maá de cahān ndaa de, te je cájini de sāha jéé ndé lulí ná ní quívi ná nuú grupo fariseo, te grupo un ñhin ga cánducú ndéyi de squicu de ley yā vésú tāca gá grupo tēe nación yō. <sup>6</sup> Te ñūhun ni na jnūhun ni jejnūhun Yaā Dios nuú tāca jín yō jeē nastécu yā ndíyi, te maá siquī tāca jnūhun yāha-ni cúu jeē cájequin de cuēchi siquī ná. <sup>7</sup> Chi maá yō jeē cácuu yō jnāhan ndihúxi uú yucún ñayuu Israel, cáñūhun ni yō jnūhun ni jejnūhun ya jeē nastécu yā ndíyi, te jeē yūcuán nduú ñuu cáchiñūhún yō Yaā Dios te cájejniñu yō núu yā. Te suni súcuán ñūhun ni maá ná, tātā rey Agripa, te siquī jeē nácani ná jnūhun jeē natecu ndíyi cúu jeē cájicān jnāhan ñuu yō hebreo cuēchi siquī ná. <sup>8</sup> Te chí má nastécu Yaā Dios tāca ndíyi cájeni ni ní naún?

*Jeē ní cachi Pablo ndese ni jito xeēn de ñayuu cávandje*

<sup>9</sup> Te maá ná chi ni jeni ni na jéé jíní ñūhún ndonda ná siquī ñayuu cávandje i Jesús, Yaā ní jehnu ñuu Nazaret. <sup>10</sup> Te súcuán ni sāha ná ini ñuu Jerusalén, chi tāca sūtū cácujeñu ni cajéhe de jnūhun jeē cóndiso jniñu ná chuhun ná cuéhē ñayuu vecāa siquī jeē cávandje i Jesús, te íyo vāha ni na núu cájehni de i. <sup>11</sup> Te tijní jínú ni sāha ndevāha na jín i ini tācá vehe ñi sinagoga jeē ni sāha fuerza na i jeē na stóo i jnūhun cávandje i. Te xeēn ni quívi ni na núu i, chi nde ñuu jicá ní jehēn ná ni sāha xeēn na jín i.

*Jeē ní cachi tucu Pablo ndese ni sama ya ini de*

(Hch. 9.1-19; 22.6-16)

<sup>12</sup> Te sutū cácujeñu ni cajéhe de jnūhun jeē cóndiso jniñu ná quíhīn na sāha xeēn na jín ñayuu cávandje cáyūcú ñuu Damasco nuú. <sup>13</sup> Te cuahān ná ichi ún, tātā rey, te caxū cúu, te ichi ándiví ní quíji ñi nduva ni ndindéé ndaxín núu na jín núu tée cuango

jín ná, te víhyá gā ndíi vésú niándii. <sup>14</sup> Te ndíhi ná ní cacotúú ná nuú ñūhun. Te ni jini sōho ná ñi jnūhun ni cahān jín ná jín jnūhun yuhu yō hebreo: Saulo, Saulo, ¿najehe jito xeēn rō ruhū? Chi jeē sāha ró súcuán cúu nájñūhun siquī jeē tu jéndije ti, te jéñú yatá tí xiní pulla, te súcuán stóho ti maá tí, achí. <sup>15</sup> Yūcuán na te ni cahān ná: ¿Na ñihín cúu jeē cahān, Tātā? achí ná. Te maá Jítoho na ní cahān yā jín ná: Máá rí cúu Jesús, te jeē jito xeēn rō ñayuu cávandje i ruhū cúu jeē jito xeēn rō ruhū. <sup>16</sup> Ndonda condichi rō, chi véji ri nuú rō jeē tejniñu ri rohó sāha rō jniñu cúní ri, te nacani cáji rō jnūhun tāca jéé ní jito ró vijna, jín jéé steén gā rí nuú rō tāca quívi quíji. <sup>17</sup> Te jnama ri rohó núu tāca jnāhan ñuu rō jín núu ñayuu tāca gá nación, chi nuú ñayuu un táji rí rohó quíhīn rō. <sup>18</sup> Te táji rí rohó quíhīn rō nuú i, chi nájñūhun nanune ró tñúú i cúu jeē steén rō jnūhun ri nuú i te jecūhun ni i. Chi ñayuu ná tu candje i ruhū, nájñūhun cájica i nuú néé. Te jeē candje i ruhū, quívi i nuú luz rí, te tuá quíhi i chíji jniñu jeē cúní jexeeñ jeē cúu Satanás, chi sa suhva quíhi i chíji jniñu cúní maá rí. Te táji rí rohó quíhīn rō nuú i, návāha candje i ruhū te cone cáhnu ni rí nuú cuéchi i. Yūcuán na te inuú ñhin tahú i jín tāca gá ñayuu jeē ni sáando ri anuá i, achí yā jín ná.

*Jeē ní cachi Pablo ndese ni jetáhú de jnūhun ni cahān yā*

<sup>19</sup> Jeē yūcuán tu ní sánihni ni na núu jnūhun ni cahān yā ichi ándiví jín ná, tātā rey Agripa. <sup>20</sup> Chi ní jetáhú ná, te ni nacani ná jnūhun ya xihna gā nuú ñayuu ñuu Damasco, te sáa te ni nacani ná jnūhun ya nuú ñayuu ñuu Jerusalén jín ná región Judea jín núu ñayuu tāca gá nación. Te jnūhun ni nacani ná núu i cúu jeē na nácani ni i jeē stóo i cuéchi i te nasāma ini i sāha Yaā Dios, te na sāha i jniñu vāha jeē steén jeē ní nasāma ini i. <sup>21</sup> Te siquī jeē súcuán ni nacani ná jnūhun te ni cajniñi jnāhan ñuu yō hebreo sāhá ini templo, te ni cacani i cahni i sāha núu. <sup>22</sup> Te ni chindéé ñáhān Yaā Dios sāhá, te jeē yūcuán índichi ñihin na ndé vijna nácani cáji ná jnūhun ya nuú ñayuu cácujeñu jín núu tācá-ni ñayuu. Chi tu chíso gá na jnūhun siquī jnūhun jeē ní nacani Moisés jín tāca gá tēe ni canacani jnūhun Yaā Dios nde jenahán. <sup>23</sup> Te ni cundaā jnūhun ni canacani de un jéé cánuú ndoho Cristo nde cuu yā, te xihna gā maá yā natecu vésú tāca gá ndíyi, te súcuán steén cáji yā nuú ñayuu jeē jnáma ya i, cúu ñayuu nación yō Israel jín ñayuu tāca gá nación, achí Pablo.

*Jeē ní nducú ndéyi Pablo scandje de Agripa jnūhun Jesús*

<sup>24</sup> Te súcuán ni cahān Pablo jehē maá de, te ni cahān jee Festo:

Ni nduloco rō, Pablo. Siquī jeē ni scuáha ndasí rō te jeē yúcuani ní t̄vī xínī rō, áchí de.

<sup>25</sup> Te ni cahān Pablo:

Tu ní t̄vī xínī na, tátā Festo, chí sa suhva íyó cájí ndāā jnūhun cáhān na. <sup>26</sup> Te máá rey Agripa je jíní vāha de táca jñīnu ní íyo jeē ní nacani ná, te tu yúhú ná cahān na táca jnūhun yāha, chí je jíní vāha na jéē jíní de táca jnūhun yāha, chí tú sāhi ní cúu táca jñīnu yāha. <sup>27</sup> Tátā rey Agripa, ¿á cándije ní jnūhun jeē ní cacahān tēe ní canacani jnūhun ya nde jenahān? Jéni ní na jéē cándije ní, áchí Pablo.

<sup>28</sup> Yúcuān na te ni cahān Agripa jín Pablo:

Va jéni ní rō jeē jín jecu jnūhun ní cahān rō te sāha rō jeē cándije ri Cristo, áchí de.

<sup>29</sup> Te ni cahān Pablo:

Vesú jín jecu-ni jnūhun chí jín cuéhē, te jícán tahú na jéē máá ní jín táca gá tēe cájini sóho jnūhun cáhān na vijna, na cándije ní nájñūhun cándije máá ná, te tu cúní na jéē cónuhni ní nájñūhun núhni na.

<sup>30</sup> Te ní ndihi ní cahān Pablo táca jnūhun yāha. Te ní ndocuñi rey jín gobernador jín Berenice jín táca gá tēe cácujeñu cáyūcu jín de. <sup>31</sup> Te ní cacujiyo de, te ní candajñūhun sín máá de:

Tú ní ñn cuēchi ní sāha tēe yāha jéē cúu de ní jeē cóne ga de vecāa.

<sup>32</sup> Te ni cahān Agripa jín Festo:

Cuu siáá ní tēe yāha núu jeē tu ní cáhān máa de jeē quihín de nde núu rey yō nación Roma núu, áchí de.

*Jeē ní catají de Pablo cuahān de ñuu Roma*

## 27

<sup>1</sup> Te ni cundaā jeē quihín Pablo jín barco nde Italia, te suni quingoo ná jín de. Te Pablo jín sava ga tēe cáhān vecāa ní quivicoo de ndaha ñn capitán naní Julio jeē quíndeca de tēe un ndé Italia. Te Julio cúu ñn jnāhan grupo soldado naní Augusto. <sup>2</sup> Te nde ñuu Adramitio núu cájecuñi barco ní quenda ñn barco ní quee, te ní quivicoo ná, te quihín barco un táca ñuu jeē yíhi chíji Asia jeē yúcu yumar. Te suni cuahān Aristarco jín ná, te máá de cúu tēe ñuu Tesalónica región Macedonia. <sup>3</sup> Te inga quiví ní jinūcoo ná ñuu Sidón núu cájecuñi barco. Te Julio ní cundahú ní de Pablo, te ní jēhe de jnūhun ní jecondēhe Pablo táca amigo de, te ní cachindéé ñhān i de. <sup>4</sup> Te ñuu yúcuani ní quenda barco cuahān jín ná. Te siquī jeē ñhin yíhi tachí te tu ní cúu quihín yohó barco, te ní tee xín barco cuahān jín ná xiin isla Chipre, ñuhun jeē íne sín núu ndúte, te lado jecó barco ní quendōo Chipre. <sup>5</sup> Te ní cayāha ná yumar Cílicia jín Panfilia cuahān ná, te ní jinūcoo ná ñuu Mira ndañú Licia.

<sup>6</sup> Te ñuu yúcuani ní ñhin capitán ñn barco jeē véji ñuu Alejandría te quihín ichi Italia, te ní cahān de jín ná ní quivicoo ná barco

un. <sup>7</sup> Te cuéhē quiví ní cahān na núu ndúte jín barco, chí cuéé ní jica, te fuerza-ni ní jinūcoo ná yuñú Gnido. Te tuá ní jēhe tachí un jnūhun quihín yohó barco, te ní cayāha ná núu jnūhma tachí xiin ñúu Salmón jeē íne núu isla Creta. <sup>8</sup> Te yōho ní canducú ndéyí tēe cáscaca barco un, ní yāha jín ná ní yumar xiin Creta. Te ní jinūcoo ná ñn lugar naní Buenos Puertos núu cájecuñi barco, te yajni un íne ñuu Lasea.

<sup>9</sup> Te je ní cuu cuéhē quiví ní cajica ná jín barco. Te je yajni quejéé vico mójn, te yúcuani cúu tiempo jeē yí jica barco te sanaa te coo jnūndóho núu mar. Te ní cahān ñhin Pablo jín de:

<sup>10</sup> Tátā jijnāhan ní, jíní na jéē yōho yí coo viaje yāha, te quiji jnūndóho siquī barco, te naa barco jín ndajñūnu, te nde máá yó sanaa te cuu yō, áchí de.

<sup>11</sup> Te tu ní chusóho capitán jeē cahān Pablo, chí sa suhva jeē cahān tēe scáca barco un jín tēe chíí barco. <sup>12</sup> Te siquī jeē tu íyó vāha lugar núu ní jécuiñi barco un jéē cóyucú de ní vico mójn, te ní cajeni ní cuéhē gā de jeē vāha ga núu quendacoo de yúcuān. Chí cájeni ní de jeē núu cuu te jinūcoo de ñuu Fenice te yúcuān coyucú de vico mójn. Chí Fenice suni íne yundúte isla Creta núu cájecuñi barco, te ndijin ichi noroeste jín suroeste.

*Jeē ní jéquihi ñn tachí ñhin jeē stóna ndute mar*

<sup>13</sup> Te ní jequihí vīta táchí ichi sur, te ní cajeni ní de jeē jinú de Fenice núu, te ní cascáca ga de barco jica jín de xiin Creta. <sup>14</sup> Te ní cunúu jecu gā, te ní quejéé-ni ñn tachí ñhin ndasí jeē naní táchí nordeste. <sup>15</sup> Te tuá ní cúu ga quihín yohó barco, chí ní chundahá-ni tachí cuahān jín, te ní casiáá-ni de jeē cascáca de, te cháha chúcuani cuahān barco jín ndihi ná sāha tachí. <sup>16</sup> Te ní yāha jín ná xiin isla lulí jéē naní Claudia, núu jnūhma tachí. Te vesú sūcuani te yōho uhū ní cascáca ná barco lulí jeē ndiquín yatā barco cáhnu. <sup>17</sup> Te ní casquíví ná ñni barco cáhnu. Te ní casucun núu de barco cáhnu jín yoho. Te cáyuhú de jeē quihín barco núu yaxín ndute núu naní Sirte te jñí núu ñti, te jeē yúcuani ní casnúu de sahna cóquin jeē stéchí te jica barco. Te ní casiáá de jeē na quihín ndé chí chundahá táchí. <sup>18</sup> Te tu jécuiñi cuiti jeē yíhi tachí ñhin. Te inga quiví un ní caquejéé de cájete de ndajñūnu ndiso barco, návāha nduñama gā barco te ma queé chíji ndute. <sup>19</sup> Te quiví uní ní cajēhe núu ná ndaha ní cajete ná máá ndajñūnu jéñiñu barco. <sup>20</sup> Te cuéhē quiví tu ní cájito ná ñandii ní quimi siquī jeē íin vicó, ní tu jécuiñi cuiti tachí ñhin ún, te tuá cáñūhun ní na cácu ná.

<sup>21</sup> Te ni cuu quiví jeé tuá cáyeji cuiti na stáa. Te ni jecundichi Pablo sava mēhñu tée ún, te ni cahān de:

Tātá jijnáhan ní, núu ní cájetáhú ní jñuhun jeé ni cahān ná te ma quéndacoo yó Creta nuú, te ni ma cóto yó jñundóho yáha ni ma náá ndajniñu núu. <sup>22</sup> Te vijna cáhán nihin na jín ní jeé cuandeyí ni ní jijnáhan ní, chí ní ñin ní má cúu ní, vésú naa barco. <sup>23</sup> Chi jeé cúni ní quiji ñin ndajéhé jeé ní tají máá Yáa Dios nuú ná. Chí máá yá cúu Jitoho ná, te jéjñiñu ná núu yá. <sup>24</sup> Te ndajéhé yá ún suhva ni cahān yá jín ná: Pablo, ma yūhu ró, chí váha-ni jinū ró nuú rey nación Roma, te jeé siquí rohó te sáha Yáa Dios jeé cácu ndihí tée cáhñin jín ró ini barco yáha, áhí yá jín ná. <sup>25</sup> Tātá jijnáhan ní, ma yūhu ní núu súcuan, chí máá ná cucáhnú ní na Yáa Dios jeé coo nájnūhun ni cahān ndajéhé yá jín ná. <sup>26</sup> Te jinū nahín yó ñin isla, te ma jinú yachí yó nuú quíngoo yó, áhí de.

<sup>27</sup> Te ni cuu uxí cuñ jecuáa nde jeé ní quejéé táchí, te jíca barco nuú mar Adria, te cháha chúcuan cuahān barco sáha tachí. Te máá jecuáa ún te jeé ní cuu sava ñuu te cájeni ní tée cáscáca barco jeé jí cuacuyajni jinū barco ñuhun íchi. <sup>28</sup> Te ni casínga de ñin jeé cáchicuáhá de nasaa cúnú ndute, te ni cajini de jeé iyó ócō xahūn ñin metro. Te ni jíca barco jecu gā te ni casínga tucu de, te ni cajini de jeé iyó ócō uxā na metro. <sup>29</sup> Te cáyūhú de jeé jécujnáhan barco jín toto, te ni cajihni de cuñ cāa gancho náhnú yatā barco un, te ni cascāne de nde jehé ndúte návāha chituu te jecuiñí barco. Te yōhyo jnāá de jeé na cundijin yachí. <sup>30</sup> Te tée cáscáca barco un ní canducú de cunu de quíngoo de jín barco lulí te cácu de nuú jñundóho quiji siquí barco cáhnú núu. Jeé yúcuan ní casnúu de barco lulí un núu ndúte, te cása-ha-ni de nájnūhun jeé snúu de inga cāa gancho ichi núu barco návāha tú cuni ñayuu jeé cácuni de cunu de quíngoo de. <sup>31</sup> Te ni cahān Pablo jín capitán jín táca soldado:

Núu tú coyūcu tée yáha ini barco cáhnú jín yó, te ma cácu cuiti maá ní jijnáhan ní, áhí de.

<sup>32</sup> Yūcuán na te soldado ni cajehnde de yoho núhni barco lulí, te ni jneni-ni cuahān.

<sup>33</sup> Te nuú cuácmdijin te ni cahān Pablo jín táca tée un jéé na cáji de staā. Te suhva ni cahān de:

Vijna iyó uxí cuñ quiví jeé cándito ní te tu cáyeji cuiti ní stáa. <sup>34</sup> Te cáhán ndahú ná jín ní jeé na cáji ní stáa, návāha nanihñin ní ní te cácu ní, chí ní ñin yó má cúu, ní ma tují cuiti yó, áhí de.

<sup>35</sup> Te ni ndihí ni cahān de jñuhun yáha, te ni quihñin de ñin staā, te mēhñu táca ñayuu un ní nacuatáhú de nuú Yáa Dios, te ni tahú sáva de staā ún, te ni quejéé de yéji de. <sup>36</sup> Yūcuán na te ni candusí ni ndihí de, te suni ní cayejí

de staā. <sup>37</sup> Te ndivii na jéé cáñuhun ná ini barco cúu uú ciento uní xico xahūn ñin ná. <sup>38</sup> Te ni cayejí váha ndihí ná. Yūcuán na te ni cajete de trigo cuahān nuú ndúte un, návāha na ndúñama gā barco.

### *Jeé ni queé barco chíj ndute*

<sup>39</sup> Te nuú ní cundijin te ni cajito de ñuhun, te tu ní cáncuni de ndé nuú cúu. Te ni cajito de nuú íne cuiñí ndute, te suni máá ñíti cúu, te cájeni ní de jinū de yúcuan jín barco nuú na cúu núu. <sup>40</sup> Te ni cajehnde de yoho núhni cāa gancho yúcuan, te ni caquendōo cāa un núu mar. Te ni canandají de yujnu jeé scotú chí barco, te ni nacata caa de sahma cóquin ichi núu návāha chundahá táchí barco, te ni quejéé caca quihñin de ichi núu iyó ñíti. <sup>41</sup> Te ni jinū barco nuú nihin náquijnáhan ndute. Te ni queé barco nuú ñíti ñuhun chíj ndute, te ni jññi-ni ichi núu te tuá ní jíca cuiti, te yatā barco un ní cahya-ni jeé nihin ni cani suhmā ndute mar. <sup>42</sup> Yūcuán na te ni candajñuhñn soldado jeé cáhni de táca preso návāha ma súde i te cunu i quíngoo í. <sup>43</sup> Te cúní capitán un jéé cácu Pablo, te ni jesicoo de. Chí sa ní cahān de núu ndé ñayuu jiní suté te xíhna gā i na nungoo i suté i nuú ndúte, te na quéndā-ni i quihñin i nuú ñuhun íchi. <sup>44</sup> Te suni súcuan na quecōo ndihí i quihñin i, sava i coso candá i jín yujnu cunu te sava ga i jín pedazo yujnu barco. Te súcuan ní cacácu ndihí ná ní jinūcōo ná ñuhun íchi.

### *Jeé ni íne Pablo isla Malta*

## 28

<sup>1</sup> Te nuú ní cacācu ná te ñayuu cáyūcu yúcuan ní cacachi i nuú na jéé isla un nání Malta. <sup>2</sup> Te ñayuu un ní cacundáhú ní i saña jijnáhan ná, te ni cascáyú i ñin ñuhñin cáhnú, te ni cacahān i jín ná jeé nasaá ná, chí mñin sáha jeé cúun saū. <sup>3</sup> Te ní stutú Pablo jecu tujnu íchi. Te jeé jnāá de tujnu un núu ñuhñin te ñin coō xeññ jínú tí ní quenda tí tujnu un jéé ní cujihñi, te ní chiyuhú-ni tí ndaha de. <sup>4</sup> Te ñayuu cáyūcu yúcuan ní cajito i jeé ndíta caa coō un yíyuhú tí ndaha de, te ni cacahān i:

Tée yáha vā sanaa te ni jehni de ndiyí núu súcuan, te vésú je ní cácu de nuú mar, te máá yáá sándaá jniñu ñayuu tu jéhe ga yá jñuhun jeé cótecu de, áhí í.

<sup>5</sup> Te ní caja Pablo ndaha de, te ni ninga coō un núu ñuhñin, te tú na vé ní ndóho de. <sup>6</sup> Te cándetu táca ñayuu jeé chúhun i cuiñí de chí cotúú-ni de te cuu de. Te ni cunahán téyí cándetu i, te ni cajito i jeé tú na vé ní ndóho de. Yūcuán na te ní nasāma cájeni ní i, te ni cacahān i jeé ñin yaā cúu Pablo.

<sup>7</sup> Te yajni yúcuan iyó ñuhun tée cújehnu ga Malta un, nání de Publio. Te ni cana tée un saña jijnáhan ná, te ni jéhe núu de vehe

de ni coyūcu ná jíin de uní quiví, te ni jito yúcun de saña. <sup>8</sup> Te tátá Publio cáa de, chi ndóho de cuehyí quiji jíin cuehyí niñí. Te ni jecondéhe Pablo tēe ún, te ni jicān tahú de te ni soó de ndaha de siquí tēe ún, te ni nduvāha-ni de. <sup>9</sup> Yūcuán na te ni quijicoo ndáhi ga ñayuu cácuñu yūcuán, te suni sūcuan ni canduvāha-ni i. <sup>10</sup> Te ñayuu un ní cajēhe i cuehē ndajniñu ni cacutahū ná. Te nuū ni jíin quiví jeē quingoo tucu ná jíin barco, te ni cajēhe i táca ndajniñu cuu ná ichi.

*Jeē ni jíin Pablo ñuu Roma*

<sup>11</sup> Te uní yoó ni coyūcu ná Malta. Te ñin barco jeē véji ñuu Alejandria ni ñe Malta ní vico mjin, te ichi nuū barco un ndéé uñ figura ídolo ñuu de nání Cástor jíin Pólux. Te ni quivícoo ná barco un cuángoo ná. <sup>12</sup> Te ni jinūcoo ná ñuu Siracusa, te yūcuan ní coyūcu ná uní quiví. <sup>13</sup> Te ni quenda barco cuahān jíin ná nduu nduu yundúte, te ni jinūcoo ná ñuu Regio. Te inga quiví ún vāha ni quiji tachí ichi sur, te ni quendacoo ná ñuu Regio, te uū quiví te ni jinūcoo ná ñuu Puteoli. <sup>14</sup> Te yūcuan ní caquijnāhan ná jíin jecu hermano cácañdije, te ni cacana de saña ní coyūcu ná jíin de ñin semana. Yūcuán na te ni quendacoo ná jeē quihñ ná ñuu Roma. <sup>15</sup> Te hermano cáyūcú ñni ñuu Roma, je ni canihñ de jñuhun jeē jinūcoo ná, te ni quendacoo de, te sava de ni caquijnāhan de saña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíināhan de, te ni nacuatáhú de nuū Yaā Dios, te ni ndundeyí ni de. <sup>16</sup> Te saá te ni jinūcoo ná ñni ñuu Roma, te capitān ni squiví de táca preso ndaha tēe cújēhnu nuū táca soldado ñuu Roma. Te ni cajēhe de jñuhun jeē cone sñin Pablo te condito ñin soldado de.

*Jeē ní nacani Pablo jñuhun ya ñni ñuu Roma*

<sup>17</sup> Te nuū uní quiví te ni cana Pablo táca tēe cácuñjēhnu nuū jñāhan ñuu de hebreo cáyūcú ñni ñuu Roma. Te ni cacutútú de, te ni cahān Pablo jíin de:

Tátá jíināhan ní, tú cuiti na vé ni sāha ná siquí jñāhan yó hebreo ni siquí táca jniñu ní catajníni jíi yó. Te vésú sūcuan te ni cajniñi i saña ndé ñuu Jerusalén ni casquíví i saña ndaha tēe ñuu Roma jíināhan de. <sup>18</sup> Te tēe ñuu Roma jeē cácuñjēhnu cáyūcú Cesarea ni castíchi de saña, te cácuñi de siáá de saña núu, chi ni cajini de jeē tú na cuēchi ná jeē cúñ ná. <sup>19</sup> Te jñāhan ñuu yó hebreo tu ní cajēhe de jñuhun. Jeē yūcuan ní cahān na jeē quiji ná nuū maá rey cujēhnu ga nde ñuu Roma yāhá te sándaā maá de siquí ná. Te tú véji ná jeē cáquin na cuēchi siquí ñayuu nación yó. <sup>20</sup> Jeē yūcuan ní cana ná nihñ jíināhan ní, návāha cuni na táca ní te nda-jñuhun yó. Chi yóhó ñayuu Israel cáñuhun ni yó jeē nátecu ndiyí, te suu jñuhun un nácani

na, te jeē yūcuan cúu jeē nuhni na jíin cadena yāha, áchí de.

<sup>21</sup> Te ni cacahān tēe un jíin Pablo:

Tú ni ñin carta ni cátañi ñayuu cáyūcú Judea nuū na jeē cástūhun de jñuhun ní, te táca jñāhan yó Judea jeē ní quijicoo yāhá, tú ni ñin jñuhun neé ní cacahān de siquí ní. <sup>22</sup> Te cánujñahan ni ná cuni sōho ná ndese cúu jñuhun jeē cahān ní, chi je cájini na jeē táca-ni lado cácañān ñayuu contra siquí jñuhun jeē jeē steén ni, áchí de.

<sup>23</sup> Te ni cajeni de ñin quiví, te ni quijicoo cuehē de vehe nuū néne Pablo. Te ni nacani de jñuhun ndese ndácu Yaā Dios jniñu, te ni steén cají de jñuhun nde jenéhen te nde ni ñni. Te sūcuan ni nducú ndéyí de scándije de táca tēe un jñuhun Jesús, te ni steén de jeē suni sūcuan cáhān ley jeē ní jēhe ya nuū Moisés jíin jñuhun jeē ní catee tēe ni canacani jñuhun Yaā Dios nde jenahān. <sup>24</sup> Te ni cacandije sava de jñuhun ni cahān Pablo, te sava ga de tu ní cájetáhú de. <sup>25</sup> Chi tú inuú cáhño ni de. Te saá cánducú de quingoo de te ni cahān Pablo:

Ndaā cahān jñuhun jeē ní cahān Isaías, tēe ni nacani jñuhun Yaā Dios nde jenahān, chi suhva ni cahān de jíin táca jíi yó ní sāha Espiritu Santo:

<sup>26</sup> Ni cahān Yaā Dios:

Cuahān nuū jñāhan ñuu rō yāhá te cahān rō jíin i:

Vésú cuni nahñ vāha ró te ma jécūhun ni rō, te vésú coto vāha ró te ma cúni rō.

<sup>27</sup> Chi yōhyo nihni ní rō,

chi tu cácuñi rō cuatáhú rō.

Te yōhyo uhū cájini sōho rō,

chi tu cánujñahan ni rō cuni sōho ró jñuhun ri.

Te nájnūhun cájesi rō tinūu ró

cúu jeē tu cácuñi rō nanducú ró ndese cúu,

te tu cácuñi rō jeē násāma ñni rō

návāha nasávāha ri anuá rō nuū cuéchi ró, ní achi Yaā Dios.

Achí tutu. <sup>28</sup> Núu sūcuan te na cástūhun ná nuū ni jeē jñuhun ni tají Yaā Dios jeē jñāya ya yohó, nde vijnā te tají yá jñuhun yāha quíhñ nuū ñayuu táca nación jeē tu cájini i jñuhun ya, te máá i chi cuni sōho i, áchí de.

<sup>29</sup> Te ní jñu ni cahān de jñuhun yāha, te cuangoo jñāhan de hebreo, te yōhyo ní cacahān de siquí jñuhun yāha jíināhan de.

<sup>30</sup> Te ni condee Pablo uū cuiyá vehe jeē ní quihñ núu de ún. Te ni cusñ ní de cahān de jíin táca ñayuu ní quijicoo nuū de. <sup>31</sup> Te jēhnu-ni ni nacani de jñuhun ndese ndácu Yaā Dios jniñu, te ni steén de jñuhun máá jítoho yó Jesucristo, te tú ni ñin ní jési jeē nácani de jñuhun.

## CARTA JEE NI TEE SAN PABLO APOSTOL NUU ÑAYUU ÑUU ROMA

<sup>1</sup> Máá rí cúu Pablo, mozo Jesucristo, chí ni cana Yaā Dios ruhū cúu ri apóstol yā, ni jeni ya ruhū te ni taji yá ruhū jeē nácani ri jnúhun jeē jnáma ya ñayuu.

<sup>2</sup> Te jnúhun un ní jejnúhun ya nde jenahán ndasí, te yósó núu tútu íi jeē ní catee tēe ni canacani jnúhun ya. <sup>3</sup> Te jnúhun un cáhán siquī Jitoho yō Jesucristo, Yaā cúu Sēhe Yaā Dios. Te ní nduu ya tēe, ní cacu ya chíji yucūn rey David. <sup>4</sup> Te ni natecu yā mēhñu ndíyi ní sáha Espíritu íi, te súcuan ní steén Yaā Dios jeē cúu ya Sēhe ya jeē ndíso poder. <sup>5</sup> Te jeē jíin Jesucristo ní jēhe Yaā Dios jniñu luu yáha jeē cácuu ri apóstol, cájica ri jíin jnúhun Cristo, náváha coo ñayuu táca nación jeē candíje i jeē sáha ya jehé i, te cuatáhú i nuu yā. <sup>6</sup> Te suni máá ró jijnáhan ró, suni ní cana ya rohó ní quívicoo ró ndaha Jesucristo.

<sup>7</sup> Te tēe ri carta yáha cuajeē nuu rohó ñayuu ñuu Roma. Chí ni cundáhú ní Yaā Dios rohó, te ní cana ya rohó jēe coo ndoo coo íi ró nuu yā. Te ñuhun ní rí jeē máá Tátá yō Yaā Dios jíin Jitoho yō Jesucristo sáha ga yā jeē váha rohó, te sáha ya jeē coo ndeyí coo sñ ní ró.

### *Jeē cuní Pablo quiñin de ñuu Roma*

<sup>8</sup> Te xihna gā cástúhun rí nuu ró jeē nácuatáhú rí nuu Yaā Dios jeē siquí rohó jijnáhan ró, chí ní sáha Jesucristo jeē váha rohó. Chí ní ñáyivi jíite núu jnúhun cuahán ndese váha cácondíje ró yá. <sup>9</sup> Te máá Yaā Dios jini yá jeē nini jíicán tahú rí jehé ró jijnáhan ró nuu jíicán tahú rí. Chí yóhoyo ndíhví ní rí jejníñu rí nuu yá jeē nácani ri jnúhun Sēhe ya. <sup>10</sup> Te nini jíicán tahú rí nuu yá jeē núu cuní yá te nde vijna te cuu jecondéhe rí rohó. <sup>11</sup> Chí cúu ní rí coto rí nuu ró jijnáhan ró, te steén gā rí jnúhun ya nuu ró, náváha quendóo váha ga anuá ró te cuiñi ñhin ga ró jíin. <sup>12</sup> Súcuan cuní rí náváha sáha yó jēe inuu coo ndeyí ní yó jijnáhan yó siquí jeē inuu cácondíje yó yá.

<sup>13</sup> Hermano jijnáhan ró, cuní rí jeē na jécúhun ní ró jeē tíjni jinu ní cuu ní rí jecondéhe rí rohó, te nde vijna ná tu cuu. Chí cuní rí scuité núu ga rí jnúhun ya mēhñu ró, nájnúhun ní sáha rí mēhñu ñayuu táca gá nación. <sup>14</sup> Chí cúu rí tēe táu siquí jnúhun ya, chí táu rí nacuáha rí jnúhun ya nuu ndíhi ñayuu, cúu ñayuu jíin gā siquí ndíhi jeē iyó ñáyivi jíin jéé tu jíin cuiñi, cúu ñayuu túhva jíin jéé tú túhva. <sup>15</sup> Jeē yúcuu cúu jeē ndíhví ní rí jeē suni nuu rohó ñayuu ñuu Roma nacani ri jnúhun jnáma ya yohó.

### *Jeē ndíso jnúhun váha ya poder*

<sup>16</sup> Chí tu cúcanu rí siquí jnúhun váha ya, chí yúcuu cúu poder Yaā Dios jeē jnáma ya táca ñayuu cácondíje, xihna gā ñayuu hebreo te suni táca gá ñayuu. <sup>17</sup> Chí jnúhun váha ya un steén nuu yó jeē ndáhva Yaā Dios cuéchi yó siquí jeē candíje yó jéé sáha ya jehé yó, te máá jéé candíje yó ní cuahán yó. Chí súcuan cáhán nuu tútu íi: Ñayuu jeē ní ndahva yá cuéchi í, técu i jeē candíje i jeē sáha ya jehé i, áchi.

### *Siquí jeē iyó ndasí cuéchi ñayuu*

<sup>18</sup> Chí jíin váha yó jéé Yaā Dios andívi, cuáha ya castigo xeén nuu táca ñayuu tu cácondíje te máni cuéchi casáha. Chí jíin jniñu néé casáha i te cájesi i nuu jnúhun ndaa. <sup>19</sup> Te ma cúu cahán i jeé tu jécúhun ní i siquí ndese Yaā cúu Yaā Dios, chí máá yá ní steén nuu i. <sup>20</sup> Chí jíin táca jeē ní sáha ya te cúu jécúhun ní ñayuu ndese Yaā cúu máá Yaā tu jíto i nuu. Chí nde ní jecóo ñáyivi jíin ndé vijna te cúu jécúhun váha ní i jeé máá yá cúu Yaā Dios te iyó poder yá ní cáni. Te jeē yúcuu má cúu cuiñi cahán i jeé tu jíin i jeé iyó yá. <sup>21</sup> Chí vésu ní cajini i ndese Yaā cúu ya, te tu ní cáchiñúhún i ya jeé cúu ya Yaā Dios, te ní tu ní nácuatáhú i nuu yá. Chí sa suhva ní nduu i ñayuu cájeni cáhā ní, chí ní candunéé íi i, te ní quendóo nee ini anuá i. <sup>22</sup> Cácahán i jeé ndíchi i, te sa suhva cácuméé i. <sup>23</sup> Chí ní castóo i Yaā Dios jeé yóhoyo luu cújéhnu, jeé ma cúu cuiñi. Te ní cajetáhú i táca imágen jeé casáha i, jeé cáa nájnúhun tēe cájilhi, te suni nde imágen saa jíin cóo jíin quiñi cájica ndicúñu ndaha.

<sup>24</sup> Te jeé yúcuu ní siaá Yaā Dios i jeé na sáha i táca jniñu jnéhen jniñu néé jéé cuní i. Te casáha i jniñu néé jíin jnáhan i jeé cúu máá jnúhun canu. <sup>25</sup> Chí tu ní cácondíje i jnúhun ndaa Yaā Dios, chí sa ní cacandíje i jnúhun stáhú. Te cáhiyo yñúhún i te cáchiñúhún i nuu táca jéé ní sáha ya, lugar jeé chíñúhún i máá Yaā ní sáha ún, Yaā jeé cánuu cahán yó jeé cújéhnu ya ní cáni. Amén.

<sup>26</sup> Jeé yúcuu ní siaá Yaā Dios i jeé na sáha i táca jniñu néé jéé cándiyo ní i jeé cúu máá jnúhun canu. Chí nde ñahan ní casama ña modo síhí, te ní quívi ña jíin modo neé. <sup>27</sup> Te suni súcuan tēe ní casiaá de modo chíjniñu jíin ñahan. Te nde ní nduquijí de ní casáha ndiyí de jíin jnáhan yí de, te tēe jíin tēe ní casáha de jniñu jnúhun canu. Te cándoho de castigo siquí jniñu néé ní casáha de.

<sup>28</sup> Te jeé tu ní cácuu i cuajnúhún i Yaā Dios, jeé yúcuu ní siaá yá i jeé na cáni néé ní i, te sáha i táca jniñu jeé tu iyó váha. <sup>29</sup> Te máni máá na jniñu jeé tu iyó ndaa cándihví ní, te cájica jnéni, casáha jniñu néé, cándiyo ní, cájito uhú jnáhan. Te máni jeé cácuuésun ní, cájehni ndiyí, cájehán, cástáhú, cáshuhú jnáhan, cásjnúhún siquí jnáhan. <sup>30</sup> Cácahán jnúhun néé siquí jnáhan,

cájito uhú Yaā Dios, cácujeé ni, cáсандúxí máá, cásatéyí máá, cájequin costumbre neé, tu cájendetú nuú tatá nuú naná. <sup>31</sup> Te tu cájecúhun cuiti ni, tu squícu jnúhun jéjnhun, tu iyó máni jíin jnáhan, tu íne cáhnu ni nuú jnáhan, tu cúndáhú ni jnáhan. <sup>32</sup> Te je cájini váha i jeé ni sándaā Yaā Dios jeé ñáyyu casáha súcuan, cánuú jnahnú ndetú i. Te vésú súcuan cájini i, te níni cásaáha i jniñu neé un, te suni cánujnahán ni i jeé casáha jnáhan i súcuan.

*Ndaā sándaā Yaā Dios siquī cuéchi*

## 2

<sup>1</sup> Núu súcuan te róhó jéé cahán cuéchi siquī jnáhan, núu na-ni ñayuu cúu ró, ma cúu cahán rō jeé tú na cuéchi máá ró. Chi jeé cahán rō cuéchi siquī jnáhan ró cúu jeé ndénehen ró cuéchi siquī máá ró. Chi róhó jéé cahán cuéchi, suni súcuan sáha máá ró cuéchi. <sup>2</sup> Chi jíni yō jeé Yaā Dios, ndaā sáha ya jeé ndóna ya siquī cuéchi ñayuu casáha súcuan. <sup>3</sup> Te róhó jéé cahán cuéchi siquī ñayuu casáha cuéchi, te suni súcuan sáha máá ró, ¿te á jéni ni rō jeé cácu máá ró quiví ndóna Yaā Dios siquī cuéchi, chí naún? <sup>4</sup> ¿A cújéé ni rō nuú jnúhun jeé yóhoyo váha ni Yaā Dios jíin ró, jíin jéé iyó paciencia yá jeé tú yachí cuáha ya castigo nuú rō? ¿Te á tu jécúhun ni rō jeé jnúhun jeé yóhoyo váha ni yá sáha jeé nácani ni rō siquī cuéchi rō? <sup>5</sup> Chi níhni ni rō te tu nácani ni rō siquī cuéchi rō. Te jeé yúcuán cáyá gā rō castigo siquī rō quiví sáha Yaā Dios juicio, máá quiví jeé cóo ndijin jeé ndaā sándaā yá siquī cuéchi. <sup>6</sup> Chi chunaa yá nuú ná ñn ná ñn ñayuu núu ndese jniñu ni casáha i. <sup>7</sup> Te ñayuu jeé tu jécuiñi i jeé sáha i jniñu váha, cuáha ya jnúhun jeé cótecu i ní cáni. Chi ndúcú i quiví i nuú ndujéhnu yñíhún i, nuú ní cáni cótecu i. <sup>8</sup> Te quiví ni yá te cuáha ya castigo nuú ñayuu cujéé ni nuú yá, te cúniñni ni nuú jnúhun ndaā, chí sa nuú jnúhun yacuá yóho jetáhú i. <sup>9</sup> Te táca ñayuu casáha jniñu neé, chí níhni i jnúndóho xeén te cucuíhyá ndasí ni i, xíhna gā ñayuu hebreo te suni súcuan ñayuu táca gá nación. <sup>10</sup> Te sa suhva táca ñayuu casáha jniñu váha, chí quiví i nuú ndujéhnu yñíhún i, te coo ndeyí coo sí ni i, xíhna gā ñayuu hebreo te suni súcuan ñayuu táca gá nación.

<sup>11</sup> Chi Yaā Dios tu sáha ya cuenta ndese cúu ñn ñn ñayuu, chí inuú sáha ya jíin i. <sup>12</sup> Chi táca ñayuu jeé casáha cuéchi, vésú tu cáyihni i chíji ley jeé ni jéhe ya nuú Moisés, te tu níni ley un te jnahnú ndetú i. Te táca ñayuu cáyihni chíji ley Moisés te casáha cuéchi, jíin ley un sándaā yá cuéchi i. <sup>13</sup> Chi tu ndáhva Yaā Dios cuéchi ñayuu jeé máá jéé cúni nahín-ni i jnúhun cáhán ley yá. Chí sa suhva ñayuu squícu jeé cahán ley yá cúu jeé ndáhva yá cuéchi i. <sup>14</sup> Chi ñayuu táca nación jeé tu cáneváha tutu ley jeé ni jéhe ya nuú ñayuu hebreo, te núu cásquícu

máá i ley yá, suu cúu jeé cáneváha i ley yá ini anuá i, vésú tu cáneváha i tutu ley un. <sup>15</sup> Te súcuan cástéén i jeé jnúhun ndácu ley un chí ñúhun ini anuá i. Te táca jéé cájeni ni i jíin ánuá i, suu cúu jeé steén nuú i siquī núu ni sáha i cuéchi chí váha ni sáha i. <sup>16</sup> Te súcuan coo máá quiví jeé jíin Jesucristo sándaā Yaā Dios siquī táca jéé tu iyó váha jeé ní cajeni sáhi ni táca ñayuu. Súcuan cáhán jnúhun váha ya jeé nácani rí.

*Siquī jeé tu cásquícu ñayuu hebreo ley Moisés*

<sup>17</sup> Te róhó cácahán rō jeé téé hebreo cácuu ró, te cátenuú rō máá ley Moisés, te cácutéyí ró jeé siquī Yaā Dios. <sup>18</sup> Te cájeni ni rō jeé jíini rō ndese nújnahán ni yá, jíin jéé cúu nácáji váha ró ndé-ni cúu jniñu váha, chí ni cacutúhva ró ley un. <sup>19</sup> Te cájeni ni rō jeé máá ró cácuu téé steén ichi Yaā Dios nuú ñayuu tu cájini cuiti, jíin jéé cúu sáha ró jéé cúndijin ini anuá ñayuu cájica nájnúhun nuú neé. <sup>20</sup> Te cájeni ni rō jeé cúu steén ró nuú ñayuu tú túhva jnúhun ya, jíin jéé máá ró cácuu maestro nuú ñayuu tu jécúhun ni. Chí jíin tutu ley yá te cájini rō ndese cúu jnúhun ndíchí jnúhun ndaā, cájeni ni rō. <sup>21</sup> Núu súcuan te máá ró jeé castéén nuú ñayuu, ¿te naun tu cástéén rō nuú máá ró? Te máá ró jeé cácahán jeé ma sácuihná i, ¿te naun cáscuihná máá ró? <sup>22</sup> Te máá ró jeé cácahán jeé ma cósiquí ndéé i, ¿te naun cósiquí ndéé máá ró? Te máá ró jeé cácahán jeé cácuquini ni rō ídolo, ¿te naun cáscuihná ró ndajñíhu jeé yúcu ini vehe ídolo? <sup>23</sup> Te cácutéyí ró jíin ley Yaā Dios, te vésú súcuan te casáha ró jéé cácahán ñayuu siquī yá, chí tu cásquícu máá ró jnúhun ndácu ley yá ún. <sup>24</sup> Chí súcuan yósó núu tútu íi: Ñayuu táca gá nación, máni cácahán ndeváha i siquī Yaā Dios, jeé siquī cuéchi róhó ñayuu hebreo.

<sup>25</sup> Te núu cásquícu ró ley Moisés, yúcuán na te níhni jniñu ndije jeé ní canihni rō jnuñi circuncidar. Te núu tu cásquícu ró ley un, te vésú ni cuu ró circuncidar, te nájnúhun jeé tu ní cúu ró. <sup>26</sup> Te téé táca nación, núu cásquícu de jniñu ndácu ley un, vésú tu ní cániñi de jnuñi circuncidar, núu súcuan te nájnúhun ni canihni de jnuñi circuncidar. <sup>27</sup> Te téé jeé tu ní cúu circuncidar yiquí cúñu de, te cásquícu de ley yá, máá de cahán cuéchi siquī rō. Chí tu cásquícu ró, vésú cáneváha ró tutu ley un, te ni cuu ró circuncidar. <sup>28</sup> Chí nasúu jéé cáca ichi siquí ñn téé sáha jeé cúu ndije de téé hebreo. Te ni nasúu jéé cúu circuncidar yiquí cúñu ñn téé sáha jeé cúu de téé ndaā. <sup>29</sup> Chí sa suhva téé cúu hebreo ndije, cúu jeé ini anuá de ñúhun jnúhun ndaā. Te téé cúu circuncidar ndije, chí nde jíin ini jíin ánuá de sáha de jniñu ndaā te nasúu jéé ndíso de jnuñi circuncidar jeé cahán ley un cúu.

Tēe cándāa súcuan, nasūu ñáyyuu cájejnúhún i de, chí máá Yaā Dios.

### 3

<sup>1</sup> ¿Núu súcuan te na vé iyó gá nuū ñáyyuu hebreo jeē quéndōo vāha ga i? ¿Te ndé nihín jnínū jeē casáha i circuncidar? <sup>2</sup> Vāha ndasí nihín jnínū. Xihna gā nihín jnínū jeē ni jéhe Yaā Dios jnūhun ya nuū maá i. <sup>3</sup> Te vēsú sava i tu ní cácdíje, ¿te á suu sáha jeē ma squícu ga Yaā Dios jnūhun ni jejnūhun ya, chí naún? <sup>4</sup> Tú cuítí jeē súcuan, chí vēsú núu ndíhi ñáyyuu castáhú i, te Yaā Dios chí iyó ndāa yā. Chí suhva yósó nuū tútu íi jeē ní cáhān ñn tēe jín yá:

Cahān ñáyyuu jeē iyó ndāa ní jín táca jnūhun cáhān ni,

te cuni i jeē iyó ndāa ní vēsú núu cácahān i squícu ní.

Achí tutu.

<sup>5</sup> Te cácahān sava ñáyyuu jeē iyó vāha jeē sáha yó cuéchi, chí cuéchi yó jéjníñu stéén jeē iyó ndāa Yaā Dios. Núu súcuan ¿te á cuu cahān yō jeē tú vāha sáha Yaā Dios jeē jéhe ya castígo núu jéjníñu cuéchi yó súcuan? (Va cáhān-ni nde rí nájñūhun cácahān ñáyyuu ñáyíví.) <sup>6</sup> Tú cuítí jeē súcuan. Chí núu jeē tú vāha sáha Yaā Dios, ¿te ndese cuu sándaā yā cuéchi ñáyyuu ñáyíví?

<sup>7</sup> Te núu jnūhun stáhú cácahān ñáyyuu jéjníñu stéén jeē yóhō cújéhu Yaā Dios squícu jeē máni cáhān ndāa yā, ¿te á cuu cahān yō jeē tú vāha jeē cahān yā jeē cuéchi cúu jeē castáhú i? <sup>8</sup> Tuú, chí núu jeē súcuan cúu, te cuu cahān yō jeē vetú-ní sáha yó jéé neé návāha quee jeē vāha núu. Te sava ñáyyuu cácahān ndevāha i squícu rí jeē súcuan cástéén rí, te tú ndāa. Ñáyyuu ún chí iyó vāha jeē ndénehen ya cuéchi squícu i.

#### *Ndivii yō iyó cuéchi*

<sup>9</sup> Núu súcuan ¿te á vāha ga ñáyyuu cácuu yóhō ñáyyuu hebreo vēsú inga ñáyyuu naún? Tú cuítí jeē súcuan. Chí je ní cacahān yō jeē vēsú ñáyyuu hebreo chí ñáyyuu táca gá nación, ndivii yō yíhi chíji cuéchi. <sup>10</sup> Chí suhva cáhān tutu íi: Tú cuítí na ñáyyuu ndāa iyó, ní ñn i.

<sup>11</sup> Te tú cuítí ñáyyuu jécūhun ní iyó, te tú ní ñn i nánducú i Yaā Dios.

<sup>12</sup> Ndíhi i ní cascuíta i jnūhun ya, te inuú-ni ní caství ndíhi i máá i.

Te tú cuítí ñáyyuu sáha jnínū vāha iyó, ní ñn i.

<sup>13</sup> Yaū sucūn i cúu nájñūhun yaū ndíyi jeē núne,

chí máni jnūhun stáhú cácahān i.

Te nájñūhun veneno coō yíhi yuhu i,

<sup>14</sup> chí máni máá jnūhun ndevāha jnūhun uvuā cácahān i.

<sup>15</sup> Te yóhō ñama jehē i jeē cáhni i ndíyi.

<sup>16</sup> Te ndé-ni cúu-ni nuū cájica i te squícu i jnūndóho jeē jnañnú ndetú ñáyyuu.

<sup>17</sup> Te tú cájica cuítí i jín jnūhun coyūcu máni i,

<sup>18</sup> te ní tu cáncani ní i jeē cónso íyo i nuū Yaā Dios.

Achí tutu.

<sup>19</sup> Te jíní yō jeē táca jnūhun cáhān ley jehān, chí cáhān nuū ñáyyuu yíhi chíji ley un, návāha ndíhi i ma cúu cahān i jehē i. Chí ndenehen Yaā Dios cuéchi squícu i nde jín ñáyyuu ní ñáyíví. <sup>20</sup> Chí tú ní ñn ñáyyuu quéndōo ndāa i nuū yā jeē nducú i squícu i jnínū ndácu ley un. Chí ley un jéjníñu máni návāha cuni yō jeē iyó cuéchi yó.

#### *Jeē jnáma ya yohó squícu jeē candíje yó jéé sáha ya jehē yō*

<sup>21</sup> Te vijna te je cájini vāha yó ndese ndáhva Yaā Dios cuéchi yó. Te nasūu ley un sáha jeē quéndōo ndāa yō, vēsú maá tutu ley jín tēe ní canacani jnūhun ya, ní cacahān ndese ndáhva yā cuéchi ñáyyuu. <sup>22</sup> Chí táca ñáyyuu jeē cácdíje i jeē ní jíhi Jesucristo jeē chúnaa yā cuéchi i, chí ndahva Yaā Dios cuéchi i squícu jeē súcuan cácdíje i. Chí inuú-ni cúu táca ndíhi ñáyyuu. <sup>23</sup> Chí ndíhi yó ní casáha cuéchi, te jeē yúcuun tu ní cúu quéndōo ndāa yō nuū Yaā Dios. <sup>24</sup> Te squícu jeē yóhō vāha ní Yaā Dios, jeē yúcuun ndáhva yā cuéchi yó súcuan-ni. Chí squícu jeē ní jíhi Cristo Jesús cúu jeē jnáma ya yohó. <sup>25</sup> Chí Yaā Dios ní jeni ya Cristo návāha socó yā maá yā chunaa yā cuéchi yó jéé ní jíhi yā. Te jnáma ya yohó núu súcuan cándíje yó. Te súcuan ní sáha Yaā Dios návāha stéén yā jeē Yaā ndāa cúu ya. Chí ichi yátá ní iyo paciencia yā, te tu ní chíhi ya cuenta cuéchi ñáyyuu. <sup>26</sup> Te tiempo yáha stéén yā jeē Yaā ndāa cúu ya, chí ndāa sáha ya jeē squéndōo ndāa yā ñáyyuu candíje vēsú iyó cuéchi i, chí cácdíje i jeē ní chunaa Jesús cuéchi i ní ndahva yā.

<sup>27</sup> Núu súcuan ¿te á cuu cutéyi gá yō squícu maá yó? Ma cúu cuítí, chí ma cúu cutéyi yó cani ní yō jeē vāha squícu yó ley yā. Chí jnáma ya yohó máá squícu jeē candíje yó jéé sáha ya jehē yō. <sup>28</sup> Núu súcuan te je jíní yō jeē ndáhva Yaā Dios cuéchi yó squícu jeē súcuan cándíje yó, te nasūu jéé nducú yó squícu yó jéé ndácu ley.

<sup>29</sup> ¿Te á núu maá-ni ñáyyuu hebreo cúu ya Yaā Dios, chí naún? Tuú, chí suni cúu ya Yaā Dios jeē jnáma ñáyyuu táca gá nación. <sup>30</sup> Chí ñn-ni Yaā Dios iyó, te ndáhva yā cuéchi ñáyyuu cácdíje jeē ní sáha ya jehē i, cúu ñáyyuu ndíso jnūni circuncidar, cúu ñáyyuu jeē tuú. <sup>31</sup> Te jeē candíje yó jéé jnáma ya yohó, ¿á sáha jeé tuá jíni ñúhún squícu yó ley yā, chí naún? Tú cuítí, chí sa suhva sáha jeē vāha ga cuu squícu yó ley yā.

*Abraham cúu ñn ejemplo nuū yō*



## 4

<sup>1</sup> Núu súcuan ¿te ndese cahān yō siquī tāca jēē ní cuu jíin jíi yō Abraham? ¿Ndesē ní ndahvā cuēchi de? <sup>2</sup> Nasūu jēē ní sáha máá de cúu jēē ní ndahva Yaā Dios cuēchi de. Chi núu jēē súcuan cúu núu, te cuu cuteyí de jēē váha ní sáha de. Te tu ní cutéyí de, chi nasūu siquī jēē ní sáha máá de cúu jēē ní ndahva Yaā Dios cuēchi de. <sup>3</sup> ¿Chi ndese cahān tutu i? Cahān jēē ní candíje Abraham jēē sáha ya jēē ní jéjnūhun ya nuū de, te jēē yúcuan ní ndahva yā cuēchi de. <sup>4</sup> Te iin ñayuu sájniñu, te yāhu i chi nasūu jēē cútahū i cúu, chi jēē chúnāa yō nuū i cúu. <sup>5</sup> Te jēē jnāma Yaā Dios ñayuu, chi jēē cútahū i cúu. Chi vēsú tu cúu squícu i táca jniñu váha, te núu candíje i jēē jnāma ya i nuū cuēchi i, yūcuán na te ndahva yā cuēchi i. <sup>6</sup> Te David suni ní cahān de ndese yōhyo ndetū ñayuu jēē ndáhva Yaā Dios cuēchi i, vēsú tu cúu sáha i ní iin jniñu jēē quéndōo ndaā i nuū yā. <sup>7</sup> Chi ní cahān de:

Nacā ndetū ñayuu jēē íne cáhnu ní yā nuū jniñu néē ní sáha i,

te tu ndénehen ya cuēchi siquī i.

<sup>8</sup> Te nacā ndetū tēē jēē tuá chíhi máá Jítoho yó cuenta cuēchi de.

Achí tutu.

<sup>9</sup> ¿Te á máni máá ñayuu squícu ley circuncidar cúu jēē quéndōo ndetū? ¿Chí suni quéndōo ndetū ñayuu jēē tu cúu circuncidar naún? Suni máá i quéndōo ndetū i. Chi je ni cahān yō jēē ní candíje Abraham jēē sáha ya jēē ní jéjnūhun ya, te jēē yúcuan ní ndahva yā cuēchi de. <sup>10</sup> Te ná ní ndahva yā cuēchi de, ¿á je ni cuu de circuncidar, chí ndé ná tuú? Nasūu jēē jé ní cuu de circuncidar, chí nde ná tuú. <sup>11</sup> Te cuéé gá te ní nihin de jnūi circuncidar. Te suu ní cuu iin seña, nájnūhun iin sello jēē ní ndahva yā cuēchi de siquī jēē súcuan ní candíje de. Te jēē yúcuan ní cahān yā jēē cuu de jíi nuū tāca ñayuu jēē candíje i jēē sáha ya jehē i, suni nuū ñayuu tu ní cuu circuncidar, chí suni ndahva yā cuēchi máá i. <sup>12</sup> Te suni cúu de jíi nuū ñayuu ní cuu circuncidar, te nasūu máni jēē ní cuu i circuncidar, chí suni jēē ní jni i ejemplo de. Chi cáandíje i jēē sáha ya jehē i, nájnūhun ní candíje máá de nde ná tu cuu de circuncidar:

*Núu candíje yó te sáha Yaā Dios jēē ní jéjnūhun ya*

<sup>13</sup> Chi ní jéjnūhun Yaā Dios nuū Abraham jíin núu tāca yúcūn de jēē cuāha ya ní ñáyiví cuu tahū de. Te nasūu siquī jēē ní nducú de squícu de ley yā cúu jēē ní jéjnūhun ya un núu de, chí sa suhva siquī jēē ní candíje de jēē ní jéjnūhun ya, te ní ndahva yā cuēchi de. <sup>14</sup> Chi núu jēē máni máá ñayuu nducú squícu ley cúu jēē nihin jēē ní jéjnūhun ya, núu súcuan te cándíje cáha yó nuú, te ma nihin jniñu jēē ní jéjnūhun ya ún. <sup>15</sup> Te ley

chí sáha jēē nihin ñayuu castigo siquī jēē tu cúu squícu i. Te núu jēē tu ley, te suni tú na jnūhun stívi ñayuu siquī ley coo núu.

<sup>16</sup> Núu súcuan te ní jéjnūhun ya jēē sáha ya jēē váha jíin ñayuu siquī jēē candíje i jēē súcuan sáha ya, te jēē cútahū i súcuan-ni cúu. Te jēē ní jéjnūhun ya ún, íyó cutú nuū tāca yúcūn Abraham, te nasūu núu máá-ni ñayuu jēē nducú squícu ley jenahān, chí suni nuū tāca ñayuu cáandíje nájnūhun ní candíje Abraham. Te súcuan cúu de jíi nuū tāca yó jēē cáandíje yó. <sup>17</sup> Súcuan ní sáha Yaā Dios chí ní candíje de jēē sáha ya. Chi súcuan cahān tutu i: Ní jeni ri rohó cuu ró jíi nuū cuehē ndasí ñayuu. Súcuan ní cahān máá Yaā jēē nastécu ndíyí te cahān yā ndese coo tāca jēē ná tu coo.

<sup>18</sup> Te ní candíje de, te ní cocuhun teyí ní de jēē ní jéjnūhun ya jēē coo cuehē yúcūn de, vēsú tuá na modo coo sēhe de núu. Te jēē yúcuan ní nduu de jíi nuū cuehē ndasí ñayuu, nájnūhun ní cahān Yaā Dios: Súcuan nducuehē yúcūn rō, achí yá jíin de. <sup>19</sup> Te je yajni jinú de ciento cuya, te vēsú súcuan te tu ní quenda de nuū jnūhun cándíje de, vēsú jíin de jēē máá de jíin ñasihí de Sara je jéhu ndasí ndindúu de jēē ma cúu ga coo sēhe de.

<sup>20</sup> Te tu ní nácani siquī ní de jēē ma cándíje ga de jnūhun ní jéjnūhun Yaā Dios jēē coo sēhe de. Chí sa suhva ní candíje nihin ga de, te ní nacuatáhú de nuū Yaā Dios. <sup>21</sup> Chí ní cucáhnu váha ní de jēē cúu squícu Yaā Dios ndíhi jēē ní jéjnūhun ya. <sup>22</sup> Te jēē yúcuan ní ndahva yā cuēchi de siquī jēē súcuan ní candíje de.

<sup>23</sup> Te nasūu máá-ni siquī Abraham cúu jēē yosó núu tútu jēē ní ndahva yā cuēchi de jēē ní candíje de. <sup>24</sup> Chí suni yósó jēē siquī yohó jíjnáhan yó. Chí suni ndahva yā cuēchi máá yó jēē candíje yó jēē cúu ya Yaā ní nastécu Jítoho yō Jesús. <sup>25</sup> Chí ní jíhi Jesús jēē chúnāa yā cuēchi yó, te ní natecu yā návāha ndahva Yaā Dios cuēchi yó.

*Ndesē quéndōo ñayuu jēē ndáhva yā cuēchi*

## 5

<sup>1</sup> Núu súcuan te je ní ndahva Yaā Dios cuēchi yó siquī jēē ní candíje yó jēē sáha ya jehē yó. Te jēē yúcuan ní sáha ya jēē ní ndívi yó núu jnūhun maní yá jíin yó, siquī jēē ní jíhi Jítoho yō Jesucristo jehē yó. <sup>2</sup> Chí máá Cristo ní sáha jēē ní quáivcoo yó núu Yaā Dios, chí ní sáha ya jēē váha yohó siquī jēē súcuan cándíje yó. Te cáhnu nihin yó jíin jnūhun jēē sáha ya jēē váha yohó. Te cúsiñ ní yó chí ñūhun ní yó jēē jinú yó nuū lúu cujéhu yó jíin Yaā Dios. <sup>3</sup> Te nasūu máá yáha-ni, chí suni cúsiñ ní yó jēē ndóho yó jnūndóho. Chí jíin yó jēē máá jnūndóho sáha jēē jéndeyí ní yó. <sup>4</sup> Te jēē jéndeyí ní yó sáha jēē íje váha yó cuu yó ñayuu ndaā. Te jēē íje váha yó sáha jēē ñūhun ní yó tāca jēē váha jēē cóo. <sup>5</sup> Te táca jēē ñūhun ní

yō, chi nihīn nahīn yō. Chi jñūhun cundáhú ni Yāā Dios yohó, ni cunuú ini anuá yō, sáha Yāā Dios jeē jíin Espíritu Santo jeē ni jēhe ya nuū yō.

<sup>6</sup> Chi náa ndóho yó jée ma cúu cuíti jnama yó máa yó, te ni jihī Cristo jehē yohó jée cúu yó ñayuu iyó cuéchi. Te ni jihī yá máa quíví jeē jé ni jeni Yāā Dios. <sup>7</sup> Te yí cúu jeē cúu ñayuu jehē inga ñayuu, vésú jehē ñayuu ndaa. Chí sanaa te iyó jínu jeē chúndeyí ni ñayuu tēe cuu de jehē ñayuu ndaa váha. <sup>8</sup> Te máa Cristo chí ni jihī yá jehē yó náa máni cuéchi sáha yó, te súcuan ni steén Yāā Dios jeē cundáhú ni yá yohó. <sup>9</sup> Te vijna je ni ndahva Yāā Dios cuéchi yó siquí jeē ni jihī Cristo jehē yó. Núu súcuan te suni jíni váha yó jée jnama Cristo yohó núu castigo quiji quíví sáha Yāā Dios juicio. <sup>10</sup> Chi náa cúu ga yó enemigo Yāā Dios, te siquí jeē ni jihī Sehe ya jehē yó, te ni sáha ya jeē ndívi yó núu jñūhun maní yá jíin yó. Te jeē súcuan ní ndívi yó nuū jñūhun maní yá jíin yó, te suni jíni váha yó jée cácu yó siquí jeē técu Cristo, nduú yá jíin yó. <sup>11</sup> Te nasúu máa yáha-ni, chí suni cúsi ndasí ni yó jíin Yāā Dios siquí jeē ni sáha Jitoho yó Jesucristo jehē yó, chí máa yá ni sáha jeē ní ndívi yó núu jñūhun maní Yāā Dios jíin yó.

#### *Jñūhun Adán jíin jñūhun Cristo*

<sup>12</sup> Núu súcuan te jíni yó jeē ni quívi cuéchi ini ñayívi ní sáha máa ñayuu tēe Adán. Te jeē siquí cuéchi yúcuau te ní jecóo cuehyí jéni ñayuu. Te jeē yúcuau cúu jeē jihī ndíhi ñayuu, chí ndíhi i yíhi cuéchi. <sup>13</sup> Te nde ná tu cuáha ya ley nuū Moisés, te je iyó cuéchi ini ñayívi. Te siquí jeē ná tu coo ley yá, te tu ní chíhi ya cuenta jeē castívi i. <sup>14</sup> Te vésú súcuan te nde tiempo Adán te nde tiempo Moisés ni yíhi ñayuu chíhi cuehyí jeē jéni i siquí jeē iyó cuéchi i. Chí ni jihī i siquí cuéchi ni casáha máa i, vésú tu ní sáha i jñáhan cuéchi jeē ni sáha Adán jeē ní cunihni ní de nuū ñayuu ní ndacu ya. Te Adán ni cuu de ñayuu muestra máa Yāā ní quiji cuéé ga.

<sup>15</sup> Te jñūhun jeē ni sáha Adán cuéchi, tu quíjñáhan cuíti jíin táhū jeē jnama Yāā Dios yohó. Chí jeē ní stávi máa ñayuu tēe ún, jeē yúcuau cúu jeē jihī ndíhi yó. Te jñūhun jeē jnama Yāā Dios yohó cújéhu ndasí gá, chí siquí jeē ní sáha máa ñayuu tēe Jesucristo cúu jeē súcuan-ni jnama ya ndíhi ñayuu candíje. <sup>16</sup> Te cuéchi jeē ni sáha máa ñayuu tēe Adán, tu quíjñáhan cuíti jíin jñūhun jeē jnama Yāā Dios yohó. Chí siquí máa ñayuu tēe cuéchi ún te ni quívicoo ñayuu chíhi jñūhun jñahnū ndetū i. Te jñūhun jeē jnama ya ñayuu, sa suhva sáha jeē súcuan-ni ndáhva yá cuéchi i, vésú yóhyo cuehé cuéchi ni casáha i. <sup>17</sup> Chí siquí jeē ní sáha máa ñayuu tēe Adán cuéchi, te ni nihīn poder cuehyí jéni ñayuu. Te sa suhva siquí jeē ní jihī máa ñayuu tēe Jesucristo, te víhyá gá ní nihīn ñayuu máa yá poder jeé cótecu i

caca ndaa i jíin yá. Chí ni ndahva yá cuéchi i siquí jeē yóhyo váha ni yá.

<sup>18</sup> Núu súcuan te siquí jeē ní sáha máa ñayuu tēe Adán cuéchi, te ni quívicoo ndíhi ñayuu chíhi jñūhun jñahnū ndetū i. Te sa suhva siquí jeē ní sáha máa ñayuu tēe Jesucristo ñayuu jñíhu váha ndasí, te ndáhva Yāā Dios cuéchi ndíhi ñayuu te cotecu i ní cáni. <sup>19</sup> Chí siquí jeē tu ní jéndije máa ñayuu tēe, te ni quívicoo cuehé ndasí ñayuu níhin chíhi cuéchi. Te suni súcuan siquí jeē ní jéndije máa ñayuu tēe Jesucristo, te ndáhva Yāā Dios cuéchi cuehé ndasí ñayuu.

<sup>20</sup> Te ni jéhe ya ley yá náváha cuni yó jeé cuehé cuéchi casáha yó. Te jeē ní nducuehé cuéchi yó, te víhyá gá cuehé cúu jñūhun jeé váha ni yá jeé íne cáhnu ní ya nuū yó. <sup>21</sup> Núu súcuan te nájnūhun ni ñayuu poder cuehyí jéni ñayuu siquí jeé iyó cuéchi i, suni súcuan iyó poder jñūhun jeé váha ni yá jíin yó. Chí ndáhva yá cuéchi yó te cotecu yó ní cáni siquí jeē ní jihī Jitoho yó Jesucristo jehē yó.

*Jeé tuáyíhi yó chíhi cuéchi chíyíhi yó ndaha Cristo*

## 6

<sup>1</sup> Núu súcuan ¿te ndese cahān yó? ¿A caca ga yó jíin cuéchi náváha víhyá gá sáha ya jeé váha yohó jée cóne cáhnu ní ya nuū yó? <sup>2</sup> Ma cúu cuíti. Chí nájnūhun je ni jihī yó jeé tuá yíhi yó chíhi cuéchi, te ma cúu ga caca yó jíin cuéchi núu súcuan. <sup>3</sup> ¿A tu cájecūhun ní rō jeé táca yó jeé ní jendute yó siquí jeé ní quívi yó ndaha Cristo Jesús, suni ní jendute yó siquí jeé ní quívi yó chíhi jñūhun jeé ní jihī yó jíin yá? <sup>4</sup> Chí jeé ní jendute yó cúu nájnūhun ní quíndūyí yó jée ní jihī yó jíin yá. Te vijna te cuu caca yó jíin vida jeé jeé ní jéhe ya nuū yó, chí nájnūhun suni ní natecu yó jíin yá. Chí ní natecu yá ní sáha Tátá yá jíin poder jeé cújéhu ndasí yá.

<sup>5</sup> Chí núu ní cundúú yó jíin yá siquí jñūhun jeé ní jihī yó jíin yá, te suni súcuan cundúú yó jíin yá siquí jñūhun jeé ní natecu yó jíin yá. <sup>6</sup> Chí jíni yó jeé ní naa modo máa yó jeé ní jíca yó jíin íchi yátá, chí ni quívi yó núu jñūhun jeé ní jihī yó jíin Cristo jíca cruz. Te súcuan ní naa modo yó jeé cúu yó mozo nuū cuéchi, náváha tuá cuajníhu yó núu táca jñíhu jeé máni cuéchi cúu. <sup>7</sup> Chí ñayuu jeé jé ní cajihí, je ni quendacoo i chíhi táca cuéchi. <sup>8</sup> Te núu je ni jihī yó jíin Cristo, te cándije yó jée suni súcuan ní natecu yó jíin yá. <sup>9</sup> Chí jíni yó jeé ní natecu Cristo, te ma cúu cuíti ga yá, chí cuehyí jéni yohó, tuá na vé cúu sáha jíin yá. <sup>10</sup> Chí jeé ní jihī yá, te ñayuu ní ní jihī yá jeé siquí cuéchi ñayuu. Te jeé técu yá vijna, chí sáha ya jeé cuní Yāā Dios. <sup>11</sup> Te suni súcuan róhó jíjñáhan ró, sáha ró cuenta jeé nájnūhun ní cajihí rō jeé ní quendacoo ró chíhi cuéchi. Te cátecu rō náváha sáha ró jée cuní Yāā Dios, chí ndúú ró jíin Jitoho yó Cristo Jesús.

<sup>12</sup> Nú súcuan te ma cuáha ga rō jñūhun quihí ró chíji cuēchi jín yiqui cūnu rō jeē cūu. Chí cuēchi ún stáhní ní rohó jéē na sáha ró táca jéē ndiyo neé ní rō. <sup>13</sup> Te ma cuáha ró máá ró cuajníñu ró núu cuēchi jeē cócuu ró jín jñiñu neé. Chí sa suhva cuáha ró máá ró nuu Yaa Dios, te sáha ró cuenta jeē nájnūhun je ni cajihí rō te ni canatecu rō nuu yā. Te cuáha ndíhi ró máá ró nuu yā jeē cuajníñu ró núu jñiñu ndaa. <sup>14</sup> Chí tuá na poder cuēchi jeē cundeyí jín ró, chí tuá cáyihí ró chíji ley jenahán, chí sa cáyihí ró chíji jñūhun jeē váha ni yā jín rō.

*Jñūhun mozo jeē steén ndese quéndō ñayuu cácanđje*

<sup>15</sup> ¿Nde se sáha yó núu súcuan? ¿A caca ga yō jín cuēchi siquí jeē tuá yíhi yó chíji ley jenahán, chí sa yíhi yó chíji jñūhun jeē váha ni yā jín yó? Ma cúu cuiti. <sup>16</sup> Chí cájini rō jeē núu cuáha ró máá ró jeē cuatáhu rō sájníñu ró núu ñn tēe, núu súcuan te cácuu ró mozo nuu tēe ún, te cánuu cuandije ró núu de. Te suni súcuan núu cuáha ró máá ró jeē sáha ró cuēchi, te mozo cuēchi cácuu ró, te cuu rō. Te núu cuatáhu ró nuu máa yá, te mozo yā cácuu ró jeē cáca ndaa rō. <sup>17</sup> Te na cútahū yō nuu Yaa Dios, chí vēsú ní cacuu ró mozo nuu cuēchi, te vijna chí nde jín ñn jín anuá rō ní cajetáhu ró nuu jñūhun ya jeē ní quívicoo ró núu. <sup>18</sup> Te vijna te je ní nduu libre rō jeē tuá cácuu ró mozo nuu cuēchi, te cájejníñu ró núu jñiñu ndaa. <sup>19</sup> (Ní cahán rī ñn jñūhun ndese cúu siquí mozo ñn ñayiví yáha, chí tu cájecūhun yachí ní rō siquí jñūhun ya.) Núu súcuan te nájnūhun ní cajehé ró máá ró nde saá jeē ní cajejníñu ró núu táca jñiñu jñéhén jñiñu neé, suni súcuan cuáha ró máá ró vijna jeē cuajníñu ró núu jñiñu ndaa, návaha coo ndoo coo ñ rō nuu Yaa Dios.

<sup>20</sup> Chí nde náa cácuu ró mozo nuu cuēchi, te tu ní cájejníñu ró núu jñiñu ndaa. <sup>21</sup> ¿Te na vé ní canihín rō siquí cuēchi ní casáha ró un jéē cácuu ró vijna sáha? Tú cuiti, chí máá jéē jñahnú ndetū ró níf cáni sáha. <sup>22</sup> Te vijna te je ní canduu libre rō jeē tuá cácuu ró mozo nuu cuēchi, te cájejníñu ró núu Yaa Dios. Te suu sáha jeē quéndō váha ró, chí cáhíyo ndoo cáhíyo ñ rō nuu yā, te nde sandíhi te cotecu ró níf cáni. <sup>23</sup> Chí yáhu jeē níhín ñayuu siquí cuēchi cúu jeē jñahnú ndetū i. Te sa tahú jeē jéhe Yaa Dios cúu jeē cótecu yō níf cáni andiví, siquí jeē nduu yó jín Jítoho yó Cristo Jesús.

*Jñūhun ñasihí jín yí jeē steén ndese quéndō ñayuu cácanđje*

## 7

<sup>1</sup> Hermano, je cájini rō ndese cáhán ley yā, te cájini rō jeē yíhi ñayuu chíji ley maá-ni núu técu i ñayiví yáha. <sup>2</sup> Te yáha cúu nájnūhun ñn ñahan jeē ní quijnáhan, chí cáhán ley jeē yíhi ña ndaha yíi ña maá-ni núu técu de. Te

núu ní jihí yíi ña, te je ní quenda ña chíji ley jeē ní quijnáhan ña jín de. <sup>3</sup> Núu súcuan te núu quijnáhan ña jín inga tēe níni técu gā yíi ña, te casíqui ndéē ña de. Te núu je ní jihí yíi ña, te je ní quenda ña chíji ley un. Te cuu quijnáhan ña jín inga tēe, chí nasūu jéē casíqui ndéē ña núu súcuan.

<sup>4</sup> Te suni súcuan róhó jínáhan ró, ñání mání, chí ndúu ró jín Cristo. Chí nájnūhun ní cajihí rō jín Cristo, te ní quendacoo ró chíji ley jenahán. Te vijna chí nájnūhun ní quijnáhan ró jín inga, cúu jeē ní quívicoo ró ndaha Cristo, Yaa ní natecu mehñu ndíyi, návaha cuu sáha ró jñiñu váha jeē cuní Yaa Dios. <sup>5</sup> Chí ná ní cajica yó jín modo maá yó nde saá, te ley un ní sáha jeē ní ndiyo neé ní yō táca jéē cuní yiqui cūnu yō jeē sáha yó. Te yūcan ní sáha jeē jñahnú ndetū yō nuu. <sup>6</sup> Te vijna te je ní quenda yó chíji ley jenahán, chí nájnūhun je ní jihí yō jeē ma níhín gā poder siquí yō. Te súcuan te iyó libre yō jeē cuajníñu yó nuu Yaa Dios. Te jica yó jín modo jeē jéē cuní maá Espíritu, chí tuá yíhi yó chíji ley jeē ní tee Moisés jenahán.

*Siquí cuēchi jeē ñūhun ñn anuá yō*

<sup>7</sup> ¿Nde se cahán yō núu súcuan? ¿A ley ndíso cuēchi? Tú cuiti jeē súcuan. Te núu jeē tú ley yā, te ma cúni cuiti rī jeē iyó cuēchi rī. Chí ma cúni rī jeē cuēchi cúu jeē ndiyo ní rī ndajniñu jñáhan rī núu tu ní cáhán ley jeē ma ndiyo ní yō. <sup>8</sup> Te súcuan ní níhín cuēchi modo cocuu jín rī. Chí siquí jeē ndácu ley jñiñu jeē ma sáha yó cuēchi, te ní quejéé ndiyo ní rī sáha rī táca jéē neé. Te núu jeē tu ley, te suni tú na jñūhun stívi yó siquí ley nuu. <sup>9</sup> Chí ní iyo tiempo jeē técu rī jeē ná tu jecūhun ní rī jeē cahán ley. Te ná ní quejéé rī jécūhun ní rī jñiñu jeē ndácu ley, te ní jecūhun ní rī jeē iyó cuēchi rī, te ní nduu rī nájnūhun ndíyi. <sup>10</sup> Chí ní jini rī jeē ley jeē sáha jeē cótecu anuá rī nuu, te tuú chí sa ní sáha jeē jñahnú ndetū rī nuu. <sup>11</sup> Chí jín jéē ndácu ley un jñiñu, te ní níhín cuēchi modo cocuu jín rī, te ní stahú ruhū. Chí jín jéē ndácu ley jñiñu, te cuēchi ní sáha jeē ní quenda jñūhun jeē jñahnú ndetū rī.

<sup>12</sup> Núu súcuan te iyó ndaa maá ley, te táca jñiñu ndácu chí iyó ndoo iyó ndaa váha. <sup>13</sup> Núu súcuan te ley jeē iyó váha ún, ¿a suu sáha jeē jñahnú ndetū rī naún? Tú cuiti. Chí sa suhva máa cuēchi cúu jeē sáha jeē jñahnú ndetū rī, te súcuan stúu cuēchi ndese iyó máa. Chí jín jñiñu váha jeē ndácu ley te ní natūu jñiñu neé jéē cúu cuēchi.

<sup>14</sup> Chí jín yō jeē nuu maá Espíritu vēji ley. Te ruhū chí sa névaha rī ñn modo neé máa rī jeē ní squívi ruhū jéjníñu cáha rī nuu cuēchi. <sup>15</sup> Chí táca jéē sáha rī, tu jécūhun ní rī najehé cúu jeē sáha rī. Chí jñiñu váha jeē cuní rī sáha rī, tu ndé níhín rī fuerza sáha rī, chí sa suhva sáha rī jñiñu neé jéē tu cúvaha ní

rī sāha rī. <sup>16</sup> Te náa sāha ri jniñu neé jéē tu cúní rī sāha rī, núu súcuan te nácuni rī jéē iyó ndáá ley. <sup>17</sup> Núu súcuan te nasūu rúhū cúu jéē sāha jniñu neé un, chí modo neé jéē ñúhun iní anuá rī cúu jéē sāha cuēchi. <sup>18</sup> Chí jíni rī jéē modo maá rí jéē névāha rí iní anuá rī, tú cuíti na vé jéē váha iyó. Chí cúní rī sāha ri jniñu váha, te tu ndé níhín rī fuerza sāha rī. <sup>19</sup> Chí jniñu váha jéē cuní rī sāha rī, tu sāha rī. Te jniñu neé jéē tu cúní rī, sa yúcuan sāha rī. <sup>20</sup> Te náa sāha ri jniñu jéē tu cúní rī sāha rī, te nasūu rúhū cúu jéē sāha, chí modo neé jéē ñúhun iní anuá rī cúu jéē sāha.

<sup>21</sup> Núu súcuan te ní jíni rī jéē súcuan cúu jíni rí: Vésú cuní rī sāha ri jniñu váha, te sa máni modo neé cúu jéē ñúhun iní anuá rī. <sup>22</sup> Chí cúsñ ní rī jíni ley Yaā Dios nde jíni iní anuá rī. <sup>23</sup> Te ní nacuní rí jéē iyó inga modo neé máá rí jéē jési nuú jéē cuní rī sāha rí jéē váha. Te cúu rí nájnūhun preso nuú cuēchi jéē jícu jíni rí.

<sup>24</sup> Nacá jéē ndahú gá cúu ri núu súcuan. ¿Ndeé ñin jnama ruhū nuú modo neé máá rí jéē jícu jíni rí jéē jnahnú ndetū rí? <sup>25</sup> Na cútahú ndasí rí nuú Yaā Dios, chí máá yá cúu jéē jnama ruhū nuú modo neé rí siquí jéē ní jíni Jitoho rí Jesucristo jehé rí. Núu súcuan te vésú cuní yó squícu yó ley Yaā Dios, te jéē jíni fuerza maá yó ma cúu, chí modo neé máá yó sāha jéē jejniñu caha yó nuú cuēchi.

*Siquí jéē jícu yó jíni modo cuní Espiritu Yaā Dios*

## 8

<sup>1</sup> Núu súcuan te ma ndénehen Yaā Dios cuēchi siquí ñayuu cáyihí ndaha Cristo. Chí tuá cájica i jíni modo neé máá i, chí sa suhva cájica i nájnūhun cúní maá Espiritu yá. <sup>2</sup> Chí modo jéē sāha Espiritu cúu jéē técu yó siquí jéē yíhi yó ndaha Cristo Jesús. Te yúcuan ní sāha jéē ní nduu libre yó nuú jnúhun jéē ní yíhi yó chíji cuēchi jéē jnahnú ndetū yó nuú. <sup>3</sup> Chí ní sāha Yaā Dios jéē quéndō vāha ñayuu jéē tu ní cúu quéndō vāha jíni ley Moisés, siquí jéē tú na fuerza i jíni modo maá i jéē squícu i ley un. Chí ní tají yá Sēhe ya ní quíji, te ní nduu ya nájnūhun ñayuu cáhíyo cuēchi, návāha socó yá maá yá siquí cuēchi, vésú tú na cuēchi ya. Te súcuan ní ndonda Yaā Dios siquí cuēchi jéē ní casáha ñayuu jíni modo neé máá i. <sup>4</sup> Súcuan ní cuu návāha cuu squícu yó táca jniñu ndaá jéē ndácu ley, chí tuá jícu yó jíni modo neé máá yó, chí jícu yó nájnūhun cúní maá Espiritu.

<sup>5</sup> Chí ñayuu jéē cájica jíni modo neé máá, chí máni ndíhví ní i siquí jéē cuní maá i. Te ñayuu jéē cájica nájnūhun cúní Espiritu, chí máni ndíhví ní i siquí jniñu cúní maá Espiritu. <sup>6</sup> Te jéē ndíhví ní yó siquí modo cuní maá yó sāha jéē jnahnú ndetū yó. Te jéē ndíhví ní yó siquí jniñu cúní maá Espiritu, sa suhva sāha jéē cotecu yó níí cáni te coo ndeyí

coo sñ ní yó. <sup>7</sup> Chí ñayuu jéē ndíhví ní siquí modo neé cúní maá i, chí jíto uhū i Yaā Dios, chí tu cúní i cuatáhú i ley Yaā Dios, te ní ma cúu squícu i. <sup>8</sup> Jéē yúcuan, ñayuu jícu jíni modo cuní maá, tu cúu sāha i jéē cúsñ ní Yaā Dios jíni i.

<sup>9</sup> Te máá ró jíni náhan ró, chí tuá cájica ró jíni modo cuní maá ró, chí cájica ró nájnūhun cúní Espiritu, chí ndeé Espiritu Yaā Dios iní anuá rō. Te ñayuu jéē tu ndeé Espiritu Cristo iní i, tu cáyihí i ndaha ya. <sup>10</sup> Te núu ndeé Cristo iní rō, te vésú ñin quívi te cuu yíqui cúñu rō jéē siquí cuēchi, te cotecu anuá rō siquí jéē ní ndahva Yaā Dios cuēchi rō. <sup>11</sup> Te núu iní rō jíni náhan ró ndeé Espiritu maá Yaā jéē ní nastécu Cristo Jesús méñhu ndíyi, yúcuan na te máá yá suni sāha ya jéē natecu yíqui cúñu rō jéē cúu. Te sāha ya súcuan jéē jíni maá Espiritu yá jéē ndeé iní rō.

<sup>12</sup> Núu súcuan, hermano jíni náhan ró, ndeé jniñu yó jéē caca ndaá yó, te nasūu jéē sāha yó modo neé cúní maá yó. <sup>13</sup> Chí núu caca ró jíni modo neé máá ró, te jnahnú ndetū rō. Te núu jíni fuerza maá Espiritu snáa rō táca jniñu casáha ró jíni modo neé máá ró, te cotecu rō níí cáni.

<sup>14</sup> Chí táca ñayuu jéē cándiquín modo jéē steén Espiritu Yaā Dios, máá i cácuu sēhe Yaā Dios. <sup>15</sup> Chí Espiritu jéē ní canihín rō, tu ní sāha ya rohó jéē cuu ró nájnūhun mozo nuú yá jéē yūhú tucu ró núu yá, chí sa ní sāha ya jéē cúu yó sēhe ya. Te jéē yúcuan cúu jéē cahán jee yó: Tátá maá ná. <sup>16</sup> Te máá Espiritu steén yá iní anuá yó jéē cúu ndije yó sēhe Yaā Dios. <sup>17</sup> Te núu sēhe ya cácuu yó, te suni nihín yó maá táhú jéē ní jéjñūhun ya, te ñin cáhnu-ní coo tahū yó jíni Cristo. Chí núu ndóho yó jíni yá vijna, suni cujéñhu yó jíni yá andiví.

<sup>18</sup> Núu súcuan te sāha ri cuenta jéē táca jnúndōho jéē ndóho yó vijna, lúli ndasí cúu nuú jnúhun jéē cujéñhu luu yó jíni yá cucuée gá. <sup>19</sup> Chí ndihí jéē ní jécōo, yóho cándetu jéē na sāha Yaā Dios jéē nduvāha, quívi quénda ndijin jéē cujéñhu sēhe Yaā Dios jíni náhan i. <sup>20</sup> Chí táca jéē ní jécōo, chí ní quívi chíji jnúhun jéē tu quéndō vāha. Te nasūu jéē ní castívi máá, chí ñayuu ní casáha cuēchi, te jéē yúcuan ní squéndō Yaā Dios súcuan. Te máni cándetu jéē ndúvāha. <sup>21</sup> Chí ñin quívi te táca jéē ní jécōo, chí quenda chíji jnúhun jéē tvi jíni jéē tehyú. Te nduluu ndasí nájnūhun coo táca sēhe Yaā Dios, chí cácu nuú jnúhun jéē tu quéndō vāha. <sup>22</sup> Chí jíni yó jéē táca jéē ní jécōo, chí nde vijna te nájnūhun inuú-ní cándoho te cájitū ní jéē na ndúvāha ndihí. <sup>23</sup> Te nasūu máá-ní táca jéē ní jécōo cúu jéē ndóho, chí suni nde maá yó ndóho yó, vésú je névāha yó Espiritu jéē cúu seña jéē ñin quívi te nihín yó ndihí tahū yó. Chí yóho ndóho yó jnúndōho, te ndetū yó jéē náquihin sēhe ya yohó te jnama ya yíqui cúñu yó jéē tuá ndoho yó jíni. <sup>24</sup> Chí ní jnama ya yohó siquí

jeē ñũhun ni yō jeē súcuan coo. Te núu je ni sáha ya nájnũhun ñũhun ni yō, yũcuán na te tuá ñũhun ni yō jeē sáha ya súcuan jíin yō. Chi tuá ndétu yō te núu je ni cuu súcuan. <sup>25</sup> Te núu ná tu coto yō jéē sáha ya jeē ñũhun ni yō, yũcuán na te jíin paciencia ndétu yō jéē sáha ya.

<sup>26</sup> Te suni súcuan máá Espíritu chándéé ñáhán yá yohó jéē tú na fuerza ini yō. Chi tu jíin yō cacán tahú yō nájnũhun cánuú. Te máá Espíritu cahán ndahú yá jíin Yaā Dios jehē yō siquĩ táca jéē jítu ndasí ni yō te tu níhín yō ñũhun ndese cacán tahú yō. <sup>27</sup> Te máá Yaā Dios jeē jito ndee anuá yō, chí jíin yá táca jéē cuní máá Espíritu cahán yá jehē yō. Chí ñayuu cáyihí ndaha Yaā Dios, cahán ndahú Espíritu jehē i nájnũhun cúní Yaā Dios.

*Váha-ni cúndeyí yó siquĩ ndihí jeneé*

<sup>28</sup> Te jíin yō jeē táca-ni jeē quíji nuú ñayuu maní jíin Yaā Dios, jeē váha chí jéē uhú, chí quéndoo váha ga i nuú yá, sáha ya jíin táca jéē yúcuan. Chí cácuu i ñayuu jeē ní cana ya i ní quívicoo i ndaha ya siquĩ jeē súcuan ni tee ní yá nde jenahán. <sup>29</sup> Chí nde ná tu coo i te je jíin yá i, te je ní jeni ya i jeē ndoo ndaa nduu ánuá i ndacu i máá Séhe ya, návaha na cúu Séhe ya ñani jéhu nuú cuehē ñayuu cácuu ñani cácadíje. <sup>30</sup> Te jeē ní jeni ya i, te suni ní cana ya i. Te jeē ní cana ya i, te suni ní ndahva yá cuéchi i. Te jeē ní ndahva yá cuéchi i, te suni ní sáha ya jeē cujéhu i.

<sup>31</sup> ¿Te ndese ga cahán yō siquĩ ñũhun jéhu yáha núu súcuan? Chí núu íne Yaā Dios jíin yó, ¿te ndé ñin cuu cahán siquĩ yō? Tú ní ñin. <sup>32</sup> Chí máá yá tu ní jnáma ya Séhe ya jeē ma cúu yá, chí sa suhva ni jéhe ya Séhe ya ní jíihí yá jehē ndihí yō. Te núu súcuan ni jéhe ya Séhe ya, te nagā ni cuu jeē ma cuáha ya táca gá jeē jíin ñũhun yó. <sup>33</sup> ¿Te ndé ñin cuu cahán cuéchi siquĩ ñayuu jeē ní nacáji Yaā Dios? Tú ní ñin. Chí máá yá ní ndahva ya cuéchi i. <sup>34</sup> ¿Te ndé ñin cuu ndenehen cuéchi siquĩ yō núu súcuan? Tú ní ñin. Chí máá Cristo cúu jeē ní jíihí yá jehē yō, te suni ní natecu ya. Te vijna te ndéé yá lado váha Yaā Dios nuú cujéhu ya, te cahán ndahú yá jíin Yaā Dios jehē yō. <sup>35</sup> ¿Te ndé ñin cuu quenehen yohó núu ñũhun cundáhú ní Cristo yohó? ¿A jnúndoho, chí táca jéé yíi sáha, chí jéé cájito xeēn ñayuu yohó, chí jnáma, chí jéé cúmani sahma, chí jnúhun yúhú, chí jéé cáhni i yohó naún? Ni ñin táca jéé yáha. <sup>36</sup> Chí súcuan yósó núu tútu ñi jeē cácahán ñayuu cácadíje jíin Yaā Dios:

Jeē siquĩ máá ní te ndihí-ni hora cácuni i cahni i saña.

Te cásaha i jíin ná nájnũhun cásaha i jíin lanchi, quiti cúu.

Achí tutu. <sup>37</sup> Te tuú chí vésú cándoho yó táca jéé yáha, te váha-ni cúndeyí yó siquĩ ndihí-ni, sáha máá Yaā jeē ní cundáhú ni

yohó. <sup>38</sup> Jeē yúcuan cúcáhu ni rí jeē tú ní ñin cuu quenehen yohó núu jnúhun cundáhú ni Yaā Dios yohó. Ni núu cuu yō, ni núu cotecu yō, ni táca ndajéhé andiví, ni táca jéé neé jéé cácujehu jnái poder, ni jeē iyó vijna, ni jeē cóo, <sup>39</sup> ni jeē iyó núu súcun, ni jeē iyó núu cúnú, ni táca gá jeē ní jecóo, ma cúu cuiti quenehen yohó núu Yaā Dios, jeē jíin Jitoho yō Cristo Jesús ni cundáhú ni yá yohó.

*Siquĩ ndese ni nacáji ya yucún Israel*

**9**

<sup>1</sup> Te cahán ndaa rí chí cúu rí tēe cándíje Cristo, te tu stáhú rí, te jíin rí ini anuá rí jeē cahán ndaa rí sáha Espíritu Santo. <sup>2</sup> Yóhoyo cúcuíhyá ni rí, te níin jnáhuhú ni anuá rí <sup>3</sup> jeē siquĩ táca jnáhan rí ñayuu nación hebreo, chí ñin-ni yucún rí jíinánhan rí. Chí jeē siquĩ máá i te cúu ni rí jeē núu na cúu te cujiyo rí nuú Cristo te jnahnú ndetú rí, návaha jíin yúcuan te cuu cácu ánuá máá i núu. <sup>4</sup> Chí cácuu i yucún ñayuu Israel, te nde jenahán ni sáha Yaā Dios jeē cúu i séhe ya, te méhũ vicó jeē ndíndéé ní condee yá jíin i sáa. Te jíin máá i ní sáha ya táca contrato, te ní jéhe ya ley yá nuú Moisés jeē cúu máá i, te ní steén yá ndese chíñuhún i ya ini templo, te nuú máá i ní jejnũhun ya cuehē jnúhun. <sup>5</sup> Te máá i cácuu yucún táca jíi yō jeē ní cacujéhu, te suni yucún máá i ní cacu Cristo jeē ní nduu ya tēe. Te máá yá cúu Yaā Dios jeē jnái ndihí-ni, te níi cáni cahán ñayuu jeē cujéhu ya. Amén.

<sup>6</sup> Te nasũu jéé tu ní quée ndaa táca jnúhun jeē ní jéjnũhun Yaā Dios nuú ñayuu Israel. Chí ní quee ndaa nahín núu vésú jecu-ni i, chí tú ndihí-ni yucún Israel cúu jeē cácadíje. <sup>7</sup> Chí nasũu ndihí yucún Abraham cácuu ndíje séhe de jeē ní jéjnũhun ya. Chí ní cahán Yaā Dios jíin de: Nuú maá-ni séhe ró Isaac cúu nuú coo yucún ró jeē ní jéjnũhun rí nuú ró. <sup>8</sup> Te jnúhun yáha cúní cahán jeē ní ñin ñayuu tu cúu i séhe Yaā Dios siquĩ jeē ní cacu i ñin yucún jeē jéni ni i jeē váha ga cúu. Chí sa suhva máni yucún jeē ní jéjnũhun ya cúu ndíje yucún jeē chíhí ya cuenta. <sup>9</sup> Chí yáha cúu jnúhun jeē ní jéjnũhun ya nuú Abraham: Máá tiempo jeē ní jeni rí te quíji rí, te cacu ñin séhe yíi ñasíhí ró Sara, achí yá.

<sup>10</sup> Te nasũu máá yáha-ni, chí suni Rebeca ní cacu uú séhe yíi ña, te ñin-ni tátá ndíndúú i, jeē ní cuu jíi yō Isaac. <sup>11-13</sup> Te nde ná tu cacu ndíndúú i, te ná tu sáha i jeē váha jéé uhú, te je ní cahán yá jíin Rebeca: Sũchi ní cacu xíhna gá cuajníñu i nuú sũchi sándíhí, achí yá. Chí suni súcuan cahán tutu ñi: Ni jito maní rí Jacob, te Esaú chí tuú, achí Yaā Dios. Te súcuan jíin yō jeē máá Yaā Dios cuu nacáji ya ñayuu núu ndese tēe ní máá yá, te nasũu siquĩ jníñu jeē sáha i, chí sa suhva siquĩ ndese cúní máá yá nacáji ya i.

<sup>14</sup> ¿Ndese cahān yō núu súcuan? ¿A jéé tu íyó ndāā Yāā Dios jeē sāha ya súcuan, chí naún? Tú cuiti. <sup>15</sup> Chi nde jenahán ní cahān yā jíín Moisés: Ndé-ni cúu jeē cuní rī cundáhú ní rī, te cundáhú ní rī. Te ndé-ni cúu jeē cuní rī sāha rī jeē vāha jíín, te sāha rī jíín, áchí yā. <sup>16</sup> Núu súcuan te nasūu síquī jeē cuní maá ñáyyu, ní nasūu jeē nducú ndéyí maá i cúu, chí síquī ndese cuní maá yā cundáhú ní yā i. <sup>17</sup> Chi suni súcuan yósó núu tútu íi jeē ní cahān yā jíín rey ñuu Egipto: Ní jeni rī rohó jéé cúu ró rey, návāha jíín rohó te stéén rī poder rī, te návāha cuité núu síhví rí ní ñáyíwí, áchí yā. <sup>18</sup> Núu súcuan te núu ndé íin cuní yā cundáhú ní yā, te cundáhú ní yā. Te núu ndé íin cuní yā jeē cuníhni ní, te sāha ya jeé cuníhni ní.

<sup>19</sup> Te sanaa te cahān íin ró jíín rí: Núu súcuan cúu ¿te najehē cahán gā yā jeē cuēchi sāha yó? Chí ma cúu casi yō nuú yā jeē ndese cuní maá yā sāha ya. Achí rō. <sup>20</sup> Te sa suhva cáhán rī jíín ró: Róhó, ¿ndé íin cúu ró jéé jení ní rō stió cuíñí rō nuú Yāā Dios? ¿A cuu cahān quísi ñuhun jíín téé ní sāha: Najehē ní sāha ró rúhú súcuan? achí. <sup>21</sup> Chi tēe sāha quísi, cuu sāha de ndese cuní maá de, chí íin-ni ñuhun cuu sāha de íin quísi fino te inga quísi corriente.

<sup>22</sup> ¿Te á tu jétáhú ró jeē suni súcuan sāha Yāā Dios jíín ñáyyu? Chí cuní yā steén yā ndese sāha ya juicio síquī ñáyyu, te súcuan te cuní i poder yā. Te vēsú súcuan te ní íyo paciencia ní yā jeé tu ní ndóna yachí yā síquī ñáyyu jeē ñahnú ndetú. <sup>23</sup> Te sāha ya súcuan návāha stéén yā ndese yóhoyó luu cújéhu ya síquī jniñu sāha ya jíín yóhó ñáyyu cundáhú ní yā. Chí nde jenahán je ní sátúhva ya yohó jéé luu cújéhu yó jíín yā. <sup>24</sup> Chí ní cana ya yohó jéé candíje yó, te sava yó cúu ñáyyu hebreo te sava yó cúu ñáyyu táca gá nación. <sup>25</sup> Chi suni súcuan ní cahān yā, yósó núu tútu Oseas:

Ñáyyu jeé tu ní cúu ñáyyu maá rí, vijna te cahān rī jeé cácuu i ñáyyu maá rí.

Te ñáyyu jeé tu ní íyo maní rī jíín, vijna te cahān rī jeé cácuu i ñáyyu jeé maní rī jíín.

<sup>26</sup> Te maá lugar nuú ní cahān rī jeé násūu ñáyyu rī cácuu i, suu yúcuan cáhán ñáyyu jeé cácuu i sēhe Yāā Dios, Yāā técu ní cáni.

Achí yā. <sup>27</sup> Te Isaías sa suhva ní cahān de jñuhun ñáyyu Israel: Vēsú ní cayá yucūn Israel nájñuhun ñiti yumar, te jecu-ni i jnama ya. <sup>28</sup> Chí Jitoho yō Yāā Dios, yachí sínu ya jniñu jeé sándaā yā cuēchi ñáyyu ñáyíwí. Achí tutu. <sup>29</sup> Chí nájñuhun ní cahān tucu Isaías:

Maá Yāā cúu Jitoho nuú táca ndajéhé andiví, núu tu ní jnama ya jecu yucūn yō nuú, te je ní ndoho yó nájñuhun ñáyyu ñuu Sodoma jíín ñuu Gomorra, jeé ní naa ndíhi.

Achí tutu.

*Jeé tu cájetáhú ñáyyu hebreo jñuhun jnama ya i*

<sup>30</sup> ¿Ndese cahān yō núu súcuan? Suu jeé ñáyyu táca gá nación, vēsú tu ní cánducú i quendōo ndāā i nuú Yāā Dios, te ní ndahva yā cuēchi i. Chí síquī jeé ní candíje i jeé ní jíín Cristo jehé i cúu jeé ní ndahva yā cuēchi i. <sup>31</sup> Te sa suhva ñáyyu Israel, vēsú cánducú i quendōo ndāā i nuú Yāā Dios sāha ley yā, te tu cundeyí i quendōo ndāā i. <sup>32</sup> ¿Te najehē? Síquī jeé tu cánducú i jeé ndahva yā cuēchi i jeé candíje i jeé ní jíín Cristo jehé i, chí sa jení ní i jeé squícu maá i ley te quendōo ndāā i. Te jeé stívi i súcuan cúu nájñuhun cácotúú i síquī maá yūú jeé cácachihí jehé, te suu cúu Cristo. <sup>33</sup> Chí súcuan cáhán nuú tútu íi:

Nde ñuu rī Sion sāha rī jeé cóne maá Yāā jeé cúu nájñuhun yūú jeé cácachihí i jehé i.

Te cúu ya nájñuhun toto jeé cotúú i sāha.

Te sa suhva ñáyyu cándíje Yāā ún, chí jnama nahín yā i.

Achí Yāā Dios.

## 10

<sup>1</sup> Hermano jijnáhan ró, cúu ndasí ní rī te jíicán tahú rī nuú Yāā Dios jehé ñáyyu nación rī Israel, jeé na jnama ya i jíijnáhan i. <sup>2</sup> Chí cáhán rī jeé vāha cásáha i jeé ndíhví ní i cáchíñúhún i Yāā Dios. Te vēsú súcuan te cáchíñúhún cáhá i. <sup>3</sup> Chí tu cájecūhun ní i ndese ndáhva Yāā Dios cuēchi ñáyyu, te ndúcu i quendōo ndāā i maá-ni jeé squícu i ley. Te tu cájetáhú i maá modo jeé ndáhva Yāā Dios cuēchi i. <sup>4</sup> Chí síquī jeé ní sāha Cristo te cuu quenda ñáyyu chíji ley Moisés. Te ndáhva Yāā Dios cuēchi táca ñáyyu jeé candíje i jeé ní sāha Cristo jehé i.

<sup>5</sup> Chí súcuan ní tee Moisés jñuhun ñáyyu jeé cánducú quendōo ndāā jíín ley: Núu íin ñáyyu cuu squícu i táca jniñu ndácu ley, te cotecu i núú, áchí. <sup>6</sup> Te jñuhun jeé ndáhva Yāā Dios cuēchi ñáyyu síquī jeé candíje i jeé sāha ya jehé i, chí sa suhva cáhán: Ma cáni ní rō jeé jíni ñúhún caa ró andiví nasnúu ró Cristo jeé ndahva yā cuēchi ró. <sup>7</sup> Ní ma cáni ní rō jeé jíni ñúhún cuun ró ndé nuú cúnú ndonehen ró Cristo mēhñu ndíyí, nájñuhun jeé tu ní nátecu yā. <sup>8</sup> ¿Te ndese cáhán jñuhun un núu súcuan? Yajni íyó jñuhun ya jíín ró, chí ñúhún íni yuhu ró jíín íni anuá ró, achí tutu. Te suu cúu jñuhun jeé na candíje yó jéé jéé jnama ya yohó. Te jñuhun yáha cúu jeé cánacani rí. <sup>9</sup> Chí núu cahān ró jeé Jitoho ró cúu Jesús, te núu candíje ró jíín íni jíín ánuá ró jeé ní nátecu yā mēhñu ndíyí ní sāha Yāā Dios, yúcuan na te jnama ya rohó. <sup>10</sup> Chí jíín íni jíín ánuá yō candíje yó jéé ní jíín yā jehé yó, te súcuan te ndáhva Yāā Dios cuēchi yó. Te jeé cahān yō jeé Jitoho yó cúu Jesucristo, te súcuan te jnama ya yohó.

<sup>11</sup> Chi cáhán tutu i: Táca ñáyyu jeē candíje i ya, chi jnama nahín yá i, áchí. <sup>12</sup> Chi inuú-ni cúu ñáyyu hebreo jíin táca gá ñáyyu, chi máá yá cúu Jitoho nuú ndihí yó, te cuehē jeē váha sáha ya jíin ñáyyu cácahán ndahú jíin yá. <sup>13</sup> Chi súcuan cáhán jnūhun ya: Ndihi ñáyyu cácahán ndahú jíin máá Jitoho yó, chi jnama ya i, áchí. <sup>14</sup> ¿Te ndese cahán ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jnūhun ya? ¿Te ndese cuni sōho i te núu tú na ñáyyu nacani jnūhun nuú i? <sup>15</sup> ¿Te ndese nacani ñáyyu jnūhun ya te núu jeē tu táji yá i quihín i? Chi nájnūhun cáhán tutu i: Yōhoyó luu jniñu cásaáha ñáyyu cájica jíin jnūhun ndeyí sñ ní jeē cáncani i jnūhun váha ya, áchí.

<sup>16</sup> Te nasūú ndihí i jétáhu nuú jnūhun jnama ya i. Chi ní cahán Isaías nde jenahán: Tátá Yáa Dios, ¿ndé ñáyyu ní candíje jnūhun jeē cáncani ná ví? áchí de. <sup>17</sup> Núu súcuan te núu cuni nahín ñáyyu te cuu candíje i. Te jnūhun cuni nahín i cúu jnūhun Cristo.

<sup>18</sup> Te cájnūhun rí: ¿A tu ní cájini sōho i jnūhun un núu súcuan? Tuú chi ní cajini sōho i, chi cáhán tutu i:

Ñí ñáyivi ní cajini sōho ñáyyu jnūhun jeē ní canacani de.

Te nde nuú jicá gá táca lado ní jinú jnūhun ún.

Achí tutu. <sup>19</sup> Te suni cájnūhun rí: ¿A tu ní cájécūhun ní ñáyyu Israel jnūhun ún? Tuú chi ní cájécūhun ní i, te tu ní cájjetáhu i. Chi xihna gá Moisés ní cachi de jeē ní cahán Yáa Dios: Cucuíñí ró jijnáhan ró, chi cuáha ri jnūhun ri nuú inga ñáyyu jeē násūú iin nacióon cúu.

Te quiví ní rō coto ró jeē cuáha ri jnūhun ri nuú iin nacióon jeē tu jécūhun ní.

<sup>20</sup> Te suni Isaías ní chundeyí ní de ní cachi cáji de jeē ní cahán Yáa Dios:

Ñáyyu jeē tu ní cáncanducú rúhū, ní cajini i ruhū.

Te nuú ñáyyu jeē tu ní cácajnūhún, ní steén ri nuú i ndese Yáa cúu ri.

<sup>21</sup> Te siquí ñáyyu Israel sa ní cahán de jeē ní cáhán yá: Ndiquíví ní cana ri i jeē quívicoo i nuú rí, te tu ní cácuni i, chi ñáyyu niñi ní, ñáyyu jéé ní cácuu i. Achí yá, achí Isaías.

*Jeé iyó jecu na ñáyyu Israel jeé jnama ya*

## 11

<sup>1</sup> Núu súcuan te cájnūhun rí: ¿A ní stóo Yáa Dios ñáyyu maá yá Israel, chí naún? Tú cuiti. Chi ruhū suni tēe Israel cúu ri, te yucūn Abraham cúu ri, te Benjamín cúu jíi rí jenahán. <sup>2</sup> Tu ní stóo Yáa Dios ñáyyu maá yá, chí je ní nacáji ya i nde jenahán. ¿A tu cájini rō ndese cáhán tutu i jnūhun Elías, tēe ní nacani jnūhun ya jenahán? Chi náa jicán tahú de, te ní cahán de siquí ñáyyu Israel: <sup>3</sup> Tátá Yáa Dios, ní cajehni i táca tēe cáncani

jnūhun ní, te ní cajenu i táca altar ní. Te máñúhún na sáña ní quendóo, te vijna suni cácuni i cahni i sáña, áchí de. <sup>4</sup> Te Yáa Dios ní nastió cuíñí yá: Iyó nahín úxá mil ñáyyu cácaandíje ruhú jeē tu ní cájecuñí yití i nuú ídolo náni Baal, achí yá. <sup>5</sup> Te suni súcuan vijna, chí iyó jecu na ñáyyu jeē ní nacáji ya siquí jeē váha ní yá jíin i. <sup>6</sup> Te núu ní nacáji ya i siquí jeē váha ní yá jíin i, te nasūu siquí jeē ní sáha i jniñu váha cúu. Chi núu siquí jeē ní sáha i jniñu váha cúu, yūcuán na te nasūu siquí jeē váha ní yá cúu.

<sup>7</sup> ¿Te ndese cúu núu súcuan? Cúu jeē ñáyyu Israel tu ní cundeyí i quendóo ndaá i nájnūhun ní canducú i. Te sava i jeē ní nacáji ya, chí máá i ní ndahva yá cuéchi i. Te sava ga i ní ndunihni ní i, <sup>8</sup> nájnūhun cáhán tutu i: Ní sáha Yáa Dios jeē tu jécūhun cuiti ní i siquí yá, ní tu jíni i jíin tñúú i, ní tu jíni nahín i jnūhun ya, te súcuan cúu nde vijna. Achí tutu. <sup>9</sup> Te suni ní cahán David:

Vico jeē casáha i, na cóo nájnūhun iin trampa chí iin xeyū, náváha nihín i castigo xeén siquí jeē castívi i casáha i cuéchi.

<sup>10</sup> Te ánuá i na ndúnee, nájnūhun jeé tuá cúu coto i,

te na jécostáhi jnūndóho siquí i ní cáni. Achí tutu.

### *Siquí jeé jnama ya ñáyyu táca gá nacióon*

<sup>11</sup> Núu súcuan te cájnūhun rí: ¿A tuá cúu cuiti ndívi ñáyyu Israel nuú Yáa Dios jeé súcuan ní castívi i? Tú cuiti. Chi sa suhva jeé ní cacunihni ní i, te sa ñáyyu táca gá nacióon ní canihín tahú máá i jnūhun jeé jnama ya i. Te yūcuan sáha tucu jeé ñáyyu Israel condihví ní i jeé suni candíje máá i. <sup>12</sup> Chi jeé ní castívi i, te sa ñáyyu ní cáhnu ñáyivi ní canihín máá i jnūhun ya. Te jeé ní cajica yátá i, suu ní sáha jeé ní canihín ñáyyu táca nacióon jnūhun ya. Núu súcuan te quíví jeé ndívicoo tucu ndihí ñáyyu Israel ndaha ya, te ñáyyu ñáyivi víhyá gá quendóo ndetú i sáha ún.

<sup>13</sup> Te vijna te cáhán rí jíin róho ñáyyu táca nacióon jeé tu ní jíni jnūhun ya. Chí ní táji Yáa Dios ruhú jeé scáca ri jnūhun nuú rohó ñáyyu táca nacióon. Te ndúcú rí jeé na cuájñúhún ró jijnáhan ró jniñu sáha ri jeé nácani ri jnūhun ya. <sup>14</sup> Chi cúní rí jeé jíin yúcuán te nacani ní sava jnáhan ri ñáyyu Israel jeé suni candíje máá i, te jnama ya i. <sup>15</sup> Chi jeé ní stóo ya ñáyyu Israel, jeé yúcuán cúu jeé sa ñáyyu ñáyivi ní sáha ya jeé ndívicoo i nuú jnūhun maní yá jíin i. Núu súcuan te quíví naquihín tucu ya ñáyyu Israel, quíví ún suni váha ndasí sáha ya jíin ñáyyu ní cáhnu ñáyivi. Chi coo nájnūhun jeé natecu i jeé cúu i nájnūhun ndíyi. <sup>16</sup> Te ñáyyu Israel cáscó i nuú Yáa Dios pan jeé quéndá xihna gá nuú ñujen, te súcuan steén i jeé ndihí un cúu cuenta yá. Te iin yujnu, núu yihí jeé

cuenta yā cúu, te suu cúu nde yoho jíin ndé ndihi ndaha. Te suni súcuan ñayuu Israel, yñhi cuenta i nuū yā, siquī jeē jíi i xihna ñũhũn, ni quivicoo de ndaha ya.

<sup>17</sup> Chi ñayuu Israel cácuu i nájñuhun ndayújnu olivo váha, te sava ndaha un ní quendē. Te rōhó ñáyuu táca nación jeē tu jíin jñuhun ya, cácuu ró nájñuhun ndayújnu olivo yucú, te ni nachuhun ya rohó núu ni quendē ñayuu cácuu ndayújnu váha ún. Te nájñuhun inuú-ni cástaa ró ndúxi jíin cajin jeē véji nde yoho yújnu ún. <sup>18</sup> Núu súcuan te ma sáha téyi ró maá ró nuū ñáyuu Israel jeē cácuu nájñuhun ndayújnu jeē ní quendē. Ma cutéyi ró, chi nucūhun ni rō jeē násúu jéé yohó stáa cajin nuū maá ró, chi sa maá ró stáa cajin jeē véji nde yoho.

<sup>19</sup> Te sanaa te cahān rō: Tú chi sava ndaha ni quendē návāha nachuhun ya ruhū nuū ni quendē ún, achi rō. <sup>20</sup> Ndaā, te ni quendē i siquī jeē tu ní cácandje i Cristo. Te rōhó chi máni siquī jeē cácandje ró, jeē yúcuu cúu jeē ni quivicoo ró lugar i. Te ma sándúxi ró maá ró núu súcuan, chí sa suhva conso iyo ró núu Yaa Dios. <sup>21</sup> Chi tu ní íne cáhnu ni yā nuū maá ndaha jeē chíñiñu, te suni súcuan ma cóne cáhnu ni yā nuū ró jíinánhan ró te núu stívi ró. <sup>22</sup> Núu súcuan te sáha váha ro cuenta ndese váha ni Yaa Dios jíin ndese xeēn ni yā. Chi ni nduxeēn ni yā jíin ñayuu hebreo jeē ní castívi ún, te sa cundáhu ni yā rohó. Te cánuú cuiñi nihin ro jíin jñuhun jeē váha ni yā jíin ró. Chi núu tuú, te suni quende yā rohó. <sup>23</sup> Te maá i, núu candíje tucu i, te nucōndee tucu i, chí maá Yaa Dios cuu nachuhun tucu ya i. <sup>24</sup> Núu súcuan te rōhó ñáyuu táca nación jeē tu ní jíin jñuhun ya, ní quendē rō xiní yújnu olivo yucú, te ni nachuhun ya rohó xiní yujnu olivo váha, vésú nasúu ndaha maá yujnu un cácuu ró. Te nagā ni cuu ñayuu hebreo jeē ma náchuhun ya i nuū ní quendē i, chí cácuu i maá ndayújnu váha ún.

*ñin quivī te jnama ya ndihi ñayuu nación Israel*

<sup>25</sup> Hermano, cúni rī jeē na jécūhun ni rō jíinánhan ró ndese iyó jñuhun yáha jéé ní yisáhi, návāha ma cutéyi ró caní ni rō jeē ndichí xiní maá ró: Chi sava ñayuu Israel ni ndunihni ni i, te súcuan coo maá-ni nde quivī jínu candíje ñayuu táca nación jeē tu jíin jñuhun ya. <sup>26</sup> Te sáa te jnama ya ndihi ñayuu nación Israel, chí cáhán tutu íi:

Ichi ñuu rī Sión quiji Yaa jnama ñayuu, te sáha ya jeē tuá coo cuēchi nuū táca yúcuñ Jacob.

<sup>27</sup> Te yáha cúu contrato jeē sándaā rī jíin i, quivī jeē quénde ri cuēchi i jíinánhan i, áchi Yaa Dios.

Achí tutu.

<sup>28</sup> Chi ñayuu hebreo un ní nduu i nájñuhun enemigo Yaa Dios siquī jeē tu ní cácandje i

jñuhun jnama ya i. Te jeē yúcuu te cuu cuiñé núu jñuhun un núu táca rōhó. Te vésú súcuan te siquī jeē ní nacāji ya táca jíi i jenahán, te cundáhu gá ni yā i jeē ma stóo ya i ní cáni. <sup>29</sup> Chi tu nácani yátá ni yā jeē cána ya ñayuu jíin jéé jéhe ya tahū i. <sup>30</sup> Te rōhó jíinánhan ró, suni ní cahíyo nihni ni rō nuū Yaa Dios nde saá. Te vijna jeē ní cacunihni ni maá ñayuu hebreo, te cundáhu ni yā rohó. <sup>31</sup> Te suni súcuan maá i, chí vésú cácuñihni ni i vijna, te cundáhu tucu ni yā i, nájñuhun cundáhu ni yā maá ró jíinánhan ró. <sup>32</sup> Chi Yaa Dios ni sáha ya jeē ní quendōo ndivii ñayuu chíji jñuhun cunihni ni i, návāha suni cuu cundáhu ni yā ndivii i.

<sup>33</sup> Núu súcuan te náhán náa ni yō jeē yóhyo cuehē jñuhun ndichí iyó jíin Yaa Dios, te ndihi cuiñi jíin yā. Te ni ma cúu cuiñi castúhun yó ndese téé ni yā sáha ya táca-ni, te ma cánda cuiñi yó jecūhun ni yó ndese cúu táca jéé sáha máa yá. <sup>34</sup> Chi cáhán tutu íi: ¿Ndé ñin ni jecūhun ni ndese jéni ni maá Jitoho yó? ¿Chí ndé ñin ni steén nuū yā? <sup>35</sup> ¿Ndé ñin ni jéhe xihna gā nuū maá yá, návāha nachunaa yā nuū i? <sup>36</sup> Chi nde nuū maá yá véji táca jéé iyó, te maá yá ni sáha ndihi, te jeē cúu maá yá cúu. Te na cáhán yō jeē yóhyo luu cújéhnu Yaa Dios ní cáni. Amén.

*Jeē na cóo ndoo ánuá yō cuajniñu yó núu Yaa Dios*

## 12

<sup>1</sup> Núu súcuan te cáhán ndahú rí jíin ró jíinánhan ró, hermano, jeē siquī jeē cundáhu ni Yaa Dios yohó. Na sóco ró maá ró nuū yā, coo ndoo coo íi ró cuajniñu ró nuū yā, nájñuhun cúsiñ ni yā. Chí yáha cúu jeé chíñiñuhó ró yā nde jíin íni jíin ánuá ró. <sup>2</sup> Te ma cáca ró jíin táca modo casáha ñayuu ñayvī yáha, chí sa na sáma ró modo caní ni rō, te ndujeé jéé níjñni rō. Te súcuan te cuu nacāji ró ndé-ni cúu jeé váha jeē nujnahan ni Yaa Dios, jeé cúsiñ ni yā, jíin jéé íje ni rō jíin jñuhun ya.

<sup>3</sup> Te siquī jeē váha ni yā ni jéhe ya jniñu nácani rí jñuhun ya, jeē yúcuu cáhán rí jíin ndihi ró jéé ma cáni ni rō jeé váha ga ñayuu cúu ró núu cūhva jeé iyó ró. Chí ná ñin ná ñin ró na cáni ndaā ni rō siquī maá ró, te ma scáa ga ró caní ni rō jeé váha ga ñayuu cúu ró vésú nuū cūhva jeé ní jéhe Yaa Dios fuerza íni ró candíje ró. <sup>4</sup> Chí cácuu yó nájñuhun ñin yiqui cúñu jeé iyó cuéhe parte, te sáñ sáñ jéñiñu ñin ñin. <sup>5</sup> Chí vésú iyó cuéhe yó, te nájñuhun ñin-ni yiqui cúñu cúu yó jéé yñhi yó ndaha Cristo, chí ñin-ni ni nduu yó jíinánhan yó.

<sup>6</sup> Te sáñ sáñ tahū ni jéhe Yaa Dios nuū yó jeé cuajniñu yó núu yā, núu ndese ni nujnahan ni yā ni jéhe ya nuū ñin ñin yó. Núu súcuan te na cuajniñu váha yó jíin táhū ún. Núu ni nihin yó tahū jeé nácani yó jñuhun ya, te cánuú sáha yó ndé maá cūhva ni jéhe ya cándje yó. <sup>7</sup> Te núu ni nihin yó



tahū jeē chindéé ñáhan yó jnahan yó, te na sáha yúcún yó. Te núu ni nihñ yó tahū jeē steén yó, te na cóndihvī ni yó steén yó. <sup>8</sup> Te ñayuu jeē stihvī ni inga ñayuu, suni na sáha yúcún i. Te ñayuu jéhe nuū jnahan, na cuáha i stícuan-ni. Te ñayuu ndiso jniñu, na ndácu vāha i jniñu. Te ñayuu jito ndáhū ñayuu ndahú, na cúsi ni i sáha i.

*Ndese cánuú squícu ñayuu cácanđije*

<sup>9</sup> Te na cundáhú ndije ni rō jnahan rō, nasūu máa jéē cahán-ni rō. Te coto uhū rō jniñu néé, te condiquīn rō jniñu vāha. <sup>10</sup> Te cánuú coo manī rō jín jnahan rō nájñuhun jéē manī rō jín ñani rō. Te nducú rō jeē quéndōo yíñuhún gá jnahan rō vēsú maá rō.

<sup>11</sup> Te ma cucúxí rō jín jniñu cásaha rō. Chi jín ini jín ánuá rō condihvī ni rō cuajniñu rō nuū máa Jítoho yó.

<sup>12</sup> Te na cúsi ni rō jeē cáñuhun ni rō táca jéē vāha jeē cóo. Te na cuándeýi ni rō núu ndóho rō jñndóho. Te níni na cácan tahú rō.

<sup>13</sup> Te coto ndáhú rō ñayuu cácanđije núu cúmani nuū i. Te cuáha núu rō vehe nuū ñayuu cájica.

<sup>14</sup> Te cacān tahú rō jehē ñayuu cájito xeēn rohó. Ma cahán ndevāha ro síquī i, chí sa cacān tahú rō jehē i.

<sup>15</sup> Te núu cúsi ni ñayuu, te suni na cúsi ni rō jín i. Te núu cucúhyá ni ñayuu, te suni na cucúhyá ni rō jín i.

<sup>16</sup> Na cóo inuú ni rō jín táca jnahan rō. Te ma cundúxí rō, chí sa quijnahan rō jín ñayuu nuū ga. Ma cáni ni rō jeē ndichí xini rō.

<sup>17</sup> Te ma nasáha ndevāha rō jín ni ñin ñayuu, núu ni sáha ndevāha i jín rō. Na cóndihvī ni rō sáha rō jniñu vāha, jito jínú táca ñayuu. <sup>18</sup> Te na cóndihvī ni rō coyūcu máni rō jín táca ñayuu, vēsú ndese cándāa máa i. <sup>19</sup> Nāni máni jijnahan rō, ma nacuāha rō jéē ndútahū ñayuu casáha ndevāha jín rō, chí sa cuāha rō jñuhun jeē máa Yaā Dios cuāha ya castigo i. Chí cahán tutu i: Máa rí cuāha castigo i, máa rí nacuāha yāhu i, áchí Jítoho yó. <sup>20</sup> Te suni cahán tutu: Tēe jito uhū rohó, núu jí de sóco, te cuāha rō jéē cáji de. Te núu jichí de, te cuāha rō jéē cóho de. Chí núu sáha rō súcuan, te cucanu de te nacani uhū ni de jeē ni jito uhū de rohó. <sup>21</sup> Ma cuāha rō jñuhun jeē cundeýi jniñu néé jín rō, chí sa jniñu vāha na sáha rō návāha ndahvā jniñu néé.

## 13

<sup>1</sup> Táca ñayuu na cuátahú i nuū tohó cándiso jniñu ñuu. Chí ma cóo tēe cándiso jniñu te núu tu ní sáha máa Yaā Dios. Te tēe cándiso jniñu chí Yaā Dios ni tee jniñu síquī de. <sup>2</sup> Te ñayuu jeē tu jétahú nuū tēe cándiso jniñu, núu súcuan te cunihni ni i nuū jeē ní jeni Yaā Dios. Te ñayuu jeē cunihni ni, chí cuéchi sáha i, te nihñ i castigo. <sup>3</sup> Chí táca

tēe ndiso jniñu, nasūu jéē ndiso jniñu de jeē yūhú ñayuu casáha jniñu vāha, chí sa jeē yūhú ñayuu casáha jniñu néé. Te núu cúni rō jeē ma cúxeēn tēe cándiso jniñu nuū rō, na sáha rō jniñu vāha núu súcuan. Yūcuán na te cuajñuhún de rohó. <sup>4</sup> Chí jéjniñu Yaā Dios de jijnahan de, návāha coyūcu vāha rō jijnahan rō. Te núu sáha rō jniñu néé, te sa yūhu rō, chí nasūu cáha-ni cúu jeē cándiso jniñu de stóho de ñayuu. Chí jéjniñu Yaā Dios de, návāha cuāha de castigo ñayuu casáha jniñu néé. <sup>5</sup> Jeē yúcuan cánuú jéē cuatáhú rō nuū tēe cándiso jniñu, te nasūu máni jeē ma nihñ rō castigo, chí suni jeē tú na cuéchi coo ánuá rō. <sup>6</sup> Te jeē yúcuan cúu jeē suni cájēhe rō xūhun nuū tēe cándiso jniñu cuu jniñu ñuu. Chí jéjniñu Yaā Dios de, te máni jniñu yúcuan casáha de.

<sup>7</sup> Te chunaa rō ndihi jeē cátaū rō nuū táca ñayuu. Cuāha rō xūhun ñuu nuū tēe stútú xūhun ñuu, te cuāha rō xūhun renta nuū tēe stútú renta. Te na cóo respeto rō nuū ñayuu cánuú coo respeto rō. Te na cóo yíñuhún rō nuū ñayuu cánuú coo yíñuhún rō. <sup>8</sup> Ma cótaū rō nuū ní ñin. Te íyó ñin jeē taū rō jeē ma tahndé cuiti, suu jeē ní cahán Yaā Dios jeē cundáhú ni rō jnahan rō. Chí ñayuu cundáhú ni jnahan, je ni squícu i ndihi jeē ndácu ley yā. <sup>9</sup> Chí súcuan ndácu ley jniñu: Ma cosíquí ndéé rō jnahan rō, ma cáni rō ndiýi, ma sacuíhná rō, ma sajnúhún rō, ma ndiýo ni rō jeē névāha jnahan rō. Te táca jñuhun yāha jín táca gá jniñu ndácu ley, ndihi-ni yñi chíji jñuhun yāha: Cundáhú ni rō jnahan rō nájñuhun cundáhú ni rō máa rō, áchí tutu. <sup>10</sup> Te núu cundáhú ni yó jnahan yó, te tu sáha yó ni ñin jeē tu íyó vāha nuū i. Núu súcuan te jeē cundáhú ni yó jnahan yó, yúcuan cúu jeē squícu yó ní ley yā.

<sup>11</sup> Súcuan sáha rō jijnahan rō, chí sáha rō cuenta jeē cácuayajni quivī ndíji ya. Te ma cóo ga rō nájñuhun ñayuu quixi, jeē cūhuun ni rō. Chí vijna je ni cuyajni ga quivī jnáma ya yohó vēsú quivī ní candíje yó jñuhun ya. <sup>12</sup> Chí nájñuhun je yajni yāha jecuáa, te cuacundijin quivī jnáma ya yohó. Núu súcuan te na stóo yó jniñu jeē ní sáha yó nuū néé, te na cúcutú yó jín táca jniñu ndaa jeē caca yó jín luz yā. <sup>13</sup> Na cáca yíñuhún yó nájñuhun cánuú caca yó jín luz yā. Ma nájini rō, ma sáha rō táca vico néé, ma cáca jnéni rō, ma sáha rō jniñu néé, ma cuajñahan rō, ma cucuéstún ni rō. <sup>14</sup> Chí sa suhva cuiñi cutú rō jín fuerza máa Jítoho yó Jesucristo, jeē ma cuāha ga rō jñuhun sáha rō jniñu cúni modo neé máa rō.

*Ma cahán neé yó coto yó jnahan yó*

## 14

<sup>1</sup> Cuatáhú rō ñayuu jeē ná tu ije jín jñuhun ya, te ma tejñahan rō jín i síquī táca jñuhun jeē sáin jéni ni i jín máa rō. <sup>2</sup> Chí íyó ñayuu jeē

jéni ni i jeē cūu caji i ndinuū-ni. Te iyó ñayuu jeē ná tu ije jíin jnúhun ya, te cájeni ni i jeē tú vāha caji i cūñu, chí jeē ní casocó ñayuu nuū ídolo cūu. <sup>3</sup> Te rōhó tēe jeē yéji ndinuū-ni, ma cahán rō coto ró tēe jeē tu yéji ndinuū. Te rōhó tēe jeē tu yéji ndinuū, ma cahán rō coto ró tēe jeē yéji ndinuū. Chí Yaā Dios ni jetáhú yá tēe ún. <sup>4</sup> Te rōhó, ¿ndé iin cūu ró jēe cahán neé ró jito ró mozo Yaā Dios? Chí núu vāha chí neé sáha de, te máá yá cūu jeē sándaā jíin de, nasūu máá ró. Te tuú chí cuiñi vāha de, chí mozo máá Jítoho yō cūu de, te cuu sáha ya jeē ma stívi de.

<sup>5</sup> Te suni iyó ñayuu jeē jéni ni jeē íi gā iin quiví vésú inga quiví. Te inga ñayuu chí jéni ni i jeē inuū-ni cūu táca quiví. Te táca i na cúndaā vāha ni maá i siquí jeē jéni ni i. <sup>6</sup> Chí tēe jeē née íi quiví, chíñúhún de máá Jítoho yō jeē sáha de sūcuan. Te tēe jeē tu née íi quiví, suni chíñúhún de Jítoho yō jeē sáha de sūcuan. Te tēe jeē yéji ndinuū-ni, chíñúhún de máá Jítoho yō jeē sáha de sūcuan, chí nácuatáhú de nuū Yaā Dios. Te tēe jeē tu yéji ndinuū, suni chíñúhún de Jítoho yō jeē sáha de sūcuan, te suni nácuatáhú de nuū yā.

<sup>7</sup> Chí ni iin yó tu técu yō jeē vāha máá-ni yó, te ni iin yó tu jíhí yō jeē cuni máá yó. <sup>8</sup> Chí núu técu yō, te técu yō jeē cuajniñu yó núu máá Jítoho yō. Te núu cuu yō, te suni cuu yō siquí jeē cuni máá Jítoho yō. Núu sūcuan te núu jeē cótecu yō chí jēe cuu yō, te yíhi yó ndaha Jítoho yō. <sup>9</sup> Chí ni jíhí Cristo te ni natecu yā, návāha cuu ya Jítoho nuū ñayuu ni jíhí jíin ñayuu técu.

<sup>10</sup> Te rōhó, ¿naun jéni neé ni rō jito ró jnāhan ró núu sūcuan? ¿Te naun cújéé ni rō jito ró de? Chí táca yó cuiñi yó yuhu mesa Cristo jeē sándaā yá jniñu yó. <sup>11</sup> Chí suhva yósó núu tútu íi:

Jendaá ndije chí nuū máá rí cuiñi yítí táca ñayuu,

te ndíhi i cahān jeē máá rí cūu Yaā Dios, áchí máá Jítoho yō.

<sup>12</sup> Núu sūcuan te ná iin ná iin yó nacūaha yó cuenta nuū Yaā Dios ndese jniñu ni casáha yó.

#### *Ma sáha yó jēe quiví jnāhan yó cuēchi*

<sup>13</sup> Te jeē yūcuan ma cahán neé gá yō coto yó jnāhan yó. Chí sa tee ni rō jeē má sáha ró ni iin jniñu jeē sáha jeē stívi jnāhan ró te quiví i cuēchi. <sup>14</sup> Te jíni rí jeē ni iin jeē ni sáha Yaā Dios, tu stívi ánuá yō. Chí sūcuan ni cucáhnú vāha ni rí siquí jeē candije rí Jítoho yó Jesús. Te núu iin ñayuu jéni ni i jeē iyó jēe stívi ánuá í, yūcuán na te sūcuan sáha un jíin máá í. <sup>15</sup> Te núu jnāhan ró tu cúvāha ni de jeē yéji rō cūñu ni casocó ñayuu nuū ídolo, chí jéni ni de jeē stívi un ánuá rō, núu sūcuan te tu cúndáhú ni rō de jeē sáha ró sūcuan. Coto má snáá rō anuá jnāhan ró siquí jeē yéji rō iin jeē jéni ni de jeē cuēchi cūu. Chí suni jehē máá de ni jíhí

Cristo. <sup>16</sup> Ma sáha ró jniñu jeē cahán i siquí, vésú jíni máá ró jeē iyó vāha. <sup>17</sup> Chí jeē ndáu Yaā Dios jniñu nuū yō, nasūu siquí ndese caji yō coho yó cūu, chí sa suhva siquí jeē na sáha yó jniñu ndaā, te coyūcu máni yō jíin jnāhan yó, te cusíi ni yō sáha Espírítu Santo. <sup>18</sup> Te ñayuu jeē sūcuan jéjniñu nuū Cristo, chí cusíi ni Yaā Dios jíin í, te suni cájējñúhún ñayuu í.

<sup>19</sup> Núu sūcuan te na cóndihví ni yō coyūcu máni yō, návāha jíin yūcuan chindéé ñájñāhan yó ije yó jíin jnúhun ya. <sup>20</sup> Te ma cuáha ró jnúhun jeē ndeyu yéji rō snáá jniñu ni sáha Yaā Dios jíin jnāhan ró. Chí iyó ndoo ndije ndíhi jeē yéji yō, te vésú sūcuan te tú vāha jeē yéji rō ndeyu jeē sáha jíin jnāhan ró jēe caji de jeē jéni ni de jeē cuēchi cūu. <sup>21</sup> Vāha ga ma cáji rō cūñu, ni ma cóho ró vino, te ni iin ma sáha ró jēe stívi ánuá jnāhan ró, te quiví de cuēchi, te caca yátá de nuū jnúhun cándije de. <sup>22</sup> Te núu cándije ró jēe tú na vé sáha jeē yéji rō, te sūcuan na cándije máá-ni ró nuū Yaā Dios. Te nacá ndetú tēe jeē tu sáha jíin ánuá de jeē cuēchi cūu núu caji de coho de. <sup>23</sup> Te tēe yéji iin jeē jéni ni de sanaa te stívi ánuá de, núu sūcuan te sáha de cuēchi, chí tu cándije de jeē iyó vāha jeē yéji de. Chí táca jēe sáha yó, núu tu cándije yó jēe iyó vāha, te cuēchi cūu.

*Jeē na sáha yó jēe cusíi ni jnāhan yó*

## 15

<sup>1</sup> Te yóhó jēe ni íje yó jíin jnúhun ya, cánuú condito yó ñayuu jeē ná tu ije jíin jnúhun ya, návāha cándije vāha í. Te ma sáha yó jēe máá-ni yó cusíi ni. <sup>2</sup> Chí ná iin ná iin yó na sáha yó jēe cusíi ni jnāhan yó, návāha quendōo vāha í te ije í jíin jnúhun cándije í. <sup>3</sup> Chí ni Cristo, tu ní sáha ya jeē cusíi ni máá yá, chí sa suhva jeē cusíi ni Tátá yā. Chí suhva cahán tutu íi: Táca jnúhun ndevāha jēe cácahān ndevāha ñayuu siquí ní, ni ndívi siquí máá ná, áchí Cristo jíin Tátá yā. <sup>4</sup> Chí táca jnúhun jeē ní jecosō nuū tútu íi nde jēnahán, chí ni jecosō návāha stéén nuū yō, te nihñi yó jnúhun jeē sáha jeē cuandeyí ni yō te ndusíi ni yō. Te sūcuan te cocuhun ni yō táca jēe vāha jeē cóo. <sup>5</sup> Te máá Yaā Dios jeē jēhe jnúhun cuandeyí ni jíin jnúhun ndúsíi ni, na sáha ya jeē cóo inuū ni rō, nájnūhun cúní Cristo Jesús. <sup>6</sup> Te sūcuan te iin-ni coo ró te inuū-ni cuu cahán ró jeē yóhoyo vāha Yaā cūu Yaā Dios, Tátá Jítoho yó Jesucristo.

*Jeē ni jtē jnúhun vāha ya nuū ñayuu táca nación*

<sup>7</sup> Núu sūcuan te cuatáhú ró táca jnāhan ró, nájnūhun ni jetáhú Cristo yóhó, návāha cuni ñayuu jeē luu cújēhnu Yaā Dios. <sup>8</sup> Chí cahán rí jeē ní quiji Cristo Jesús, ni sáha ya táca jniñu jeē quendōo vāha ñayuu hebreo, návāha cúndaā táca jnúhun jeē ní jéjnūhun Yaā Dios nuū táca jíi í. Te sūcuan ni steén

Cristo jeē squícu Yaā Dios tāca jée ni jéjnūhun ya. <sup>9</sup> Te suni ni quiji ya návaha ñayuu tāca nación jeē tu jíni jnūhun ya, cahān i jeē yóhoyo váha ni Yaā Dios jeē cundáhú ni yā i. Chi suhva cáhán tutu íi:

Núu súcuan te cahān na jée yóhoyo váha ni ní, cuni ñayuu tāca nación,

te cata ná yaa jeē chiñúhún ná nihín.

<sup>10</sup> Te cahán tucu tutu íi:

Róhó ñayuu tāca nación, inuú na cúsí ni rō jíin ñayuu maá yá.

<sup>11</sup> Te cahán tucu:

Róhó ñayuu tāca nación, na cahán rō jeē yóhoyo váha ni Jitoho yō Yaā Dios, te róhó ñayuu tāca-ni ñuu, suni na cahán rō jeē yóhoyo cújéhu ya.

<sup>12</sup> Te suni ni tee Isaiás jnūhun yáha:

Nuú yúcün Isai quiji in jeē cújéhu, te ndacu ya jniñu nuú ñayuu tāca nación. Te ñayuu ún chi cocuhun ni i tāca jée sáha ya. Achí tutu.

<sup>13</sup> Te maá Yaā Dios jeē sáha jeē cáñuhun ni yō tāca jée váha jeē coo, na sáha ya jeē cóo síi ndasí ni rō jíin jée cóo ndeyí ni rō siquí jeē cácadíje nihin rō yá. Te súcuan te cocuhun teyí gá ni rō tāca jée váha jeē coo, sáha poder maá Espíritu Santo.

<sup>14</sup> Nānī mání, cúcáhu ni rī jeē váha ndasí cándihví ni rō jíin jniñu váha, te váha ndasí cájecūhun ni rō, te cúu stíhví jnāhan ni rō.

<sup>15</sup> Te ni jeni ni rī jeē tee ri carta yáha cáhán cají rī jíin ró jijnáhan ró, návaha víhyá gā na cocuhun ni rō tāca jnūhun yáha. Chi súcuan sáha rī siquí jeē váha ni Yaā Dios te ni jéhe ya jniñu nuú rī <sup>16</sup> jeē jejniñu rī nuú Jesucristo, jeē nácani rī jnūhun nuú ñayuu tāca nación jeē tu jíni jnūhun ya. Te nácani rī jnūhun váha Yaā Dios nuú i jeē jnāma ya i. Súcuan sáha rī návaha ñayuu tāca nación, cuu squívi rī i ndaha ya jeē cúu i nájñūhun in jeē socó rī nuú yā jeē cúsí ni yā jíin. Chi ni sáha Espíritu Santo jeē iyó ndoo iyó íi i nuú yá.

<sup>17</sup> Núu súcuan te siquí jeē candíje ri Cristo Jesús, te cúsí ni rī jeē jejniñu váha rī nuú Yaā Dios. <sup>18</sup> Chi ma cúu cahān rī siquí jniñu casáha inga tēe, chi maá-ni siquí ndese ni jejniñu Cristo ruhū jeē sáha rī jeē ñayuu tāca nación tu ní jíni jnūhun Yaā Dios, vijna jétáhú i nuú yá. Chi súcuan ni cuu jíin jnūhun ni cahān rī jíin jniñu ni sáha rī. <sup>19</sup> Chi ni sáha rī jniñu jéhu ndíso poder jeē steén jeē cújéhu ya, te ni íyo poder Espíritu Santo jíin rí. Te súcuan ni nacani ndíhi rī jnūhun ndese jnāma Cristo ñayuu. Te ni nacani rī nde ñuu Jerusalén, jíin ndíhi tāca ñuu, jíin nde ní región Ilírico. <sup>20</sup> Súcuan cúu jeē ní condíhví ni rī ni nacani rī jnūhun jeē jnāma ya ñayuu. Te ni jehén rī nuú ñayuu jeē ná tu cuni jnūhun Cristo, chi tu ní cúní rī nacani rī nuú ñayuu jeē jé ni jíni i ni canacani inga tēe. <sup>21</sup> Chi sa suhva ni sáha rī nájñūhun cáhán tutu íi:

Tāca ñayuu jeē tu ní quiji jnūhun ya nuú i, vijna chí cuni i jnūhun ya, te tāca ñayuu jeē tu ní jíni cuítí jnūhun ya, vijna chí jecūhun ni i.

Achí tutu.

### *Jeē ñūhun ni Pablo jeē quihín de Roma*

<sup>22</sup> Te jeē yúcuan cúu jeē cuehē jínu ni cujnéñu rí, te tu ní cúu jecondéhe rí rohó jijnáhan ró. <sup>23</sup> Te vijna chí ni ndíhi jniñu rí ní cáhu tāca región ndaíñú yáha. Te je ni cuu cuehē cuiyá jeē cuní rī jeē rī nuú rō. <sup>24</sup> Núu súcuan te ñūhun ni rī jecondéhe rí rohó jijnáhan ró núu na yáha rí quihín rī España. Te ñūhun ni rī jeē núu je ni cusí ni rī jeē ní jito jnāhan yó, yúcuan na te chindéé ñáhán ró ruhū jeē quihín gá rí. <sup>25</sup> Te xíhna gá na quihín rī ñuu Jerusalén quindéca rí xūhún cuu hermano cáyūcu yúcuan. <sup>26</sup> Chi ñayuu Macedonia jíin Acaya ni cajeni ni i jeē cáquin i xūhun quihín nuú hermano cándoho ndáhú ñuu Jerusalén. <sup>27</sup> Chi súcuan ni cacusí ni i ni casáha i. Te íyó váha jeē súcuan, chí maá i jeē cácuu i ñayuu tāca gá nación, táu i jeē sáha váha i nuú ñayuu hebreo un. Chi ñayuu hebreo ni casáha jeē ní quiji jnūhun Yaā Dios nuú i jeē quéndōo váha ánuá i sáha. Jeē yúcuan cánuú jée chindéé ñáhán i ñayuu hebreo cácadíje jíin ndajniñu ñayívi yáha. <sup>28</sup> Núu súcuan te jeē jínu jniñu yáha jée quindéca rí xūhun yáha nuú i, yúcuan na te jecondéhe rí rohó jijnáhan ró jée yáha rí quihín rī España. <sup>29</sup> Te jíni váha rí jeē quiví jínu rí nuú rō, te váha ndasí quendōo rō jée nacani ga rí jnūhun váha Cristo nuú rō.

<sup>30</sup> Hermano jijnáhan ró, cáhán ndahú rí jíin ró jeē chindéé ñáhán ró ruhū cadān tahú rō jehé rí nuú Yaā Dios siquí jniñu ndúcu ndeyí rí. Súcuan sáha ró siquí jeē candíje yó Jitoho yó Jesucristo, jíin siquí jeē cundáhú ni yó jnāhan yó sáha maá Espíritu. <sup>31</sup> Te cacān tahú rō jeē na cácu rí nuú tée región Judea jeē tu cácadíje, jíin jée na cúsí ni tāca hermano ñuu Jerusalén jeē quindéca rí xūhun yáha cuu de. <sup>32</sup> Te súcuan te núu cúní Yaā Dios te jecondéhe rí rohó jijnáhan ró, te cusí ni yó, te nanihín ni rī jeē condee rí jíin ró. <sup>33</sup> Te maá Yaā Dios jeē jéhe jnūhun ndeyí síi ni, na cóo ya jíin ró jijnáhan ró. Amén.

### *Jeē cahán Pablo jeē sándeýi ni i*

## 16

<sup>1</sup> Te vijna te cáhán rí jíin ró jijnáhan ró jée na chindéé ñáhán ró hermana Febe, chí cúu ña ñahan jéjniñu jeē siquí jnūhun ya nuú ñayuu cácadíje ñuu Cencrea. <sup>2</sup> Te cuatáhú ró ña nájñūhun cúní maá Jitoho yó, chí súcuan cánuú sáha hermano cácadíje. Te chindéé ñáhán ró ña na-ni vé cúu jeē jíni ñūhún ña, chí súcuan ni chindéé ñáhán maá ña cuehē ñayuu, te suni nde ruhū.

<sup>3</sup> Cahān rō jīn Priscila jīn Aquila jeē sándeýí ni ndindúú de, áchí rí, chí cáchindéé ñájnáhan de jīn rí siquí jníñu Cristo Jesús. <sup>4</sup> Chí ná ni iyo jnūndóho jeē cuu rí nuú, te ni cachundeyí ni de ni canducú de scácu de ruhū, vēsú suni cuu maá de nuú. Te nácuatáhú rí nuū ndindúú de, te nasūu maá-ni ruhū, chí suni táca grupo ñayuu cácañdije táca nación. <sup>5</sup> Te suni cahān rō jīn ñáyyu cácañdije ndútútú vehe de, sándeýí ni i, áchí rí. Te cahān rō jeē sándeýí ni Epeneto, tēe maní rí jīn. Chí ñuu Acaya, maá de cúu jeē ní candije xīhna gā nuū Cristo. <sup>6</sup> Suni cahān rō jeē sándeýí ni Maria, ñahan jeē ní jejnīñu ndasí jeē siquí jnūhun ya mēhñu rō jijnáhan rō. <sup>7</sup> Te cahān rō jeē sándeýí ni Andrónico jīn Junias, tēe cácuu jnáhan ñuu rí jeē ní cahīn jīn rí vecāa. Te táca apóstol chí cájejnūhún de ndindúú tēe jīñá, te xīhna gā de ni cacandije Cristo vēsú maá rí.

<sup>8</sup> Cahān rō jeē sándeýí ni Amplias, tēe maní rí jīn, chí cándije de Jitoho yō. <sup>9</sup> Te cahān rō jeē sándeýí ni Urbano, tēe chindéé ñájnáhan jīn yō siquí jníñu Cristo Jesús, te suni súcuan Estaquis, tēe jeē maní rí jīn. <sup>10</sup> Suni cahān rō jeē sándeýí ni Apeles, tēe jeē ní stēen jeē candije vāha de Cristo, te suni súcuan cahān rō jīn ñáyyu vehe Aristóbulo. <sup>11</sup> Cahān rō jeē sándeýí ni Herodión, tēe cúu jnáhan ñuu rí. Te suni súcuan ñayuu vehe Narciso jeē cácañdije maá Jítoho yō. <sup>12</sup> Te suni cahān rō jeē sándeýí ni Trifena jīn Trifosa, ñahan cásjñiñu siquí jnūhun maá Jítoho yō. Te suni sándeýí ni Pérsida, hermana jeē maní yō jīn, chí suni ní sájnīñu ndasí ña siquí jnūhun Jítoho yō. <sup>13</sup> Te cahān rō jeē sándeýí ni Rufo, tēe cájejnūhún ñáyyu jeē vāha cándije de maá Jítoho yō. Te suni súcuan cahān rō jīn náná de, te maá ña suni ní jito ña ruhū nájnūhun jeē naná rí cúu ña. <sup>14</sup> Te cahān rō jeē sándeýí ni Asíncrito jīn Flegonte jīn Hermas jīn Patrobas jīn Hermes jīn táca hermano jeē cáyūcu jīn de. <sup>15</sup> Te suni súcuan Filólogo jīn Julia jīn Nereo jīn cuáha de, jīn Olimpas jīn ndíhi hermano cácañdije cáyūcu jīn de jijnáhan de.

<sup>16</sup> Te jeē cahān táca rō jīn jnáhan rō, te yīñúhún techūhu rō ndaha i. Te táca grupo ñayuu cácañdije nuū Cristo, cáhán i jeē na sándeýí ni rō.

<sup>17</sup> Te cáhán ndahú rí jīn rō, hermano jijnáhan rō, jēé cóto rō maá rō nuū ñáyyu cútucu ni te ndúcú ství jnáhan jīn jnūhun tu quíjnáhan jīn jēé ní cacutūhva rō. Te cujiyo rō nuū i jijnáhan i. <sup>18</sup> Chí ñayuu súcuan, tu jéjñiñu i nuū Jítoho yō Jesucristo, chí máni ndíhví ni i siquí jeē cáji i. Te yōhoyo ndúxí i jīn jnūhun cácahán i, te súcuan stáhú i ñayuu jeē tu jímí vāha. <sup>19</sup> Te maá rō jijnáhan rō, chí je cájini ndíhi ñayuu ndese vāha cájetáhú rō nuū yā, te jeē yúcuan cúsiñ rí. Te cúní rí jeē cóo listo vāha rō sáha rō jniñu vāha, te ma sáha rō jniñu néé. <sup>20</sup> Te maá Yā Dios jeē jéhe

jnūhun ndeyí sñ ni, yachí sáha ya jeē cúndeyí rō siquí jexeén jeē cúu Satanás. Te ñūhun ni rí jeē Jítoho yō Jesucristo na sáha ya jeē vāha rōhó jijnáhan rō.

<sup>21</sup> Sándeýí ni rō jijnáhan rō, áchí Timoteo, tēe chindéé ñáhán jīn rí siquí jnūhun ya. Te suni súcuan cácahán jnáhan ñuu rí Lucio jīn Jasón jīn Sosípater.

<sup>22</sup> Te ruhū jeē naní Tercio, jeē tēe ri carta yáha jēe cáhán Pablo, suni cáhán rí jeē sándeýí ni rō jeē cácañdije rō Jítoho yō.

<sup>23</sup> Te Gayo, tēe ni jēhe núu vehe ndéé ruhū Pablo, cáhán de jeē sándeýí ni rō jijnáhan rō. Te suni jēhe núu de vehe nuū táca ñáyyu cácañdije. Te suni súcuan cáhán Erasto, tēe cúu tesoroero ñuu yáha, te suni súcuan cáhán hermano Cuarto.

<sup>24</sup> Te ñūhun ni rí jeē maá Jítoho yō Jesucristo, na sáha ya jeē vāha rōhó jijnáhan rō. Amén.

*Jnūhun sándiñi jēe cáhán jeē yóhoyo cújēhnu ya*

<sup>25</sup> Te vijna na cáhán yō jeē yóhoyo cújēhnu Yā Dios. Chí maá yá cuu sáha jeē cuíñi ñihin ga rō jijnáhan rō jīn jnūhun jnáma ya rohó jeē nácani ri, jīn jnūhun Jesucristo jeē steén rí. Chí súcuan ni steén Yā Dios jnūhun sáhi yá, jeē ní yisáhi ní cáni nde ná tu jecōo ñayívi. <sup>26</sup> Te vijna te je ni nane cáji. Chí jīn tútu ñi jeē ní catee tēe ni canacani jnūhun ya, ni jité núu jnūhun sáhi yáha nuū ñáyyu táca nación, návāha candije i te cuatáhú i. Chí Yā Dios jeē técu ní cáni, súcuan ni ndacu ya jniñu.

<sup>27</sup> Te ní cáni na cáhán yō jeē yóhoyo cújēhnu Yā Dios siquí jniñu ní sáha ya jeē jīn Jesucristo. Chí maá ñn-ni ya iyó te yóhoyo ndíchi yá. Súcuan na cóo. Amén.

## CARTA HN JEE NI TEE SAN PABLO APOSTOL NUU ÑAYUU ÑUU CORINTO

<sup>1</sup> Máá rí cúu Pablo, te ni cana Yaá Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jñūhun ya. Te ndindúu rí jiin hermano yō Sóstenes <sup>2</sup> cátee rí carta yáha cuájeē nuū rohó ñáyyuu ñuu Corinto jeē cácadnje ró Yaá Dios. Chi cácuu ró ñáyyuu maá yá, chi cáyihí ró ndaha Cristo Jesús. Chi ni cana Yaá Dios rohó jijnáhan ró jeē coo ndoo coo íi ró nuū yā. Te ni cana ya rohó ndé jiin táca gá ñáyyuu jeē ndácunehen i máá Jitoho yō Jesucristo, ndé-ni cúu nuū cáhíyo i. Chi Jitoho táca yó jiin i cúu ya. <sup>3</sup> Te cáñuhun ni rí jeē Tatá yō Yaá Dios jiin Jitoho yō Jesucristo na sáha ga yá jeē váha rohó, te sáha ya jeē coo ndeyí coo sñ ni rō.

*Cristo sáha ya táca jéé váha yóhó*

<sup>4</sup> Te níni nácuatáhu rí nuū Yaá Dios jeē siquí rohó jijnáhan ró, chi jeē jiin Cristo Jesús ni sáha ya jeé váha rohó. <sup>5</sup> Chi cáyihí ró ndaha Cristo, te jeé yúcuan ní sáha Yaá Dios jeé cáhíyo cúcá ró jiin táca jñūhun ya, chi cájecūhun váha ni rō te cúu nacani ró. <sup>6</sup> Chi súcuan cúu jeé cáhíin níhin ró jiin jñūhun Cristo jeé ní canacani ri nuū rō. <sup>7</sup> Te súcuan te tu cúmaní ni ñin tahú jeé jéhe ya cuu ánuá ró níni jéé cándetu ró quívi jeé quénda ndijin Jitoho yō Jesucristo. <sup>8</sup> Te máá yá chí sáha ya jeé cuiñi níhin ró nde na jínu quívi, náváha ma cóo cuechi siquí ró quívi ndíji Jitoho yō Jesucristo. <sup>9</sup> Te squícu Yaá Dios táca jéé ni jéjñūhun ya, te ni cana ya rohó jijnáhan ró náváha cuni jñáhan ró jiin Séhe ya, Yaá cúu Jitoho yō Jesucristo.

*Siquí jeé ma cóo sñ ni i jiin jñáhan i*

<sup>10</sup> Hermano, nde jiin síhví Jitoho yō Jesucristo cahán ndahú rí jiin ró jeé inuú-ni na ndájñūhun ró jijnáhan ró, te ma cóo sñ ni rō. Chi váha inuú na cóo ni rō jiin táca jéé cájeni ni rō. <sup>11</sup> Súcuan cáhán rí, ñáñi máni, chi ni cacastūhun ñáyyuu vehe Cloé nuū rí jeé cátejñáhan ró. <sup>12</sup> Chi táca ñn ñn ró sñin sñin cácahán ró: Ruhū chí jiin Pablo índichi rí, cácahán sava ró. Te sava ga rō: Ruhū chí jiin Apolos. Ruhū chí jiin Pedro. Ruhū chí jiin Cristo. Cácahán rō. <sup>13</sup> Te jeé cácahán ró súcuan ¿te á cájeni ni rō jeé sñin sñin Cristo iyó jéé cánacani ri jñūhun? ¿Te á ruhū Pablo ni jihí jicā cruz jehé rō? ¿Chí jiin síhví ruhū ni cajendute ró, chí naun? <sup>14</sup> Tú cuiñi. Te na cútahú rí nuū Yaá Dios jeé tú cuehē ró ni scuándute rí, chí máá Crispo jiin Gayo-ni, <sup>15</sup> náváha ma cahán ni ñin ró jéé jiin síhví rí ni jendute ró. <sup>16</sup> Te sá núcūhun ni rí jeé suni ni scuándute rí Estéfanas jiin ñáyyuu vehe de.

Te sanaa te súcuan-ni cúu ñáyyuu ni scuándute rí, jéni ni rí. <sup>17</sup> Chi tu ní téjñífu Cristo ruhū jeé scuándute rí, chí sa suhva jeé nácani ri jñūhun jeé jnáma ya ñáyyuu. Te tu ní ndícú rí jeé steén rí nuū rō ñn modo ndichí jéé ma jécūhun ni rō, chí núu súcuan te ma cúu jecūhun váha ni rō jñūhun jeé ni jihí Cristo jicā cruz.

*Jiin Cristo ni steén Yaá Dios poder yā jiin jñūhun ndichí yá*

<sup>18</sup> Te jñūhun jeé ni jihí yá jicā cruz jeé jnáma ya ñáyyuu, chí jñūhun cánée íi cúu nuū ñáyyuu cuango nuū jnahnú ndetú. Te máá yó jeé cuahán yó nuū cácu yó, chí jíni yó jeé jñūhun Yaá Dios jeé ndíso poder cúu. <sup>19</sup> Chi suhva yósó núu tútu íi jeé ni cáhán Yaá Dios: Na snáa rí jñūhun ndichí cácahán ñáyyuu ndichí cuenta ñayívi yáha,

te ma cuatáhu rí jñūhun cácahán ñáyyuu jeé jéni ni jeé jíni váha.

Achí yá.

<sup>20</sup> Núu súcuan ¿te ndé cuajñíñu tēe ndichí cuenta ñayívi yáha, jiin téé cásteén tutu, jíni téé cánanducú yúcun siquí jeé steén ñáyyuu ñayívi yáha? Chí táca jñūhun ndichí cuenta ñayívi yáha, ni cahán Yaá Dios jeé jñūhun cánée íi cúu. <sup>21</sup> Te yóhyo ndichí sáha Yaá Dios. Chí táca jñūhun ndichí cájini ñáyyuu ñayívi, ni cachi ya jeé tu jéjñíñu jeé cúni i ndese Yaá cúu ya. Yūcuán na te ni nujnahan ni yā jeé jiin jñūhun ya jeé cánacani ri te jnama ya ñáyyuu cácadnje, vésú cájeni ni ñáyyuu ñayívi jéé jñūhun cánée íi cúu.

<sup>22</sup> Chí ñáyyuu hebreo, máni cácuni i jeé sáha Yaá Dios cuehē jñíñu jéhu jeé steén poder yá. Te ñáyyuu griego chí máni siquí jñūhun ndichí cándihví ni i. <sup>23</sup> Te máá rí chí sa suhva cánacani ri jñūhun jeé ni jihí Cristo jicā cruz jeé jnáma ya ñáyyuu. Te jñūhun yáha sáha jeé jnánini ni ñáyyuu hebreo, te ñáyyuu táca gá nación chí cájeni ni i jeé jñūhun cánée íi cúu.

<sup>24</sup> Te ñáyyuu jeé ní cana ya ni quívicoo ndaha ya, vésú ñáyyuu hebreo chí ñáyyuu griego, chí jíni i jeé jiin Cristo ni steén Yaá Dios poder yá jiin jñūhun ndichí yá. <sup>25</sup> Chí jñūhun Yaá Dios jeé cácahán ñáyyuu jeé jñūhun cánée íi cúu, yóhyo ndichí gá vésú jñūhun ndichí ñáyyuu. Te cájeni ni ñáyyuu jeé tú na poder yá ná ni jihí Jesús jeé jnáma ya yóhó, te tuú chí níhin téyí gá poder yá ún vésú poder ñáyyuu.

<sup>26</sup> Hermano, máá ró cácuu jeé ní cana ya ni quívicoo ró ndaha ya. Te condéhe ró jeé tú cuehē ró ndichí jiin jñūhun ñayívi, ni tú cuehē ró cándacu jñíñu, ni tú cuehē ró cácuu séhe ñáyyuu cújéhu. <sup>27</sup> Chí sa suhva ni nacáji Yaá Dios táca jéé cácahán ñáyyuu ñayívi jéé tu ndichí cuiñi, náváha coo jñūhun canu nuū táca jéé ndichí. Te ni nacáji ya ñáyyuu tu téyí iní ñayívi, náváha coo jñūhun canu nuū ñáyyuu teyí. <sup>28</sup> Te suni ni nacáji Yaá Dios táca jéé tu cújéhu iní ñayívi, jíni táca jéé sajeé ni

i nuū, nde jīn tāca jēē tū jniñu cájeni ni i, návāha snūu ya tāca jēē cújēhnu ini ñayīví. <sup>29</sup> Súcuan ni sáha ya návāha ni ñin ñayuu ma cúu sátéyí i máá i nuū yā. <sup>30</sup> Te máá ró jijnáhan ró chi ni sáha Yaā Dios jeē nduú ró jīn Cristo Jesús. Chi nde nuū maá yá ni canihñin yō jñuhun ndíchí, te ni ndahva yā cuéchi yó, te ni sáha ya jeē iyó ndoo iyó íi yō nuū yā, chi ni jnama ya yohó. <sup>31</sup> Te jeē yúcuan na cóo nájñuhun cáhán tutu íi: Núu ñin ñayuu cuní i cutéyí i, te na cutéyí i siquī jeē ni sáha máá Jitoho yō jehé i, áchi.

*Jeē nácani Pablo jñuhun jeē ni jīhí Cristo*

## 2

<sup>1</sup> Te ruhū, hermano, ná ni jeē rī nuū ró jijnáhan ró jēē nácani ndaā rī jñuhun Yaā Dios, te tu ni nácani rī jñuhun ndíchí jēē ma jécūhun ni ró. <sup>2</sup> Chi ná ni iyo rī jīn ró te tú na inga jñuhun ní ndúcú rī castūhun rī nuū ró, chí máni máá jñuhun Jesucristo jeē ni jīhí yā jicā cruz jeē jnáma ya yohó. <sup>3</sup> Te ná ni jinū rī nuū ró jijnáhan ró, chí tú na fuerza rī, te yúhú rī, te quísi i ruhū. <sup>4</sup> Te ná ni nacani rī jñuhun nuū ró, chí nasūu jīn jñuhun ndíchí ñayuu ñayīví ní scándije rī rohó, chí sa suhva jīn máá poder Espíritu yā ni steén rī nuū ró jijnáhan ró, <sup>5</sup> návāha ma cuiñi ró siquī jñuhun ndíchí cácahān ñayuu, chí cuiñi ró siquī poder Yaā Dios.

*Jīn Espíritu te steén Yaā Dios ndese Yaā cúu ya*

<sup>6</sup> Te ndaā chí ndíchí cácahān rī jīn ñayuu jeē jé ni ije jīn jñuhun cándije i ya. Te nasūu jñuhun ndíchí jēē iyó ini ñayīví yáha, ni nasūu jñuhun ndíchí cácahān tēe cájéjēhnu ñayīví yáha, chí tēe ún yáha-ni jeē cájéjēhnu de. <sup>7</sup> Chí jñuhun cácahān rī cúu jñuhun ndíchí máá Yaā Dios jeē ní yisáhí. Chí jñuhun ndíchí un jēē ní yisáhí, ni jequin Yaā Dios nde ná tu jecóo ñayīví, návāha cácu yó jēē cótecu yó níí cáni sáha jñuhun ún. <sup>8</sup> Chí ni ñin tēe cújéjēhnu nuū ñayīví yáha, tu ní jécūhun ni de jñuhun ndíchí un. Chí núu ni jecūhun ni de nuú, te ma cáhni cuiñi de máá Jitoho yō, Yaā cújéjēhnu luu. <sup>9</sup> Chí cúu nájñuhun cáhán tutu: Tāca jēē ni sátūhva Yaā Dios jeē cúu ñayuu jeē maní jīn yá,

ni ñin ún tu ní jito jínúú ñayuu, ni tu ní jini sōho i,

ni tu ní qujji jeē súcuan cani ni i. Achí tutu. <sup>10</sup> Te máá yō jijnáhan yó chí ni steén Yaā Dios táca un nuū yō jeē jīn Espíritu yā. Chí máá Espíritu jini vāha ya te steén yā ndihí, chí nde ndihí jeē ndíchí gá máá Yaā Dios.

<sup>11</sup> Chí ni ñin ñayuu ma cúu cuní i ndese jéni ni inga ñayuu, chí máá-ni i jīn ánuá i cúu jeē jini. Te suni súcuan ni ñin ñayuu tu jini i ndese jéni ni Yaā Dios, chí máá-ni Espíritu Yaā Dios cúu jeē jini. <sup>12</sup> Te máá yó chí ni nihñin yō

Espíritu un jēē véji nuū Yaā Dios, te tu cájeni ni yō nájñuhun cájeni ni ñayuu ñayīví. Te jeē yúcuan cúu jeē cájecūhun ni yō ndese ni sáha Yaā Dios jeē váha yóhó siquī jeē váha ni yā. <sup>13</sup> Te suu siquī tāca jēē yáha cúu jeē cácahān rī, te nasūu jīn jñuhun jeē castéén ñayuu ndíchí, chí jīn jñuhun jeē steén máá Espíritu. Chí cástéén rī jñuhun Espíritu nuū ñayuu cánevāha Espíritu.

<sup>14</sup> Te ñayuu ñayīví tu cájetáhú i tāca jñuhun jeē véji nuū Espíritu Yaā Dios, chí cájeni ni i jeē jñuhun cánéé íi cúu. Te ma cúu jecūhun ni i, chí tu cánevāha i máá Espíritu jeē sáha jeē jécūhun ni i. <sup>15</sup> Te ñayuu cánevāha Espíritu, chí cájecūhun ni i ndese iyó ndihí-ni. Te ñayuu ñayīví ma cúu jecūhun ni i ndese ñayuu cácuu ñayuu ún. <sup>16</sup> Chí suhva cáhán tutu íi: ¿Ndé ñin cuu cuní ndese jéni ni máá Jitoho yō? ¿Te ndé ñin cuu steén nuū yā? Ni ñin ma cúu. Achí tutu. Te vēsú súcuan te máá yó chí cájeni ni yō nájñuhun jéni ni Cristo.

*Jeē cáchindéé ñájñahan de cájejñiñu de nuū Yaā Dios*

## 3

<sup>1</sup> Te ruhū, hermano, tu ní cúu cahān rī jīn ró jijnáhan ró nájñuhun cáhán rī jīn ñayuu jica jīn Espíritu. Chí ni cahān rī jīn ró nájñuhun jīn ñayuu cájica jīn modo máá, chí cácuu ró nájñuhun sūchi lúli jēē ná tu ije ró jīn jñuhun Cristo. <sup>2</sup> Ni steén rī nuū ró jeē tú yí, chí cácuu ró nájñuhun sūchi lúli jēē jéxin gā. Te tu ní cáhán rī jīn ró jñuhun yíi jeē cúu nájñuhun jeē ndáva jeē véji ñayuu ni ije, chí ná tu canda ró jīn ndé saá. Te ni vijna ná tu canda ró jīn. <sup>3</sup> Chí cájica ga ró jīn modo neé máá ró. Chí cácuuésún ni ró, te cácajnáhan ró, te cácusñin ni ró. Núu súcuan te cácuu ró nájñuhun ñayuu ñayīví jēē cájica jīn modo neé máá. <sup>4</sup> Chí ñin ró cáhán: Ruhū chí jīn Pablo índichi rī. Te inga ró cáhán: Ruhū chí jīn Apolos. Te súcuan cúu jeē cájica ró jīn modo neé máá ró

<sup>5</sup> ¿Te ndé ñin cúu ruhū, te ndé ñin cúu Apolos núu súcuan? Chí máá mozo-ni Yaā Dios cácuu rī, te ni jejniñu ya ruhū návāha candije ró máá Jitoho yō. Chí ná ñin ná ñin rī ni sáha jniñu ndese ni jēhe máá Jitoho yō nuū rī.

<sup>6</sup> Ruhū, nájñuhun ni taji rī jñuhun ya ini anuá ró, te Apolos, nájñuhun ni chuhun de ndute cúu jeē ní steén gā de nuū ró. Te máá Yaā Dios cúu jeē ní scuéñu jñuhun ini anuá ró. <sup>7</sup> Núu súcuan te tú na vé cúu sáha tēe táji ní tēe chūhun ndute, chí sa suhva máá Yaā Dios cúu jeē scuéñu. <sup>8</sup> Te tēe táji jīn tēe chūhun ndute, ñin-ni cácuu de. Te táca de chí cuāha ya yáhu nuū de ndese jniñu ni casáha ñin ñin de. <sup>9</sup> Chí ruhū jijnáhan rī chí tēe chindéé ñájñahan cájejñiñu nuū Yaā Dios cácuu rī. Te máá ró jijnáhan ró cácuu nájñuhun itu Yaā Dios jeē jicu ya jīn.

Te suni nájñūhun ñin vehe jeē sāha Yaā Dios cácuu ró. <sup>10</sup> Te ruhū chí cūu rí nájñūhun ñin maestro albañil jeē ní jequin rí cimientu vehe ún, cūu jeē ní scándje rí rohó. Te inga de cása de siquī, cūu jeē castéén gā de nuū ró. Núu súcuan te ná ñin ná ñin de na cóo cuidado de ndese sāma de siquī. <sup>11</sup> Te Jesu-cristo cūu cimientu vehe ún, te ní ñin ma cūu caquin inga cimientu, chí máa yá cūu jeē ní ndahva cuēchi ró. <sup>12</sup> Te tāca ñáyuu cácañje, chí sāha i vehe siquī cimientu un, núu jín ndajñiñu vāha nájñūhun oro chí plata chí yūu luu, chí jín jeē yachi naa, nájñūhun yujnu chí ite chí ndayóhō. <sup>13</sup> Te natūu jñiñu un jeē ní sāha ñin ñin i, te suu cūu ndese ní condihví ní i siquī maá yá. Chí máa quíví juicio jeē sándaā yá jñiñu ñáyuu, quíví ún natūu cáji jñiñu i. Chí jín ñūhūn quiji quíví ún, te nájñūhun sāha ñuhūn jeē jēhmu tāca jeē cūu cayū, súcuan coto ndee ya jñiñu ñin ñin i. <sup>14</sup> Te núu tú cayū jñiñu ní sāha i siquī cimientu un, te nihín i tahū i. <sup>15</sup> Te núu tu ní condihví ní i jín jñiñu ya, te ma nihín i tahū i, chí nájñūhun cayū jñiñu i. Te máa i chí cácu ánuá i, vēsū nájñūhun je yajni cayū i núu yáñuhūn.

<sup>16</sup> ¿A tu cájini ró jeē cácuu ró nájñūhun templo Yaā Dios, chí ndéé Espiritu Yaā Dios ini anuá ró? <sup>17</sup> Te núu ñin tēe stívi de templo Yaā Dios, te snáhnú ndetū yá tēe ún. Chí ndoo ndasí cūu templo yā, te suu cácuu máa ró.

<sup>18</sup> Ní ñin ró ma stahú ró máa ró jín jeē jéni ní ró. Núu ñin ñáyuu jéni ní i jeē ndichí i jín jñūhun ñayiví yáha, vāha ga na siáa i ún, návāha coo ndichí ndije i jín jñūhun máa yá. <sup>19</sup> Chí jñūhun ndichí jeē iyó ini ñayiví yáha, jñūhun cánée íi cūu nuū Yaā Dios. Chí cáhán nuū tútu ñi: Ñayuu ndichí cuenta ñayiví, chí nájñi ya i siquī jñūhun ndichí i jeē jési i jñūhun ya, achí. <sup>20</sup> Te cáhán tucu tutu: Máa Jítoho yó jini yá tāca jeē jéni ní ñáyuu ndichí, chí máni jeē jéni cáhā i, achí. <sup>21</sup> Núu súcuan te ní ñin ró má cutéyí ró jeē siquī ní ñin tēe ndichí. Chí cuenta máa ró cūu ndihí-ni. <sup>22</sup> Cūu Pablo, cūu Apolos, cūu Pedro jeē castéén nuū ró. Cūu ndihí jeē iyó ini ñayiví, jeē iyó vijna jín jeē quiji. Te vēsū núu cotecu ró chí cuu ró, te ndihí-ni chí cuenta máa ró cūu. <sup>23</sup> Te máa ró cácuu cuenta Cristo, te Cristo cūu cuenta Yaā Dios.

*Jeē casáñiñu apóstol siquī jñūhun ya*

#### 4

<sup>1</sup> Núu súcuan te na cáni ní ró jijnáhan ró jeē mozo-ni nuū Cristo cácuu rí, jeē ní tejniñu ya ruhū jeē steén rí jñūhun Yaā Dios jeē ní yisāhi ndé jenahán. <sup>2</sup> Te ndaā chí tēe jeē sáñiñu siquī ún, iyó responsable ná ñin ná ñin de jeē squícu vāha de. <sup>3</sup> Te ruhū tu sāha rí cuenta núu cánanducú ró siquī rí ndese sāha rí, chí

núu cánanducú ñáyuu cácujeñhu ini ñayiví. Te ní máa rí tu chíhí rí cuenta siquī maá rí. <sup>4</sup> Chí vēsū jini rí jín ánuá rí jeē tú na cuēchi rí, te nasūu yúcuan cūu jeē quéndōo ndaā rí, chí máa Jítoho yó cūu jeē jito ndee ruhū. <sup>5</sup> Jeē yúcuan ma nánducú ró siquī jñiñu jñáhan ró, chí nde na quée máa quíví te cuni ró. Chí nde na ndiji máa Jítoho yó te nastūu ndijin yá tāca jñiñu jeē yisāhi núu nēe, te steén ndijin yá tāca jeē jéni ní ñáyuu jín ánuá i. Yúcuan na te máa Yaā Dios cuajñūhún yá ná ñin ná ñin i ndese ní casáha i.

<sup>6</sup> Hermano, tāca jñūhun yáha ní cahān rí návāha quéndōo vāha ró jijnáhan ró. Te ní cachi rí jeē máa rí jín Apolos cácuu rí mozo-ni nuū yá, te súcuan cácuu rí ñin ejemplo nuū ró. Te cáhán rí jeē súcuan cácuu rí, návāha cutūhva ró cani ní ró máa-ni nájñūhun cáhán tutu ñi. Chí ma sandúxi ró jeē cuajñūhún ró ñin tēe steén, te inga de tuú.

<sup>7</sup> ¿Te naun cácutéyí ró nuū jñáhan ró núu súcuan? ¿Te na vé cūu jeē iyó núu ró jeē tu ní cácutahū ró nuū yá? Te núu ní cacutahū ró nuū yá, ¿te naun cástátéyí ró máa ró jeē nájñūhun jeē nasūu jeē ní cacutahū ró cūu?

<sup>8</sup> Va je ní cacucúca ró, chí je cánevāha ró ndihí, cájeni ní ró. Te je cándacu máa ró jñiñu, te ní tuá cájini ñūhūn ró ruhū, cájeni ní ró. Tú vāha jeē súcuan cácutéyí ró. Te nacā jeē vāha núu jeē cándacu ndije nde ró jñiñu núu, návāha suni cuāha ró jñūhun jeē ndacu nde rí jñiñu jín ró jijnáhan rí. <sup>9</sup> Te iyó jéni ní rí jeē ruhū tēe cácuu apóstol, ní sāha Yaā Dios jeē cácuu rí nájñūhun tēe núu ga nuū ñáyuu, nájñūhun tēe jeē jé ní cundaā jeē cūu. Te ní ñayiví jín andiví cándēhe vāha nuū rí, cūu ndajéhe Yaā Dios jín ñáyuu. <sup>10</sup> Chí jeē siquī Cristo te cáhán i jeē tēe cánée cácuu rí. Te tāca róhō va ndichí ró jín jñūhun Cristo, cájeni ní ró. Te tāca ruhū chí tu fuerza rí, te róhō va iyó fuerza ró, cájeni ní ró. Te róhō chí cáhiyo yifūhūn ñáyuu nuū ró, te nuū rí chí casájée ní i. <sup>11</sup> Ní véjicoo rí cáji rí sóco te nde vijna. Te cájichí rí ndute, te cúmani sahma rí, te tu casáha vāha ñayuu jín rí, te ní tu cánevāha rí vehe. <sup>12</sup> Te nihin casáñiñu rí jín ndaha rí. Cácahān neé i nuū rí, te cácahān vāha rí jín i. Cájito xeén i ruhū, te cájendeyí ní rí. <sup>13</sup> Cácahān neé i siquī rí, te sa cácahān maní rí jín i. Te cácuu rí nájñūhun yacá ini ñayiví, te casquéhichí i ruhū nde vijna.

<sup>14</sup> Te nasūu jeē tēe rí yāha jeē cúcanu ró, chí sa suhva jeē stihví ní rí rohó, chí cácuu ró nájñūhun sehe rí chí maní rí jín ró. <sup>15</sup> Chí vēsū na cóo uxí mil tēe steén jñūhun Cristo nuū ró, te ñin-ni tátá ró iyó. Te máa rí cūu nájñūhun tátá ró, chí ní scandije rí rohó jeē ní nacani rí jñūhun vāha Cristo Jesús jeē jnáma ya yohó. <sup>16</sup> Núu súcuan te cáhán ndahú rí jín ró jeē na ndácu ró ruhū jijnáhan ró.

<sup>17</sup> Te jeē yúcuan cūu jeē tají rí Timoteo cuajeé de nuū ró. Chí cūu de nájñūhun sehe

ri jeē maní rí jín de, te squícu vāha de nuū maá Jítoho yō. Te máá de nacachi tucu de nuū rō ndese jíca ri jeē candíje ri Cristo, jín ndese stéén rí nuū táca grupo ñayuu cácaandíje táca lado. <sup>18</sup> Te sava ró chi cásatéyí ró maá ró, chí cájeni ní rō jeē cuiti gā rí nuū rō. <sup>19</sup> Te tuú chi yachi jeē rí nuū rō te núu súcuan cúní maá Jítoho yō. Yūcuán na te nanducú rí siquí tée cácutéyí, te ma sáha ri cuenta jñūhun cácahān-ni de, chí sa coto ndee rí de núu cuu squícu nde de. <sup>20</sup> Chi jeē ndácu Yaā Dios jniñu nuū yō, nasūu maá jeē cahán i-ni yó cúu, chí jíní ñúhún condiso poder jñūhun cáhán yō jín jniñu sáha yó. <sup>21</sup> Núu súcuan ¿te ndese cácuti rō? ¿A jeē cuxeēn rí nuū rō núu na jeē rí, siquí jeē tu cánacani ní rō, chí nacani ní rō te jeē rí jín jñūhun cúndáhú ni jín jñūhun vītá ní?

*Jeē sándaā Pablo siquí iñ cuēchi*

## 5

<sup>1</sup> Te ni nihīn rí jñūhun jeē jíca jnéni iñ tee jeē íne mēhñu ró, chí ndéca de naná uū de. Te xeēn ndasí sáha tēe ún, chí ni ñayuu jeē tu cájini jñūhun Yaā Dios, tu cásaá i súcuan. <sup>2</sup> Te vēsú súcuan te cásatéyí ró maá ró jijnáhan ró. Vāha ga jeē na cúculhyá ndasí ní rō. Te cánuú jēe na quēnehen ró tēe sáha cuēchi ún na quēnda de mēhñu ró. <sup>3</sup> Te ruhū, vēsú tu íyó rí jín ró, te nájñūhun jeē íyó rí jín ró cúu jeē ñúhún ní rí rohó. Te je ni sándaā rí siquí tēe ní sáha cuēchi ún, chí nájñūhun jeē íyó rí jín ró cúu. <sup>4</sup> Núu súcuan te na ndútútú ró jijnáhan ró, te máá Jítoho yō Jesucristo coo ya jín ró. Te máá rí chí nájñūhun cone rí jín ró, chí ñúhún ní rí rohó. Te poder maá Jítoho yō Jesús suni coo jín ró. <sup>5</sup> Te na chíhi yó tēe ún ndaha Satanás, návāha na ndóho yiqui cúñu de, te nacani ní de te cácu ánuá de quiví ndijí Jítoho yō Jesús.

<sup>6</sup> Tuú vāha jeē cásatéyí ró maá ró. ¿A tu cájini rō jñūhun cáhán suhva? Vēsú jecu-ni levadura te ndáa ní ñujen sáha, áchi. <sup>7</sup> Núu súcuan te quenehen ró tēe un nájñūhun scáne ró levadura jeē ní tvi. Te súcuan te cuu ró nájñūhun pan jeē cúvāha jín ñujen jé jé tū na levadura yíhi, jeē cáyeji i vico pascua. Te ndaā jeē súcuan cácu ró. Chí je ni jíhi Cristo jeé ní sócō yā maá yá jehē yō, chí cúu ya nájñūhun londe pascua jeē ní jíhi. <sup>8</sup> Núu súcuan te na cócūhun ní yō ndese ní cuu vico pascua un, te na cóo ndije ndaā anuá yō, te suu cúu nájñūhun pan jeē tū na levadura yíhi. Te ma sáha yó jniñu néé jín jniñu jnehén, jeē cúu nájñūhun levadura jeē ní tvi.

<sup>9</sup> Nuū inga carta jeē ní tee ri nuū rō jijnáhan ró ní cahān rí jeē ma quiví nduu rō jín ñayuu cájica jnéni. <sup>10</sup> Te tu ní cáchi rí jeē ma quíjñahan cuiti rō jín ñayuu tu cácaandíje jeē cájica jnéni, jeē ndíyo ní, jeē sácúhñá, jeē

chiñúhún ídolo. Chí núu súcuan te jíní ñúhún jeē quēnda ró ini ñayiví nuú, chí tuá na inga modo jeē cújyo ró núu i chí ndéé yó ñayiví jín i. <sup>11</sup> Chí sa suhva ní cáchi rí jeē ma quiví nduu rō jín máá ñayuu jeē cácahān i jeē cúu i hermano, te núu jíca jnéni i, chí ndíyo ní i, chí chíñúhún i ídolo, chí chíso jñūhun i siquí jñahan i, chí nájini i, chí cuíhñá i. Te ní ma cáji cuiti rō staā jín ñayuu casáha súcuan. <sup>12-13</sup> Chí nasúu jniñu rí cúu jeē sándaā rí siquí ñayuu jeē tu cáhīn jín yó. Yaā Dios cúu jeē sándaā siquí i. Te ñayuu cáhīn jín ró chí cánuú jéé sándaā ró siquí i. Núu súcuan te cánuú jéé quēnehen ró tēe ní sáha cuēchi un jeē íne de mēhñu ró, na quēnda de.

*Jeē ma cáquin i cuēchi siquí jñahan i nuū tohó tu cácaandíje*

## 6

<sup>1</sup> Te núu jñahan ró jéé candíje ní sáha cuēchi siquí rō, ¿te naun jéngoo ró jín de nuū tohó jeē tu cácaandíje jín yó? ¿Te naun tu cásaandaā ró nuū jñahan ró cácaandíje Yaā Dios? <sup>2</sup> ¿A tu cájini rō jeē ñayuu cácaandíje Yaā Dios chí iñ quiví te sándaā i jniñu ñayuu ñayiví? Te núu iñ quiví sándaā rō jniñu ñayuu ñayiví, ¿te á má cúu sándaā rō vijna siquí táca cuēchi lúli cásaá jñahan ró? <sup>3</sup> ¿A tu cájini rō jeē iñ quiví te sándaā yō nde jniñu táca ndajéhé andiví? Te nagā ní cuu jniñu ñayiví yáha jeē ma cúu sándaā yō. <sup>4</sup> Núu súcuan te núu jñahan ró sáha de iñ cuēchi siquí rō, ¿te naun jéngoo ró sa nuū táca tēe jeē tu cúu de jñahan ñayuu cácaandíje jeē sándaā de siquí cuēchi ún? <sup>5</sup> Súcuan cáhán rí návāha na cúcanu rō jijnáhan ró. ¿A tu íyó ní iñ tēe jécūhun ní mēhñu ró jeē cuu sándaā de siquí rō? <sup>6</sup> Tú vāha jeē iñ hermano caquin cuēchi siquí inga hermano nuū tohó jeē tu cácaandíje.

<sup>7</sup> Te jeē cájequin rō cuēchi siquí jñahan ró, chí jeē caství í rō cúu. ¿A tú vāha ga cuandeyí ní rō na sáha i cuēchi siquí rō chí quende i ndajniñu ró? <sup>8</sup> Te tuú chí sa máá ró cásaá cuēchi te cáquende ró ndajniñu, te nuū táca hermano ró cúu jeē casáha ró.

<sup>9-10</sup> ¿A tu cájini rō jeē ñayuu tu íyó ndáa, ma nihín tahú i quiví i ñuu nuū ndácu Yaā Dios jniñu? Ma stahú ró maá ró cani ní rō jeē nihín tahú rō, chí ní ñayuu jeē jíca jnéni, ní ñayuu chíñúhún ídolo, ní ñayuu casiquí ndéé jñahan, ní tēe sáha ndiyí jín jñahan yí, ní ñayuu cuíhñá, ní ñayuu ndíyo ní, ní ñayuu nájini, ní ñayuu chíso jñūhun siquí jñahan, ní ñayuu stahú jñahan siquí xūhun, ma nihín tahú i quivícoo i ñuu nuū ndácu Yaā Dios jniñu. <sup>11</sup> Te súcuan ní candāa sava ró núu, te vijna chí je ní nacate ya rohó, te cáhiyo ndoo cáhiyo í rō nuū yā. Chí je ní ndahva yā cuēchi ró jéé jín máá Jítoho yō Jesús jín Espíritu Yaā Dios.



*Jeē iyó ndoo iyó ū yiqui cūñu ñayuu cácadjje*

<sup>12</sup> Te ndaa cūu jeē cácahān jeē ndihi-ni jñiñu iyó vāha sáha yó núu ndese cúní yō. Te vēsú sūcuan te nasūú ndihi sáha jeē quēndōo vāha ánuá yō. Ndihi chí cuu sáha yō, te vēsú sūcuan te tu iyó vāha jeē quívi yó núú jñiñu jeē stívi ánuá yō. <sup>13</sup> Te ndaa cūu jeē cácahān jeē ndeyu cūu jeē cūhun chíji, te chíji cūu jeē cūhun ndeyu. Te ñn quívi te tuá coo sūcuan, chí naa ndindúú un sáha Yaā Dios. Te nasūu siquī jeē cáca jñení yó cūu jeē iyó yiqui cūñu yō, chí sa suhva jeē sáha yó jée cuní maá Jítoho yō. Te Jítoho yō chí ndító ya yiqui cūñu yō. <sup>14</sup> Te nájñuhun jeē ní nastécu Yaā Dios Jítoho yō, suni sūcuan nastécu yā yohó jíñ poder yā.

<sup>15</sup> ¿A tu cájini rō jeē yiqui cūñu táca ñn ñn rō cūu nájñuhun táca parte yiqui cūñu Cristo? Núu sūcuan ¿te á cuu quende yó ñn parte yiqui cūñu Cristo te squijnáhan yó jíñ ñn ñahan jica jñení? Ma cūu cuiti sūcuan. <sup>16</sup> ¿A tu cájini rō jeē tēe quijnáhan jíñ ñahan jica jñení, ñn na yiqui cūñu ni nduu de jíñ ña? Chí cáhan tutu íi: Jeē ndindúú chí ñn na yiqui cūñu cuu, áchí. <sup>17</sup> Te ñayuu jeē quijnáhan jíñ maá Jítoho yō, chí suni sūcuan ñn na cūu i jíñ yá siquī jeē candíje i ya.

<sup>18</sup> Núu sūcuan te cunu rō jée ma quívi rō núu jñuhun jica jñení. Chí táca gá cuēchi jeē sáha ñayuu, chí nastúú yiqui cūñu i stívi i. Te núu jica jñení i, te siquī yiqui cūñu i cūu jeē sáha i cuēchi. <sup>19</sup> ¿A tu cájini rō jeē yiqui cūñu rō cūu templo Espírítu Santo jeē ní jéhe Yaā Dios nuū rō, te ndéé yá ñni rō? Te nasūu cuenta maá rō cácuu rō. <sup>20</sup> Chí Yaā Dios yahu ní cuu jeē ní nacuaan ya rohó jíñáhan rō. Te jeē yūcuan canuú jée cáca yíñuhún rō nuū Yaā Dios jee sáha rō jñiñu vāha nde jíñ yiqui cūñu rō jíñ ñni jíñ ánuá rō, chí máni cuenta Yaā Dios cūu.

*Jñuhun cástūhun siquī tēe jíñ ñasihí*

## 7

<sup>1</sup> Vijna te na cáchi ri siquī táca jñuhun jeē ní cacajñuhun rō ruhū nuū carta. Jendaá jeē vāha ga quendōo ñn tēe núu tú condeca de ñahan. <sup>2</sup> Te siquī jeē iyó jñuhun jñení, te vāha ga jeē táca tēe na cóo ñasihí maá de, te suni táca ñahan coo yñi maá ña. <sup>3</sup> Te yñi na squícu vāha de nuū ñasihí de jeē cūu de yñi ña. Te suni sūcuan ñasihí na squícu vāha ña nuū yñi ña. <sup>4</sup> Chí ñasihí chí tu cūu sáha ña jeē cuní ña jíñ yiqui cūñu ña, chí suni jeē cuní yñi ña. Te suni sūcuan yñi tu cūu sáha de jeē cuní de jíñ yiqui cūñu de, chí suni jeē cuní ñasihí de. <sup>5</sup> Te ma sasáhán rō maá rō nuū jñáhan rō. Te núu cácuni rō jeē vihyá gā cacān tahú rō jecu tiempo, te núu cáhíyo conforme ndindúú rō, te cuu sásáhán rō maá rō nuū jñáhan rō. Te yūcuán na te vāha ga naquijnáhan tucu

ró, návāha ma cóto ndee Satanás rohó siquī jñuhun jñení.

<sup>6</sup> Te nasūu jee ndácu ri jñiñu jeē canuú quijnáhan rō, chí jeē jéhe ri jñuhun cūu. <sup>7</sup> Chí nájñahan ni rī jeē táca tēe na cóo maá ñn-ni de, nájñuhun iyó maá rí. Te sñn sñn ni sáha Yaā Dios jíñ ñn ñn de ndese cūu maá de, chí sava de cuu quendōo maá ñn-ni de, te inga de chí tuú chí sñn ni sáha ya jíñ de.

<sup>8</sup> Núu sūcuan te cáhan rī jíñ ñayuu cáhíyo maá ñn-ni, jíñ ñahan ní caquendōo ndáhú, jeē vāha ga te núu quendōo maá ñn-ni i, nájñuhun iyó maá rí. <sup>9</sup> Te núu jíñ i jeē ma cánda i quendōo maá ñn-ni i, te na quijnáhan i núu sūcuan. Chí vāha ga jeē quijnáhan i vēsú jeē ndúqujji i.

<sup>10</sup> Te nuū ñayuu jeē jé ni quijnáhan chí ndácu ri jñiñu jeē ñahan ma ndusñn ña jíñ yñi ña. Te nasūu rúhū cūu jeē ndácu jñiñu, chí maá Jítoho yō. <sup>11</sup> Te núu ñn ñahan ndusñn ña jíñ yñi ña, te na quēndōo maá ñn-ni ña, chí cuu naquijnáhan ña jíñ yñi ña. Te yñi suni ma ndusñn de jíñ ñasihí de.

<sup>12</sup> Te jíñ sava ga ñayuu chí cáhan rī vāha jée jéni ni maá rí, te nasūu jee ní cachi maá Jítoho yó cūu. Núu ñn hermano ndéca de ñahan jeē tu cándíje, te núu nájñahan ni ña condee ña jíñ de, te ma ndusñn de jíñ ña. <sup>13</sup> Te núu ñn ñahan ndéca ña tēe jeē tu cándíje, te núu nájñahan ni de condee de jíñ ña, te ma ndusñn ña jíñ de. <sup>14</sup> Chí tēe tu cándíje, yñi cuenta de nuū Yaā Dios siquī jeē ní quijnáhan de jíñ ñahan cándíje. Te ñahan tu cándíje, yñi cuenta ña nuū Yaā Dios siquī jeē ní quijnáhan ña jíñ tēe cūu hermano cándíje. Chí núu tu sūcuan te sehe i ma quñi cuenta i nuū Yaā Dios, te vijna chí yñi cuenta i nuū yā. <sup>15</sup> Te yñi chí ñasihí tu cándíje, núu fuerza cuní i ndusñn i jíñ jñáhan i, te na ndúsñn i. Chí núu sūcuan cuní i, te hermano chí hermana cándíje tu canuú casi i jeē ndusñn jñáhan i jeē tu cándíje. Chí ni cana Yaā Dios yohó jée condee maní yō jíñ jñáhan yó. <sup>16</sup> Te rōhó jée cácuu ñasihí, tu cájini rō, sanaa te cándíje yñi rō sáha rō, te cácu de. Te suni sūcuan rōhó jée cácuu yñi, tu cájini rō, sanaa te cándíje ñasihí rō sáha rō, te cácu ña.

<sup>17</sup> Te ná ñn ná ñn rō na quēndōo rō ndese ni sáha Jítoho yō jeē cūu rō, jíñ ndese iyó rō ná ni cana ya rohó ní cándíje rō. Te sūcuan ndácu ri nuū táca grupo ñayuu cácadíje. <sup>18</sup> Núu ni cana ya ñn tēe jeē ní cuu circuncidar, te sūcuan na quēndōo de. Núu ni cana ya ñn tēe jeē tu ní cūu circuncidar, te ma cūu de circuncidar. <sup>19</sup> Chí tú na vé sáha núu cūu yó circuncidar chí tuú, chí jeē canuú gá cūu jeē na squícu vāha yó jñiñu cuní Yaā Dios. <sup>20</sup> Ná ñn ná ñn rō na quēndōo rō ndese iyó rō ná ni cana ya rohó ní cándíje rō. <sup>21</sup> Núu mozo jeē ní jeen ñayuu cūu rō ná ni cana ya rohó, te ma cóndíhvī ni rō jeē quēnda rō. Te núu iyó modo jeē quēnda rō nduu libre rō, te iyó vāha

jeē sāha ró. <sup>22</sup> Chi tēe cúu mozo jeē ní jeen ñayuu, te núu ní cana Jitoho yō de, te vijna chí ni nduu libre de nuū cuéchi de, jéjníñu de nuū maá Jítoho yō. Te suni súcuan tēe sájniñu cuenta maá, te núu ní cana ya de, te vijna chí ni nduu de mozo jejniñu nuū Cristo jeē ní nacuaan ya de. <sup>23</sup> Chi yahu ni cuu jeē ní nacuaan Yaā Dios rohó jijnáhan ró, cúu jeē ní jíhí Sēhe ya jehē rō. Núu súcuan te ma cuajniñu ró nuū jniñu cáhá-ni jeē ndácu ñayuu ñayíví. <sup>24</sup> Núu súcuan hermano, ná ñin ná ñin ró na quéndōo ró nuū Yaā Dios ndese iyó ró ná ni cana ya rohó.

<sup>25</sup> Te vijna te siquī ñayuu jeē iyó máá-ni, tú na jñūhun ní ndácu Jitoho yō nuū rī. Te na cáhán rī jeē jéni ní maá rí, chí ni cundáhú ní Jitoho yō ruhū, te ni sāha ya jeē cúu cáhán ndaā rī. <sup>26</sup> Jéni ní rī jeē váha-ni núu quendōo-ni tēe ndese cáhíyo de, jeē siquī jeē iyó jñúndóho tiempo yáha. <sup>27</sup> Núu iyó ñasihí ró, te ma ndusñn ró jíin ña. Te núu tu iyó ñasihí ró, te ma nducú ró ña. <sup>28</sup> Te núu qui-jnáhan ró, te nasūu cuéchi cúu. Te núu qui-jnáhan sūchi síhí, te suni nasūu cuéchi cúu. Te ñayuu qui-jnáhan, chí niññi i jñúndóho ñayíví yáha, te cúní rī jeē ma niññi rō jñúndóho.

<sup>29</sup> Hermano jijnáhan ró, jñūhun jeē cáhán rī yáha cúu jeē yachi-ni ndihí tiempo jeē sāha yó jniñu ya. Núu súcuan te nde vijna te tēe iyó ñasihí, na cóndihví gā ni de siquī jniñu máa yá vésú siquī ña. <sup>30</sup> Te ñayuu jeē ní jíhí jnáhan vehe i, na sāha i nájnūhun jeē tu cúcuíhyá ni i. Te ñayuu cúsiñ ni, na sāha i nájnūhun jeē tu cúsiñ ní i. Te ñayuu jéen, na sāha i nájnūhun jeē nasūú ndajniñu i cúu. Ma cuáha i jñūhun jeē cási táca un jéé ma cúu cóndihví ní i jniñu máa yá. <sup>31</sup> Te ñayuu jeē ní cacóndihví ní siquī ndajniñu ñayíví yáha, ma cuoneñu ga i jíin. Chí je yajni naa táca jéé iyó ñayíví yáha.

<sup>32</sup> Cúní rī jeē ma nácani ndasi ní rō siquī táca jéé iyó ini ñayíví. Chí tēe cúu soltero, ndéhví ní de jniñu máá Jitoho yō, ndese cusñ ní Jitoho yō sāha de. <sup>33</sup> Te tēe iyó ñasihí chí ndéhví ní de jniñu iyó ñayíví, ndese cusñ ní ñasihí de sāha de. <sup>34</sup> Te suni súcuan sñn sñn jéni ní ñahan iyó yñ jíin ñahan iyó máá. Chí ñahan iyó máá, ndéhví ní ña jniñu máá Jítoho yō, chí cúní ña jeē coo ndoo coo ñi anuá ña jíin yíqui cúñu ña cuajniñu ña nuū yā. Te ñahan iyó yñ chí ndéhví ní ña jniñu iyó ñayíví, ndese cusñ ní yñ ña sāha ña.

<sup>35</sup> Jeē váha máá ró jijnáhan ró cúu jeē ní cáhán rī súcuan. Chí nasūu jéé nducú rí casi rī jeē qui-jnáhan ró, chí sa suhva cúní rī jeē caca yíñúhún ró te nune ró cuajniñu cutú ró nuū maá Jítoho yō.

<sup>36</sup> Te núu ñin tēe iyó sēhe síhí de, te núu cuayñ i, te núu jéni ní de jeē váha ga jeē qui-jnáhan i, núu súcuan te na sāha de jeē jéni ní de, te cuáha de jñūhun qui-jnáhan i, chí nasūu cuéchi cúu. <sup>37</sup> Te núu ñin tēe ní cundaā ní de jeē cóndee sēhe síhí de súcuan-ni, jeē

ma cuáha de i vésú fuerza jícan ñayuu i, núu súcuan te cuu quendōo i nájnūhun cúní de, chí jeē váha sāha de. <sup>38</sup> Núu súcuan te tēe jéhe jñūhun qui-jnáhan i, váha sāha de. Te tēe tu jéhe jñūhun, chí váha ga sāha de.

<sup>39</sup> Te ñahan ní qui-jnáhan, chí yññi ña ndaha yñ ña níñi jeē tēcu de. Te núu je ní jíhí yñ ña, yūcuán na te je ní cuu libre ña jeē qui-jnáhan tucu ña jíin na-ni tēe cúu ní ña, te núu tēe cándje nuū Jítoho yō cúu de. <sup>40</sup> Te jéni ní rī jeē ndetú gā coo ña te núu quendōo ña súcuan-ni. Te suni jéni ní rī jeē jíin Espírítu Yaā Dios cúu jeē cáhán rī.

*Siquī cúñu ní sócō nuū ídolo*

## 8

<sup>1</sup> Te vijna te na cáchi rī siquī cúñu ní sócō nuū ídolo. Ndaā chí táca yó jéni ní yó jeē maá yó cúu jeē jíni ndese cúu. Te táca jéé jíni yó ún, chí nducú sāha jeē cundúxi yó. Te sa suhva jeē cundáhú ní yó jnáhan yó, sāha un jéé ije i jíin jñūhun ya. <sup>2</sup> Núu na-ni ñayuu jéni ní i jeē jíni váha i, te tuú chí ná tu cuni cuiti i nájnūhun cánuú cuni i. <sup>3</sup> Te sa suhva ñayuu jeē máa i jíin Yaā Dios, máá i cúu jeē jetáhú yá.

<sup>4</sup> Núu súcuan te na cástūhun rí siquī cúñu jeē ní casocō ñayuu nuū ídolo. Ndaā chí jíni yó jeē táca ídolo ñayíví, tú ndaā cuiti. Te tú na inga yaā iyó, chí máá ñin-ni Yaā Dios. <sup>5</sup> Te ñayuu chí cájeni ní i jeē iyó táca yáa ini andívi jíin ñayíví, chí cacáhan i jeē iyó ndije cuehé yaā i jíin jítoho i. <sup>6</sup> Te nuū maá yó chí ñin-ni Yaā iyó, jeē cúu Tátá yó Yaā Dios. Te máa yá ní sāha táca jéé iyó, te cuenta maá yá cúu yó jijnáhan yó. Te suni iyó ñin-ni Jitoho yó Jesucristo, te nde nuū maá yá véji táca jéé iyó, te suni máa yá ní sāha yóhó.

<sup>7</sup> Te ñayuu cácañdje, chí tú ndihí i jíni jñūhun yáha. Chí sava i ní cacáan i ní chíñúhún i ídolo nde ná tu candje i. Te nde vijna núu cáyeji i cúñu ún te sāha i cuenta jeē ní sócō nuū ídolo cúu. Te siquī jeē ná tu ije i jíin jñūhun Yaā Dios, te jéni ní i jeē cunjéhen anuá i sāha cúñu jeē ní sócō nuū ídolo ún. <sup>8</sup> Te ndaā chí nasūu jéé yéji yó cúu jeē sāha jeē cuatáhú Yaā Dios yohó. Chí núu yéji yó, nasūu yúcuán sāha jeē quéndōo váha ga yó nuū Yaā Dios. Te núu tu yéji yó, ní tu sāha jeē quéndōo ndáhú gá yó nuū yā. <sup>9</sup> Te vésú tú ní ñin jési jeē ma cúu caji ró cúñu ún, te coto ró jnáhan ró jéé ná tu ije jíin jñūhun ya, te ma sāha ró jéé suni caji i jeé jéni ní i jeé cuéchi cúu. <sup>10</sup> Váha ga ma caji ró núu súcuan, chí sanaa te hermano ró jeé ná tu ije jíin jñūhun ya, coto de rohó jéé yéji ró ini vehe ídolo, chí jíni váha ró jéé tú na vé sāha. Te súcuan te sāha ró jéé cájni ní de jeé suni caji maá de cúñu jeé ní sócō nuū ídolo, vésú jéni ní de jeé cuéchi cúu. <sup>11</sup> Te súcuan stívi ró anuá hermano ró jeé ná tu ije jíin jñūhun ya, jeé

vēsú jini vāha máá ró jeē tú na vé sáha jeē cáji rō. Te tú vāha sáha rō, chi suni jehé maá de ni jihí Cristo. <sup>12</sup> Te núu súcuan stávi ró anuá hermano rō jeē ná tu ije jíin jnúhun ya, núu súcuan te siquí Cristo cóu jeē sáha rō cuéchi. <sup>13</sup> Núu súcuan te núu cūñu un sáha jeé quívi hermano rī cuéchi, te ma cáji cuiti ga rī cūñu ún, návāha ma sáha rī jeé quívi de cuéchi.

*Siquí jeē iyó derecho tēe cácuu apóstol*

## 9

<sup>1</sup> Te máá rī chi jíca libre rī, te iyó derecho rī siquí jeē cóu rī apóstol, tēe ní tají yá scáca jnúhun ya. Chi ní jito rī nuū máá Jítoho yō Jesús, te máá ró jijnáhan ró cácuu jniñu jeē ní sáha rī jeē ní squívi rī rohó ndaha Jítoho yō. <sup>2</sup> Te núu sava ga ñayuu tu jétáhú i jeē cóu rī apóstol, te nuū máá ró chí suu cóu ndije rī. Chí siquí jeē ní scandíje rī rohó jijnáhan ró, te jeé yúcuan cácuu ró prueba jeē steén jeē ndiso jniñu rī cóu rī apóstol nuū máá Jítoho yō.

<sup>3</sup> Te jnúhun yáha cáhán rī jehé máá rī nuū ñayuu cácahán siquí rī. <sup>4</sup> Achí rī: Iyó derecho rī cáji rī coho rī jeé cájehe ñayuu núu cúní rī. <sup>5</sup> Te suni iyó derecho rī núu jeē cuní rī condeca rī in hermana candíje cuu ñasihí rī, caca ña jíin rī, nájñuhun iyó ñasihí Pedro jíin táca gá apóstol jíin tēe cácuu ñani máá Jítoho yō. <sup>6</sup> ¿Chí cájeni ní rō jeē máá ruhū-ni jíin Bernabé tú na derecho rī jeé stóo rī jniñu cásáha rī jeé cótecu rī, návāha nune ga rī nacani rī jnúhun vāha ya, chí naún? <sup>7</sup> ¿A iyó soldado jeé técu de xūhún vehe de? ¿A iyó tēe jeé jítu uva te tu yéji de ndehé ún? ¿A iyó tēe jeé ndító lanchi te tu jhi de leche tí? Tú cuítí. ¿Te á suni tu iyó derecho rī cotecu rī siquí jnúhun ya naún? <sup>8</sup> Te ma cáni ní rō jeé táca jeé cahán rī yahá, máni máá jeé cácahán ñayuu ñayívi cóu. Chi nde máá ley yá jeé ní jéhe ya nuū Moisés, cáhán súcuan. <sup>9</sup> Chí cáhán nuū tútu ley yá: Ma chúhun ró ñunu yuhu stíqui, quítí jéxín trigo, achí. Te ndaá chí nasúu máni siquí stíqui cóu jeé ní cáhán yá súcuan. <sup>10</sup> Chí suni siquí máá yó ní cahán yá. Chí ley un ní jéhe ya jeé vāha máá yó, chí steén jeé tēe jítu jíin tēe jéxín trigo cánuú jeé nihín de sava un quívi ndutútu. <sup>11</sup> Te suni súcuan ruhú jijnáhan rī jeé ní cataji rī jnúhun Espíritu ini anuá rō, ¿te á véyi cóu jíin ró núu nastútú rī jeé cótecu rī nuū rō? <sup>12</sup> Te núu sava ga tēe cástéén nuū rō, iyó derecho de cacán de nuū rō, te nagá ní cuu ruhú jijnáhan rī jeé ma cóo derecho rī cacán rī.

Te tu ní cájicān rī derecho un, chí sa suhva ní jendeyí ní rī coto máá rī jeé cáji rī, návāha ma cási rī jeé cáca jnúhun vāha Cristo. <sup>13</sup> Te cájini rō jeé sutú ní cajejniñu ini templo, ní cacotecu de siquí jeé ní casocó ñayuu ini templo. Chí sutú ní cajejniñu nuū altar nuū ní casocó i quítí, suni ní cayejí de sava quítí

ún. <sup>14</sup> Te suni súcuan ní ndacu máá Jítoho yō jniñu jeé tēe cánacani jnúhun jeé jnáma ya yohó, siquí jniñu un nihín de jeé cótecu de. <sup>15</sup> Te ruhú tu ní jíicān cuiti rī derecho rī yahá, te suni nasúu jeé tēe rī jnúhun yáha návāha cuáha ró núu rī jijnáhan ró. Chí jéni ní rī jeé vāha ga núu na cóu rī nasúu jéé quíhin rī jeé cuáha ró, chí casi jeé cósiñ ní rī scáca rī jnúhun ya súcuan-ni.

<sup>16</sup> Te tú vāha núu sátéyi rī máá rī siquí jeé nácani rī jnúhun jeé jnáma ya yohó. Chí in jeé ní tejniñu ya ruhú cóu, te cánuú squícu rī. Chí nacá ndahú cóu rī te núu tú nacani rī jnúhun ya. <sup>17</sup> Te núu jeé cóu ní máá rī sáha rī nuú, yúcuán na te cuu cacán rī yáhu rī. Te tuú chí cánuú sáha rī, chí máá Yáa Dios ní tee ya jniñu siquí rī. <sup>18</sup> Núu súcuan te yáhu rī cóu jeé cósiñ ní rī jeé súcuan-ni nácani rī jnúhun jeé jnáma ya yohó, te tu jíicān rī derecho rī jeé cotecu rī siquí jeé nácani rī jnúhun ya.

<sup>19</sup> Chí vēsú tú ní in ñayuu ndácu jniñu nuú rī, te ní sáha rī máá rī mozo nuú táca i jeé nácani rī jnúhun nuú i, návāha nihín rī cuehé i candíje i Cristo. <sup>20</sup> Núu ine rī jíin jnáhan rī hebreo te sáha rī nájñuhun cásáha i, návāha cuu scándíje rī i. Chí násáha rī máá rī nájñuhun tēe cáyihí chíji ley Moisés, návāha cuu scándíje rī i jeé cáyihí i chíji ley un, vesú tuá yáhi rī chíji ley un. <sup>21</sup> Te suni násáha rī máá rī nájñuhun ñayuu tu cáyihí chíji ley Moisés, návāha cuu scándíje rī ñayuu ún. Te vēsú súcuan te yáhi rī chíji ley Yáa Dios, chí suu cóu ley Cristo jeé squícu rī. <sup>22</sup> Te núu ine rī jíin ñayuu jeé ná tu ije jíin jnúhun ya, te sáha rī máá rī nájñuhun jeé ná tu ije rī jíin jnúhun ya, návāha cuu scándíje ga rī i. Núu súcuan te násáha rī máá rī núu ndese cándaa táca ñayuu, návāha táca-ni modo un te cuu scándíje rī sava i. <sup>23</sup> Táca yáha sáha rī jeé siquí jnúhun jeé jnáma ya yohó, návāha suni nihín rī tahú jeé ndiso jnúhun ya.

<sup>24</sup> Je cájini rō jeé tēe cájini carrera, jendaá chí ndihi de cájini, te in-ni de cúndeyí nihín premio. Te suni súcuan nducú ndéyi máá ró squícu ró, návāha nihín rō premio nuú yá. <sup>25</sup> Te táca tēe cúní cándeyí siquí in deporte, chí cácuáha de te cándito de máá de. Súcuan cásáha de návāha nihín de in premio jeé cóu corona ndaha yújnu jeé náa yachí. Te máá yó chí sa suhva cánducú ndéyi yó návāha nihín yō in premio jeé ma náa cuiti. <sup>26</sup> Te máá rī suni nducú ndéyi rī nájñuhun tēe cájini, te tu nducú ndéyi cáha rī. Te sáha rī nájñuhun tēe cácajnáhan juego jeé tu jéhe iyú de, chí queé jniñu sáha rī. <sup>27</sup> Chí sa suhva stóho rī yiquí cóuñu rī, te stáhví ní rī máá rī squícu rī. Chí vēsú ní stáhví ní rī inga ñayuu jeé nducú ndéyi i, te núu tu nducú ndéyi máá rī te snáā rī premio rī.

*Siquí jeé ma chíñuhún i ídolo*

## 10

<sup>1</sup> Hermano jijnáhan ró, cúní rī jeē na jécūhun ni rō ndese ni cajica jíi yō jengahán. Chi ndihí de ni cajica chíi vicō jeē ni stéén ichi nuū de, te ndihí de ni cayáha mēhñú ndute Mar Rojo jeē ní cusán, ni nune ichi. <sup>2</sup> Súcuan cúu jeē ní canduu inuú ndihí i jíin Moisés, chí ni candiquín i de chíi vicō jíin mēhñu mar. <sup>3</sup> Te ndihí i chí inuú-ni ni cayeji i alimento jeē ni jéhe máá Espíritu. <sup>4</sup> Te suni ndihí i ni cajihí ndute jeē ní jéhe Espíritu. Chi ni cajihí i ndute jeē ní cane jicā cava nuū ní cajica cuu i. Te Cristo cúu nájnūhun cava un jéé jéhe ya ndute cotecu yō ní cání. <sup>5</sup> Te vésú súcuan te cuehē i ni cunihni ni i, te tu ní cúsñi ni Yaa Dios jíin i, te jeē yúcuan ní cajihí i nuū ñūhun téhé.

<sup>6</sup> Te táca jéé ní cuu ún, ñin ejemplo cúu nuū yō, náváha ma ndíyo ni yō táca jéé neé, nájnūhun ni candiyo ni ñayuu ún. <sup>7</sup> Te ma chíñúhún ró ídolo, nájnūhun ni casáha sava i. Chi súcuan cáhán nuū tútu íi: Ni cacucōo ñayuu ún, ni cayeji i ni cajihí i vico ídolo, te ni ndocuñí i ni cajita jéhé i, áchi. <sup>8</sup> Te ni ma cáca jnéni ró nájnūhun ni casáha sava i, te ni cajihí ocō uní mül i jeē ñin quiví-ni. <sup>9</sup> Te ni ma sáha ró jniñu jeē squití ní ró Jitoho yō, nájnūhun ni casáha sava i, te ni cajihí i jeē ní catuu coō i, ni sáha ya. <sup>10</sup> Te ni ma cahán sóo ró siquí Yaa Dios, nájnūhun ni cacahán sóo sava i, te ni cajihí i jeē ní jehni ndajéhé yā i.

<sup>11</sup> Te táca jéé ní cuu ún, chí ñin ejemplo cúu nuū yō. Te súcuan yósó nuū tútu náváha na chúhun váha ni maá yō. Chí cácuu yō ñayuu cátecu quiví cuándihí ñayiví. <sup>12</sup> Núu súcuan te róhó jéé cájeni ni ró jeé cáhín nihin ró jéé ma sáha ró cuéchi, coto má quiví ró cuéchi. <sup>13</sup> Chí máni iyó jéé nducú squiví róhó cuéchi, te inuú-ni cándoho ró súcuan nde jíin táca gá ñayuu. Te cuu cucáhu ni ró Yaa Dios jeé ma cuáha ya jñūhun jeé vihyá gā coto ndee jexeén róhó vésú jeé cúu cundeyí ró jíin. Chí sa suhva núu vēji jeē nducú squiví róhó cuéchi, te chindéé ñáhán yá rohó quenda ró te cundeyí ró siquí.

<sup>14</sup> Náni máni, ma chíñúhún cuiti ró ídolo núu súcuan. <sup>15</sup> Cáhán rī jíin ró jéé cúu ró ñayuu cájecūhun ni, te na sáha ró cuenta núu ndaá jñūhun cáhán rī. <sup>16</sup> Máá copa íi jeé cájicán tahú yō jehé, suu cájihí cáhu yó jéé steén yō jeē inuú cúu ndihí yó, chí ni jeti niñí Cristo jeé siquí yó ná ni jihí yā jicā cruz. Te pan jeé sacuéchi yó cáyeji cáhu yó, stéén jeē inuú cúu ndihí yó siquí jeē ní jéhe Cristo yiqui cúñu yā ni jihí yā jehé yō. <sup>17</sup> Te vésú cuehē yō iyó, te ñin-ni ñayuu cácuu yó, chí ñin-ni pan un cáyeji cáhu yó siquí jeé cándíje yó.

<sup>18</sup> Condēhe ró ndese casáha ñayuu Israel. Táca téé jeé yéji quiti jeē ní sócō nuū yā, chí inuú-ni cúu ndihí de siquí jeé cáyeji de jeé ní sócō ún. <sup>19</sup> Núu súcuan te cáhán rī jeē tu ndé jéjñíñu ídolo, ni tu jéjñíñu cúñu jeé

ni sócō nuū ídolo, chí inuú cúu jíin táca gá cúñu. <sup>20</sup> Te suni cáhán rī jeē ñayuu tu cájini jñūhun Yaa Dios, núu cásocō i, te nuū tachí cásocō i, nasūu nuū Yaa Dios. Te tu cúní rī jeé cuajñíñu ró nuū tachí. <sup>21</sup> Ma cúu coho ró copa máá Jitoho yō te nuū cájihí ró jéé ní sócō nuū tachí. Te ma cúu caji ró nuū mesa Jitoho yō te núu cáyeji ró jeē ní sócō nuū tachí. <sup>22</sup> Ma quiví nduu yō súcuan jíin táchí, náváha ma cucuñí Jitoho yō jíin yó. ¿Chí téyi gá máá yó vésú máá yá jeē ma cúu stóho ya yohó, cájeni ni ró, chí naún?

### *Ndihí chí sáha yó jíin jñūhun cundáhú ni*

<sup>23</sup> Te ndaá cúu jeé cacahán jeē ndihí-ni jniñu iyó váha sáha yó núu ndese cúní yō. Te tuú chí nasúu ndihí sáha jeé quéndōo váha ánuá yō. Ndihí chí cuu sáha yó, te vésú súcuan te nasúu ndihí sáha jeé ije jnánhan yó jíin jñūhun ya. <sup>24</sup> Chí cánúu sáha yó jéé váha jnánhan yó, nastuu máni máá jéé váha máá yó.

<sup>25</sup> Cuu caji ró ndihí-ni cúñu cúyáhu nuū yáhu, te ma cájnūhun ró ni ma cání ni ró núu jeē ní sócō nuū ídolo cúu. <sup>26</sup> Chí cuenta máá Jitoho yó cúu ñayiví jíin ndivii jeé iyó ini, te cuu cuajñíñu yó.

<sup>27</sup> Te núu ñin tēe tu cándíje, cana de róhó caji ró jíin de, te núu cácuni ró quihín ró, núu súcuan te caji ró táca jéé cání de nuū ró. Te ma cájnūhun ró ni ma cání ni ró núu jeē ní sócō nuū ídolo cúu. <sup>28</sup> Te núu cachi ñin i nuū ró jeé cúñu ni sócō nuū ídolo cúu, yúcuan na te ma cáji ró, chí siquí jeé jéni ni i jeé cuéchi cúu, te tu cúní ró sáha ró jéé quiví i cuéchi. <sup>29</sup> Te súcuan cáhán rī siquí jeé inga i cájeni ni i jeé cuéchi cúu, te nasūu jéé súcuan cájeni ni máá ró.

Te sanaa te cahán ñin ró: ¿A tu iyó libre rī caji rī jeé cuní maá rī, vésú cájeni ni inga i jeé cuéchi cúu? <sup>30</sup> ¿Te núu nácuatáhú rī nuū Yaa Dios te yéji rī, te najehé cacahán i siquí rī jeé yéji rī? achi ró. <sup>31</sup> Tuú chí ndihí jeé sáha ró, vésú jeé caji ró chí jéé coho ró, chí na-ni jniñu sáha ró, ndihí na sáha yíñúhún ró jíin Yaa Dios, náváha cuní ñayuu jeé luu cújéhu ya. <sup>32</sup> Te ma sáha ró jniñu jeé squiví ró ñayuu nuū cuéchi, cúu ñayuu hebreo, cúu ñayuu táca nación jeé tu jíin jñūhun ya, cúu ñayuu cándíje Yaa Dios. <sup>33</sup> Te ruhú chí nducú rí jeé na cúsñi ni táca ñayuu jíin táca jniñu sáha rī. Tu nducú rí jeé váha máá-ni rī, chí sa nducú rí sáha rí jeé váha cuehē ñayuu, náváha cácu i.

## 11

<sup>1</sup> Te na ndácu ró ruhú jijnáhan ró, nájnūhun ndácu máá rí Cristo.

### *Siquí ndese cánúu sáha ñahan cándutúti*

<sup>2</sup> Váha casáha ró, hermano, jeé niní cánucūhun ni ró ruhú, te cándihvi ni ró jíin táca jniñu jeé ní steén rī nuū ró. <sup>3</sup> Te cúní rī jeé na jécūhun ni ró jeé Cristo cúnúu yá

nuū tāca tée. Te tēe cūnuú de nuū ñasihí de. Te Yaā Dios cūnuú yá nuū Cristo. <sup>4</sup> Nūū ñn tēe ññuhun de lélú te jícán tahú de chí nácani de jñuhun nuū ndutútú ñayuu cácanđje, núu súcuan te jéhe de jñuhun canu máá de. <sup>5</sup> Te sa núu ñn ñahan tu ndési xiní ña te jícán tahú ña chí nácani ña jñuhun, núu súcuan te jéhe ña jñuhun canu máá ña, chí ñn-ni cúu un núu ní sáte xiní ña. <sup>6</sup> Chí núu tú casi ña xiní ña, vāha ga na sáte ña ixi ña núu súcuan. Te núu cūcanu ña jeē sáte ña ixi ña chí jéē sáte lii ña, te na cási ña núu súcuan. <sup>7</sup> Te tēe chí ma cási de xiní de, chí máá de cúu muestra jeē steén ndese cúu Yaā Dios jeē cujéhu ya. Te ñahan chí stéén ña jeē cujéhu tēe. <sup>8</sup> Chí ná ni sáha ya tēe, te nasūu jín yiqui ñahan ni sáha ya, chí sa suhva jín yiqui tēe ni sáha ya ñahan. <sup>9</sup> Te ñahan chí ni cuvāha ña jeē siquí tēe, nasūu tēe jeē siquí ñahan. <sup>10</sup> Te jeē yúcuan cānuú jéē cōndesi xiní ñahan, te suu stéén jeē cujéhu tēe, chí suni cāndéhé ndajéhé yā ndese sáha ña. <sup>11</sup> Te vesú súcuan te yohó jéē candíje yó, chí jíní yó jeē tu iyó tēe núu jeē tu iyó ñahan, te tu iyó ñahan núu jeē tu iyó tēe. <sup>12</sup> Chí vesú ni sáha ya ñahan jín yiqui tēe, te vijna cácu tēe chíji ñahan, te máá Yaā Dios cúu jeē sáha tācá-ni.

<sup>13</sup> Na sáha máá ró cuenta ¿á iyó váha núu tu ndési xiní ñahan te jícán tahú ña nuū Yaā Dios? <sup>14</sup> Chí sáha yó cuenta jeē ñni ñayiví yáha, núu cāni ixi tēe te cūcanu de sáha. <sup>15</sup> Te ñahan chí sa vāha jito ña te núu cāni ixi ña, chí suu ni jéhe ya jeē cōndesi xiní ña. <sup>16</sup> Te núu ndé ñn ñayuu cuní i cahān i siquí jñuhun yáha, te ruhú jín tāca grupo ñayuu cácanđje nuū Yaā Dios, tú na inga costumbre jejnúhún rí siquí jñuhun yáha.

### *Jeē castívi i siquí Cena Jitoho yó*

<sup>17</sup> Te iyó inga jñuhun cānuú cahān rí jín ró, chí tu cúu cahān rí jeē vāha cásáha ró. Chí nuū cāndutútú ró te tu sáha jeē quéndōo vāha ga ró, chí sa jeē castívi ró. <sup>18</sup> Xihna jñuhun yáha cāhán rí, jeē nihín rí jñuhun jeē nuū cāndutútú ró te cācusín ni ró. Te jéni ni rí jeē ndaā cúu. <sup>19</sup> Chí níni coo sava ró jéē cusín ni, návāha natūu ndé-ni cúu jeē cácanđje vāha mēhñu ró. <sup>20</sup> Te jeē cācusín ró súcuan nuū cāndutútú ró, te nasūu cena máá Jitoho yó cúu jeē cáyeji ró núu súcuan. <sup>21</sup> Chí núu cáyeji ró, te tācá ñn ñn ró cúní caji xihna gā vesú jñáhan ró. Te súcuan te sava ró tu cānihñn, te cāji sōco, te sava ró cānājñi jeē cājihni cuehé. <sup>22</sup> ¿A tu cānevāha ró vehe nuū cāji ró coho ró, chí naún? Chí jeē casáha ró súcuan cúu jeē tu iyó yññuhún ró ñni vehe nuū cāndutútú ñayuu cácanđje Yaā Dios, chí cásáha ró jéē cácanu ñayuu jeē tú na vé névāha. ¿Ndesse cahān rí jín ró núu súcuan? ¿A cāhān rí jeē vāha cásáha ró? Tuú chí nasūu jéē vāha cúu jeē casáha ró súcuan.

### *Siquí jeē ní jequín Jitoho yó Cena yā* (Mt. 26.26-29; Mr. 14.22-25; Lc. 22.14-20)

<sup>23</sup> Chí jñuhun yáha jéē ní nastéén rí nuū ró, chí nuū máá Jitoho yó ni nihín rí: Jeē máá jecuáá jeē ní nastúu de Jitoho yó Jesús, te ni quihin ya pan. <sup>24</sup> Te ni nacuatáhú yá, te ni tahú cuéchi yá, te ni cahān yá jín tēe cácuáha jín yá: Quihin te caji ró jijnáhan ró, chí yáha cúu yiqui cúñu rí jeē ní sōco rí jeē siquí ró. Te níni caji ró súcuan jeē cáñuhun ni ró ruhú jeē ni jíhí rí jehē ró. Achí yá. <sup>25</sup> Te suni súcuan ni quihin ya copa ná ni cuu ni cuxíni ya jín de, te ni cahān yá: Jeē ññuhun copa yáha cúu ññi rí jeē sácútu contrato jeē jeē jnáma rí ñayuu. Te tāca jínu jeē cājihni ró, te nucūhun ni ró ruhú. Achí yá. <sup>26</sup> Chí tāca jínu jeē cáyeji ró pan un te cājihni ró copa un, súcuan cástéén ró jeē ni jíhí Jitoho yó jehé yó. Te súcuan na sáha ró ndé quiví ndíji ya.

### *Ndesse caji yññuhún i Cena yā*

<sup>27</sup> Te núu na-ni ñayuu caji i pan un chí coho i copa Jitoho yó ún, te núu tu sáha yññuhún i nuū Yaā Dios, núu súcuan te sáha i cuéchi jeē tu iyó yññuhún i siquí yiqui cúñu máá Jitoho yó jín siquí ññi yá. <sup>28</sup> Núu súcuan te coto ndee ró máá ró núu iyó ndoo ánuá ró jeē tú cuéchi ró. Te sáa te cuu caji ró pan un te coho ró copa un. <sup>29</sup> Chí núu ñn ñayuu tu yéji tu jíhí yññuhún i te tu nucūhun ni i jeē yiqui cúñu yá cúu, ñayuu ún chí nihín i castigo núu na caji i coho i. <sup>30</sup> Jeē yúcuan cúu jeē iyó cuehé ñayuu cácuñu jín jéē ní cacuxí, cáñiyo mēhñu ró. Te sava i je ni cajiñi. <sup>31</sup> Te núu coto ndee yó máá yó nde ná tu caji yó, te Jitoho yó ma cuáha ya castigo yohó. <sup>32</sup> Te núu Jitoho yó jéhe ya castigo yohó, te súcuan stóho ya yohó návāha ma jnahnú ndetū yó jín ñayuu ñayiví.

<sup>33</sup> Nání maní, núu súcuan te jeē cāndutútú ró jeē cāji ró Cena yā, te condetu ró te caji ñnuú ró. <sup>34</sup> Te núu ñn ñayuu jí i sōco, te xihna gā na caji i vehe i návāha ma stívi i nuū cāndutútú ró. Te súcuan te ma cuáha ya castigo i. Te quiví jecondéhe rí rohó te cachi rí ndese coo sava ga jññu.

### *Siquí tāca táhū jeē jéhe Espíritu*

## 12

<sup>1</sup> Hermano, cúní rí jeē na jécūhun ni ró siquí tāca táhū jeē jéhe Espíritu nuū yó, suu tāca modo jejnñu ñn ñn yó núu Yaā Dios.

<sup>2</sup> Te cājini ró jeē ná ni cuu ró ñayuu ná tu candíje, te ni cacondihví ni ró ni cachiññuhún ró ídolo ññhín. <sup>3</sup> Te vijna te na jécūhun ni ró jeē núu ndé ñayuu cahān ndevāha i siquí Jesús, te nasūu jín poder Espíritu Yaā Dios cúu jeē cahān i súcuan. Te ni ñn i ma cúu cahān i jeē Jitoho i cúu Jesús, te núu tu ndéé poder Espíritu Santo ñni i.

<sup>4</sup> Te sñn sñn tahú jéhe ya jeē cuajññu ñn ñn yó núu yá, te ñn-ni máá Espíritu cúu jeē

jéhe. <sup>5</sup> Te s̄in s̄in jéjníñu yó, te nuū maá ñin-ni Jitoho yó jéjníñu yó. <sup>6</sup> Te s̄in s̄in modo sáha yó jniñu ya, te ñin-ni Yaā Dios cúu jeē sáha jniñu un jíin yó. <sup>7</sup> Te nuū ná ñin ná ñin yó ní jéhe Yaā Dios tahū jeē sáha Espírítu ya jíin yó, návaha na sáha yó jéē ije jnánhan yó jíin jnūhun ya. <sup>8</sup> Chi sava yó ní canih̄in tahū jeē ndichí cáhán yó jnūhun ya, sáha maá Espírítu. Te sava ga yó ní canih̄in yó jeē cúu jécūhun vāha ni yó te castūhun yó, te suni maá Espírítu sáha. <sup>9</sup> Te nuū sava ga yó ní jéhe ya tahū jeē cúu cándije ñihin yó jéē sáha ya jeē jicán yó, te sava ga yó cúu sáha yó jéē ndúvāha ñayuu cácuñu, te suni maá Espírítu sáha. <sup>10</sup> Te sava ga yó cúu sáha jniñu jéhnū jíin fuerza Yaā Dios. Te sava ga yó cúu nácani jnūhun ya. Te sava ga yó ní sáha ya jeē nácani yó táca jnūhun, núu vēji nuū Espírítu yá chí tuú. Te sava ga yó ní nih̄in tahū jeē cáhán yó tijni yuhu jeē tu jécūhun ni yó. Te sava ga yó cúu nacastūhun yó jnūhun ni cahán jnánhan yó jíin inga yuhu ún. <sup>11</sup> Te táca tahū yáha, chí ñin-ni maá Espírítu sája, te s̄in s̄in jéhe ya nuū ñin ñin yó, ndese nūjnahan ni maá yá.

*Ndih̄i yó cúu nájñūhun ñin na yiqui cúñu*

<sup>12</sup> Chi nájñūhun ñin yiqui cúñu iyó cuéhē parte, súcuan cúu yó jíin Cristo jeē cúu yó nájñūhun yiqui cúñu yá, chí ñin na cúu yó jíin yá. Te vesú cuéhē parte cácuu yó te ñin-ni cúu yó, nájñūhun ñin yiqui cúñu jeē iyó cuéhē parte. <sup>13</sup> Chi ñin na ní canduu yó jíin yá ní sáha ñin-ni maá Espírítu ná ní cajendute yó. Súcuan cúu vesú cúu yó ñayuu hebreo chí ñayuu griego, vesú mozo jeē ní jeen ñayuu chí téē sájniñu cuenta maá. Te ndih̄i yó chí ñin-ni Espírítu ní canih̄in yó.

<sup>14</sup> Te ñin yiqui cúñu chí nasúú ñin-ni parte cúu, chí sa cuéhē parte cúu. <sup>15</sup> Te núu jehē cahán: Nasúu cuenta yiqui cúñu cúu ri, chí nasúú ndaha cúu ri, te tuú chí parte yiqui cúñu cúu nahín. <sup>16</sup> Te núu sōho cahán: Nasúu cuenta yiqui cúñu cúu ri, chí nasúu tinūu cúu ri, te tuú chí parte yiqui cúñu cúu nahín. <sup>17</sup> Núu ñí yiqui cúñu yó cúu tinúú, ¿te ndese cuní sōho yó núu súcuan? Te núu ñí yiqui cúñu yó cúu sōho, ¿te ndese cuaan yó xicō núu súcuan? <sup>18</sup> Te Yaā Dios ní chujnánhan ya ñin ñin parte yiqui cúñu, nájñūhun cuní yá jeē coo. <sup>19</sup> Chi núu ñin-ni parte cúu ndih̄i, te nasúú ñin ñí yiqui cúñu cúu núu súcuan. <sup>20</sup> Te tuú chí cuéhē parte iyó, te ñin-ni yiqui cúñu cúu.

<sup>21</sup> Te ni ma cúu cahán tinūu jíin ndaha: Tu jíni ñúhún rí rohó. Te ni xiní ma cúu cahán jíin jéhe: Tu jíni ñúhún rí rohó. <sup>22</sup> Chi sa suhva táca parte yiqui cúñu jeē jéni ní yó jeē núu ga fuerza, suu cúu jeē cánuú gá. <sup>23</sup> Te táca parte yiqui cúñu jeē jéni ní yó jeē tu cáa vāha, suu cúu jeē yucún gá chūhun yó sahma. Te parte jeē tú-ni luu cáa, sa vāha ga jési yó. <sup>24</sup> Chi parte jeē lúu cáa, tu cánuú

jéē condih̄yū. Chi súcuan ni chujnánhan Yaā Dios yiqui cúñu, jeē yucún gá ndító yó jéē tu cáa luu. <sup>25</sup> Súcuan ni sáha ya návaha ma cus̄in táca parte yiqui cúñu, chí sa chindéé ñájñánhan vāha jíin jnánhan. <sup>26</sup> Te núu jérú ñin parte yiqui cúñu, te suni ñí cáhnu-ni jétú. Te núu ñin parte ndító yucún yó, te suni ndih̄i-ni parte quéndōo vāha.

<sup>27</sup> Te róho jíjnánhan ró chí nájñūhun yiqui cúñu Cristo cácuu ró, chí ñin na cúu yó jíin yá. Te ná ñin ná ñin ró cúu ñin ñin parte yá. <sup>28</sup> Núu súcuan te s̄in s̄in jniñu ní jéhe Yaā Dios nuū táca ñayuu cácan dije jeē cácuu i nájñūhun ñin ñin parte yá: Te suu ñin parte yá cúu táca apóstol jeē ní jeni ya x̄ihna gā jeē scáca de jnūhun ya. Yūcuán na te jeē uú, téē cácanani jnūhun ya, te jeē uní, téē cástéén. Yūcuán na te ñayuu casáha jniñu jéhnū jíin fuerza yá, jíin ñayuu casáha jeē ndúvāha ñayuu cácuñu, jíin ñayuu cachindéé ñájñánhan, jíin ñayuu cándiso jniñu, jíin ñayuu cácahán s̄in s̄in yuhu jeē tu cájecūhun ni. <sup>29</sup> ¿A ndih̄i yó cácuu apóstol, chí naún? ¿A ndih̄i yó cácanani jnūhun? ¿A ndih̄i yó cástéén? ¿A ndih̄i yó cuu sáha jniñu jéhnū? <sup>30</sup> ¿A ndih̄i yó cuu sáha jeē ndúvāha ñayuu cácuñu? ¿A ndih̄i yó cuu cahán s̄in s̄in yuhu? ¿A ndih̄i yó cuu nacastūhún yuhu ún, chí naún? Tuú chí s̄in s̄in tahū ní canih̄in yó. <sup>31</sup> Núu súcuan te na cóndih̄v̄i ní rō cacán rō jeē cuáha Yaā Dios tahū cánuú gá nuū rō. Te vijna te na stéén rī nuū rō ñin jeē vāha ga nuū táca gá tahū ún, suu jnūhun cundáhú ní jnánhan.

*Jñūhun jeē cundáhú ní jnánhan*

### 13

<sup>1</sup> Vesú núu cuu cahán yó tijni yuhu jeē cácahán ñayuu chí jéē cácahán ndajéhé Yaā Dios, te núu tu cundáhú ní yó jnánhan yó, te jnūhun cahán yó un cúu nájñūhun ñin tambor jeē ndaxín cáján chí ñin platillo jeē ndaxín cáxin sánee sōho ñayuu. <sup>2</sup> Te vesú cuu nacani vāha yó jnūhun ya, te cuu jecūhun ní yó táca jnūhun sáhi yá jíin táca jnūhun ndichí, te núu tu cundáhú ní yó jnánhan yó, te tu ndé jéjníñu cuiti yó núu súcuan. Te vesú cuu candije téyí yó jeē nde cuu cahán yó jeē cújyio yucu, te núu tu cundáhú ní yó jnánhan yó, te tu ndé jéjníñu cuiti. <sup>3</sup> Te vesú na sája yó ndih̄i jeē névāha yó cuu ñayuu ndahú, te vesú núu cuāha yó jnūhun cahmu ñayuu yohó jéē siquí jnūhun ya, te núu tu cundáhú ní yó jnánhan yó, te tu ndé jéjníñu cuiti.

<sup>4</sup> Ñayuu cundáhú ní chí iyó paciencia jíin jnánhan, te iyó mání ní, te tu cúcuésún ní. Te tu sándúxí, te tu sátéyí maá. <sup>5</sup> Tu sájéé ní, tu ndúcu jéhe cuu máa-ni, tu quití ní, tu ñúhun ní jnūhun quití ní. <sup>6</sup> Tu cúsh̄ ní jíto jniñu néé casáha jnánhan, chí sa cúsh̄ ní jíin jniñu vāha. <sup>7</sup> Ñayuu cundáhú ní chí ndih̄i jéhn̄de ní ndoho jehé jnánhan, te tu jécuiñi jeē candije jnánhan,

jiín jée ñúhun ni jeē squicu jnáhan, jiín jée jéndeiy ni jiín jnáhan.

<sup>8</sup> Jñuhun cundáhu ni chi ma náa cuiti. Te quiji quiví jeē tuá nacani i jñuhun, ni tuá cahán i tijni yuhu, ni tuá jini ñúhún jñuhun ndíchi. <sup>9</sup> Chi tu jini váha váha yó vijna, te jñuhun cáncani yó suni jecu-ni cúu. <sup>10</sup> Te núu na quiji quiví jeē cuni yó ndihi, yúcuán na te tuá coo jeē jini yó jecu-ni.

<sup>11</sup> Ná ni cuu yó súchi lúli te ni cahán yó, ni jeni ni yó, ni jecuhun ni yó nájñuhun súchi lúli. Te ná ni jehnu yó te ni stóo yó modo súchi lúli. <sup>12</sup> Te suni súcuan, jecu-ni jécuhun ni yó vijna, nájñuhun jeē jito yó núu ñn espejo jeē tú ndijin váha. Te cúcuéé gá te jecuhun cáji ni yó ndihi. Te vijna chi jecu-ni jini yó, te cúcuéé gá te cuni váha yó ndese Yaa cúu ya, nájñuhun jini váha ya yohó ndese ñayuu cúu yó. <sup>13</sup> Núu súcuan te iyó úni jñuhun jeē quéndoo cutú nú cáni: Jeē candije nihin yó jée squicu ya jeē ni jéñuhun ya, jeē cócuhun ni yó táca jée váha coo, jiín jée cundáhu ni yó jnáhan yó. Te jñuhun cundáhu ni chi jéhnú ndasí gá cúu nuú táca jée yáha.

*Siqui jeē cácahán i tijni yuhu*

## 14

<sup>1</sup> Na cóndihví ni ró cundáhu ni ró jnáhan ró, te suni cóndihví ni ró cacán ró táca táhú jeē jéhe Espíritu. Te tahú jeē cánuú gá cúu jeē nácani ró jñuhun ya. <sup>2</sup> Chi tée néváha tahú jeē cahán de tijni yuhu jeē tu jécuhun ni de, chi máa-ni Yaa Dios jini jeē cahán de, nasúu ñayuu. Chi ni ñn i ma jécuhun ni jeē cahán de. Chi sáha Espíritu jeē cahán de táca jñuhun yisáhi. <sup>3</sup> Te sa suhva tée nácani jñuhun ya, chi jiín ñayuu cahán de náváha ije i jiín jñuhun ya, te stíhví ni de i, te cahán ndeyí ni de jiín i. <sup>4</sup> Te tée jeē cahán tijni yuhu, chi máa-ni de ije jiín jñuhun ya. Te tée jeē nácani jñuhun ya, chi sa suhva sáha de jeē ñayuu cácaandije ije i jiín jñuhun ya.

<sup>5</sup> Nújnahan ni rí jeē ndihi ró cuu cahán ró tijni yuhu jeē tu jécuhun ni ró, te jeē cánuú ndasí gá cúu jeē nácani ró jñuhun ya. Chi jéhnú ga jniñu sáha tée nácani jñuhun ya vésú tée cahán tijni yuhu. Chi núu tú tée castuhun jñuhun cáhan de, te ma cuajniñu jeē ije ñayuu cácaandije. <sup>6</sup> Jeé yúcuán hermano jijnáhan ró, núu na jée rí nuú ró, te núu cahán rí tijni yuhu jeē tu jécuhun ni ró, ¿te ndé cuajniñu ún? Te núu na cahán rí ñn jeē ni steén yá, chí ñn jeē cutúhva ró jñuhun ndaa, chí ñn jeē nácani rí jñuhun ya, chí ñn jeē steén rí nuú ró, yúcuán cúu jeē cuajniñu.

<sup>7</sup> Sáha yó cuenta jeē nájñuhun instrumento música, vésú tu técu, te cuu cata, nájñuhun flauta jiín arpa. Te núu tu jita sín sín nota, ¿te ndese cuni yó na yaa jita? <sup>8</sup> Te núu corneta tu jecu cáji, te ni ñn tée ma sátúhva de quihín de guerra. <sup>9</sup> Te suni

súcuan róhó jijnáhan ró, núu tu cáhan cají ró jñuhun jecuhun ni ñayuu, ¿te ndese cuni i ró vée cahán ró? Chi jñuhun cáhan ró ndíso tachí cuahán jiín. <sup>10</sup> Te ndaa chi iyó cuéhé yuhu ini ñayiví, te táca yuhu chi iyó ñayuu jécuhun ni. <sup>11</sup> Te núu tu jécuhun ni yó yuhu cáhan ñn tée, te cúu yó nájñuhun tée ñuu jicá núu tée cáhan, te suni nájñuhun tée ñuu jicá cúu de nuú maá yó. <sup>12</sup> Jeé yúcuán róhó jée cácani ndasí ró nihin ró tahú jeē jéhe Espíritu, na cácan ró tahú jeē sáha jeē ije ñayuu cácaandije jiín jñuhun ya.

<sup>13</sup> Núu súcuan te ñayuu jeē cahán inga yuhu jeē tu jécuhun ni i, na cacán tahú i jeē cuu nacastúhún i yuhu ún. <sup>14</sup> Chi núu jicán tahú yó jiín inga yuhu, te máa ánuá-ni yó cúu jeē jicán tahú, te tu ndé jéniñu nuú jeē níjnúni yó. <sup>15</sup> ¿Ndese sáha yó núu súcuan? Na cacán tahú yó jiín ánuá yó, te suni jiín jée níjnúni yó. Na cáta yó yaa ñn jiín ánuá yó, te suni jiín jée níjnúni yó. <sup>16</sup> Chi núu nácuatáhu ró máni jñuhun jeē ní quiji nuú ánuá ró te tu jécuhun ni ró, núu súcuan te tée jini sóho te tu jécuhun ni, ma cúu nacuatáhu de jiín ró. Chi tu jini cuiti de na jñuhun cáhan ró. <sup>17</sup> Ndaa chi váha nácuatáhu máa ró, te inga de chi tú na vé nihín de jeé ije de jiín jñuhun ya. <sup>18</sup> Na cutáhu rí nuú Yaa Dios jeé cahán gá rí jiín tijni yuhu vésú maá ró jijnáhan ró. <sup>19</sup> Te vésú súcuan te núu íne rí nuú cáyúcu tútu ñayuu cácaandije, te nújnahan gá ni rí cahán rí uhún-ni jñuhun jeé jécuhun ni i te steén nuú i, vésú jeé cahán rí uxí mil jñuhun jiín inga yuhu jeé tu jini cuiti i.

<sup>20</sup> Hermano jijnáhan ró, ma cáni ni ró nájñuhun súchi lúli, chi sa suhva na ije ró jée jecuhun váha ni ró. Te coo ró nájñuhun súchi lúli jée tu jini i jniñu neé. <sup>21</sup> Te yósó núu tútu ley yá jenahán: Jiín jñuhun cácahán tée inga yuhu, jiín jñuhun cácahán tée ñuu jicá, sáha rí jeé cuni sóho ñayuu yáha jñuhun rí. Te ni jiín súcuan ma sáha i cuenta jñuhun cahán rí, achí máa Jítóo yó. <sup>22</sup> Núu súcuan te tahú jeé cahán yó tijni yuhu, yúcuán cúu ñn jeé steén poder Yaa Dios nuú ñayuu tu cácaandije, nasúu núu ñayuu cácaandije. Te jeé nácani yó jñuhun ya, yúcuán cúu jeé steén nuú ñayuu cácaandije, nasúu núu ñayuu tu cácaandije. <sup>23</sup> Núu súcuan te núu ndihi ró ñayuu cácaandije cáhiyo tútu, te táca ró cácahán sín sín yuhu, te quívicoo ñayuu tu jécuhun ni jiín ñayuu tu cácaandije, ¿te á má cahán i jeé ni canduu loco ró? <sup>24</sup> Te núu táca ró cáncani jñuhun ya, te núu quiví ñn tée tu cácaandije chí ñn tée tu jécuhun ni, yúcuán na te nacuni de jeé tée iyó cuéchi cúu de, te coto ndee de máa de jiín jñuhun cáncani ró. <sup>25</sup> Te nucuhun ni de táca jée ní jeni yuhu ni de jiín ánuá de. Yúcuán na te jecuiñi yití de te chiñúhún de Yaa Dios. Te cahán de jeé íne ndije Yaa Dios jiín ró jijnáhan ró.

*Siqui jeē yucún yíñuhún na cóo nuū ndutútúyó*

<sup>26</sup> Nuu súcuan hermano jijnáhan ró: Nuū cándutútú ró te tāca ró coo ñn yaa ñ cata ró, chí ñn jñuhun stéén ró, chí ñn jñuhun jeē ní sáha Yaā Dios jeē jécuhún ní ró, chí inga yuhu jeē cahán ró, chí jeē nácastühun ró jñuhun inga yuhu ún. Te ndihí ún na sáha ró návaha ije ñayuu cácadnje jñn jñuhun ya. <sup>27</sup> Te núu cáhíyo tēe cahán inga yuhu, te na cáhán uū de chí úní-ni de, te ná ñn ná ñn de na cáhán. Te suni jini ñuhún jeē nacastühún ñn tēe jñuhun ún. <sup>28</sup> Te núu tu íyó tēe jeē cúu nacastühun jñuhun ún, te tēe cácahán inga yuhu, váha ga ma cahán de nuū cándutútú ró, te na cáhán maá-ni de jñn Yaā Dios. <sup>29</sup> Te suni súcuan tēe cácanani jñuhun, na cáhán uū de chí úní de, te sava ga ró nacani ní ró núu íyó ndáa jeē cácahán tēe ún. <sup>30</sup> Te núu inga tēe néne ni nihín de ñn jñuhun jeē ní stéén yá nuū de, núu súcuan te tēe cáhán na jecuiñí jeē cahán de, návaha cahán inga tēe ún. <sup>31</sup> Te súcuan te ná ñn ná ñn ró cuu nacani ró jñuhun jeē stéén yá nuū ró, návaha cutühva ró te coo ndeyí ní ró. <sup>32</sup> Te tēe cácanani jñuhun, jini ñuhún cuatáhú de jeē nácani inga tēe jñuhun te jecuiñí jeē cahán maá de. <sup>33</sup> Chi Yaā Dios cuni yá jeē coo nayúú méhñu ró, násuu jeē sacá núu cuvaa ró.

Te nájnühun cásaha tāca grupo hermano cácadnje, <sup>34</sup> suni súcuan tāca ñahan cándutútú jñn ñayuu cácadnje, na cóo nayúú ña. Chí tú váha jeē cahán ña, chí sa cuatáhú ña nájnühun cáhán tutu ley ya. <sup>35</sup> Te núu cúní ña cucáhnu ní ña ñn jñuhun, te nde vehe na cájnühún ña yí ña. Chí jñuhun canu cúu jeē cahán ñn ñahan méhñu nuū cándutútú ró.

<sup>36</sup> Te na sáha ró cuenta jeē tu ní quénda jñuhun Yaā Dios nuū maá ró jijnáhan ró, te nasúu máá ñn máá ró ní cánihín jñuhun ya. <sup>37</sup> Núu ñn tēe jéni ni de jeē tēe nácani jñuhun ya jñn tēe névaha Espiritu cúu de, núu súcuan te na cuájñuhún de jeē jñiñu ní ndacu Jitoho yó cúu jeē tēe ri yáha. <sup>38</sup> Te núu tu jétáhú de jñuhun yáha, suni ma cuatáhú yó de.

<sup>39</sup> Núu súcuan, ñáni mání jijnáhan ró, na cóndihvi ní ró nacani ró jñuhun ya, te ma cási ró nuū tēe cácahán sñn sñn yuhu. <sup>40</sup> Te yúcún yíñuhún na sáha ró tāca jñiñu.

*Jñuhun jeē ní natecu Cristo*

## 15

<sup>1</sup> Hermano jijnáhan ró, vijna te nucühun ní ró jñuhun jnáma ya yohó jeē ní nacani ri nuū ró. Te jñuhun ún chí je ni cajetáhú ró, te suni cáhín nihín ró jñn. <sup>2</sup> Te suni jñn jñuhun ún te ní jnama ya rohó, te núu cáhín nihín ró jñn jñuhun ní nacani ri nuū ró, te núu tu ní cácadnje cáha ró.

<sup>3</sup> Chi jñuhun cánuú gá jeē ní nihín maá ri ní nastéén ri nuū ró: Jeē ní jñí Cristo siquí cuéchi yó, nájnühun je cáhán tutu ñn nde jenahán. <sup>4</sup> Te ní quindúji ya, te ní natecu yá nuū uní quiví, nájnühun cáhán tutu ñn. <sup>5</sup> Te ní nane ya nuū Pedro. Te sáa te ní nane ya nuū ndihúxí gá apóstol. <sup>6</sup> Te sáa te ní nane ya nuū vihyá gá uhún ciento hermano jeē cáyucu tútu. Te sava i tēcu gá nde vijna, te sava i je ní jñí. <sup>7</sup> Te sáa te ní nane ya nuū Jacobo, yucúan na te nuū ndihí ga apóstol.

<sup>8</sup> Te jeē sándihí na te ní nane ya nuū maá ri. Te nájnühun ñn jeē ní cacu yúte, súcuan cúu jeē ñn sanaa-ni te ní nduu ri apóstol. <sup>9</sup> Chí tēe núu ga nuū tāca gá apóstol cúu ri, te ní nasúu tēe váha cúu ri jeē cónani ri apóstol, chí ní jito xeén ri ñayuu cácadnje nuū Yaā Dios. <sup>10</sup> Te siquí jeē ní sáha Yaā Dios jeē váha ruhú, jeē yúcuan cúu ri apóstol vijna. Te jeē ní sáha ya jeē váha ruhú, chí tú cáha ní cúu, chí sa ní scáca ga ri jñuhun ya vésú tāca gá tēe apóstol. Te nasúu máá ri ní sáha, chí Yaā Dios ní sáha ya jeē váha un jñn ri. <sup>11</sup> Núu súcuan te vésú ruhú chí tāca gá tēe ún, súcuan cácanani ri jñuhun, te súcuan ní cacandje ró.

*Jñuhun jeē natecu ndíyi*

<sup>12</sup> Te jeē cácanani ri jñuhun Cristo jeē ní natecu yá méhñu ndíyi, zte naun cácahán sava ró jeē ma natecu ndíyi? <sup>13</sup> Chí núu jeē tú natecu ndíyi, te suni tu ní natecu Cristo nuū. <sup>14</sup> Te núu jeē tu ní natecu Cristo, te cácanani cáha ri jñuhun ya nuū, te suni cácadnje cáha ró núu. <sup>15</sup> Chí núu jeē súcuan cúu núu, te cácuu ri tēe jeē tu cácahán ndaá jñuhun Yaā Dios, chí ní cacachi ri jeē ní nastécu Yaā Dios Cristo. Te núu jeē tú natecu ndíje ndíyi, núu súcuan te tú ndaá jeē ní nastécu Yaā Dios Cristo. <sup>16</sup> Chí núu tú natecu ndíyi, te ní Cristo suni tu ní natecu yá nuū. <sup>17</sup> Te núu tu ní natecu Cristo, te cácadnje cáha ró te cándiso ñn gá ró cuéchi ró núu. <sup>18</sup> Te núu jeē súcuan cúu núu, te suni je ní cajahnú ndetú ñayuu ní cacandje Cristo. <sup>19</sup> Chí núu tú natecu ndíyi, te núu máá ñn-ni siquí vida yáha ñuhún ní yó jeē sáha Cristo jeē váha yohó, núu súcuan te ndahú ndasí gá cácuu yó vésú tāca gá ñayuu, chí cácadnje cáha yó núu.

<sup>20</sup> Te tuú chí íyó ndáa jeē ní natecu Cristo méhñu ndíyi. Te máá yá cúu jeē xihna gá ní natecu nuū tāca gá ndíyi jeē natecu. <sup>21</sup> Chí siquí jeē ní stívi ñn-ni tēe Adán, te ní quejéé jíhí ñayuu. Te suni súcuan siquí jeē ní sáha ñn-ni tēe Cristo, te natecu ñayuu. <sup>22</sup> Chí nájnühun cájihí ndihí yó siquí jeē cácuu yó yúcún Adán, suni súcuan natecu ndihí yó siquí jeē yíhi yó ndaha Cristo. <sup>23</sup> Te ná ñn ná ñn ndese ndiquín jñahan máá: Xihna gá Cristo ní natecu yá, te sáa te quiví ndíji ya te natecu tāca ñayuu yíhi ndaha ya. <sup>24</sup> Yucúan na te jñu tiempo, te snáa yá poder táca enemigo jeē cujéhu jñn jeē ndácu jñiñu jñn



jéé iyó poder. Te ndihi jeé ndácu ya jniñu nuú, nacuaña ya nuú Tatá yá Yaá Dios. <sup>25</sup> Chi cánuú jéé ndacu Cristo jniñu nde quiiji quiví jeé quénde Yaá Dios poder táca jéé jito uhú nuú Cristo, te stóho ya. <sup>26</sup> Te jeé sándihí na te snáa yá cuehyi jéhi ñayuu. <sup>27</sup> Chi cáhán tutu ii jeé sáha Yaá Dios jeé kujéhu Cristo siquí ndihi, te cuatáhú núú yá. Te jeé cáhán jeé kujéhu ya nuú ndihi-ni, te jíní vāha yó jéé máa Yaá Dios ma quíhi ya ndaha Cristo, chí Yaá Dios cúu jeé ní chíhi táca un ndaha Cristo. <sup>28</sup> Te ná ní quiví ndihi ún ndaha Cristo, yūcuán na te suni máa Cristo jeé cúu ya Sehe, quiví ya ndaha Tatá yá, Yaá jeé ní chíhi táca un ndaha ya. Te súcuan te máa Yaá Dios jniú ya ndihi-ni.

<sup>29</sup> Te iyó ñayuu cájendute jehé ndíyi. Te núu tú natecu cuiti ndíyi, ¿te najehé cájendute i jehé ndíyi núu súcuan?

<sup>30</sup> Te ruhú jijnáhan rí, ¿najehé cúu jeé ndiquiví cájendeyí ní rí jito rí jnūndóho cuu rí, te núu tú natecu ndíyi? <sup>31</sup> Hermano, nájñuhun iyó ndáa jeé cúsi ní rí siquí jeé cácandíje ró Jítoho yó Jesucristo, suni súcuan iyó ndáa jeé ndiquiví nducú ñayuu cahni ruhú siquí jniñu ya. <sup>32</sup> Te jeé ní ndoho rí ní casáha tēe xeēn ñuu Efeso, jeé cácuu de nájñuhun quiti xéén, ¿te na vé nihín rí siquí un núu súcuan? Chi núu tú natecu ndíyi, te cuu cahán yó nájñuhun áchí in jñuhun: Na cúsi ní yó caji yó coho yó, chí sanaa te sajne te cuu yó, achí yó nuú.

<sup>33</sup> Ma cuáha ró jñuhun stáhú ñayuu rohó. Chi áchí in jñuhun: Núu cájica ró jín ñayuu neé, te stíví i róhó jéé tuá caca ndaa ró. <sup>34</sup> Nachuhun ní ró jijnáhan ró, te sáha ró jniñu ndaa, te ma sáha ga ró cuéchi. Chi sava ró tu cájini cuiti ró ndese Yaá cúu Yaá Dios. Súcuan cáhán rí návāha na cúcanu ró.

### *Ndese natecu ndíyi*

<sup>35</sup> Te sanaa te cahán in ró: ¿Ndese natecu ndíyi? ¿Ndese coo yiqui cúñu i? achí ró. <sup>36</sup> Tu jécūhun cuiti ní ró núu súcuan. Chi cúu nájñuhun jeé cátají ró táca tata chíji ñuhun návāha nane yucú i. <sup>37</sup> Te tata jeé quiví chíji ñuhun, núu trigo chí inga tata, chí nasūu yucú cúu, chí máa núni-ni cúu. <sup>38</sup> Te cuéé gá te cane, chí Yaá Dios ní jēhe ya yucú tata ún, ndese ní nujnahan ní máa yá, te ná in ná in tata chí sñn sñn cáa yucú ní sáha ya. <sup>39</sup> Te suni súcuan táca yiqui cúñu, chí tú inuú cándaā. Chí sñn cáa ñayuu, te sñn cáa quiti, te sñn cáa saa, te sñn cáa chácá. <sup>40</sup> Te suni súcuan cúu táca jéé in andiví jín táca jéé iyó ñáyiví. Te sñn luu cáa jeé in andiví, te sñn luu cáa jeé iyó ñáyiví. <sup>41</sup> Te sñn ndíndēe nándi, te sñn ndíndēe yóó, te sñn ndíndēe táca quími. Te táca in in quími chí suni sñn sñn ndíndēe. <sup>42</sup> Te suni súcuan coo jín ndíyi jeé natecu. Ndíyi jeé chíndūji yó chí téhyū, te jeé nastécu yá chí ma cúu gá. <sup>43</sup> Jeé chíndūji

yó chí ndáhú cáa, te jeé nastécu yá chí luu kujéhu. Jeé chíndūji yó chí tú na fuerza, te jeé nastécu yá chí coo fuerza. <sup>44</sup> Jeé chíndūji yó chí in yiqui cúñu cuenta ñáyiví cúu, te jeé nastécu yá chí in yiqui cúñu cuenta Espíritu yá cúu. Chi iyó yiqui cúñu cuenta ñáyiví, te suni iyó yiqui cúñu cuenta Espíritu.

<sup>45</sup> Chí súcuan yósó núu tútu ii: Adán, tēe xihna ñúhún, ní cuvāha de jín vida cuenta ñáyiví, áchí. Te Cristo cúu nájñuhun inga Adán uú, te máa yá cúu Espíritu jeé jēhe vida. <sup>46</sup> Te nasúu yiqui cúñu cuenta Espíritu cúu jeé ní cuvāha xihna gá, chí sa suhva yiqui cúñu cuenta ñáyiví, te sáa te nduca cuenta Espíritu. <sup>47</sup> Te cuenta ñáyiví cúu tēe xihna ñúhún, chí ní cuvāha de jín tícachā ñuhun. Te Adán uú jeé cúu máa Jítoho yó, chí nde andiví ní quiiji ya. <sup>48</sup> Te ñayuu ñáyiví yáha, chí cúu i jnāhan Adán jeé ní cuvāha jín tícachā ñuhun. Te ñayuu jeé quívicoo andiví, chí ndúu i nájñuhun máa Yaá ní quiiji nde andiví. <sup>49</sup> Chí jeé cáa yó nájñuhun tēe ní cuvāha jín tícachā ñuhun, suni súcuan coo yó nájñuhun cáa máa Yaá ní quiiji nde andiví.

<sup>50</sup> Jñuhun yáha cástūhun rí nuú ró jijnáhan ró, hermano, jeé yiqui cúñu yó cuenta ñáyiví yáha, ma cúu quiví ñuu nuú ndácu Yaá Dios jniñu. Chí jeé jíhi cúu, te ma cúu quiví nuú cótecu ní cáni. <sup>51</sup> Te cúni rí jeé na jécūhun ní ró jñuhun yáha jeé ní yisáhi: Nasúu ndihi yó cuu, te ndihi yó chí nasāma yiqui cúñu yó. <sup>52</sup> Chí quiví jeé cuécu sandihí na trompeta, te in yachí-ni, nájñuhun in jeé nácueni-ni yó, te nasama ya yohó. Chí cuecu trompeta un, te natecu táca ndíyi jeé ma cúu gá i. Te táca yó jeé cátecu yó quiví ún, chí nasama ya yiqui cúñu yó. <sup>53</sup> Chí jeé tehyú yáha, cánuú nucūhun jeé ma téhyú gá. Te jeé jíhi cánuú nucūhun jeé ma cúu cuiti gá. <sup>54</sup> Chí jeé jíhi jeé tehyú, chí quiiji quiví jeé nucūhun jeé ma cúu gá ma tehyú gá. Yūcuán na te cundaā jñuhun yósó núu tútu ii: Jín poder yá ní snáa yá cuehyi jéhi ñayuu. <sup>55</sup> Cuehyi jéhi yóhó ¿ndese ga cuu sáha xeēn jín yó? Chí natecu yó. ¿Te ndese ga cundeyí jín yó? Chí snáa yá. Achí tutu. <sup>56</sup> Chí cuéchi cúu jeé sáha jeé cundeyí cuehyi jéhi ñayuu. Te ley yá jengahán sáha jeé náne cuéchi siquí yó. <sup>57</sup> Te na cútahú yó nuú Yaá Dios, chí jín máa Jítoho yó Jesucristo sáha ya jeé cundeyí yó siquí cuéchi jín siquí jñuhun cuu yó.

<sup>58</sup> Jeé yúcuan, ñáni mání, cuiñi ñihin ró te ma cáca yátá ró jijnáhan ró. Te níni na sájniñu vāha ró jín jniñu máa Jítoho yó. Chí je cájini ró jeé tu cásjniñu cáha ró jín máa Jítoho yó.

*Siquí jeé cáquin i xūhun cuu táca hermano*

## 16

<sup>1</sup> Te vijna te cahán rí siquí xūhun jéé cáquin ró cuu hermano cácandíje cándoho ndáhú.

Suni na sáha máá ró jijnáhan ró nájnūhun ni ndacu ri nuū tāca grupo ñayuu cácadnje ichi Galacia. <sup>2</sup> Tācá domingo te ná ñn ná ñn ró chuváha sñn ró jecu xūhún, núu ndese ni nihñn maá ró, náváha quiví jeē jinú rí nuū rō te je iyó túhva. <sup>3</sup> Te jeē jeé rí, te cuáha ri carta nuū tāca téee jeē nácāji ró, te tají rí de quingoo de nuū tācá hermano cáyucú Jerusalén, quísiáha de xūhun jéé ní casocō rō. <sup>4</sup> Te núu iyó váha jeē quihñn rí, te suni quihñn rí jín de jijnáhan de.

*Jeē cahán Pablo siquí jeē quícondéhé de ñayuu cácadnje*

<sup>5</sup> Te jeē jeé rí nuū rō jijnáhan ró, te jini ñúhún jeē xihna gā jeē rí región Macedonia, yūcuán na te jeē rí ñuu rō Corinto. <sup>6</sup> Te sanaa te quendōo rí jín ró jijnáhan ró jecu tiempo, chí sanaa te coyūcu yó ñí tiempo mñjin. Yūcuán na te cuu chindéé ñáhán ró ruhū, núu ndé chí quihñn tucu rí. <sup>7</sup> Chí tu cúní rí jeē rí nuū rō vijna te yáha yachí rí quihñn rí, chí ñúhun ni rí jeē quendōo rí jín ró jecu tiempo, te núu cuáha Jitoho yō jnūhun. <sup>8</sup> Te cone rí ñuu Efeso yáhá nde na yáha quiví Pentecostés. <sup>9</sup> Chí coo cuehē ñayuu scandje rí, te váha quihñn jniñu Jitoho yō. Te suni iyó cuehē ñayuu cácuu contra.

<sup>10</sup> Te núu na jéé Timoteo, te sáha ró jéé coo sñ ni de mēhñu ró, te ni ñn ma cáni ni de siquí. Chí suni jniñu máá Jitoho yō sáha de, nájnūhun máá rí. <sup>11</sup> Núu súcuan te ni ñn ró má sajeé ni rō nuū de. Chí sa suhva chindéé ñajnáhan ró jín de jeē na quihñn gā de, te coo ndeyí coo sñ ni de, náváha ndiji de coto jnáhan rí jín de. Chí ruhū jín sava ga hermano cándetu rí de.

<sup>12</sup> Te hermano Apolos chí ni cahán ndahú rí jín de jeē na jéé de jín sava ga hermano, condéhé de rōhó. Te ni jeni ni de jeē ma cúu jeē de vijna. Te núu na núne de te jeé de.

*Saludo jeē sándñí*

<sup>13</sup> Ndito coo ni rō jijnáhan ró, te cuiñi ñihin ro jín jnūhun cácadnje ró. Te téyí na cóo ni rō, te na cóo fuerza ini rō. <sup>14</sup> Te tāca jéé casáha ró, na sáha ró jín jnūhun cúndáhú ni jnáhan.

<sup>15</sup> Hermano, cájini rō jeē xihna gā ñayuu vehe Estéfnas ni cacandje ichi Acaya. Te ni cajēhe i máá i nuū jniñu jeē chindéé ñáhán i tācá hermano cácadnje. <sup>16</sup> Te cúní rí jeē suni máá ró jijnáhan ró, cuatáhú váha ró ñayuu casáha súcuan, jín táca ñayuu cachindéé ñajnáhan te casájniñu siquí jniñu ya. <sup>17</sup> Cúsñ ni rí jeē ní quijicoo Estéfnas jín Fortunato jín Acaico, chí tēe yáha ni cajejniñu de nuū rí jehē rō jeē tu ní cáhio ró jín rí. <sup>18</sup> Chí ni ndundeyí ni rí, te suni súcuan máá ró jijnáhan ró, ni casáha de. Te cánuú cuajnúhún ró tāca téee cándāa súcuan.

<sup>19</sup> Sándeyí ni rō jijnáhan ró, áchí táca grupo ñayuu cácadnje cáyūcu Asia. Aquila jín

Priscila jín ñáyuu cácadnje jeē cándutútu vehe de, cácahán i jeē sándeyí ndasí ni rō jín jnūhun máá Jitoho yō. <sup>20</sup> Te tācá hermano cácahán i jeē sándeyí ni rō. Te jeē cahán rō jín táca jnáhan ró, te yíñúhún techūhu ró ndaha i.

<sup>21</sup> Ruhū Pablo, jín ndaha máá rí téee rí jnūhun yáha jeē na sándeyí ni rō jijnáhan ró.

<sup>22</sup> Te núu ndé ñn tu iyó maní jín Jitoho yō Jesucristo, te na jnánú ndetú i núu súcuan. Te na cáhán yō: Jitoho ná, cúní na jéé yachí ndiji ní.

<sup>23</sup> Te ñúhun ni rí jeē maá Jitoho yō Jesucristo na sáha ga yā jeē váha rōhó jijnáhan ró.

<sup>24</sup> Te maní rí jín ró jijnáhan ró jéé cácadnje ró Cristo Jesús. Súcuan na cóo. Amén.

## CARTA UU JEE NI TEE SAN PABLO APOSTOL NUU ÑAYUU ÑUU CORINTO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaá Dios ni taji yá ruhū nacani rí jñūhun ya. Te ndindúú rí jín hermano yō Timoteo cátee ri carta yáha cuájeé nuū rohó hermano ñuu Corinto jeé cácan díje ró Yaá Dios, jín nuū ndihí rohó jée cáyihí ndaha Yaá Dios jeé cáyūcu ní cáhnu Acaya. <sup>2</sup> Te cáñuhun ni rí jeé Tatá yō Yaá Dios jín Jitoho yō Jesucristo na sáha ga yā jeé váha rohó te sáha ya jeé coo ndeyí coo sñ ni rō.

*Siquí jeé ní ndoho Pablo jñúndóho*

<sup>3</sup> Na cáhán yō jeé yóhoyo cújéhnu Yaá Dios, Yaá cúu Tatá máá Jitoho yō Jesucristo. Chi máá yá cúu Tatá yō jeé cundáhu ni yohó, te níni sáha ya jeé ndúsñ ni yō. <sup>4</sup> Chi sáha ya jeé ndúsñ ni yō siquí táca jñúndóho ndóho yó, náváha suni cuu sáha máá yō jeé ndúsñ ni jnánhan yō jée cándoho jñúndóho. Chi nájñūhun ni sáha ya jeé ndúsñ ni máá yó, suni súcuan sáha yó jée ndúsñ ni i. <sup>5</sup> Chi jeé ndóho yó cuehē jñúndóho nájñūhun ni ndoho Cristo, suni súcuan nihin yō cuehē jñūhun ndusñ ni, sáha Cristo. <sup>6</sup> Jeé yúcuan núu cándoho rí jñúndóho te súcuan te cuu sáha rí jeé ndúsñ ni rō te quendóo váha ga anuá rō. Te jeé sáha Yaá Dios jeé ndúsñ ni rí, suu sáha tucu jeé ndúsñ ni máá rō, te quéndóo váha ga anuá rō. Te súcuan te nihín rō fuerza jeé cuándeyí ni rō jín táca jñúndóho nájñūhun cándoho rí. <sup>7</sup> Te cáñuhun ndasí ni rí jeé cúu rohó, chi cájini rí jeé nájñūhun cándoho ró jñúndóho jín rí, suni súcuan ndusñ ni rō jín rí sáha máá Yaá Dios.

<sup>8</sup> Hermano, cácuni rí jeé na cúní rō jijnánhan ró ndese ni candoho rí ichi Asia. Chi yóhoyo xeēn jñúndóho ni cajito rí, nde je yajni tuá canda rí, te ni jeni ni rí jeé cuu rí nuú. <sup>9</sup> Te siquí jeé ní cajehnde ni rí cuu rí, te yúcuan ní sáha jeé ní cajecūhun ni rí jeé ma ténuū rí máá rí chi tú jñiñu rí, chi sa suhva Yaá Dios jeé nastécu ndiyí tenuū rí. <sup>10</sup> Chi máá yá ni scácu ruhū jijnánhan rí nuū jñúndóho xeēn jé yajni cuu rí nuú, te suni súcuan scácu ya ruhū vijna. Te ñūhun ni rí jeé suni scácu tucu ya ruhū ichi núu gā. <sup>11</sup> Te suni na chindéé ñáhán ró ruhū jijnánhan rí jeé cacān tahú ró jehē rí. Chi núu cuehē ñayuu cacān tahú jehē rí, te suni cuehē i cuu nacuatáhu jehē rí jeé ní sáha ya jeé váha ruhū.

*Jeé ní cucuéé Pablo quihín de ñuu Corinto*

<sup>12</sup> Iyó ññ jeé sáha jeé cácusñ ni rí: Chi váha iyó ní anuá rí jeé váha ndoo te ndaá ni cajica rí nuū ñayuu ñayívi, te víhyá gā nuū máá ró jijnánhan ró. Chi siquí jeé váha ni Yaá Dios, te ni chindéé ñáhán yá ruhū, te nasūu siquí jeé

ndichí máá rí cúu jeé ní cajica rí súcuan. <sup>13</sup> Te jñūhun cátee rí nuū táca carta rí, chi máni jeé cúu cahu ró te jecūhun ni rō cúu. Te ñūhun ni rí jeé jecūhun váha ga ni rō, <sup>14</sup> nájñūhun je cájecūhun ni rō jecu. Te súcuan te cuu cusñ ni rō siquí rí quívi ndíji Jitoho yō Jesús, nájñūhun cácusñ ni rí siquí máá rō.

<sup>15</sup> Te siquí jeé súcuan ni cucáhu ni rí, te jeé yúcuan ní jeni ni rí jeé núu na quihín rí Macedonia te jeé rí nuū máá ró xihna gā, náváha cusñ ni rō jeé jécondēhe rí rohó úu jínu nuú. <sup>16</sup> Chi ni jeni ni rí jeé jécondēhe rí rohó, te yáha rí quihín rí Macedonia, te jeé nándicó rí Macedonia te ndíji tucu rí nuú rō. Yúcuan na te cuu chindéé ñáhán ró ruhū jeé quihín rí ichi Judea nuú. <sup>17</sup> Te jeé súcuan ni jeni ni rí, ¿te á téu te nacani váha ni cúu rí jeé tu ní jée rí nuú rō, chí maá rō? ¿A cájeni ni rō jeé cúu rí nájñūhun ñayuu ñayívi jée yachí cahán jeé cuu, yúcuan na te tuú, chí naún? <sup>18</sup> Tuú chí máá Yaá Dios jín yā jeé tu cáhán rí jín ró jeé cuu, te yachí nacáhan rí jeé ma cúu. <sup>19</sup> Chi ruhū jín Silvano jín Timoteo ni canacani rí jñūhun Jesucristo Sēhe Yaá Dios nuú ró jijnánhan ró. Te máá yá tu cáhán yā jeé cuu te nacáhan tucu ya jeé ma cúu. Chi squícu ya jeé cahán yā. <sup>20</sup> Chi ndihí jeé ní jéjñūhun Yaá Dios, squícu máá Cristo. Te jeé yúcuan cacáhan yō jeé yóhoyo luu cújéhnu Yaá Dios, te cacáhan yō Amén, chi ndihí squícu Cristo Jesús. <sup>21</sup> Te Yaá Dios cúu jeé sáha jeé ruhū jijnánhan rí jín rohó jijnánhan ró, cáhín nihin yó jín Cristo, te ni sándoo ya yohó jée cuajniñu yó núu yā. <sup>22</sup> Te suni ní jēhe ya Espíritu yā jeé cóndee ini anuá yō, te cúu ya nájñūhun ññ sello jeé steén jeé cúu yó sēhe Yaá Dios. Te sáha Espíritu jeé iyó ndaá ni yō jeé cuáha Yaá Dios tahú yō.

<sup>23</sup> Te jeé ná tu jeé rí nuú ró ñuu Corinto, nájñūhun ni jeni ni rí, suu cúu siquí jeé tu ní cúní rí cuxeēn rí nuú ró jeé tu casáha váha rō. Te máá Yaá Dios cúu Yaá jíní jeé cahán ndaá rí. Te iyó váha jeé na cúu rí te núu tu cáhán ndaá rí. <sup>24</sup> Te nasūu jée cácuni rí ndacu nihin rí jñiñu nuú ró siquí jñūhun cácan díje ró yá, chí je cáhín nihin rō jín jñūhun ún. Chi sa suhva cácuni rí chindéé ñáhán rí rohó jée na cusñ gā ni rō.

## 2

<sup>1</sup> Núu súcuan te ni jeni ni rí jeé ma jée rí inga jñu nuú ró jín jñūhun cuxeēn rí te cucuíhyá ní ró sáha rí. <sup>2</sup> Chi núu cucuíhyá ní ró sáha rí, ¿te ndé ñayuu sáha jeé cusñ ni máá rí? Tuá na inga ñayuu, chí máni máá rohó, te ndese cuu te núu ní sáha rí jeé cucuíhyá ní ró. <sup>3</sup> Te jeé yúcuan cúu jeé ní tee rí carta unú rō, náváha nacani ni rō siquí cuéchi ró sáha, te ma cucuíhyá ní rí sáha cuéchi ró quívi jeé rí nuú rō. Chi sa suhva sáha ró jée cusñ ni rí. Te jíní váha rí jeé núu cusñ ni rí, te suni ndihí ró jijnánhan ró cusñ ni rō. <sup>4</sup> Te jeé ní tee rí carta

un núu rō, te yōhyo ni nacani ni rī siquī rō, te ni jnahuhū ni rī, te nde ndahyū rī ni tee rī. Te tu ní téé rī jeē sāha rī jeē cucuíhyá ni rō, chí sa suhva návāha cuni rō ndese yōhyo manī rī jín rō.

*Jeē íne cáhnu ni Pablo nuū téé ni sāha cuēchi*

<sup>5</sup> Te jeē ní cucuíhyá ni rī ni sāha tēe jeē ni sāha cuēchi ún, te nasūu máá-ni rī, chí suni nde máá ró jijnáhan ró ni sāha de jeē ní cacucuíhyá ni rō jecu. Te cáhān rī jeē jecu-ni, chí tu cúni rī cuxeēn ndasí rī. <sup>6</sup> Te jín jēé ní cacuxeēn rō nuū de ná ni candutútú rō, te jín yúcuan-ni te ni cuu-ni. <sup>7</sup> Te vijna chí jini ñúhún jeē cóne cáhnu ni rō nuū de, te sāha ró jēé ndúsī ni de, chí sanaa te caa ga cucuíhyá ni de, te ma ndúsī gā ni de. <sup>8</sup> Núu súcuan te cáhān ndahú rī jín ró jijnáhan ró jēé steén tucu ró jēé iyó manī rō jín de. <sup>9</sup> Chí jeē siquí jniñu yáha cúu jeē ní tee rī carta un núu rō, návāha coto ndee rī rohó núu cuatáhú váha ró jniñu ndácu rī nuū rō. <sup>10</sup> Núu súcuan te núu íne cáhnu ni rō nuū ñayuu, te suni súcuan ruhú. Chí jeē íne cáhnu ni rī nuū ñayuu núu ni sāha i cuēchi, te sāha rī súcuan siquí jeē manī rī jín ró jito jínúu Cristo. <sup>11</sup> Chí cánúu cone cáhnu ní yō, chí tu cúni yō jeē nihín Satanás cuēchi siquí yō, chí je jini váha yō ndese ndúcú un stáhú yóhó sāha yó cuēchi.

*Jeē tu ní íyo nayúú ni Pablo ini ñuu Troas*

<sup>12</sup> Ná ni jehēn rī ñuu Troas jeē nácani rī jñuhun jito ho yō Cristo, te váha ni sāha ya jeē ní íyo modo jeē nácani rī jñuhun ya. <sup>13</sup> Te vēsú súcuan te tu ní íyo nayúú ní anuá rī, chí tu ní nijnáhan rī jín hermano yō Tito. Yúcuán na te ni nacuatáhú rī nuū ñayuu yúcuán, te cuananducú rī de ichi Macedonia.

*Jñuhun jeē cujéhnu ndúú yó jín Cristo*

<sup>14</sup> Te na cútahú yō nuū Yaā Dios, chí níni ndéca váha ya yohó cuángoo yó jín Cristo Jesús, te ndúú yó jín yá jeē cujéhnu ndasí yá snáa yā poder ndihi enemigo yā. Te jéjníñu ya yohó jēé scuité núu yó jñuhun ya tãcá-ni lugar, nájñuhun jíté núu ñin xicō asín. <sup>15</sup> Te cúu yó nájñuhun ñin sije jeē jeén asín nuū Yaā Dios sāha Cristo. Te nájñuhun jeē jinú xicō un núu ñayuu cácu ánuá jín núu ñayuu jñahnú ndetū. <sup>16</sup> Nuū ñayuu jñahnú ndetū chí cúu yó nájñuhun ñin xicō jeē cúu i sāha, te nuū ñayuu cácu ánuá chí cúu yó nájñuhun ñin xicō váha jeē cótecu i sāha. Te ní ñin yó ma cánda yó sāha yó jniñu yáha, te núu ma chindéé ñahán yá yohó. <sup>17</sup> Te ruhú jijnáhan rī, tu cásáha rī nájñuhun cásáha cuehé tēe jeē cánducú de nihín de xúhun siquí jñuhun Yaā Dios. Chí sa cáncani ndaā rī jñuhun ya, chí máá Yaā Dios ní tají ruhú, te máá yá jini jeē cáncani ndaā rī siquí jeē cáncandije rī Cristo.

*Jñuhun siquí contrato jeé*

### 3

<sup>1</sup> Te jeē cácahān rī súcuan, ¿te á cájeni ni rō jeē cánducú tucu rī cahān rī jeē váha ga tēe cácuu rī, chí naún? ¿Te chí jini ñúhún jēé steén rī carta recomendación nuū rō, chí jēé cacān rī cuāha ró núu rī jijnáhan rī, nájñuhun cásáha sava i? <sup>2</sup> Tuú chí máá-ni ró cácuu nájñuhun ñin carta recomendación rī. Te jeē ñúhún ni rī jeē ní cacandije váha ró ni sāha rī, suu cúu nájñuhun jeē yosó jñuhun carta un ini anuá rī. Te ndihi ñayuu chí nájñuhun cáhu i, cúu jeé jini i ndese ni nasāma ró. <sup>3</sup> Chí máá ró cácuu nájñuhun ñin carta jeé ní tee Cristo te cáscaca rī. Te nasūu jín tinta ni tee ya, chí sa suhva jín Espiritu Yaā Dios, Yaā técu. Te nasūu núu tabla yuū nájñuhun ni tee ya ley yā, chí sa suhva nuū anuá ñayuu ni tee ya.

<sup>4</sup> Te cácahān rī súcuan, chí cácuacáhu ni rī Yaā Dios siquí jeē ni sāha Cristo. <sup>5</sup> Te nasūu jēé cájeni ni rī jeé cúu canda máá rī sāha rī jniñu ún. Chí sa suhva máá Yaā Dios sāha jeé cuu squicu rī. <sup>6</sup> Te máá yá ni sāha jeé cuu cuajniñu váha rī siquí contrato jeé yá. Te contrato yáha tu cáhān jeé squicu yó ley jeé ní tee jín letra, chí sa suhva jeé caca yó jín vida jeé, suu jeé ní jéhe Espiritu yá. Chí contrato ley jeé yosó jín letra, jñahnú ndetū ñayuu sāha. Te jeé sāha máá Espiritu cúu jeé cótecu yó ní cáni.

<sup>7</sup> Te ley jenahán jeé ní jéhe ya nuū Moisés, ni yosó letra nuū tabla yuū. Te yōhyo ni cujéhnu, te ni ndindéé ndasí ni sāha, te nde Moisés ndí nuū de ni sāha. Te tu ní cúu coto váha ñayuu Israel nuū de ni sāha. Te vēsú súcuan te cuéé-ni cuéé-ni ni ndahvā jeé ndindéé nuū de. Te núu súcuan ni cujéhnu ndasí ley jeé sāha jeé cuu ñayuu te jñahnú ndetū i, <sup>8</sup> te sa vihyá gā cujéhnu ndasí gā jñuhun cotecu yō jeé jéhe Espiritu nuū yō. <sup>9</sup> Chí núu yōhyo ni cujéhnu ley un jēé jñahnú ndetū ñayuu sāha, te sa vihyá gā cujéhnu jñuhun jeé ndáhva Yaā Dios cuēchi yó. <sup>10</sup> Chí ley un jēé ní cujéhnu nde saá, tuá cujéhnu cuiti, siquí jeé cujéhnu ndasí gā jñuhun Espiritu jeé iyó vijna. <sup>11</sup> Te núu súcuan ni cujéhnu ley jeé ní íyo jecu-ni tiempo, te sa cujéhnu ndasí gā jñuhun jeé coo ní cáni.

<sup>12</sup> Te jeé súcuan cáñuhun ni rī, jeé yúcuan cáñiyo téyí ni rī nácani rī jñuhun yáha. <sup>13</sup> Chí tu cásáha rī nájñuhun ni sāha Moisés jeé ní jesí de ñin sahma nuū de, návāha tú coto ñayuu Israel ndese cuandahvā jeé ní ndindéé nuū de. <sup>14</sup> Te ñayuu ún tu ní cájecúhuhun ni i. Te nde vijna núu cácahu ñayuu Israel tutu contrato ley jenahán, suni tu cájecúhuhun ni i, chí nájñuhun jesí sahma un núu jeé nijnúni i, te tu cújiyo cuiti. Chí nde jeé candije i Cristo, yúcuán na te cújiyo. <sup>15</sup> Te suni súcuan nde vijna núu cácahu i tutu ley Moisés, te nájñuhun jeé jesí ñin sahma nuū jeé nijnúni i. <sup>16</sup> Te jeé násāma ini ñin ñayuu quívi i nuū máá Jítoho yō Cristo, yúcuán na te

cújiyo-ni jeé jési ún. <sup>17</sup> Chi Jitoho yó cúu máá Espíritu. Te nuú ine Espíritu maá Jitoho yó, yúcuan cúu nuú iyó libre ñayuu jeé tuá yáhi i chíji ley jenahán. <sup>18</sup> Te jeé yúcuan máá yó jijnáhan yó, tuá jési nuú jeé níjnūni yó. Chi cácuu yó nájñūhun espejo jeé jéhe nduva, cúu jeé cájica ndaá yó te suu stéén ndese yóhoyo luu cújéhnū máá Jitoho yó. Te máá yó táca quívi cuanasāma yó cuanduu luu ga anuá yó nájñūhun cáa máá yá. Chi máá Jitoho yó jeé cúu ya Espíritu, súcuan sáha ya jíin yó.

#### 4

<sup>1</sup> Núu súcuan te tu ndínūu ni rí cáncani ri jñūhun ya. Chi siquí jeé ní cundáhú ni yá ruhū jijnáhan ri te ni jéhe ya jniñū yáha nuú rí. <sup>2</sup> Te tu cása ha ri jniñū neé jéé cūcanu yó sáha, ni tu cájica cuu ri jíin jñūhun ndíchí stáhú, ni tu cásama ri jñūhun Yaá Dios. Chi sa suhva cácahán rí máni jñūhun ndaá. Te súcuan te cuu cuni táca ñayuu ini anuá i jeé cácahán ndaá rí jito jínū Yaá Dios. <sup>3</sup> Te núu iyó ñayuu tu jécūhun ni jñūhun jnama ya yohó jéé cáncani ri, te súcuan cúu nuú máni máá ñayuu jnahū ndetū. <sup>4</sup> Te jeé tu cácañdije i, te máá jéxeén jeé ndácu jniñū ini ñayívi yáha, ní jesi nuú jeé níjnūni i, návaha ma ndíndee jñūhun Cristo ini anuá i, te ma cuni i jeé yóhoyo luu cújéhnū Cristo, Yaá jeé ínuú cáa jíin Yaá Dios. <sup>5</sup> Te jeé cáncani ri jñūhun, te nasūu jñūhun máá rí, chi sa suhva jñūhun Jitoho yó Jesucristo cáncani ri. Te máá rí chi cácuu rí mozo-ni nuú rō jijnáhan ró jéé siquí jeé maní rí jíin Jesús. <sup>6</sup> Chi ná ni sáha Yaá Dios ñayívi te ni cáhán yá jeé na cúndijin nuú neé. Te suni súcuan ni sáha ya jeé ní cundijin nuú anuá yó jeé cájecūhun ni yó siquí Jesucristo, ndese ndíndee núu yá, cúu jeé yóhoyo luu cújéhnū ya nájñūhun cúu Yaá Dios.

*Jeé cándiquín yó jñūhun cácañdije yó yá*

<sup>7</sup> Te táca jñūhun yáha jeé yóhoyo luu cújéhnū, chi nájñūhun jeé ñūhun ini ñi quísi ñūhun. Chi cácuu yó nájñūhun quísi ñūhun, chi tú na fuerza yó. Te jeé yúcuan cájini váha ri jeé máá Yaá Dios cúu jeé jéhe poder siquí jñūhun yáha jeé yóhoyo luu cújéhnū, te nasūu fuerza máá rí cúu. <sup>8</sup> Te jeé yúcuan, vesú táca lado cájito ri jñūndóho, te tu sáha jeé ma ndúsíi gá ni rí. Te vesú cácuuñhá ni rí siquí jñūndóho, te cáñūhun ni rí jeé quee váha jniñū ri. <sup>9</sup> Te vesú cájito xeén ñayuu ruhū, te máá yá tu stóo ya ruhū jijnáhan ri. Te vesú cánducú i snáa i ruhū jíin jniñū sáha ri, te ma cúu. <sup>10</sup> Te ndé-ni cúu nuú cuángoo ri, te nájñūhun ni ndoho Jesús jeé ní jíhi yá, suni súcuan cándoho ri jeé jé yajni cuu rí, návaha suni cuu stéén rí fuerza Jesús jeé técu yá ini yíqui cúñu rí. <sup>11</sup> Chi jeé níni cátecu rí, te táca quívi je yajni cahni ñayuu ruhū jeé siquí Jesús. Te súcuan te cájito ñayuu jeé técu Jesús ini

yíqui cúñu rí jeé cúu. <sup>12</sup> Núu súcuan te ruhū jijnáhan ri, níni cúu jeé jé yajni cuu rí siquí jñūhun ya, te yúcuan sáha jeé cotecu máá ró ní cáni jijnáhan ró.

<sup>13</sup> Te yósó núu tútu íi: Ni candije ri te jeé yúcuan ní cahán rí, achí. Te suni jeé cácañdije máá rí cúu jeé cáncani ri jñūhun ya. <sup>14</sup> Chi cájini rí jeé máá Yaá jeé ní nastécu Jitoho yó Jesús, suni súcuan nastécu yá ruhū, te sáha ya jeé ñi cáhnu ni cuiñi ndihi yó núu yá. <sup>15</sup> Chi táca jñūndóho yáha cándoho ri návaha coo váha ró jijnáhan ró. Te súcuan te cayá cuehē gá ñayuu jeé sáha ya jeé váha i. Yúcuán na te suni yóhoyo cuehē i nacuatáhú i nuú Yaá Dios, te cújéhnū ga yá sáha.

<sup>16</sup> Jeé yúcuan cúu jeé tu ndínūu ni rí, te vesú cuandihí fuerza yíqui cúñu rí, te sa suhva cuanduu fuerza gá anuá rí táca quívi. <sup>17</sup> Chi jñūndóho jeé ndóho yó ñayívi yáha, tú-ni xeén cúu, te yachí yáha. Te sáha jeé níhín yó ñi tahū jeé cújéhnū yó ní cáni jeé cáa ndasí gá vesú jñūndóho ún. <sup>18</sup> Te tu táñūhún yó núu táca jñūndóho jito yó núu vijna, chi sa suhva táñūhún yó núu táca jéé váha jeé tu jito yó núu vijna. Chi táca jéé jito yó núu vijna, chi yachí ndihi, te táca jéé tu jito yó núu, chi coo ní cáni.

#### 5

<sup>1</sup> Chi yíqui cúñu yó jeé ndeé yó ñayívi yáha, cúu nájñūhun ñi vehe jeé náa. Te cájini yó jeé núu na náa, te cuáha Yaá Dios ñi yíqui cúñu jeé, te suu cúu nájñūhun ñi vehe jeé coo ní cáni ichi ándivi. Te nasūu ñi vehe jeé sáha ñayuu cúu, chi jeé sáha Yaá Dios cúu. <sup>2</sup> Te níni jéé ndeé yó vehe yáha jeé cúu yíqui cúñu yó, te cájítū ni yó sáha, chi yóhoyo cúní yó jeé núcūhun yó yíqui cúñu jeé yó nde ándivi. <sup>3</sup> Chi jeé núcūhun yó un, te ma cóo máá na anuá yó jeé náa yíqui cúñu yó yáha. <sup>4</sup> Chi níni jéé iyó gá yó ñi vehe yíqui cúñu yó yáha, te jíitū ni yó te cúcuñhá ní yó. Te nasūu jéé cuní yó jeé stóo yó yíqui cúñu yó te coo máá-ni ánuá yó. Chi sa suhva cúní yó núcūhun yó jéé jeé, návaha ndahvá yíqui cúñu yó jeé náa, te coo máá jéé cotecu ní cáni. <sup>5</sup> Te Yaá Dios cúu jeé ní sáha ya jeé súcuan coo yó. Te ni jéhe ya Espíritu yá jeé cóndee ini anuá yó, te sáha Espíritu jeé iyó ndáa ni yó jeé cuáha Yaá Dios tahū yó.

<sup>6</sup> Núu súcuan te níni cúu jeé cácuáhnū ni rí. Chi cájini rí jeé níni ndeé gá rí chíji yíqui cúñu yáha, te jíca cúu ri jíin núu ndeé máá Jitoho yó. <sup>7</sup> Chi vijna chi cácañdije ri jeé iyó yá jíin rí, vesú ná tu coto ri nuú yá. <sup>8</sup> Te cácuáhnū ni rí, chi sáha ri cuenta jeé váha ga núu na quénda ri chíji yíqui cúñu yáha te quíhín rí condee rí jíin máá Jitoho yó. <sup>9</sup> Jeé yúcuan cúu jeé cánducú ndeyí rí sáha ri jeé cusíi ni yá jíin rí, vesú núu ndeé gá rí yíqui cúñu rí chí vesú núu condee rí jíin yá. <sup>10</sup> Chi cánuú jéé ndihi yó cuiñi yuhu mesa Cristo jeé

sándaā yā jniñu yó. Te ná ñn ná ñn yó nññn yó siquĩ ndese ni casáha yó, á jéé váha chí jéé neé, ná ni condee yó chíji yiqui cúñu yó.

*Siquĩ jeé ndávicoo yó núu jññhun manĩ Yaā Dios jññ yó*

<sup>11</sup> Núu súcuan te cándiso ñyo ri nuū maā Jítoho yó, te jeé yúcuan ndúcú ndéyí ri scandije ri ñayuu. Te jññi Yaā Dios jeé cáhño ndaā rí, te ñññun ni rí jeé suni súcuan cájini maā ró. <sup>12</sup> Te nasūu jéé cánducú tucu ri cahñn ri jeé váha ga tēe cácuu ri, chí sa suhva cástññun rí jeé cuu cusñi ni rí jeé siquĩ rí jijnáhan rí. Te súcuan te cuu stío cuiñi ró nuū ñayuu jeé cutéyí i siquĩ ndese cáa ñayuu, te tu sáha i cuenta ndese cáa ini anuā ñayuu. <sup>13</sup> Te va sanaa te cájeni ni ró jeé tēe loco cácuu ri jeé cácahñn rí súcuan. Te siquĩ jeé cándihví ni rí jehé Yaā Dios cúu. Te tuú chí cáhño váha xiní rí, te jeé yúcuan cájejniñu rí jeé quéndoo váha ró. <sup>14</sup> Chí siquĩ jeé ní cundáhú ni Cristo ruhū jijnáhan rí cúu jeé cánuú nacani ri jñññun ya. Chí cájini váha ri jeé ni jíhi maññññun-ni ya jeé siquĩ ndihí yó, te jeé yúcuan nájnññun ni jíhi ndihí yó jíñn yá. <sup>15</sup> Chí ni jíhi yá jeé siquĩ ndihí yó náváha táca yó jéé tēcu, ma cótecu ga yó jéé sáha yó jéé cuní maā yó, chí sa suhva jeé cuní maā yá jeé ni jíhi yá te ni natecu yá jeé siquĩ yó. <sup>16</sup> Jéé yúcuan tuá casáha ri cuenta ndese-ni cándaā ñayuu, nájnññun casáha ñayuu ñayiví. Te vésú súcuan ní casáha ri cuenta siquĩ Cristo nde saá, jeé ññn tēe-ni cúu ya, te vijna chí cájini rí jeé cúu ya Sēhe Yaā Dios. <sup>17</sup> Chí núu ññn ñayuu yñhi i ndaha Cristo, te je ni ndujeé i. Te táca modo neé ní neváha i, je ni yáha cuahñn, te vijna je ni ndujeé ndihí.

<sup>18</sup> Te Yaā Dios cúu jeé sáha ndihí jeé yáha, chí jíñn Cristo ní sáha ya jeé ní ndávicoo yó núu jñññun manĩ yá jíñn yó. Te ni tejñññu ya ruhū jeé cánacani ri jñññun jeé ndávicoo ñayuu nuū jñññun manĩ yá jíñn i. <sup>19</sup> Chí jíñn Cristo te ní sáha Yaā Dios jeé ñayuu ñayiví ndávicoo i nuū jñññun manĩ yá jíñn i. Te tu ndácunehen ya cuēchi ní casáha ñayuu. Te ni tejñññu ya ruhū jeé cánacani ri jñññun yáha ndese ndávicoo i nuū jñññun manĩ yá jíñn i. <sup>20</sup> Núu súcuan te cácuu ri tēe cájica jñññu maā Cristo. Te jeé cahñn rí, te nájnññun jeé maā Yaā Dios cahñn ndahú yá jíñn rí. Núu súcuan te cácahñn ndahú rí jíñn ró jeé cahñn Cristo, jeé na ndávicoo ró núu jñññun manĩ Yaā Dios jíñn ró. <sup>21</sup> Te Cristo, vésú tú ni ññn cuēchi ya, te ní sáha Yaā Dios jeé ní nucondee cuēchi yó siquĩ yá. Te súcuan te yóhó jéé yñhi ndaha Cristo, ní nucondee siquĩ yó jeé iyó ndaā yó nájnññun iyó ndaā Yaā Dios.

## 6

<sup>1</sup> Núu súcuan te siquĩ jeé cácuu ri tēe cásjñññu jíñn yá, te cácahñn ndahú rí jíñn ró

jeé ma stóo uun ró jñññun jeé ní sáha Yaā Dios jeé váha róhó. <sup>2</sup> Chí áchí yá nuū tútu ññ: Máá tiempo cuní maá rí te cuní sōho rí jñññun cáhñn ndahú ró jíñn rí.

Te maá tiempo jññama ri ñayuu, te jññama ri rohó.

Achí yá. Te vijna-ni cúu maá tiempo jeé cuní yá, chí vijna-ni cúu tiempo ni quijí Yaā jññama yóhó.

<sup>3</sup> Te cánducú rí jeé ma sáha ri ní ññn jñññu jeé casi jeé candije ñayuu, náváha ma cahñn i siquĩ jñññu ndíso ri. <sup>4</sup> Chí sa suhva cánducú rí jeé ndihí jeé sáha ri, steén jeé cácuu ri tēe cájejniñu nuū Yaā Dios. Jeé yúcuan cájendeyí ni rí jíñn jéé ndóho ri jñññññu, jíñn jéé cúmani nuū rí, jíñn jéé yñ sáha jíñn rí. <sup>5</sup> Chí ní ñyo tijni jíñu jeé ní cacani i ruhū, jeé ní cachune i ruhū vecaā, jeé ní candonda i siquĩ rí, jeé ní casájniñu nññin rí, jeé ní cajehni rí máhna maá rí, jeé ní cahño ndite ni rí. <sup>6</sup> Te suni cánducú rí jeé cuajñññun i ruhū siquĩ jeé ndoo cájica rí, te cájēcññun váha ni rí jñññun ndaā, te cáhño paciencia ni rí, te váha ni rí, te ndéé Espiritu Santo ini rí, te cákundáhú ndije ni rí jñññun rí. <sup>7</sup> Te cánacani ndaā rí jñññun, te poder Yaā Dios íne jíñn rí. Te jíñn jñññun ndaā cándahva rí táca jñññu neé, chí nájnññun jeé cájejniñun ri siquĩ. Chí nájnññun jeé ndónnda un siquĩ rí te ndónnda ri siquĩ. <sup>8</sup> Iyó jíñu yññññun ñayuu jíñn rí, te iyó jíñu tuú. Iyó jíñu jéjñññun i ruhū, te iyó jíñu cácahñn i siquĩ rí. Iyó jíñu cácahñn i jeé tēe stáhú cácuu rí, te iyó jíñu cácahñn i jeé tēe ndaā cácuu rí. <sup>9</sup> Iyó jíñu casáha i nájnññun jeé tu jíñi i ruhū jijnáhan rí, te iyó jíñu jeé jíñi váha i ruhū. Iyó jíñu jeé cuní ñayuu cahñi i ruhū, te cátecu nahñn rí. Te vésú cástóho i ruhū, te tu cájihí rí sáha. <sup>10</sup> Te vésú iyó jéé cácuuññyá ní rí, te níñi cácusñi ní rí. Te vésú tēe ndahú cácuu rí, te sácúca rí cuehē ñayuu jíñn jñññun ya. Te vésú tú na vé cáneváha rí, te jíñn maá yá te ndihí-ni cúu jeé cáneváha rí.

<sup>11</sup> Hermano ññu Corinto, súcuan cúu jeé cácahñn cáj rí jíñn ró jijnáhan ró, chí siquĩ jeé maní rí jíñn ró, jeé yúcuan cáchi ndihí ri ndese cándoho rí. <sup>12</sup> Máá rí jijnáhan ri cácahñn cáj rí siquĩ jeé maní ndasí rí jíñn ró, te maá ró jijnáhan ró sanaa te tu súcuan cúu. <sup>13</sup> Nájnññun cáhñn tatá jíñn sēhe, súcuan cáhñn ndahú rí jíñn ró jeé nájnññun iyó mán rí jíñn ró, súcuan na cóo maní tucu ró jíñn rí.

*Siquĩ jeé cúu yó templo Yaā Dios*

<sup>14</sup> Ma quíví nduu ró jíñn jñññu neé casáha ñayuu tu cácdandje, chí ma cúu coo inuú ró jíñn i. ¿Chí ndese cuu quijnáhan jñññu casáha ñayuu ndaā jíñn jñññu casáha ñayuu tú ndaā? ¿Te ndese cuu coyúcu inuú ñayuu cájica jíñn luz yá jíñn ñayuu cájica nájnññun nuū neé? <sup>15</sup> ¿Ndese cuu coo inuú ní Cristo jíñn Satanás? ¿Te ndese cuu cuiñi cáhnu ñayuu cácdandje jíñn ñayuu tu cácdandje? <sup>16</sup> ¿Te ndese cuu

quijnáhan templo Yaã Dios jiín ídolo? Chi máá ró cácuu templo Yaã Dios, Yaã técu, chi ndéé yá ini anuá rō, nájñuhun ni cahān yā: Condee rī ini i te caca cuu ri mehñú i, te cuu ri Yaã Dios maá i, te cuu i ñayuu maá rī.

<sup>17</sup> Te jeē yúcuan ní cahān gā yā: Ma quiví nduu rō jiín jñiñu néé cásaha i, te cusñn rō jijnáhan rō, áchí Jítoho yō. Te ma jñá rō táca jéé tú ndaá. Yūcuán na te naquihñ ri roho,<sup>18</sup> te cuu ri Tatá rō jijnáhan rō, te cuu rō séhe yí rí jiín séhe síhí rí, áchí Jítoho yō, Yaã jñá ndihí poder. Achí tutu.

## 7

<sup>1</sup> Núu súcuan, ñānī mānī, cánevāha yó táca jñuhun yáha jéé ni jéjnūhun ya. Jeē yúcuan na sándoo yó máá yó táca jéé sajnéhén yiqui cúñu yó jiín ánuá yō. Te na cónso iyo yó núu Yaã Dios, te coo ndoo coo iñ yō nuū yā jiín ndihí jñiñu cúní yā.

*Jeē ní canacani ni ñayuu Corinto siquí cuéchi i*

<sup>2</sup> Coo maní rō jiín rí jijnáhan rō ví. Chi tu ní sáha rí falta nuū ní ñn rō, te tu ní stívi rí anuá ní ñn rō, te ní ñn rō tu ní stáhú rí. <sup>3</sup> Te nasūu jéé nducú rí cahān rī nuū rō cúu jeē cahān rī súcuan, chí je ní cahān rī jeē yóhoy maní rī jiín rō. Te níñí ñuhun ní rí roho, vésú cuu yó chí cotecu yō. <sup>4</sup> Te cúcáhu ndasí ní rí roho jijnáhan rō, te cúsní teyí ní rí jeē siquí rō. Te vésú cájito rí táca jñúndóho yáha, te íyó ndeyí ní rí te cúsní ndasí ní rí jeē siquí rō.

<sup>5</sup> Ná ní jengoo ri Macedonia te tu ní iyo nayúú ní anuá rī, chí sa suhva yí ní iyo jñúndóho jiín rí táca lado. Chi ní iyo jeē ní castáhān jñáhan jín rí, te ní cayūhu rí sanaa te caca yátá ñayuu cácandje. <sup>6</sup> Te Yaã Dios jeē sáha jeē ndúndeyí ní ñayuu cácuuhyá ní, ní sáha ya jeē ní candundayi ní rí, chí ní quiji Tito ní sáha ya. <sup>7</sup> Te ní candusí ní rí, nasūu máá ñn-ní siquí jeē ní quiji de, chí suni jeē ní ndundayi ní de ní casáha rō. Chí ní castūhñ de jeē cáñuhun ní rō coto tucu rō rúhū, jiín jéé cácuuhyá ní rō jeē siquí cuéchi rō, jiín jéé canacani ní rō jehē rī. Te jeē yúcuan ní cusí gā ní rī.

<sup>8</sup> Te carta jeē ní tají rí nuū rō, vésú ní sáha jeē ní cacucuíhyá ní rō, te tuá nácani cuíhyá ní rí jeē ní sáha súcuan. Chí vésú ní cucuíhyá ní rí saá, te vijna te tuá, chí jíní rí jeē jecu-ní quiví ní cacucuíhyá ní rō ní sáha. <sup>9</sup> Te vijna te cúsní ní rí, te nasūu síquí maá jéé ní cacucuíhyá ní rō. Chí cúsní ní rí jeē ní jejníñu jeē ní cacucuíhyá ní rō, chí ní sáha jeē ní canacani ní rō siquí cuéchi rō. Chí ní cacucuíhyá ní rō nájñuhun cúní maá Yaã Dios, te nasūu jéé ní sáhuhū rí roho. <sup>10</sup> Chí núu súcuíhyá ní yō nájñuhun cúní Yaã Dios, te suu sáha jeē nácani ní yó siquí cuéchi yó

te jnama ya yohó, te ma cóo ga jeē nácani cuíhyá ní yō. Te jeē cácuuhyá ní ñayuu tu cácandje, tu jéjníñu jeē nácani ní i, chí sa jñahnū ndetū i. <sup>11</sup> Te ní cacucuíhyá ní rō nájñuhun cúní Yaã Dios, te vijna te cájito rō náa váha ní jejníñu. Chí ní canacani ndasí ní rō ní sáha, te ní canducú rō jeē quéndoo ndaá rō, te ní cacuxeēn rō nuū téé ní sáha cuéchi, te ní cayūhu rō jeē ní castívi rō núu yā. Yūcuán na te yóhoy ní cacuní rō coto tucu rō núu rí, te yóhoy ní candíhvī ní rō ní cacuxeēn rō nuū téé ní sáha cuéchi ún. Te súcuan ní castéén rō jeé tú cuéchi rō, chí tu ní cájejnúhñ rō cuéchi ní sáha téé ún. <sup>12</sup> Te jeē ní tee ri carta un, nasūu máá-ní jeē cúxeēn rī nuū téé ní sáha cuéchi ún, ní nasūu máá-ní jeē cahān rī jehē téé ní ndoho ní sáha de. Chí sa suhva ní tee ri návaha nucūhñ ní rō ndese yóhoy ní canacani ní rō jehē rí jító jínúu Yaã Dios. <sup>13</sup> Jeē yúcuan ní candusí ní rí jeē siquí rō.

Te vilyá gā ní cacusí ní rí jeē ní jini rí jeē cúsní ní Tito, chí ní nduu nayúú ini de ní casáha rō. <sup>14</sup> Chí je ní cahān rí jiín de jeē cúsní ní rí jeē váha ñayuu cácuu rō, te vijna te tu ní quéndoo rí jñuhun canu jeē siquí rō. Chí nájñuhun ní cajini rō jeē íyó ndáa táca jñuhun ní cacahān rí jiín rō, suni súcuan ní cundaā jñuhun ní cacahān rí jiín Tito jeē cúsní ní rí siquí rō jeé váha cácuu rō. <sup>15</sup> Te vilyá gā maní de jín rō vijna jeē ñuhun ní de jeé váha ní cajetáhú rō jeé cahān de, te ní cahíyo yíñuhñ rō ní candiso iyo rō núu de. <sup>16</sup> Núu súcuan te cúsní ní rí siquí jeé cucáhu ndasí ní rí roho jijnáhan rō.

*Jeē na cúsní ní i socó i cuehē*

## 8

<sup>1</sup> Hermano, vijna te suni cácuni rí castūhñ rí nuū rō jijnáhan rō ndese cuehē jeé váha ní sáha Yaã Dios jiín ñayuu cácandje cáyucú Macedonia. <sup>2</sup> Chí vésú yóhoy ní jito ndee jñúndóho i, te suni yóhoy ní cacusí ní i jín jñuhun ya. Te vésú ñayuu ndahú ndasí cácuu i, te yóhoy váha ní cajejuñ i cuehē xūhñ jéé cúu ñayuu ndahú cácandje. <sup>3</sup> Chí cúu rí testigo jeē ní cacusí ní maá i ní cajéhe i ndésaa ní canda i, te nde vilyá gā ní cajéhe i. <sup>4</sup> Chí ní cacahān ndahú ndasí i jín rí jeé na cuáha rí jñuhun chindéé ñáhān i jín yó cuáha i xūhñ cuu hermano cándoho ndahú. <sup>5</sup> Te vilyá gā ní casáha i vésú jeé ní cajeni ní rí, chí xíhna gā ní casocó i máá i nuū Jítoho yō, te sáa te ní cajéhe i máá i sáha i táca jéé cácuni rí, ndihí ndese nújñahn ní Yaã Dios. <sup>6</sup> Te jeē súcuan ní casáha ñayuu Macedonia, te ní castíhvī ní rí Tito jeé na jéé tucu de nuū maá rō, sáha de jeé jñu jñiñu jeé ní squéjéé de jín rō jeé suni caquin rō cuehē xūhñ cuu ñayuu ndahú. <sup>7</sup> Chí máá rō yóhoy váha casáha rō táca-ní, chí váha cácandje rō,

vāha cānacani rō jñūhun, vāha cājecūhun ni rō, vāha cāndihvī ni rō, vāha manī rō jīn rī jijnāhan rī. Nūu sūcuan te suni cānuū sāha vāha rō jñūhun yāha jēe cuāha rō jēe cūu ñayuu ndahū.

<sup>8</sup> Te nasūu jēe cunī rī ndacu rī jñūhu nuū rō, chi sa cástūhun rī nuū rō ndese yōhyo cācusī ni sava ga ñayuu jēhe i xūhūn, te sūcuan te cuni rī jēe suni mǎá rō cācundáhū ndije ni rō ñayuu ndahū. <sup>9</sup> Chi je cājini rō ndese yōhyo vāha ni Jitoho yō Jesucristo jīn yō. Chi siquī jēe ní cundáhū ni yā rohó te ni nasáha ndáhū yá mǎá yá, vēsū cucá ndasí yá nde andíví nuū. Te sūcuan ni sāha ya jēe cācucá rō ndihi jēe ndiso jñūhun ya, siquī jēe ní nasáha ndáhū yá mǎá yá.

<sup>10</sup> Te jēe vāha mǎá rō cūu jēe na cáchi rī ndese jéni ni rī siquī jñūhu yāha. Vāha ni caquejé rō nde jendujin, chi nasūu mǎá-ni jēe ní cajequin rō xūhūn, chi suni yōhyo ni cacusī ni rō sāha rō. <sup>11</sup> Nūu sūcuan te vijnā te sínu rō. Te nájñūhun ni cacusī ni rō ni caquejé rō jīn, suni sūcuan na cūsī ni rō sínu rō, chi cuāha rō nūu ndese cānevāha rō. <sup>12</sup> Chi nūu cūsī ni yō cuāha yō, te jétáhū yá nūu ndese névāha yō, chi tu jícán yā jēe cuāha yō jēe tu névāha yō.

<sup>13</sup> Te nasūu jēe cahán rī jēe cáhni ndahū rō mǎá rō jēe cáa ga nihīn i vēsū jēe ndóo nuū mǎá rō. <sup>14</sup> Chi sa suhva jēe ññ cūhva-ni coneváha rō jīn i. Chi cānevāha cuehē rō vijnā, te cuu cuāha rō jēe cūmanī nuū i. Yūcuán na te nūu ndé ññ quivī coneváha i, te suni cuu cuāha i te nūu ni cumanī nuū rō. Te sūcuan te ññ cūhva-ni coneváha rō jijnāhan rō, <sup>15</sup> nájñūhun cáhán tutu ī siquī ñayuu jēe ní canastútú maná nde jenahán: Tēe jēe ní nastútú cuehē, tu ní ndóo ga nuū de. Te tēe jēe ní nastútú jecu-ni, suni tu ní cūmanī nuū de. Achí tutu.

#### *Jñūhun Tito jīn ūu gā jñāhan de*

<sup>16</sup> Te na cútahū rī nuū Yaā Dios jēe ni sāha ya jēe ndihví ni Tito jehē rō nájñūhun cāndihvī ni mǎá rī. <sup>17</sup> Chi ni jetáhū de jēe ní cacahán rī jīn de jēe jēe de nuū rō. Te siquī jēe ndihví ni de jehē rō, jēe yūcuan cuájēe de, chi sūcuan cūu ni mǎá de.

<sup>18</sup> Te suni cātájí rī ññ hermano cuajeē jīn Tito nuū rō. Te tāca grupo ñayuu cācandíje cājeñūhūn i tēe un jēe vāha jéjñīfu de siquī jñūhun jēe jñāma ya yohó. <sup>19</sup> Te tāca grupo ñayuu cācandíje suni ni catee i jñūhu siquī de jēe cáca de jīn rī chindéé ñāhán de quindēca de xūhun jīn rī jēe ní cajēhe ñayuu. Te jñūhu yāha cāsáha rī návāha cahán ñayuu jēe yōhyo vāha Yaā cūu mǎá Jitoho yō, chi cuni i ndese yōhyo cācusī ni rō cāsocō rō xūhūn. <sup>20</sup> Te quingoo ndindúú rī návāha ni ññ ñayuu ma tēe i cuēchi siquī rī siquī xūhun cāsocō ñayuu. <sup>21</sup> Chi nducú rī jēe squícu ndaá rī tācá jñūhu,

nasūu mǎá ññ-ni nuū Yaā Dios, chi suni nuū ñayuu.

<sup>22</sup> Te suni cātájí rī ññ hermano yō cuajeē de jīn ndindúú tēe yāha. Te tijnī jīnu ni steén de jēe yōhyo cūsī ni de ndihví ni de tacá jñūhu. Te vijnā chi ndihví gā ni de jehē rō, chi cūcáhu ndasí ni de jēe cāsquícu rō. <sup>23</sup> Te nūu cācajnūhūn ñayuu siquī Tito, te achí rō jēe cūu de tēe chindéé ñāhán jéjñīfu jīn rī nuū rō siquī jñūhun ya. Te uū gā hermano yō yāha, achí rō jēe cācuu de tēe jēe ni catejñūhu ñayuu cācandíje, te cáhīyo yñūhūn de nuū Cristo. <sup>24</sup> Nūu sūcuan te steén rō nuū de jēe cáhīyo manī ndije rō jīn de, návāha na cūni tāca grupo ñayuu cācandíje. Te sūcuan cuni i jēe tu ní cācusī cahá ni rī siquī rō.

*Siquī jēe cājequin i xūhūn cuu tācá hermano*

## 9

<sup>1</sup> Te vijnā te tuá jínī ññūhūn tee rī nuū rō siquī xūhun jēe cājequin rō cuu tācá hermano cāndoho ndahū. <sup>2</sup> Chi je jínī rī jēe cānujnahan ni rō cuāha rō. Te jēe yūcuan mǎni cūsī ni rī cahán rī jīn ñayuu Macedonia jēe rohó ñayuu Acaya, je ni casátūhva rō xūhun ndé jendujin. Te jēe sūcuan ni cacusī ni mǎá rō, te jēe yūcuan cuehē ñayuu Macedonia ni cacondihvī ni i ni cajēhe mǎá i. <sup>3</sup> Te tájí rī ndinúní hermano yāha cuájēe mǎá de nuū rō xihna gā, návāha jēe jínū mǎá rī te ma quéndoo néé rī siquī jñūhun ni cahán rī jēe squícu vāha rō jīn jñūhu ún. Chi coo tūhva ndije rō jīn xūhun nájñūhun ni cahán rī jīn i. <sup>4</sup> Chi sanaa te jecoo jecu tēe Macedonia jīn rī, te nūu cuni de jēe tu cáhīyo tūhva rō, te coo jñūhun canu nuū rī, te suni nuū mǎá rō jijnāhan rō, chi ni cahán teyí rī jēe cáhīyo tūhva ndije rō. <sup>5</sup> Jēe yūcuan ní jeni ni rī jēe cānuú cahán rī jīn tāca hermano yāha jecoo de xihna gā, te sáa te jinū rī, návāha stíhví ni de rohó jēe yáchī na cóo tūhva xūhun jēe ní cacahán rō jēe cuāha rō. Te sūcuan te coo tūhva siquī jēe vāha ni rō, te nasūu jēe safuerza rī rohó.

<sup>6</sup> Cocuhun ni rō jñūhun yāha, jēe nūu jecu-ni cuāha rō te suni jecu-ni nanihīn rō: Chi tēe jēe tihlī-ni táji, suni tihlī-ni nastútú. Te tēe jēe táji cuehē, suni cuehē nastútú. Achí tutu. <sup>7</sup> Tācá ññ ññ rō cuāha rō ndésaa ni tee ni rō. Ma cūxī ni rō cuāha rō, chi nasūu fuerza cūu. Chi Yaā Dios manī yā jīn ñayuu jēe cūsī ni cuāha. <sup>8</sup> Te mǎá Yaā Dios cuu sāha ya jēe nducuehē ndinuū jēe vāha cuu rō jijnāhan rō, návāha níni coneváha rō ndihi tācá jēe jínī ññūhūn rō, te coo sobra gā jēe cuāha rō jēe cūu tācá jñūhu vāha. <sup>9</sup> Chi sūcuan cáhán tutu ī siquī tāca ñayuu jēhe: Ni scáa i ni jēhe i nuū ñayuu ndahū. Te tācá jñūhu vāha sāha i, chi quéndoo ní cání.



Achí tutu. <sup>10</sup> Te Yaā Dios jéhe ya tata nuū tēe táji, te nihin de staā jeē cájide. Te suni súcuan cuāha ya ndinuū jeē váha cuu ró, te sáha ya jeē cáyā te nducuehē jniñu váha cásáha ró. <sup>11</sup> Súcuan cucúca ró jín táca-ni, návāha cuu cuāha cuehē ró. Te xūhun jéē cuāha ró quihin nuū hermano cándoho ndáhú, suu sáha jeē nácuatáhú i nuū Yaā Dios. <sup>12</sup> Chi xūhun jéē cuāha ró núū i, nasūu máá ñn-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios. <sup>13</sup> Te cahān i jeē yóhyo váha Yaā cúu Yaā Dios, chi xūhun jéē ní cajéhe ró stéen jeē váha cácandje ró jñuhun Cristo. Te suni sáha jeē cahān i jeē yóhyo cújéhu Yaā Dios siquī jeē ní cajéhe cuehē ró nuū i jín núū sava ga ñayuu. <sup>14</sup> Te suni cacān tahú i jehē ró, chi coo manī ndasí i jín ró siquī jeē yóhyo váha ni sáha Yaā Dios jín ró. <sup>15</sup> Te na cútahú yō nuū Yaā Dios, chi ni jéhe ya Sēhe ya nuū yō, jeē cúu ñn tahú cáhnu ndasí jéē ma cánda cuiti yō castühún ndihí yó.

*Jeē ndiso jniñu Pablo cúu de apóstol*

## 10

<sup>1</sup> Te ruhū Pablo, cáhān ndahú rí jín ró jijnáhan ró jín modo máá Cristo jeē vítá ni yā te váha ni yā. Ruhū, chi cácahān ró jeē iyó suchí ni rí núu ndéé rí jín ró, te núu ndéé jíca rí te tu yúhú cuiti rí cahān nihin rí jín ró, cácahān ró. <sup>2</sup> Núu súcuan te cáhān ndahú rí jín ró jeē núu na jéé rí te ma cahān ró jñuhun jeē sáha jeē cuxeñ rí nuū ró. Chi sava ró cácahān jeē casáha rí jniñu ya siquī jeē máni jeē na nihín rí siquī ún. Núu súcuan te iyó túhva rí cuxeñ rí nuū ñayuu cácahān súcuan. <sup>3</sup> Chi vésú cácuu rí ñayuu cáyúcu iní ñayví, te tu cájejnāhan rí modo cájejnāhan ñayuu ñayví. Chi nájnūhun jeē cájejnāhan rí siquī táca jniñu neé. <sup>4</sup> Chi nasúú ndajniñu ñayví jéjníñu rí cájejnāhan rí, chi jín poder Yaā Dios cájejnāhan rí snáa rí táca fuerza jeē cúu contra siquī yā. <sup>5</sup> Súcuan cásnáa rí táca jñuhun ndúxí jín jñuhun téyí jeē nducú casi jeē ma cúni ñayuu ndese Yaā cúu Yaā Dios. Te cájeji rí nuū ndihí jeē tú váha jeē cájeji ni ñayuu, návāha cuandetū i nuū Cristo. <sup>6</sup> Te jeē jinu cuandetū váha máá ró, yúcuán na te coo túhva rí cuāha rí castigo nuū táca gá ñayuu jeē tu cájendetū.

<sup>7</sup> Máá ró jijnáhan ró máni cájeji ni ró modo ñayuu tu cájecūhun ni. Núu na-ni tēe jéni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan rí. <sup>8</sup> Te núu ni cahān teyí rí jín ró jeē ndiso jniñu rí, te tu cúcanu rí sáha. Chi máá Jítoho yō ni tejníñu ya ruhū jijnáhan rí, návāha sáha rí jeē ije ánuá ró jín jñuhun ya, nasūu jéē snáa rí. <sup>9</sup> Núu súcuan te tu cúni rí jeē cáni ni ró jeē nducú rí síuhú rí rohó jín carta rí. <sup>10</sup> Chi cácahān sava ró jéē táca carta rí yóhyo stáhví ni te nihin ndácu jniñu, te sa

suhva núu ndéé rí jín ró te tu cúndeyí ni rí ndacu nihin rí jniñu, te suni tu cúu cahān vāvihí rí, achí ró. <sup>11</sup> Te ñayuu cácahān súcuan na sáha i cuenta jeē nájnūhun nihin cáhān carta rí jeē íne jíca rí, suni súcuan nihin ndacu rí jniñu nuū ró jeē cóndee rí jín ró.

<sup>12</sup> Te va ma chúndeyí cuiti ni nde rí jeē sajéhu rí máá rí, nájnūhun cásáha sava tēe un jéē cájejnūhún nde de máá de. Táca tēe ún chi cácuáné de jeē cájeji ni de jeē cújéhu ga de vésú jnáhan de, te tu cásáha de cuenta ndese cúni Yaā Dios jeē caca de. <sup>13</sup> Te ruhū jijnáhan rí, chi cuteyí nde rí máá cúhva-ni jniñu jeē ní jéhe Yaā Dios nuū rí, te ma yáha ga rí. Máá Yaā Dios ni tee cúhva yá ndésaa cúu jeē sáha rí, te máá yá ni jéhe jñuhun jeē ni jínú rí nuū rohó ñayuu ñuu Corinto. <sup>14</sup> Jeē yúcuán ná ni jinúcoo rí nuū ró jeē xúhna ñúhún te nasūu jéē ni yáha rí nuū cúhva jniñu ní jéhe ya nuū rí. Chi xúhna gá máá rí ni jinúcoo nuū ró ni canacani rí jñuhun váha Cristo. <sup>15</sup> Te tu cácuteyí rí siquī jniñu ní casáha inga tēe, nájnūhun jeē jniñu máá rí cúu. Chi sa suhva cáñuhun ni rí jeē cuehē gá candje ró, te súcuan te cuu sáha rí cuehē gá jniñu ya méñu ró, te níni máá cúhva jeē ní jéhe ya nuū rí. <sup>16</sup> Yúcuán na te cácuani rí scuité núu ga rí jñuhun jnáma ya yohó núu táca gá ñuu yúcu ndé yúcuán gá. Te súcuan te ma quívi nduu rí cuteyí rí nuū jeé jé ni canacani inga tēe jñuhun.

<sup>17</sup> Te núu ndé tēe cúni de cuteyí de, na cuteyí de siquī jeē sáha máá Jítoho yō, nasūu siquī jeé sáha máá de. <sup>18</sup> Chi nasúu tēe jeé jejnūhún máá cúu jeé quéndō yíñúhún, chi sa suhva tēe jeé jejnūhún máá yá.

*Jeē cahān Pablo siquī tēe cácanani jñuhun stáhú*

## 11

<sup>1</sup> Cone cáhnu ni ró jijnáhan ró jeé cahān rí jecu jñuhun modo nájnūhun cácahān ñayuu canéé. Núu súcuan te cáhnu coo ni ró ví. <sup>2</sup> Chi cúcuñí rí jehē ró jijnáhan ró, nájnūhun cúcuñí Yaā Dios. Chi cácuu ró nájnūhun ñn sūchi síhí iyó ndoo, te ní sáha rí jeé quijnáhan ró jín Cristo, nájnūhun quijnáhan ñn sūchi síhí jín máñúhún-ni yá i. <sup>3</sup> Te yúhú rí sanaa te cuāha ró jñuhun stáhú táca tēe un róhó, te siáa ró jñuhun jeé chíñúhún ndáa ró Cristo nde jín iní jín ánuá ró. Chi suni súcuan ni sáha Satanás jín Eva, chi ni quívi iní ñn coo, te ni stahú un ña jín jñuhun ndíchí stáhú. <sup>4</sup> Chi núu quijcoo tēe nuū ró jeé tu cácanani ndáa de jñuhun Jesús nájnūhun ni canacani rí nuū ró, te va yóhyo váha cájetáhú nde ró de. Te suni súcuan váha cájetáhú nde ró núu inga espíritu jín núu inga jñuhun jeé tu quijnáhan jín Espíritu jín jñuhun jeé ní cacandje ró jéē jnáma ya rohó. <sup>5</sup> Te táca tēe cácandje ró un jéē cácahān jeé apóstol kujéhu ga cácuu, tú cuiti jeé cújéhu ga nde

de nuū rī. <sup>6</sup> Chi vēsū tu nīhīn vāha nde ri modo cahān rī, te jécūhun vāha ni rī. Chi jīn ndihī jniñū ni casāha ri mēñū rō ni castéén cají rī nuū rō jeē súcuan cúu.

<sup>7</sup> Tu ní jicān rī xūhun nuū rō siquī jeē ní nacani rī jñūhun jnáma ya yohó. Te súcuan ni cotecu ndahú rī návāha quendóo vāha ga maá rō jīn jñūhun ya. ¿Te va cuēchi ni sāha ri jeē ni sāha ri súcuan, chí naún? <sup>8</sup> Chi sava ga grupo ñayuu cácadnje ni quihin rī xūhun jeē ní cajēhe i nuū rī, návāha súcuan-ni nacani rī jñūhun ya nuū rō jijnáhan rō. <sup>9</sup> Te ná ni condee rī jīn rō te ni ndihī xūhun rī, te tu ní jicān cuiti rī nuū ní ñn rō. Chi hermano jeē ní quijicoo ichi Macedonia ni cajēhe de nuū rī jeē cúmani. Te jeē súcuan tu ní stáhān rī rohó, te ni ma sāha cuiti rī. <sup>10</sup> Te nájnūhun cúcāhnu vāha ni rī jeē jini rī jñūhun ndaā Cristo, suni súcuan jini rī jeē ma quihin rī xūhūn nuū ni ñn ñayuu ní ndáñū Acaya, návāha ma cási i jeē cúsi ni rī jeē súcuan-ni nacani rī jñūhun ya. <sup>11</sup> ¿Te á siquī jeē tú maní rī jīn rō cúu jeē cahān rī súcuan, jéni ni rō, chí naún? Tuú chí maá Yaā Dios jini yā jeē maní rī jīn rō jijnáhan rō.

<sup>12</sup> Te sāha ri ná-ni sāha rī, chi ma quihin rī xūhun rō, návāha cási rī nuū jeē casatéyí téé un maá de jeē cáchān de jeē inuú casāha de jniñū ya jīn rī. <sup>13</sup> Te téé ún chi nasūú apóstol ndaā cácuu de, chí māni maá jñūhun stáhú cáchān de, te casāha de maá de jeē cácuu de apóstol Cristo. <sup>14</sup> Te tu náa ni yō jito yó jéé casāha de súcuan, chí je jini yō jeē suni Satanás násama maá te stáhú jéé sāha maá nájnūhun ñn ndajéhe Yaā Dios jeē jica jīn luz yā. <sup>15</sup> Te jeē yúcuan suni tu náa ni yō jito yó jéé téé cájejniñū nuū Satanás, casāha de maá de jeē téé ndaā cácuu de. Te ñn quiví te nanihīn de siquī jniñū néé casāha de.

*Jñūdóho ni ndoho Pablo siquī jeē cúu de apóstol*

<sup>16</sup> Inga jīnu cáhān rī jīn rō jeē ni ñn rō ma cáni ni rō jeē téé cánéé cúu rī. Te núu súcuan cájeni ni rō, te va cuatáhú nde rō jéé cahān rī nájnūhun téé cánéé, návāha suni cuu cutéyí nde ri jecu nájnūhun casāha téé ún. <sup>17</sup> Jeé cahān rī vijna chi nasūu jéé ní ndacu maá Jítoho yō cúu, chí sa nájnūhun téé cánéé cahān rī jeé cutéyí nde ri. <sup>18</sup> Chi cuehē de casatéyí de maá de modo jeé iyó ini ñayiví, te suni súcuan na satéyí nde rī maá rī núu súcuan. <sup>19</sup> Te va téé cáhīyo cájī xīnī cácuu nde rō, te jeé yúcuan cúu vāha ni nde rō cuatáhú rō ñn téé cánéé núu súcuan. <sup>20</sup> Chi va vāha-ni cájendeyí ni rō nuū téé un jéé casáfuerza de rohó cuajniñū rō núu de, chí casāha de jeé ndundáhú rō, chí cácuende de ndajniñū rō, chí casájéhnu de maá de nuū rō, chí ndé cácatu de nuū rō. <sup>21</sup> Te vēsū cúcanu nde ri cahān rī, te na cáhān rī jeé tu ní cūndeyí ni

nde ri satéyí rī maá rī nájnūhun casāha téé ún.

Te vijna te núu iyó sava téé chūndeyí ni de satéyí de maá de, te va suni chūndeyí ni nde maá rī núu súcuan. Te va cáhān rī nájnūhun cáhān ñn téé cánéé. <sup>22</sup> Núu cácutéyí de jeé téé hebreo cácuu de, te suni súcuan ruhū. Núu téé Israel cácuu de, te suni ruhū. Núu yucūn Abraham cácuu de, te suni ruhū. <sup>23</sup> Núu téé cájejniñū nuū jñūhun Cristo cácuu de, te vihýá gā ruhū. Te va cáhān rī nájnūhun téé cánéé jéé cutéyí rī súcuan. Chi ni caa ga ni sájniñū rī vēsū maá de jijnáhan de, te ni caa ga ni cacani i ruhū, te cuehē gā jīnu ni ine ri vecāa, te suni cuehē gā jīnu ni cacuni ñayuu cahni i ruhū. <sup>24</sup> Te jñāhan rī hebreo, uhūn jīnu ni cacani xeēn de ruhū jīn cuarta ññ, ñn cūhva jeé je yajni cuu rī sāha. <sup>25</sup> Uní jīnu ni cacani de ruhū jīn yujnu xī, te ñn jīnu ni cajēhe de yuú xini rī. Uní jīnu ni quēe barco jeé ní jica ri siquī jñūhun ya. Te ñn jecuāā jīn ñn ndiaca ni yosó candá rī nuū cunú ndute mar. <sup>26</sup> Cuehē jīnu ni ndoho ri ni jica ri ichi, te ni cácu rī nuū táca yúte, te ni cácu rī nuū táca ñacuihná. Ni cácu rī nuū ñayuu nación rī jīn nuū ñayuu ñuu jicá. Ni cácu rī cháha chúcuan ná ni Iyo ri ñuu jīn rancho jīn mar. Ni cácu rī nuū táca jñāhan rī jeé tu iyó ndáa. <sup>27</sup> Ni sájniñū nīhin rī te yí ní ndoho rī. Cuehē jīnu ni jehni rī maá rī máhná. Ni jīri rī sóco, ni jichí rī ndute. Cuehē jīnu ni Iyo ndite ni rī, ni cuijnu rī, ni cumani sahma rī

<sup>28</sup> Te siquī táca jéé yáha chí iyó gá. Chi ndiquiví ndóho rī jeé nácani ndasí ni rī jehé táca grupo ñayuu cácadnje. <sup>29</sup> Núu ñn ñayuu tu fuerza ini i, te suni ndóho ri jehé i. Te núu ñn ñayuu quiví i cuēchi sāha jñāhan i, te ndóho rī jñūhun cúcanu jīn jñūhun náxeēn ni. <sup>30</sup> Núu súcuan te núu cánuú cutéyí nde ri, te va cutéyí rī siquī táca jéé steén jeé tú na fuerza ini rī. <sup>31</sup> Te Yaā Dios, Yaā cúu Tátá maá Jítoho yó Jesucristo, jini yā jeé cahān ndaā rī. Te ní cáni na cáhān ñayuu jeé vāha ndasí Yaā cúu ya. <sup>32</sup> Ná ni Iyo ri ñuu Damasco, te gobernador jeé ndacu jniñū ndañūñ jeé jniñí rey Aretas, ni jeni de soldado ni cacondito táca yéhyí jeé ní condúu ndihyú ñuu ún, chí jniñí de ruhū quihin rī vecāa ni cuni de núu. <sup>33</sup> Te ni quiví rī chíji ñn jica, te ñayuu cácadnje ni cascūn i ruhū ventana ñn vehe jeé néne jicá jeé ndihyú ñuu ún. Te súcuan ni cácu rī nuū téé ún.

*Jeé ní jito ndijin Pablo jeé ní stúu ya nuū de*

## 12

<sup>1</sup> Te tu nīhīn jniñū jeé cutéyí rī. Te vāha ga na cástūhun rī nuū rō siquī jeé ní jito ri jeé ní stúu maá Jítoho yō nuū rī te ni steén ndijin yā nuū rī. <sup>2</sup> Jini rī ñn téé cándje Cristo, te je ni cuu uxí cuūn cuiyā jeé ní sāha ya jeé ní caa téé un ní jehēn de nde andiví únī. Te tu jini rī

núu ni jehēn rī jīn yiqūi cūñu rī, chí ní jehēn anuá-ni rī. Máa Yaa Dios cúu jeē jini. <sup>3</sup> Te jini rī jeē ní ndonehen ya ruhū. Te á ní jehēn rī jīn yiqūi cūñu rī, chí ní ndōo, tu jini rī, chí máa-ni Yaa Dios cúu jeē jini. <sup>4</sup> Chi ní sáha ya jeē ní caa rī ni jehēn rī nde jardín andiví. Te yūcuan ní jini sōho rī tāca jnūhun sáhi ndasí jeē ma cúu castūhun yóhó ñayuu. <sup>5</sup> Te siquī jeē ní sáha ya sūcuan jīn rī cúu jeē cutéyí rī, te ma cutéyí rī siquī ndese cúu máa rī. Chi cutéyí rī máni jeē tú na fuerza ini rī. <sup>6</sup> Te núu cuní rī cutéyí rī siquī máa rī nuú, te nasūu jeē canéé rī núu sáha rī sūcuan núu, chí ndaa jeē nde iyó jeē cutéyí rī. Te ni ma sáha rī, chí tu cuní rī jeē cani ni ñayuu jeē cujéñu ga rī vesú jeē ní jito i chí jeē ní jini i jnūhun rī.

<sup>7</sup> Te tu cuní yā jeē yáha rī cutéyí rī siquī jeē ní stéen ndijin yā jniñu jéñu ndasí un núu rī, te jeē yūcuan ni quiji ñn jnūndóho jeē ndiquin ruhū te stóho ruhū. Te ñn jeē ni jéhe ya jnūhun ni tají Satanás cúu, ñn jeē stóho ruhū, návāha ma yáha rī cutéyí rī. <sup>8</sup> Te uní jinu ni cahān ndahú rī jīn máa Jítoho yō jeē na téjyo ya quihīn. <sup>9</sup> Te ni cahān yā jīn rī: Tuú chí tu cúmaní jeē cundáhú ní rī rohó. Chi ñayuu jeē tú na fuerza ini, sáha rī jeē nducuehē gā fuerza máa rī ini i, ni achi yā. Núu sūcuan te cúsi rī ní rī jeē tú na fuerza ini rī, chí sūcuan te nducuehē gā fuerza Cristo ini rī. <sup>10</sup> Jeē yūcuan cúu jeē cúsi rī ní rī jeē tú na fuerza rī, jīn jéé cácahān ndevāha ñayuu jīn rī, jīn jéé cúmaní nuú rī, jīn jéé cájito xeēn i ruhū, jīn jéé ndóho rī jnūndóho siquī Cristo. Chí jeē tú na fuerza máa rī, yūcuan sáha jeē nihín rī fuerza máa yá.

*Jeē nácani ni Pablo siquī ñayuu cácañje ñuu Corinto*

<sup>11</sup> Te va tēe cánéé cúu rī jeē ní sátéyí nde rī máa rī. Te siquī jeē tu cácañje ró ruhū, jeē yūcuan ní sátéyí rī máa rī. Chi cánuu jéé máa ró cuajnúhun ró ruhū nuú. Chi vesú tú jniñu rī jeē máa rī, te va tu núu cuiti nde rī nuú táca tēe un jéé cácahān ró jeē apóstol cujéñu cácuu de. <sup>12</sup> Chi mēñhō ró ní sáha rī táca jniñu jeē stéen jeē cúu ndije rī apóstol. Chí jīn cuéhē paciencia ni sáha rī táca jniñu jéñu jeē stéen poder Yaa Dios, jīn táca jniñu jeē nahān ní cana ni rō ní cajito ró. <sup>13</sup> Te tu ní sáha rī jeē núu ga cácuu ró núu táca gā grupo ñayuu cácañje, chí máa ñn-ni jeē tu ní stāhān rī rohó jéé cuáha ro jéé jini ñúhūn rī. Cone cáñu ni rō núu sūcuan ni sáha nde rī falta nuú ró víi.

<sup>14</sup> Te vijna jeé iyó túhva rī jecondēhe rī rohó vuelta uní. Te suni tú na vé cacān rī nuú ró, chí nasūu ndajniñu ró cúu jeē cuní rī, chí sa suhva jeé quendōo vāha ró jīn jnūhun ya. Chí nájnūhun sēhe rī cácuu ró, te sēhe chí tu cánuu caya i jeē cúu tátá i, chí sa tátá cánuu cuáha de jeé quendōo vāha sēhe de. <sup>15</sup> Jeé yūcuan cúsi rī ní rī stāhi rī jeé névāha rī, te

nde stāhi rī fuerza máa rī, návāha sáha rī jeé quendōo vāha ánuá ró jijnáhan ró. Te maní gā coo rī jīn ró, vesú sanaa te jecu-ni cáhīyo maní ró jīn rī.

<sup>16</sup> Te iyó jecu ró cácahān jeé vesú tú na vé ni jicān rī nuú ró, te tēe stáhú cúu rī, chí ni nducú rī modo ndichí nihīn rī xūhun ró, cácahān ró. <sup>17</sup> ¿A táca tēe ní tají rī nuú ró, á ñn máa de ni stáhú de rohó jéé nihīn de xūhun ró cuu máa rī, chí naún? Tú cuiti. <sup>18</sup> Ni cahān ndahú rī jīn Tito jeé jecondēhé de rohó, te ni tají rī ñn hermano ni jeé jīn de. ¿Te chí ní stáhú Tito rohó ní quihin de xūhun nuú ró jeé cuu máa de, chí naún? Tuú chí ñnuú ní casáha ndindúú rī, te ñn-ni ánuá ndindúú rī.

<sup>19</sup> ¿Sanaa te cájeni ni ró jeé cahān rī jnūhun yáha návāha quendōo vāha rī jīn ró, chí naún? Nasūu sūcuan cúu, chí Yaa Dios jini yā jeé cahān rī máa-ni jnūhun jeé cuní Cristo. Te ndihi jeé cahān rī chí nducú rī jeé ije ró jīn jnūhun ya, ñānī máni. <sup>20</sup> Chí yúhú rī jeé núu na jéé rī, te sanaa te cuní rī jeé tu casáha ró jniñu núnahan ni rī. Te máa ró jijnáhan ró, suni ma núnahan ni ró ruhū. Chí sanaa te cátejnáhan ró, cácuuésún ni ró, cácuiti rī ró, cáсандúxí ró, cáсандúhún ró, cácahān ró siquī jnáhan ró, cácutéyí ró, cájica néé ró. <sup>21</sup> Te yúhú rī jeé núu na jéé tucu rī te cuáha Yaa Dios jnūhun canu nuú rī jeé sūcuan casáha ró. Te sanaa te cucuíhyá ni rī nuú iyó cuéhē ró jeé ní casáha cuéchi ichi yátá, te tu nácani ni ró stóo ró jniñu jnéhēn jniñu jica jnéni jīn jniñu néé ndasí ní casáha ró.

*Saludo jīn jnūhun cástūhun Pablo jeé sándāhi*

## 13

<sup>1</sup> Yáha cúu vuelta uní jeé jecondēhe rī rohó. Te sándaā yō jniñu nájnūhun cáhān tutu: Jīn jnūhun jeé cahān uū chí úní testigo te cundaā táca jniñu, áchi. <sup>2</sup> Te vijna jeé ñe jicá rī te cáhān tucu rī nájnūhun ni cahān rī ná ni ñe rī jīn ró. Cáhān rī nuú ñayuu ni casáha cuéchi un jīn nuú ndihi ró, jeé núu na jéé tucu rī te ma cóo vítá ni rī jīn ró. <sup>3</sup> Te yūcuan cuu prueba jeé cánducú ró, suu núu jendaā jeé cahān rī jīn fuerza Cristo. Chí Cristo tu cúmaní fuerza yā jeé sándaā yā jīn ró, chí stéen yā poder yā mēñhū ró. <sup>4</sup> Te vesú tu ní stéen yā fuerza yā ná ni jilhi yā jicá cruz, te vijna chí técu yā jīn poder Yaa Dios. Te nájnūhun ni ndoho máa yá, suni sūcuan cándoho rī vijna jeé tu fuerza rī. Te vesú sūcuan te jīn poder Yaa Dios cátecu rī jīn yā jeé cuajniñu rī nuú ró jeé siquī jnūhun ya.

<sup>5</sup> Coto ndee ró máa ró núu cáhīn nihīn ró jīn jnūhun cácañje ró yá. Sáha vāha ro cuenta. ¿Te á tu cájini ró jeé ndeé Jesucristo ini anuá ró, te núu ndaa jeé ní cacandije ndije ró? <sup>6</sup> Te ñúhun ni rī jeé suni cácañhū ni ró jeé máa rī cácañje ndije rī. <sup>7</sup> Te cájicān tahú rī nuú Yaa Dios jeé ma sáha ró ni ñn

jniñu néé. Te vēsú núu cuajnúhún ró jeē váha ndácu ri jniñu nuū rō, chí vēsú núu ma cuajnúhún rō, te tú na vé sáha, chí mání jeē na sáha ró jniñu ndaā cúu jeē cánducú rí. <sup>8</sup> Chí tu jési ri nuū jniñu ndaā, chí sa suhva scáca rí. <sup>9</sup> Núu súcuan te cácusī ni rī núu tú na fuerza maá rí, te núu iyó fuerza maá ró. Te níni cácan tahu rí jeē na íje ga ni rō jijnáhan ró jíin jnúhun ya. <sup>10</sup> Te téé rí carta yáha nuū rō nde ná tu jeē rí, náváha núu na jéé rí te tuá jíni ñúhún cuxeēn rí nuū rō. Chí ni jēhe Jitoho yō jniñu ndíso ri yáha jéé sáha ri jeē íje ánuá rō jíin jnúhun ya, nasūu jéé snáā rí.

<sup>11</sup> Je ni cahán yō núu súcuan hermano, te na cóo jeē váha jíin ró jijnáhan ró. Te na cóndihvī ni rō íje ró jíin jnúhun ya, te coo ndeyí ni rō. Te na cóo inuú ni rō te coyūcu mání rō jíin jnáhan ró. Te Yaā ndíso jnúhun ndeyí sī ni jíin jnúhun cundáhú ni, coo ya jíin ró jijnáhan ró. <sup>12</sup> Te jeē cahán rō jíin táca jnáhan ró, te yíñúhún techūhu ró ndaha i. <sup>13</sup> Sándeyí ni rō jijnáhan ró, áchí hermano cácandíje jeē cáyūcu yáha.

<sup>14</sup> Te ñúhún ni rí jeē Jitoho yō Jesucristo na sáha ga yā jeē váha róhó jijnáhan ró, te Yaā Dios cundáhú ni yā rohó, te Espíritu Santo condee cáhnu ya jíin ró. Súcuan na cóo. Amén.

## CARTA JEE NI TEE SAN PABLO APOSTOL NUU ÑAYUU GALACIA

<sup>1</sup> Máá rí cúu Pablo apóstol. Te nasūu ñáyyuu ni jéni ruhū ni nasūu ñáyyuu ni tájí ruhū jeé nácani rí jñūhun, chí sa suhva máá Jesucristo jíin Tátá yō Yaā Dios, Yaā ní nastécu Jesús méhñu ndáyi. <sup>2</sup> Te ruhū jíin táca hermano cáyūcu jíin rí yāhá, cátee rí carta yáha cuájeé nuū rohó ñáyyuu cácaandije ní región Galacia. <sup>3</sup> Te cáñuhun ní rí jeé Tátá yō Yaā Dios jíin Jítoho yō Jesucristo, na sáha ga yá jeé váha rōhó, te sáha ya jeé coo ndeyí coo síi ní rō. <sup>4</sup> Chí Jesús ní socó yá máá yá jeé ní jíhí yá jeé síquí cuéchi yó, návāha jnama ya yohó nuū táca jeé neé íyó ñayívi yáha, chí súcuan ní nujnahan ní máá Tátá yō Yaā Dios. <sup>5</sup> Jeé yúcuán na cáhán yō jeé yóhoyo luu cújéhu ya ní cáni. Súcuan na cóo. Amén.

*Siquí jeé tuá na inga jñūhun cácu ñayuu*

<sup>6</sup> Te náhán náá ní rí jíto rí jeé yóhoyo yáchi cánducú ró stóo ró Yaā Dios, Yaā ní cana rōhó jeé quívi ró ndaha ya síquí jeé cundáhú ní Cristo yohó. Chí ní candiquín rō inga jñūhun jeé sín cáhán. <sup>7</sup> Te tú cuiti na inga jñūhun jnama yóhó íyó. Te cáhíyo jecu ñayuu castáhán i rōhó, te cácuni i nasama i jñūhun ndese jnama Cristo yohó. <sup>8</sup> Te núu ñi ñayuu nacani inga jñūhun nuū rō ndese jnama ya rohó, te núu tu quíjnáhan jíin jñūhun ní canacani rí nuū rō xihna gā, na jnánhú ndetū ñayuu ún. Te vesú máá rí chí ñi ndajéhé jeé quíji nde andiví nacani inga jñūhun núu, na jnánhú ndetū. <sup>9</sup> Je ní cahán rí jíin ró, te suni súcuan cáhán tucu rí vijna: Na-ní tee nacani inga jñūhun nuū rō, te núu tu quíjnáhan jíin jñūhun jeé ní cajetáhú ró, na jnánhú ndetū tee ún.

<sup>10</sup> Te jeé cahán rí súcuan, ¿á ndúcú rí jeé cuajnúhún ñáyyuu ruhū, chí Yaā Dios? ¿Chí ndúcú rí jeé cúsi ní ñayuu jíin rí, cájeni ní rō? Núu ndúcú gá rí jeé cúsi ní ñayuu jíin rí, te nasūu mozo Cristo cúu rí núu súcuan.

*Ndese ní jinú Pablo cúu de apóstol*

<sup>11</sup> Te cástūhun rí nuū rō, hermano jíjnáhan rō, jeé jñūhun jnama ya yohó jéé nácani rí, nasūu jéé ní jeni ní máá rí jíin ñáyyuu cúu. <sup>12</sup> Chí nasūu ñáyyuu ní steén nuū rí, ní nasūu ñáyyuu ní sáha jeé ní cutúhva rí, chí sa suhva máá Jesucristo ní steén nuū rí.

<sup>13</sup> Chí je ní cajini jñūhun ró ndese ní sáha rí nde saá, ná ní chíñúhún rí sahán jnáhan rí ñayuu hebreo. Te cájini rō jeé yóhoyo ní jito xeén rí ñayuu cácaandije nuū Yaā Dios, te ní condihví ní rí snáá rí i núu. <sup>14</sup> Te váha ga ní cutúhva rí sahán ún vesú cuehē gā tee nación rí jeé ní cajehnu jíin rí, chí ní condihví gā ní rí síquí táca jeé ní cajequin jíi rí. <sup>15</sup> Te vesú

súcuan te Yaā Dios je ní nacáji ya ruhū nde ná tu cacu rí, te ñi quívi te ní cusí ní yá ní cana ya ruhū jeé quívi rí ndaha ya, síquí jeé yóhoyo ní cundáhú ní yá ruhū. <sup>16</sup> Te ní steén yá Sēhe ya nuū rí, návāha nacani rí jñūhun ndese jnama ya ñayuu táca nación jeé tu jíni jñūhun ya. Yúcuán na te tu ní cájnūhun rí ní ñi ñayuu, <sup>17</sup> ní tu ní jéhén rí ñuu Jerusalén nuū tee cácuu apóstol xihna gā vesú ruhū. Chí sa suhva ní jehén-ní rí nde región Arabia, te saá te ní nuhūn tucu rí ñuu Damasco.

<sup>18</sup> Yúcuán na te nde ní yáha uní cuiyā, te ní jehén rí Jerusalén. Te ní jini jnáhan rí jíin Pedro, te ní condee rí jíin de xahún-ní quívi. <sup>19</sup> Te tu ní jíto rí nuū táca gá apóstol, chí máá ñi-ní nuū Jacobo ñani máá Jítoho yō. <sup>20</sup> Jñūhun yáha jeé tee rí cuajeé nuū rō, chí jíni Yaā Dios jeé ndaá cúu.

<sup>21</sup> Yúcuán na te ní jehén rí ní región Siria jíin Cilicia. <sup>22</sup> Te ñayuu cácaandije jeé yíhi ndaha Cristo, jeé cáyúcu región Judea, ná tu coto cuiti i nuū rí saá. <sup>23</sup> Chí máni jñūhun-ní ní cajini i cácahán ñayuu: Tee ní jito xeén yohó nde saá, vijna chí nácani de jñūhun cándije yó jéé ní nducú de snáá de nde saá, áchí i. <sup>24</sup> Te ní cacahán i jeé yóhoyo cújéhu Yaā Dios jeé súcuan ní sáha ya jíin rí.

*Jeé ní cajetáhú táca gá apóstol un Pablo*

## 2

<sup>1</sup> Yúcuán na te nde nuū uxí cuñ cuiyā, te ní jehén tucu rí Jerusalén jíin Bernabé, te suni ní jeca rí Tito ní jehén de jíin rí. <sup>2</sup> Te ní jehén rí chí máá Yaā Dios ní steén yá jeé jíni ñúhún quíhin rí. Te ní candutútú sín nene tee cácujehu nuū ñayuu cácaandije ún. Te ní castūhun rí nuū de síquí jñūhun jnama ya yohó jéé nácani rí nuū ñayuu táca nación tu jíni jñūhun ya. Te súcuan ní sáha rí návāha cuajnúhún de jniñu rí, te ma quéndōo cáhá jniñu sáha rí jíin jéé ní sáha rí. <sup>3</sup> Te ní tu ní casáha fuerza de Tito, tee ní jica jíin rí, jeé cōndee jñuní circuncidar de, vesú nasūu tee hebreo cúu de. <sup>4</sup> Te súcuan ní cundaá, vesú ní quívicoo jecu tee stáhú jéé sáha de jeé hermano cácuu de. Te tee un ní quívicoo de návāha yuhu-ní coto de ndese ní ndulibre yō nuū ley circuncidar síquí jeé yíhi yó ndaha Cristo Jesús. Chí cácuni de jeé síquí tucu yó ley un, nduu tucu yó mozo nuū ley un. <sup>5</sup> Te tu ní cajetáhú cuiti rí nuū tee ún, chí cúní rí jeé quéndōo ñiñi ró jíjnáhan ró jíin jñūhun jnama ya yohó.

<sup>6</sup> Te máá tee cácujehu nuū ñayuu cácaandije ún, tuá na inga jniñu jéé ní cándacu de nuū rí. Te máá rí chí tu ní chíhi rí cuenta síquí jeé cácujehu de, chí suni Yaā Dios tu sáha ya cuenta, chí inuú-ní cúu ndívií tee nuū yá. <sup>7</sup> Chí sa suhva ní cajini de jeé jñūhun jnama ya yohó, ndíso jniñu rí nacani rí nuū ñayuu táca nación jeé tu casáha circuncidar,

nájñuhun nácani Pedro jñuhun un núu ñáyuu hebreo jeë casáha circuncidar. <sup>8</sup> Chi Yaá Dios jeë ní tají Pedro jeë nácani de jñuhun nuú ñáyuu hebreo, suni máá yá ni tají rúhũ jeë nácani ri jñuhun nuú ñáyuu táca nación tu jíni jñuhun ya.

<sup>9</sup> Jeë yúcuan, Jacobo jíin Pedro jíin Juan, ni cajini de jeë Yaá Dios ni jêhe ya jniñu luu yáha nuú rí. Te tée un cácahã ñáyuu cácañdije jeë maá de cácujeñhu ga. Te ni cajini de ndaha ri jíin ndaha Bernabé, jeë ní castéén de jeë cáhiyo maní de jíin rí, jíin jeë ní cacundaã ni de jeë maá rí quingõo nacani jñuhun nuú ñáyuu táca gá nación, te maá de jíinãhan de nuú ñáyuu hebreo. <sup>10</sup> Te maá ñin-ni jeë ní cajicã de cúu jeë cónahãn rí chindéé ñáhãn rí ñáyuu cándoho ndáhú, te jniñu ñn je ni condihví ni rí ni sáha ri.

#### *Jeë ni cáhãn Pablo nuú Pedro*

<sup>11</sup> Te ná ni quiji Pedro ñuu Antioquía, te ni cahãn cají rí nuú de, chi ni stívi de jniñu. <sup>12</sup> Chi nde ná tu quecoo sava jñahan de hebreo jeë ní tají Jacobo, te yéji de staã jíin ñáyuu jeë násuú hebreo cácuu. Yúcuã na te nuú ní quecoo tée ñn, te ni cusin de jeë tuá yéji de jíin i, chi yúhũ de jeë cúni táca tée un jéé tuá squicu de ley jñahan de hebreo. Chi áchí ley jeë ma cúu cají de staã jíin ñáyuu jeë tu casáha circuncidar. <sup>13</sup> Te sava ga tée hebreo jeë cácañdije, suni ni cacujiyo de nuú i, nájñuhun ni sáha Pedro, chi cáyuhú de jeë cúni tée ñn. Te nde máá Bernabé ni cascáhãn de ni cujiyo. <sup>14</sup> Yúcuã na te ni jini rí jeë ní canayúhũ de cají de staã jíin ñáyuu ñn, cúu jeë tuá jíca de jíin modo jeë cahãn jñuhun jñama ya yohó. Te ni cahãn rí nuú Pedro, jíto jínuú táca de: Róhó jéé cúu tée nación yó hebreo, tuá squicu ró ley jñahan yó hebreo, chi yéji ró jíin ñáyuu ñn. ¿Te najehé safuerza ró i jeë squicu i ley jñahan yo hebreo núu súcuã? ní achí rí.

#### *Ñin-ni modo jñama ya ñáyuu hebreo jíin táca gá nación*

<sup>15</sup> Te yohó chi cúu yó ñáyuu hebreo, te cácahãn yó jeë násuú ñáyuu táca gá nación casáha cuéchi cácuu yó. <sup>16</sup> Te wésú súcuã te jíni yó jeë ní ñn yó tu quéñdõo ndaã yó nuú Yaá Dios jeë squicu yó jniñu ndácu ley Moisés jenahãn, chi máá jeë candije yó jeë Jesucristo ndahva yã cuéchi yó. Jeë yúcuan suni máá yó ni candije yó Jesucristo, návãha ndahva yã cuéchi yó síquĩ jeë candije yó, násuú jíin jéé nducú yó squicu yó ley un. Chi áchí tutu ñi: Ni ñn ñáyuu ma quéñdõo ndaã i nuú Yaá Dios jíin jéé nducú i squicu i jniñu jeë ndácu ley, achí.

<sup>17</sup> Te máá yó ñáyuu hebreo, núu cúni yó jeë ndahva Yaá Dios cuéchi yó síquĩ jeë ni jíhĩ Cristo jehé yó, suu cúu jeë jécuhun ni yó jeë suni ñáyuu casáha cuéchi cúu yó, nájñuhun táca gá ñáyuu. Núu súcuã ¿te á cuéchi ni sáha

yó jeë ni stóo yó ley jenahãn ná ni candije yó Cristo? Tú cuiti jeë súcuã. <sup>18</sup> Chi sa núu naquihin tucu yó ley jeë ni stóo yó un, te súcuã tée yó cuéchi síquĩ maá yó. <sup>19</sup> Chi ruhũ, nájñuhun ni jíhĩ rí ni sáha ley un, te jeë yúcuan má cúu ga ndacu jniñu nuú rí. Te súcuã te cuu cotecu rí jeë sáha ri jeë cuní Yaá Dios. <sup>20</sup> Chi nájñuhun je ni jíhĩ rí jíca cruz jíin Cristo, te vijna chi tuá técu rí jeë maá rí, chi máá Cristo cúu jeë técu ini rí. Te jeë técu rí ini ñayivi yáha vijna cúu jeë candije ri jeë Sêhe Yaá Dios chindéé ñáhãn yá ruhũ. Chi ni cundáhú ni yã ruhũ te ni socó yã maá yá jehé rí. <sup>21</sup> Núu súcuã te tu cuní rí casi rí nuú jñuhun jeë ndahva Yaá Dios cuéchi yó síquĩ jeë yóhyo váha ni yã jíin yó. Chi núu jeë quéñdõo ndaã yó nuú yã jeë nducú yó squicu yó ley jenahãn, yúcuan na te tu ndé jéjiniñu jeë ni jíhĩ Cristo nuú.

#### *Jñuhun ley jíin jñuhun cándije*

### 3

<sup>1</sup> Róhó hermano ñuu Galacia, ¿naun tu cájecuhun ni ró? ¿Ndé tée ni saca núu xiní ró jeë tuá cájetáhú ró jñuhun ndaã? Chi ná ni canacani ri jñuhun ya nuú ró, te cají ndasí ni cájecuhun ni ró jeë ni jíhĩ Jesucristo jíca cruz jehé ró. <sup>2</sup> ñin-ni jñuhun yáha cájñuhun rí rohó: ¿Ndese ni canihin ró Espiritu Santo? ¿A jéé ní cacundeyí ró squicu ró jniñu ndácu ley Moisés? Tú cuiti, chi jeë ní cacandije ró jñuhun jñama ya rohó jéé ní cajini sóho ró. <sup>3</sup> ¿Ndese cúu jeë tu cájecuhun cuiti ni ró? Chi xihna gã ni cacandije ró jéé ni jíhĩ Cristo jeë jnama ya rohó, te ni canihin ró Espiritu. Te vijna ¿á cajeni ni ró jeë stóo ró jñuhun ñn te fuerza maá ró squicu ró ley un, te cácu ró naún? <sup>4</sup> Núu súcuã te tu ndé ní jéjiniñu cuiti jeë ní castóho ñáyuu rohó síquĩ jñuhun jñama Cristo rohó, chi vijna cánducú ró squéñdõo ró jñuhun ñn. Nacã jeë váha te núu jeë tu ní castóo ró, chi sa cácañdije ndije ró yá. <sup>5</sup> ¿Te na síquĩ cúu jeë jêhe Yaá Dios Espiritu yã nuú ró te sáha ya jniñu jéhuu mēñhu ró? Tu sáha ya síquĩ jeë cánducú ró squicu ró ley un, chi síquĩ jeë ní cacandije ró jñuhun jñama ya rohó jéé ní cajini sóho ró.

<sup>6</sup> Abraham ni candije de jeë sáha Yaá Dios jeë ni jéjñuhun ya, te jeë yúcuan ní ndahva yã cuéchi de. <sup>7</sup> Núu súcuã te na jécuhun ni ró jíinãhan ró jéé ñáyuu cácañdije jeë sáha Yaá Dios jehé i, ndávi i yucún Abraham síquĩ jeë súcuã cácañdije i. <sup>8</sup> Chi nde jenahãn je cáhãn tutu ñi jeë ñáyuu táca nación tu jíni jñuhun Yaá Dios, ndahva yã cuéchi i núu candije i ñn. Te nde ná tu cuu táca jéé yáha te je ni jéjñuhun ya jñuhun váha yáha nuú Abraham: Jeë rohó cúu jeë quéñdõo ndetú ñáyuu táca nación. <sup>9</sup> Núu súcuã te ñáyuu cácañdije, quéñdõo ndetú i jíin Abraham, tée ni candije jeë ni jéjñuhun ya.

<sup>10</sup> Te sa jnahnū ndetū ñayuu jeē cánducú i quendōo ndaā i jeē jiín ley Moisés. Chi súcuan yósó núu tútu ii: Jnahnū ndetū tāca ñayuu jeē tu squícu ndihi cuiñi jñuhun yósó núu tútu ley, achí. <sup>11</sup> Núu súcuan te cáji cúu jeē ni ñin ñayuu ma quendōo ndaā i nuū Yaā Dios siquī jeē nducú i squícu i ley un. Chi cáhán tutu: Ñayuu jeē ní ndahva yā cuēchi i, técu i jeē candíje i jeē sáha ya jehē i, achí. <sup>12</sup> Te ley Moisés tu cáhán jeē cótecu yō ní cáni siquī jeē candíje yó, chí sa suhva cáhán: Núu ndé ñayuu squícu jniñu yáha, te cotecu i sáha, achí.

<sup>13</sup> Te Cristo ni jnama ya yohó núu jñuhun cáhán ley jeē jnahnū ndetū yó siquī cuēchi yó, chí máá yá ni ndoho siquī jñuhun jeē jnahnū ndetū yó. Chi yósó núu tutu ii: Tāca ñayuu condita caa jicá yúñu, jnahnū ndetū i, achí. <sup>14</sup> Te Cristo Jesús ni jihí yá jicá yúñu cruz návaha quendōo ndetū ñayuu táca nación sáha ya. Chi jñuhun jeē ni jéjnūhun ya quendōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yó, te nihín yó Espíritu jeē ni jéjnūhun ya quíji.

*Siquī ley jiín siquī contrato jeē ni jéjnūhun ya*

<sup>15</sup> Hermano, na cáhán rī ñin jñuhun ndese cásaña ñayuu ñayiví: Núu ñin tēe sáha de ñin contrato chí ñin acta, te núu je ni cucutú ni sáha de firmar, te ma cúu ga najnanū, ni ma cúu jecosó gā. <sup>16</sup> Te suni súcuan ni sáha Yaā Dios ñin contrato jeē ni jéjnūhun ya nuū Abraham jiín yúcūn de jeē quíji. Te tu cáhán tutu ii siquī cuehē yucūn de, chí sa cáhán siquī ñin-ni yucūn de, te suu cúu Cristo. <sup>17</sup> Núu súcuan te jñuhun jeē cahán rī yáha cúu jeē xīhna gā ni sáha Yaā Dios ñin contrato jiín Abraham, jeē quíji Cristo jnama ya yohó, te ni sácútu yá. Yūcuán na te ni yáha cuñin ciento ocó uxí cuiyá, te sáá te ni jéhe ya ley nuū Moisés. Te ley un jéē ní quee cueé gā, ma cúu nacanun contrato un, ni ma cúu casí nuū jñuhun jeē ni jéjnūhun ya jeē jnama ya yohó. <sup>18</sup> Chi núu jeē jiín ley Moisés jnama Yaā Dios ñayuu, yūcuán na te nasūu siquī contrato jeē ni jéjnūhun ya cúu. Chí sa suhva siquī máá jéē ni jéjnūhun Yaā Dios nuū Abraham cúu jeē ní jnama ya de.

<sup>19</sup> Núu súcuan ¿te ndese jéjnūñu ley Moisés? Jéjnūñu chí ni jéhe ya un cuéé gā návaha nastúu cuēchi i. Te ni ndacu jniñu máá-ni nde ná tu quíji Cristo, Yáa cúu yucūn jeē ni jéjnūhun Yaā Dios jeē quíji. Te nde ná ni jéhe Yaā Dios ley un núu ñayuu, te ni taji yá táca ndajehé yá ni cacastūhun núu Moisés, te Moisés ni nacachí nuū i. <sup>20</sup> Te sín cúu jñuhun jeē ni jéjnūhun ya nuū Abraham jeē quíji Cristo, chí máñuhún-ni ya ni jéjnūhun, te tu ní jini ñuhún ni ñin jeē nacachí nuū Abraham.

*Siquī ndese jéjnūñu ley jenahán*

<sup>21</sup> Núu súcuan ¿te á cúní cahán jeē ley jeē ni jéhe Yaā Dios nuū Moisés, téjiyo jeē ni jéjnūhun ya ún? Tú cuiñi jeē súcuan. Chí núu jeē ni jéhe Yaā Dios ñin ley jeē cótecu ñayuu ní cáni sáha, yūcuán na te quendōo ndaā i nuū yá siquī jeē squícu i jniñu ndácu ley un núu. <sup>22</sup> Te tuú chí yósó núu tútu ii jeē ndihi ñayuu ñayiví, nájnūhun yíndihyū i vecāa chí cáyihí i chíji cuēchi. Te súcuan cúu návaha táca i jeē candíje i jeē ní jihí Jesucristo jehē i, nihín i máá jéē ni jéjnūhun ya nuū i siquī jeē candíje i ún.

<sup>23</sup> Chí nde ná tu quee jñuhun candíje yó Cristo, te nájnūhun ni yíndihyū yó ni sáha ley jenahán, návaha condetu yó quiví quíji Cristo, Yaā candíje yó. <sup>24</sup> Núu súcuan te ley ni cuu ñin jeē ndíto yóhó nájnūhun ñin mozo ndíto sūchi lúlí, te ni jéjnūñu nde quiví ní quíji Cristo, návaha candíje yó jéē ní jihí yá jehē yó, te ndahva Yaā Dios cuēchi yó. <sup>25</sup> Te vijna jeē ní quee Cristo, Yaā candíje yó, te tuá yñi yó ndaha ley jeē cúu nájnūhun mozo ndíto yóhó.

<sup>26</sup> Chí ndivii rō cácuu sēhe Yaā Dios siquī jeē ní cacandíje rō Cristo Jesús. <sup>27</sup> Chí táca rō jeē ní jendute rō siquī jeē ní quiví rō ndaha Cristo, ni sáha ya jeē ní nduu rō nájnūhun cúu máá yá. <sup>28</sup> Te vijna chí tuá cuo rō ni ñayuu hebreo ni ñayuu griego, ni mozo jeē ní jeen ñayuu, ni ñayuu sájniñu cuenta maá, ni tēe ni ñahan. Chí ñin na cúu rō núu yá jeē cáyihí rō ndaha Cristo Jesús. <sup>29</sup> Te núu cáyihí rō ndaha Cristo, núu súcuan te yucūn Abraham cácuu ndije rō, te nihín rō máá táhū jeē ni jéjnūhun ya.

#### 4

<sup>1</sup> Jeē cahán rī jiín rō jijnáhan rō cúu jeē yáha: ñin sūchi chíu táhū, vésú máá i naquihin ndihi jeē névaha tátá i, te núu lulí i chí ñuú cúu i jiín mozo. <sup>2</sup> Chí yñi i ndaha táca jéē ndíto i jiín jéē ndíto ndajniñu i, nde quee quiví jeē ní jeni tátá i, te sáá te nihín i. <sup>3</sup> Te suni súcuan yóhó, chí nde ná tu jecūhun ni yó siquī Cristo te ni cuu yó nájnūhun sūchi lúlí, te ni yñi yó chíji táca costumbre jeē ní cajequin ñayuu ñayiví. <sup>4</sup> Te nde ná ni quee quiví jeē ní jeni Yaā Dios, te ni taji yá Sēhe ya, ni cacu ya chíji ñin ñahan, te ní cacu ya yucūn ñayuu nación hebreo jeē cáyihí chíji ley Moisés. <sup>5</sup> Súcuan ni cacu ya návaha jnama ya yohó jéē tuá quíhi yó chíji ley un, te návaha naquihin Yaā Dios yohó cuu yó sēhe ya.

<sup>6</sup> Te siquī jeē cácuu rō sēhe ya, te ni taji Yaā Dios Espíritu Sēhe ya ni quiví ini anuá rō, te sáha ya jeē cácahán jee rō: Tátá máá ná. <sup>7</sup> Núu súcuan te tuá cácuu rō nájnūhun mozo, chí sēhe ya cácuu rō. Te jeē cácuu rō sēhe Yaā Dios, te suni nihín rō máá táhū jeē ni jéjnūhun ya jeē jiín Cristo.

*Jeē nácani ni Pablo siquī ñáyyu cácadnje*

<sup>8</sup> Chi nde saá, nde ná tu jecūhun ni rō ndese Yaā cūu Yaā Dios, te ni cacuu ró mozo nuū tāca jeē násūu yāā ndaā cūu. <sup>9</sup> Te vijna chi je cājini rō ndese Yaā cūu ya, te vāha ga na cāhán rī jeē maá yá je jíní yā rohó. Núu súcuan ¿te najehē cáculi rō nandió cóo ró nduu tucu ró mozo nuū tācá costumbre ñayuu ñayiví jeē tu níhín jníñu cuiti? <sup>10</sup> Chi máni jeē cānēe ñi rō quiví jín yóo jín vico jín cuíyá. <sup>11</sup> Te yúhú rí sanaa te tu ní jéjníñu cuiti jeē ní nacani ri jñūhun nuū rō.

<sup>12</sup> Cāhán ndahú rí jín ró hermano, jeē na cáni ni rō nájñūhun jéni ni maá rí jeē tuá squícu ri costumbre ñayuu hebreo. Chi ruhú ní nasáha ri maá rí nájñūhun maá ró jeē tu ní cáyihí ró núu ley costumbre ñayuu hebreo. Te tú na vé ni cásáha ró jéē cuculhyá ni rí nde saá. <sup>13</sup> Chi cājini rō ndese ni cuu ná ni nacani núu rí jñūhun nuū rō ndese jnáma ya yohó. Chi siquī jee cuhú rí te ni jecuiñí rí ñuu rō ni nacani ri jñūhun. <sup>14</sup> Te vésú jñūndóho ni cuu jeē ní cocuhú rí, te tu ní cásájéē ní rō nuū rí, ni tu ní cásquéhichí ní rō ruhú. Chi sa ni cajetáhú rō ruhú nájñūhun jeē cūu rí ñin ndajehé Yaā Dios, chí nájñūhun jeē cūu rí maá Cristo Jesús. <sup>15</sup> Núu súcuan ¿te najehē cūu jeē tuá cáculi ní rō jín rí vijna? Chi náhán rí jeē vāha ní casáha ró jéē ní cajnahuhú ní rō núu jeē cūu te tava ró tinúu vāha maá ró, cuāha ró nduu tinúu rí nuú. <sup>16</sup> Te vijna ¿á ní nduu ri enemigo rō siquī jeē cachí rí máni jñūhun ndaā nuū rō, chí naún?

<sup>17</sup> Te cáhiyo tēe jeē cándihví ni siquī rō jijnáhan ró, te nasúu jéē quéndóo vāha ánuá ró, chí sa jeē cáculi de nasásin de rohó jín ruhú, návāha cándihví ní rō jeē cuu maá de. <sup>18</sup> Te iyó vāha jeē cándihví ní de jehé rō, te núu jeē quéndóo vāha ánuá ró cūu núu. Chi níni jini ñúhún sáha de jeē vāha rohó, vésú núu íne ri jín ró chí núu tú rí íne. <sup>19</sup> Séhē mání jijnáhan ró, jeē siquī rohó cūu jeē inga jínu jnāhuhú ní rí, chí nájñūhun ñin ñahan scácu sēhe, súcuan ndóho rí jehé rō. Te suu cūu jeē jnāhuhú ní rí ndétu rí jeē na ndúndaā anuá ró ndacu ró Cristo. <sup>20</sup> Nacá jeē vāha núu jeē ndeé rí jín ró vijna ñúhún, návāha cuu cahán maní rí jín ró. Te tu cújñúni cuiti ni rí ndese ga cūu jeē cáni ni rí siquī rō.

*Jñūhun yátá siquī Agar jín Sara*

<sup>21</sup> Rohó jijnáhan ró jéē cáculi rō quihí ró chíji ley Moisés, cachí nuū rí: ¿á tu ní cājini sōho ró ndese cāhán ley un? <sup>22</sup> Chi cāhán tutu ñi jeē Abraham ní iyo uū sēhe yí de. Te ñin i cūu sēhe Agar, ñahan cūu mozo vehe de. Te inga i cūu sēhe ñahan iyó libre, suu ñashí de Sara jeē ní cuu ña ñahan numá. <sup>23</sup> Te sēhe ñahan cūu mozo, ni cacu i nájñūhun cácu tāca gá sūchi lúli. Te sēhe ñahan cūu libre, ni cacu i maá siquī jeē súcuan ni jéjñūhun Yaā Dios.

<sup>24</sup> Te yāha cūu ñin jñūhun yátá, chí ndindúú ñahan un cūu ña nájñūhun ndindúú contrato jeē ní sáha Yaā Dios jín ñayuu. Máá ñahan nání Agar, cūu ña nájñūhun contrato ley jeē véji nde yucu Sinaí. Te ñayuu cáyihí chíji contrato ley, cácu i mozo nuū ley un. <sup>25</sup> Chi Agar cūu nájñūhun ley jeē ní jéhe Yaā Dios xíní yucu Sinaí jeē ñin nde Arabia. Te cūu ña nájñūhun Jerusalén, ñuu ñayuu hebreo, jeē iyó vijna, chí tāca sēhe ñuu Jerusalén, cácu i nájñūhun mozo nuū ley un. <sup>26</sup> Te Jerusalén jeē iyó andiví, chí sa suhva iyó libre nájñūhun Sara. Te yohó ñayuu cácadnje, nájñūhun sēhe un cácu yó, chí iyó libre yó nuū contrato ley. <sup>27</sup> Chi suhva yósó núu tutu ñi:

Rohó jeē ní cuu ró ñahan numá jéē tú sēhe ró, na cūsí ni rō.

Rohó jéē tu ní jéhnde chíji ró jéē scácu ró, na cána jee ró jéē cūsí ni rō.

Chi coo cuehē gá sēhe rohó jéē ní cuu ró ñahan numá vésú ñahan jeē jé ní scácu sēhe.

Achí tutu.

<sup>28</sup> Hermano, sēhe Yaā Dios cácu yó, chí súcuan ni jéjñūhun ya nuū yó, nájñūhun ni jéjñūhun ya nuū Abraham jeē cacu sēhe de Isaac. <sup>29</sup> Te nde saá te inga sūchi ní cacu nájñūhun cácu tāca gá ñayuu, ni jito xeñ i Isaac, sūchi ní cacu ní sáha Espiritu. Te nájñūhun ní iyo saá, suni súcuan cājito xeñ ñayuu tāca sēhe Yaā Dios nde vijna. <sup>30</sup> ¿Te ndese cāhán tutu ñi? Achí: Quenehen ró ñahan cūu mozo na quíhín ña jín sēhe ña. Chí sēhe ñahan cūu mozo, ma níhín i tahú jín sēhe ñahan libre, achí yá jín Abraham. <sup>31</sup> Núu súcuan hermano, tu cūu yó nájñūhun sēhe ñahan cūu mozo, chí nájñūhun sēhe ñahan libre cūu yó.

*Na cuñi ñihin yó jín jñūhun jeē ní sáha libre yohó*

## 5

<sup>1</sup> Te Cristo ní sáha libre yá yohó jéē tuá yíhi yó chíji ley Moisés. Núu súcuan te cuñi ñihin ró jín jñūhun jeē ní sáha libre yá yohó, te ma ndívicoo tucu ró cuu ró mozo nuū ley un.

<sup>2</sup> Sáha ró cuenta jijnáhan ró, chí ruhú Pablo cahán rí jín ró jeē núu squícu ró ley circuncidar, yūcuán na te tu níhín jníñu cuiti jeē ní candnje ró jéē ní jíhi Cristo jehé rō. <sup>3</sup> Te inga jínu cāhán ñihin rí jín táca tēe cánducu ngu circuncidar, jeē núu súcuan te suni cánuú jéē squícu de ndívii cuiti gá jñūhun cāhán ley Moisés. <sup>4</sup> Rohó jéē cánducu ró quéndóo ndaā ró jeē squícu ró ley un, je ní casiaá ró Cristo núu súcuan. Je ní castóo ró jñūhun jeē ndahva yá cuéchi ró siquī jeē cundáhú ní Yaā Dios rohó. <sup>5</sup> Te maá yó chí cájica yó jín Espiritu, te cácadnje yó jéē ní ndahva yá cuéchi yó, te jeē yúcuan ñūhun ní



yō jeē quendōo ndaā yō quivī cuñi yō nūu Yaā Dios. <sup>6</sup> Chi yóhó jéé cáyihí ndaha Cristo Jesús, vēsū nūu jeē cúu yó circuncidar chí tu cúu yó, tú na vé nihín jniñu. Jeē nihín jniñu cúu jeē candije yó jeē sáha ya jehé yō. Te yūcuan sáha jeē cundáhú ni yó jnánhan yó.

<sup>7</sup> Váha ni cacandije ró nūu. <sup>8</sup> Te ndé ñin ni jesi jeē tuá cájetáhú ró jnūhun ndaā nūu sūcuan? <sup>8</sup> Jnūhun jeē ní cascáhán de róhó, chí tú vēji nuū maá Yaā ní cana róhó ní quivicoo ró ndaha ya. <sup>9</sup> Te ma náa ni ró jeē téé cástáhú róhó, jnūhun cástéén de cúu nájñūhun levadura, chí vēsū jecu-ni levadura, te ndáa ndihí ñujen sáha. <sup>10</sup> Te cúcáhnū ni rí jeē maá Jítho yó sáha ya jeē ma cándije ró jijnánhan ró inga jnūhun jeē sñin cáhán. Te maá Yaā Dios cuáha ya castigo téé jeē sáca nūu xiní ró, nūu na-ní téé cúu de.

<sup>11</sup> Te ruhū, hermano, nūu jeē nácani ga rí jnūhun ley circuncidar nde vijna, te jnánhan rí ñayuu hebreo ma cóto xeēn i ruhū nuū. Chí ma quití ni i jeē nácani rí jnūhun jeē ní jñhí Cristo jica cruz, nūu jeē sūni nácani rí jnūhun circuncidar nuū. <sup>12</sup> Te táca téé jeē sáca nūu xiní ró siquí jnūhun ún, váha ga na cáhnde gá de máá de nūu sūcuan.

<sup>13</sup> Chí máá ró jijnánhan ró hermano, ni cana ya rohó náváha coo libre ró nuū ley un. Te vēsū iyó libre ró, te ma cáni ni ró jeē cúu quivicoo ró táca cuéchi jeē cúu modo neé cuní maá ró, chí sa suhva na sáha ró máá ró mozo jeē chindéé ñáhán ró jnánhan ró siquí jeē cundáhú ni ró i. <sup>14</sup> Chí je ni squícu ró ndihí ley nūu squícu ró ñin-ni jnūhun ndácu jniñu yáha: Cundáhú ni ró jnánhan ró nájñūhun cundáhú ni ró maá ró, achí. <sup>15</sup> Te nūu máni jeē ndóna xeēn ró siquí jnánhan ró jeē cuajnáhan ró, te coto ma snáa ró jniñu jeē ní sáha ya mehñu ró jijnánhan ró.

*Modo cuní ñayuu tu cándije jín modo sáha Espíritu*

<sup>16</sup> Sūcuan cáhán rí jín ró jijnánhan ró: Caca ró nájñūhun cuní maá Espíritu, te yūcuán na te ma sáha ga ró modo jeē cuní maá ró. <sup>17</sup> Chí táca jéé cuní maá yó, yūcuan jési nuū jeē cuní maá Espíritu. Te jeē cuní Espíritu, jési nuū modo neé jéé cuní maá yó. Te jeē ndindúú yáha chí cájesi nuū jnánhan, te jeē yūcuan tu cúu sáha ró jniñu váha jeē cuní ró sáha ró. <sup>18</sup> Te nūu máá Espíritu steén nuū ró, nūu sūcuan te tuá cáyihí ró chíji ley jenahán.

<sup>19</sup> Te iyó ndijin táca jniñu cásaña ñayuu cájica jín modo neé máá, te yáha cúu: Cásiquí ndéé jnánhan i, cásaña i jniñu jnéhén, cásaña neé ndasí i. <sup>20</sup> Cáchiñūhún i ídolo, cásaña tási i, cájito uhū jnánhan i, cájejnánhan i, cácuññí ni i. Te yachí cáquití ni i, te cándihví ni i jeē cúu máá-ni i, te cátejñánhan i cásasñin i máá i. <sup>21</sup> Te cácuésún ni i, cájehni i ndiyí, cánañni i, cásaña i vico neé, jín táca gá jeē sūcuan. Te cáhán nihin rí jín ró, nájñūhun je ni cahán

rí jín ró saá, jeē ñayuu casáha sūcuan, ma nihín tahú i quivicoo i ñuu nuū ndácu Yaā Dios jniñu.

<sup>22</sup> Te ñayuu jeē nduú i jín Espíritu, táca jniñu yáha sáha ya jín i: Jeē cundáhú ni jnánhan, jeē cūsñi ni, jeé iyó ndeyí sñi ni, jeé iyó paciencia, jeē maní ni, jeé váha ni, jeé squícu váha. <sup>23</sup> Jeē tu sáha jeē cujéhnū, jín jéé jési modo jeē cuní maá. Te tú na ley cacán cuéchi siquí ró nūu sáha ró táca jniñu yáha. <sup>24</sup> Te ñayuu cáyihí ndaha Cristo, nájñūhun je ni cajehni i modo neé máá i jicá cruz, nde jín táca jéé ndiyo neé ni i te cutíndí i. <sup>25</sup> Te jeē sūcuan ni jéhe máá Espíritu ñin vida jeé nūu yó, te suni na cáca yó jín modo steén Espíritu.

<sup>26</sup> Te ma sandúxí yó jéé squití ni yó jnánhan yó, te ni ma cucuésún ni yó siquí jnánhan yó.

*Jnūhun jeē chindéé ñáhán yó jnánhan yó*

## 6

<sup>1</sup> Hermano, nūu ñin jnánhan ró ni sáha cuéchi, te róhó jéé cájica jín Espíritu, na náchuhun ichí ró i. Te jín jnūhun vitá cahán ró jín i, te suni condito ró máá ró jeē ma cacán ñin ró sáha ró táca cuéchi. <sup>2</sup> Te chindéé ñáhán ró jnánhan ró nūu na vé cúu jeē ndóho i, chí sūcuan cúu jeé squícu ró ley Cristo.

<sup>3</sup> Chí nūu ñin ñayuu jéni ni i jeé ñayuu teyí cúu i, vēsū nastū sūcuan cúu, te stáhú i máá i nūu sūcuan. <sup>4</sup> Te táca ñin ñin ró na cóto ndee ró ndese cáca jniñu sáha ró. Te nūu váha sáha ró, yūcuán na te cuu cusñi ni ró jín jéé sáha máá ró, te tu níni jéé scáni jnánhan ró máá ró jín jnánhan ró. <sup>5</sup> Chí táca ñin ñin yó cánuú squícu yó jín jniñu ni jéhe ya nuū máá yó.

<sup>6</sup> Te róhó jéé casuáha jnūhun váha ya, na chindéé ñáhán ró téé cástéén nuū ró jín táca jéé váha cáneváha ró.

<sup>7</sup> Ma stivi ró caní ni ró jeē cuu sáha ró cuéchi. Chí ma cúu sácatá ró nuū Yaā Dios caní ni ró jeē tu sáha ya cuenta. Chí táca nūu ndese sáha ñayuu, suu yūcuán naniñin i. <sup>8</sup> Chí ñayuu jeé sáha i jeé cuní modo neé máá i, nihin i jeé jnahnú ndetú i sáha modo jeé cuní maá i ún. Te ñayuu jeé sáha jeé cuní maá Espíritu, chí nihin i jeé cótecu i ní cáni andiví sáha Espíritu. <sup>9</sup> Te ma cuíta yó jeé sáha yó jniñu váha nūu sūcuan, chí jeé quée máá quiví te naniñin yó, te nūu ma cuíta yó. <sup>10</sup> Nūu sūcuan te táca jín jeé cúu sáha yó, te na sáha váha yó jín táca ñayuu, te hermano yó jeé cacandije cúu jeé cánuú gá.

*Saludo jín jnūhun cástūhun Pablo jeé sándihí*

<sup>11</sup> Condēhe ró jeé náhnū letra téé ri cuajeé nuū ró jijnánhan ró, chí ndaha máá rí téé rí yáha. <sup>12</sup> Te téé jeé casáfuerza de róhó cuu ró circuncidar, cásaña de siquí jeé cácuni de cuajnúhún ñayuu de. Te cásaña de náváha ma cóto xeēn ñayuu de jeé cáncani de jnūhun

jeē ni jīhī Cristo jehē yō. <sup>13</sup> Te ni máá de jeē casáha de circuncidar, suni tu squícu vāha de ndīhi ga ley jenahán. Te cáacuní de jeē cuu ró circuncidar, návāha cuu sátéyí de máá de núu quihín ró jnúnī circuncidar sáha de. <sup>14</sup> Te ruhū tu cúní rī satéyí rī máá rī siquī ní ñn jeē yúcuan, chí máá ñn-ni siquī jeē ni jīhī Jitoho yō Jesucristo jicā cruz. Chí siquī yúcuan cúu nájñūhun ni jīhī rī, chí ni siaá rī táca jéē iyó ini ñaywí, te suni nájñūhun ñn ndīyí cúu ri nuū ñaywí. <sup>15</sup> Chí núu yīhi yó ndaha Cristo Jesus, te tu níhín jníñu núu cúu yó circuncidar chí tuú. Chí jeē níhín jníñu cúu jeē ní nasájeé yá anuá yō. <sup>16</sup> Te ñúhun ni rī jeē táca ró jeē jíca ró jín modo yáha, na sáha ga yā jeē coo ndeyí coo sī ni rō, te cundáhú ni yā rohó. Te suni ñúhun ni rī jeē súcuan sáha ya jín táca gá i jeē cúu ndije i ñayuu cácanđije Yaā Dios.

<sup>17</sup> Te vijna jín ní gá cuahān yō, cúní ri jeē ma stáhān gā ni ñn ñayuu ruhū. Chí yiqui cúñu rī ndíso seña jeē ni túji rī ni ndoho ri jeē cúu ri mozo máá Jitoho yō Jesús.

<sup>18</sup> Hermano, ñúhun ni rī jeē na sáha ga Jitoho yō Jesucristo jeē vāha rōhó jijnáhan ró. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU EFESO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaa Dios ni taji yá ruhü. Te téé ri carta yáha cuájeé nuü rohó ñayuu ñuu Efeso, jeé cácuu ró ñayuu maá yá jeé cácañdije ró Cristo Jesús. <sup>2</sup> Te ñuhun ni rí jeé Tatá yó Yaa Dios jiin Jitoho yó Jesucristo, na sáha ga yá jeé váha róhó, te sáha ya jeé coo ndeyí coo sñ ni ró.

*Jeé sáha Cristo jeé quéndõo váha ánuá yó*

<sup>3</sup> Na cáhán yó jeé yóhoyo cújéhu Yaa Dios, Yaa cúu Tatá Jitoho yó Jesucristo. Chi ni jéhe ya táca jeé váha iyó andiví jeé quéndõo váha ánuá yó, chi yáhi yó ndaha Cristo. <sup>4</sup> Chi nde ná tu jecõo ñayiví te ni nacáji ya yohó jéé quívi yó ndaha Cristo, náváha coo ndoo ánuá yó te caca ndaa yó nuü yá. <sup>5</sup> Je ni cundáhú ni yá yohó nde saá, te ni tana ya yohó jéé náquihin séhe ya yohó. Te jiin Jesucristo ni sáha ya súcuan, chi ni nujnahan ni yá sáha ya. <sup>6</sup> Te jeé yúcuuan niní na cáhán yó jeé yóhoyo cújéhu ya, chi yóhoyo váha ni sáha ya yohó jiin táca jéé váha ni yá, siquí jeé yáhi yó ndaha Cristo, Séhe ya jeé maní yá jiin. <sup>7</sup> Te siquí jeé yóhoyo váha ni yá jiin yó, te Séhe ya un ní jnama ya yohó jéé ni jíhi yá jehé yó, te ni ine cáhnu ni yá nuü cuéchi yó. <sup>8</sup> Te ni steén yá jeé cundáhú ndasí ni yá yohó, te ni sáha ya jeé jécúhun ni yó te cundichí yó jiin ñuhun ya. <sup>9</sup> Te ni sáha ya jeé cuni yó ñn jñuhun ya jeé ní yisáhi, jeé tu ní sáha ya jeé cuni ñayuu jenahán. Chi súcuan ni tee ni máá yá, chi sáha ni nujnahan ni yá sáha ya. <sup>10</sup> Te yáha cúu jñuhun ún: Nde na queé tiempo te sáha ya jeé ndihi jeé yúcu andiví jiin jéé yúcu ñayiví, inuú-ni nduu, quíhi ndaha Cristo.

<sup>11</sup> Te siquí jeé yáhi yó ndaha Cristo, te nihin yó tahü yó, chi je ni nacáji Yaa Dios yohó nde saá. Chi súcuan ni tee ni maá yá, chi sáha ya táca-ni jeé jé ni cundaá ni yá jeé nujnahan ni yá sáha ya. <sup>12</sup> Súcuan ni sáha ya náváha máá rí jeé xíhna gā ni cacandije ri Cristo, caca ndaa rí te súcuan sájeéhu rí yá jeé yóhoyo luu cújéhu ya. <sup>13</sup> Te suni máá ró jijnáhan ró, ni cajini ró jñuhun ndaa jñuhun váha jeé jnama ya rohó, te ni cacandije ró Cristo. Te ni canihin ró Espíritu Santo jeé ni jéjñuhun ya jeé cuáha ya. Te ndéé Espíritu yá ún ini anuá yó, te cúu ya nájñuhun sello jeé steén jeé cúu yó séhe Yaa Dios. <sup>14</sup> Te sáha ya jeé jini ndije yó jéé cucuéeé gá te cuáha Yaa Dios tahü yó, nde na sínu ya jñiñu jeé jnama ya ñayuu yá. Te quívi ún cahán yó jeé cujéhu ya, chi yóhoyo luu cújéhu ya.

*Jeé jicán tahü Pablo jehé ñayuu cácañdije*

<sup>15</sup> Te ruhü ni jini jñuhun ri ndese cácañdije ró jéé ni sáha Jitoho yó Jesús jehé ró, jiin ndese cácañdáhú ni ró ndihi ñayuu cáyáhi ndaha Yaa Dios. <sup>16</sup> Te jeé yúcuuan tu jécuiñí rí jeé nácuatáhú rí jehé ró, te jeé jicán tahü rí te tu náá ni rí cacán tahü rí jehé ró. <sup>17</sup> Chi jicán tahü rí jeé na sáha Yaa Dios jeé jécúhun váha ni ró te ndundichí ró jiin jñuhun ya, te cuni gā ró ndese Yaa cúu ya. Chi máá yá cúu Yaa Dios Jitoho yó Jesucristo, te cúu ya Tatá yó jeé luu ndasí cújéhu. <sup>18</sup> Te jicán tahü rí jeé na sándjijn gā yá nuü jeé njñuní ró, náváha jecúhun ni ró ndese cáca ndihi jeé cáñuhun ni ró nihin ró siquí jeé ní cana ya rohó. Te jecúhun ni ró ndese cúca cácuu ró jiin táca jñuhun jéhu luu ndiso jñuhun ya jeé cúu ñayuu maá yá. <sup>19</sup> Te jicán tahü rí jeé na jécúhun ni ró ndese yóhoyo jéhu poder yá jeé sájniñu ya ini anuá yohó jéé cúu yó ñayuu cácañdije. Chi tu ndáhi cuiti poder yá. <sup>20</sup> Te suu poder un cúu jeé ni steén yá ná ni sáha ya ñn jñiñu jéhu ga jeé ni nastécu yá Cristo méhñu ndáyi te ni scúcõo ya lado váha ya nde andiví. <sup>21</sup> Te ni jeni ya Cristo siquí táca jéé cujéhu, jiin jéé ndiso jñiñu, jiin jéé jñí poder, jiin jéé ndácu jñiñu, jiin siquí táca jeé cácahán ñayuu jeé cujéhu, cúu tiempo yáha, cúu tiempo quíji. <sup>22</sup> Te ni jehé ya jeé cujéhu Cristo siquí ndiví. Te ni sáha ya jeé cúnuu yá cujéhu ya nuü ñayuu cácañdije. <sup>23</sup> Te ñayuu cácañdije un cácuu i nájñuhun yiquí cúñu ya, chi ñn na cúu i jiin yá te ñuhun chitú yá ini anuá i, chi Yaa jeé ñuhun chitú ní cáhnu-ni cúu ya.

*Ni cácu yó siquí jeé ní cundáhú ni yá yohó*

## 2

<sup>1</sup> Te ni sáha ya jeé cotecu ró ní cáni jiin Cristo. Chi je ni cacuu ró nájñuhun ndáyi nuü yá, ni sáha cuéchi ró jiin jñiñu néé ní casáha ró. <sup>2</sup> Chi ni cajica ró jiin jñiñu yúcuuan nde saá, ná ni cacondiquín ró jñiñu ñayuu ñayiví, ná ni cajetáhú ró nuü jexeén jeé ndácu jñiñu nuü táca táchi xeén, te jica nuü tachí. Te suu cúu jeé scánda ini ñayuu ñihni ni nuü Yaa Dios. <sup>3</sup> Te máá rí jijnáhan ri, suni súcuan ni cajica ri, chi ni casáha ri jñiñu néé jéé cuni máá rí, jiin táca jéé jicán yiquí cúñu rí, jiin jéé cájeni néé ní rí nde saá. Jeé yúcuuan suni ni cacuu ri ñayuu jeé nihin castigo xeén jeé cuáha ya nuü, chi inuú-ni ni casáha ri nájñuhun casáha máá i. <sup>4</sup> Te Yaa Dios chi yóhoyo cuéhé ni cundáhú ni yá yohó, te váha ndasí ni yá jiin yó. <sup>5</sup> Te náa cúu yó nájñuhun ndáyi nuü yá ni sáha cuéchi yó, te ni nastécu yá yohó jéé cotecu yó ní cáni jiin Cristo. Chi siquí jeé yóhoyo váha ni yá cúu jeé ní jnama ya yohó. <sup>6</sup> Te ni nastécu yá yohó jéé cotecu inuú yó jiin Cristo Jesús, te scúcõo ya yohó jiin yá nde andiví. <sup>7</sup> Súcuan ni sáha ya náváha ní gá tiempo jeé quíji, te steén yá ndese yóhoyo

manī yā jīn yó, jīn ndese vāha ni yā jīn yó jeē siquī Cristo Jesús. <sup>8</sup> Chi siquī jeē yóhō manī yā jīn ró cúu jeē ní jnama ya rohó, chi ní cacandje ró jeē sáha ya jehē rō. Te nasū siquī jeē ní casáha máá ró cúu, chi tahū jeē ní jēhe ya nuū ró cúu. <sup>9</sup> Chi tú na jniñu vāha ní casáha yó jeē jnama ya yohó, te jeē yúcuān ní ñn yó ma cúu sátéyí yó maá yó. <sup>10</sup> Chi cúu yó ñn jniñu luu jeē ní nasáha máá yá, chi ní nasáha ya yohó jeē cundúú yó jīn Cristo Jesús, návāha sáha yó táca jniñu vāha jeē jé ní sátūhva Yāā Dios jeē sáha yó.

*Jeē sáha Cristo jeē ndívi yó núu jñūhun manī Yāā Dios jīn yó*

<sup>11</sup> Núu súcuān te na núcūhun ní rō ndese ñayuu ní cacuu ró ndé saá. Chi tu ní cácuu ró ñayuu hebreo, chi sa suhva ní cacuu ró ñayuu táca nación jeē tu jíní jñūhun ya. Te ñayuu hebreo jeē casáha circuncidar yiqui cúñu, ní cacahān i jeē cácuu ró ñayuu tu sáha circuncidar. <sup>12</sup> Na núcūhun ní rō jeē ndé saá tu ní cáhīn ró jīn Cristo, te ní cacuu ró ñayuu ñuu jicá núu nación Israel. Te tu ní cájini ró táca jñūhun contrato jeē ní jéjñūhun Yāā Dios. Te tu ní ñne Yāā Dios jīn ró ñayivi yáha, te tú na vé jeē vāha ní cáñuhun ní rō jeē cóo. <sup>13</sup> Te vijna chi ní ndívicoo ró núu Yāā Dios jeē tu ní cájini ró jñūhun ya nde saá, chi ní quívicoo ró ndaha Cristo siquī jeē ní jīhī yā jehē rō. <sup>14</sup> Chi Cristo cúu Yāā sáha jeē ndúmaní jñáhan yó. Chi ní sáha ya jeē ñayuu hebreo jīn ñayuu táca gá nación, ní nduu yó ñn na nuū yá. Chi ní sáha ya jeē tuá jito uhū jñáhan yó, te suu cúu nájnūhun jeē ní jenu ya ñn jeē ndihyú sava mēñu yó jeē sásin yohó. <sup>15</sup> Chi ní socó yá maá yá ní jīhī yā, te súcuān ní ndahva yá ley jenahán jīn jñūhun ndácu jniñu jīn jéé tajnúni ndiso máá. Chi ley un ní sásin ñayuu hebreo jīn táca nación jeē tu ní jíní i ley un. Te ní nasquíjñáhan ya ndihī yó jéé ní nduu yó ñn na nación jeē, yīhī yó ndaha ya. Te súcuān ní sáha ya jeē ní ndumaní jñáhan yó. <sup>16</sup> Te jīn jéé ní jīhī yā jicá cruz, te ní snáá yá jñūhun cájito uhū jñáhan ñayuu hebreo jīn táca gá nación. Te ní sáha ya jeē ndívicoo yó núu jñūhun manī Yāā Dios jīn yó, te ní nduu yó ñn na ñayuu maá yá.

<sup>17</sup> Chi ní quiji Cristo ní nacani ya jñūhun vāha nuū táca ñayuu jeē na ndívi i nuū jñūhun manī yā jīn i, cúu rohó ñayuu tu ní cájini jñūhun ya, te suni ñayuu jñáhan ri hebreo jeē cájini jñūhun ya. <sup>18</sup> Te vijna te siquī jeē ní jīhī Cristo, te ndihī yó, cúu ñayuu hebreo chí ñayuu táca gá nación, cuu quívicoo yó núu Tatá yō Yāā Dios, te ñn-ni Espiritu yā sáha. <sup>19</sup> Núu súcuān te tuá cúu ró nájnūhun ñayuu ñuu jicá ní ñayuu tatú, chí ñn na ní nduu ró jīn ñayuu ñuu maá yá. Te jñáhan ñayuu vehe Yāā Dios cácuu ró. <sup>20</sup> Te cácuu ró nájnūhun ñn ñn parte ñn vehe cáhnu

jeē cúvāha siquī cimientu, te cimientu un cúu jñūhun Cristo jeē ní canacani táca apóstol jīn téé ní canacani jñūhun ya jenahán. Te máá Jesucristo cúu nájnūhun yuū cánuu gá jeē yítuu vehe. <sup>21</sup> Te ññ vehe cúvāha vāha siquī maá yá, cúúsúcun cuáhān, cúu ñn templo ñn jeē ndeé máá Jítoho yó. <sup>22</sup> Te suu cúu máá ró jijnáhan ró, chí ndúú ró jīn Cristo, te ñnuú-ni sáma ya rohó jīn táca ñayuu cácuandje, cácuu ró nájnūhun ñn ñn yuū templo. Te suu cúu jeē ndeé Espiritu Yāā Dios ñn ró nájnūhun ñn ñn templo.

*Jeē ndiso jniñu Pablo nácani de jñūhun nuū ñayuu tu jíní jñūhun Yāā Dios*

### 3

<sup>1</sup> Te jeē yúcuān ruhū Pablo, jicán tahū ri nuū yā. Te ñne ri vecāa siquī jeē ní nacani ri jñūhun Cristo Jesús nuū rohó ñayuu táca nación jeē tu ní jíní jñūhun ya nuū. <sup>2</sup> Te jíní ri jeē ní cájini ró jñūhun ndese yóhō vāha ní sáha Yāā Dios jīn rí, chí ní jēhe ya jniñu nuū ri jeē nácani ri jñūhun vāha ya nuū rō. <sup>3</sup> Te jñūhun ya jeē ní yisáhi, ní nastúu ya nuū rí, nájnūhun je ní tee ri jecu siquī un núu rō. <sup>4</sup> Te núu na cáhu ró te cuu jecūhun ní rō jeē ní jini vāha ri jñūhun Cristo jeē ní yisáhi un. <sup>5</sup> Te tu ní stéén yā jñūhun sáhi un núu ní ñn ñayuu táca cuiyā ní quiji ichi yátá. Te vijna cúu jeē steén ndijin yā jīn Espiritu yā nuū táca apóstol jeē ní jeni ndoo ya, jīn núu téé cánacani jñūhun ya. <sup>6</sup> Te súcuān cáhān jñūhun ní yisáhi un: Ñayuu táca gá nación, ñn cáhnu-ni nihīn i tahū i jīn ñayuu hebreo, chí ní cacandje i jñūhun jeē jnama ya i. Te ñnuú-ni ní nduu ndihī i, te ñn cáhnu-ni quéndōo ndetú anuá i sáha Cristo, nájnūhun ní jéjñūhun Yāā Dios. <sup>7</sup> Te jeē siquī jñūhun yáha cúu jeē ní jeni ya ruhū jeē nácani ri jñūhun nuū rō. Chí ní cutahū rí jniñu luu yáha jeē ní jēhe ya nuū rí. Te jīn poder yá ní sáha ya un jīn rí. <sup>8</sup> Te ruhū chí cúu ri téé núu ga nuū táca ñayuu núu ga jeē yīhī ndaha ya. Te vesú súcuān te nuū maá rí ní jēhe ya jniñu luu yáha jéé nácani ri jñūhun vāha ya nuū ñayuu táca nación jeē tu jíní, ndese yóhō cúca yó ndihī jeē ndiso jñūhun Cristo, jeé ma cánda cuiyí yó jecūhun ní yó. <sup>9</sup> Chi ní jeni ya ruhū jeé steén cáj rí jeé suni máá i jnama ya i. Te yúcuān cúu jñūhun Yāā Dios jeē ní yisáhi ndé jenahán ndasí, chí máá yá ní sáha ndihī-ni. <sup>10</sup> Te súcuān ní sáha ya jīn ñayuu, návāha vijna te táca jéé cácujeñnu jīn jéé ndiso jniñu nuū sucún, na cúni ndese ndichí ndasí Yāā Dios. Chí ndichí ndasí ní sáha ya jīn ñayuu cácuandje. <sup>11</sup> Chí súcuān ní tee ní yá nde ññ cáni, te ní sáha ya jeē Jítoho yó Cristo Jesús ní squícu ya ún. <sup>12</sup> Te siquī jeē ní sáha Cristo, te vijna te jíní ndije yó jéé cúu quívi yó cáhān yó jīn Yāā Dios siquī jeé candje yó Cristo. <sup>13</sup> Núu súcuān te cáhān

ndahú rí jín ró jeé ma cucuíhyá ní rō siquí jnūndóho jeé ndóho ri jehé rō. Chi suu sáha jeé quéndōo ndetū anuá rō jijnáhan rō.

*Cristo yóhyo cundáhú ní yā yohó*

<sup>14</sup> Te jeé yúcuan cúu jeé jécuiñí yití rí nuú maá Yaa cúu Tátá Jitoho yō Jesucristo. <sup>15</sup> Te maá yá cúu Tátá nuú ndíhi ñayuu yā jeé yúcu andiví jín ñáyiví. <sup>16</sup> Te jícán tahú rí jeé jín poder yā jeé kujéhu ndasí yá, na sáha ya jeé ije váha ní rō jín jnúhun ya, te coo fuerza ini anuá rō, sáha Espiritu yā. <sup>17</sup> Te jícán rí jeé candíje nihin rō Cristo, návāha condee yā ini anuá rō, te jni váha rō jnúhun jeé cundáhú ní yā rohó, te cuiñí nihin rō jín. <sup>18</sup> Te súcuan te cuu jecúhun váha ní rō jín táca ñayuu candíje, ndese cáa jnúhun cundáhú ní Cristo yohó. Chi yóhyo jíté, cáni, cúnú, súcun jnúhun ún, chi yóhyo cuehē sáha. <sup>19</sup> Te jícán rí jeé na cúní váha rō ndese cundáhú ní yā yohó, vesú tu cúu cuiñí jecúhun ní yō ndíhi ndíhi. Te súcuan te cundúú rō jín Yaa Dios jeé cunuú yá ini anuá rō.

<sup>20</sup> Núu súcuan te na cáhán yō jeé yóhyo luu cújéhu ya, chí maá yá cúu Yaa iyó poder jeé sáha ya jeé váha ndasí gá vesú ndíhi jeé jícán yō chí jéé jéni ní yō. Te sáha ya un jín poder yā jeé sájniñu ini anuá yō. <sup>21</sup> Te na cáhán yō jeé yóhyo luu cújéhu ya jeé siquí jeé ní sáha ya jehé ñayuu cácandíje jín jéé siquí Cristo Jesús. Te súcuan na coo nde ní cáni cuiñí tiempo jeé quíji. Amén.

*Inuú-ni cácuu ñayuu cácandíje sáha Espiritu*

**4**

<sup>1</sup> Te ruhú jeé íne rí vecāa siquí jnúhun maá Jitoho yō, cáhán ndahú rí jín rō jeé na cáca ndaa rō nájñuhun cánuú caca rō jéé cácuu rō ñayuu ni cana ya. <sup>2</sup> Te níni na coo suchí ní rō, te coo vitá ní rō. Te na coo paciencia rō, te cuandeyí ní rō jín jnáhan rō jéé cundáhú ní rō í. <sup>3</sup> Te na cóndihví ní rō coyūcu maní inuú rō, sáha maá Espiritu nuú véji jnúhun maní ní. <sup>4</sup> Chi ñn-ni cácuu ñayuu maá yá, te iyó ñn-ni Espiritu, te inuú cáñuhun ní yō jeé coo jeé váha siquí jeé ní cana ya yohó. <sup>5</sup> Te iyó ñn-ni Jitoho yō, jín ñn-ni jnúhun cándíje yō, jín ñn-ni jnúhun jéndute yō. <sup>6</sup> Te iyó ñn-ni Yaa Dios jeé cúu Tátá yō jijnáhan yō. Te maá yá kujéhu siquí ndíhi yō, te sájniñu ya jín ndíhi yō, te ndéé yá ini ndíhi yō.

<sup>7</sup> Te táca ñn ñn yó ní cacutahú yō sñn sñn jniñu sáha yó, núu ndese ní tana Cristo cúhva tahú un núu yō. <sup>8</sup> Jeé yúcuan cáhán tutu íi: Ná ni ndaa ya cuanuhun yā andiví, te ní stutú yá cuehē jeé yándihyū, cuahān yā jín.

Te ní saja ya tahú nuú táca ñayuu.

<sup>9</sup> Te jeé cahán tutu jeé ní ndaa ya, suni cúní cahān jeé xihna gā nde andiví ní cuun ya nde nuú cunú gá ñayiví yáha. <sup>10</sup> Te Yaa ní cuun, suni maá yá cúu jeé ní ndaa nde nuú

súcun gá andiví, návāha cuhun chitú yá ní cáhnu-ni. <sup>11</sup> Te ní tana ya sñn sñn jniñu sáha ñayuu. Chi ní jeni ya sava ñayuu cuu apóstol, te sava ga nacani jnúhun ya, te sava ga scándíje ñayuu jnúhun jeé jnáma ya í, te sava ga coo pastor condito ñayuu cácandíje, te sava ga steén. <sup>12</sup> Súcuan ní jeni ya ñayuu maá yá jeé cuajniñu í nuú yā, návāha cuehnu ga ñayuu Cristo jín jnúhun ya. <sup>13</sup> Te súcuan coo nde nduu inuú-ni ndíhi yó jín jnúhun cándíje yó, te cuni váha yó ndese Yaa cúu Sēhe Yaa Dios. Te súcuan ije váha yó ndé na cúchitú yó jín ndíhi jnúhun jeé ñuhun chitú ini Cristo. <sup>14</sup> Te súcuan te ma coo ga yō nájñuhun sūchi lúli jéé yachí jéni yāha jéni yūcuán ní í, ní ma quívi nduu yō cháha chúcuan jín sñn sñn jnúhun jeé cástéén tēe stáhú jéé yóhyo ndito de squívi de yóhó nuú jnúhun stáhú. <sup>15</sup> Chi sa suhva na cóndiquín yō jnúhun ndaa jín jnúhun cundáhú ní. Te súcuan cuehnu yó jín táca jniñu cúní Cristo, Yaa kujéhu nuú ñayuu cácuu nájñuhun yiquí cúñu yā, chí ñn na cúu í jín yá. <sup>16</sup> Te sáha ya jeé nduu inuú ní táca í jeé cáhije í cuahān í, chí cácuu í nájñuhun ñn na yiquí cúñu jín yá. Te jéniñu váha táca ñn ñn í ndese ní nihin jniñu í, návāha scuéhu jnáhan te ije jijnáhan jín jnúhun cundáhú ní.

*Jeé ndújeé yó sáha Cristo*

<sup>17</sup> Núu súcuan te yāha cúu jnúhun cáhán rí jín rō, te jeé achí Jitoho yó cúu jeé cáhán nihin rí jín rō: jeé ma cáca ga rō nájñuhun cájica sava ga ñayuu jeé tu jini í ndese Yaa cúu Yaa Dios, chí cájica í jín jnúhun jeé jéni sáa-ni maá í. <sup>18</sup> Te iyó nee nuú jeé nájñuñí í, te tu névāha í Espiritu jeé véji nuú Yaa Dios, chí tu jini í jnúhun ya, siquí jeé nihni ní í. <sup>19</sup> Te tuá cúcanu í, chí ní quívicoo í jín jniñu néé ndasí, te ndíhví ní í sáha í táca jniñu jnéhén. <sup>20</sup> Te róhó jijnáhan rō, nasūu súcuan ní cáscuáha rō jnúhun Cristo, <sup>21</sup> te núu ndaa jeé ní cajini rō jnúhun ya jín jéé ní cacutúhva rō jín jnúhun ndaa Jesús. <sup>22</sup> Núu súcuan te na stóo rō táca jniñu ní casáha rō ichi yátá, ná ní casáha rō modo cuni maá rō jeé ní cujnéhén ánuá rō ní sáha jniñu néé stáhú jéé ní ndiyo ní rō. <sup>23</sup> Te na ndújeé ánuá rō jín jéé nájñuñí rō. <sup>24</sup> Te na cuáha rō jnúhun ndujeé rō, chí nasáha Yaa Dios rohó nájñuhun cúní maá yá jeé cáca ndaa rō jín jniñu váha jniñu ndoo.

<sup>25</sup> Núu súcuan te na cahān gā rō jnúhun stáhú, te na cáhán ndaa rō jín táca jnáhan rō, chí ñn-ni cácuu ndíhi yó.

<sup>26</sup> Núu véji ñn jeé squití ní rohó, te ma quití néé ní rō. Te ma quití ní rō nde quée niāndii. <sup>27</sup> Ma cuáha rō jnúhun jeé sáha jexeén jeé quívi rō cuéchi.

<sup>28</sup> Ñayuu ní sacuíhná, ma sacuíhná gá í, chí sa suhva na sájniñu í, te na cócuu í jín jniñu váha, návāha nihin í jeé cuáha í nuú ñayuu cúmaní nuú.

<sup>29</sup> Ni ñn jñuhun neé ma cahán rō, chi sa suhva na cahán rō jñuhun vāha jeé scuéhu jñáhan jíin jñuhun ya, te sáha jeé quéndō vāha ñayuu jíni sōho. <sup>30</sup> Ma sáha ró cuéchi návāha ma cucuíhá ni Espíritu Santo Yaa Dios. Chi Espíritu yá cúu nájñuhun sello jeé steén jeé cúu yó séhe Yaa Dios, nde quiji quiví jñu jñiñu jeé jñáma ya rohó.

<sup>31</sup> Te na siaá rō táca jñuhun cútuca ni, jíin jñuhun xeén ni, jíin jñuhun quítí ni, jíin jñuhun cahán ndevāha, jíin táca jñuhun neé. <sup>32</sup> Chi sa suhva na cóo vāha ni rō jíin jñáhan ró, te cundáhú ni rō i. Na cóne cáhu ni rō nuú jñáhan ró, nájñuhun ni ine cáhu ni Yaa Dios nuú rō síquí Cristo.

*Ndese cánuú caca ndaā séhe Yaa Dios*

## 5

<sup>1</sup> Núu súcuan te na ndácu ró Yaa Dios, chí cácuu ró séhe ya jeé maní yá jíin. <sup>2</sup> Te níni cundáhú ni rō jñáhan ró, nájñuhun ni cundáhú ni Cristo yohó, te ni socó yá maá yá jehē yō, ni cuu ya nájñuhun ñn londe jeé jeén asñ nuú Yaa Dios jeé ni socó yá maá yá.

<sup>3</sup> Te vijna jeé cácuu ró séhe Yaa Dios, te ni ma sáha ró ni ma ndájñuhun ró síquí jñuhun jíca jnéni, ni táca jñiñu jnéhen, ni jñuhun ndiyo ni ndajñiñu. <sup>4</sup> Te ni ma cahán rō táca jñuhun sáha jeé cúcanu jñáhan, ni jñuhun cánéé íi, ni jñuhun jeé tu ndé jéjñiñu cuítí. Chí táca un tu níhín jñiñu. Chí sa suhva na nácuatáhú ró nuú Yaa Dios. <sup>5</sup> Chí je cájini ró jeé ní ñn ñayuu cájica jnéni, ni jeé sáha jñiñu jnéhen, ni jeé ndiyo ni táca ndajñiñu, ma níhín tahú i quívi i ndaha Cristo jíin Yaa Dios jeé ndacu ya jñiñu nuú i. Chí táca jeé ndiyo ni i cúu nájñuhun idolo i jeé cáchiñúhún i. <sup>6</sup> Te coto ró jeé ma stahú ni ñn i rōhó jíin táca jñuhun cahán saá ni i, chí síquí táca jñuhun neé yáha cúu jeé quíji castigo xeén Yaa Dios nuú táca ñayuu níhni ni. <sup>7</sup> Ma quívi nduu ró jíin i núu súcuan.

<sup>8</sup> Chí táca quívi saá ni coyúcu ró nájñuhun nuú neé, te vijna chí cáyúcu ró jíin luz maá Jítoho yō, cúu jeé cájécúhún ni rō síquí yá. Te na cáca ró nájñuhun cájica ñayuu jeé steén luz yá ini anuá i. <sup>9</sup> Chí jñiñu sáha luz yá jíin yó cúu táca jñiñu maní ni, jñiñu ndaā, jíin jñiñu vāha. <sup>10</sup> Scuáha ró sáha ró táca jñiñu jeé nájñahan ni maá Jítoho yō. <sup>11</sup> Te ma quívi nduu ró jíin táca jeé tu níhín jñiñu jeé casáha ñayuu cáyúcu nájñuhun nuú neé. Chí sa suhva steén ró nuú i jeé tú vāha casáha i. <sup>12</sup> Chí cúcanu yō cahán yō síquí jñiñu casáha yuhu maá i. <sup>13</sup> Te luz yá sáha jeé nátū táca jñiñu neé casáha i. Te núu cuatáhú i luz yá te caca i jíin luz ún. <sup>14</sup> Jeé yúcuca cahán tutu:

Róhó jeé cúhuun ni, jeé nájñuhun quíxi, natakū ni, te quenda ró méhñu ñayuu jeé cácuu nájñuhun ndíyi. Te Cristo steén yá luz yá ini anuá rō.

Achí tutu.

<sup>15</sup> Núu súcuan te coto vāha ró ndese caca yúcuu ró. Te ma cáca ró nájñuhun cájica ñayuu canéé, chí caca ró nájñuhun cájica tēe ndíchi. <sup>16</sup> Ma snáā rō tiempo, chí condíhví ni rō jíin jñiñu ya, chí iyó cuéhé cuéchi quívi yáha. <sup>17</sup> Núu súcuan te ma cóo neé xíní rō, chí sa suhva na jécúhún vāha ni rō na jñiñu nájñahan ni maá Jítoho yō. <sup>18</sup> Te ma nájñi ró, chí tēvi ró sáha. Chí sa suhva na ndúcu ró jeé cúnuú Espíritu Santo ini anuá rō. <sup>19</sup> Te cahán rō jíin jñáhan ró jíin salmo jíin himno, yaa íi jeé cahán jñuhun ya. Te ini anuá ró cahán rō jíin yá jíin táca yaa, chí yúcuca cúu jeé jíta ánuá ró nuú yá chíñúhún ró yá. <sup>20</sup> Te níni nacuatáhú ró síquí táca-ni nuú Tatá yō Yaa Dios te ndacunehen ró síhví maá Jítoho yō Jesucristo.

*Ndese síquícu vāha ñayuu cácuandíje nuú jñáhan i*

<sup>21</sup> Te cuatáhú ró nuú jñáhan ró síquí jeé cáhíyo yíñúhún ró nuú Cristo.

<sup>22</sup> Róhó ñahan cácuu ñasihí, cuatáhú ró nuú yíi ró, nájñuhun jétáhú ró nuú Jítoho yō. <sup>23</sup> Chí yíi cújéhu nuú ñasihí, nájñuhun cújéhu Cristo nuú yohó ñayuu cácuandíje, jeé cácuu yó nájñuhun yíqui cúñu yá, chí ñn na cúu yó jíin yá. Te maá yá jñáma ya yohó. <sup>24</sup> Chí nájñuhun ñayuu cácuandíje cájetáhú i nuú Cristo, suni súcuan ñasihí cuatáhú ña ndíhi jeé cahán yíi ña.

<sup>25</sup> Te róhó tēe cácuu yíi, cundáhú ni rō ñasihí ró, nájñuhun ni cundáhú ni Cristo yohó ñayuu cácuandíje, te ni socó yá maá yá jehē yō. <sup>26</sup> Súcuan ni sáha ya jeé cóo ndoo coo íi yō nuú yá, te ni nacate ya anuá yō jíin jñuhun ya jíin jéé ní jendute yō. <sup>27</sup> Te yohó ñayuu cácuandíje chí cuíñi yó núu yá, te luu cujéhu yō. Te ma cóndee cuéchi ánuá yō, ni jeé tú luu, ni ñn jeé súcuan, chí sa suhva coo ndoo coo íi yō nuú yá, te tú na vé cumaní gā. <sup>28</sup> Te nájñuhun Cristo ni cundáhú ni yá ñayuu cácuandíje, suni súcuan cánuú jéé cundáhú ni yíi ñasihí de, nájñuhun cundáhú ni de maá de. Chí tēe cundáhú ni de ñasihí de, maá de cundáhú ni de. <sup>29</sup> Chí ni ñn tēe tu jíto uhú de maá de, chí sa suhva yéji de te ndíto yúcuu de maá de. Te suni súcuan sáha Cristo jíin yohó ñayuu cácuandíje nuú yá. <sup>30</sup> Chí cácuu yó nájñuhun yíqui cúñu yá, te ñn ñn yó cácuu nájñuhun ñn ñn parte yíqui cúñu yá. <sup>31</sup> Te suu cúu nájñuhun tēe jeé stóo de tátá de náná de, te quíjñahan de jíin ñasihí de, te ñn na cúu ndíndúu de. <sup>32</sup> Yóhoyo jéhu jñuhun sáhi yáha, te cáhan íi jeé ñayuu cácuandíje suni súcuan quíjñahan i jíin Cristo. <sup>33</sup> Te suni súcuan ná ñn ná ñn ró cundáhú ni rō ñasihí ró, nájñuhun cundáhú ni rō maá ró. Te ñasihí na cúu yíñúhún ña jíin yíi ña.

## 6

<sup>1</sup> Te róhó séhe jijnáhan ró, cuandije ró núu tatá ró nuu naná ró, chi yucuan cúu jeé váha sáha ró jéé candije ró Jítoho yó. <sup>2</sup> Chi yáha cúu in jnánhan jeé uxí jnúhun ndácu jniñu jeé ni jehe ya, te xihna gá jnúhun yáha ndiso tahü: Coo yññuhún ró nuu tatá ró nuu naná ró, <sup>3</sup> náváha quendóo ndetü ró, te náhán cotecu ró ini ñayivi yáha. Achí.

<sup>4</sup> Te róhó tátá jijnáhan ró, ma squití ni ró séhe ró, chi sa suhva scuéhnu ró i jín jnúhun cuandije i, te stéén ró nuu i jeé candije i máá Jítoho yó.

<sup>5</sup> Te róhó mozo jijnáhan ró, cuandije ró núu patrón ró ñayivi yáha, te coo yññuhún ró te conso iyo ró núu de. Te na sájniñu ndaá sájniñu ndije ró, caní ni ró jeé nuu Cristo cájejniñu ró. <sup>6</sup> Ma sájniñu ndúxí ró jeé máá jeé coto de te cuajnúhún de róhó. Chi sa suhva sáha ró cuenta jeé mozo Cristo cácuu ró. Te sáha ró jéé nújnahan ni Yaá Dios nde jín ini jín ánuá ró. <sup>7</sup> Te na cúsi ni ró sájniñu ró, te na cáni ni ró jeé nuu máá Jítoho yó cájejniñu ró, nasüu núu ñayuu. <sup>8</sup> Chi je cájini ró jeé jniñu váha sáha in in ró, te nihin ró yáhu jniñu yucuan núu máá Jítoho yó, vesú cúu ró mozo chí téé sájniñu máá.

<sup>9</sup> Te róhó patrón jijnáhan ró, suni súcuan sáha ró jín mozo ró, te ma cahán xeén ró jín i. Chi na cócuhun ni ró jeé suni máá ró jín máá i yñi ró ndaha Jítoho yó, Yaá ndeé andiví. Te tu sáha ya cuenta ndese cúu in in ñayuu, chi inuu sáha ya jín i.

*Na cúcutú yó jín táca fuerza Yaá Dios*

<sup>10</sup> Te iyó inga jnúhun, hermano jijnáhan ró. Nducú ró jeé na cóo fuerza ini ró jín fuerza máá Jítoho yó jeé nduú yá jín ró, chí iyó téyí poder yá. <sup>11</sup> Na cúcutú ró jín táca fuerza Yaá Dios, náváha cuu cuiñi nihin ró jéé ma stahú jexeén róhó. <sup>12</sup> Chi nájnúhun jeé cájejnáhan yó jín táca jéé neé. Te nasüu ñayuu cúu jeé cájejnáhan yó jín, chí sa suhva jín táca táchí cájica nuu sucún. Te yucuan cúu jeé cácujeñu, jín jéé cándiso jniñu, jín jéé cándacu jniñu nuu ñayuu ñayivi yáha jeé nájnúhun cájica i nuu neé. <sup>13</sup> Núu súcuan te na cúcutú ró jín ndihi fuerza Yaá Dios, náváha cuu cuiñi nihin ró quíví jito ndee jexeén rohó. Te súcuan coo túhva ró jín táca ndihi jeé cuiñi nihin ró jín. <sup>14</sup> Núu súcuan te cuiñi nihin ró jín jnúhun ndaá jeé cúu nájnúhun jeé yñi nihin sanchí chijí ró. Te sácútu ró máá ró jín jnúhun caca ndaá ró, te suu cúu nájnúhun jeé cúcutú soldado jín sahma cáca jeé ndihyú de. <sup>15</sup> Te níni cotúhva ró nacani ró jnúhun ndeyí jnúhun sñ ni jeé véji nuu Yaá Dios. Te suu cúu nájnúhun jeé chíhi soldado ndijēn jehē de. <sup>16</sup> Te jeé cánuú gá cúu jeé candije ró jeé iyó yá jín ró. Te yucuan cúu nájnúhun jeé túhva ró máá ró yatá in escudo. Chí jín jnúhun cándije ró un

te cuu ndahva ró ndihi jeé tají máá jexeén, jeé cúu nájnúhun nduva jeé cayú yáñuhún punta. <sup>17</sup> Te cuiñi ró jín jnúhun ni jnama ya rohó, jeé cúu nájnúhun in lélú cáca. Te cuajniñu ró jnúhun jeé yosó núu tútu Yaá Dios jeé ni jéhe Espiritu Santo nuu ró. Chi yucuan cúu nájnúhun jéjniñu soldado espada de. <sup>18</sup> Te níni cácan tahú ró nuu Yaá Dios siquí ndihi-ni, te cahán ndahú ró jín yá jín fuerza Espiritu. Núu súcuan te ndito na cóo ni ró, te ma jécuiñi ró jeé cacán tahú ró jehē táca ñayuu máá yá. <sup>19</sup> Te suni cahán ró jehē rí, náváha nihin rí jnúhun cahán rí, te coo téyí ni rí nacani cájii rí jnúhun jeé jnama ya yohó, suu jnúhun jeé ní yisáhí un. <sup>20</sup> Chi ni tají yá ruhú jeé jica rí nacani rí jnúhun ya ún, te jeé siquí un cúu jeé ine rí vecaá. Te na cácan tahú ró jeé coo téyí ni rí cahán rí jnúhun ya, nájnúhun cánuú cahán rí.

*Saludo jeé sándihí*

<sup>21</sup> Tíquico cúu in hermano jeé maní yó jín, te cúu de tēe squicu váha chindéé ñajnáhan jín rí nuu jniñu máá Jítoho yó. Te máá de castúhún ndihi ndese cuahán jniñu rí te ndese iyó rí. <sup>22</sup> Jeé yucuan ní tají rí de cuajeé de nuu ró, náváha cachi de ndese cáhiyo rí, te coo ndeyí ni ró jijnáhan ró sáha de.

<sup>23</sup> Te ñúhun ni rí jeé Tatá yó Yaá Dios jín Jítoho yó Jesucristo, na sáha ya jeé coo ndeyí coo sñ ni táca róhó jéé cácuu hermano, te coo maní gá ró jín yá, te candije váha ró. <sup>24</sup> Te ñúhun ni rí jeé na sáha ga yá jeé váha róhó jijnáhan ró jéé maní ndije ró jín Jítoho yó Jesucristo. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU NUU FILIPOS

<sup>1</sup> Máá rí cúu Pablo jiín Timoteo, mozo Jesucristo. Te cátee ri carta yáha cuájeē nuū tāca róhó hermano cáyucú ñuu Filipos, jeē cácuu ró ñayuu maá yá jeē cáyihí ró ndaha Cristo Jesús. Te suni cátee ri nuū tée cándiso jniñu cándito róhó, jiín nuū tée cájejniñu mēñhu ró. <sup>2</sup> Te cáñuhun ni rí jeē Tatá yō Yaā Dios jiín Jítoho yō Jesucristo, na sáha ga yā jeē váha róhó, te sáha ya jeē coo ndeyí coo sñ ni ró.

*Jeē jicán tahú Pablo jeē ñayuu cácandíje*

<sup>3</sup> Tāca jínu jeē núcūhun ni rí rohó jijnáhan ró, te nácuatáhú rí nuū Yaā Dios. <sup>4</sup> Te náa jicán tahú rí, te níni cúsiñ ni rí jicán tahú rí jeē ró. <sup>5</sup> Chi ni chindéé ñájnáhan ró jiín rí jeē scáca yó jnúhun váha ya, nde quiví ní cacandíje ró te nde vijna. <sup>6</sup> Te jini ndije ri jeē maá Yaā ní squéjéé jniñu váha jiín ró, cocu ya jiín ndé quiví ndiji Jesucristo, te sinu ndihi ya. <sup>7</sup> Te íyó váha jeē súcuan jéni ni rí siquí tāca róhó, chí yohyo maní rí jiín ró, te inuú-ni ni sáha ya jeē váha yóhó. Te súcuan cúu vésú íne rí vecāa chí vésú cuiñi rí nuū tāca tée cújéñu, cahān rí jeē jnúhun jeē jnáma ya yohó jéé jnúhun ndaā cúu. <sup>8</sup> Chi Yaā Dios jini yā ndese yóhyo maní rí jiín ró jijnáhan ró, nájnūhun yóhyo maní Jesucristo jiín yó. <sup>9</sup> Te jicán tahú rí jeē na cáa ga jeē cundáhú ni ró jnáhan ró, jiín jéé na jécūhun ga ni ró te cundichí ró jiín táca jnúhun ya. <sup>10</sup> Te súcuan te cuu nacáji ró táca jéé váha condiquin ró, te caca ndaā ró, te ma cóo ni ñin cuēchi siquí ró quiví ndiji Cristo. <sup>11</sup> Te súcuan te cayā cuehē jniñu váha jeē sáha Jesucristo jiín ró. Te sáha jeē coo yññuhún ñayuu jiín Yaā Dios te cahān i jeē yóhyo luu cújéñu ya.

*Jnúhun jeē técu nduú yó jiín Cristo*

<sup>12</sup> Hermano, cúní rí jeē na cúcāñu ni ró jijnáhan ró ndese ni sáha jññódóho ni ndoho rí. Chi ni sáha jeē ní jite núu ga jnúhun jeē jnáma ya yohó. <sup>13</sup> Chi táca soldado cáyucú ini palacio, jiín táca gá ñayuu, cájini i jeē íne ri vecāa jeē siquí Cristo. <sup>14</sup> Te siquí jeē íne ri vecāa, jeē yúcuu cúu jeē vihyá gā ñiñu ndeyí ni cuehē táca hermano cácandíje nuū Jítoho yō. Te cáhiyo téyí gá ni de nácani de jnúhun ya, te tu ndé ndíñu ni de.

<sup>15</sup> Te ndaā chí sava tée cácanani de jnúhun Cristo siquí jeē cuesún ni de jiín jéé nduxí de. Te sava ga de chí sa suhva cácanani de jnúhun ya siquí jeē váha ni de. <sup>16</sup> Sava de cácanani jnúhun Cristo siquí jeē nducú de jeē váha máa-ni de, te tú ndije de, chí cácani de jeē niñin gā rí jññódóho jeē íne ri vecāa. <sup>17</sup> Te sava ga de chí cácanani de jnúhun siquí jeē cundáhú ni de ruhū, chí cájini de jeē íne

ri vecāa siquí jeē cahān rí jeē jnúhun jeē jnáma ya yohó. <sup>18</sup> Tú na vé sáha núu súcuan, chí táca-ni modo cascuíté núu de jnúhun Cristo, vésú núu ndije de chí tuú. Te yáha cúu jeē cúsiñ ni rí sáha.

Te suni cusñ gā ni rí, <sup>19</sup> chí jini rí jeē táca jéé yáha sáha jeē váha ga coo jiín rí, chí cájicān tahú ró jeē rí, te Espiritu Jesucristo chindéé ñáñan yá ruhū. <sup>20</sup> Chi ñúhun ni rí te cúu ndasí ni rí jeē ma sáha rí ni ñin jeē sáha jeē cucanu ri nuū yā. Chí sa suhva coo téyí ni rí cahān rí jnúhun ya, náváha ndujéñu ga Cristo sáha máa rí vijna, nájnūhun je ni sáha rí ní véji rí, te vésú na cótecu rí chí vésú na cúu rí. <sup>21</sup> Chi jeē técu rí cúu jeē nduú rí jiín Cristo, te jeē cúu rí cúu jeē vihyá gā váha coo jiín rí. <sup>22</sup> Te núu cotecu gā rí, te cuu scáca ga rí jniñu máá Jítoho yō. Núu súcuan te tu cúcāñu ni rí ndé ñin cúu jeē váha ga, núu jeē cótecu rí chí jéé cúu rí. <sup>23</sup> Chi mēñhú ndindúú jnúhun yáha íne niñin rí. Chí ñin cúu jeē cuní rí quihñin rí condee rí jiín Cristo, chí yúcuu cúu jeē vihyá gā váha coo jiín rí. <sup>24</sup> Te suni cánuu gá jeē cótecu gā rí jeē siquí rohó jijnáhan ró. <sup>25</sup> Núu súcuan te íyó ndáa ni rí jeē quéndoo rí condee gā rí jiín ró, náváha stéén gā rí nuū ró ndese caca váha ga ró jiín yá, te cusñ gā ni ró jiín jnúhun cácandíje ró. <sup>26</sup> Núu súcuan te condee tucu ri jiín ró, te cusñ teyí ni ró jeē siquí ruhū, sáha máa Cristo Jesús.

<sup>27</sup> Te máá ñin-ni jeē condihví ni ró caca ndaā ró, nájnūhun cánuu caca ró siquí jeē cácandíje ró jnúhun Cristo. Yúcuu na te vésú na jínú rí coto jnáhan yó, chí condee jicá rí, te niñin rí jnúhun ro jéé cáñin niñin ró jiín jnúhun ya, te cáhiyo inuú ni ró, te inuú-ni cánducú ndeyí ró siquí jnúhun jeē cácandíje yó jéé jnáma ya yohó. <sup>28</sup> Te ma yuhú cuiti ró sáha jeē cájito uhú rohó. Chí jeē jito uhú i róhó, yúcuu stéén jeē jñahnúndetú i, te suni stéén jeē cáca ánuá máa ró jijnáhan ró sáha Yaā Dios. <sup>29</sup> Chi ni jeē Cristo uú jeē váha nuū ró: nasūu máa ñin-ni jeē candíje ró yá, chí suni jeē na ndóho ró jéé siquí yā. <sup>30</sup> Chí máa rí jiín róhó jijnáhan ró, nájnūhun jeē cájejnáhan yó jiín táca jéé neé. Chí ni cajito ró jéé súcuan ni sáha máa rí, te cáñihñin ró jnúhun jeē sáha ga rí nde vijna.

*Jeē ni sáha suchí yá maá yá te ni ndujéñu ya*

## 2

<sup>1</sup> Núu súcuan te sáha Cristo jeē cáhiyo ndeyí ni ró, jiín jéé cúsiñ ni ró siquí jeē váha ni yā jiín ró. Te ndéé Espiritu yā jiín ró, te maní ró jiín jnáhan ró, te cájito ndáhú ró i. <sup>2</sup> Núu súcuan te na cócu ga ró jiín táca jnúhun yáha, náváha cusñ teyí ni rí. Te inuú-ni na cóo ni ró, te coyūcu maní ró, te inuú na cóo ánuá ró, te inuú caní ni ró. <sup>3</sup> Te ni ñin jniñu ma sáha ró jéé nducú ró jeē váha máa-ni ró, ni



jeē satéyí ró maá ró. Chi sa suhva sáha suchí ró maá ró, te sáha ró cuenta jeē váha ga jnánhan ró vēsú maá ró. <sup>4</sup> Te ma cóndihví ni ró maá-ni jniñu jeē quéndōo váha máá-ni ró, chi suni na cóndihví ni ró jniñu jeē quéndōo váha jnánhan ró.

<sup>5</sup> Te na cáni ni ró jijnánhan ró nájñuhun ni jeni ni Cristo Jesús. <sup>6</sup> Chi máá yá cujéhu inuú yá jíin Yaā Dios, te vēsú súcuan te tu ní jeni ni yā jeē cujéhu inuú yá jíin Yaā Dios. <sup>7</sup> Chi ni siaá yā jeē cujéhu ya, te ni nduu ya nájñuhun índāa mozo, te ni cacu ya ni nduu ya tēe. <sup>8</sup> Te ná ni nduu inuú yá jíin tēe, te ni sáha suchí yá maá yá. Te ní jendije ya nde jíin jñuhun jeē cū yā, te nde jíin jñuhun canu jeē cū yā jíicā cruz. <sup>9</sup> Jeē yúcuán ní sáha Yaā Dios jeē yóhō ni ndujéhu luu ya, te síhví yá cujéhu ndasí gá nuú táca gá síhví. <sup>10</sup> Te táca jéē cáhīin andiví jíin ñáyiví jíin chíjī ñáyiví, núu na cūni i síhví Jesús te jecuiñí yití i. <sup>11</sup> Te cahān ndaā ndivii i jeē Jesucristo cūu máá Jítoho. Te súcuan stéén i jeē yóhō cujéhu máá Tátá yā Yaā Dios.

*Ñayuu cá candije cūu i nájñuhun quāmi jeē ndíndēe*

<sup>12</sup> Núu súcuan hermano jijnánhan ró, nájñuhun níni ní cajendije ró jñuhun ni cahān rí ná ni condee rí jíin ró, suni súcuan víhyá gā cuandije ró vijna jeē ndeé jíicá rí jíin ró. Te condihví ni ró jeē caca ndaā ró jíin jñuhun ní jnama ya rohó, te caca yíñuhún ró conso iyo ró núu yā. <sup>13</sup> Chi Yaā Dios jícu ya jíin ró jeē cūu ni ró sáha ró jniñu váha, te chindéé ñáhán yá rohó jéē squicu ró jniñu nájñahan ni yā.

<sup>14</sup> Ndihí jeē sáha ró, ma cahán sōo ró, ni ma tejnánhan ró, <sup>15</sup> návāha cuu ró séhe Yaā Dios jeē tú na cuéchi coo siquí ró te coo ndaā ró. Te caca ndoo ró méhñu ñayuu níni ni jeē casáha néé. Chi méhñu ñayuu un stéén ró jniñu váha ró, te súcuan cácuu ró nájñuhun quāmi jeē ndíndēe núu néé ñáyiví. <sup>16</sup> Te stéén ró jñuhun ya nuú i jeē cótecu i ní cáni sáha. Te súcuan te cusí teyí ni rí quiví ndíjī Cristo, chi cuni rí jeē tu ní jíca cáhá rí, ni tu ní sájñiñu cáhá rí. <sup>17</sup> Te vēsú na cūu rí jeē socó rí maá rí nuú yā jeē siquí rohó, te yúcuán cūu jeē nducú rí scandije ga rí rohó, návāha socó ró maá ró sáha ró jniñu váha jeē cá candije ró yá. Jeē yúcuán cusí ni rí, te cūni rí jeē suni cusí ni ró jíin rí jijnánhan ró. <sup>18</sup> Núu súcuan te na cusí ni maá ró jíin rí, te inuú na cusí ni yó jijnánhan yó.

*Jñuhun Títoho jíin Epafrodito*

<sup>19</sup> Te ñuhun ni rí jeē cuáha máá Jítoho yó Jesús jñuhun jeē tají yáchí rí Títoho jeē de nuú ró, návāha ndusí ni rí níu na níhín rí jñuhun ndese cáhīyo ró. <sup>20</sup> Chi tuá na inga tēe iyó yáha jéē inuú jeni ni jíin rí, nájñuhun máá de jeē ndihví ndije ni de jehē ró. <sup>21</sup> Chi táca de cánducú de jeē cūu máá de, te nasūu

jéē cuní Cristo Jesús. <sup>22</sup> Te je cájini ró jeē tēe váha cūu Títoho. Chi nájñuhun séhe jíin tátá, súcuan ni jejniñu de jeē nácani de jñuhun váha ya jíin rí. <sup>23</sup> Núu súcuan te ñuhun ni rí tají rí de jeē de nuú ró, te núu je ni cucáhu ni rí ndese coo jíin rí. <sup>24</sup> Te jeni ndije ni rí jeē cuáha Jítoho yó jñuhun jeē suni máá rí jíin yáchí rí nuú ró jijnánhan ró.

<sup>25</sup> Te suni jeni ni rí jeē cánuú tají rí hermano yó Epafrodito jeē de, chi tēe sájñiñu jíin rí siquí jñuhun ya cūu de te chindéé ñájñahan de jíin rí. Chi máá ró ni catají ró de jeē cuajniñu de nuú rí táca jéē cūmaní nuú rí. <sup>26</sup> Chi yóhō cūu ni de ndacoto tucu de nuú ró jijnánhan ró. Te ni cucuíhyá ndasí ni de, chi ni canihín ró jñuhun jeē ní cocuhū de. <sup>27</sup> Chi jendaá ní cocuhū de, te je yajni cuu de núu. Te Yaā Dios ni cunduhú ni yā de, te nasūu máñuhún-ni de, chi suni ruhū, návāha tú caa ga cucuíhyá ni rí jehē de núu. <sup>28</sup> Jeē yúcuán cūu jeē ndihví gá ni rí tají rí de nuú ró, návāha ndusí ni ró jeē ndacoto tucu ró núu de. Te suni ruhū ma cucuíhyá ndasí gá ni rí. <sup>29</sup> Núu súcuan te na cusí ni ró jeē nájñu de nuú ró, chi cūu de hermano yó jeē candije de maá Jítoho yó. Te coo yíñuhún ró jíin táca tēe índāa nájñuhun cáa de. <sup>30</sup> Chi jeē siquí jniñu Cristo cūu jeē jé yajni cuu de núu. Chi ni chundeyí ni de jeē cūu de siquí jeē chindéé ñáhán de ruhū jíin jniñu jeē tu ní íyo modo sáha máá ró jijnánhan ró.

*Jñuhun jeē cáca ndaā váha yó*

### 3

<sup>1</sup> Te vijna, hermano jijnánhan ró, na cusí ni ró jíin máá Jítoho yó. Ruhū chi tu jnánini ni rí jeē tēe tucu rí jñuhun yáha núu ró, chi cuajniñu jeē quéndōo váha ga ró. <sup>2</sup> Condito ró máá ró nuú tēe casáha jniñu néé, jeē cándāa ná cándāa ina. Chi cánducú de stújī de rohó jéē casáha de circuncidar; te tu casáha de jniñu ndaā. <sup>3</sup> Te máá yó cácuu ñayuu ni cuu circuncidar ndije, chi cáchíñuhún yó nuú Yaā Dios nde jíin ini jíin ánuá yó, te cácusí ni yó jeē yihí yó ndaha Cristo Jesús, te tu tēnuú yó jeē quéndōo ndaā yó jíin jniñu jeē sáha máá-ni yó. <sup>4</sup> Núu jeē súcuan cūu te ruhū chi suni cuu tēnuú rí jniñu jeē sáha máá-ni rí nuú. Chi núu ndé tēe jeni ni de jeē cuu tēnuú de máá de, te ruhū chi víhyá gā cuu tēnuú rí maá rí. <sup>5</sup> Chi ni casáha circuncidar ruhū nuú uná quiví ná ni cacu rí. Te yucún Israel cūu rí, te suni jnánhan yucún Benjamín, te ñin hebreo séhe hebreo cūu rí. Te suni ni cuu rí tēe grupo fariseo jeē ni squicu rí táca ley jnánhan ñuu rí hebreo. <sup>6</sup> Te ní jito xeén rí ñayuu cá candije, chi yóhō ni condihví ni rí jeē ma sáma i modo ley jenahán. Te ni ñin tu ní cūu cahān jeē tu squicu rí ley un, chi ni squicu váha rí. <sup>7</sup> Te táca jéē ní tēnuú rí ún, chi sáha rí cuenta jeē tu ndé níhín jñifu

cuítí, chi vijna te ni candíje ri Cristo. <sup>8</sup> Te suni chíhi ri cuenta jeé vaha ga na naá ndihi jeé ní tenuū rí ún, chí vaha ndasí gá cúu jeé ni quívi ri ndaha máá Jítoho rí Cristo Jesús. Te jeé siquí maá yá te ni siaá rí ndihi ún, te sáha ri cuenta jeé nájnūhun yacá-ni cúu. Chí ni quívi ri ndaha Cristo, <sup>9</sup> te ndúú yá jíin rí. Te tuá nducú rí quendōo ndaā rí jeé jíin ley un, chí sa suhva Yaā Dios ni ndahva yā cuēchi ri jeé ní candíje ri Cristo. Chí súcuan squéndōo ndaā yā ñayuu cácanđíje. <sup>10</sup> Te vijna te cúni rí jecūhun vaha ni rí ndese Yaā cúu ya. Te cúni rí jeé poder jeé ní natecu yá cone jíin rí. Te cúni rí ndoho ri jíin yá, te nde jinū rí ndoho ri nájnūhun ni ndoho máá yá jeé ni jíhi yā. <sup>11</sup> Chí yōhyo ñūhun ni rí natecu rí nájnūhun ni natecu yā.

*Jeé nducú ndeyí Pablo sínu de carrera de*

<sup>12</sup> Te ná tu nihín rí ndihi jeé ní cahān rí ún, ní ná tu ije ri jíin. Te ndúcú ndeyí rí siquí ún, chí ñūhun ni rí jeé nihín rí táca un, chí jeé yúcuán cúu jeé ní nihín Cristo Jesús ruhū xihna gā. <sup>13</sup> Hermano jijnáhan ró, tu sáha ri cuenta jeé jeé ní nihín rí ndihi ún. Te iyó in jeé sáha ri, cúu jeé squéndōo ri táca jeé ní cuu ichi yátá, te ndúcú ndeyí rí nihín rí táca jeé iyó ichi núú. <sup>14</sup> Chí cúu un nájnūhun jeé jínu ri in carrera cuahān rí nde jinū rí andiví, te nihín rí premio jeé cuáha Yaā Dios. Chí ni cana ya yohó jée quihín yó nuú yá andiví siquí jeé yíhi yó ndaha Cristo Jesús.

<sup>15</sup> Te táca yó jeé jeé ní ije vaha yó jíin jnūhun cándíje yó, súcuan na cáni ni yó. Te núu ndé in ró sáin jéni ni ró, te Yaā Dios suni stéén yá nuū ró jeé násūu súcuan cúu. <sup>16</sup> Te jíni ñūhún caní ni yó te caca yó modo jeé quijnáhan jíin jée jeé ní nihín yó.

<sup>17</sup> Hermano, na ndácu ró rúhū jijnáhan ró. Te condēhe vaha ró ndese cájica ñayuu ndaā, chí cájica i nájnūhun ni castéén rí nuū ró. <sup>18</sup> Te je ni cuu tíjni jínu ni cahān rí jíin ró, te nde ndahyú rí cahān tucu ri vijna, jeé iyó cuéhé ñayuu cájica i in modo jeé stéén jeé jito uhū i jnūhun jeé ní jíhi Cristo jíca cruz. <sup>19</sup> Te in quívi te jnahnū ndetū ñayuu ún. Chí máni jeé cáji vaha i cúu jeé cáchiñūhún i. Te sátéyí i máá i jíin jniñū neé jeé jéhe jnūhun canu. Te máni máá jée iyó iní ñayívi cúu jeé ndihví ni i. <sup>20</sup> Te máá yó chí ñayuu coyūcú andiví cúu yó, te cādetu yó jée nde yúcuán ndiji Jitoho yó Jesucristo, Yaā jnáma yóhó. <sup>21</sup> Te máá yá nasama ya yiqui cúūu ndahú yó, návaha nduu yó nájnūhun cáa máá yá jeé lúu cújéhu ya. Te súcuan sáha ya jíin poder yá jeé cujéhu ya siquí ndihi-ni.

*Níni na cúsiñ ni yó jíin Jítoho yó*

#### 4

<sup>1</sup> Núu súcuan hermano jijnáhan ró, cuiñi nihín ró jíin jnūhun máá Jítoho yó. Chí yōhyo maní rí jíin ró, te cúni rí jeé coto jnáhan yó, te

cúsñ ni rí jíin ró, te nájnūhun premio rí cácuu ró.

<sup>2</sup> Te cahān ndahú rí jíin róhó Evodia jíin Síntique jeé inuú na cóo ni ró, chí cácuu ró hermana jeé cácanđíje ró máá Jítoho yó. <sup>3</sup> Te suni cahān ndahú rí jíin róhó, téé jeé ní chindéé ñájnáhan vaha jíin rí, jeé na chindéé ñáhán ró hermana un, chí ni casájniñu nihin ña jíin rí siquí jnūhun jeé jnáma ya yohó. Te suni súcuan ni sáha Clemente jíin sava ga ñayuu ni sájniñu jíin rí. Te ni jecosō sihví i nuū libro jeé yosó shví ñayuu cotecu ní cáni.

<sup>4</sup> Te níni na cúsiñ ni ró jijnáhan ró jíin máá Jítoho yó. Te inga jinu cahān rí jeé na cúsiñ ni ró. <sup>5</sup> Sáha vaha ró jíin táca ñayuu, návaha cuni i jeé súcuan vaha ni ró. Chí máá Jítoho yó, yajni-ni cúu ya jíin ró.

<sup>6</sup> Ma nácani ndasí ni ró siquí ni in. Chí sa cahān ró jíin Yaā Dios siquí táca jée nácani ni ró. Chí cacān tahu ró, te cahān ndahú ró, te suni nacuatáhú ró nuú yā. <sup>7</sup> Yúcuán na te sáha Yaā Dios jeé cóo ndeyí coo siñ ndasí ni ró, te súcuan coo jíin ró nde cūhva jeé ma jécūhun ni ró ndese cúu jeé sáha ya ún. Te condito vaha ya anuá ró jíin jée níjnūni ró, coo cuehé jnūhun ndeyí jnūhun siñ ni jíin ró, siquí jeé yíhi ró ndaha Cristo Jesús.

*Jeé na cáni ni yó siquí táca jée vaha*

<sup>8</sup> Te in na jnūhun iyó, hermano jijnáhan ró. Na cáni ni ró siquí táca jée iyó ndaā, jíin jée sáha yíñūhún, jíin táca jniñu sáha vaha, jíin jniñu iyó ndoo, jíin táca jée iyó máni ni, jíin jée lúu sáha. Te máni na núcūhun ni ró táca jée vaha jeé sáha jeé nácuatáhú ró nuú yā.

<sup>9</sup> Táca jée ní stéén rí nuū ró, jeé ní cacutūhva ró nuū rí, jíin jée ní cajini ró ní cahān rí, jíin jée ní cajito ró ni sáha ri, táca yúcuán suni na sáha máá ró. Yúcuán na te máá Yaā jeé jéhe jnūhun ndeyí siñ ni, coo ya jíin ró.

*Jeé ní casocō ñayuu Filipos nuū Pablo*

<sup>10</sup> Te yōhyo cúsiñ ni rí sáha máá Jítoho yó, chí vijna te ni canucūhun tucu ni ró jeé chindéé ñáhán ró rúhū. Te nasūu jée ní naa ni ró sáha ró súcuan, chí siquí jeé tu ní iyo modo. <sup>11</sup> Te nasūu jée cahān rí siquí jeé ndóho ndahú rí, chí je ni cutūhva ri cusñ ni rí jíin jée névaha rí. <sup>12</sup> Jini rí cotecu ndahú rí, te jíni rí cotecu cucá rí. Chí ni cān ri jíin táca-ni, núu jeé ndutú chíji rí chí jée ndóho rí sóco, núu jeé cónevaha cuehé rí chí jée cúmaní nuú rí. <sup>13</sup> Ndihi-ni cúu sáha ri, chí máá Cristo jéhe ya fuerza ini rí. <sup>14</sup> Te vesú súcuan te vaha ni casáha ró jée ní chindéé ñáhán ró ruhū jíin jnúndóho jeé ndóho rí.

<sup>15</sup> Te róhó ñayuu ñuu Filipos, je cájini ró ndese ni cuu. Chí nde quívi ní quejée rí nácani ri jnūhun jeé jnáma ya yohó, ná ni quenda ri Macedonia vėji ri, te ni casocō ró xūhun núu rí siquí jeé ní canihín ró jnūhun ya ni nacani ri. Te ni in grupo ñayuu cácanđíje tu ní sáha súcuan, chí máá-ni róhó jijnáhan ró.

<sup>16</sup> Te ná íne ri ñuu Tesalónica, te ni catajǎ ró jecu jeē jíni ñúhún rí, ni jinū ñin uū jínu. <sup>17</sup> Te nasūu jeē nducú rí jeē cuáha ró núu rí, chi sa ndúcú rí jeē na cáyá gā jniñu váha ró, návaha cayā tahū rō nuū Yaā Dios. <sup>18</sup> Chi je ni nihīn rí ndihi jeē jíni ñúhún rí, te ndóo ga. Te íyó cuéhē nuū rí, chi ni nihīn rí jeē ní catajǎ ró vēji jíni Epafrodito. Te jeē ní catajǎ ró cúu nájnūhun ñin ofrenda jeē asín jeén, ni casocō rō nuū Yaā Dios, te cúsiī ni yā jíni. <sup>19</sup> Te Yaā Dios chi cuāha ya nuū rō tāca jeē cúmani nuū rō, chi cúcá ndasí yá jíni tāca jeē váha jeē lúu íyó núu Cristo Jesús. <sup>20</sup> Te na cáhán yō jeē yóhyo luu cújēhnu Tátá yō Yaā Dios níí cáni. Amén.

*Saludo jeē sándihí*

<sup>21</sup> Cachi rō nuū tāca ñáyuu maá yá jeē sándeyí ni i, áchí rí, chi cácanǎje i Jesucristo. Te hermano yō cáyūcu jíni rí yáha, cácahān de jeē sándeyí ni rō jijnáhan ró. <sup>22</sup> Te tāca ñáyuu maá yá jeē cáhīyo yáha, suni cácahān i jeē sándeyí ni rō. Te ñayuu cáyūcú vehe rey cújēhnu ñuu Roma yáha, maá i cácahān gā súcuan.

<sup>23</sup> Te ñúhun ni rí jeē maá Jítoho yō Jesucristo, na sáha ga yā jeē váha róhó jijnáhan ró. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU COLOSAS

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíin hermano yō Timoteo <sup>2</sup> cátee ri carta yáha cuájeē nuū rohó ñayuu ñuu Colosas, jeē cácuu ró ñayuu maá yá jeē cácañdije vāha nuū Cristo. Te cáñuhun ni rí jeē Tatá yō Yaā Dios na sāha ga yā jeē vāha rohó, te sāha ya jeē coo ndeyí coo sīi ni rō.

*Jeē jicān tahú Pablo jehē ñayuu cácañdije*

3 Te jeē cájicān tahú ri nuū Yaā Dios, Yaā cúu Tatá maá Jítoho yō Jesucristo, te níní cáncuatáhú rí nuū yā jeē siquí rohó jíjnāhan ró. <sup>4</sup> Chi ni cajini jñūhun ri ndese vāha cácañdije ró Cristo Jesús, jíin ndese cácañdáhú ní ró táca ñayuu maá yá. <sup>5</sup> Chi cáñuhun ni ró nihīn ró jeē ñūhun vāha nde andiví cuu ró. Chi ná ni cajini ró jñūhun ndaā jeē jñama ya rohó, te ni caquejéé ró ñūhun ni ró. <sup>6</sup> Te jñūhun un jéē ní canacani nuū ró, chí ndúcuehē cuahān te nihīn jñíñu ní cáhnu ñayiví. Te suni súcuan ni sāha jíin rohó jíjnāhan ró ndé quiví ní cajini ró te ni cajecūhun ni ró jeē ndaā cúu jeē yóhyo vāha ni Yaā Dios jíin ró. <sup>7</sup> Te jñūhun un cúu jeē ní steén Epafras nuū ró, tēe sájníñu jíin rí jeē maní rí jíin. Chi cúu de tēe jéjníñu squícu vāha nuū Cristo jeē ndíto de rohó. <sup>8</sup> Te máá de ni castūhun núu rí siquí rohó, ndese cácañdáhú ní ró jñāhan ró sāha maá yá.

<sup>9</sup> Jeē yúcuān suni tu cájecuiví rí jeē cájicān tahú rí jehē ró, nde quiví ní nihīn rí jñūhun ún te nde vijna. Te cájicān rí nuū yā jeē na jécūhun vāha ní ró te coo ndichí ró jíin jñūhun ya, sāha máá Espírítu, návāha cuni ró ndihi ndese nujnahan ni maá yá. <sup>10</sup> Te cájicān rí jeē caca ndaā ró nájñūhun cánuú caca ró jéē cácuu ró ñayuu maá Jítoho yō. Te súcuan te sāha ró ndihi jeē nujnahan ní yā, te nihīn jñíñu ró jíin táca jñíñu vāha, te jecūhun ga ní ró ndese Yaā cúu Yaā Dios. <sup>11</sup> Te cájicān rí jeē cuāha ya fuerza ini ró, nájñūhun íyó fuerza maá yá jeē cújéhu luu ya. Te súcuan te cuu cuandeyí ní ró jíin táca-ni jñūndóho, te cusí teyí ní ró. <sup>12</sup> Te cuu nacuatáhú ró nuū Tatá yō, chí máá yá ní chíhi fuerza yohó jéē iin cáhnu-ni jíin táca ñayuu maá yá nihīn yō tahū yō. Chí cájica yó jíin luz yā jeē yíhi yó ndaha ya. <sup>13</sup> Chí ní jñama ya yohó jéē ní yíhi yó ndaha máá jéē jñí poder nuū néé, te ní squívi ya yohó ndaha Séhe ya jeē maní yā jíin, ndácu ya jñíñu nuū yō. <sup>14</sup> Chí Séhe ya un ní jñama ya yohó jéē ní jíhi yā jehē yō, te ní ine cáhnu ní yā nuū cuéchi yó.

*Jeē ní sāha Cristo jeē ní ndāví yó núu jñūhun maní Yaā Dios jíin yó*

<sup>15</sup> Yaā Dios jeē tu cúu coto yó, ní sāha ya jeē ní quiji Séhe ya, te súcuan ní jito yó máá yá. Te Séhe ya ún, je íyó yá nde ná tu jecōo táca jéē íyó. <sup>16</sup> Chí jíin Séhe ya ní sāha Yaā Dios ndihi jeē ní jécōo, ndihi jeē íyó andiví jíin jéē íyó ñayiví, jeē jíni yō nuū jíin jéē tu jíni yō nuū. Te suni ní sāha ya táca ndajehé jeē cándacu jñíñu, jíin jéē cándiso jñíñu, jíin jéē cácujeñhu, jíin jéē cájñi poder. Jíin Cristo ní sāha Yaā Dios jeē ní jécōo ndihi, te jeē cúu Cristo cúu. <sup>17</sup> Te je íyó Cristo nde ná tu coo ndihi jeē íyó. Te ndaha máá yá yíhi vāha ndihi-ni. <sup>18</sup> Te máá yá cújéhu nuū ñayuu cácañdije, nájñūhun cújéhu xini nuū yiqui cúñu, chí nájñūhun yiqui cúñu yā cácuu i, cúu jeē iin na cúu i jíin yá. Te máá yá sāha jeē cotecu i ní cáni, te xíhna gā maá yá ní natecu méñhu ndívi, návāha cújéhu ya nuū táca-ni. <sup>19</sup> Chí ní cusí ní Yaā Dios jeē ndihi ndese cúu máá yá, suni súcuan cúu Cristo. <sup>20</sup> Te siquí jeē ní jíhi Cristo, te ní cusí ní Yaā Dios sāha ya jeē ndívicoo táca-ni nuū jñūhun maní yā jíin, táca jéē yúcu ñayiví jíin jéē yúcu andiví. Chí jíin jéē ní jíhi Cristo jíca cruz, te ní sāha Yaā Dios jeē ndávicoo táca-ni nuū jñūhun maní yā jíin.

<sup>21</sup> Te máá ró jíjnāhan ró, chí sín siquí ní cahīn ró ndé saá, te ní cajito uhū ró yā ini anuá ró, chí maní jñíñu néé ní casáha ró. Te vijna chí je ní sāha Yaā Dios jeē ní ndávicoo ró núu jñūhun maní yā jíin ró. <sup>22</sup> Súcuan ní sāha ya siquí jeē ní sócō Cristo maá yá ní jíhi yā, návāha coo ndoo coo i ró cuiñi ró núu yā, te ma coo jnéhén ró, te tú na cuéchi coo siquí ró. <sup>23</sup> Te súcuan sāha ya núu cuiñi nihīn ró jéē cáñdije vāha ró, te núu quendōo nihīn ró jíin jñūhun vāha jeē cáñuhun ní ró jeē jñama ya rohó, te ma siaá cuiñi ró. Chí jñūhun un ní cajini ró, te ní jite nuū ní cáhnu ñayiví. Te ruhū Pablo suni jéjníñu rí jeē nácani rí jñūhun ún.

*Jeē jéjníñu Pablo siquí ñayuu cácañdije*

<sup>24</sup> Te vijna te cusí ní rí jeē ndóho rí jehē ró jíjnāhan ró. Chí jíin yiqui cúñu rí ndóho rí jeē cúmaní gā ndoho rí jíin Cristo jehē ñayuu cácañdije, suu ñayuu cúu nájñūhun yiqui cúñu yā. <sup>25</sup> Te cúu rí tēe jéjníñu siquí ñayuu cácañdije, chí súcuan ní tejníñu Yaā Dios ruhū, návāha nacani ndihi rí jñūhun ya nuū ró te quendōo vāha ró. <sup>26</sup> Te nácani rí jñūhun ya jeē ní yisáhi, jeē tu ní cájini ñayuu nde jehān ndasi te nde ní cáni véji. Te vijna te je ní steén cají yá jñūhun un núu ñayuu maá yá. <sup>27</sup> Chí ní cusí ní yā jeē steén yā nuū i ndese cúcúca ndasí i jíin ndihi jeē ndiso jñūhun sāhi yāha jéē lúu cújéhu, te cuiñe núu quihīn nuū táca nación jeē tu jíin. Te jñūhun sāhi yāha cúu jeē ndeé Cristo ini anuá ró, ndúu yá jíin ró, te jeē yúcuān cáñuhun ní ró táca jéē lúu jéhu jeē coo.

<sup>28</sup> Te jñūhun Cristo un cūu jeē cānacani ri, te cástfhwí ni rī tāca ñayuu, te cástéén rī jñūhun ya návaha jecūhun vāha ni i. Te súcuan te ije vāha ni ndivii i jeē yñhi i ndaha Cristo Jesús. <sup>29</sup> Te siquī yúcuun cūu jeē sájniñu ri, chi ndíhvī ni rī nācani ri jñūhun jín tāca fuerza Cristo jeē chindéé ñájnahan ya jín rī.

## 2

<sup>1</sup> Chi cúní rī jeē na jecūhun ni rō ndese yōhoyo ndúcú ndéyí rī jehē rō, jín jéhē ñayuu ñuu Laodicea, jín ndé tāca ñayuu jeē tu ní cājini cuiti nuū rī. <sup>2</sup> Chi cúní rī jeē coo ndeyí ni anuá i, te inuú-ni coyúu máni i, te jecūhun ndíhi ni i ndese yōhoyo cūcá i jín jñūhun jeē candíje nihin i. Chi cuni i ndese Yaā cūu Cristo, chi máá yá cūu jñūhun Yaā Dios jeē ní yísahí un. <sup>3</sup> Te ini Cristo yísahí tāca jñūhun jeē cucucá rō jín, suu jñūhun ndíchi jín jñūhun jécūhun ni. <sup>4</sup> Te jñūhun yāha cáhán rī jín rō jijnáhan rō, návaha ma stahú ni ñi i róhó jín tāca jñūhun stáhú jée lúu cáhán. <sup>5</sup> Chi vésú ndeé jíca rī jín rō, te ñūhun ni rī rohó, te cúsñi ni rī jeē jín rī ndese cájica ndaā rō te cācandíje nihin rō Cristo.

<sup>6</sup> Núu súcuan te nájñūhun ni cajatáhú rō jeē Jítho rō cūu Jesucristo, suni súcuan na cáca ndaā rō jín yá. <sup>7</sup> Te na jñá vāha jñūhun ya ini rō, te na ije vāha rō jín jñūhun cācandíje rō yá, nájñūhun je ni cajini rō. Te níni nacuatáhú rō nuū Yaā Dios.

### *Jeē ndújeé yó sáha Cristo*

<sup>8</sup> Coto má cuāha rō jñūhun jeē stahú ni ñi ñayuu rohó jín jñūhun ndíchi jée tu jéñiñu, jín jñūhun ndúxi stáhú. Chi tu cācandíje i jñūhun Cristo, chi sa cācandíje i tāca jée tajnúni ñayuu, modo jeē castéén ini ñayívi yáha.

<sup>9</sup> Chi ndíhi ndese cūu máá Yaā Dios, suni súcuan cūu Cristo. <sup>10</sup> Te ndíhi ndese cūu Cristo, suni súcuan cūu rō jijnáhan rō, chi cáyihí rō ndaha ya. Te máá yá cújehnu nuū tāca jée cújehnu jín jée ndiso jniñu andívi. <sup>11</sup> Te siquī jeē cáyihí rō ndaha ya, suu cūu jeē nájñūhun ni cuu rō circuncidar. Te jeē súcuan ni sáha ya circuncidar rohó, chi nasūú ñi jñuní jeē yñhi yiqui cūñu rō cūu, chi sa suhva jeē ní sándoyo ya tāca cuéchi ni casáha rō jín modo neé máá rō. Chi súcuan cūu jeē sáha Cristo circuncidar rohó. <sup>12</sup> Te jeē ní cajendute rō cūu nájñūhun jeē ní quindúji rō jín Cristo, te suni nájñūhun jeē ní natecu rō jín yá. Chi ni cacandíje rō jée jín poder Yaā Dios ni nastécu yā Cristo mēñu ndáyí. <sup>13</sup> Chi ni cacuu rō nájñūhun ndíyí nuū yá siquī cuéchi rō, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ní cáni jín Cristo, chi ni ine cáhnu ni yá nuū tāca cuéchi rō. <sup>14</sup> Te nájñūhun jeē iyó ñi acta jeē jícan cuéchi siquī yó jeē ní stívi yó ley yá. Te ni ndahva yá acta

un, chi ni chunaa Cristo cuéchi yó jée ni jñhi yá jíca cruz. <sup>15</sup> Chi ná ni jñhi yá jíca cruz, te ni quende yá ndíhi poder tāca jéneé jée cájehnu jín jée cājini poder. Te ni quende yá jeē tuá cújehnu, chi ni sáha ya jeē cuángoo nuū quíndihyū, te súcuan ni steén yá poder yá.

### *Na ndúcú yó jeē quéndoo vāha yó ndé andívi*

<sup>16</sup> Núu súcuan te ma cuatáhú rō núu cācāhān ñayuu cuéchi siquī rō, siquī ñi jeē yéji rō chí siquī ñi jeé jíhi rō, chí jée tu nées í rō quívi víco jín quívi núcoso yó jín quívi ndetátú. <sup>17</sup> Chi tāca ley siquī un ní jéñiñu máá ndé ná tu quíji Cristo. Te vijna te ni quíji ya te tuá jín ñūhūn tāca ún. <sup>18</sup> Ma cuāha rō jñūhun jeē cási ni ñi ñayuu jeē nihín rō tahú rō. Chi cāchiñūhūn i tāca ndajéhé yá, te cācāhān i jeē súcuan cásáha suchí i máá i. Te cācāhān i jeē cājini ndíje i jeé iyó ndáa jñūhun cānacani i, te tuú. Te súcuan cásáha téyí saá-ni i máá i, chí cājini neé ní i. <sup>19</sup> Te tu cáhñi i jín Cristo, Yaā cújehnu nuū ñayuu cācuu nájñūhun yiqui cūñu yá chí ñi na cūu i jín yá. Chi máá yá scuéhnu ya i jín jñūhun ya, te nduu inuú ní táca i jeé cáhíje i cuahān i, nájñūhun ni jeni ni Yaā Dios.

<sup>20</sup> Núu súcuan te nájñūhun jeé je ni cajihí rō jín Cristo, cūu jeé ní casiáá rō tāca jée tajnúni jeé castéén ini ñayívi. Núu súcuan ¿te naun cásáha ga rō nájñūhun cásáha ñayuu ñayívi jée jéñdije rō táca jée tajnúni i? <sup>21</sup> Chi cācāhān i: Ma quehé rō ma caji rō jeé yáha chí jée yúcuun, ni ma jñá rō, áhí i. <sup>22</sup> Te máni jeé tajnúni ñayuu jín costumbre máá i cūu te tu nihín jniñu jeé quéndoo ndaā ñayuu. <sup>23</sup> Te ndaā chí cājini ni i jeé jñūhun ndíchi cūu ún, chí sáha jín i jeé chíñūhūn nihin i, jín jée sáha suchí i máá i, jín jée stóho i yiqui cūñu i. Te tu nihín jniñu cuiti jeé casi táca jniñu neé jée cúní i sáha i.

## 3

<sup>1</sup> Núu súcuan te nájñūhun ni natecu Cristo, suni súcuan ni canatecu rō jeé ní cuu rō nájñūhun ndíyí ni sáha cuéchi rō. Te na cóndihví ni rō siquī tāca jée iyó andívi núu ndeé Cristo lado vāha Yaā Dios nuū cújehnu ya. <sup>2</sup> Te na cáni ni rō siquī tāca jée iyó andívi, nasūu siquī jeé iyó ini ñayívi. <sup>3</sup> Chi nájñūhun je ni cajihí rō jín Cristo, te vijna chí nájñūhun cátecu rō jín yá andívi, chí cáyihí rō ini ndaha Yaā Dios. <sup>4</sup> Te quívi ndíji Cristo, Yaā sáha jeé cótecu yó ní cáni, yúcuán na te suni quendacoo ndíjin máá rō jín yá, te cújehnu luu rō jín yá.

### *Ñayuu jíca jín modo cuní máá, jín ñayuu ní ndujeé*

<sup>5</sup> Núu súcuan te casi rō tāca modo cuní máá rō jeé cáhíyo rō ini ñayívi yáha. Chi ma cáca jnéni rō, ma sáha rō jniñu jnéhén,

ma ndiyo ni rō sāha ró táca jniñu néé, ma cutóó ró, ma ndiyo ni rō ndajniñu. Chi táca ndajniñu jeé ndiyo ni yō cúu nájñuhun ídolo yō jeé chiñuhún yó. <sup>6</sup> Chi siquī táca jniñu yáha cúu jeé cuāha Yaā Dios castigo xeēn nuū ñáyuu niñi ni nuū yā. <sup>7</sup> Te suni jín jniñu yáha ní cajica ró ndé saá, ná ni casáha ró súcuan. <sup>8</sup> Te vijna te na stóo ró táca jeé yáha: jeé quití ni, jeé xeēn ni, jeé sāha jniñu néé, jeé cahán ndevāha nuū jnāhan, jín jeé cahán táca jñuhun tú vāha. <sup>9</sup> Ma stahú ró jnāhan ró, chi yúcuan cúu modo maá ró jeé ní cajica ró jín ndé saá, te je ni castóo ró. <sup>10</sup> Te ni canduu ró ñáyuu jeé, cuandacu ró máa Yaā ni sāha róhó, te cuajecūhun vāha ni rō ndese Yaā cúu ya. <sup>11</sup> Te ñáyuu ní ndujeé tuá cúu i ñáyuu griego, ni ñáyuu hebreo, ni ñáyuu ni sāha circuncidar, ni ñáyuu tu ní sāha circuncidar, ni ñáyuu ñuu jicá, ni ñáyuu yucú jeé ní indāa néé, ni mozo jeé ní jeen ñáyuu, ni ñáyuu sájniñu cuenta maá, chi inuú cúu ndihí i nuū yā. Chi Cristo cúu Jitoho ndihí i, te ndéé yá iní anuá ndihí i, ndúú yá jín i.

<sup>12</sup> Chi ni nacāji Yaā Dios rohó jijnāhan ró jeé cúu ró ñáyuu maá yá jeé maní yá jín. Núu súcuan te níni cundáhú ní rō jnāhan ró, te coo vāha ni rō jín jnāhan ró. Te coo suchí ni rō, te coo víta ní rō, te coo paciencia ni rō. <sup>13</sup> Cuandeyí ni rō jín jnāhan ró, te cone cáhnu ni rō nuū i te núu na vé ni sāha i nuū rō. Chi nájñuhun ni ine cáhnu ni Cristo nuū rō, suni súcuan sāha máa ró. <sup>14</sup> Te jeé cánuú gá cúu jeé cundáhú ndasí ní rō jnāhan ró. Chi yúcuan sāha jeé ndúu inuú ni rō te ije vāha ni rō jín jniñu vāha. <sup>15</sup> Te jñuhun coyūcu mání na cúnuú iní anuá ró sāha Yaā Dios. Chi ni cana ya rohó jéé nduu ró ñin na ñáyuu jeé coyūcu mání rō. Te níni na nácuatáhú ró núu yā.

<sup>16</sup> Te scuáha vāha ró jñuhun Cristo návāha cunuú jñuhun ún iní anuá ró. Te stéén rō nuū jnāhan ró, te stāhví ni rō i jín táca jñuhun ndíchí yā. Te jín salmo jín himno, yaa ii jeé cahán jñuhun ya, na cátaлуу ró jeé nácuatáhú ró iní anuá ró nuū Yaā Dios. <sup>17</sup> Te táca jniñu sāha ró, núu jeé cahán ró chí jeé sāha ró cúu, ndihí na sāha ró jéé ndujéhu sīhví máa Jitoho yō Jesús, te nacuatáhú ró núu Tatá yō Yaā Dios sāha ya.

*Ndese cánuú squícu ñáyuu cácandíje nuū jnāhan i*

<sup>18</sup> Róhó ñahan cácuu ñasihí, cuatáhú ró nuū yí ró, chí súcuan cánuú sāha ró siquī jeé candíje ró Jitoho yō. <sup>19</sup> Te róhó téé cácuu yí, cundáhú ni rō ñasihí ró, te ma cútucu ni rō jín ña. <sup>20</sup> Róhó séhe jijnāhan ró, táca-ni jniñu cuandíje ró núu tatá ró nuū naná ró, chí súcuan cúsi ni máa Jitoho yō. <sup>21</sup> Te róhó tátá jijnāhan ró, ma squítí ni rō séhe ró, návāha ma cucuíhá ni í. <sup>22</sup> Róhó mozo jijnāhan ró, táca-ni jniñu cuandíje ró núu patrón ró

ñayívi yáha. Ma sájniñu ndúxí ró jeé maá jeé coto de te cuajñuhun de róhó. Chi na sájniñu ndaā sájniñu ndíje ró, te conso íyo ró núu Yaā Dios. <sup>23</sup> Te táca jniñu sāha ró, na cúsi ni rō sāha ró, te na cáni ni rō jeé nuū Jitoho yō cájejniñu ró, nasūu nuū ñáyuu. <sup>24</sup> Chi je cájini ró jeé máa Jitoho yō cuāha ya cuehē tahū cuu ró ní cáni. Chi nuū máa Cristo cájejniñu ró, chí máa yá cúu Jitoho ró. <sup>25</sup> Te ñáyuu casáha jniñu néé, chí sa suhva ndutahū i siquī jeé ni sāha i. Chi tu sāha Yaā Dios cuenta ndese cúu ñin ñin ñáyuu, chí inuú sāha ya jín i.

#### 4

<sup>1</sup> Róhó patrón jijnāhan ró, vāha ndaā na sāha ró jín mozo ró. Te na núcūhun ni rō jeé suni iyó Jitoho maá ró, Yaā ndeé andiví.

<sup>2</sup> Te ndivíi rō ma jécuiñí rō jeé jicán tahú ró, chí coo ndito ni rō jín, te nacuatáhú ró núu Yaā Dios. <sup>3</sup> Te suni cacān tahú ró jehē rí jijnāhan rí, jeé na sāha Yaā Dios jeé cóo ga modo nacani rí jñuhun, návāha cuu cahán rí jñuhun Cristo jeé ní yisáhi, jeé tu ní cájini ñáyuu jenahán. Te siquī jñuhun un cúu jeé íne rí vecāa. <sup>4</sup> Te cacān tahú ró jeé cuu cahán cají rí ndese cánuú cahán rí.

<sup>5</sup> Sāha yúcún vāha ró jín ñáyuu tu cácandíje. Ma cúhuun ni rō siquī i, chí condíhví ni rō scandíje ró i. <sup>6</sup> Te mání cahán vāha ró jín ñáyuu, te cahán rō jñuhun cuajniñu jeé quéndoo vāha i sāha. Te caní ni rō ndese vāha nastío cuñíi rō jñuhun nuū ñin ñin i.

#### *Saludo jeé sándihí*

<sup>7</sup> Tíquico cúu ñin hermano jeé maní yō jín, te tēe squícu vāha chindéé ñájñāhan jín rí cúu de, te jéjniñu de jín rí nuū máa Jitoho yō. Te máa de castühun ndihí nuū rō ndese cuahán jniñu rí. <sup>8</sup> Jeé yúcuan ní tají rí de cuajeje de nuū rō jijnāhan ró, návāha cuni rō ndese cáhíyo rí jín jniñu, te coo ndeyí ni rō sāha de. <sup>9</sup> Te suni cuajeje Onésimo jín de, tēe cúu jnāhan máa ró jijnāhan ró. Te cúu de hermano jeé squícu vāha jeé maní yō jín. Te ndindúú de castūhun nuū rō ndese cuahán táca jniñu ichi cháha.

<sup>10</sup> Sándeyí ni rō jijnāhan ró, áchí Aristarco, tēe íne jín rí vecāa. Te suni súcuan cáhán Marcos, ñani primo Bernabé. Te je ni ndacu rí jniñu nuū rō siquī Marcos, te núu ni jecondéhe de róhó te sāha vāha ró jín de. <sup>11</sup> Te suni súcuan cáhán Jesús, tēe jeé suni nání Justo, jeé sándeyí ni rō. Te máa-ni de cácuu tēe hebreo cácandíje jeé chindéé ñáhan cánacani jñuhun jín rí siquī ndese ndácu Yaā Dios jniñu. Te yóhyo ndeyí iyó ní rí casáha de.

<sup>12</sup> Sándeyí ni rō jijnāhan ró, áchí Epafra, tēe cúu jnāhan máa ró, te mozo Cristo cúu de. Te níni jicán tahú ndasí de jehē ró, jeé na cuñíi niñin ró, te ije vāha ni rō jeé squícu vāha ró ndihí jniñu cúni Yaā Dios. <sup>13</sup> Chí cáhán ndaā rí jeé yóhyo ndíhví ni de jehē rō jijnāhan ró,

jíin jéhē ñáyuu ñuu Laodicea jíin Hierápolis.

<sup>14</sup>Lucas, tēe cúu médico jeē maní yō jíin, suni cáhán de jeē sándeýí ni rō, te suni súcuan cáhán Demas.

<sup>15</sup> Cachi rō nuū tācá hermano ñuu Laodicea jeē sándeýí ni i, áchí rí. Te suni súcuan cahān rō jíin Ninfas, jíin táca ñáyuu cácandíje cándutútú vehe ña. <sup>16</sup> Te ná ni jínu ni cacahu ró carta yáha, te suni tají ró na cáhu ñayuu cácandíje ñuu Laodicea. Te suni cahu máá ró carta jeē cuahán nuū ñáyuu Laodicea te ndiji nuū rō. <sup>17</sup> Te cachi rō nuū Arquipo jeē na ndúcú ndéýí de squícu de jniñu ní tee Jitoho yō siquí de, áchí rí.

<sup>18</sup> Ruhū Pablo, yāhá-ni cúu jeē tēe ri jíin ndaha máá rí, jeē sándeýí ni rō. Te nucūhun ni rō ruhū jeē íne ri vecāa. Te ñúhun ni rí jeē na sáha ga Yāa Dios jeē váha róhó jíjnáhan ró. Súcuan na cóo. Amén.

## CARTA HN JEE NI TEE APOSTOL SAN PABLO NUU ÑAYUU ÑUU TESALONICA

<sup>1</sup> Máá rí cúu Pablo jiín Silvano jiín Timoteo, te cátee rí carta yáha cuájeē nuū rohó ñayuu cácanđje ñuu Tesalónica, jeē cáyihí ró ndaha Tátá yō Yaā Dios jiín Jítoho yō Jesucristo. Te cañuhun ni rí jeē Tátá yō Yaā Dios jiín Jítoho yō Jesucristo, na sáha ga yā jeē váha róhó, te sáha ya jeē coo ndeyí coo sī ni rō jijnáhan rō.

*Ñayuu Tesalónica cúu i ñn ejemplo váha*

<sup>2</sup> Níni cáncuatahú rí nuū Yaā Dios jeē siquí rohó jijnáhan rō, te tu náa ni rí cacān tahú rí jehē ró jeē cájican tahú rí. <sup>3</sup> Te níni ndácunehen rí rohó núu Tátá yō Yaā Dios, jeē váha cásáha ró táca jniñu chí cácanđje ró, jiín jéé váha cájejniñu ró núu yā chí maní ró jiín yá, jiín jéé cájendeyí ró chí cañuhun ni rō jeē coo jeē váha sáha Jítoho yō Jesucristo. <sup>4</sup> Chí maní Yaā Dios jiín ró jijnáhan ró hermano, te cájini rí jeē ní nacáji ya rohó. <sup>5</sup> Chí ná ni canacani rí jñuhun nuū ró jeē jnáma ya rohó, te nasūu jéé ní cáhān rí súcuan-ni, chí ni nacani rí jiín poder Espíritu Santo, te ní cacucáhnú váha ní rí jeē jñuhun ndaa cúu. Te cájini ró ndese ní casáha váha rí ná ní coyūcu rí jiín ró, chí ní nducú rí jeē quéndōo váha ró.

<sup>6</sup> Te róhó jijnáhan ró chí ní candacu ró ruhū, te suni ní candacu ró máá Jítoho yō. Chí ní cajetáhú ró jñuhun yá, te ní cacusí ní ró ní sáha Espíritu Santo, vésú ní cajito ró cuehē jñundóho siquí ún. <sup>7</sup> Te súcuan cácuu ró ñn ejemplo nuū ndihí ñayuu cácanđje jeē cáyūcú región Macedonia jiín Acaya jiñā. <sup>8</sup> Chí jeē siquí rohó jijnáhan ró cúu jeē ní jite núu jñuhun Jítoho yō, te nasūu máni Macedonia jiín Acaya, chí suni ní cáhnu-ni ní jítē núu jñuhun ndese cácanđje ró Yaā Dios. Te jeē yúcuan tuá jini ñuhún jeē nácani máá rí jñuhun nuū i. <sup>9</sup> Chí sa máá i cáncani ndese ní cajetáhú váha ró ruhū ná ní jecoo rí nuū ró, jiín ndese ní castōo ro ídolo te ní quívicoo ró ndaha Yaā Dios, Yaā ndaa Yaā técu, jeē cuajniñu ró núu yā. <sup>10</sup> Te cáncani i jeē cándetu ró jéé ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núu castigo xeēn jeē quíji.

*Jniñu jeē ní sáha Pablo ñuu Tesalónica*

## 2

<sup>1</sup> Chí cájini ró hermano, jeē tu ní jécoco cáhá-ni rí nuū ró. <sup>2</sup> Te cájini ró jeē ní castóho i ruhū te ní cacahān ndeváha i nuū rí ini ñuu Filipos. Te vésú súcuan te máá Yaā Dios ní chindéé ñáhán yá ruhū, ní sáha ya jeē ní iyo ndeyí ní rí, te ní jecoo rí ñuu ró ní canacani rí

jñuhun jeē jnáma ya rohó. Súcuan ní casáha rí vésú xeēn ní iyo jñundóho. <sup>3</sup> Te jñuhun ní canacani rí, nasūu jñuhun ní castíví rí cúu, ní nasūu jéé níhín rí siquí ró, ní nasūu jéé ní castáhú rí rohó. <sup>4</sup> Chí máá Yaā Dios ní jito ndee yá ruhū, te ní tejniñu ya ruhū jeē nácani rí jñuhun jeē jnáma ya rohó. Te jeē yúcuan cúu jeē cácahān rí. Te tu cácahān rí jñuhun jeē núnjahan ní ñayuu, chí sa jeē núnjahan ní Yaā Dios, chí máá yá jito ndee anuá rí. <sup>5</sup> Te cájini ró jeē tu ní cánducú rí cuajnúhún rí rohó ñn modo stahú, ní tu ní cácahān rí jeē cúsiñi ní rí jiín ró náváha níhín rí xuhun ró. Te jini Yaā Dios jeé súcuan cúu. <sup>6</sup> Te ní tu ní cánducú rí jeē cuajnúhún ró ruhū, ní jeē cuajnúhún inga ñayuu ruhū, vésú súcuan cánuú coo núu, chí apóstol Cristo cácuu rí. <sup>7</sup> Chí sa suhva víta ní cacahān rí jiín ró, nájñuhun sáha ñahan ndéca yiquín jéé yucún ndíto ña sēhe ña. <sup>8</sup> Te siquí jeē cácuandáhú ndasí ní rí rohó, jeē yúcuan ní cacondihví ní rí nacani rí jñuhun váha Yaā Dios nuū ró. Te nasūu máá yúcuan-ni, chí suni nde vida rí cuáha rí jeē siquí ró nuú, chí yóhoy maní rí jiín ró. <sup>9</sup> Te cánahan ró hermano, jeē tú ní ñn rí stáhān rí jeē cacān rí nuū ró ná ní canacani rí jñuhun váha Yaā Dios nuū ró. Chí ní canducú ndeyí rí ní casájiniñu ndasí rí siquí jeē cótecu rí. Te nduú ñuu ní casájiniñu rí.

<sup>10</sup> Máá ró cájini ró, te suni Yaā Dios jini yá ndese ndaa ndoo ní cajica rí nuū rohó ñayuu cácanđje. Te ní ñn tu cúu cahān cuēchi siquí rí. <sup>11</sup> Te suni cájini ró ndese ní castíví ní rí ná ñn ná ñn ró, te ní cacahān rí jñuhun ndeyí ní jiín ró, nájñuhun sáha ñn tátá jiín sēhe de. <sup>12</sup> Te ní cacahān níhín rí jiín ró jeē ná cáca ndaa ró nuū Yaā Dios nájñuhun cánuú caca ró. Chí ní cana ya rohó jéé quíngoo ró núu ndacu ya jniñu, nuū luu cujéhnú ró jiín yá.

<sup>13</sup> Te jeē yúcuan níni nácuatáhú rí nuū Yaā Dios, chí ní cajetáhú ró jñuhun ya jeē ní canacani rí. Chí ní cajini ró jeē násūu jñuhun ñn tēe cúu, chí jñuhun Yaā Dios cúu. Te máá jéndaá jeē jñuhun un sájiniñu ini anuá rohó ñayuu cácanđje nde ndacu ró yá. <sup>14</sup> Hermano, ñayuu ñuu ró ní cajito xeēn i róhó, te súcuan ní candoho ró nájñuhun ní candoho ñayuu cácanđje cáyūcú región Judea jeē cáyihí ndaha Yaā Dios jiín Cristo Jesús. Chí nájñuhun ní candoho i ní sáha jnánan i ñayuu hebreo, suni súcuan ní candoho ró. <sup>15</sup> Chí suu ñayuu hebreo ní cajehni de máá Jítoho yō Jesús, nájñuhun ní cajehni de táca tēe ñuu de jeē ní canacani jñuhun ya nde jenahán. Te suni nde ruhū jijnáhan rí ní cascúnu de. Te cásáha de jniñu jeē tu núnjahan ní Yaā Dios, te cúu de contra siquí táca ñayuu. <sup>16</sup> Chí jésicoo de jeē ma nácani rí jñuhun nuū ñayuu táca nación jeē tu jini, náváha tú cácu i. Te súcuan sáha de jeē nducuehē gá cuēchi siquí de. Te vijna te



yachī quiji quivī jeē cuāha Yaā Dios castigo xeēn nuū de.

*Jeē cunī Pablo quicōndéhé tucu de ñayuu Tesalónica*

<sup>17</sup> Hermano, ni cacujiyo ri ñin núnúu-ni nuū rō jijnáhan rō. Te vēsú tu cájito jnáhan yó, te nini cáñuhun ni rī rohó. Te yóhoyo ni cacuu ni rī ndacoto ri nuū rō jijnáhan rō. <sup>18</sup> Te jeē yúcuan ní cajeni ni rī jecoo ri nuū rō nuū. Te ruhū Pablo, tijni jínu ni nducú rī modo jeē rī, te Satanás ní jesi ichi ri jijnáhan rī. <sup>19</sup> Chi tuá na inga cáñuhun ni rī, te tuá na inga cácusñi ni rī, chi suu máá rō jijnáhan rō. Te jeē siquī máá rō cúu jeē nihín rī premio rī te cusñi teyí ni rī cuiñi yó nuū máá Jítoho yō Jesucristo quivī ndjiji ya. <sup>20</sup> Suu jeē siquī rohó cúu jeē cácusñi teyí ni rī.

### 3

<sup>1</sup> Te jeē yúcuan tuá ni cáanda ri condetu ri nde nihín rī jñuhun ndese cáhiyo rō. Te ni casánda rī jeē quéndōo máá-ni ri ñuu Atenas. <sup>2</sup> Te ni catajī rī hermano yō Timoteo, tēe jéñiñu jín rī nuū Yaā Dios siquī jñuhun jeē jnáma Cristo yohó. Te ni jecóndéhé de rōhó náváha sáha de jeē cuiñi nihín rō te coo ndeyí ni rō jín jñuhun cácandje rō. <sup>3</sup> Te ni jeē de náváha ma náyūhú ni ñin rō síquī táca jñundóho jeē sáha ñayuu. Chi je cájini rō jeē súcuan cánuu ndoho yó. <sup>4</sup> Chi nde ná ni coyūco rī jín rō, te ni cacastūhun rī nuū rō jeē nihín nahín yó jñundóho. Te je cájini rō jeē súcuan ni cuu, nájnūhun ni cacahān rī. <sup>5</sup> Te jeē yúcuan, náa tuá ni cánda ri condetu ri jeē nihín rī jñuhun ndese cáhiyo rō, te ni tajī rī de ni jeē de, náváha cunī rī núu cácandje nahín rō. Chi ni jeni ni rī á sanaa te jexeén jeē jito ndee yohó ní cundeyí jín rō, te naa cáhá-ni jñiñu jeē ní casáha rī jín rō.

<sup>6</sup> Te vijna chi je ni ndee Timoteo nuū rī jijnáhan rī jeē ní jéé de ñuu rō Tesalónica. Te ni nacani de jeē cácandje váha rō, te cácundáhú ni rō jnáhan rō. Te ni cachí de jeē cáñuhun ni rō ruhú, chi cáhiyo maní rō jín rī. Te cácuni rō ndacoto rō núu rī, nájnūhun cácuni rī ndacoto ri nuū rō. <sup>7</sup> Te jeē yúcuan ní candusñi ni rī siquī jeē cácandje váha rō, hermano, vēsú xeēn iyó jñundóho siquī rī. <sup>8</sup> Te vijna je ni cananihín ni rī, chi cáhiñ nihín rō jín máá Jítoho yō. <sup>9</sup> Núu súcuan te tu jínu cuiñi nacuatáhu rī nuū Yaā Dios jeē siquī rohó jijnáhan rō. Chi jito ya jeē cácusñi ndasí ni rī jeē súcuan cáhiyo rō. <sup>10</sup> Te nduú ñuu cájicān tahu ndasí rī jeē ndácoto tucu ri nuū rō, te stéén gā rī na-ni jñuhun cúmani jecūhun ni rō siquī jñuhun cácandje yó.

<sup>11</sup> Te cácuni rī jeē máá Tátá yō Yaā Dios jín Jítoho yō Jesucristo, na núne ya ichi jeē cuu jecoo tucu ri nuū rō. <sup>12</sup> Te na sáha máá Jítoho yō jeē cuehē ndasí gá cundáhú ni rō jnáhan rō jín táca gá ñayuu, nájnūhun cácundáhú ni

rī rohó jijnáhan rō. <sup>13</sup> Te na sáha ya jeē íje ánuá rō jeē cuiñi nihín rō, náváha coo ndoo rō jéé ma cóo cuēchi rō núu máá Tátá yō Yaā Dios, quivī ndjiji Jítoho yō Jesucristo jín táca ñayuu yíhi ndaha ya.

*Siquī jeē caca ndaa yō modo jeē cúsní ni yā*

### 4

<sup>1</sup> Te vijna hermano, iyó inga jñuhun jeē cácahān ndahú rī jín rō te cáhān nihín rī jín rō, chi súcuan cunī máá Jítoho yō Jesús. Je ni castéén rī nuū rō ndese cánuu caca ndaa rō náváha cusñi ni Yaā Dios. Te cácahān ndahú rī jín rō jeē sa víhyá gā na cáca rō súcuan.

<sup>2</sup> Chi je cájini rō na jñiñu ni candacu rī nuū rō jeē ní ndacu máá Jítoho yō Jesús. <sup>3</sup> Te cunī Yaā Dios jeē na cóo ndoo coo íi rō nuū yā, te ma cáca jení rō. <sup>4</sup> Te ná ñin ná ñin rō na cóndeca yíñuhún rō ñasihí máá rō, te súcuan caca ndoo rō. <sup>5</sup> Te ma sáha rō jñiñu néé jéé ndiyo ni rō jesihí, nájnūhun casáha ñayuu táca nación jeē tu cájini i jñuhun Yaā Dios. <sup>6</sup> Ni ñin rō ma sáha rō cuéchi jeē quénde rō ñasihí jnáhan rō. Chi máá Jítoho yō cuāha ya castigo xeēn nuū ñayuu casáha táca jñiñu súcuan, nájnūhun je ni cacahān nihín rī ni castūhun rī nuū rō. <sup>7</sup> Chi tu ní cána Yaā Dios yohó jéé sáha yó jñiñu jñéhén, chi sa jeē caca ndoo yó. <sup>8</sup> Núu súcuan te ñayuu jeē squéhichí jñuhun yáha, nasūu jñuhun ñin tēe squéhichí i, chi sa jñuhun Yaā Dios, Yaā ní jéhe Espíritu Santo nuū yó.

<sup>9</sup> Te tu jini ñuhún jéé tēe ri nuū carta yáha jéé coo maní rō jín táca hermano, chi je ní steén Yaā Dios nuū rō jeē coo maní rō jín jnáhan rō. <sup>10</sup> Te je cáhiyo maní rō súcuan jín táca hermano cáyūcu ní cáhnu Macedonia jñiñá. Te cáhān ndahú rī jín rō hermano, jeē sa víhyá gā na cóo maní rō jín i. <sup>11</sup> Te na cóndihví ni rō coyūcú nayúu rō, te ma cóndihví ni rō siquī ndese casáha jnáhan rō, chi condihví ni rō sáha rō jñiñu máá rō, nájnūhun ni candacu rī nuū rō. <sup>12</sup> Súcuan na sáha rō náváha ñayuu tu cándje, cuatáhu i rōhó, te suni ma cúmani jeē cotecu rō.

*Siquī jeē ndjiji Jítoho yō*

<sup>13</sup> Suni cácuni rī, hermano, jeē na jécūhun ni rō jijnáhan rō siquī ñayuu cájihí, náváha ma cucuhíyá ni rō nájnūhun sava gá ñayuu jeē tu cáñuhun ni i jeē nátecu ndiñi. <sup>14</sup> Chi nájnūhun cácandje yó jéé ní jñiñ Jesús te ní natecu yā, suni súcuan cácandje yó jéé nastécu Yaā Dios táca ñayuu ni cacandje nuū Jesús te ní cajiñi.

<sup>15</sup> Jeē yúcuan cácastūhun rī ñin jñuhun jeē ní castūhun máá Jítoho yó nuū rī: Jeē yóhó jéé cátecu gā quivī ndjiji máá Jítoho yó, nasūu máá yó cosnúu jéé ndaa yó quihín yō. Chi xihna gā ñayuu je ni cajihí ndaa i quihín i. <sup>16</sup> Chi máá Jítoho yó nuu ya quiji ya ichi ándiví, te cana jee ya jeē máá yá ndácu jñiñu,

te cana jee ndajéhé cujéhu ga, te cucu trompeta Yaā Dios. Te xihna gā natecu tāca ndíyi jeē ní cacandíje Cristo. <sup>17</sup> Yūcuán na te yohó jeē cátecu gā yō quiví ndíji ya, suni ndonehen ya yohó jíin i, quihīn yō mēhñu vicó. Te naquijnáhan yó jíin máá Jítoho yō sava andiví. Te súcuan condee yō ní cáni jíin máá Jítoho yō. <sup>18</sup> Núu súcuan te jíin jnúhun yáha cahān ndeyí ni rō jíin táca jnáhan rō.

## 5

<sup>1</sup> Te tu jíni ñúhún jeē téé ri nuū carta yáha síquī cuiyā chí quiví jeē coo tācá un, hermano. <sup>2</sup> Chí je cájni vāha rō jée ñn sanaa ni yō te quee quiví ndíji máá Jítoho yō, nájñuhun ñn sanaa ni yō te quíji ñacuñhá jecuáá. <sup>3</sup> Chí ná-ni cácahān ñayuu jeē nayúu-ni ñn te tú na jñúndóho coo, te ná-ni cácahān i súcuan te ñn sanaa ni i te quíji jñúndóho síquī i jeē náá i, te ma cácu cuií i. Chí quíji quiví un nájñuhun ñn sanaa-ni te quejée jéhdē chíji ñn ñahan scácu sēhe. <sup>4</sup> Te rōhó hermano, tu cácu rō ñayuu cájica nájñuhun nuū néé jeē ñn sanaa-ni te quíji quiví un síquī rō nájñuhun quíji ñacuñhá. <sup>5</sup> Chí ndíhi rō cácu ñayuu jeē nájñuhun cájica rō nduú, chí stéén luz yā ñni anuá rō. Chí tu cácu yó nájñuhun ñayuu jeē tu jécūhun ni síquī Yaā Dios, jeē nájñuhun cájica i nuū néé. <sup>6</sup> Núu súcuan te ma cūhuun ni yō nájñuhun ñayuu cáquixí, chí sa ndito na cóo ni yō te coo cáji xíní yō. <sup>7</sup> Chí jecuáá cúu jeē cáquixí ñayuu, te suni jecuáá cúu jeē nájñi i. <sup>8</sup> Te máá yó chí nájñuhun jeē cájica yó nduú, te na cóo cáji xíní yō. Te na cúcutú yó jíin jnúhun cándíje ñihin yó jíin jnúhun cūndáhú ni yō jnáhan yó, nájñuhun cúcutú soldado jíin sahna cáa. Te na cúcutú yó jíin jnúhun jeē cáñuhun ni yō jeē cácu yó, nájñuhun cúcutú soldado jeē ñúhun lélú cáa xíní de. <sup>9</sup> Chí Yaā Dios tu ní jéni ya yohó jée cuáha ya castigo yohó, chí sa suhva jeē jnama ya yohó sáha máá Jítoho yō Jesucristo. <sup>10</sup> Te máá yá ni jihí yā jehé yō, návāha cotecu inuú yó jíin yá, vēsú núu cotecu gā yō ñayívi yáha chí cúu yō. <sup>11</sup> Núu súcuan te cahān rō jnúhun ndeyí ni jíin táca jnáhan rō, te scuéhu jnáhan rō jíin jnúhun ya, nájñuhun je casáha rō.

### *Jeē jéni ichí Pablo táca hermano*

<sup>12</sup> Te cácahān ndahú rí jíin rō hermano, jeē cuatáhú rō téé cájeññu cándito rōhó, jeē cácujeéhu de nuū rō jíin jñiñu máá Jítoho yō, te cájeni ichí de rōhó. <sup>13</sup> Te coo yíñúhún ndasí rō nuū de, te coo maní rō jíin de síquī jñiñu ya jeē casáha de. Te na cóyūcu mání rō jíin táca jnáhan rō.

<sup>14</sup> Te suni cácahān ndahú rí jíin rō hermano, jeē na stíhví ni rō ñayuu cájica cúxí. Te cahān rō jnúhun ndeyí ni jíin ñayuu jeē yachí ndínuu ni i. Te chindéé ñáhán rō ñayuu jeē tu fuerza ñni. Te cuandeyí ni rō jíin ndíhi ñayuu.

<sup>15</sup> Te coto má nasáha ndevāha rō jíin ni ñn ñayuu te núu sáha ndevāha i jíin rō. Chí máni jeē vāha nducú rō sáha rō jíin táca jnáhan rō jíin ndíhi-ni ñayuu.

<sup>16</sup> Níní na cóo sñ ni rō jijnáhan rō. <sup>17</sup> Te níní na cácan tahú rō. <sup>18</sup> Te nacuatáhú rō jeē síquī tācá-ni. Chí súcuan cúni Yaā Dios jeē sáha rō jée cácañíje rō Cristo Jesús.

<sup>19</sup> Te ma cási rō nuū jñiñu jeē sáha Espíritu Santo jíin rō. <sup>20</sup> Te ni ma cujéé ni rō nuū jnúhun cácahān téé cánacani jnúhun Yaā Dios. <sup>21</sup> Chí coto ndee rō táca jnúhun, te núu jeē vāha cúu, te cuatáhú rō. <sup>22</sup> Te ma quiví nduu rō jíin ni ñn jñiñu néé.

<sup>23</sup> Te máá Yaā Dios jeē jéhe jnúhun ndeyí sñ ni, ñúhún ni rí jeē sáha ndíhi ya jeē cóo ndoo coo ñi rō nuū yá. Te ñúhún ni rí jeē cóndito vāha ya anuá rō jíin jée ñjñíni rō, jíin yíqui cúñu rō, návāha tú na cuéchi coo síquī rō quiví ndíji máá Jítoho yō Jesucristo. <sup>24</sup> Chí Yaā jeē ní cana rōhó, sáha ya ndíhi un jíin rō, chí síquī va jeē ni jéjñuhun ya.

### *Saludo jíin bendición jeē sándíhi*

<sup>25</sup> Hermano jijnáhan rō, cacān tahú rō jehé rí jijnáhan rí.

<sup>26</sup> Te núu na cáhán rō jíin táca hermano, te techūhu yíñúhún rō ndaha i.

<sup>27</sup> Te cáhán ñihin rí jíin rō, chí súcuan cúni máá Jítoho yō, jeē na cáhu rō carta yáha nuū táca hermano.

<sup>28</sup> Te ñúhún ni rí jeē máá Jítoho yō Jesucristo na sáha ga yā jeē vāha rōhó. Súcuan na cóo. Amén.

## CARTA UU JEE NI TEE APOSTOL SAN PABLO NUU ÑAYUU ÑUU TESALONICA

<sup>1</sup> Máá rí cúu Pablo jiín Silvano jiín Timoteo, te cátee rí carta yáha cuájeē nuū roho ñayuu cácardije ñuu Tesalónica, jeē cáyihí ró ndaha Tátá yō Yaā Dios jiín Jítoho yō Jesucristo. <sup>2</sup> Te cáñuhun ni rí jeē Tátá yō Yaā Dios jiín Jítoho yō Jesucristo, na sáha ga yā jeē váha róhó, te sáha ya jeē coo ndeyí coo sī ni ró jijnáhan ró.

*Jeē sándaā yā cuēchi quivī ndíji Cristo*

<sup>3</sup> Cánúú jéē nini nacuatáhu rí nuū Yaā Dios jeē siquī roho jijnáhan ró hermano. Chi súcuan iyó váha, chí yōhoyo váha cuahije ró jiín jñuhun jeē cácardije ró yá, te yōhoyo cuanducuehē jeē cácardáhú ni ró táca jñáhan ró. <sup>4</sup> Te jeē yúcuan cúu jeē cácusī teyí ni rí cánacani rí jñuhun ró núú táca grupo ñayuu cácardije nuū Yaā Dios. Chi váha cácardije ró, te váha cájendeyí ni ró jeē cájito xeēñ ñayuu roho jiín jéē cándoho ró táca gá jñúndóho. <sup>5</sup> Te jiín táca jéē yáha chíhi ya cuenta jeē cácuu ró ñayuu váha jeē quívicoo ró ñuu nuū ndácu ya jñiñu. Chi siquī ñuu un cúu jeē cándoho ró. Te jeē súcuan chíhi ya cuenta siquī ró, yáha stéén nuū yō jeē váha Yaā cúu ya.

<sup>6</sup> Te suni iyó váha jeē nastóho ya ñayuu castóho róhó. <sup>7</sup> Te quivī ndíji Jítoho yō Jesús, quivī un sáha Yaā Dios jeē ndétatu róhó jéē cándoho, te suni ruhú jijnáhan rí. Chi jiín yáñuhūn quiji Jesús ichi ándiví jiín táca ndajéhé yā jeē ndíso poder. <sup>8</sup> Te cuáha ya castigo nuū ñayuu jeē tu ní cájéhe i jñuhun cuni i ndese Yaā cúu Yaā Dios, te tu ní cájetáhú i jñuhun máá Jítoho yō Jesucristo jeē jnáma ya i. <sup>9</sup> Te ñayuu ún chi ndoho i ní cáni, chí cujiyo i nuū máá Jítoho yō, te ma cúu quívicoo i nuū lúu ndasí cújéhu ya jiín poder yā. <sup>10</sup> Súcuan sáha ya quivī ndíji ya jeē lúu cújéhu ya sáha ñayuu cácardije jeē yáhi ndaha ya. Te nahán naa ni i coto i nuū yā. Te suni súcuan róhó jijnáhan ró, chí ni cacandije ró jñuhun jeē ní canacani rí nuū ró.

<sup>11</sup> Te jeē yúcuan cúu jeē nini cájicān tahú rí jehé ró, jeē na cúu ró ñayuu váha jeē ní cana ya róhó. Te jiín fuerza yā na sáha ya jiín ró jeē squícu ró táca jñiñu váha jeē ní catee ni ró sáha ró siquī jeē cácardije ró. <sup>12</sup> Te súcuan te cújéhu máá Jítoho yō Jesucristo sáha ró, te suni cújéhu máá ró jijnáhan ró sáha ya. Chi Yaā Dios yō jiín Jítoho yō Jesucristo, súcuan cúu jeē sáha ya jeē váha yóhó.

*Jñuhun siquī máá téē sáha xeēñ cuēchi*

### 2

<sup>1</sup> Vijna te cahān rí siquī jeē ndíji máá Jítoho yō Jesucristo jiín jéē ndutútu yó núú

yā. Cácahān ndahú rí jiín ró jijnáhan ró hermano, <sup>2</sup> jeē ma cuáha ró jñuhun sacá nuu cani ni ró, ni ma cunéé ni ró núu cácahān ñayuu jeē jé ni quee quivī ndíji máá Jítoho yō. Ma candije cuiti ró vesú nuu cahān i jeē ni níhīn i iñ jñuhun siquī un núu Espiritu, chí iñ jñuhun jeē ní cáhān inga, chí núu cachi i jeē ruhú jijnáhan rí ni tají iñ carta jeē cahān súcuan. <sup>3</sup> Ma cuáha cuiti ró jñuhun jeē stahú ni iñ i róhó. Chi nde ná tu quiji quivī ún te xīhna gā ndunīhni ni cuehé ñayuu nuū yā, te quenda ndijin máá téē sáha xeēñ cuēchi, te téē jñáhnú ndetú cúu máá téē ún. <sup>4</sup> Chi téē jito uhú Yaā Dios cúu de, te ndonda de contra siquī táca jéē casnání i yā i jiín táca jeē cáchiñuhún i. Te xeēñ gā sáha de, chí nde cucōo de ini templo Yaā Dios jeē iyó Jerusalén, te cahān de jeē máá de cúu Yaā Dios.

<sup>5</sup> ¿A cánahān ró jñuhun yáha? Chi súcuan ni cahān rí jiín ró ná ni iyo rí jiín ró. <sup>6</sup> Te je cájini ró ndé vé cúu jeē jési jeē ná tu quenda ndijin téē ún, chí nde na quee quivī máá de. <sup>7</sup> Chi je jicu sáhi táca cuēchi xeēñ ini ñayiví, te vijna chí iyó jéē jési nuū, návaha ma cáa ndasí gá cuēchi, chí nde na cújiyo máá jéē jési nuū. <sup>8</sup> Te sáá te quenda ndijin máá téē xeēñ ún. Te máá Jítoho yō Jesús cahni ya téē un jiín táchī yuhu-ni ya, te jiín jéē ndíndéē yá ndiji ya te snáhnú ndetú yā de. <sup>9</sup> Te jeē quiji téē xeēñ ún chí máá Satanás sáha. Te quiji de jiín cuéhé poder, te sáha de táca jñiñu jéhu jeē stahú de, jeē nahán naa ni ñayuu coto i. <sup>10</sup> Te jiín táca jñiñu néé te stahú ndasí de ñayuu jeē jñahnú ndetú, chí tu ní cúní i cuatáhú i jñuhun ndaā jeē cácu i núú. <sup>11</sup> Te jeē yúcuan cuáha Yaā Dios jñuhun jeē cuatáhú i jñuhun jeē tú ndaā cuiti, te candije i jñuhun stahú un. <sup>12</sup> Te súcuan te jecondee cuēchi siquī ndíhi i jeē tu ní cácardije i jñuhun ndaā, chí sa jñiñu néé ni cacusi ni i jiín.

*Ñayuu jeē ní nacáji ya jeē cácu i*

<sup>13</sup> Te cánúú jéē nini nacuatáhu rí jijnáhan rí nuū Yaā Dios jeē siquī roho jéē cácu ró hermano jeē maní Jítoho yō jiín. Chi nde ná ni jecōo ñayiví, te je ni nacáji Yaā Dios roho jéē jnáma ya róhó. Chi sáha Espiritu yā jeē cáhíyo ndoo cáhíyo i ró nuū yā te cácardije ró jñuhun ndaā. <sup>14</sup> Chi jeē yúcuan ní cana ya róhó jiín jñuhun jeē jnáma ya yohó jeē ní canacani rí, návaha quívicoo ró núú cújéhu lúu ró jiín máá Jítoho yō Jesucristo.

<sup>15</sup> Núu súcuan te cuifi níhni ró hermano, te conahán váha ró jñuhun jeē ní cacutūhva ró núu rí, núu jeē ní cacahān rí chí jéē ní tee rí nuū carta. <sup>16</sup> Máá Jítoho yō Jesucristo jiín Tátá yō Yaā Dios ni cundáhú ni yā yohó, te ní sáha ya jeē coo sī ni yō ní cáni, jiín jéē ñuhun ni yō táca jéē váha jeē coo siquī jeē váha ni yā jiín yó. <sup>17</sup> Te na sáha ga yā jeē cóo ndeyí ni anuá ró jijnáhan ró, te na sáha ya jeē ije ró

cahān rō tāca jnūhun vāha ya, te sāha ró tāca jniñu vāha.

*Jeē na cacān tahú i jehē de*

### 3

<sup>1</sup> Te íyó inga jnūhun cánuú, hermano. Na cacān tahú rō jehē rī jijnáhan rī, návāha yachī cuitē núu jnūhun máá Jítóho yō, te cuatáhú vāha ñayuu, nájñūhun ni cajetáhú máá ró. <sup>2</sup> Te suni cacān tahú rō jeē na cácu ri nuú tāca tée casáha néé jéé cátejñáhan jíin rī. Chi tú ndihi tēe cacandíje jnūhun ya. <sup>3</sup> Te máá Jítóho yō chi vāha squícu ya jeē ni jéjnūhun ya, te sāha ya jeē íje ni tāca ró jíin jnūhun ya, te coto ya rohó núu jeneé. <sup>4</sup> Te cácuacāhnu ni rī sāha máá Jítóho yō, jeē cócuu ró jíin jniñu jeē ní candacu ri nuú rō, te suni cocuu ga rō jíin. <sup>5</sup> Te ñūhun ni rī jeē máá Jítóho yō steén gā yā ndese coo maní gā rō jíin Yaā Dios nde jíin ini jíin ánuá rō, jíin jéé cuándeýí ni rō nájñūhun ni sāha Cristo.

*Jeē cánuú sájniñu yó*

<sup>6</sup> Te cándacu ri jniñu nuú rō hermano, chi súcuan ni ndacu máá Jítóho yō Jesucristo, jeē na cújiyo ró núu tācá hermano cájica cúxí te tu cájica vāha de nájñūhun ni castéén rī nuú rō. <sup>7</sup> Chi je cájini rō ndese cánuú ndacu ró rúhū jijnáhan rī, chi tu ní cájica cúxí rī ná ni cahíyo ri jíin ró. <sup>8</sup> Ni tu ní cáyeji rī staa ni ñn ró súcuan-ni, chi ni cachunaa rī. Chi sa ni canducú ndeýí rí ni casájniñu téyí rí nduú ñuú, návāha ma stáhān rī ni ñn ró. <sup>9</sup> Te vésú íyó derecho rī jeē cacān rī nuú rō nuú, te tu ní cájicān rī, chi súcuan ni casáha ri návāha cuu ri ñn ejemplo nuú rō ndese sāha ró jijnáhan ró. <sup>10</sup> Chi ná ni coyūcu rí jíin ró, te ni candacu ri jniñu yáha nuú rō: Núu ndé ñn ñayuu tu cúní i sájniñu i, te suni ma cáji i núu súcuan. <sup>11</sup> Chi ni canihīn rī jnūhun jeē cájica cúxí sava ró, te tu casájniñu ró, chi yāha yúcuan-ni sāha ró. <sup>12</sup> Te cándacu ri jniñu nuú rohó jéé casáha súcuan, te cástñví ni rī rohó jeē na cóo nayúú ró te sájniñu ró, návāha nihīn rō jeē cáji rō siquí jniñu sāha máá ró. Chi súcuan ndácu máá Jítóho yō Jesucristo jniñu.

<sup>13</sup> Hermano, ma ndínuu ni rō jijnáhan ró sāha ró tāca jniñu vāha. <sup>14</sup> Te núu ndé ñn i tu jétáhú i jnūhun jeē cahán rī nuú carta yáha, te condēhe vāha ro ndé-ni i cúu, te ma quiijnáhan ga rō jíin i, návāha na cúcanu i te nacani ni i. <sup>15</sup> Te nasūu jéé cóto uhū rō i, chi sa cahān rō jíin i nájñūhun jíin ñani rō jeē na sájniñu vāha i.

*Bendición jeē sándihí*

<sup>16</sup> Te ñūhun ni rī jeē máá Jítóho yō, Yaā jeē jéhe jnūhun ndeýí sñ ni, níni na sāha ya jeē coo ndeýí coo sñ ni rō siquí tācá-ni, te coo ya jíin ró jijnáhan ró.

<sup>17</sup> Ruhū Pablo, yāhá-ni cúu jeē téé ri jíin ndaha máá rí jeē cahán rī jeē sándeýí ni rō

jijnáhan ró. Te súcuan jéhe ri firma nuú tāca carta rī, návāha cuni rō jeē carta máá rí cúu. Súcuan cáa letra rī. <sup>18</sup> Te ñūhun ni rī jeē máá Jítóho yō Jesucristo, na sāha ga yā jeē vāha ró jijnáhan ró. Súcuan na cóo. Amén.



Te siquĩ jeẽ candíje ri Cristo te ndaã cúu jeẽ cahán rĩ.

<sup>8</sup> Núu súcuan te cúnĩ rĩ jeẽ ndihi-ni lugar na cácan tahú táca té. Te na cóo ndoo ánuá de jeẽ ma quitĩ ni de ni ma tejnáhan de. <sup>9</sup> Te suni súcuan táca ñahan, na cási vâha ña máa ña nájñuhun cánuú, návâha ma cóo jñuhun canu. Te ma cóndihví ni ña jeẽ sâha luu ndasĩ ña xinĩ ña, chí jéẽ cuhun ña siquĩ oro chí perla chí sahna vâha ga. <sup>10</sup> Chí sa suhva na quéndõo luu ánuá ña jíin jniñu vâha sâha ña, nájñuhun cánuú sâha ñahan ndoo ánuá jeẽ cájejniñu nuũ Yaã Dios. <sup>11</sup> Te núu cáhiin ña jíin ñáyuu cascuâha jñuhun ya, te na cúnĩ nahín ña te cuatáhú ña. <sup>12</sup> Chí tu jéhe ri jñuhun jeẽ steén ñahan nuũ ñáyuu ndutútú, ni jeẽ ndácu ña jniñu nuũ té. Chí sa suhva na cúnĩ nahín ña. <sup>13</sup> Chí xihna gã Adán ni sâha ya, te sáá te ni sâha ya Eva. <sup>14</sup> Te tu ní stáhú jexeén Adán, chí sa suhva ni stáhú un ñasihí de, te ni sâha ña cuẽchi. <sup>15</sup> Te jeẽ scácu táca ña sêhe te coo vâha ña, te núu na quéndõo ña jíin jñuhun cándíje ña ya, jíin jéẽ cundáhú ni ña jnánhan ña, jíin jéẽ cóo ndoo ánuá ña, jíin jéẽ sâha yíñuhún ña.

*Ndese cánuú coo téẽ cándiso jniñu nuũ ñáyuu cácandíje*

### 3

<sup>1</sup> Ndaã cúu jñuhun yâha: Núu iin téẽ cúnĩ de condiso jniñu de condito de ñáyuu cácandíje, te vâha jniñu ndúcú de sâha de. <sup>2</sup> Núu súcuan te téẽ ndiso jniñu nuũ ñáyuu cácandíje, cánuú jeẽ ma cóo ni iin jeẽ nihín ñáyuu cuẽchi siquĩ de. Te na cóo iin-ni ñasihí de, te cájĩ coo ni de, te ndito coo xinĩ de, te sâha yíñuhún de. Te cánuú jeẽ ninĩ cuanúu de vehe nuũ ñáyuu cájica, te ninĩ stéén vâha de jñuhun ya. <sup>3</sup> Te ma cúu de téẽ nájini, te ma tejnánhan de, te ma ndiyo ni de xuhún. Chí sa suhva coo vâha ni de, te coo vitá ni de, te ma cutóó ni de siquĩ xuhun. <sup>4</sup> Te cánuú jéẽ na ndácu vâha de jniñu ini vehe de, te sâha de jeẽ squícu vâha sêhe de te coo yíñuhún i nuũ de. <sup>5</sup> Chí núu iin téẽ tu jíin de ndacu vâha de jniñu ini vehe de, ¿te ndese cuu condiso jniñu de nuũ ñáyuu cácandíje nuũ Yaã Dios? <sup>6</sup> Núu súcuan te téẽ ndiso jniñu nuũ ñáyuu cácandíje, ma cúu de téẽ jeẽ saá ní candíje, chí núu súcuan te sanaa te sándúxĩ de máá de, te inuú-ni cuẽchi jecondee siquĩ de jíin jéxeén. <sup>7</sup> Te cánuú cuu de téẽ jeẽ suni nde ñáyuu tu cácandíje, cuajñuhún i de, návâha ma nihín i cuẽchi siquĩ de, te ma cundeýĩ jexeén jíin de.

*Ndese cánuú coo téẽ cájejniñu mēhñu ñáyuu cácandíje*

<sup>8</sup> Te suni súcuan téẽ cájejniñu mēhñu ñáyuu cácandíje, cánuú jéẽ na cóo yíñuhún de, te na squícu de jíin jñuhun cahán de. Te ma cúu de téẽ nájini, te ni ma ndiyo ni de xuhún. <sup>9</sup> Te na cuñi nihin de jíin jñuhun cándíje yó jéẽ ni

yisâhi ndé jenahán, te na cóo ndoo ánuá de. <sup>10</sup> Te cánuú jéẽ xihna gã coto ndee rō de, te núu ni jini rō jeẽ tú na cuẽchi de, yūcuán na te cuu cuajniñu de mēhñu ñáyuu cácandíje. <sup>11</sup> Te suni súcuan ñasihí de jíinánhan ña, cánuú coo yíñuhún ña, te ma sajnuhún ña, te cájĩ coo ni ña, te squícu vâha ña táca-ni jniñu. <sup>12</sup> Te téẽ cájejniñu mēhñu ñáyuu cácandíje, na cóo iin-ni ñasihí de, te na ndácu vâha de jniñu nuũ sêhe de jíin nuũ ñáyuu vehe de. <sup>13</sup> Chí táca téẽ cájejniñu vâha mēhñu ñáyuu cácandíje, chí vâha quéndõo yíñuhún de, te nihín de modo jeẽ cajĩ gã nâcani de jñuhun Cristo Jesús jeẽ cácandíje yó.

*Jñuhun sâhi yá jeẽ cácandíje yó*

<sup>14</sup> Te vesú ñuhun ni rĩ cuajeẽ yachĩ rĩ coto jnánhan yó, te téẽ ri jñuhun yâha cuajeẽ nuũ rō, <sup>15</sup> návâha núu cucuéeé rĩ, te je jíin rō ndese cánuú sâha vâha ñáyuu cácuu sêhe Yaã Dios. Chí máá i cácuu ñáyuu cácandíje nuũ Yaã Dios, Yaã técu. Te máá i cásaña jeẽ iyó cutú jñuhun ndaã, chí cáhiin nihin i jíin. <sup>16</sup> Te jendaá ndije chí jéhuu ndasĩ cúu jñuhun yâha jeẽ cácandíje yó, jeẽ ní yisâhi ndé jenahán:

Yaã Dios ni steén yâ maá yá, chí ni nduu ya téẽ,

te Espiritu ni steén jeẽ iyó ndáa jniñu ni sâha ya,

te táca ndajéhé andivĩ ní cajito jniñu ní sâha ya.

Te ni jitē núu jñuhun ya nuũ ñáyuu táca naciõn,

te ni cacandíje ñáyuu ní ñáyivi núu yá,

te ni ndaa ya cuanuhun yá andivĩ.

*Siquĩ ñáyuu cájica yátá nuũ jñuhun cácandíje yó*

### 4

<sup>1</sup> Te cájĩ stéén Espiritu Yaã Dios jeẽ quivĩ cuándhi te coo sava ñáyuu caca yátá i nuũ jñuhun cácandíje yó. Te cuatáhú i táca jéẽ cácahán jñuhun stáhú jíin jñuhun ní castéén tachĩ. <sup>2</sup> Chí cuni nahín i jñuhun castéén téẽ cástáhú-ni, jeẽ tu cácahán ndaã de. Chí téẽ un ní cahije ndasĩ ni de jíin jñuhun stáhú, te tuá sâha jíin ánuá de jeẽ nâcani ni de. <sup>3</sup> Te cahán de jeẽ cuẽchi cúu jeẽ coo ñasihí téẽ, te suni súcuan núu cajĩ ñáyuu sava ndeyu. Te ndeyu ún chí ni sâha Yaã Dios jeẽ cúu ñáyuu cácandíje jeẽ jíin jñuhun ndaã, návâha cajĩ i te nacuatáhú i nuũ yá. <sup>4</sup> Chí ndihi jeẽ ni sâha Yaã Dios, iyó vâha, te ma squexícó yó ni iin, chí sa nacuatáhú yó te cajĩ yó. <sup>5</sup> Chí jíin jéẽ cáhu yó jñuhun Yaã Dios jíin jéẽ nâcuatáhú yó nuũ yá, te iyó ndoo ndihi-ni.

*Téẽ jéjniñu vâha nuũ Jesucristo*

<sup>6</sup> Te núu stéén rō jñuhun yâha núu táca hermano, núu súcuan te cuu rō téẽ jéjniñu vâha nuũ Jesucristo, te ije rō jíin jñuhun vâha ya jeẽ candíje rō, chí ni cutuhva rō te ndíquín rō. <sup>7</sup> Te ma quivĩ nduu rō jíin táca jñuhun jeẽ

cúu cuento-ni jeē cajúni cāhá ni ñayuu. Chi níni na scuáha ró ndese chiñúhún váha ró Yaā Dios. <sup>8</sup> Chi jeē scuáha yó ejercicio jeē cóo ndacuī yiqui cúñu yó, jecu-ni níhín jñíñu. Te jeē scuáha yó chiñúhún váha yó yá, suu yúcuau cúu jeē váha níhín jñíñu siquī tǎcá-ni, jeē cúu vida yáha jíñ vida quiji. <sup>9</sup> Te ndaā ndije cúu jñúhun yáha, te jeē cánuú candije ndíhi ñayuu cúu. <sup>10</sup> Te jeē siquī yáha cúu jeē sájñiñu níhín yó siquī jñúhun ya te ndóho yó jéé cácahán ndeváha i nuū yó. Chi ñúhún ni yó jeē coto yó nuū maá Yaā Dios, Yaā técu. Te máa yá cúu Yaā jnáma tǎca ñáyuu, te ñayuu cácañdije jñúhun cúndáhú ni yá i, máa i cúu jeē jnáma ya.

<sup>11</sup> Tǎca jñúhun yáha cánuú jéé ndacu ró nuū i te stéén ró. <sup>12</sup> Ma cuáha ró jñúhun jeē cujéé ni ñi ñi i nuū ró siquī jeē suchí ró. Chi sa coo ró ñi ejemplo nuū ñáyuu cácañdije, jeē cúni i ndese váha cáhán ró, ndese váha sáha ró, ndese cúndáhú ni ró jnáhan ró, ndese cándije ró, ndese iyó ndoo ánuá ró. <sup>13</sup> Te níni ndé ná tu jinū rí nuū ró, te condihví ni ró jeē cáhu ró tutu ñi nuū hermano cándutútú, jíñ jéé stihví ni ró i, jíñ jéé stéén ró nuū i. <sup>14</sup> Ma cúhuun ni ró jinū tǎhū jeē ni jéhe Yaā Dios nuū ró jeē nácani ró jñúhun ya. Chi tǎca téé jéñnu cándiso jñíñu nuū ñáyuu cácañdije, ni casóo de ndaha de xiní ró, te ni sáha Yaā Dios jeē ni cacahán de jeē súcuau condiso jñíñu ró.

<sup>15</sup> Núu súcuau te cocuu ró jíñ tǎca jñíñu yáha, te condihví ni ró jíñ, náváha cuni tǎca ñáyuu jeē váha íje ró cuáhán ró jíñ. <sup>16</sup> Coo cuidado ró jeē caca ndaá ró jíñ jéé stéén váha ró jñúhun ya, te cuiñi níhín ró jíñ ndíhi. Chi núu súcuau sáha ró te quendóo váha ánuá maá ró jíñ ñáyuu chuhun ni jñúhun cáhán ró.

*Ndese sáha váha yó jíñ ñáyuu cácañdije*

## 5

<sup>1</sup> Ma cúxeēn ró nuū tǎca téé jéñnu, chi sa cahán váha ró jíñ de jeē ma stívi de, nájnúhun cáhán ró jíñ tǎtá ró. Te tǎca téé suchí, suni cahán váha ró jíñ de nájnúhun jíñ ñani ró. <sup>2</sup> Te suni súcuau cahán ró jíñ tǎca ñahan jéñnu, nájnúhun jíñ náná ró. Te suni súcuau jíñ tǎca ñahan súchí, nájnúhun jíñ cuáha ró, te yíñúhún ndajñúhun ró jíñ ña.

<sup>3</sup> Te ñayuu cácañdije na cuáha i jeē jíni ñúhún ñahan ni caquendóo ndáhú, te núu ni quendóo ndáhú ndije ña jeé tú na ñayuu condito ña. <sup>4</sup> Chi ñi ñahan ni quendóo ndáhú, núu iyó séhe ña chí séhe chání ña jeé jéváha, te na cóto máa i ña. Chi cánuú cutúhva i jeé xihna gǎ nuū ñáyuu vehe i squícu i coto i. Te na nácosto i náná i tǎtá i siquī jeē ni cacondito ña i. Chi yáha cúu jñíñu váha jeē núnjahan ni Yaā Dios. <sup>5</sup> Te ñi ñahan ni quendóo ndáhú ndije jeé máa ñi na ña, ñúhun ni ña jeé maá Yaā Dios condito ya ña, te tu jécuiñi ña

jeé jícan tǎhú ña nduú ñuú. <sup>6</sup> Te sa suhva núu máni ndíhví ni ña siquī tǎca jéé cúsiñ ni maá-ni ña, yúcuán na te vésú técu ña, te nájnúhun je ni jíñi ña. <sup>7</sup> Jñíñu yáha ndacu ró nuū ñáyuu, náváha ma cóo cuéchi siquī i. <sup>8</sup> Te núu ñi ñayuu tu ndíto i jnáhan vehe i, te víhyá gǎ ñayuu ñi vehe i, núu súcuau te sáha i jñíñu jeé tu quiñáhan jíñ jñúhun cándije yó, te cúu i ñi jeé neé gǎ vésú ñayuu tu cácañdije.

<sup>9</sup> Te ñahan viuda cuu quívi síhví ña nuū lista ñayuu jeé cáchindéé ñáhán ró jíñ xúhun, te núu je ni jíñu ña uní xico cuiyá, te núu ni íyo ñi-ni yí ña. <sup>10</sup> Te suni cánuú jéé cua-jñúhún ñáyuu ña jeé váha jñíñu ni sáha ña, núu jeé ni scuéñnu váha ña séhe ña, jíñ jéé ní jéhe núu ña vehe nuū ñáyuu cájica, jíñ jéé ní jeñíñu ña nuū hermano cácañdije, jíñ jéé ní chindéé ñáhán ña ñayuu cándoho jñíñúndóo, jíñ jéé ni sáha ña tǎca gǎ jñíñu váha.

<sup>11</sup> Te tǎcá ñahan viuda jeé iyó suchí gǎ, chi ma soó ró síhví ña nuū lista. Chi sanaa te nducú ña jeé cúsiñ ni maá-ni ña, te ma cóndihví ni ña siquī Cristo, chi cuu ni ña condeca tucu ña té. <sup>12</sup> Te súcuau jeconde cuéchi siquī ña, chi tu ní squícu ña jeé ni jéñúhun ña ná ni jecosó síhví ña nuū lista. <sup>13</sup> Te suni caca cuu ña tǎcá-ni vehe te quee cúxí ña. Te nasúu máni jeé cáca cúxí ña, chi suni siquī jeé sajnúhún ña, te quívi nduu ña cahán ña jñúhun jeé tu iyó váha jeé cahán ña. <sup>14</sup> Jeé yúcuau cúni rí jeé tǎcá ñahan viuda jeé iyó suchí, na nándaña ña, te scuéñnu ña séhe, te coto váha ña vehe ña, náváha ñayuu cácuu contra ma cúu cahán i siquī ña. <sup>15</sup> Chi sava ñahan viuda jeé ni cájica yátá ña te sáha ña jñíñu jeé cuni Satanás.

<sup>16</sup> Te núu ñi tée chí ñi ñahan cándije, núu iyó ñahan viuda vehe i, te na cóto máa i ña. Te ma cóndee gasto ña siquī grupo ñayuu cácañdije, náváha cuu cuáha váha i nuū ñahan viuda jeé tu ndé ñi coto ña.

<sup>17</sup> Te tǎca téé jéñnu cándito ñayuu cácañdije, na jécunaá doble yáhu de, te núu cándihví ni de cástéén de cácanaci váha de jñúhun ya. <sup>18</sup> Chi cúu nájnúhun cáhán tutu ñi: Ma cánda stiquí caxín tí trigo, núu ma cuáha ró jéé cáji tí. Te suni cáhán: Tée jeé sájñiñu tǎtú, jíñi ñúhún quiyáhu de, áchí.

<sup>19</sup> Ma cuajñúhún ró te núu jéquin ñayuu cuéchi siquī ñi tée jéñnu cándito ñayuu cácañdije te núu tu iyó úu chí úni testigo. <sup>20</sup> Te núu casáha ñayuu cuéchi, te cánuú cúxeēn ró nuú i, jíto jíñúu ndíhi ñayuu, náváha na cónso íyo sava ga i. <sup>21</sup> Te cáhán níhín rí jíñ ró, jíto máa Yaā Dios jíñ Jítoho yó Jesucristo jíñ tǎca ndajéhé yá jeé ní nacáji ya: Squícu váha ró jñíñu yáha, te ma sáha ró cuenta ndese cúu ñi ñi i, chí inuú-ni sándaá ró siquī ndíhi-ni i. <sup>22</sup> Ma cáni yachí ró ñi tée jeé condiso jñíñu de nuū ñáyuu cácañdije, chí xihna gǎ coto ndee ró de. Chi sanaa te stívi de, te cuéchi de

suní condee siquĩ rō jíin de. Te coto ró máá ró jeé ma quívi ró jíin jniñu neé.

<sup>23</sup> Te siquĩ jeé núu-ni núu-ni cúhú chíi ró, te ma cóho ga rō máni ndute, chí suní coho ró jecu vino.

<sup>24</sup> Cuéchi sava ñayuu chí je íyó ndijin nde ná tu quívi i nuú cúndaá cuéchi i. Te cuéchi sava ga i chí cúcuéé te natúu nahín. <sup>25</sup> Te suní súcuan táca jniñu váha, chí íyó ndijin. Te vésú ná tu natúu jniñu váha ún, te ma cúu quisáhi níí cáni, chí natúu nahín.

## 6

<sup>1</sup> Táca ñayuu cácuu mozo, na cóo yíñúhún váha i nuú patrón i, náváha ma cahán neé ñayuu siquĩ Yaá Dios jíin siquĩ jnũhun ya jeé castéén yó. <sup>2</sup> Te mozo jeé yíhi nuú patrón cáandíje, ma cáni ní i jeé cúhva-ni sáha yíñúhún i nuú de siquĩ jeé hermano cáandíje cácuu de. Chí sa cuajniñu váha ga i nuú de, chí tēe cándíje tēe maní i jíin cúu táca tēe un jeé sájniñu i nuú. Jnũhun yáha stéén rō te stíhvĩ ní rō i.

*Siquĩ jeé chíñúhún váha yó yá te cusĩ ni yó jíin cúhva jeé névaha-ni yó*

<sup>3</sup> Te núu ndé tēe stéén de jnũhun tú ndaá jeé tu quíjnáhan jíin jnũhun váha ndaá máá jítoho yó Jesucristo, jíin jnũhun ní stéén Yaá Dios jeé cáandíje yó, <sup>4</sup> núu súcuan te máni tēe ndúxí tēe tu jécũhun cuíti ní cúu de. Chí cánéé xíní de, chí máni cúni de tejnáhan de siquĩ táca jnũhun stéén de. Te táca un sáha jeé cácuuésún ní, jíin jéé cátejnáhan, jíin jéé cácahán ndeváha, jíin jéé cájeni neé ní siquĩ jnáhan, <sup>5</sup> jíin jéé máni cástáhan jnáhan. Súcuan cásaáha tēe jeé ní ndunéé xíní, jeé tu cájini jnũhun ndaá. Te cájeni ní de jeé nihín de cuehē xũhun siquĩ jnũhun cáandíje de stéén de. Na cújiyo ró núu ñayuu cándaá súcuan. <sup>6</sup> Te jendaá jeé yóhoy váha quéndoo yó te núu chíñúhún váha yó yá, te núu cúsiñ ní yó jíin cúhva jeé névaha-ni yó. <sup>7</sup> Chí tú na vé ní cácu yó jíin ñayivi yáha, ní tú na vé condiso yó quihín yó jíin núu na cúu yó. <sup>8</sup> Te núu íyó jéé cáji yó jeé cusúcún yó, te na cúsiñ ní yó jíin yúcuan-ni. <sup>9</sup> Chí ñayuu jeé cuní cucúcá, chí yachí quívi i cuéchi jeé jíto ndee jexeén i. Te quívi i jíin cuéhē jniñu cánéé jniñu stívi jéé ndíyo ní i. Te táca un sáha jeé tívi ñayuu te jnahnú ndetú i. <sup>10</sup> Chí jeé ndíyo ní yó xũhún, yúcuan sáha jeé quejéé táca jniñu neé. Te sava ñayuu jeé ndíyo ní xũhún, ní castóo i jnũhun cáandíje i, te ní canihín i cuehē ndasí jnúndóho.

*Jeé na ndúcu ndéyí yó siquĩ jnũhun cándíje yó*

<sup>11</sup> Te róhó chí tēe jéjniñu nuú Yaá Dios cúu ró, te cunu ró coto ró táca cuéchi yáha. Te condiquín rō jniñu ndaá, te chíñúhún váha ró Yaá Dios, te cándíje váha ró, te cundáhu ní rō jnáhan ró, te cuandeyí ní rō, te coo

vítá ní rō, <sup>12</sup> Te nducú ndéyí ró siquĩ jnũhun cándíje yó yá. Te cuiñi nihín ró jíin jnũhun jeé ní nihín tahú yó cotecu yó níí cáni. Chí jeé yúcuan cúu jeé ní cana ya rohó, te cáji ní cahán rō jeé váha cándíje ró yá, jíto jíinúú cuehē ñayuu. <sup>13</sup> Te cáhán nihín rí jíin ró, jíto máá Yaá Dios, Yaá jeé sáha jeé tēcu táca-ni, jíin Jesucristo, Yaá jeé cáji ní cahán yá ní nacani ya jnũhun váha nuú Poncio Pilato. <sup>14</sup> Squícu váha ró jniñu ndácu ya nuú rō, te ma stívi ró sáha ró, náváha ma cahán ñayuu cuéchi siquĩ rō. Te súcuan sáha ró níí ndé quívi ndíji Jitoho yó Jesucristo. <sup>15</sup> Chí quíji ndijin yá máá quívi jeé ní jeni Yaá Dios. Te Yaá Dios chí máá ñn-ni ya cúu Yaá yóhoy ndetú, te jniñi ya ndihí poder. Te cúu ya Rey nuú táca rey, jíin Jitoho nuú táca jítoho. <sup>16</sup> Te máñúhún-ni ya cúu jeé íyó níí cáni. Te ndéé yá ñn lugar nuú ndí ndaxín, nuú ma cúu quívi yó. Te ní ñn ñayuu ñayivi yáha tu ní jíto cuíti i nuú yá, te ní ma cúu coto i nuú yá. Te níí cáni na cóo yíñúhún yó nuú yá, chí jniñi máá yá poder níí cáni. Amén.

<sup>17</sup> Te cahán rō jíin ñayuu cucá ndajniñu ñayivi yáha, jéé ma cúndúxí i. Te ma tēnuú i xũhún i, chí yachí naa ún. Chí sa suhva na tēnuú i jeé coo váha i sáha Yaá Dios, Yaá tēcu, chí máá yá jéhe cuehē yá táca-ni jeé cúsiñ ní yó jíin. <sup>18</sup> Te ndacu ró jniñu nuú i jeé na sáha váha i, chí jeé sacúca ndíje i máá i cúu jeé sáha i táca jniñu váha. Te na cúu i ñayuu váha ní jeé cuáha i jeé cúu jnáhan i. <sup>19</sup> Te súcuan caya i cuehē jniñu váha jeé coo cucá i nuú yá níí tiempo jeé quíji. Te nihín tahú i cotecu i níí cáni.

*Jniñu sándíhi ndácu Pablo nuú Timoteo*

<sup>20</sup> Te róhó Timoteo, condito ró táca jniñu ní chíhi ya ndaha ró. Te ma quívi nduu ró jíin táca jnũhun cáhá-ni, cuenta ñayivi yáha, jíin táca jnũhun stáhu jéé cácahán i jeé jnũhun ndíchí ndáá cúu. <sup>21</sup> Chí sava ñayuu cándiquín táca jnũhun yáha, ní cajica yátá i ní castóo i jnũhun cáandíje i ya.

Te ñũhun ní rí jeé Yaá Dios na sáha ga yá jeé váha róhó. Súcuan na cóo. Amén.



## CARTA UU JEE NI TEE SAN PABLO APOSTOL NUU TIMOTEO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jñuhun jeē ni jéjnūhun ya jeē cótecu yō ní cáni siquī jeē yíhi yó ndaha Cristo Jesús. <sup>2</sup> Te tée ri carta yáha cuájeē nuū rō Timoteo, chi cúu ro nájñuhun sēhe ri jeē maní ri jín. Te ñūhun ni rí jeē Tatá yō Yaā Dios jín Jítoho yō Jesucristo, na sáha ga yā jeē váha rōhó, te cundáhú ni yā rohó, te sáha ya jeē coo ndeyí coo sī ni rō.

### *Jeē nácani de jñuhun Cristo*

<sup>3</sup> Níní tu náa ni rí cacán tahú rí jehē rō nuū Yaā Dios nduū ñuu, te nácuatáhú rí nuū yā jeē siquī rō. Chi nuū maá yá jejniñu ri, nájñuhun ni casáha táca jí rí, te iyó ndoo ánuá rí nuū yā. <sup>4</sup> Te núcūhun ni rí jeē ni ndáhyū rō ná ni quenda ri cuahān rí. Te cúu ni rí ndacoto jñahan yó, náváha cusí ndasí ni rí. <sup>5</sup> Te núcūhun ni rí jeē váha ndije cándije rō Cristo, nájñuhun ni cándije náná jéhu rō Loida, jín náná rō Eunice xíhna gā. Te cúcáhu ni rí jeē suni súcuan cándije máá rō vjna.

<sup>6</sup> Te jeē yúcuan nástíhví ni rí rohó jée na cóndíhví gā ni rō jín táhū jeē ni jéhe Yaā Dios nuū rō jeē nácani rō jñuhun ya. Te tahū un ní nihin rō ná ni tee ri ndaha ri xíní rō. <sup>7</sup> Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jñuhun, chi sa sáha jeē iyó fuerza ini yō, jín jée cundáhú ni yó jñahan yó, jín jée ndíto iyó xíní yō. <sup>8</sup> Núu súcuan te ma cúcanu rō nacani ndaā rō jñuhun máá Jítoho yō. Te suni ma cúcanu rō jeē siquī maá rí jeē íne ri vecāa siquī jñuhun ya. Chi sa cuāha rō jñuhun ndoho rō jín rí siquī jeē cánacani yó jñuhun jnáma ya yohó, núu ndese ni jéhe Yaā Dios fuerza ini yō. <sup>9</sup> Chi ni jnama ya yohó, te ni cana ya yohó jée coo ndoo ánuá yó cuajñíñu yó nuū yā. Te tu ní cána ya yohó siquī jeē váha ni sáha yó, chi siquī jeē ní tee ni maá yá jeē cundáhú ni yá yohó jée yíhi yó ndaha Cristo Jesús. Chi nde ná tu jecóo ñayíví, te je cundáhú ni yá yohó. <sup>10</sup> Te vjna jeē ní quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ni yá yohó. Chi máá Cristo ni snáa yá poder cuehyí jéhi yóhó, chi jín jñuhun jnáma ya yohó ni steén cají yá nuū yō jeē cótecu yō ní cáni chi ma jnahnú ndetū yō.

<sup>11</sup> Te ní jeni Yaā Dios ruhū jeē nácani ri jñuhun ún, te ní tají yá ruhū cúu ri apóstol jeē steén rí nuū ñayuu táca nación jeē tu jíní jñuhun ya. <sup>12</sup> Te siquī un cúu jeē ndóho rí táca jñúndóho yáha íne ri vecāa. Te tu cúcanu rí, chi jíní rí ndese Yaā cúu Yaā cándije rí, te

cúcáhu ni rí jeē cúu coto ya jniñu jeē ní chihi ya ndaha ri nde vjna te nde quíví ndíji ya.

<sup>13</sup> Te cuiñi nihin rō jín táca jñuhun ya jeē steén ndaā, suu jñuhun jeē ni steén rí nuū rō. Te caca rō jín jñuhun cándije yó, te cundáhú ni rō jñahan rō siquī jeē yíhi rō ndaha Cristo Jesús. <sup>14</sup> Te condito rō táca jniñu váha jeē ní chihi ya ndaha rō, sáha poder maá Espíritu Santo jeē ndeé ini yō.

<sup>15</sup> Je jíní rō jeē táca ñayuu cáyūcu Asia ni castóo i ruhū. Te uu i cúu Figelo jín Hermógenes. <sup>16</sup> Te jícán tahú rí jeē cundáhú ni Jítoho yō ñayuu vehe Onesiforo, chi cuehē jínu ni nanihín ni rí ní sáha de, te tu ní cúcanu de siquī rí jeē ní ine ri vecāa. <sup>17</sup> Chi sa suhva ná ní quiji de ñuu Roma, te ni nanducú yúcun de ruhū nde ni nanihín de ruhū. <sup>18</sup> Te jícán tahú rí jeē máá Jítoho yó cundáhú ni yá de quíví ndíji ya. Te je jíní váha máá rō ndese yóhoyó ni chindéé ñáhán de ruhū ná ni cahíyo rí ñuu Efeso.

*Jeē cúu yó nájñuhun soldado váha nuū Je-sucristo*

## 2

<sup>1</sup> Núu súcuan te rōhó, séhē mání, na cóo fuerza ni rō siquī jeē yíhi rō ndaha Cristo Jesús te sáha ya jeē váha rōhó. <sup>2</sup> Te táca jñuhun jeē ní jini rō ní cahān rí, jito jínúu ñayuu cuehē, jñuhun ún na nástéén rō nuū tēe cásquícu váha, náváha suni cuu steén tucu máá de nuū sáva ga í.

<sup>3</sup> Te rōhó na cuandeyí ni rō coto rō jñúndóho, chi cúu rō nájñuhun ñn soldado váha nuū Jesucristo. <sup>4</sup> Ni ñn soldado jeē ñn nuū guerra, tu sájñeñu de máá de jín jniñu máá de, chi cánuu jeē sáha de mání máá jée ndácu tēe ní tejniñu de. <sup>5</sup> Te suni súcuan tēe cásquícu deporte, ma nihín de premio te núu tú condíhví ni de cosíquí váha de máá modo chíjñiñu. <sup>6</sup> Te tēe sájñiñu nihin ñuhun, máá de cúu jeē nihín xíhna gā jeē cuáha itu. <sup>7</sup> Nacani ni rō siquī jeē cahān rí, te máá Jítoho yó sáha ya jeē jécūhun ni rō siquī ndíhi.

<sup>8</sup> Te cocuhun ndasí ni rō Jesucristo, Yaā ní quiji yucūn rey David, te ni natecu yá mehñu ndíyí, nájñuhun cahān jñuhun jnáma ya yohó jée nácani rí. <sup>9</sup> Te jeē siquī jñuhun un ndóho rí jñúndóho, te nde ní cajíhni i ruhū íne ri vecāa nájñuhun ñn tēe ni sáha cuéchi xeén. Te jñuhun Yaā Dios chi ma cúu cuhni i jeē ma cuité núu. <sup>10</sup> Núu súcuan te jéndeyí ni rí jito rí táca jñúndóho yáha siquī jeē cundáhú ni rí ñayuu jeē ní nacáji ya, náváha suni cácu máá i jeē quíví i ndaha Cristo Jesús, te quíhni i nuū cujéhu i ní cáni. <sup>11</sup> Chi ndaā cahān jñuhun yáha:

Núu vésú na cúu yō jeē siquī yá, te suni cotecu yō jín yá,

<sup>12</sup> te núu cuandeyí ni yó ndoho yó, te suni ndacu yó jniñu jín yá.

Te núu ma cuajnúhún yó yā, te suni ma cuajnúhún yá yohó.

13 Te vésú tu squícu váha yó, te máá yá chi máni squícu ya,

chi tu cúu sáfalta yā, chi squícu ya jeé ni cáhān ya.

*Tēe sájniñu squícu váha jíin jnúhun ya*

14 Jnúhun yáha na nástíhvi ni rō ñayuu, te cahān nihin rō jíin i, jito máá Jítoho yō, jeé ma téjñāhan i siquī tāca jnúhun sáa-ni. Chi tu ndé jéjniñu cuiti, chi sa stívi ñayuu jíni sōho. 15 Te nducú ndéyí rō jeé cuajnúhún Yāā Dios rohó, jeé cúu rō tēe sájniñu squícu váha jíin jnúhun ya, návāha ma cúcanu rō nuū yā siquī ní iin, chi váha nacani rō jnúhun ndaā yā. 16 Te ma quívi nduu rō jíin tāca jnúhun sáa-ni ñayívi yáha, chi suu sáha jeé ndúcuehé gā jniñu néé quívicoo ñayuu cácahān. 17 Te tāca jnúhun cástéén i chi cúu nájnúhun iin ndíhvi; xeén jeé sacáhú gá cuahān. Te Himeneo jíin Fileto cúu uú tēe jeé casáha súcuan. 18 Chi tēe un ní cajica yátá de nuū jnúhun ndaā, te cácahān de jeé jeé ní cuu ni canatecu ndívi. Te súcuan cácaha nuu de xini sava ñayuu cácañdije. 19 Te Yāā Dios ní jeni ya ñayuu máá yā, te iyó cutú ndaā i jeé ma cáca yátá i, nájnúhun yósó nuū tútu i: Je jíni Jítoho yō Yāā Dios tāca ñayuu jeé yíhi ndaha máá yā. Te suni cáhān: Tāca ñayuu jeé ndácunehen síhvi Cristo, na cújiyo i nuū jniñu néé, áchi.

20 Te ini iin vehe cáhnu iyó cuéhé cohō, nasūu máni cohō oro cohō plata, chi suni cohō yujnu cohō ñuhun. Te iyó jéé fino te iyó jéé corriente. 21 Te núu iin ñayuu sándoo i máá i jeé quenda i nuū tāca jniñu néé, te cuu i nájnúhun iin cohō fino. Te coo ndoo coo i i nuū Jítoho yō, te nihin jniñu i ndese cuní máá yā. Te coo túhva i jeé sáha i tāca jniñu váha.

22 Núu súcuan te cunu ró coto ró tāca jéé tú váha jeé cándiyo ni tēe suchí. Te condiquin rō jniñu ndaā, jíin jnúhun cándije ró yā, jíin jnúhun cundáhú ní, jíin jnúhun coyúcu máni jíin jnāhan. Te súcuan sáha ró ndé jíin tāca ñayuu ndoo ánuá jeé ndácunehen síhvi máá Jítoho yō. 23 Te ma quívi nduu rō jíin tāca jnúhun cánéé i jeé tu iyó cáji, chi je jíni rō jeé sáha jeé tejñāhan ñayuu. 24 Te mozo máá Jítoho yō, tú váha jeé tejñāhan de, chi sa suhva cánuú jéé coo váha ni de jíin tāca ñayuu. Te coo váha ni de stéén de, te cuandeyí ni de jíin i. 25 Te jíin jéé víta ni de te cani ichi de ñayuu nihni ní. Chi sanaa te nacani ni i sáha Yāā Dios, te jecúhun ni i ndese iyó jnúhun ndaā. 26 Te nducájí ni i te cácu i nuū jexeén jeé ní jniñu ún i, chi ni cundeyí jíin i jeé sáha i jeé cuní máá.

*Siquí ndese coo ñayuu sáha néé quívi cuándihi*

### 3

1 Te suni na jécúhun ni rō jeé quívi cuándihi te quee quívi coo jnúndóho. 2 Chi coo ñayuu jeé chiñúhún máá, te ndiyo ni i xúhún, te sátéyí i máá i, te sánduxí i máá i. Te cahān neé i siquī Yāā Dios, te cuníhni ni i nuū tatá i nuū naná i, te ma nácuatáhú i, te ma chiñúhún i Yāā Dios. 3 Te ma cóo maní i jíin jnāhan i ni ma cundáhú ni i. Te sájniñu i, te ma cúu casi i tāca jéé ndíyo néé ni i, te yōhyo xeén coo i, te quiti ni i coto i tāca jniñu váha. 4 Te suni nastúu i jnāhan i, te ma yúhú i sáha i cuéchi, te coo nduxí ndasí i, te nducú i jeé cúsi ní ña jíin i, te ma nducú i quívi i nuū Yāā Dios. 5 Te sáha-ni i jeé chiñúhún i ya, te casi i nuū poder yā jeé ma sáma modo i.

Ma quívi nduu rō jíin ñayuu casáha súcuan. 6 Chi sava tēe ún quívi de vehe te stáhú de tāca ñahan cánéé jéé iyó ndasí cuéchi. Te yachi quívicoo ña jíin tāca jnúhun tú ndaā jeé cúsi ní ña jíin. 7 Te vésú níni scuáha ña na-ni jnúhun, te tu cúu cuiti jecúhun ni ña jnúhun ndaā yā. 8 Te nájnúhun ni casáha tēe tásí Janes jíin Jambres jenahán, jeé ní canducú de casi de nuū Moisés, suni súcuan sáha tēe ún, chi nducú de casi de nuū jnúhun ndaā. Chi coo nee jeé njñúni de, chi ma candije ndije de jnúhun cándije yó. 9 Te ma quée jniñu sáha de, chi cuni tāca ñayuu jeé tēe cánéé xini cácu de, nájnúhun ni cajini ñayuu jeé ni iyo néé xini ndindúú tēe jeé ní nducú casi nuū Moisés.

*Jniñu sándihi ndácu Pablo nuū Timoteo*

10 Te róhó chi jeé ni cutúhva váha ró ndese stéén rí, ndese jíca ndaā rí, ndese tēe ni rí sáha rí, ndese cándije rí yā, ndese néé rí paciencia, ndese cundáhú ni rí jnāhan rí, jíin ndese jéndeýí ni rí. 11 Chi ní cajito xeén ñayuu ruhú, te ní ndoho rí jnúndóho. Te jíni rō tāca jéé ní ndoho rí ñuu Antioquía, ñuu Iconio, jíin ñuu Listra. Te jíni rō ndese ni cajito xeén i ruhú. Te máá Jítoho yō ní jnama ya ruhú nuū ndíhi ún. 12 Chi ndaā cúu jeé tāca ñayuu jeé ndíhvi ní cuajniñu váha nuū Cristo Jesús, ndoho i jeé coto xeén ñayuu i. 13 Te ñayuu casáha jniñu néé jíin ñayuu castáhú, chi sa víhyá gā cocuu i jíin jniñu néé, chi stáhú i ñayuu, te suni candije máá i jnúhun stáhú.

14 Te róhó chi sa cuíni nihin ró jíin jéé ní cutúhva ró jíin jéé ní cucáhnu váha ni rō. Chi jíni rō ndese ñayuu cúu jeé ní cástéén nuū rō. 15 Chi nde ná lulí ró, te je jíni rō ndese cáhān tutu i jeé steén nuū rō ndese candije ró jeé ní jíhi Cristo Jesús jehé rō návāha cácu rō. 16 Te níf tutu i cúu jnúhun jeé ní cáhān Yāā Dios, te váha nihin jniñu jeé steén nuū yō, jeé cahán nuū yō, jeé náchuhun ichi yóhó, jíin jéé scuéhnu yóhó jíin jniñu ndaā, 17 návāha tēe cájejniñu nuū Yāā Dios, ije ni de te coo túhva váha de sáha de tāca jniñu váha.

## 4

<sup>1</sup> Te cáhán rí jín ró, jíto Yaā Dios jín Jítoho yō Jesucristo, Yaā quiji ndacu jniñu, te sándaā yā jniñu ñayuu cátecu jín ñáyuu ní cajihí. <sup>2</sup> Cáhán nñin rí jeē na nácani ró jnūhun ya, te stñví ní ró i candíje i. Te níni sáha ró súcuan núu núne i chí vésu tu núne i. Te sáha ró jeē na jécūhun ní i, te cahān rō nuū i, te caní ichí váha ró i, te jín cuéhē paciencia steén rō nuū i. <sup>3</sup> Chi quee tiempo jeē ma cuájnuhún cuiti ñayuu jnūhun ya jeē steén ndaā váha, chí sa cuajnuhún i jnūhun cúshí ní maá i, te nducú i cuehē maestro jeē steén nuū i máni jnūhun jeē núnahan ní i cuni nahín i. <sup>4</sup> Te cujiyo i nuū jnūhun ndaā, te condihví ní i táca jnūhun jeē maá cuento-ni cúu. <sup>5</sup> Te rōhó chí níni coo ndito ní rō, te cuandeyí ní rō jín jnúndóho, te condihví ní rō nacani ró jnūhun jnáma ya yohó, te squícu váha ró jín jniñu ya jeē sáha ró.

<sup>6</sup> Te ruhū chí je ní socó rí maá rí jeē cúu rí, te je cuacuyajni quiví cuu rí. <sup>7</sup> Te je ní cundeyí rí jeē ní nducú ndéyí rí siquí jniñu váha, te je ní jinu ní jica rí ñayívi yáha, te tu ní siáá rí jnūhun cándíje rí yā. <sup>8</sup> Te vijna je íyó túhva premio jeē níhín rí siquí jeē ní jica ndaā rí. Chí Jítoho yō cuáha ya un núu rí maá quiví sándaā yā jniñu, chí maá yá cúu juez ndaā. Te nasūu núu maá ñn ruhū cuáha ya, chí suni cuáha ya nuū táca ñáyuu jeē cúu ní i jeē ndíji ya chí maní i jín yá.

*Jeē cána Pablo quiji Timoteo nuū de*

<sup>9</sup> Nducú ndéyí ró quiji yachí rō nuū rí. <sup>10</sup> Chí Demas ní stóo de ruhū, chí ndíyo ní de ndajniñu ñayívi yáha, te cuahān de ñuu Tesalónica. Te Crescente chí cuahān de Galacia, te Tito cuahān de Dalmacia. <sup>11</sup> Te máá ñn na Lucas íne jín rí. Te jeē quiji ró, te condeca ró Marcos quiji ró jín de, chí váha cuajniñu de jeē chindéé ñáhán de ruhū jín jniñu ya. <sup>12</sup> Tíquico ní tají rí de cuahān de ñuu Efeso. <sup>13</sup> Te jeē quiji ró, te condaha ró cotón jeē ní stóo rí vehe Carpo ñuu Troas. Te suni condaha ró táca libro, te jeē cánuú gá cúu táca tutu ní tee máá rí.

<sup>14</sup> Alejandro, tēe cúu herrero, yōhyo xeēn ní sáha de jín rí. Te máá Jítoho yō cuáha ya yāhu de jeē súcuan ní sáha de. <sup>15</sup> Te condito ró máá ró nuū de, chí yōhyo ní cuu de contra siquí jnūhun cástéén yó.

<sup>16</sup> Te ná ní ine rí jeē xlhna ñúhún núu táca tóhō, te tú ní ñn tēe ní índichi jín rí, chí ndihí de ní castóo de ruhū. Te ñúhun ní rí jeē Yaā Dios cone cáhnu ní yā nuū de. <sup>17</sup> Te vésú súcuan te máá Jítoho yō ní chindéé ñáhán yá ruhū, te ní jēhe ya fuerza ini rí, te súcuan ní sínu rí ní nacani ndihí rí jnūhun jnáma ya yohó, ní cajini nahín ñáyuu táca nación tu jíni jnūhun ya. Súcuan ní jnama Jítoho yō ruhū nuū táca tēe xeēn. <sup>18</sup> Te jnama ga yā ruhū nuū táca jniñu neé, te condito ya ruhū

nde quiví rí andiví núu ndacu ya jniñu. Te na cáhán yō jeē yóhyo luu cújéhu ya ní cáni. Amén.

*Saludo jín bendición jeē sándihí*

<sup>19</sup> Te cahān rō jeē sándeýí ní Prisca jín Aquila, jín ñáyuu vehe Onesíforo, achí rí. <sup>20</sup> Erasto ní quendōo de ñuu Corinto. Te ní quendōo Trófimo ñuu Mileto, te cúhú de. <sup>21</sup> Te condihví ní rō quiji ró nde ná tu quejéé vico míjin. Sándeýí ní rō, achí Eubulo jín Pudente jín Lino jín Claudia jín táca gá hermano.

<sup>22</sup> Te ñúhun ní rí jeē maá Jítoho yō Jesucristo na cóo ya jín ró, te Yaā Dios sáha ga yā jeē váha rōhó jínánhan ró. Súcuan na cóo. Amén.

## CARTA JEE NI TEE SAN PABLO APOSTOL NUU TITO

<sup>1</sup> Máá rí cúu Pablo, mozo Yaā Dios jíin apóstol Jesucristo, chí ni tají Yaā Dios ruhū jeē scándije rí ñayuu ní nacáji ya, návaha jecūhun ní i jñūhun ndaā yā jeē candíje yó, <sup>2</sup> te cocuhun ní i jeē cótecu i níí cáni. Chí nde ná tu jecōo ñayíví te ní jejnūhun Yaā Dios jeē cótecu yó, te iyó ndaā jñūhun ní cahān yā. <sup>3</sup> Te vijna jeē ní quee tiempo ní jeni ya, te steén caji yá jñūhun ya nuū yó. Te ní tejníñu ya ruhū ní ndacu ya jniñu jeē nácani rí jñūhun ya ún. Chí Yaā jnáma yóhó cúu ya. <sup>4</sup> Te tée rí carta yáha cuájeē nuū rō Tito, chí nájñūhun sēhe rí cúu ndije rō siquí jeē inuū-ní candíje yó yá. Te ñūhun ní rí jeē Tatá yō Yaā Dios jíin Jitoho yō Jesucristo, Yaā jnáma yóhó, na sáha ga yá jeē váha róhó, te cundáhú ní yá rohó, te sáha ya jeē coo ndeyí coo sñ ní rō.

### *Jniñu ya jeē ní sáha Tito nde isla Creta*

<sup>5</sup> Te ní stóo rí rohó ndé isla Creta, návaha sándaā rō siquí jniñu jeē cúmani gā cundaā, te caní rō táca tée jéhu condito ñayuu cácaandíje táca ñuu, nájñūhun ní ndacu rí jniñu nuū rō. <sup>6</sup> Te tée jéhu un cánuú jeē ma cóo ní ñin jeē nihín ñayuu cuēchi siquí de. Te cánuú coo ñin-ní ñasihí de. Te sēhe de cánuú cuu i sūchi cácaandíje jeē ma nihín ñayuu cuēchi siquí i jeē tu sáha váha i chí jée níhni ní i nuū de. <sup>7</sup> Chí tēe cácujeñu cándiso jniñu nuū ñayuu cácaandíje, cánuú caca ndaā de chí cándiso jniñu de siquí jniñu Yaā Dios. Te ma satéyí de máa de, ma quití yachí ní de, ma cúu de tēe nájini, ma cuajnáhan de, te ma ndiyo ní de xūhún. <sup>8</sup> Chí sa cánuú jée níni cuáha núu de vehe nuū ñayuu cájica, te níni sáha de jniñu váha, te ndito coo xiní de, te coo de tēe ndaā, te coo ndoo ánuá de, te casi de modo jeē cuní maá de. <sup>9</sup> Te cánuú cuiñi níhin de jíin jñūhun ndaā jeē ní scuáha de, návaha cuu stíhví ní de ñayuu jíin táca jñūhun ndaā váha, te suni cuu sáha de jeē jécūhun ní ñayuu cácuu contra, te casi i yuhu i.

<sup>10</sup> Chí iyó cuéhē ñayuu níhni ní, te cástéén i inga modo jéni ní maá i jeē súcuán cácu ñayuu, te stáhú i ñayuu. Te jnáhan yó hebreo cúu jeē víhyá gā casáha súcuán. <sup>11</sup> Te cánuú jée casi rō yuhu táca tée ún, chí cástéén de jñūhun jeē tu iyó váha stéén de, chí cuní de níhni de xūhun siquí ún. Te súcuán sáca nuu de xiní ndihí ñayuu táca vehe.

<sup>12</sup> Te ñin tēe isla Creta jeē nácani jñūhun, ní cahān de siquí jnáhan ñuu de: Jnáhan yó ñayuu Creta, chí máni ñayuu stáhú cácuu i, te nájñūhun quití xéén casáha i, te máni ndíhví ní i caji cuéhē i, te cúxí i, áchí de. <sup>13</sup> Te ndaā cúu jñūhun ní cahān tēe ún. Jeé yúcuán na

cúxeēn rō nuū i, návaha ndaā váha na cándije i. <sup>14</sup> Te ma sáha i cuenta táca jñūhun ní catava jnáhan yó hebreo, jeē maá cuento-ni cúu, ní ma siquícu i jniñu cándacu tēe ní quendacoo nuū jñūhun ndaā.

<sup>15</sup> Te ñayuu jeē ní ndundoo jeē níjnūni, máni modo iyó ndoo iyó váha jéni ní i jíto i táca-ni. Te ñayuu tu cándije jeē tu ní ndundoo jeē níjnūni, máni jéni ní i ñin modo tú ndoo tú váha siquí táca jée jíto i. Chí nde jeē níjnūni i jíin ánuá i iyó jnéhén. <sup>16</sup> Te vesú cácahān i jeē jíini i Yaā Dios, te jíin jniñu casáha i te jíini yó jeē tú ndije i. Chí ñayuu ndeváha ñayuu níhni ní cácuu i, te tu cúu sáha i ní ñin jniñu váha.

### *Jñūhun ya jeē steén ndaā váha*

## 2

<sup>1</sup> Te máá rō chí níni na cahān rō táca jñūhun jeē quijnáhan jíin jñūhun ya jeē steén ndaā váha. <sup>2</sup> Te cahān rō jíin táca tée jéhu jeē na cóo caji ní de, te sáha yíñúhún de, te ndito coo xiní de, te candíje níhin de jñūhun cundáhú ní yá de, te cundáhú ní de jnáhan de, te cuandeyí ní de. <sup>3</sup> Te suni súcuán táca ñahan jéhu, na sáha yíñúhún ña, te ma sajnúhún ña, te ma nájini ña. Te na stéén ña táca jée váha. <sup>4</sup> Te na stéén ña nuú táca ñahan sūchí jée coo maní ña jíin yí ña jíin sēhe ña. <sup>5</sup> Te ndito coo xiní ña, te coo ndoo ánuá ña, te coto váha ña jniñu vehe ña, te coo váha ní ña, te cuatáhú ña nuú yí ña, návaha ma cahān neé ñayuu siquí jniñu Yaā Dios.

<sup>6</sup> Te suni súcuán stíhví ní rō táca tée sūchí jeē ndito na cóo xiní de. <sup>7</sup> Te róhó, cuu rō ñin ejemplo nuú de jeé sáha rō táca jniñu váha. Te jeé steén rō nuú de te ndaā steén rō de coo ndije ní rō. <sup>8</sup> Te ndaā váha stéén rō, návaha ma cúu cahān ñayuu siquí. Te súcuán te cucanu ñayuu cácuu contra, chí ma cúu cahān i ní ñin cuēchi siquí rō.

<sup>9</sup> Te cahān rō jíin ñayuu cácuu mozo jeē na cuatáhú i nuú patrón i, te na sáha i táca jniñu jeé núnahan ní de, te ma cahān maá i núu ndacú de jniñu nuú i. <sup>10</sup> Te ma sacuíñá i ndajniñu de, chí na cúu i ñayuu ndaā ndije, návaha jíin táca jniñu jeé sáha i, te cuní táca ñayuu jeé yóhoyo luu cúu jñūhun jeé steén siquí Yaā Dios, Yaā jnáma yóhó.

<sup>11</sup> Chí vijna je ní steén Yaā Dios ndese sáha ya jeé váha ñayuu, chí cuní yá jnama ya ndihí ñayuu ñayíví. <sup>12</sup> Te jñūhun jeé váha ní yá jíin yó, suu stéén nuú yó jeé na siáá yó jniñu neé jíin táca jée ndiyo neé ní yó. Te ndito na cóo xiní yó ini ñayíví yáha, te caca ndaā yó, te chíñúhún váha yó Yaā Dios. <sup>13</sup> Te suni stéén nuú yó jeé cocuhun ní yó jeé quéndoo ndetú yó jeé quíji máa quíví jéhu jeé quénda ndijin Yaā Dios, Yaā cujéhu ndasí, suu Jesucristo, Yaā jnáma yóhó. <sup>14</sup> Chí ní socó yá maá yá jehé yó, návaha jnama ya yohó núu táca jniñu neé, te sándoos ndihí ya anuá yó jeé cuu

yó ñáyu maá yá, te condihví ni yō sáha yó jniñu váha.

<sup>15</sup> Tāca jnúhun yáha cánuú stéén rō, te stíhví ni rō i, te cahān rō nuū i, chí súcuan ndiso jniñu rō. Te ma cuáha ro jnúhun jeē sajeē ni ni ñin i nuū rō.

*Ndese cánuú sáha ñayuu cácandíje*

### 3

<sup>1</sup> Te na nástíhví ni rō i jeē cuatáhu váha i nuū tēe cácujeñu jín tēe cándiso jniñu ñuu. Te na squicu i jniñu cándacu de, te coo ñamā ni i sáha i tācá jniñu váha. <sup>2</sup> Te ma cahān neé i síquí ni ñin ñayuu, te coyūcu mání i jín ñáyu, te coo váha ni i, te coo vītá ni i jín ndíhi ñayuu.

<sup>3</sup> Chí máá yó suni ni cuu yó ñáyu canéé jeē tu jécūhun ni nde saá, te ni cacuníhni ni yō nuū Yāā Dios. Te ni cacandíje yó táca jnúhun tú ndaā, te ni cajejniñu saá-ni yó núú táca jéé ní ndiyo neé ni yō jín na-ni jniñu ni cusí ni yō. Te ni cajica yó jín jniñu neé jín jnúhun cuésún ni. Chí ni cajito uhū ñayuu yohó, te ni cajito uhū yō i. <sup>4</sup> Yūcuán na te Yāā Dios, Yāā jnáma yóhó, ní steén yā jeē váha ni yā te cundáhu ni yā ndíhi ñayuu ñayíví. <sup>5</sup> Te ni jnama ya yohó, te tú na jniñu váha ní cásáha yó jéé jnáma ya yohó, chí sa síquí jeē ní cundáhu ni yā yohó. Chí ni nacate ya anuá yō, te súcuan ni nacacu jeé yó, te ni ndujeé yó ni sáha ya jín máá Espíritu Santo.

<sup>6</sup> Te yōhyo ni cunuú Espíritu Santo ini anuá yō, jeē ni sáha Yāā Dios jeē jín Jesucristo, Yāā jnáma yóhó. <sup>7</sup> Te súcuan te ni ndahva yā cuēchi yó síquí jeē váha ni yā, te nihín tahú yó cotecu yō ní cáni, nájnūhun ñúhun ni yō.

<sup>8</sup> Ndaā cúu jnúhun yáha, te cúni rí jeē niní cahān nihín ro táca jnúhun yáha, návaha ñayuu cácandíje Yāā Dios, na cóndihví ni i cocuu i jín jniñu váha. Chí iyó váha táca jéé yáha, te nihín jniñu jeē quéndōo váha ánuá ndíhi ñayuu. <sup>9</sup> Te ma quívi nduu rō jín táca jnúhun cánéé íi, jín jnúhun síquí ndese vēji táca jíi yō, jín táca jnúhun sáha jeē cátejnhān i cácahān i jeē cánuú squicu yó ley Moisés. Chí máni jnúhun cáhá-ni jeē tu nihín jniñu cúu.

<sup>10</sup> Te núu iyó ñayuu jeē sáha jeē ndusín ini ñayuu cácandíje, te cahān rō nuū i ñin uū jínu, te núu ma chúhun ni i, te quenehen rō i. <sup>11</sup> Chí jíni rō jeē ñin ñayuu sáha súcuan, stívi ndasí i chí jíni i jeē tú váha sáha i, te jeé yúcuan jécondée cuēchi síquí i.

*Jeē cána Pablo quiji Tito nuū de*

<sup>12</sup> Te jeē tají rí Artemas chí Tíquico cuajeé de, yūcuán na te nducú ndéyí rō quiji rō núu rí ñuu Nicópolis, chí je ní cundaā ni rí jeé yúcuan condee rí tiempo mījin. <sup>13</sup> Te condihví ni rō chindéé ñahān rō Zenas, tēe cúu abogado, te suni súcuan Apolos. Chí cuáha rō jéé jíni ñúhún de jeé quíngoo ga de

ichi nuū quihín de. Te coto rō jéé ma cúmaní ni ñin nuū de. <sup>14</sup> Te ñayuu cáhīn jín yó, cánuú cutūhva i sáha i tācá jniñu váha, te chindéé ñahān i ñayuu cúmaní nuū, návaha ma cótecu saá-ni i.

*Saludo jín bendición jeē sándíhi*

<sup>15</sup> Tāca ñayuu cáyūcu jín rí yáha, cácahān i jeē sándeyí ni rō. Te cahān rō jeē achi rí jeē sándeyí ni ñayuu jíñā jeē maní yō jíni síquí jeē cácandíje yó. Te ñúhun ni rí jeē na sáha ga Yāā Dios jeē váha rōhó jínhan rō. Súcuan na cóo. Amén.

## CARTA JEE NI TEE SAN PABLO APOSTOL NUU FILEMÓN

<sup>1</sup> Máá rí cúu Pablo, te íne ri vecãa jeë siquí jnúhun Cristo Jesús. Te jíin hermano yō Timoteo cátee ri carta yáha cuájeë nuū rō Filemón. Chi cúu rō téee jeë cáhiyo maní rí jíin, chi chindéé ñájnánhan rō jíin rí siquí jníñu Yaã Dios. <sup>2</sup> Te suni cátee ri carta yáha nuū ñáyyu cácan díje cándutútu ini vehe rō, te suni nuū hermana yō Apia, jíin nuū Arquipo, téee chindéé ñájnánhan jíin yō siquí jníñu cánducú ndeyí yō jíin. <sup>3</sup> Te cáñuhun ni rí jeë Tatá yō Yaã Dios jíin Jítoho yō Jesucristo, na sáha ga yá jeë váha rōhó jínánhan rō, te sáha ya jeë coo ndeyí coo sñ ni rō.

*Tēe cúndáhú ni te cándíje váha cúu Filemón*

<sup>4</sup> Te jeë jíicán tahú rí nuū Yaã Dios te tu náa ni rí cacãñ tahú rí jehē rō, te níni nácuatáhú rí nuū yá jeë siquí rō. <sup>5</sup> Chi níhin rí jnúhun jeë váha cándíje rō jnúhun cúndáhú ni Jítoho yō Jesús rohó, te cúndáhú ni rō táca ñáyyu yñi ndaha Yaã Dios. <sup>6</sup> Te jíicán tahú rí jeë ñáyyu ni cacandíje siquí jeë cándíje máá rō, na jécúhun váha ga ni i siquí táca jéë váha jeë sáha ya yohó jeë jíin Cristo Jesús. <sup>7</sup> Chi cúsiñ ndasi ni rí te iyó ndeyí ni rí, hermano, siquí jeë cundáhú ni rō ñáyyu cácan díje. Chi máá rō ni sáha jeë ní ndusiñ ni i.

*Jeë jíicán Pablo ñin favor jehē Onésimo*

<sup>8</sup> Núu súcuan te cáhán ndahú rí jíin rō, vēsú cuu ndacu ri nuū rō ndese cánuú sáha rō, chi cúu rí apóstol Cristo. <sup>9</sup> Te tuú chi sa cáhán ndahú rí jíin rō siquí jeë cáhiyo maní yō. Te cundáhú ni rō ruhū sáha rō jéë cuní ruhū Pablo, chi je jéñu rí, te íne ri vecãa jeë siquí jnúhun Cristo Jesús. <sup>10</sup> Te cáhán ndahú rí jíin rō jehē mozo rō Onésimo jeë ní jeen rō te ni jinu. Te vijna te cúu i nájnūhun sēhe ri, chi ni scándíje ri i ini vecãa yáhá.

<sup>11</sup> Te nde saá chi tu ní cúu i mozo squícu nuū rō, chi ni jinu i. Te nde vijna chi váha cuajníñu i nuū rō jíin núu rí. <sup>12</sup> Te nátají rí i najeë i nuū rō. Núu súcuan te cahán váha rō jíin i, te sáha rō cuenta jeë nájnūhun máá rí ni najinū, chi yōhyo maní rí jíin i. <sup>13</sup> Te cusñ ni rí núu jeë na cúu quendōo i jíin rí yáhá, náváha cuajníñu i nuū rí lugar máá rō níni jéë íne ri vecãa jeë siquí jnúhun váha ya. <sup>14</sup> Te tu ní cuní rí sáha rí súcuan, chi nde cuãha máá rō jnúhun. Chi nasūu jéë safuerza rí rohó, chi jeë váha ni rō te sáha rō favor jíin rí, nájnūhun cúsiñ ni máá rō. <sup>15</sup> Chi sanaa te jeë siquí yáha cúu jeë ní jinu i ni cujiyo i nuū rō jecu-ni tiempo, suu náváha ví quendōo i jíin rō sáha Yaã Dios. <sup>16</sup> Te vijna tuá cúu i ñin mozo jeë ní jeen rō, chi ni nduu i ñin jeë váha ga, suu ñin hermano jeë maní rō jíin. Te ruhū

chi yōhyo maní rí jíin i, te nagā ni cuu máá rō jeë ma cóo maní rō jíin i. Te nasūu jéë maní rō jíin ñin téee súcuan-ni, chi siquí jeë cúu i ñin hermano jeë cándíje nuū Jítoho yō.

<sup>17</sup> Te núu sáha rō cuenta jeë ruhū cúu jnánhan rō cándíje, núu súcuan te cahán váha rō jíin i jeë jinú i nuū rō, nájnūhun jeë ruhū cahán rō jíin. <sup>18</sup> Núu na-ni falta ni sáha i nuū rō, chí núu táú i nuū rō, te cacãñ rō chunaa máá rí. <sup>19</sup> Ruhū Pablo, jíin ndaha máá rí téee rí yáha jéë máá rí nachunaa. Súcuan cáhán rí vēsú cuu cahán rí jeë sa máá rō taú nuū rí sáha rō jéë cúsiñ ni rí siquí jeë ni scándíje rí rohó te ni cácu ánuá rō. <sup>20</sup> Núu súcuan, hermano, sáha rō favor yáha jíin rí siquí jeë cándíje rō Jítoho yō. Sáha rō jéë ndusiñ ni rí, siquí jeë cúu rō hermano cándíje Cristo.

<sup>21</sup> Te téee rí yáha núu rō, chí cúcáñu váha ni rí jeë cuatáhú rō, te nde vihyá gā sáha rō vēsú jeë ni jíicán rí. <sup>22</sup> Te suni jíicán rí jeë sátúhva rō núu cóndee rí, chí ñúhun ni rí jeë quenda rí yáhá te jeë rí nuū rō sáha Yaã Dios siquí jeë cájicãñ tahú rō jehē rí.

*Saludo jíin bendición jeë sándihí*

<sup>23</sup> Epafras, téee íne jíin rí vecãa jeë siquí jnúhun Cristo Jesús, cáhán de jeë sándeyí ni rō. <sup>24</sup> Te suni súcuan cácahán Marcos, jíin Aristarco, jíin Demas, jíin Lucas, téee cáchindéé ñájnánhan jíin rí siquí jníñu ya.

<sup>25</sup> Te ñúhun ni rí jeë Jítoho yō Jesucristo na sáha ga yá jeë váha rōhó jínánhan rō. Súcuan na cóo. Amén.

## CARTA JEE CUAHAN NUU ÑAYUU HEBREO

*Jeë ní tǎjǎ Yaā Dios Sēhe ya ni nacani ya jñūhun*

<sup>1</sup> Tijní jínu te tijní modo ni cahān Yaā Dios jín táca jíí yō nde jenahán, chí ni tǎjǎ yá tēe ni canacani jñūhun ya. <sup>2</sup> Te vijna te tiempo cuándihí yāha ní tǎjǎ yá maá Sēhe ya ni nacani ya jñūhun nuū yō. Te jín Sēhe ya ní sáha ya ñayívi jín táca gá, te ndívii jeë iyó ní chíhí ya ndaha Sēhe ya. <sup>3</sup> Te Sēhe ya yōhyo luu cújéhnú ya, nájñūhun luu cújéhnú maá yá. Te ndihí ndese cúu maá yá, suni súcuan cúu Sēhe ya. Te jín poder jñūhun ní cahān Sēhe ya te iyó cutú ndihí-ní. Te ní sándooyá yohó táca cuéchi yó, te sáa te ní cucōo ya lado váha mesa maá Yaā cújéhnú nde andíví.

*Jeë cújéhnú ga Sēhe Yaā Dios vésú táca ndajéhé yá*

<sup>4</sup> Te ní ndujéhnú ndasí gá Sēhe ya vésú táca ndajéhé andíví, chí ni nihín yá tahú jeë ndíso ya jniñú jéhnú ndasí gá vésú jniñú cándiso ndajéhé. <sup>5</sup> Chí súcuan ní cahān Yaā Dios jín Sēhe ya, te nasūu jín ndajéhé yá: Máá ró cúu Sēhe ri,

te vijna te ní sajéhnú ri rohó jéë cúu ri Tatá rō.

Te suni ní cahān yá jñūhun Sēhe ya, te nasūu jñūhun ndajéhé yá:

Máá ri cúu Tatá nuú Sēhe ri,  
te maá i cúu Sēhe nuū rí.

<sup>6</sup> Te suni ná ní tǎjǎ yá Sēhe ya cújéhnú, ní quiiji ini ñayívi yáha, te ní cahān yá:

Ndihí ndajéhé ri na chíñtúhún i Sēhe ri.

<sup>7</sup> Te ní cahān tucu ya jñūhun ndajéhé yá:

Nájñūhun quée tachí, súcuan cájica ndajéhé rí sáha ri,  
te táca un jéë cájiejniñú nuū rí, nájñūhun yáñuhūn cácuu.

<sup>8</sup> Te jñūhun Sēhe ya chí sa suhva cáhán yá:

Máá ró cúu Yaā Dios, te ndacu ró jniñú ní cáni,

te jniñú ndácu ró, máni jniñú ndaā cúu.

<sup>9</sup> Cúsñ ní rō jín jniñú váha, te jito uhū rō jniñú neé.

Jeë yúcuan ruhū, Yaā Dios maá ró, ní sáha ri jeë yóhyo ga cúsiñ ní rō vésú táca gá jeë iyó andíví.

<sup>10</sup> Te suni cáhán yá:

Máá ró cúu Jítoho, te nde xíhna ñúhún ní sáha ró jéë ní jécōo ñayívi.

Te andíví chí suni jeë ní sáha ró cúu.

<sup>11</sup> Te táca un chí naa, te maá ró chí ní cáni iyó ró.

Te táca un chí cutúhú nájñūhun cutúhú ñin sahma,

<sup>12</sup> te nacaquin jñahnū rō te nasama ró jínahán.

Te maá ró chí ma sáma cuiti rō,  
te quiví cótecu rō ma ndihí cuiti.

<sup>13</sup> Te súcuan ní cahān tucu yá jín Sēhe ya, te nasūu jín ndajéhé yá:

Cucōo ró lado váha ri nuū cújéhnú ró,  
te na sáha ri jeë quende rō poder táca jéë cájito uhū rohó.

Achí yá. <sup>14</sup> Te táca ndajéhé yá chí mozo-ní cácuu, te tǎjǎ yá cuangooyé chindéé ñáhán ñayuu jeë nihín tahú jeë jnama ya.

*Jeë ma cúhuun ní yō jín jñūhun jnáma ya yohó*

## 2

<sup>1</sup> Núu súcuan te cánuú jéë váha ga chuhun ní yō táca jñūhun ya jeë ní cajini yó, chí núu tuú te sanaa te scuíta yó. <sup>2</sup> Chí nde jenahán ní jejniñú ya ndajéhé yá ní castūhun jñūhun ya, te ní cajini ñayuu jeë iyó ndaā. Te ñayuu nihni ní jín ñayuu tu ní cájendetú jñūhun ún, vetu-ní ní canihín i castigo. <sup>3</sup> Te núu súcuan ní cuu, te yóhó, ¿ndese cácu yó núu ma chúhun ní yō jñūhun cánuú gá jeë jnáma ya yohó? Chí xíhna gá maá Jítoho yó ní nacani ya jñūhun yáha, te sáa te tēe jeë ní cajini nahín ní canacani ndaā tucu maá de nuū yó. <sup>4</sup> Te Yaā Dios suni ní chindéé ñáhán yá de jeë ní canacani de jñūhun ya. Chí ní sáha ya jín de jeë ní casáha de sñin sñin jniñú jéhnú jeë nahán náa ní yō jito yó poder yá. Te suni ní jéhe ya Espíritu Santo yá nuū ñin ñin, ndese ní nujnahan ní maá yá sáha yó.

*Jeë ní nduu Jesús jñáhan ñayuu*

<sup>5</sup> Te Yaā Dios nasūu núu ndajéhé yá ní jéhe ya jñūhun jeë condiso jniñú siquí ñayívi jéë quíji, chí sa suhva nuú Sēhe ya Cristo ní jéhe ya. Te siquí ñayívi un cúu jeë cahán rí yáha. <sup>6</sup> Chí suhva yósó núu tútu jeë ní cahān David jín yá:

¿Na vé cúu ñayuu jeë ñūhun ní ní i?

Te ndáhví ní ní siquí i, te maá ñayuu cúu i.

<sup>7</sup> Chí jecu-ní tiempo ní sáha ní jeë núu i nuú táca ndajéhé ní.

Yūcuán na te sajéhnú ní i te squéndōo yíñtúhún ní i,

te caní ní i jeë ndacu i jniñú nuú táca jéë ní sáha ní.

<sup>8</sup> Te ndihí jeë iyó chí sáha ní jéë cújéhnú i siquí.

Achí tutu. Te jeë ní sáha Yaā Dios jeë cújéhnú i siquí ndihí, núu súcuan te ma quéndōo ní ñin jeë ma cújéhnú i siquí. Te vésú súcuan te vijna te ná tu coto yó jéë cújéhnú i siquí ndihí jeë iyó. <sup>9</sup> Te jeë jini yō vijna cúu Jesús, Yaā jeë ní nduu núu jecu-ní tiempo nuú táca ndajéhé yá. Chí ní ndoho ya jeë ní jihí yá jéhe yó, te jeë yúcuan ní ndujéhnú luu tucu ya, te ndihí cáhíyo yíñtúhún nuú yá. Chí jeë váha ní Yaā Dios jín yó, jeë yúcuan ní jihí Jesús jéhe yó.

<sup>10</sup> Te ndihí jeē iyó chi cuenta Yaā Dios cúu, chí máá yá ni sáha. Te suni ndéca ya cuehē ndasí séhe ya jeē quihín i andiví núu luu kujéhu i jíin yá. Te váha níhín jníñu jeē ni jéhe ya jnūndóho nuū Jesús, chí jeē ní ndoho ya súcuan te cuu condeca váha ya ñayuu ni jnama ya. <sup>11</sup> Chí Jesús jeē ni sándoo ya i te máá i jeē ní candundoo i, chí ñn-ni Tátá i jíin yá. Te jeē yúcuan tu cúcanu Jesús jeē cahán yá hermano yá jíin i, vésú ndasí núu i. <sup>12</sup> Chí yósó núu tútu jeē ní cáhán yá jíin Tátá yá: Cachi na jnúhun ní núu táca hermano na, te mēñu núu cándutútú i cata ná ndese cújéhu ní.

<sup>13</sup> Te suni cáhán yá nájñuhun cácahán hermano yá:

Ruhú chí cándije ri yá.

Te cáhán tucu yá:

Yáha íne ri jíin táca gá séhe Yaā Dios jeē ni jéhe ya nuū rí.

Achí Jesús.

<sup>14</sup> Te nájñuhun cácahu ñayuu jeē cúu i yiqui cúnu, suni súcuan ní cacu Jesús, náváha cuu yá jehé yó. Te súcuan ní snáá yá poder jexeén jeē squíví ñayuu nuū cuéchi te jíin i. <sup>15</sup> Te ní cacu ya súcuan náváha cuu quenehen ya táca ñayuu chíji jnúhun jeē yuhú i cuu i. Chí ní vida i ndóho i sáha ún. <sup>16</sup> Te jendaá tu ní quíji ya jeē chindéé ñáhán yá táca ndajéhe yá, chí sa suhva jeē chindéé ñáhán yá ñayuu cácañje jeē ní nduu yucún Abraham. <sup>17</sup> Jeē yúcuan ní jini ñúhún nduu inuú yá jíin táca hermano yá, náváha cuu ya sutú kujéhu jeē squícu váha ya táca jniñu jehé i nuū Yaā Dios. Chí ní cundáhú ní yá i, te ní ndahva yá cuéchi i jeē ní sócō yá máá yá jehé i. <sup>18</sup> Chí suni máá yá ní ndoho ya jeē ní jito ndee jnūndóho ya, te jeē yúcuan cuu chindéé ñáhán yá ñayuu jeē jito ndee jnūndóho i.

*Cújéhu ga Jesús vésú Moisés*

### 3

<sup>1</sup> Hermano, ní cana Yaā Dios rohó, te cácuu ró ñayuu ndoo máá yá. Núu súcuan te na nácani váha ní ró siquí Cristo Jesús, Yaā cúu apóstol jeē ní tejniñu Yaā Dios, te suni cúu ya sutú kujéhu siquí jnúhun cácañje yó. <sup>2</sup> Chí ní squícu váha ya nuū Yaā Dios, Yaā ní tee jniñu un siquí yá, nájñuhun ní squícu váha Moisés nuū ñayuu jeē ní cáhán Yaā Dios jeē cácuu i ñayuu vehe ya. <sup>3</sup> Chí cújéhu ndasí gá Jesús vésú Moisés, nájñuhun cújéhu ndasí gá tēe sáha vehe nasúu máá vehe. <sup>4</sup> Chí táca vehe iyó téé ní sáha. Te máá Yaā Dios cúu jeē ní sáha táca jéé iyó. <sup>5</sup> Te Moisés ní squícu váha de jíin jniñu jeē ní cuu de mozo ní condito de ñayuu vehe Yaā Dios. Te ní castúhún de siquí táca jnúhun jeē steén yá tiempo quíji. <sup>6</sup> Te Cristo chí sa cúu ya máá Séhe jeē ndácu jniñu nuū ñayuu vehe Tátá yá, te váha squícu ya jeē ní jéjnühun ya nuū i. Te suni máá yó

cácuu ñayuu vehe ya, te núu na cuñí níhin yó jíin jnúhun cácañje yó ndé quíví sándhí, te núu cúñí ní yó jeē ñúhún ní yó táca jéé váha jeé coo.

*Jnúhun jeē ndetátu ñayuu Yaā Dios*

<sup>7</sup> Núu súcuan te na chúhún ní yó jeē cahán Espíritu Santo nuū tútu íi:

Vijna te núu cuni sóho ró jéé cahán Yaā Dios,

<sup>8</sup> te ma cúñihni ní ró nájñuhun ní cacunihni ní ñayuu jenahán.

Chí tu ní cájendetú i nuū yá ná ní cajica i nuū ñúhún téhé.

<sup>9</sup> Chí yúcuan ní casáha jíí ró jniñu jeē ní quítí ní rí, achí yá,

vésú ní cajito i táca jniñu ní sáha ri uū xico cuiyá.

<sup>10</sup> Jeē yúcuan ní quítí ní rí jíin ñayuu tiempo un.

Te ní cahán rí jeé máni jeé castóo i ichi ndaá, chí tu cácuu i condiquín i jnúhun ri.

<sup>11</sup> Te jeé yúcuan ní quítí ní rí, te ní cahán teyí rí

jeé ma quívicoo cuítí i nuū ndetátú i sáha ri. Achí yá.

<sup>12</sup> Núu súcuan hermano, coto má conéé ánuá ní ñn ró jéé cáca yátá ró jeé tuá cácañje ró Yaā Dios, Yaā técu. <sup>13</sup> Chí sa suhva táca quíví na stúhví jnáhan ní ró, níni gá iyó tiempo, náváha ma cúñihni ní ní ñn ró te stáhú róhó sáha ró cuéchi. <sup>14</sup> Te núu na cuñí níhin yó ndé quíví sándhí jíin jnúhun jeé ní quejéé yó jíin, yúcuán na te cuu yó jnáhan Cristo.

<sup>15</sup> Chí cáhán tutu:

Vijna te núu cuni sóho ró jéé cahán Yaā Dios, te ma cúñihni ní ró nájñuhun ní cunihni ní ñayuu jenahán.

Achí. <sup>16</sup> ¿Te ndé-ni cúu ñayuu jeē ní jini jnúhun ya te ní cunihni ní? Suu ndihí ñayuu jeé ní scácu Moisés jeé ní quendacoo Egipto.

<sup>17</sup> ¿Te ndé-ni cúu ñayuu jeé ní quítí ní yá nuū uū xico cuiyá? Suu ñayuu jeé ní casáha cuéchi, te ní cajihí i nuū ñúhún téhé. <sup>18</sup> ¿Te ndé-ni i cúu jeé ní cáhán teyí yá jeé ma quívicoo cuítí i nuū ndetátú i sáha ya? Suu máá ñayuu jeé tu ní cájendetú nuū yá. <sup>19</sup> Núu súcuan te jíin yó jeé tu ní cúu quívicoo i nuū ndetátú i, siquí jeé tu ní cácañje i ya.

### 4

<sup>1</sup> Te níni iyó gá jnúhun jeé ní jéjnühun ya jeé quívicoo ñayuu nuū ndetátú i sáha ya, te na cónso iyo yó jéé ma stíví yó, náváha tú coo jíin sava ró jéé ma níhín ró quíví ró.

<sup>2</sup> Chí suni máá yó ní cajini sóho yó jnúhun jeé jnáma ya yohó, nájñuhun ñayuu jenahán un. Te nuū máá i tu ní jéjníñu jnúhun ní cajini i ún, siquí jeé tu ní cácañje i. <sup>3</sup> Te yohó jéé cácañje, máá yó cúu jeé quívicoo yó nuū ndetátu yó. Te siquí ñayuu tu cácañje ní cahán ya suhva:



Jeē yúcuan ní quiṭi ní rí, te ni cahān teyí rí jeē ma quívicoo cuiṭi i nuū ndetātú i sáha ri. Te súcuan ni cahān yā vēsú je iyó túhva nuū ndetātú i nde ná ni jecōo ñayiví. <sup>4</sup> Chi súcuan yósó jnúhun nuū tútu ñi siquí quiṭi uxá:

Ni sínu Yaā Dios táca jéē ni sáha ya, te ni ndetātu yá quiṭi uxá.

<sup>5</sup> Te suni nuū tútu un yósó tucu:

Ma quívicoo cuiṭi i nuū ndetātú i sáha ri. Achí yá. <sup>6</sup> Núu súcuan te sava ñayuu chi quívicoo nahín i nuū ndetātú i. Te ñayuu jenahán jéē ní cajini jnúhun jeē jnáma ya i, tu ní quívicoo i siquí jeē tu ní cájendetú i nuū yā. <sup>7</sup> Jeē yúcuan ní jeni tucu ya inga quiṭi jeē quívicoo ñayuu, te quiṭi un cúu vijna. Chi ná ni yáha cuehē tiempo jeē ni cahān yā jín ñayuu jenahán, te yósó núu tútu jeē ni sáha ya jeē suni ni cahān David suhva:

Vijna te núu cuni sóho ró jéē cahān yā, te ma cúnihni ní ró núu súcuan.

Achí tutu. <sup>8</sup> Te nde jenahán ní squívi Josué ñayuu Israel un ñuu nuū ndetātú i. Te tu ní cúu squívi de i nuū ndetātu ánuá i sáha ya. Chi núu súcuan te ma cahán gā Yaā Dios jín táca ñayuu jeē vijna cúu quiṭi jeē quívicoo i nuū ndetātú i. <sup>9</sup> Núu súcuan te iyó túhva nahín ñi nuū ndetātu ñayuu Yaā Dios, nájnūhun ni ndetātu máá yá. <sup>10</sup> Chi ñayuu jeē quívicoo nuū ndetātú i jín yá, chi ndetātú i jeē ní casájniñu i, nájnūhun ni ndetātu Yaā Dios nuū jniñu ni sáha máá yá. <sup>11</sup> Núu súcuan te na ndúcú ndéyí yó quiṭi yó núu ndetātu yó un, te ma sáha ni ñi yó cuéchi jeē ma cándije yó, nájnūhun ni casáha i nde saá.

<sup>12</sup> Chi jnúhun Yaā Dios ndító técu te iyó poder. Chi cúu nájnūhun ñi espada jeē xeén ndindúú lado, chi nástuu cáji ndese iyó jéē níjnūni yó jín ánuá yó, nájnūhun sáha espada jeē jéhnde te nástuu nuū ñujnáhan yíqui jín meque. Te jnúhun ya nástuu ndihi ndese jéni ní yó jín ndese cúni yó sáha yó. <sup>13</sup> Te tu iyó ní ñi jeē yisáhi jeē tu jini máá Yaā jeē náquihin cuenta, chi ndihi-ni jini váha ya, te ndihi-ni túu ndijin nuū yā.

*Jesus cúu sutú cujéhu ga*

<sup>14</sup> Te cánevāha yó ñi sutú cujéhu ga, te je ni ndaa ya ní ndivi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuiṭi ñiñi yó jín jnúhun jeē ní cándije yó. <sup>15</sup> Chi névāha yó ñi sutú cujéhu jeē jito ndáhú yóhó jeē tu fuerza yó squícu váha yó. Chi nájnūhun ndóho yó jéē jito ndee jexeén yohó, suni súcuan ni ndoho ya jeē ní jito ndee un yá, vēsú tú cuiṭi cuéchi ya. <sup>16</sup> Núu súcuan te ma yūhu yó, chi na quiṭi yó yuhu mesa yā, cúu jeē cacān tahú yó. Chi maní yā jín yó, te cundáhú ní yá yohó, te siquí jeē váha ní yá te chindéé ñahán yá yohó táca jínu jeē jini ñúhún yó.

**5**

<sup>1</sup> Chi táca sútú jeē ní cujéhu jenahán, ni nacáji Yaā Dios de méhñu ñayuu, te ni jeni ya de jeē cuiṭi de nuū yā jehē ñayuu, te socó de ndajniñu jín quiṭi nuū yā jeē siquí cuéchi i. <sup>2</sup> Te cuu cahān vítá de jín ñayuu tu jécūhun ni jín ñayuu castívi, chi máá de suni tú na fuerza ñi de squícu váha de. <sup>3</sup> Jeē yúcuan cúu jeē suni cánuú sócō de quiṭi nuū yā jeē siquí cuéchi máá de, nasūu máá-ni jeē siquí cuéchi ñayuu.

<sup>4</sup> Te ni ñi tēe tu cúu sájéhu de máá de jeē cuu de sutú cujéhu, chi sa máá Yaā Dios cúu jeē nacáji ya de, nájnūhun ni nacáji ya Aarón nde jenahán. <sup>5</sup> Te suni súcuan Cristo, tu ní sájéhu ya máá yá jeē cuu ya sutú cujéhu, chi sa Yaā Dios ni sáha, chi ni cahān yā jnúhun yáha:

Máá ró cúu Sēhe ri, te vijna te ni sájéhu ri rohó jéē cúu ri Tatá ró.

<sup>6</sup> Te suni cáhán tucu ya nuū tútu ñi:

Ñi cáni cúu ró sútú, nájnūhun sutú Melquisedec jenahán.

<sup>7</sup> Te Cristo, ná ni condee ya ñayiví, te ni jicān tahú yā, te nde ní ndahyú yā te ni ndahyú cohó yá. Te ni cahān ndahú yá jín Yaā Dios, Yaā jeē cúu jnama ya jeē ma cúu yā nuú. Te siquí jeē yíñúhún ní chiñúhún yá Yaā Dios, te ní chindéé ñajnáhan Yaā Dios jín yá nuū jnúndóho ún. <sup>8</sup> Chi vēsú Sēhe Yaā Dios cúu ya, te ni jendetú yá ni ndoho ya ñi ñayiví, te súcuan ni jini yā ndese cúu jnúhun jendetú. <sup>9</sup> Te ná ni cuu ní squícu ndihi ya jeē ní jendetú yá, te ni cucutú jnúhun jeē jnáma ya táca ñayuu jendetú nuū yā, te cotecu i ní cáni. <sup>10</sup> Chi ní jeni Yaā Dios yá jeē cúu ya sutú cujéhu nájnūhun sutú Melquisedec.

*Siquí jeē ma cáca yátá i*

<sup>11</sup> Te iyó cuéhē jnúhun jeē castúhun rí siquí táca jéē yáha. Te yí cúu jeē jécūhun ní ró sáha ri, siquí jeē tu cácuni ró chuhun ní ró. <sup>12</sup> Te je ní cunahán cácandije ró, te jini ñúhún jéē cúu ró tée stéén nuú. Te tuú chi sa cájini ñúhún tucu máá ró tée stéén nuú ró táca jnúhun Yaā Dios jeē tú yí cuiṭi. Chi sa ní canduu ró nájnūhun sūchi yíquin jéē jini ñúhún caxin i, chi ná tu ije i caji i jeē ndáva. Súcuan cácuu ró chi ná tu ije ró jín jnúhun yí gá. <sup>13</sup> Chi núu máni máá nájnūhun sūchi yíquin jéxin cácuu ró, núu súcuan te tu cúu jécūhun váha ní ró jnúhun ndaa. <sup>14</sup> Te ñayuu jeē jé ni ije, chi cáyeji i jeē ndáva, cúu jeē ní cutúhva váha i te je cúu nacáji i jeē váha jín jéē neé.

**6**

<sup>1</sup> Núu súcuan te na yáha yó núu táca jnúhun Cristo jeē tú-ni yí, te na quiṭiñ yó nuū jnúhun yí gá, návāha na ije váha ní yó jín jnúhun ya. Te ma ndejéé tucu yó jín jnúhun jeē ní scuáha yó xilna gá, suu jnúhun jeē

nácani ni yō stóo yo cuéchi yó jéē cúu yō sáha, jíin jéē candíje yó Yaā Dios, <sup>2</sup> jíin síquī jeē jéndute, jíin síquī jeē soó ndaha xinī ñáyuu, jíin síquī jeē nátecu ndiyi, jíin síquī jeē jnahnū ndetū ñayuu ní cáni. <sup>3</sup> Núu súcuan te na yáha yó núu táca jeē yáha te quívi yó núu jnūhun yí gá, te núu cáñha Yaā Dios jnūhun.

<sup>4</sup> Chi iyó ñáyuu jeē jé ni jecūhun ni i, te je ni jini i táca jéē jéhe Yaā Dios, te je ni quívi i nuū jnūhun stéén Espíritu Santo, <sup>5</sup> te suni je ni jini i jnūhun vāha Yaā Dios jíin ndese coo poder yā tiempo quíji. <sup>6</sup> Te ñayuu un núu caca yátá i, te ma cúu ga ndejéé jeé i jeé nácani ni i. Chi jeé cáca yátá i cúu nájñūhun jeé nácani tucu i Sēhe Yaā Dios jíicá cruz, te cájēhe i jnūhun canu yā cájito ñayuu. <sup>7</sup> Te ñayuu chi cácuu i nájñūhun ñūhun jeé cúun vāha saū nuū te ndóyo vāha. Te núu cánecoo jeé vāha caji tēe casájnīnu, yūcuán na te cúsi ni Yaā Dios jíin. <sup>8</sup> Te núu máni iñu yóquin jíin yucū sajnēñu cánecoo nuū, núu súcuan te tu jéjnīñu cuiñi, te squéndōo ñi yā, te ñi quívi te cayū. Súcuan jnahnū ndetū ñayuu cájica yátá.

*Jeē ñūhun ni yō táca jéē vāha jeē coo*

<sup>9</sup> Te máá ró jíjnāhan ró hermano, vēsú cácahān rī súcuan jíin ró, te cácuahnu ni rī jeé cácuu ró ñayuu cuiñi ñihin, chi ñayuu ni jnama ya cácuu ró. <sup>10</sup> Te Yaā ndaā cúu Yaā Dios, te tu náa ni yā jniñu casáha ró. Chi síquī jeé cáhiyo manī ró jíin yá te ni cacundáhú ni ró hermano ró cácaníje, te ni cachindéé ñáhán ró i, te súcuan casáha ró ndé vjna. <sup>11</sup> Te cácani rī jeé níni súcuan sáha ga ná ñi ná ñi ró ndé quívi sándihí, chi jeé sáha ró súcuan te ñihin ró ndihí jeé cáñūhun ni ró. <sup>12</sup> Te cácani rī jeé ma cúhuun ni ró, chi sa ndacu ró ñáyuu cácaníje jeé jíin paciencia cándetu i, te jeé yúcuán ñihin tahu i táca jéé ni jéjnūhun ya.

<sup>13</sup> Chi quívi jeé ni jéjnūhun Yaā Dios nuū Abraham, te ni ndacunehen ya maá yá jeé ni jéjnūhun téyí yá, chi tuá na inga ndacunehen ya jeé cujéñu ga vēsú maá yá jeé cuu testigo yā. <sup>14</sup> Te ni cahān yā: Jendaā ndíje jeé vāha ndasí sáha rī jíin ró, te sáha rī jeé nducuehē ndasí yúcuñ ró, achí yá jíin Abraham. <sup>15</sup> Te jíin paciencia ni condetu de, te súcuan te ni ñihin de jeé ní jéjnūhun ya. <sup>16</sup> Te núu cáhān teyí ñáyuu, te ndacunehen i síhví ñi jeé cujéñu ga vēsú maá i. Te núu íyó ñi jnūhun jeé tu cácaníje jñāhan, te núu ñi tēe cáhān teyí de jíin síhví Yaā Dios, yúcuán na te jécuiñi jeé cátejñāhan. <sup>17</sup> Te suni súcuan Yaā Dios, chi ni jéjnūhun téyí yá nuū ñáyuu jeé cuāha ya tahu i. Chi ni cuni yā jeé cucáñu vāha ni i jeé ma nácani yátá ní yā síquī jeé ni jéjnūhun ya nuū i. <sup>18</sup> Chi ma nácani yátá cuiñi ní yā síquī jnūhun jeé ni cáhān yā uū jíinu, ñi jeé ni jéjnūhun ya, te inga jeé ni cáhān teyí tucu ya síquī suni jnūhun ún. Chi tu stáhú cuiñi yā. Te jeé yúcuán máá yó jeé ní tūhva

yó yá, chi yōhyo íyó ndeyí ni yō, te cáñūhun teyí ni yō jeé síquī cuu ya jeé ni cáhān yā. <sup>19</sup> Te síquī jeé súcuan ñūhun ni yō, te suu sáha jeé quéndōo ñihin ánuá yō jíin jnūhun ya, te quéndōo ndaā ni yō, nájñūhun quéndōo ñihin barco jeé ñi gancho yuū. Te sáha jeé cúu quívi yó andiví núu íi gá, nájñūhun cuarto íi gá jeé ni íyo ichi yátá sahma ni ndita caa ñi vehe íi jenahán. <sup>20</sup> Te ñi yúcuán chi xihna gá Jesús ni quívi, návāha nune ya ichi quívicoo yó. Te jeé yúcuán ní cáni cúu ya sutū cujéñu nájñūhun sutū Melquisedec.

*Jeé cúu Jesús sutū nájñūhun Melquisedec*

**7**

<sup>1</sup> Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā cujéñu téyí. Te ni jéjnāhan de Abraham ná ni nandico Abraham jeé ní cundeyí de ní cajejnāhan de jíin táca rey. Te ni jíicān tahu de jehē Abraham. <sup>2</sup> Te táca úxi ndajniñu jeé ní quende Abraham nuū táca rey un, ni jéhe de ñi ñi síquī un núu Melquisedec. Te síhví Melquisedec cuni cahān: rey jeé sáha jniñu ndaā. Te suni nání de rey Salem, te jnūhun Salem cuni cahān: jeé iyó ndeyí sí ní. Te jeé yúcuán suni nání de: rey jeé sáha jeé iyó ndeyí sí ní ñayuu. <sup>3</sup> Te tu cáhān tutu jnūhun tátá de ní náná de ní táca jíi de. Ni tu cáhān núu ni cacu de, ni núu ni jíhi de. Chi cúu de nájñūhun Jesús, Sēhe Yaā Dios, chi ní cáni cúu de sutū.

<sup>4</sup> Te condēhe jíjnāhan ró náa jéñu ni cuu Melquisedec, chi jíi jéñu yó Abraham ni jéhe de ñi ñi síquī táca jéé uxí nuū de síquī táca jéé ní quende de nuū rey un. <sup>5</sup> Te jíin yó jeé táca úxi ndajniñu ni canihñ ñayuu, ni cájēhe i ñi ñi síquī un ní caquihñ tēe cácuu sutū yucūñ Leví, nájñūhun cáhān ley Moisés. Te ni caquihñ de nuū ñáyuu cácuu jñāhan de, chi ñi-ñi yucūñ Abraham cácuu de jíin i. <sup>6</sup> Te Melquisedec nasūu yúcuñ Leví cúu de, te vēsú súcuan te ni quihñ de ñi ñi síquī táca jéé uxí nuū Abraham. Te suni ní jíicān tahu de jehē Abraham, vēsú cúu Abraham tēe jeé ní jéjnūhun ya nuū. <sup>7</sup> Te jíin vāha yó jéé tēe cújéñu ga cúu jeé jíicān tahu jehē tēe núu ga. <sup>8</sup> Te ñayívi yáha chi táca sutū cáquihñ de ñi ñi síquī táca jéé uxí nuū ñáyuu, vēsú cácuu te tēe cájihí. Te Melquisedec suni ní quihñ de, te máá de chi cáhān tutu íi jeé tēcu de. <sup>9</sup> Te suni cuu cahān yó jeé Leví, tēe jeé ní quihñ ñi ñi síquī táca jéé uxí nuū ñáyuu, suni nájñūhun nuū maá de ní quihñ Melquisedec ñi ñi síquī táca jéé uxí. Chi jeé ní jéhe Abraham nuū Melquisedec, suu cúu nájñūhun jeé suni ní jéhe de jeé síquí Leví jíin ndihí ga yucūñ de jeé quíji. <sup>10</sup> Chi yucūñ Abraham cúu Leví, te vēsú ná tu cacu de quívi jeé ní jéjnāhan Melquisedec Abraham,

te nájñuhun jeē ni jéhe máá de cúu jeē ni jéhe Abraham.

<sup>11</sup> Te yucūn Leví ni cane sutū Aarón jín táca gá sutū ní quijicoo. Te ni castéén de ley yá nuū ñáyu Israel jenahán. Te núu ní cúu sáha de jeē quendōo ndaā ñayuu jín ley un núu, te tuá cánuú jeē núcuñí inga clase sutū lugar Aarón jín yucūn de. Te inga clase sutū cúu Cristo jeē cúu ya nájñuhun sutū Melquisedec. <sup>12</sup> Te núu nucuiñí inga clase sutū, te suni cánuú sáma ley siquī yucūn de. <sup>13</sup> Núu súcuan te ni sáma ley un, chi cáhán tutu íi jeē Jítoho yō Jesús cúu inga clase sutū ún, te ni cacu ya chíji inga yucūn. Te yucūn ní quiji ya ún, tú ni ñn ní cúu sutū. <sup>14</sup> Chi jíni váha yó jéé chíji yucūn Judá ni cacu Jítoho yō. Te yucūn ún chi tu ní cáhán cuiñí Moisés jeē cánecoo sutū.

<sup>15</sup> Te cáji cúu jeē ní nucuiñí Cristo jeē cúu ya inga clase sutū nájñuhun sutū Melquisedec. <sup>16</sup> Te tu cúu ya sutū jeē ní cacu chíji yucūn Leví nájñuhun cáhán ley jenahán. Chi cúu ya sutū siquī jeē ndiso ya poder cotecu yá ñí cáni te ma cúu cuiñí yá. <sup>17</sup> Chi súcuan ni cahān Yaā Dios jñuhun ya: Ñí cáni cúu ró sutū, nájñuhun sutū Melquisedec.

<sup>18</sup> Núu súcuan te jñíñu jeē ní ndacu ley jenahán siquī sutū, chi ni naa vijna, chi tu ní ñhín jñíñu quendōo ní cáni. <sup>19</sup> Chi ley Moisés tu ní sáha jeē quendōo ndaā ñayuu. Te ni ñhín yō ñn jñuhun váha ga jeē ñuhun ni yō jeē ndáha Cristo cuēchi yó, te súcuan ni cuyajni yó núu Yaā Dios.

<sup>20</sup> Te jíni jéé ni cáhán teyí Yaā Dios te cúu Jesús sutū. <sup>21</sup> Chi táca gá tēe ún, nasūu jín jñuhun jeē ni cáhán teyí yá ní cúu de sutū. Te Jesús chi ní cahān teyí Yaā Dios jeē cuu ya sutū, chi súcuan cáhán tutu: Ni cahān teyí máá Jítoho yō Yaā Dios, te ma nácani yátá ni yá:

Ñí cáni cúu ró sutū,  
nájñuhun sutū Melquisedec.

Achí yá. <sup>22</sup> Núu súcuan te jíni Jesús ni cucutú ñn contrato váha ga vēsú ley jenahán. <sup>23</sup> Te táca gá sutū ún, chi ní iyo cuehē de, chi siquī jeē cájhi de te tu ní cúu cuiñí de ñí cáni. <sup>24</sup> Te Jesús chí cúu ya sutū jeē cuiñí ñí cáni, chí técu ya ñí cáni. <sup>25</sup> Jeē yucuan ndiso jñíñu ya jnama ya ñayuu quijicoo nuū Yaā Dios, cotecu i ñí cáni. Chi ñí cáni técu yá te cáhán yá jehé i jíni Yaā Dios.

<sup>26</sup> Núu súcuan te váha ndasí sutū kujéñu cúu Jesús, jeē nájñuhun jíni ñuhún yó. Chi sutū íi cúu ya, te tú na cuēchi ya, te íyó ndoo ya, te tu cúu ya jñáhan ñayuu casáha cuēchi, te kujéñu téyí yá nde nuū sucún gá andiví. <sup>27</sup> Te máá yá tu jíni ñuhún sáha ya nájñuhun ni casáha sutū cácujeñu jenahán, jeē ndiquiví ni casocó de quiñí siquī cuēchi máá de xíhna gā, te sáá te siquī cuēchi ñayuu. Chi ñn jínu-ni ní socó yá máá yá jehé yó, te

ni cuu-ni. <sup>28</sup> Chi ni jeni ley Moisés táca sutū kujéñu jeē tú na fuerza squicu váha. Yucúan na te cuéé gá te ni cahān teyí Yaā Dios. Te jíni jéé ni cáhán teyí yá, te ni jeni ya Sēhe ya jeē cúu ya sutū kujéñu, te sutū ndaā sutū váha cúu ya ní cáni.

*Jeē ndiso jñíñu Cristo siquī ñn contrato jeé*

## 8

<sup>1</sup> Núu súcuan te jñuhun cánuú gá jeē jé ni cahān rí cúu yáha: Néváha yó ñn sutū kujéñu nájñuhun ni cahān rí, te ndéé yá lado váha mesa nuū ndácu jñíñu máá Yaā kujéñu nde andiví. <sup>2</sup> Te vijna te cúu ya sutū nde andiví, jeē cúu ndije lugar íi jeē ní sáha máá Jítoho yō Yaā Dios, nasūu ñayuu. Chi tu cáa nájñuhun vehe íi jenahán jeē ní casáha ñayuu. <sup>3</sup> Te táca sutū kujéñu ni jeconaa de jeē socó de ndajñíñu jíni quiñí nuū Yaā Dios. Núu súcuan te Jesucristo suni ní jini ñuhún jeē socó yá jeē cúu ya sutū. <sup>4</sup> Te núu ní iyo ga yá ñn ñayví, te ni ma quiñáhan jeē cúu ya sutū jíni táca gá sutū, chí níni casocó gá de quiñí nájñuhun cáhán ley Moisés. <sup>5</sup> Te jñíñu casáha de, tu quiñáhan jíni jéé iyó andiví. Chi cúu ñn muestra-ni jeē steén siquī andiví. Te cúu nájñuhun jeē ní cahān Yaā Dios jíni Moisés quiñí ní quejéé de sáha de vehe íi jenahán: Coto váha ró jéé sáha ró táca ndajñíñu nájñuhun jito jeē ní steén rí nuū ró nde xini yúcu, áchí Yaā Dios jíni de. <sup>6</sup> Te vijna te sáha Cristo jñíñu jéñu ndasí gá vesú jeē casáha táca sutū ún, chí ndiso jñíñu ya siquī contrato jeé jéé yóhyo váha ga, chí ndiso jñuhun jéñu ga jeē ní jéñuhun Yaā Dios.

<sup>7</sup> Chi contrato ley xíhna ñuhún, núu jeē ní sáha jeē queé váha jñíñu núu, te tuá cánuú jéé cóo contrato uu. <sup>8</sup> Chi ñayuu jenahán un jéé tu ní cáquendōo ndaā, suhva ni cahān Yaā Dios jíni í, áchí tutu:

Quiji quiñí jeē nasáha rí ñn contrato jeé  
jín ñayuu Israel jíni ñayuu Judá, áchí Jítoho  
yō Yaā Dios.

<sup>9</sup> Te ma cóo nájñuhun contrato jeē ní sáha rí jíni jíni i jenahán,

quiñí jeē ní jñn rí ndaha de jíñáhan de,  
te ni quenehen rí de ñni nació Egipto.  
Chi tu ní cásequen váha de jín contrato ley rí.  
Jeé yúcu tuá ní táñuhún rí de, áchí Yaā  
Dios.

<sup>10</sup> Núu súcuan te suhva coo contrato jeé nasáha rí jíni ñayuu Israel,  
nde na quiñí quiñí yúcu, áchí Jítoho yō Yaā  
Dios:

Sáha rí jeé jécuhun ley rí nuū jeé níñníní í,  
te suni ñni anuá í tee rí jñuhun ley rí.

Te cuu rí Yaā Dios maá í,  
te máá í cuu ñayuu maá rí.

<sup>11</sup> Te tuá jíni ñuhún steén í nuū jñáhan í nuū ñáni í,

návaha cuni í ndese Yaā cúu Jítoho í.

Chi ndihí i cuni ndese Yaá cúu ri, nde ñayuu núu ga jíin ndé ñayuu cujéhuu ga. <sup>12</sup> Chi cone cáhnu ni rí nuú i jeé ní casáha i jniñu néé, te ni ma núcuhun ga ni rí cuéchi ni casáha i. Achí Yaá Dios. <sup>13</sup> Te jeé ní cáhān yā jeé cuáha ya ñin contrato jeé cúu jeé ní cachi yā jeé tuá cuajniñu contrato xihna ñúhún. Te ñin jeé ní cutúhú jéé tuá jejniñu, chí jíni yō jeé je yajni naa.

*Vehe ñi ñayivi yáha ní steén ndese cáa andivi*

## 9

<sup>1</sup> Te ndaá chí contrato xihna ñúhún ni ndacu jniñu ndese chíñúhún i ya, jíin ndese coo ñin vehe ñi ñi ñayivi yáha. <sup>2</sup> Te ní cuváha vehe ñi ún, te ní Iyo uú cuarto. Te cuarto xihna ñúhún jéé naní cuarto ñi, ní ñin candelero oro jíin mesa oro jíin pan ñi. <sup>3</sup> Te ní Iyo sahna jeé ndíta caa jeé ndihyu inga cuarto jeé naní cuarto ñi ndasí gá. <sup>4</sup> Te ñi un ní Iyo ñin altar oro nuú cayú sūje cútú, jíin yéjñú jeé ñúhun contrato ley, te máni oro cúu ní síquí yéjñú. Te ñi yéjñú un ñe ñin tijehēn oro jeé ñúhun maná jeé ní cuun andivi. Te suni ñe vara Aarón jeé ní nane numa, jíin tabla yuú jeé yosó jñúhun contrato ley. <sup>5</sup> Te síquí yéjñú un ní cahñin ndindúú figura ndajéhé querubín jeé steén jeé ñe Yaá Dios. Te ní sáha cuandahú síquí tapa yéjñú nuú ní cóso yuyú ññi jeé ndáhva cuéchi. Te tu núne yó cáhān gā yō síquí táca yúcuān vijna.

<sup>6</sup> Te ná ní jinu táca ún, te núni núni quívicoo sutú ñi cuarto xihna ñúhún jéé casáha de jniñu jeé cúu de sutú. <sup>7</sup> Te ñi cuarto uú, chí tu cúu quívicoo na-ni sutú jíin inga ñayuu, chí máñúhún-ni sutú cujéhuu ga cúu jeé quívi, te suni ñin-ni vuelta jeé cuyá. Te suni ma cúu quívi de núu tú ññi quiti jeé socó de nuú Yaá Dios jeé síquí cuéchi máa de jíin síquí cuéchi ñayuu. <sup>8</sup> Te jíin yúcuān steén Espíritu Santo nuú yō jeé ná ní Iyo ga cuarto ñi xihna ñúhún ñi ñayivi, te tu ní núne ichi jeé quívi ñayuu ñi lugar ñi ndasí jeé cúu andivi. <sup>9</sup> Chi táca yúcuān cúu jeé ní steén ndese cúu tiempo vijna. Chí jeé ní casocó i ndajniñu jíin quiti nuú Yaá Dios, chí tu ní cúu cuiti sáha jeé quéndō ndoo ánuá ñayuu ní casocó ún. <sup>10</sup> Chí táca ún ní steén máni síquí yiquí cúñu yō, ndese caji yō, ndese coho yō, ndese ndundoo yō. Te ní jejniñu máa-ni nde ní quiji Cristo jíin ñin modo váha ga.

<sup>11</sup> Chí vijna je ní quiji Cristo, te cúu ya sutú cujéhuu ga jeé ndíso jniñu ya síquí táca jéé váha jeé ní quiji vijna. Te cúu ya sutú ñi lugar ñi nde andivi jéé cujéhuu ga te váha ga vesú cuarto ñi jenahán. Te nasūu jéé ní casáha ñayuu cúu, chí nasūu cuenta ñayivi yáha cúu. <sup>12</sup> Te jeé ní quívi ya ñi lugar ñi ndasí gá nde andivi, te nasūu jíin ññi ndixúhú ní ññi becerro, chí jíin ññi maá yá

ni quívi ya, ní socó yā ñin jinu-ni jeé ní cáni. Te súcuān ní nama ya yohó jéé cótecu yō ní cáni. <sup>13</sup> Chí nde jenahán te ññi stíquí jíin ññi ndixúhú jíin yáa becerro jeé ní cayú nuú altar, ní cacosó yuyú de síquí ñayuu jeé tu íyó ndoo ánuá i, te súcuān ní ndundoo i nuú yā. <sup>14</sup> Te núu ní ñihñ jniñu ññi táca quiti ún, te nagá ní cuu ññi maá Cristo. Chí Yaá ndoo cúu ya, te ní socó yā maá yá nuú Yaá Dios, ní sáha Espíritu jeé íyó ní cáni. Te ññi yā nácate ánuá yō nuú jniñu néé jéé cúu yō sáha. Te súcuān te cuu cuajniñu yó núu Yaá Dios, Yaá técu.

<sup>15</sup> Jeé yúcuān cúu jeé ndíso jniñu ya síquí ñin contrato jeé. Chí ní jíhi yā, te súcuān ní quende yā cuéchi ní casáha ñayuu ná ní Iyo i chíji contrato xihna ñúhún. Te ñayuu jeé cána Yaá Dios i quívicoo i ndaha ya, ñihñ i tahú i jeé cóo ní cáni, náñúhun ní jejniñu ya. <sup>16</sup> Chí cúu náñúhun núu sáha ñin téé acta jeé cahán síquí tahú, te nde na cúu de te ñihñ jniñu. <sup>17</sup> Chí núu técu gā téé ní sáha, te tu ñihñ jniñu. Te nde núu ní jíhi de, te sáa te jéjniñu. <sup>18</sup> Te suni súcuān contrato xihna ñúhún, suni ní jini ñúhún cucutú jíin ññi quiti ní jíhi. Te contrato jeé chí ní cucutú jíin ññi Cristo jeé ní jíhi yā. <sup>19</sup> Chí ná ní cuu ní cachi Moisés táca jniñu ndácu contrato ley un núu ndivii ñayuu, te ní quihin de ññi becerro jíin ññi ndixúhú jíin ndute, te jíin íxi cácuéhé jíin yúcu hisopo ní cóso yuyú de síquí libro ley jíin síquí ndivii ñayuu. <sup>20</sup> Te ní cahān de: Yáha cúu ññi jeé cucutú contrato ley jeé ní cána Yaá Dios jíin yō, achí de. <sup>21</sup> Te suni ññi un ní cóso yuyú de nde maá vehe ñi jíin táca ndajniñu ní cajéjniñu de jeé cáchiñúhún de ya. <sup>22</sup> Te je yajni ndihí ndajniñu, chí cahān ley un jeé jini ñúhún ndundoo jíin ññi. Te núu ma cáti ññi te ma cóne cáhnu ní yā nuú cuéchi núu.

*Jeé ní sóco Cristo maá yá jeé quende yā cuéchi*

<sup>23</sup> Núu súcuān te táca ndajniñu un jéé cácuu muestra táca jéé íyó andivi, ní jini ñúhún ndundoo jíin ññi quiti. Te táca máa jéé íyó andivi, chí ní jini ñúhún ndundoo jíin ññi Cristo jeé yóhyo váha ga. <sup>24</sup> Te Cristo chí tu ní quívi ya ñi lugar ñi jeé ní casáha ñayuu, chí ñin muestra-ni ní cuu un jéé steén ndese íyó lugar ñi ndije nde andivi. Chí máa andivi ní quívi ya, te vijna ñe ya nuú Yaá Dios jeé cahán yá jehé yō. <sup>25</sup> Te máa sūtú cujéhuu ga quívi de táca cuyá ñi cuarto ñi gá jeé socó de ññi quiti. Te Cristo tu ní sóco yā maá yá cuéhé jinu, chí ñin jinu-ni. <sup>26</sup> Chí núu jeé súcuān te cánuu jéé cuéhé jinu ndoho ya nde ná ní jecóo ñayivi te nde vijna núu. Te tuú chí sa tiempo cuándihí yáhá ní quenda ndijin yā ñin jinu-ni jeé ní cáni, ní socó yā maá yá jeé ní quende yā cuéchi. <sup>27</sup> Te náñúhun ní cundaá jeé cúu táca ñayuu ñin jinu-ni, yúcuān na te

sándaā Yāā Dios jniñu i, <sup>28</sup> suni súcuan Cristo ni jihī yā ñin jñu-ni jeē ni sócō yā maá yā jeē ni quende yā cuēchi cuehē ñayuu. Yūcuán na te ndijji ya inga jñu, te nasūu jéē sócō tucu ya maá yā jeē quénde yā cuēchi, chi sa suhva jeē jnáma ya ñayuu jeē cādetu i jeē ndjji ya.

## 10

<sup>1</sup> Chi ley Moisés ni cuu ñin muestra-ni táca jéē váha jeē ni quijji jñn Cristo, ñin jeē steén-ni ndese coo máá jéē váha. Jeē yúcuan tu cúu cuiti sáha ley un jéē quéndōo ndaā ñayuu jeē quijjicoo i nuū Yāā Dios jeē cásocō i quiti nuū cuiyá nuū cuiyá. <sup>2</sup> Chi núu ní cúu sáha ley un jéē quéndōo ndaā i, te jecuiñī jeē cásocō i quiti núu. Chi núu ní cúu, te ñin jñu-ni te je ni quéndōo ndoo ánuá ñayuu cásocō ún, te ma yūhu gá anuá i jeē ní sáha i cuēchi núu. <sup>3</sup> Te tuú chi jeē cásocō i quiti ún táca cuiyá, sa sáha jeē núcūhun ni i cuēchi i. <sup>4</sup> Chi niñī siquī jñn niñī ndixuhú, ma cúu cuiti quende cuēchi.

<sup>5</sup> Jeē yúcuan ná ní quiji Cristo ñin ñayiví, te ni cahān yā jñn Yāā Dios:

Jeē jéhi i quiti jñn jéē jéhe i ofrenda nuū ní, chi tu ní núnahan ni ní.

Te ni sātūhva ní yiqui cúñu maá ná jeē sócō na.

<sup>6</sup> Te tu ní cúsi ní ni jéē jéhu i quiti te sócō i ti jeē ndúndoo cuēchi i núu.

<sup>7</sup> Yūcuán na te ni cahān ná: Yāha véji ná jéē squícu ná jniñu jeē núnahan ni ní, Tātā Yāā Dios.

Chi súcuan je yósō jñūhun na núu tútu.

Achí Jesús. <sup>8</sup> Xihna gā ni cahān yā jeē tu ní núnahan ni Yāā Dios te tu ní cúsi ní yā jeē jéhi i quiti te jéhe i ofrenda, jñn jéē jéhu i ti te sócō i ti jeē ndúndoo cuēchi i núu, nájñūhun ndácu ley jenhán jniñu. <sup>9</sup> Te ni cahān gā yā: Yāha véji ná jéē squícu ná jniñu jeē núnahan ni ní, Tātā Yāā Dios. Te jeē ni cahān yā súcuan, te ni sáha ya jeē jecuiñī jeē cásocō i quiti, chi ni sócō yā maá yā. <sup>10</sup> Te ni sáha Yāā Dios jeē iyó ndoo iyó í yó nuū yā siquī jeē ni sáha Jesucristo jeē núnahan ni Yāā Dios, suu jeē ni sócō yā yiqui cúñu yā ñin jñu-ni jeē níf cáni.

<sup>11</sup> Te táca sūtú ún ndiquivī ni cahñin de ni cajejññu de nuū yā, te cuehē jñu cajeñni de suu quiti jeē sócō sócō de. Te táca un chi ma cúu cuiti quende cuēchi. <sup>12</sup> Te Cristo chí ñin jñu-ni jeē níf cáni ni sócō yā maá yā jeē siquī cuēchi yó. Te saá te ni cucōo ya lado váha Yāā Dios nuū kujéhu ya. <sup>13</sup> Te yúcuan ndétu ya vjna nde quiji quiví jeē quénde yā poder táca jéē jito uhū nuū yā. <sup>14</sup> Chi jeē ni sócō yā maá yā ñin jñu-ni, te ni sáha ya jeē níf cáni quéndōo ndaā ñayuu ni sándoo ya. <sup>15</sup> Te máá Espíritu Santo suni cáji cahān yā siquī jñūhun yáha, chí xihna gā cahān yā:

<sup>16</sup> Suhva coo contrato jeē nasáha ri jñn i, nde na quiji quiví yúcuan, áchí Jítoho yó Yāā Dios:

Sáha ri jeē jécūhun ley rī ñin anuá i, te suni nuū jeē níññūni i tee ri jñūhun ley rī.

<sup>17</sup> Yūcuán na te cahān gā yā:

Ma núcūhun cuiti gā ni rī táca cuēchi jñn jniñu néé ni casáha i.

Achí yā. <sup>18</sup> Núu súcuan te núu je ni ine cáhu ni yā nuū cuēchi yó, te tuá cánuú jéē sócō gā yó jeē siquī cuēchi yó.

*Jeē ní nune ichi quiví yó nuū Yāā Dios*

<sup>19</sup> Jeē yúcuan hermano, ma ñin jeē cáni ni yó, chí cuu quiví yó lugar ñi ndasi ndé nuū iyó Yāā Dios, siquī jeē ní jetti niñī Jesucristo.

<sup>20</sup> Chi ni nune ya ñin ichi jéē jéē cótecu yó níf cáni sáha ya. Chi ná ni jihī yā te ni tahndē sahma ndíta caa jeē ndihyú lugar ñi ndasi gá ñi vehe ñi. Te súcuan ni steén Yāā Dios jeē núne quiví yó lugar ñi ndasi gá nuū iyó yá. <sup>21</sup> Te Jesús cúu sutú kujéhu ndasi jeē ndíto yóho ñayuu cácuu sehe Yāā Dios. <sup>22</sup> Núu súcuan te na quívicoo yó nuū Yāā Dios, te na cóo ndije ndaa anuá yó, te na cándje ñin yó jéē iyó ndaa ndihí jñūhun ya. Chi jñn niñī Cristo ni ndundoo ánuá yó nuū táca cuēchi ni casáha yó, nájñūhun ni ndundoo yó nuū yā jeē ní jendute yó jñn ndute. <sup>23</sup> Te na cuffi ñin yó jñn jñūhun jeē cácahān yó jeē ñūhun ni yó jeē sáha ya jeē váha jñn yó. Te ma cáca yátá yó, chí váha squícu maá Yāā Dios jeē ni jéñūhun ya nuū yó. <sup>24</sup> Te na nácani ni yó ndese stíhví jñāhan ni yó jeē cundáhú gá ni yó jñāhan yó, jñn jéē sáha yó jniñu váha. <sup>25</sup> Te níni na ndútútu yó chiñūhūn yó yā, te ma cúhuun ni yó nájñūhun casáha sava i, chí sa víhyá gā na stíhví jñāhan ni yó, chí je cájini yó jeē cuácuyajini quiví ndjji ya.

<sup>26</sup> Te núu je ni jécūhun ni yó te ni jetáhú yó jñūhun ndaa, te nuū máni sáha sáha-ni yó cuēchi, núu súcuan te tuá na inga iyó jéē cúu siquī cuēchi yó. <sup>27</sup> Chi sa quéndōo máni ga jñūhun xeē siquī yó jeē quiji quiví juicio te quiji yāñuhūn xeē jeē cayú ñayuu jeē cájito uhū i ya. <sup>28</sup> Ñayuu squéhichí ley Moisés, te núu uú chí úní ñayuu cahān cuēchi siquī i, te cuu nahñ i, te tuá na jñūhun cundáhú ni iyó. <sup>29</sup> Te nagá ni cuu jeē ma ndóho xeēn gā ñayuu jeē squéhichí i máá Séhe Yāā Dios, chí nájñūhun jeē jéñú ñinhu i siquī yā. Te sáha i jeē tu ndé jéññūni niñī yā jeē ní jetti siquī contrato jeē ndúndoo i nuū yá nuú. Te súcuan sáha ndeváha i nuū maá Espíritu Yāā Dios jeē sáha jeē váha yóho. <sup>30</sup> Chi je jñi yó jeē ni cahān maá yá: Máá rí sáha jeē ndutahū i siquī cuēchi i, máá rí cuáha castigo i, áchí Jítoho yó. Te suni cahān: Máá Jítoho yó sándaā yā siquī cuēchi ñayuu yā. <sup>31</sup> Núu súcuan te xeēn ndasi cúu jeē quiví ñayuu ñin ndaha Yāā Dios, Yāā técu, jeē ndutahū i siquī cuēchi i.

<sup>32</sup> Te na núcūhun ni rō ndese ni cuu ichi yátá, nde náa sá ní quejéé ró caca ró jñn luz yá, te ni cajendeyí ni rō ni candoho ró tijni

jnündóho xeēn. <sup>33</sup> Chi sava ró ní cacahān neé i nuū ró te ni castóho i róhó ní cajito ñayuu. Te sava ga rō ni cajēhe ró jnúhun cuiñi ró jín ñayuu ni candóho súcuan. <sup>34</sup> Chi ni cacundáhú ni rō ñayuu ní cahīn vecāa jeē siquí yā, te ni cacusiñ ní rō vēsú ni caquende ñayuu ndajniñu ró. Chi ni casáha ró cuenta jeē ndé andiví cánevāha ró iñ tahū jeē váha ndasí gá jeē coo ní cáni. <sup>35</sup> Núu súcuan te ma siaá rō jnúhun jeē ní candije ndije ró jéē váha ni yā, chi cuehē ndasí táhū nihīn ró siquí ún. <sup>36</sup> Chi cánuú jéē cuándeyí ní rō návāha sáha ró jéē núnahan ni Yaā Dios, te nihīn ró jeē ní jéjñuhun ya. <sup>37</sup> Chi cáhán tutu i: ñin núnúu-ni te ndee Yaā ndiji, te ma cucuéé yá.

<sup>38</sup> Te ñayuu jeē ní ndahva rī cuēchi i, cotecu i jeē candije i jeē sáha ri jehē i.

Te núu na cáca yátá i, te ma cusīñ ní rī jín i. Achí Yaā Dios. <sup>39</sup> Te yóhó tu cácuo yó jnáhan ñayuu cájica yátá jeē jnahnú ndetū i. Chi sa cácandije yó jéē nihín tahū yō cotecu anuá yō.

### *Siquí jnúhun cándije*

## 11

<sup>1</sup> Te jeē candije yó, suu cúu jeē cúndaā ndije ni yō jeē nihín yō táca jéē ñuhun ni yō, jín jéē jíní váha yó jéē iyó ndije táca jéē tu cájito yó núu vijna. <sup>2</sup> Te ñayuu jengahán chi ní jejnúhún yá i siquí jeē súcuan ni cacandije nihín i.

<sup>3</sup> Siquí jeē candije yó cúu jeē jécūhun ni yō jeē ní sáha Yaā Dios ñayiví jín jnúhun ni cahán-ni ya. Te jín poder Yaā Dios jeē tu jito yó núu, ni jecōo táca jéē jito yó núu.

<sup>4</sup> Ni candije Abel jeē sáha ya jehē de, te jeē yúcuan ní socó de jeē váha ga nuū Yaā Dios vēsú Caín. Te jeē yúcuan ní jejnúhún yá jeē iyó ndáa de, chi ní jetáhú yá jeē ní sócō de quití nuū yá. Te vēsú ní jihí de, te cáhán gā ejemplo de jín yó nde vijna, chi ní candije ndáa de.

<sup>5</sup> Ni candije Enoc jeē sáha ya jehē de, te jeē yúcuan ní naquihín ya de cuahán de andiví, te tu ní jihí de. Te tu ní cánanihín ñayuu de, chi ní ndoñúhún-ni de ní sáha ya. Te achí tutu jeē nde ná tu naquihín ya de te ní cusīñ ní yá jín táca jéē ní sáha de. <sup>6</sup> Te núu tu cándije yó jéē sáha ya jehē yō, te tú na modo cusīñ ní Yaā Dios jín yó. Chi ñayuu jeē cuní quívicoo ndaha ya, cánuú jéē candije ndáa i jeē iyó yá jín jéē cuáha ya tahū nuū ñayuu jeē nducú i candije i ya.

<sup>7</sup> Te Noé ní candije de jeē sáha Yaā Dios jehē de, ná ní castúhun yá nuū de jeē coo jnúndóho jeē ná tu coto de jeē coo. Te jeē yúcuan ní jendetū de ní sáha de barco cáhnu jeē naní arca, návāha cácu de jín ní vehe de. Te jeē súcuan ní candije de, te ní cane cuēchi siquí ñayuu jeē tu ní cándije i ya. Te ní

ndahva yā cuēchi de siquí jeē ní candije de jeē sáha ya jehē de.

<sup>8</sup> Te Abraham ní candije de jeē sáha ya jehē de, te jeē yúcuan ní jetáhú de ná ní cahán yá jín de jeē quihín de iñ lugar nuū cuáha ya cuu tahū de. Te ní quenda de cuahán de, vēsú tu jín de ndé nuū quihín de. <sup>9</sup> Ni candije de jeē sáha ya jehē de, te jeē yúcuan ní condee tatú de nuū ñuhun jeē ní jéjñuhun ya jeē cuáha ya nuū de. Te ní condee de vehe ñi, te suni súcuan Isaac jín Jacob, chi sēhe de ún suni inuú nihín tahū i jín de jeē ní jéjñuhun ya. <sup>10</sup> Chi ní ñuhun ní de condee de máá ñuu andiví jéē iyó cutú cimientu, te máá Yaā Dios ní jequin yá ní sama ya ñuu ún.

<sup>11</sup> Te suni ní candije máá Sara jeē sáha ya jehē ña, te jeē yúcuan ní nihín ña fuerza jeē ní jecūhun sēhe ña. Chi nde ná ní yāha ndasí cuiyá ña, te ní cacu iñ sēhe yí ña, chi ní candije ña jeē squicu Yaā Dios jeē ní jéjñuhun ya. <sup>12</sup> Te súcuan ní cuu jeē ní táhū cuehē ñayuu ní sáha iñ-ni Abraham, vēsú je jéhnu ndasí de. Te yucūn de ní nducuehē ndasí, nájnúhun quimi andiví, jín ñiti yumar, jeē ma cúu cuiñi cahu yó.

<sup>13</sup> Te táca téee cándije un, ní cajihí de. Te vēsú tu ní cájito de jeē ní jéjñuhun ya, te ní cajini váha de jeē cóo, te ní cacusiñ ní de jeē cóto de inga tiempo. Te súcuan ní cacahán de jeē ñayuu ñuu jicá ñayuu tatú cácuu de ini ñayiví yáha. <sup>14</sup> Te táca téee jeē cahán súcuan, chí stéen cají de jeē nducú de iñ ñuu jeē cúu andiví núu cúu ñuu máa de. <sup>15</sup> Chi núu jeē cáncani ní de siquí ñuu nuū ní quendacoo de, te iyó modo jeē nándicó cóo de te núu jeē cácu de núu. <sup>16</sup> Te túu chí ní cacuú ndasí ní de coyúcú de inga ñuu váha ga jeē cúu ñuu andiví. Jeē yúcuan tu cūcanu Yaā Dios jeē naní yá Yaā Dios de jijnáhan de, chí je ní sátuhva ya iñ ñuu nuū cóyúcú de.

<sup>17</sup> Ni candije Abraham jeē sáha ya jehē de, te jeē yúcuan ní jehēn de jín Isaac jeē socó de i, ná ní jito ndee ya de. Te ní tyo túhva de jeē socó de sēhe de un jéē mañúhún ní i nuū de, vēsú ní nihín de jnúhun jeē ní jéjñuhun ya suhva siquí i: <sup>18</sup> Isaac cúu téee jeē squejéé rí yucūn ró quihín, achí jnúhun ní jejnúhún ya. <sup>19</sup> Te ní sáha de cuenta jeē cúu nastécu Yaā Dios i. Te nájnúhun súcuan ní cuu, chí cuu cahán yō jeē nájnúhun ní jihí i te ní natecu i nuū de, chí ní jesi-ni ya jeē ma cáhni de i.

<sup>20</sup> Ni candije Isaac jeē sáha ya jehē de, te jeē yúcuan ní cahán de jeē váha tahū nihín sēhe de Jacob jín Esaú tiempo quiji. <sup>21</sup> Te suni súcuan ní candije Jacob, te jeē yúcuan, náa je yajni cuu de te ní cahán de jeē váha tahū nihín ndindúú sēhe yí José. Te yítu de vara de, ní chíñúhún de Yaā Dios. <sup>22</sup> Te suni súcuan ní candije José, te jeē yúcuan, náa cuacuyajni cuu de, te ní cahán de jeē táca yucūn Israel, iñ quiví quendacoo i nación

Egipto. Te ni ndacu de jniñu jeē chindūji i yiqui de ñuu nuū quáivoo i.

<sup>23</sup> Te ná ni cacu Moisés, te tátá i náná i ni cacandije de jeē sáha ya jehē de, te jeē yúcuan ní cacondito sáhi de i uní yoō. Chi ni cajito de jeē lúu cáa i, te tu ní cáyuhú de siquí acta jeē ní sáha rey jeē na cúu táca súchi yá. <sup>24</sup> Te suni súcuan ní candije Moisés, te jeē yúcuan ná ní jehnu de te tuá ní jéhe de jñuhun cuu de sēhe ñahan cúu sēhe síhí rey Egipto. <sup>25</sup> Chi sa ni cuu ni de ndoho de jíin táca jñahan de ñayuu Yaā Dios, nasūu jēē cusíi ní de jecu-ni tiempo jíin cuéchi. <sup>26</sup> Chi ní sáha de cuenta jeē núu cahān neē ñayuu siquí de jeē siquí Cristo, te yúcuan sáha jeē cucá ndasí gá de ndihí jeē ndíso jñuhun Yaā Dios, vésú jeē nihín de ndihí ndajniñu cucá iyó nación Egipto. Chi ní ñuhun ní de jeē caúha ya tahú de. <sup>27</sup> Te jeē súcuan ní candije de, jeē yúcuan ní quenda de nación Egipto cuahān de. Te tu ní yúhú de jeē quití ní rey nuū de. Chi ní ñin nihin de siquí jniñu sáha de, chi ní sáha de cuenta jeē je jíto de nuū Yaā jeē tu cúu coto yó núu vijna.

<sup>28</sup> Te jeē súcuan ní candije de, te jeē yúcuan ní cahān de jeē na cáhni ñayuu londe pascua. Te ni ndacu de jniñu jeē na cóso yuyú i niñí tī yehyí i, návaha núu na quiji ndajéhé jeē cáhni yá táca sēhe nuū ñayuu Egipto, te ma cáhni yá sēhe nuū ñayuu Israel. <sup>29</sup> Te siquí jeē ní cacandije ñayuu Israel jeē sáha ya jehē i, te ni cayāha-ni i mēhñu Mar Rojo, chi ní nune ya te ni natūu-ni ñuhun íchi. Te suni súcuan ní cacuni tēe Egipto yāha de núu, te ní nandihyū-ni ndute siquí de ní cajihí de.

<sup>30</sup> Ni cacandije soldado jeē sáha ya jehē de, te jeē yúcuan ní cotúu jeē ní condúu ndihyú ñuu Jericó, ná ní cajicó ndúu de uxá quívi. <sup>31</sup> Te Rahab, vésú ñahan tñni ní ni cuu ña, te ní candije ña jeē sáha ya jehē ña. Te ní chindéé ñáhán ña tēe Israel jeē ní quijicoo ní condéhé yuhu ndese iyó ñuu ña. Te jeē yúcuan tu ní jíhí ña jíin ñayuu nihni ní ñuu ña ún.

<sup>32</sup> ¿Te ndé jñuhun ga cahān rī núu súcuan? Chi tuá na tiempo jeē nácani ga rī jñuhun Gedeón jíin Barac jíin Sansón jíin Jefe tē jíin David jíin Samuel jíin táca tēe ní canacani jñuhun ya nde jenahán. <sup>33</sup> Ni cacandije de jeē sáha ya jehē de jíinñahan de, te jeē yúcuan ní cacundeyí de ní canajni de táca ñuu náhnu, te váha ní candacu de jniñu nuū, te ní chindéé ñáhán yá de nájñuhun ní jejnñuhun ya. Te núu sava de ní jesi Yaā Dios yuhu ndícaha jeē tu ní cáyeji tī de. <sup>34</sup> Te sava de tu ní cáyú de sáha ñuhun jeē cayú xeēn. Te sava de ní cácu de jeē tu ní jíhí de jíin espada. Te sava de ní nanihín ní de náa tuá fuerza de núu, te ndacuí teyí ní Iyo de nuū guerra, te ní cacundeyí de siquí soldado táca ñuu jicá jēé jíto uhú ún de. <sup>35</sup> Te sava ñahan ní natecu sēhe ña jeē ní jíhí i.

Te sava ga ñayuu chi sa suhva ní candoho xeēn i nde ní cajihí i. Te tu ní cájēhe i jñuhun jeē siaá i jñuhun ya te cácu i, chi ní catee ní i jeē natecu i coyúcu váha ga i andiví. <sup>36</sup> Te sava ga i ní casacátá ñayuu nuū i, te ní cacani ñayuu i, te nde ní caconuhní cadena i ní cahñin i vecāa. <sup>37</sup> Te ní cajēhe yuū xiní i, te ní cajehnde i jíin sierra, te ní cajito ndee i jíin jñundóho, te ní cajehni i jíin espada. Ni cajica cuu i cháha chúcuan, te máá ñií lánchi máá ñií ndíxuhú ní cañuhun i. Ní candoho ndáhú i, ní cajito i jñundóho, ní castóho ñayuu i. <sup>38</sup> Váha ndasí ñayuu ní cacuu i jeē tú cuiti ñayuu ñayiví súcuan, te vésú súcuan te ní casáha ñayuu jeē ní cajica cuu i nuū ñuhun téhé jíin chúji yucu, ní cahñin i yáú cava jíin yáú ñuhun. <sup>39</sup> Te táca ñayuu yáha, vésú ní jejnñuhun yá i jeē ní cacandije nihin i jeē sáha ya jehē i, te tu ní cajito i nuū jeē ní jejnñuhun ya. <sup>40</sup> Chi ní sátúhva Yaā Dios ñin jniñu váha ga, te suu cúu jeē sáha Cristo jíin yó, návaha ñin cáhnu-ni nihin yó tahú yó jíin i, te jeē yúcuan cúu jeē ná tu nihin i ndihí tahú i.

*Jeē na cócunuū yó nuū maá ñin-ni Jesús*

## 12

<sup>1</sup> Te iyó cuéhé ndasí ñayuu un jēé ní cacandije nihin i jeē sáha ya jehē i, te nájñuhun ní jicó ndúu i yóhó, cástéén gā i nuū yó nde vijna jeē suni súcuan na cándije yó. Núu súcuan te suni máá yó, na tējiyo yó táca jēé sajnēñu jíin cuéchi jeē ní cáan yó jíin. Te na cuándeýí ní yó cunu yó jíin carrera jeē ní jéhe ya jeē cunu yó. <sup>2</sup> Te na cócunuū váha yó Jesús, Yaā jeē ní scándije yóhó te sáha ya jeē íje váha yó jíin jñuhun ya nde jñu íje yó. Chi máá yá ní jendeyí ní yá ní ndoho ya jicá cruz. Te vésú jñuhun canu cúu jeē súcuan cuu yá, te tu ní sáha ya cuenta. Chi ní ñuhun ní yá jeē sa cusíi ndasí ní yá ná ní cuu ní ndoho ya. Yúcuán na te ní cucóo ya lado váha mesa nuū ndácu Yaā Dios jniñu.

<sup>3</sup> Te na nácani ní rō ndese ní jendeyí ní yá ní ndoho ya jeē ní sáha ndeváha ñayuu iyó cuéchi jíin yá. Te súcuan te ma cuíta ró ní ma ndínuu ní rō jíin jñundóho. <sup>4</sup> Chi ní ná tu ndoho ró jēé ndé cuu ró jeē cánducú ndéýí ró snáa ró cuéchi. <sup>5</sup> Te sanaa te je ní canaa ní rō jñuhun cáhán tutu íi, jeē stihví ní Yaā Dios rohó jēé cácu ró sēhe ya:

Séhē, ma quití ní rō jeē snahnú Jitoho yó rohó,

te ní ma ndínuu ní rō núu cáhán yá nuū rō.

<sup>6</sup> Chi Jitoho yó snahnú yá ñayuu jeē maní yá jíin,

te jéhe ya castigo táca jēé náquihin ya cuu sēhe ya.

Achí tutu. <sup>7</sup> Núu súcuan te na cuándeýí ní rō jeē snahnú Yaā Dios rohó, chí sáha ya jíin ró nájñuhun sáha tátá jíin sēhe. Chi tú na sēhe iyó jēé tu snahnú tátá i. <sup>8</sup> Te núu ma

sahnú yā rohó, nájñuhun ndóho tāca séhe, núu súcuan te nájñuhun séhe ndáhú cácuu ró, nasūu séhe ndije ya. <sup>9</sup> Te tátá yō ñayivi yáha, suni ni sahnú de yóhó, te ni iyo yíñuhún yó jíin de. Te nagá ni cuu jeé ma cuádetū yō nuū maá Tátá yō andiví jeé sahnú yā yohó, te cotecu yō ní cáni. <sup>10</sup> Te ndaā chi máa de ni casáhnú de yóhó jecu-ni quiví, ndese ni cuu ni maá de. Te máa yá chi snáhnú yā yohó iin modo jeé quéndō vāha ga yō, návāha coo ndoo yó nájñuhun íyó ndoo máa yá. <sup>11</sup> Te ndaā chi tu cácusī ni yō maá hora jeé ndóho yó castigo, chi sa cúcuíhá ni yō. Te cúcuéé gá te cuni yō jeé ní quendō ndaā yō te coo ndeyí sī ni yō jeé ni snáhnú yā yohó.

*Siquí ñayuu jeé casquéhichí i jñuhun cáhán Yaā Dios*

<sup>12</sup> Núu súcuan te ma cóo ró nájñuhun tēe ni cuíta íi ndaha te quisi i xiní yití, chi sa ndacui na sáha ró máa ró nuū jñúndóho. <sup>13</sup> Te sáha ró ichi ndóo caca ndaa ró, návāha nduvāha rōhó jeé tu fuerza ini, jeé cácuu ró nájñuhun tēe chácuá jeé tu cúu caca vāha.

<sup>14</sup> Te na cóndihvī ni rō jeé condee maní rō jíin tāca ñayuu, jíin jeé cóo ndoo coo íi rō nuū yā. Chi ma cúu coto ni iin ñayuu nuū maá Jítoho yō te núu tu íyó ndoo i. <sup>15</sup> Te coto má cáca yátá ni iin ró te scuíta ró jñuhun jeé sáha Yaā Dios jeé vāha rōhó, návāha tú cuu ró nájñuhun iin yucū uvuá jeé stívi te sáha dañó jíin cuéhē ñayuu. <sup>16</sup> Te ni iin ró ma cáca jnéni. Te ni ma cóo jéé ni rō nuū Yaā Dios, nájñuhun ni iyo Esaú. Chi máa iin cohó ndeyi ni jícan de nuū ñáni de, ni sama de jíin derecho de jeé cúu de sūchi núu, te súcuan ni xícó de derecho de. <sup>17</sup> Te cájini rō jeé cucuéeé gá te ni cuni de jeé na cáhán tátá de jeé vāha tahu nihín de, te tu ní cúu, chi tuá ni táñuhún Yaā Dios de. Chi tu ní nihín jñiñu jeé ní nacani ni de, vesú ni nducú ndeyí de te nde ndahyú de.

<sup>18</sup> Te rōhó jíinánhan ró tu ní quíjicoo ró nuū íyó cúu, nájñuhun iyo ni cuu máa yucu nuū ni jéhe ya ley yā nuū ñayuu Israel. Chi ni cane yáñuhún yucu Sinaí, te nee lúchi jnúú jíto, te quée tachí xeén. <sup>19</sup> Te ni jecu trompeta, te ni cahán Yaā Dios. Te ñayuu jeé ní cajini sōho jeé cahán yā, ni cacahán ndahú i jeé ma cahán gā yā jíin í. <sup>20</sup> Chi tu ní cundeyí i jíin jñuhun jeé ní ndacu ya jñiñu nuū i, chi ni cahán yā: Vēsú iin quiti-ni núu quiví ti yucu yáha, jíni ñuhún cuu tī jíin yúu chí jíin lanza, achí yá. <sup>21</sup> Te siquí jeé íyó ndasí cúu jeé cájito i ún, te ni cahán Moisés: Quísi i ruhū jeé yuhú rí, achí de.

<sup>22</sup> Te vijna rōhó jéé cácadíje, tu ní quíjicoo ró nuū yúcu yúcu. Chi sa suhva nuū maá yucu Sion jíin nuū maá ñuu Yaā Dios, Yaā técu, ni quívicoo ró. Te ñuu un cúu Jerusalén jeé íyó andiví, nuū cáhíyo tútú cuéhē ndasí mil ndajéhé cáchíñuhún Yaā Dios. <sup>23</sup> Te ni

quívicoo ró núu cáyūcu tútú ñayuu cácadíje jeé cácuu séhe Yaā Dios, jeé íyó lista i andiví. Te ni quívicoo ró núu Yaā Dios, Yaā sándaā jñiñu ndihi ñayuu, jíin núu cáhíyo ánuá ñayuu vāha jeé jeé ní squéndō ndaā yā i. <sup>24</sup> Te suni nuū maá Jesús, Yaā ndíso jñiñu siquí contrato jeé ní quívicoo ró. Te yahu ndasí gá jñiñu sáha níñi yā jeé ní jéti jeé ndáhva cuéchi yó, nasūu níñi Abel jeé ní jíicān cuéchi.

<sup>25</sup> Núu súcuan te coto má squéhichí rō jñuhun jeé cahán ya jíin ró jíinánhan ró. Chi ñayuu jeé tu ní cájetáhú ná ni cahán yā jíin i ñayivi yáha, tu ní cácau i. Te xeén gá ndoho yóhó te núu ma cuatáhú yó nuū yā jeé cahán yā nde ichi ándiví núu súcuan. <sup>26</sup> Te nde saá ní quisi i ñayivi jéé ni cahán yā. Te vijna chi cáhán yā: Iin na jínu quisi rí ñayivi, te nasūu máa-ni ñayivi, chí suni táca jéé iin andiví, áchí yá. <sup>27</sup> Te jñuhun yáha jéé cahán, iin na jínu, chí cúní cahán jeé téjijo ya táca jéé tu íyó cutú, suu jeé ní cuvāha, návāha na quéndō jeé cóo cutú ní cáni. <sup>28</sup> Núu súcuan te cuāha Yaā Dios iin ñuu nuū yó jeé cóo cutú ní cáni. Te jeé yúcu. na nácuatáhú yó nuū yā, te na chíñuhún yó yā, te na cóo yíñuhún yó, návāha cusī ni yā jíin yó. <sup>29</sup> Chi Yaā Dios maá yó cúu nájñuhun iin ñuhún jeé snáá ndihi jeé neé.

*Ndese sáha yó te cusī ni Yaā Dios*

## 13

<sup>1</sup> Ma jécuiñí rō jíinánhan ró jéé cundáhú ni rō hermano rō cácadíje. <sup>2</sup> Conahán ró jeé cánuú cuāha núu ró vehe nuū ñayuu cájica. Chi íyó jínu jeé súcuan ni cajéhe núu ñayuu vehe, te ní cájini i jeé nuū maá ndajéhé andiví ni cajéhe núu i vehe.

<sup>3</sup> Te conahán ró chindéé ñáhan ró ñayuu cáhīn vecā, chí sáha ró cuenta jeé nájñuhun cáhīn cáhnu ró jíin i vecā. Te suni nacani ni rō jehē jñahan ró jéé cándoho i sáha ñayuu, chí núu súcuan coo jíin máa ró te suni ndoho ró.

<sup>4</sup> Coo yíñuhún ró siquí jñuhun quíjínhan ñayuu, te ma cosiquí ndéé jñahan ró. Chi máa Yaā Dios sándaā yā cuéchi ñayuu tijní ni jíin ñayuu casiquí ndéé jñahan.

<sup>5</sup> Te ma ndíyo ni rō xuhún, chí na cóo sī ni rō jíin jéé cánevāha ró. Chi máa yá ni cahán: Ma siaá cuíta rí rohó, ni ma stóo cuíta rí rohó, áchí yá. <sup>6</sup> Núu súcuan te ma iin jeé cáni ni yó, chí cuu cahán yó: Máa Jítoho rí chindéé ñáhan yá ruhú, te ma yūhu rí núu na vé cuni ñayuu sáha i jíin rí.

Achi yō.

<sup>7</sup> Te na núcūhun ni rō táca pastor rō, jeé ní castéén de jñuhun Yaā Dios nuū rō. Te sáha vāha ro cuenta ndese ni nihín jñiñu jeé ní casáha de, te na ndácu ró de jeé ní cacandíje de jeé sáha ya jehé de.



<sup>8</sup> Te Jesucristo chi ñn-ni cáa ya ichi yátá jiín vjna jiín ní cáni. <sup>9</sup> Núu súcuan te ma cuáha ró jnúhun candije ró táca jnúhun jeē sñn cáhán jeē tu quíjnánhan jiín jnúhun máá yá. Chi iyó váha jeē na ñje ánuá yō sáha jnúhun jeē váha ni yá jiín yō. Te tu jiín ññúhún yó jnúhun jeē tajnúni siquí jeē yéji yō, chi tu níhín jniñu cuíti jiín ñayuu cáhín jiín.

<sup>10</sup> Te máá yó chi cáneváha yó ñn jeē ni sócō maá jéhē yō, cúu Cristo. Te táca sūtū jeē cásocō gā de modo jeē cahán ley jenahán, tú na vé níhín de nuū yā jeē ni sócō yā maá yá. <sup>11</sup> Te sūtū cujéhu ga, ná ni sócō de ññí táca quíti ini cuarto ñ gā jeē siquí cuéchi, te yiqui cúñu ñ ni cajehmu de ichi yátá ñuu. <sup>12</sup> Te suni súcuan ni ndoho máá Jesús ichi yátá ñuu, náváha jiín níñí maá yá te sándoo ya ñayuu. <sup>13</sup> Núu súcuan te ma cóo inuú gā ni yō jiín ñayuu tu cá candije, chi nájnúhun quíhín yō jiín yá ichi yátá ñuu, te na ndóho yó jiín yá jeē sácatā i. <sup>14</sup> Chi ñayiví yáha tu iyó ñuu nuū coo yó ní cáni, chí sa cánducú yó máá ñuu nuū cóyūcu yó quiví quíji. <sup>15</sup> Núu súcuan te jeē jiín Jesucristo te níni na cáhán yō jeē yóhoyó cújéhu Yaā Dios, chí suu cúu nájnúhun ñn jeē sócō yō nuū yā, suu jeē nácuatáhu yó nuū yā. <sup>16</sup> Te ma náā ni ró sáha váha ró nuū jnánhan ró, te cuáha ró jéé cúmaní nuū i. Chí nájnúhun ñn jeē cásocō ró nuū Yaā Dios cúu táca jéé yáha, te cúsiñ ni yá jiín.

<sup>17</sup> Te cuandije ró nuū tēe cácuu pastor ró, te cuandetū ró nuū de. Chí cándito de róhó jéé quéndōo váha ánuá ró, chí cájini de jeē cánuú nacuáha de cuenta nuū yā. Te condihví ni ró sáha váha ró, náváha cusíñ ni de siquí ró te ma cucuíhyá ni de siquí ró. Chí núu tu súcuan te ma cóo jeē váha jiín ró.

<sup>18</sup> Te cacán tahú ró jehē rí jijnánhan rí. Chí váha iyó ni anuá rí jeē tú na cuéchi rí. Chí cácuñi rí caca yíñúhún rí jiín táca jniñu. <sup>19</sup> Te suni cáhán ndahú rí jiín ró jeē cacán tahú ndasí ró jehē maá rí, náváha cuáha ya jnúhun jeē yachí gā cuajeé tucu rí nuū ró.

#### *Bendición jiín saludo jeē sándihí*

<sup>20</sup> Te máá Yaā jeē jéhe jnúhun ndeyí sñí ni nuū yō, ni nastécu yā Jitoho yō Jesucristo mēhñu ndíyi. Te Jesús cúu pastor cujéhu jeē ndíto ñayuu cácuu nájnúhun lanchí ya. Chí jiín níñí yā ni sácutú yá contrato jeé yá jeé coo ní cáni. <sup>21</sup> Te ññúhun ni rí jeē Yaā Dios na sáha ya jeē ije ni ró jijnánhan ró, náváha cuu sáha ró táca jniñu váha ndese nújnahan ni yā. Te ññúhun ni rí jeē jiín fuerza Jesucristo jeē ndeé yá ini yō, na sáha Yaā Dios jeē cuu yó ñayuu cúsiñ ni yá jiín. Te na cáhán yō jeé yóhoyó luu cújéhu ya ní cáni. Amén.

<sup>22</sup> Hermano jijnánhan ró, cáhán ndahú rí jiín ró jeē cone cáhnu ni ró jeé stihví ni rí rohó jiín jecu-ni jnúhun ni tee rí nuū carta yáha. <sup>23</sup> Te cástúhun rí jeé hermano yō Timoteo, je ni quenda de vecáa. Te núu yachí quíji

de yáha, te cuajecoo ndíndúú rí nuū ró coto jnánhan yó.

<sup>24</sup> Te cahán ró jiín táca tēe cácuu pastor ró jiín táca hermano cá candije jeē sándeyí ni de, áchí rí. Te ñayuu Italia suni cá cahán i jeé sándeyí ni ró.

<sup>25</sup> Te ññúhun ni rí jeē na sáha ga Yaā Dios jeé váha róhó jijnánhan ró. Súcuan na cóo. Amén.

## CARTA JEE NI TEE SANTIAGO NUU ÑAYUU CACANDIJE

1 Máá rí cúu Santiago, mozo Yaá Dios jíin Jítoho yō Jesucristo. Te tēe rí carta yáha cuájeé nuū rohó ñayuu cacandije jeé cácuu ró ndihúxí uū yucún Israel, te ni cajitē núu ró ní ñáyívi. Sándeyí ni ró jijnáhan ró.

*Yaá Dios sáha jeé jécūhun ni yō*

2 Ñānī mánī, na cúsi ndasí ni ró jijnáhan ró núu quíji tiji táca jnūndóho siquí ró. <sup>3</sup> Chi cájini ró jeé núu jito ndee jnūndóho rohó núu cacandije váha ró, te yūcuan sáha jeé cútūhva ró cuándeyí ni ró. <sup>4</sup> Te na cuándeyí ni ró nde ije váha ró jíin, náváha cuu sáha ró ndihi jniñu váha, te ma cúmanī jeé squícu váha ró núu yá.

<sup>5</sup> Te núu ndé ñn ró cúmanī jecūhun ni ró caca ndichí ró jíin jnūhun Yaá Dios, na cácan ró nuū yá, te sáha ya jeé jécūhun ni ró. Chi sáha ya ndihi jeé cájicán ñayuu, te tu cúxeēn yá nuū i jeé jicán i. <sup>6</sup> Te jeé jicán ró, te cánuú candije ró jée sáha ya jeé jicán ró, te ma cáni siquí ni ró. Chi ñayuu jéni siquí ni, cúu i nájñūhun ndute mar jeé ndóna jisó cóyo cuahān cháha chúcuan sáha tachī. <sup>7</sup> Ñayuu ún ma cáni ni i jeé sáha Jítoho yō jeé jicán i. <sup>8</sup> Chi ñayuu jeé jéni ñn jéni uū ni, chi mánī násāma ni i jíin táca jniñu cásáha i.

<sup>9</sup> Táca hermano ndahú, na cúsi ni de jeé sáha Yaá Dios jeé cujéhu de. <sup>10</sup> Te hermano cucá, na cúsi ni de núu ni ndundáhú de. Chi táca tēe cucá, yachī naa jeé cucá de, nájñūhun náa ita yucú. <sup>11</sup> Chi núu ni cane niāndii te cūjimi, te íchí-ni yucú, te cóyo-ni ita, te náa-ni jeé lúu cáa. Te suni sūcuan ndoho táca tēe cucá níni sá jicu de jíin jniñu de.

*Siquí jeé jito ndee jnūndóho yóhó*

<sup>12</sup> Yōhō ndetú tēe jeé jéndeýí ni de núu jito ndee jnūndóho de. Chi núu je ni cundeyí de jíin, te niñin de premio jeé cujéhu de cotecu de ní cáni. Chi sūcuan ni jéñūhun Yaá Dios jeé cuáha ya nuū ñayuu jeé maní jíin yá. <sup>13</sup> Núu ñn ñayuu jicán ini i jeé sáha i cuēchi, te ma cáni ni i jeé nuū Yaá Dios véji jeé jicán sáha i cuēchi. Chi ni ñn ma cúu cuiti sáha jeé quívi Yaá Dios cuēchi, te ni máá yá tu squívi ya ni ñn ñayuu nuū cuēchi. <sup>14</sup> Chi sa suhva jeé ndiyo néé ni máá i, suu sáha jeé jicán ini i sáha i cuēchi, te scánda ini i chí stáhú un i. <sup>15</sup> Te jeé ndiyo néé ni i, yūcuan quejéé cuēchi. Te cuēchi ún, núu je ni cunihin, te sáha jeé jnahnú ndetú ñayuu. <sup>16</sup> Núu sūcuan te ma stívi ró cani ni ró jijnáhan ró, ñānī mánī.

<sup>17</sup> Táca jée cútahú yō jeé váha jeé lúu iyó, chí véji nde andívi núu máá Yaá Dios, Yaá ni sáha táca jée ndíndēe íin andívi. Te máá yá tu

násāma cuiti ini yá nájñūhun násāma nduva jíin cuándahú. <sup>18</sup> Te ni sáha ya jeé cotecu yō ní cáni, chí ni candíje yó jnūhun ndaá yá. Te ni nduu yó nájñūhun sēhe nuū yá nuū táca gá sēhe ya jeé quíji, chí sūcuan ni nujnahan ni yá sáha ya.

*Siquí ndese chiñúhún ndaá yō yá*

<sup>19</sup> Núu sūcuan te táca rohó ñānī mánī, ñama na chúsohó ró jnūhun ya, te sa suhva ma cahán yachí ró, ni ma quívi yachí ni ró. <sup>20</sup> Chi ñayuu cáquiti ni, tu sáha i jniñu ndaá jeé cuní Yaá Dios. <sup>21</sup> Núu sūcuan te na siáá ró táca jniñu jnéhen jíin jniñu néé jéé ni cáya jíin ró. Te na cóo vitá ni ró te cuatáhú ró jnūhun ya jeé ni quívi ini anuá ró. Chi jnūhun un ndiso poder jeé cácu ánuá ró.

<sup>22</sup> Te na squícu ró jée steén jnūhun ún, te nasūu máá jée cūni sóho ró sūcuan-ni, chí núu sūcuan te cástáhú ró máá ró, chí tu níhin jniñu núu tu squícu ró. <sup>23</sup> Chi tēe jeé jíni sóho de jnūhun ya sūcuan-ni, te tu squícu de, cúu de nájñūhun ñn tēe jeé jito de nuū espejo ndese cá nuū de. <sup>24</sup> Te jito váha de nuū de, te cuahān-ni de, te náa ni de ndese cá nuū de. <sup>25</sup> Te núu ñn tēe tu náa ni de jnūhun jíni sóho de, chí sa suhva chúhun váha ni de jeé cahán máá ley ndaá Jesús jeé ni sáha libre yohó, te núu cuiñi níhin de jíin, te squícu de jeé ndácu, yūcuán na te quéndōo ndetú de jíin jniñu váha jeé sáha de.

<sup>26</sup> Te núu ndé ñn ró jéni ni ró jeé chiñúhún váha ró Yaá Dios, te núu tu ndito ró yáá ró, núu sūcuan te stáhú ró máá ró, te tu ndé jéniñu jeé chiñúhún ró yá. <sup>27</sup> Ñayuu jeé chiñúhún ndoo chiñúhún ndaá i máá Táta yō Yaá Dios, chí jniñu yáha sáha i: Chíndéé ñáhan i sūchi ní caquendōo ndáhú jíin ñahan ní caquendōo ndáhú, núu na-ni jnūndóho iyó. Te tu sájnéhén i ánuá i jíin jniñu néé iyó ñáyívi.

*Ma cúhichí ni yō coto yó ñayuu ndahú*

## 2

<sup>1</sup> Ñānī mánī, cacandije ró Jítoho yō Jesucristo jeé cujéhu luu ya. Núu sūcuan te ma sáha ró cuenta ndese cúu ñn ñayuu, chí inuú sáha ró jíin ndihi i. <sup>2</sup> Chi iyó jínu quívi ñn tēe ini vehe nuū cándutútú ró, te yhi xehyu oro ndaha de, te ñūhun de sahma váha. Te suni iyó jínu quívi ñn tēe ndáhú, te ñūhun de sahma tahndé. <sup>3</sup> Te tú váha núu sáha yíñúhún ró jíin tēe ñūhun sahma váha, te cahán ró jíin de: Cucóo ní lugar váha yáha. Te cahán ró jíin tēe ndáhú: Yūcuán cuiñi ní, chí yáha cucóo ní nuū ñūhun, achi ró. <sup>4</sup> Chi núu cásáha ró sūcuan, te tu jéni váha ni ró siquí jnahan ró, chí sán sáha ró jíin tēe cucá jíin tēe ndáhú.

<sup>5</sup> Ñānī mánī, chúsohó ró jnūhun cáhán rí: Yaá Dios ni nacáji ya ñayuu ndahú ini ñáyívi yáha jée cóo cucá i jíin jnūhun cacandije i ya,

te nihĩn i tahũ i ñuu nuũ ndácu ya jniñũ. Chi ni jejnũhun ya cuãha ya un nuũ ñayuu jeẽ manĩ jiĩn yá. <sup>6</sup> Te máá ró chi sa suhva cájehẽ ró jnũhun canu ñayuu ndahũ. ¿Te á násũu tée cúca cúu jeẽ castáhũ róhó siquĩ jeẽ nihĩn de xũhun ró, te yachi jéquin de cuẽchi siquĩ ró nuũ tohó? <sup>7</sup> Te suni cácahãn neé de siquĩ Cristo, te suu sihvĩ máá yá cúu jeẽ cánanĩ ró cristiano.

<sup>8</sup> Vãha cásaãha ró te núu cáscuicu ndije ró máá jnũhun jéhuu ga jeẽ cahãn ley, nãjnũhun yosó nuũ tútu iĩ: Cundáhũ ni ró jnãhan ró nãjnũhun cundáhũ ni ró máá ró, achí. <sup>9</sup> Te núu sãĩn sãha ró jiĩn ñayuu cúca jiĩn ñayuu ndahũ, núu súcuan te cuẽchi cásaãha ró, te jéconde cuẽchi siquĩ ró jeẽ stívi ró ley Yãã Dios. <sup>10</sup> Chi núu iĩn ñayuu stívi i iĩn-ni jniñũ ndácu ley, te vësũ na squicu i ndihĩ ga, te nãjnũhun ni stívi i ndihĩ ley, te ndihĩ un jéconde cuẽchi siquĩ i. <sup>11</sup> Chi Yãã jeẽ ni cáhãn jeẽ ma cósiquĩ ndéẽ jnãhan ró, suni ni cahãn yã jeẽ ma cáhni ró ndiyi. Te vësũ tu ní cásiquĩ ndéẽ jnãhan ró, te núu ni jehni ró ndiyi, núu súcuan te je ni stívi ndihĩ ró ley. <sup>12</sup> Te táca jéẽ cahãn ró jiĩn jéẽ sãha ró, chi sãha ró cuenta jeẽ sãndaã yã ndihĩ un jiĩn máá ley Jesús jeẽ ni sãha libre rohó. <sup>13</sup> Chi quivĩ sãndaã yã jniñũ, te ñayuu jeẽ tu ní cundáhũ ni jnãhan, suni ma nihĩn i jnũhun cundáhũ ni. Te ñayuu ni cundáhũ ni jnãhan, cusũ ni i jeẽ ní ndahva yã cuẽchi i máá quívĩ sãndaã yã jniñũ.

#### *Tu jéjniñũ jeẽ candíje yó núu tu squícu yó*

<sup>14</sup> Ñãni máni, núu cáhãn iĩn tée jeẽ candíje de jeẽ sãha ya jehẽ de, te núu tu sãha de jniñũ váha, ¿te ndé jéjniñũ jeẽ candíje de ún? ¿A cuu cácu anuá de jiĩn jéẽ cahãn-ni de jeẽ candíje de, te núu tu sãha de jniñũ váha? <sup>15</sup> Te núu iĩn hermano yó chí hermana yó, cúmanĩ sahna i jiĩn jéẽ cáji i táca quívĩ, <sup>16</sup> te núu iĩn ró cáhãn jiĩn i: Cuandeyĩ ni ró, te cusúcun váha ró te caji váha ró, achí ró jiĩn i, te núu tu ní jehẽ ro jéẽ jini ñũhũn i cotecu i, ¿te ndé jéjniñũ jeẽ cahãn ró súcuan? <sup>17</sup> Te suni súcuan cúu jeẽ núu achí ró jeẽ candíje ró jeẽ sãha ya jehẽ ró, te núu tu sãha ró jniñũ váha, núu súcuan te tu ndé jéjniñũ cuiti jeẽ cahãn-ni ró jeẽ candíje ró.

<sup>18</sup> Te sanaa te cahãn iĩn ñayuu: Róhó chi candíje ró jéẽ sãha ya jehẽ ró, te ruhũ chi sãha ri jniñũ váha. ¿Na jiĩn stéẽn ró jeẽ candíje ró jeẽ sãha ya jehẽ ró, te núu tú na jniñũ váha sãha ró? Te ruhũ chi sãha ri jniñũ váha te súcuan stéẽn rĩ jeẽ candíje ri jeẽ sãha ya jehẽ rĩ. <sup>19</sup> Ndaã chi cándíje ró jeẽ iyó iĩn-ni Yãã Dios. Te va iyó váha núu súcuan. Te tachĩ chi suni súcuan cácandíje, te cácuasi i jeẽ cáyũhũ, chi tu cásaãha jniñũ váha. <sup>20</sup> ¿Te naun tu jécũhun ni ró? ¿A tu jini ró jeẽ núu tu sãha ró jniñũ váha, te tu ndé jéjniñũ cuiti jeẽ cahãn ró jeẽ candíje ró? <sup>21</sup> Te jí yó Abraham, ni ndahva yã cuẽchi de siquĩ jeẽ ni sãha de jniñũ

vãha. Chi ni jetáhũ de jeẽ ni cáhãn yã jeẽ cahni de sêhe de Isaac socõ de i nuũ altar. <sup>22</sup> Te jécũhun ni ró jeẽ siquĩ jeẽ ní candíje de jeẽ sãha ya jeẽ ni jéjnũhun ya nuũ de, jeẽ yúcuan ní jetáhũ de jeẽ ni cáhãn yã jeẽ socõ de sêhe de. Te jeẽ ní jetáhũ de, suu ni steén jeẽ candíje ndije de jeẽ sãha ya jeẽ ni jéjnũhun ya nuũ de. <sup>23</sup> Te súcuan ni cundaã jnũhun cáhãn tutu iĩ: Abraham ni candíje de jeẽ ni jéjnũhun ya nuũ de, te jeẽ yúcuan ní ndahva yã cuẽchi de, achí tutu. Te ni conani de amigo Yãã Dios.

<sup>24</sup> Núu súcuan te je ni cajini ró jeẽ ndahva Yãã Dios cuẽchi ñayuu jeẽ casãha i jniñũ váha siquĩ jeẽ cácandíje i jeẽ sãha ya jehẽ i, te nasũu máá jéẽ cahãn-ni i jeẽ candíje i. <sup>25</sup> Te suni súcuan Rahab, vësũ ñahan tíjni ni ni cuu ña xĩhna gã, te ni ndahva yã cuẽchi ña siquĩ jeẽ ni sãha ña jniñũ váha. Chi ni jehẽ núu ña vehe nuũ táca mozo ni taji Josué, te ni chuhichĩ ña de inga ichi, návãha cácu de nuũ tée cánducũ cahni de. Te jeẽ yúcuan ní ndahva Yãã Dios cuẽchi ña. <sup>26</sup> Te iĩn ñayuu núu tuá anuá i nuũ yiqui cúũu i, te ndiyi cúu i. Te suni súcuan núu cándíje yó jeẽ sãha ya jehẽ yó, te núu tu sãha yó jniñũ váha, te nãjnũhun ndiyi cúu yó.

#### *Jnũhun siquĩ yãã yó*

### 3

<sup>1</sup> Ñãni máni, ma cáni ni cuehẽ ró cuu ró maestro steén jnũhun ya. Chi cájini ró jeẽ yóhó jéẽ steén jnũhun, cuehẽ gã cuẽchi ndenehen ya siquĩ yó. <sup>2</sup> Chi ndihĩ yó stívi cuehẽ jniñũ. Te núu iĩn tée cuu condito de yáá de jeẽ ma stívi de jiĩn ni iĩn jeẽ cahãn de, núu súcuan te yóhyo váha tée cúu de, te suni cuu condito de ní gã de jeẽ ma stívi de. <sup>3</sup> Chi cúu nãjnũhun jeẽ chíhi yó freno yuhu caballo, te súcuan snáhnũ yó ní tĩ jeẽ quihĩn tĩ jiĩn yó ndé nuũ cuni yó. <sup>4</sup> Te suni súcuan táca barco, vësũ náhnũ ndasĩ, te vësũ nihĩn chũndahá táchĩ, te jiĩn iĩn timón lulĩ-ni te cuu scuicó tée scáca, te quihĩn de jiĩn ndé nuũ cuni de. <sup>5</sup> Te suni súcuan cúu yáá yó, chí vësũ lulĩ-ni, te cuehẽ teyĩ sãha yó jiĩn. Te suni jini yó jeẽ iĩn ñũhũn lulĩ cuu jniñũ jeẽ cayũ iĩn yucu cáhnũ ndasĩ. <sup>6</sup> Te suni súcuan yáá yó, chí sãha nãjnũhun iĩn ñũhũn, chí scuíquĩn cuehẽ teyĩ jniñũ néẽ. Te yáá yó cúu iĩn parte lulĩ yiqui cúũu yó, te sãha jeẽ quívĩ ní yó cuẽchi. Te infierno cúu jeẽ scuíquĩn jnũhun néẽ jiĩn yáá yó, te yáá yó scuíquĩn cuehẽ jniñũ néẽ ní tiempo jeẽ iyó yó iĩn ñayivĩ. <sup>7</sup> Te ñayuu chi cuu snáhnũ i táca quiti jiĩn saa jiĩn cóo jiĩn quiti ñũhũn nuũ mar, te je ni snáhnũ i cuehẽ tĩ. <sup>8</sup> Te ni iĩn ñayuu ma cúu condito i yáá i. Chi iĩn jeẽ neé jéẽ ma cúu condito i cúu. Te nãjnũhun yuhu cóo jeẽ ñũhũn chitú veneno jeẽ jéhni, súcuan cúu yáá yó. <sup>9</sup> Jiĩn yáá yó chíñũhũn yó Tatá yó Yãã Dios, te suni jiĩn yáá yó cahãn ndevãha yo siquĩ ñayuu jeẽ ni

sáha ya ánuá i nájnūhun iyó máá yá. <sup>10</sup> Īn-ni yuhu cáne jnūhun chífúhún yó yá jín jnūhun cáhán ndeváha yó. Nání mání, tu iyó váha cuítí jeé súcuan. <sup>11</sup> ¿A ĩn-ni tesóco cáne ndute váha jín ndute úvuá, chí naún? <sup>12</sup> Nání mání, ¿á cuu cuun ndehē oliva xiní yúnu higo, te á cuu cuun ndehē higo xiní yoyucú uva, chí naún? Te suni súcuan ĩn tesóco ma cuu cane ndute úhvuá jín ndute váha.

#### *Jnūhun ndíhí jeé véji nuū Yaā Dios*

<sup>13</sup> Te núu ndé ĩn rō ndíhí te jécūhun vāha ni, núu súcuan te jín jeé jíca ndáa rō steén rō jeé súcuan cúu rō. Te na cóo suchí ni rō modo jeé jéhe jnūhun ndíhí yá. <sup>14</sup> Te núu cácuésún teyí ni rō te ndúcú rō jeé cujéhu máá rō, núu súcuan te ma cutéyí rō cani ni rō jeé ndíhí rō. Chí suu cúu jeé stahú rō, te cúu rō contra siquī jnūhun ndáa. <sup>15</sup> Chí ñayuu cándāa súcuan, nasūu núu Yaā Dios véji jeé ndíhí i. Chí cuenta ñayiví, jín cuenta anuá neé ñayuu, jín cuenta máá jéxeén cúu. <sup>16</sup> Chí nuū iyó ñayuu cuuésún ni jín ñayuu nducú jeé cujéhu máá, suni yūcuan iyó jnūhun sáca núu jín táca jniūu neé. <sup>17</sup> Te jnūhun ndíhí jeé véji nuū Yaā Dios, núu ni sáha jeé ní ndundíhí ñayuu, yūcuán na te iyó ndoo ánuá i. Te suni yúcu maní i jín jnāhan i, te vítā ni i, te tú níhni ni i. Te cundáhu ni i jnāhan i, te sáha i jniūu váha. Te suni iyó ndáa i, te tu stáhú i. <sup>18</sup> Te ñayuu cáyūcu mání jín jnāhan, jín jnūhun maní casáha i táca jniūu ndáa, te nanihín i jeé quéndoo ndáa i.

#### *Jeé ma cutóo ni yō jeé iyó ini ñayiví*

### 4

<sup>1</sup> ¿Te ndese quejéé jeé cájejnāhan rō jín jeé cátejnāhan rō? Quejéé siquī jeé cándiyo neé ni rō, te yōhyo scánda ini anuá rō. <sup>2</sup> Chí cándiyo ni rō, te tu cánevāha rō, te suu sáha jeé cájejni rō ndíyí. Cándiyo ni rō jeé névāha jnāhan rō, te tu níhín rō, te suu sáha jeé cátejnāhan rō te cájejnāhan rō. Te tu cánihín rō jeé cuní rō, chí tu cájicān rō nuū Yaā Dios. <sup>3</sup> Te núu cájicān rō, te tu cánihín rō, chí tu cájicān váha rō, chí mání jeé cusī ni máá rō cúu jeé cájicān rō nuū yá. <sup>4</sup> Ñayuu castóo Yaā Dios cácuu rō. ¿A tu cájini rō jeé núu cutóo ni rō jeé iyó ini ñayiví, yūcuan cúu jeé cájito uhū rō Yaā Dios? Chí ñayuu jeé cutóo ni jeé iyó ñayiví, ndúu i ñayuu jíto uhū nuū Yaā Dios. <sup>5</sup> Te tu cáhán saá-ni jnūhun yáha jeé yosó núu tútu i: Máá Espíritu jeé ní jéhe Yaā Dios jeé ndéé ini yó, cúcuifí ni yá jeé súcuan casáha yó, chí maní yá jín yó, achí. <sup>6</sup> Te jeé váha ni Yaā Dios, te jéhe ya fuerza ini yō jeé ma sáha yó súcuan. Chí cáhán tutu i: Yaā Dios jési yá nuū ñayuu casáha téyí máá, te váha ni yá chindéé ñáhan yá ñayuu casáha suchí máá, achí. <sup>7</sup> Núu súcuan te cuandetu rō nuū Yaā Dios. Te cuiñi níhín rō jeé ma cuatáhú rō jexeén, te cunu coto rōhó jijnāhan rō. <sup>8</sup> Maní

gā coo rō jín Yaā Dios, te víhyá gā steén yá jeé maní yá jín rō. Róhó jéé casáha cuéchi, na sándoo rō máá rō, stóo rō cuéchi. Te rōhó jeé cácuu rō coo maní rō jín Yaā Dios níni jeé cácuu rō cutóo ni rō jeé iyó ini ñayiví, na sándoo rō ánuá rō jeé tuá coo rō súcuan. <sup>9</sup> Na jnāhuhū ni rō, te cucuíhyá ni rō, te na ndáhyū rō siquī jeé iyó cuéchi rō. Te vesú ni cajecú rō, te vijna na ndáhyū cohó rō. Te vesú ni cacusiñi rō, te vijna na ndúcuíhyá ni rō. <sup>10</sup> Na sásuchí rō máá rō nuū Yaā Dios, te sájéhu ya rōhó.

#### *Ma cóndihvi ni yō siquī cuéchi jnāhan yó*

<sup>11</sup> Hermano jijnāhan rō, ma cáhán neé rō siquī jnāhan rō. Chí tēe jeé cáhán neé siquī jnāhan, chí jéé ndihví ni siquī cuéchi jnāhan, nájnūhun jeé siquī ley yá cáhán neé de, chí tu squícu de ley jeé cundáhu ni yō jnāhan yó, te nájnūhun cáhán de jeé tu iyó ndáa ley yá. Te núu cáhán rō jeé tu iyó ndáa ley yá, núu súcuan te nasūu jeé squícu rō, chí sa jeé cáhán rō siquī. <sup>12</sup> Iyó ĩn-ni Yaā jeé ní jéhe ley, te máá-ni ya cúu jeé sándaá siquī cuéchi. Te jnama ya ñayuu cácandíje te snáhnú ndetu yá ñayuu tu cácandíje. Núu súcuan ¿te na jniūu ndíso rō jeé sándaá rō siquī jnāhan rō?

#### *Tú váha jeé satéyí yó máá yó*

<sup>13</sup> Vijna te cáhán rī jín rōhó jéé cácahán: Vijna chí sájnē te quihín yō ũuu yūcuan, te coyūcu yó ĩn cuiyá, te cuaan yó xíco yó, te níhín yō siquī, achí rō. <sup>14</sup> Te tu jini cuítí rō ndese coo sajnē. ¿Chí na vé va víhí cúu vida rō? Cúu nájnūhun ĩn vicó nūhún jéé ĩn nūnúu-ni núcūhun, te yūcuán na te ndéchi-ni cuahán. <sup>15</sup> Chí sa váha ga na cáhán rō: Núu cuní máá Jítoho yó te cotecu yó te sáha yó jeé yáha chí jéé yūcuan, achí rō. <sup>16</sup> Te sa suhva mání cácutéyí ni rō cácahán rō. Te tú váha jeé súcuan cácutéyí ni rō. <sup>17</sup> Te núu ĩn ñayuu jini i sáha i jniūu váha, te núu tu sáha i, te cuéchi cúu núu súcuan.

#### *Jnūhun cáhán nuū tēe cúcá*

### 5

<sup>1</sup> Te cáhán rī jín táca rōhó tēe cúcá, jéé na ndáhyū rō te ndahyū cohó rō siquī jnūndóho jeé quíji nuū rō. <sup>2</sup> Chí ndajniñu cúcá cánevāha rō, je téhyu. Te sahna váha rō, je tēe tiquixín. <sup>3</sup> Te oro jini plata cánevāha rō, chí je cáne xehyu. Te xehyu un steén jeé ní casáha rō jniūu stáhú jín xūhun rō. Te yūcuan cúu jeé ndúnhin cuéchi siquī rō, nájnūhun ĩn ñuhún jeé snáa yiqui cúñu rō. Chí ni cacaya cuehē rō ndajniñu váha quiví cuándihí yáha. <sup>4</sup> Te táca tēe ni cajehnde trigo rō, tu ní cáchunaa váha rō yáhu de. Te vijna cácana jee de nuū Yaā Dios, Yaā cúu Jítoho nuū táca ndajéhé andiví, jeé súcuan ni casáha rō. Te jini sōho ya jeé cácana jee tēe ni cajehnde ún. <sup>5</sup> Cátecu váha ndasí rō ini ñayiví yáha, te casáha rō táca jeé cácusī ni máá rō.

Te cájito yúcuñ ró maá ró, te cúu ró nájnūhun quíti néñu jeē ndétu quiví cúu. <sup>6</sup> Te ni catee ró cuēchi siquī ñáyyu ndaā, te nde ni cajehni ró i. Te tu ní cúu casi i jeē casáha ró.

*Jeē na cóo paciencia ni yō te cacān tahu yō*

<sup>7</sup> Hermano, núu súcuan te coo paciencia ni rō condetu ró ndé quiví ndíji máá Jítóho yō. Tēe sájniñu ñuhun, cánuú coo paciencia ni de condetu de nde quiji saū néhen jíin sáū néñu isa, te sáá te nihīn de nunī váha jeē jéhe itu. <sup>8</sup> Te suni súcuan coo paciencia ni rō, te ndeyí coo ni rō condetu ró, chí cuacuyajni ndee máá Jítóho yō. <sup>9</sup> Te ma cahán sōo ró siquī jeē sáha jnáhan ró, hermano, náváha ma jécondee cuēchi siquī rō. Chí máá Yaā jeē sándaā cuēchi, je yajni ndíji ya. <sup>10</sup> Nánī mánī, conahan ró jijnáhan ró ndese ni casáha tēe ni canacani jnūhun máá Jítóho yō nde jenahán, chí ni cacuu de ñin ejemplo nuū yō. Chí vesú ni candoho de, te ni ñyo paciencia ni de. <sup>11</sup> Te cáhán yō jeē ñáyyu cájendeyí ni jíin jnūndóho, ndetū cúu i sáha Yaā Dios. Chí ni cajini ró jnūhun ndese ni jendeyí ni Job jíin jnūndóho, te suni cájini ró jeē yóhoyo váha ga ni quendō de ni sáha máá Jítóho yō ná ni yáha jnūndóho. Chí yóhoyo cúndáhú ni yā yohó, te váha ndasí ni yā jíin yó.

<sup>12</sup> Nánī mánī, jeē cánuú gá cúu jeē ma cahán cáha ró sihví Yaā Dios jíin jnūhun cácahān teyí ró. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chíi ñayiví, te ni ñin ga jnūhun súcuan ma cahán teyí ró. Chí núu cahān rō jeē cuu, te súcuan-ni cahān rō. Te núu cahān rō jeē tuú, te súcuan-ni cahān rō, ma scáa gā rō cahān rō, náváha ma ndénehen Yaā Dios cuēchi siquī rō.

<sup>13</sup> Te núu íyó ñin ró jéē ndóho jnūndóho, te na cacān tahu rō. Te núu íyó ñin ró jéē cúsiñ ni, te na cáta ró yaa jeē chíñúhún ró yá. <sup>14</sup> Te núu íyó ñin ró jéē cuhú, te na cána ró tēe jéhnu cándito ñayuu cácandíje. Te na cacān tahu de jehē ñayuu cuhú. Te jíin sihví máá Jítóho yō na chíhi de aceite i. <sup>15</sup> Te núu cácandíje de jeē sáha Jítóho yō jeē cájicān tahu de, yūcuán na te jnama ya ñayuu cuhú. Chí nasáváha ya i, te núu ni sáha i cuēchi, te cone cáhnu ni yā nuū i. <sup>16</sup> Núu súcuan te nacani ndaā rō cuēchi ró núu jnáhan ró, te cacān tahu rō jehē jnáhan ró náváha nduváha ró jíjnáhan ró. Chí núu ñin tēe ndaā ndíhví ni de jíicān tahu de, te yóhoyo váha níhín jniñu, chí sáha ya jeē jíicān de. <sup>17</sup> Chí Elías, tēe ni nacani jnūhun Yaā Dios jenahán, suni ñin tēe jeē nájnūhun íyó máá yó ni cuu de. Te ni jíicān tahu ndasí de jeē ma cúun saū, te tu ní cúun saū unī cuiyā ññu yō. <sup>18</sup> Yūcuán na te ni jíicān tahu tucu de, te ni cuun saū, te ni canecoo tucu táca jéē jéhe ñuhun.

<sup>19</sup> Nánī mánī, núu ñin ró ni stóo ichi ndaā, te núu inga rō nachuhichí ró jnáhan ró, <sup>20</sup> núu

súcuan te cuni rō jeē núu ni nachuhichí ró tēe ni quiví cuēchi, te je ni jnama ró de jeē jnahnú ndetū de núu, te súcuan íyó jnūhun cáhnu ni nuū cuēhe cuēchi de.

## CARTA HN JEE NI TEE SAN PEDRO APOSTOL NUU ÑAYU CACANDIJE

<sup>1</sup> Máá rí cúu Pedro, apóstol jeē ní tají Jesucristo, te téé rí carta yáha cuájeē nuū rohó ñáyuú ní cajitē nuú, te cáyūcu jíca ró ní Ponto, Galacia, Capadocia, Asia, jíin Bitinia. <sup>2</sup> Te máá Tátá yō Yaā Dios ní nacáji ya rohó, chí súcuán ní tee ní yā nde ná tu jecōo ñayíví. Te jíin Espíritu Santo ní sáha ya jeē iyó ndoo iyó í rō cájētáhu ró nuū yā, te ní nacate ya anuá rō jíin níñi Jesucristo. Te ñūhun ní rí jeē na cáyá gā táca jéē váha jeē sáha ya rohó, jíin jéē coo ndeyí coo sí ní rō jíjnáhan rō.

*Jeē ñūhun ní yō táca jéē váha jeē cóo andívi*

<sup>3</sup> Na cáhán yō jeē yóhō cújéhu Yaā Dios, Yaā cúu Tátá máá Jítoho yō Jesucristo. Chí ní cundáhú ndasí ní yā yohó, te ní sáha ya jeē ní nacacu jeē yó, siquí jeē ní natecu Jesucristo mēñū ndíyí. Te jeē yúcuán níni cáñuhun ní yō táca jéē váha jeē coo. <sup>4</sup> Chí níñi rō tahú jeē ñáñūhun váha íni andívi jeē cúu ró jíjnáhan rō. Te tahú un má náa cuítí, ní ma tívi cuítí, ní ma ndíhi cuítí. <sup>5</sup> Chí cácadíje ró jéē sáha Yaā Dios jehē rō, te jeē yúcuán ndíto ya rohó jíin poder yā, náváha jnama ya rohó quíví sándíhi, chí ní sándaá yā jeē súcuán coo.

<sup>6</sup> Jeē yúcuán cácusí ndasí ní rō, vēsú cájito ró cuéhē ndinuú jñūdóho jecu-ni quíví. <sup>7</sup> Chí nájnūhun jeē stuhvá ñayuu oro jíin ñūñūn, jíto ndee í núu jeē váha cúu, suni súcuán cánuú coto ndee jñūdóho róhó núu cácadíje níhin ró chí tuú. Chí jeē cácadíje níhin ró, chí yahu ndasí gá cúu vēsú oro, ndajñíñū jeē náa. Te yúcuán cúu jeē cuajnúhún yá rohó, te sájéhu ya rohó, te squéndōo yíñūhún yá rohó quíví quenda ndíjin Jesucristo.

<sup>8</sup> Te vēsú tu ní cájito ró nuū yā, te cáhíyo maní ndasí ró jíin yā. Te cácadíje níhin ró yá vēsú tu cájito ró nuū yá víjna. Te yóhō luu cácusí ndasí ní rō, chí nde tuá níñi cuítí yō jñūhun castūhun yó ndese cúsi ní yō. <sup>9</sup> Te níñi tahú ró jeē cácu ánuá rō, chí jeē yúcuán cúu jeē cácadíje ró.

<sup>10</sup> Te téé ní canacani jñūhun Yaā Dios nde jenahán, ní cananducú yúcuán de ní caca-jñūhun váha de siquí jñūhun ndese jnama ya yohó. Te ní cacachí de ndese sáha Yaā Dios jeē váha róhó jíjnáhan rō. <sup>11</sup> Chí nde ná tu coo, te ní steén Espíritu Cristo nuū de jíjnáhan de ndese quíji jñūdóho siquí Cristo jíin ndese luu ndujéhu tucu ya jeē yáha jñūdóho ún. Te ní cananducú yúcuán de jeē na jécūhun ní de ndé quíví quíji Cristo te ndese coo táca jéē ní cáhán máá Espíritu jeē ndeé íni de. <sup>12</sup> Te ní steén Yaā Dios nuū de jeē násū máá de coto jñíñū jeē ní canacani

de ún, chí sa máá yó cúu jeē cóto. Te víjna je ní cajini sóho máá ró jñūhun ún, chí táca téé nacani jñūhun jnama ya yohó, ní canacani de nuū ró, ní sáha poder Espíritu Santo jeē ní quíji íchi andívi. Te jñūhun ún chí nde máá ndajjéé Yaā Dios cananducú náváha na jécūhun ní.

*Cúni yā jeē coo ndoo ánuá yó*

<sup>13</sup> Jeē yúcuán ndito na cóo xini ró jíjnáhan ró, te cájí coo ní rō. Te cocuhun ndasí ní ró jeē níñi rō táca jéē váha jeē sáha Yaā Dios rohó quíví quenda ndíjin Jesucristo. <sup>14</sup> Te na cúu ró séhe jeē cájētáhu váha. Te ma sáha gá rō táca jñíñū jeē ní cacusí ní rō sáha ró nde ná tu jecūhun ní rō jñūhun Yaā Dios. <sup>15</sup> Chí sa suhva na cóo ndoo ánuá ró jíin táca jñíñū cása rō, chí Yaā ní cana róhó, Yaā iyó ndoo cúu ya. <sup>16</sup> Chí súcuán cáhán tutu íi: Na cóo ndoo ró jíjnáhan ró, chí ruhú iyó ndoo rí, achí yá.

<sup>17</sup> Te núu cácahán rō Tátá ró jíin Yaā Dios, núu súcuán te na cáca yíñūhún ró nuū yá táca quíví jéé cájica ró ñayívi yáha. Chí máá yá sándaá siquí ndese ní casáha íin íin yó, te tu sáha ya cuenta ndese cúu íin íin yó, chí inuú sáha ya jíin ndíhi yó. <sup>18</sup> Chí ní jnama ya rohó núu táca costumbre jeē ní cajequin jíi ró, jeē ní cajejníñū cáha ró nuú. Te cájini váha ró jéé yahu cúu jeē ní jnama ya rohó. Chí tu ní chúnaa yā jíin ndajñíñū jeē náa, nájnūhun oro jíin plata, <sup>19</sup> chí sa suhva jíin níñi Cristo jeē yáhu ndasí gá cúu. Chí ní socó yá máá yá nájnūhun íin londe, quítí iyó váha iyó ndoo. <sup>20</sup> Chí jeē yúcuán ní jeni Yaā Dios máá Cristo nde ná tu jecōo ñayívi, te ní cane ndíjin Cristo máá tiempo cuándíhi yáha, náváha quendōo váha ánuá ró jíjnáhan ró. <sup>21</sup> Te jeē jíin Cristo te cácadíje ró Yaā Dios. Chí ní sáha Yaā Dios jeē ní natecu yá mēñū ndíyí jíin jéē ní ndujéhu ya. Te jeē yúcuán cácadíje ró Yaā Dios, te cáñuhun ní ró coto ró yá.

<sup>22</sup> Te víjna chí je ní candundoo ánuá rō, chí ní cájētáhu ró jñūhun ndaá ní sáha Espíritu jíin ró, náváha cundáhú ndíje ní rō hermano cácadíje. Núu súcuán te na cundáhú ndasí ní rō jnáhan ró nde jíin íni jíin ánuá rō. <sup>23</sup> Chí je ní canacacu jeé ró, te nasū chíji yucūn ñayuu jeē cúu. Chí sa jñūhun Yaā Dios jeē ndíto técu ní cáni ní sáha jeē ní nacacu ró. <sup>24</sup> Chí súcuán cáhán tutu íi:

Nájnūhun yucū túu ndíhi táca ñayuu, chí jecu-ni quíví técu í.

Te nájnūhun ita yucū cúu jeē cújéhu í.

Chí íchí-ni yucū, te ndáhvá-ni ita.

<sup>25</sup> Te jñūhun Jítoho yō Yaā Dios, sa quéndōo ní cáni.

Achí tutu. Te jñūhun un cúu máá jñūhun jnama ya yohó jéē ní canacani rí nuū ró.

## 2

<sup>1</sup> Núu súcuan te na siáá ró táca jniñu néé, táca jée stahú, jée tú ndije, jee cucuésún ní, jín jée sajnúhún siquí jnánhan. <sup>2</sup> Te nájnūhun sūchi yíquí n sá ní cacu jee jéxin te jéhu, súcuan na cóndihví ní ró scuáha ró jnúhun ndaa yá, náváha cuehnu ró jín te cácu ánuá ró. <sup>3</sup> Chi je cájini ró jee yóhoyo váha ní maá Jítoho yó.

*Cristo cúu nájnūhun yuū yítuu vehe*

<sup>4</sup> Núu súcuan te maní gá coo ró jínánhan ró jín Jítoho yó Cristo. Chi cácuu ró nájnūhun templo nuū ndeé Yaa Dios, chi ndeé yá ini anuá ró. Te Cristo cúu nájnūhun in yuū cánuú gá jee yítuu yíquí templo, te sáha ya jee cótecu ró ní cáni. Te ñayuu vesú ní casquéhichi i ya, te Yaa Dios chi je ní nacáji ya Cristo chi cánuú ndasí yá, nájnūhun nacáji yó in yuū váha jee quituu yíquí vehe. <sup>5</sup> Te máá ró chi cácuu ró nájnūhun in in yuū jee cúváha templo Yaa Dios, te cotecu ró ní cáni. Te na cuáha ró jnúhun jee sama ya rohó jínánhan ró jee cúváha templo yá, cúu jee ndeé Espiritu yá ini anuá ró nájnūhun in in templo. Te suni cúní Yaa Dios jee cuu ró sútú cáhiyo ndoo cájejniñu nuū yá. Chi siquí jee ní sáha Jesucristo jehé ró, te na sóc ró maá ró jee cuajniñu ró nuū yá sáha ró táca jniñu váha jee nújnahan ní Yaa Dios. <sup>6</sup> Chi súcuan cáhán tutu i:

Vijna te nde ñuu rí Sion jéquin rí in yuū jee cánuú gá jee quituu yíquí vehe, chi ní nacáji rí yá nájnūhun in yuū váha jee cánuú téyí.

Te ñayuu jee candíje i ya, jnama nahín yá i. Achí Yaa Dios, achí tutu. <sup>7</sup> Te máá ró jee cácadíje ró, chi yuū váha jee cánuú téyí cúu ya nuū ró. Te nuū ñayuu tu cácadíje chi tuú, chi sa cúndaá jee cahán tutu i:

Máá yúú jee ní casquéhichi tēe cásama vehe, suu cúu yuū cánuú gá yítuu yíquí vehe.

<sup>8</sup> Te suni cúndaá jnúhun jee cahán tutu siquí ñayuu tu cácadíje:

Cúu ya nájnūhun in yuū jee cácachihí i jehé i, nájnūhun toto jee cotúú i sáha.

Achí. Chi jee cácachihí i jehé i cúu jee casánihni ní i nuū jnúhun ya. Te je ní cúndaá jee jnahnú ndetú i siquí jee cácanihni ní i.

*Jnúhun ñayuu maá Yaa Dios*

<sup>9</sup> Te máá ró cácuu ñayuu jee ní nacáji Yaa Dios. Te suni cácuu ró sútú cájejniñu nuū maá Yaa cúu Rey, te ñayuu cáhiyo ndoo, jín ñayuu maá yá cácuu ró. Súcuan ní sáha Yaa Dios rohó náváha nacani ró jnúhun ndese yóhoyo jéhu jniñu sáha ya, chi máá yá ní cana rohó ná ní coyúcu ró nájnūhun nuū néé. Te ní squívicoo ya rohó nuū luz yá jee yóhoyo váha stéén yá ini anuá ró. <sup>10</sup> Chi nde saá te nasúu ñayuu Yaa Dios cácuu ró, te vijna je ní nduu ró ñayuu maá yá. Te nde saá chi ná tu

cundáhú ní yá rohó, te vijna je cundáhú ní yá rohó jínánhan ró.

*Jee cuajniñu váha yó nuū Yaa Dios*

<sup>11</sup> Nání maní, ini ñayví yáha cácuu ró nájnūhun ñayuu ñuu jicá jee cájica cuu tátú. Núu súcuan te cáhán ndahú rí jín ró jee ma sáha ró táca jniñu jee ndíyo néé ní ró jín modo maá ró. Chi táca ní cájejniñhan jín ró, ndúcú jee jnahnú ndetú anuá ró. <sup>12</sup> Te ndaa na cáca ró méhñu ñayuu tu jíní jnúhun Yaa Dios. Chi vesú cácahán i siquí ró, nájnūhun cácahán i siquí ñayuu casáha jniñu néé, te núu na cóto i jniñu váha casáha ró, te quiví sándaá Yaa Dios jniñu te cahán i jee yóhoyo cújéhu ya.

<sup>13</sup> Jee siquí maá Jítoho yó te cuatáhú ró nuū táca tóhó cándiso jniñu nuū ñayuu. Cuatáhú ró nuū maá rey, chi tēe cújéhu ga cúu de. <sup>14</sup> Te cuatáhú ró nuū táca gobernador jee ní jeni rey náváha stóho de ñayuu casáha jniñu néé te cuajnúhún de ñayuu casáha jniñu váha. <sup>15</sup> Chi cúní Yaa Dios jee sáha ró jniñu váha, te jee súcuan sáha ró te táca ñayuu canéé jee tu cájejúhun ní, casa i yuhu i.

<sup>16</sup> Te na cáca ndaa ró jee cácuu ró ñayuu ní nduu libre anuá, te nasúu jee ní nduu libre ró jee sáha ró jniñu néé. Chi sa cácuu ró mozo Yaa Dios, te cuajniñu váha ró nuū yá. <sup>17</sup> Coo respeto ró nuū táca ñayuu. Cundáhú ní ró hermano cácadíje. Conso iyo ró nuū Yaa Dios. Coo yíñhún ró nuū maá rey.

*Jee na ndóho yó jéhé jnánhan yó nájnūhun ní ndóho Cristo*

<sup>18</sup> Rohó jee cácuu mozo, cuatáhú ró nuū patrón ró, te coo respeto ró nuū de. Te nasúu máa-ni nuū tēe váha ní jín tēe vitá ní, chi suni nuū tēe xeén ní. <sup>19</sup> Chi in jee váha cúu núu jéndeyí ní in tēe jee stóho cáha ñayuu de siquí jee squícu de nuū Yaa Dios. <sup>20</sup> Chi núu cástóho i rohó jee casáha ró cuéchi, te ní in ma cuajnúhún rohó nuū jéndeyí ní ró jín jee ndóho ró. Te núu cástóho i rohó jee casáha ró jniñu váha, te núu jéndeyí ní ró jín, váha cúu jee váha jee nújnahan ní Yaa Dios. <sup>21</sup> Chi jee yúcuan cúu jee ní cana ya rohó jínánhan ró. Chi suni máá Cristo ní ndóho ya jee siquí ró, te súcuan ní cuu ya in ejemplo nuū ró jee na ndóho ró jéhé jnánhan ró, te súcuan condíquín ró ichi ya. <sup>22</sup> Te máá yá tú cuiti na cuéchi ní sáha ya, ní tú cuiti na jnúhun stáhú ní cáhán yá. <sup>23</sup> Ná ní cacahán neé i nuū yá, te tu ní nácahán neé yá. Te ná ní castóho i ya, te tu ní téjnahan ya jín i, chi sa ní chíhi ya maá yá ndaha Yaa Dios, Yaa sándaá váha siquí ndíhi ún. <sup>24</sup> Te ní condiso máá Cristo cuéchi yó jín yíqui cúñu yá ná ní jihí yá jicá cruz, náváha quenda yó chíji cuéchi te caca ndaa yó. Chi ní tují yá, te jee yúcuan ní canduváha ánuá ró. <sup>25</sup> Chi ní casana ró nájnūhun lanchi, te vijna je ní candicó ró ní ndívicoo ró nuū Cristo, Yaa cúu pastor ró te ndíto váha ya anuá ró.

*Ndese cánuú coyūcu váha yíi jín ñasihí*

### 3

<sup>1</sup> Suni súcuan róhó ñasihí jínáhan ró, cu-atáhú ró nuú yíi ró, návaha núu cúu de tē tu cándije jñuhun ya, te cuu scándije ró de, jeé tuá nini jín jeé cahán ró, chí máá jín jeé casáha váha ró. <sup>2</sup> Chi cuni de jeé cájica ndaa ró te cáhīyo respeto ró. <sup>3</sup> Te jeé casáha luu ró máá ró, chí nasūu máni máá ichi síquí ró sáha ró, jeé sáha luu ndasí ró xinī ró, chí jeé cúhun ró síquí oro chí sahma váha ga. <sup>4</sup> Chi sa nducú ró jeé quéndōo luu ánuá ró, te coo luu ró ñn modo jeé ma náa cuítī, suu jeé cóo vítā ní ró te coo nahín ní ró. Chí yáha cúu jeé yahu ndasí gá nuú Yaā Dios. <sup>5</sup> Chi ñahan ní cahīyo ndoo ánuá nde jenahán, suni súcuan ní casáha luu ña ánuá ña. Chí ní cañuhun ní ña Yaā Dios, te ní cajetáhú ña nuú yíi ña. <sup>6</sup> Te súcuan ní sáha Sara, chí ní jetáhú ña nuú yíi ña Abraham, te ní cahán yíñúhún ña jín de. Te róhó jínáhan ró, núu sáha váha ró te núu ma yūhu ró ní ñn, yūcuán na te coo ró nájnūhun ní iyo Sara.

<sup>7</sup> Te suni súcuan róhó yíi, na cóo vítā ní ró jín ñasihí ró. Te yíñúhún coo ró jín ña, síquí jeé núu ga fuerza ña vésú rohó, te suni síquí jeé inuú ní canihín tahú ró cotecu ró ní cáni síquí jeé váha ní Yaā Dios. Te súcuan sáha ró návaha tú casi nuú jñuhun jicán tahú ró.

*Jñuhun ñayuu cándoho síquí jeé cájica ndaa*

<sup>8</sup> Núu súcuan te inuú na cáni ní ró jínáhan ró, te cucuhyá ní ró jeé ndóho jñáhan ró, te cundáhú ní ró i nájnūhun ñani ró. Te na cóo manī ró te caní suchí ní ró. <sup>9</sup> Núu casáha neé ñayuu jín ró, te ma násáha neé ró jín i. Te núu cácahān neé i nuú ró, te ma nácahān neé ró núu i. Chí sa suhva cacān tahú ró jeé na quéndōo váha i. Chí Yaā Dios ní cana ya rohó jeé suni súcuan quéndōo váha ró. <sup>10</sup> Chí súcuan cáhān tutu íi:

Ñayuu cácuni cotecu váha te cusī ní táca quívī,

na cóto i yuhu i jeé ma cáhān neé i,  
te na cóto i jeé ma cáhān i jñuhun stáhú.

<sup>11</sup> Na cújīyo i nuú jñiñu neé, te na sáha i jñiñu váha.

Na nducú i coyūcu máni i, te na cóndihví ní i jín.

<sup>12</sup> Chí máá Jítoho yó ndíto ya ñayuu ndaa,  
te jini nahín yá jeé cájicān tahú i.

Te ñayuu casáha jñiñu neé, chí tu jétáhú yá i. Achí tutu.

<sup>13</sup> Te ní ñn ma sáha neé jín ró te núu máni jñiñu váha cándihví ní ró sáha ró. <sup>14</sup> Te vésú núu ndóho ró síquí jeé cájica ndaa ró, te yóhō ndetū cácuu ró. Núu súcuan te ma yūhu ró coto ró i, ní ma cunee ní ró. <sup>15</sup> Chí sa jín iní jín ánuá ró chíñúhún ró máá Jítoho yó Cristo. Te níni coo túhva ró nastió cuíñí víta ró te cahán yíñúhún ró jín ñayuu jeé castíhí

rohó síquí táca jeé cáñuhun ní ró. <sup>16</sup> Te caca ndaa ró jeé tú na cuéchi condee anuá ró, návaha ñayuu cácahān neé síquí ró, cucanu i jeé ní stáu yáhu i róhó jeé cájica ndaa ró chí cácañdije ró Cristo. <sup>17</sup> Chí núu cúní Yaā Dios te váha ga jeé ndóho ró síquí jeé casáha ró jñiñu váha vésú síquí núu sáha ró jñiñu neé.

<sup>18</sup> Chí máá Cristo suni ní ndoho ya, te ñn jín-ni ní jihí yá jeé síquí cuéchi ndihí yó. Yaā váha cúu ya, te ní ndoho ya jeé yohó ñayuu ní casáha jñiñu neé, návaha quívicoo yó núu Yaā Dios sáha ya. Chí ní jihí yiquí cúñu yá, te ánuá yá chí tēcu-ni ní cáni. <sup>19</sup> Te ná ní jihí yá te ní jehēn anuá yá ní nacani ya jñuhun nuú anuá ñayuu cáyindihyū. <sup>20</sup> Chí nde jenahán tu ní cájetáhú i, ná ní iyo paciencia ní Yaā Dios te ní condetu ya níni sáha Noé barco jeé naní arca. Te jín arca un ní cácu jecu-ni ñayuu, chí unā-ni i ní cácu nuú ndúte. <sup>21</sup> Te nájnūhun ní cacācu i nuú ndúte, súcuan cúu jeé jéndute yó vijna te cácu ánuá yó. Te jeé jéndute yó, nasūu jeé ndúndoo yiquí cúñu yó, chí sa jeé jicán yó nuú Yaā Dios jeé ndúndoo ánuá yó. Te súcuan te cácu yó, chí ní cundúú yó jín Jesucristo nuú jñuhun ní natecu yá. <sup>22</sup> Te ní ndaa ya cuanuhun yá andiví, te ndéé yá ichi ndávaha Yaā Dios nuú cujéñnu ya. Te táca ndajehé andiví, jín jeé cándacu jñiñu, jín jeé cájni poder, cájendetū nuú yá.

*Jeé na cuájnīñu yó jín táhū jeé ní jéhe ya nuú yó*

### 4

<sup>1</sup> Núu súcuan te nájnūhun ní ndoho Cristo jeé yó jín yiquí cúñu yá, suni súcuan na táva ní máá ró ndoho ró. Chí ñayuu jeé ní ndoho jín yiquí cúñu, tuá sáha i cuéchi. <sup>2</sup> Núu súcuan te ní tiempo jeé cuahán gā ró, na sáha ró jñiñu jeé cúní Yaā Dios, te ma sáha ga ró jñiñu jeé ndíyo neé ní ró jín modo máá ró. <sup>3</sup> Chí nde ní véji ró, te ní casáha ró cuéhé cuéchi jeé cánujñahan ní ró síquí jeé tu ní cájini ró jñuhun Yaā Dios. Te tiempo un máni máá jeé neé ní casáha ró, te ní candiyo ní ró táca jeé neé, ní canajini ró, ní casáha ró vico neé, ní cajihí ndasí ró nuú víco ró, te ní cachíñúhún ró ídolo jeé ní cáhān Yaā Dios jeé ma chíñúhún yó. <sup>4</sup> Te cácu neé ní i jeé tuá cájica ró jín i jeé sáha ró táca cuéchi xeēn jín i. Te jeé yúcuán cúu jeé cácahān neé i síquí ró. <sup>5</sup> Te máá i chí ñn quívī te nacuaña i cuenta nuú máa Yaā jeé iyó túhva ya sándaā yá jñiñu ñayuu técu jín ñayuu ní cajihí. <sup>6</sup> Chí jeé yúcuán suni ní quiñi jñuhun váha ya nuú táca ndíyo ná ní cotecu i. Te ní cundaá síquí cuéchi ní casáha i ñayiví yáha, nájnūhun cúndaá síquí ndihí ñayuu, návaha nacani ní i te cotecu anuá i ní cáni nájnūhun técu Yaā Dios.

<sup>7</sup> Te je cuacuyajni quívī jeé náa táca jeé iyó. Núu súcuan te ndito na cóo xinī ró jínáhan



ró, te condihví ni rō cacān tahú rō. <sup>8</sup> Te jeē cānuú gá cūu jeē cundáhú ndasí ni rō jnāhan rō. Chi núu cundáhú ni yō jnāhan yó, te iyó jnūhun cāhnu ni nuū cuehē cuēchi. <sup>9</sup> Sāha vāha rō jín ñayuu jeē jinú i vehe rō, te ma cuxí ni rō. <sup>10</sup> Tāca rō cuajniñu rō núu jnāhan rō, núu ndese iyó máa táhū rō jeē ni jēhe Yāa Dios jeē cuajniñu rō núu yā. Te squícu vāha rō jín táhū jeē sán sán ni jēhe ya nuū in in rō. <sup>11</sup> Núu tahú jeē nácani rō jnūhun cūu, te na cāhán rō nájñūhun jeē máa Yāa Dios cāhán. Te núu tahú jeē chindéé ñáhán rō jnāhan rō cūu, te na sāha rō jín fuerza jeē ni jēhe ya nuū rō, návāha jín ndihi jeē casáha rō te cāhán ñayuu jeē yóhoyo cújéhnu Yāa Dios siquí jeē ni sāha ya jín Jesucristo. Te na cāhán yō jeē luu cújéhnu Cristo te jnái ya poder ní cāni. Amén.

*Jeē ndóho yó siquí jeē candíje yó Cristo*

<sup>12</sup> Ñāni mání, núu vēji jñūdóho xeēn jeē coto ndee rohó, te ma cunéé ni rō caní ni rō jeē máa rō ni nihín jñūdóho xeēn gā. <sup>13</sup> Chi sa cusí ni rō jeē cándoho rō jecu jñūdóho jeē ni ndoho Cristo, návāha suni cusí ndasí ni rō quiví quéndā ndijin yā jeē cújéhnu luu ya. <sup>14</sup> Te yóhoyo ndetū rō te núu cācāhán neé i nuū rō siquí jeē cācandíje rō Cristo. Chi máa Espíritu Yāa Dios jeē cújéhnu ndasí, ndéé yā ini rō. Máa i chi cācāhán neé i siquí yā, te máa rō chi cāchíñūhún rō yā. <sup>15</sup> Te núu ndoho rō, te na ndóho rō siquí jeē cācandíje rō Cristo. Te ma ndóho rō siquí táca cuēchi nájñūhun cándoho ñayuu jéhi ndiyí, ñayuu sacuíhná, ñayuu sāha jniñu neé, jín ñayuu quiví nduu nuū jniñu jnāhan jeē tu cānuú quiví nduu. <sup>16</sup> Te sa núu in rō ndóho siquí jeē candíje rō Cristo, te ma cūcanu rō, chí sa nacuatáhú rō nuū Yāa Dios siquí jeē cūu rō cristiano.

<sup>17</sup> Chi je ni jinú quiví jeē quejéé sándaā Yāa Dios cuēchi, te xíhna gā ñayuu cácuu sēhe ya sándaā yā cuēchi. Te núu xíhna gā cuēchi máa yó quejéé yā sándaā yā, núu súcuan te xeēn gā coo jeē ndénehen ya cuēchi siquí ñayuu jeē tu ní jétáhú jñūhun vāha ya. <sup>18</sup> Te núu yóhoyo yí cácu ñayuu vāha, núu súcuan ¿te ndese cácu ñayuu casáha jniñu neé jín táca cuēchi? <sup>19</sup> Núu súcuan te rohó jeē cándoho siquí jeē súcuan cúní Yāa Dios, ma jécuiñí rō sāha rō jniñu vāha, te na chíhi rō máa rō ndaha máa Yāa jeē ni sāha rohó, chí squícu ya jeē ni jéñūhun ya.

*Jeē jēhe de consejo ñayuu cācandíje*

**5**

<sup>1</sup> Vijna te na cāhán rí jín táca rohó téé jéhnu cándito ñayuu cācandíje, chí suni téé jéhnu ndíto ñayuu cācandíje cūu máa rí. Te cūu rí testigo jeē ní jito rí ndese ni ndoho Cristo. Te suni ndujéhnu rí jín rō sāha Cristo quiví quéndā ndijin yā. <sup>2</sup> Na cóto yúcún rō

ñayuu jeē ndeé jniñu rō condito rō, jeē cácuu i nájñūhun lanchi Yāa Dios. Te na cusí ni rō condito rō i, chí súcuan cúní Yāa Dios. Te nasūu siquí jeē sáfuerza yā rohó, ni nasūu siquí jeē nihín rō xūhún, chí sa siquí jeē cúní rō cuajniñu rō. <sup>3</sup> Te nasūu jeē ndacu nihín rō jniñu nuū ñayuu cándito rō, chí sa nducú rō cuu rō in ejemplo nuū i jeē cácuu i lanchi ya. <sup>4</sup> Yūcuán na te quiví quéndā ndijin máa Yāa cūu Pastor cújéhnu nuū rohó téé cácuu pastor lanchi ya, te cuāha ya premio nuū rō jijnāhan rō jeē yóhoyo luu te ma máa cuiti.

<sup>5</sup> Te suni rohó táca téé suchí, na cuándetū rō nuū táca téé jéhnu jínā. Te ndihi rohó ñayuu cācandíje, cuándetū rō nuū jnāhan rō, te caní suchí ni rō. Chí suhva cāhán tutu: Yāa Dios jési yā nuū ñayuu casáha téyí máa, te vāha ni yā chindéé ñáhán yā ñayuu casáha suchí máa.

Achí. <sup>6</sup> Núu súcuan te na cāni suchí ni rō, chí cáyihí rō ndaha Yāa Dios jeē jnái poder. Te sájéhnu ya rohó, na jinú máa quíví. <sup>7</sup> Tāca jéé cānacani ndasí ni rō siquí, chíhi rō ndaha máa yā te máa yā coto, chí ndíto ya rohó.

<sup>8</sup> Te cájí na cóo xiní rō te ndito coo ni rō. Chí jexeén jeē jito uhú rohó, jíca cuu nducú squiví rohó jijnāhan rō núu cuēchi. Te xeēn gā sāha vésú ndicaha jeē iyo ndáhyú. <sup>9</sup> Te cuiñí nihín rō jéé ma cúndeyí jexeén jín rō, te nihín candíje rō jñūhun cúndáhú ni yā rohó. Chí cājini rō jeē suni súcuan cándoho hermano rō jeē cáyūcu ní cāhnu ñayiví. <sup>10</sup> Te núu ni jinu jeē ndoho rō jecu-ni tiempo, te Yāa Dios chí sāha ya jeē ije vāha ni rō jín jñūhun ya, jín jéé cuiñí nihín rō, te cuāha ya fuerza ini rō, te quendōo cutú rō ní cāni. Chí máa yā cūu jeē sāha táca jéé vāha yóhó, te ni cana ya yohó jéé cújéhnu luu yó jín yā ní cāni, siquí jeē nduu yó jín Jesucristo. <sup>11</sup> Te na cāhán yō jeē yóhoyo luu cújéhnu ya te jnái ya poder ní cāni. Amén.

*Saludo jeē sándihí*

<sup>12</sup> Jíní rí jeē Silvano cūu in hermano jeē squícu vāha. Te máa de cuajeé nuū rō jín carta yáha jéé ní tee rí jecu jñūhun. Te jín yáha stihví ni rí rohó, te cāhán rí jín rō jeē ndaá cūu jeē táca jéé vāha ni sāha Yāa Dios rohó, suu stéén nuū rō jeē cundáhú ndije ni yā rohó. Te na cuiñí nihín rō jín jñūhun yáha.

<sup>13</sup> Ñayuu cācandíje jeē cáyūcú ñuu Babilonia, jeē ní nacāji ya i nájñūhun ni nacāji ya rohó, cācāhán i jeé sándeyí ni rō. Te Marcos, téé cūu nájñūhun sēhe rí, suni súcuan cāhán de. <sup>14</sup> Te núu na cāhán rō jín jnāhan rō, te techūhu mání rō ndaha i.

Te na cóo ndeyí coo sī ni ndihi rō jéé cáyihí rō ndaha Jesucristo. Súcuan na cóo. Amén.

## CARTA UU JEE NI TEE SAN PEDRO APOSTOL NUU ÑAYUU CACANDIJE

<sup>1</sup> Máá rí cúu Simón Pedro, te cúu ri mozo Jesucristo, te cúu ri apóstol jeé ní taji yá. Te téu ri carta yáha cuájeé nuú rō jijnáhan rō, jeé ní sáha Yaá Dios jeé inuú-ni jín rí jijnáhan ri ni canihñ rō jñuhun luu váha jeé cácan dije yó yá. Chi Yaá ndaa cúu Yaá Dios, suu máá Jesucristo jeé jnáma yóhó. <sup>2</sup> Te ñuhun ni rí jeé na sáha ga yá jeé váha ndasí rōhó jín jeé yóhoo coo ndeyí coo sñ ni rō siquí jeé cájecuhun váha ni rō ndese Yaá cúu Yaá Dios jín Jítoho yō Jesús.

*Siquí ndese cánuú coo ñayuu cácan dije*

<sup>3</sup> Te Yaá Dios, jín poder yá ni jēhe ya nuú yō táca jéé sáha jeé cúu caca ndaa yō nuú yá jín jéé chiñúhún váha yó yá. Chi ni steén yá máá yá nuú yō, chí cúu ya Yaá jeé ní cana yóhó, siquí jeé yóhoo cujéhuu ya jín táca jniñu jéhuu sáha ya. <sup>4</sup> Jeé yóhoo ní jejnūhun ya táca jéé yóhoo jéhuu yóhoo váha sáha ya yóhó, návāha jín táca ún te nduu rō nájñuhun iyó máá yá, te cácu rō núu jniñu jeé cándiyo néé ní ñayuu casáha i ini ñayivi yáha. <sup>5</sup> Núu súcuan te na ndúcu ndeyí rō jín jñuhun yáha. Te jeé cácan dije rō, te siquí ún na chísoó rō jeé caca ndaa rō. Te jeé cájica ndaa rō, te siquí ún chísoó rō jeé cóndihvñ rí rō jecūhun váha ni rō. <sup>6</sup> Te siquí ún chísoó rō jeé casi rō modo jeé cuní máá rō. Te siquí ún chísoó rō jñuhun cuandeyí ni rō, te siquí ún chísoó rō jeé chiñúhún váha rō Yaá Dios. <sup>7</sup> Te siquí ún chísoó rō jeé cóo maní rō jín jñahan rō, te siquí ún chísoó rō jeé cundáhú ni rō jñahan rō.

<sup>8</sup> Chi núu cayá táca jniñu yáha jín rō, te suu sáha jeé ma cótecu saá-ni rō, chí sa quee váha jniñu sáha rō, siquí jeé cájecūhun ni rō ndese Yaá cúu Jítoho yō Jesucristo. <sup>9</sup> Te ñayuu jeé tu casáha jniñu yáha, nájñuhun jeé cáhíyo cuáá i, chí tu jécūhun ni i jñuhun ya, te je ni naa ni i jeé ní sándoo ya i táca cuéchi ni casáha i ichi yátá. <sup>10</sup> Jeé yúcuu na ndúcu ndeyí rō hermano, návāha coo seguro jeé ní cana ya rohó jín jéé ní nacáji ya rohó. Chi núu sáha rō táca jniñu yáha, te ma cáca yátá cuiti rō. <sup>11</sup> Yúcuán na te nune váha ichi quívi rō ini ñuu máá Jítoho yō Jesucristo, Yaá jnáma yóhó, nuú ndácu ya jniñu ní cání.

<sup>12</sup> Jeé yúcuu ma jécuiñ rí sáha ri jeé núcūhun ni rō táca jñuhun yáha, vésu je cájini rō te cáhñin ñihñ rō jín jñuhun ndaa jeé cácan dije rō. <sup>13</sup> Chi jéni ni rí jeé iyó váha sthvi ni rí rohó vijna técu gā rí, návāha nucūhun ni rō. <sup>14</sup> Chi máá Jítoho yō Jesucristo ní castūhun yá nuú rí jeé tuá cotecu nahán rí ñayivi yáha. <sup>15</sup> Jeé yúcuu na ndúcu ndeyí gá

rí stihví ni rí rohó, návāha núu je ni jihí rí, te níni nucūhun ni rō táca jñuhun yáha.

*Jeé ní cajito de jeé cujéhuu Cristo*

<sup>16</sup> Ná ni castéén rí jñuhun máá Jítoho yō Jesucristo nuú rō, ndese ndiji ya jín poder yá, te tu ní cácahñ rí in cuento-ni jeé ní catava ndichí ñayuu. Chi ná ni cahíyo ri jín yá xiní yúcu, te ní cajito jín núu rí jeé tucu ni nduu ya jeé ní nduluu jéhuu ya. <sup>17</sup> Chi ni cajini rí jeé Tatá yō Yaá Dios ni cahñ yíñúhún yá jín Jesús, te ni sajhénu ya Jesús. Chi ichi ándiví ní quíji jñuhun luu, ni cahñ Yaá Dios: Yáha cúu Sēhe ri jeé maní ndasí rí jín, te cúsu ni rí jín, áchi yá. <sup>18</sup> Te ni cajini sóho rí jñuhun un jéé ní cahñ ichi ándiví, chí ni cahñ rí jín máá Jítoho yō xiní yúcu í ún.

<sup>19</sup> Te súcuan cájini yō jeé iyó ndaa ndije táca jñuhun ni cateé téu ní canacani jñuhun ya nde jengahán. Te váha jeé na chúhun ni rō jñuhun un jijnáhan rō, chí suu cúu nájñuhun in luz jeé cayú nuú néé, nde na cundijin quívi ndiji ya, te steén yá ini anua rō nájñuhun jeé ndíndéé lucrero. <sup>20</sup> Te xíhna gā na jécūhun ni rō jeé ní in jñuhun cáhán tutu íi, nasúu jéé súcuan-ni ni cajeni ni téu cúu. <sup>21</sup> Chí táca téu ndoo jeé ní canacani jñuhun ya nde jengahán, tu ní cácahñ cuiti de jñuhun jeé cúu ni máa de. Chí sa suhva ni canacani de jñuhun Yaá Dios jeé ní steén Espíritu Santo nuú de.

*Siquí téu cástéén jñuhun stáhú  
(Judas 4-13)*

## 2

<sup>1</sup> Te méhñu ñayuu Israel ún suni ni cahíyo téu ni canacani jñuhun stáhú. Te suni súcuan coo téu steén jñuhun stáhú méhñu rō. Te squívi de jñuhun stáhú jéé tívi ñayuu sáha. Te ni ma cuajñuhún de Jítoho yō jeé jnáma ya de, te súcuan sáha de jeé jnahñu ndetú yachí de. <sup>2</sup> Te cuehē ñayuu condicūñ i modo neé jéé castéén de. Te sáha de jeé cahñ neé ñayuu siquí jñuhun váha ya jeé cúu ichi ndaa. <sup>3</sup> Te siquí jeé cándiyo ní de xūhún, te quende de xūhun rō siquí jñuhun stáhú steén de nuú rō. Te tu quíñ jñūndóho jnahñu ndetú de, chí nde jengahán je ndetú jñuhun ndonda ya siquí cuéchi de.

<sup>4</sup> Chí tu ní íne cáhnu ni Yaá Dios nuú táca ndajéhé yá jeé ní casáha cuéchi, chí sa ni jnaa yá infierno cáyindihyú nuú néé, cánuhñi jín cadena. Te ni chindihyú yá nde quívi sándaa yá siquí. <sup>5</sup> Te suni tu ní íne cáhnu ni yá nuú ñayuu jengahán, chí sa ní scūun ya saū seén siquí ñayuu ni casáha néé un. Te máá-ni Noé, téu ní nacani jñuhun ndaa, ní scácu ya de jín úxā gā ñayuu. <sup>6</sup> Te suni ní ndonda ya siquí cuéchi ñayuu ñuu Sodoma jín ñuu Gomorra, te ni cayú ñuu i ni nduu máá yáa na. Te súcuan cúu i in ejemplo nuú táca gá ñayuu sáha néé jéé quíji ga. <sup>7</sup> Te ní scácu ya Lot, chí téu ndaa ní cuu de, te ní cucuíhyá

ndasí ni de ni jito de jniñu néé ní casáha ñayuu neé un. <sup>8</sup> Chi tēe váha un ní condee de mēhñu ñayuu ún, te ndiquiví ní nacani cuihyá ní de jeé ní jini sōho de ni jito de tācá jniñu néé ní casáha i. <sup>9</sup> Núu súcuan te máá Jítoho yō chi jnāma ya ñayuu cáchiñhún núu yā, te núu vēji jñūndóho siquī i. Te chíndihyū yā ñayuu casáha néé, návaha ndoho i castigo quiví sándaā yā cuēchi i.

<sup>10</sup> Te vīhyá gā stóho ya tēe casáha jniñu jnehén jēe ndiyo néé ní de, te cácuu jēe ní de siquī jniñu ndácu máá Jítoho yō. Nihni ndasí ní de, te cáhundeyí ní de sáha de jeé cácuu máa de, te tu cáyūhú de cahān ndeváha de siquī tāca jēe cácujeñu nuū súcun. <sup>11</sup> Te ní máá ndajehé jeé cáhiin nuū Jítoho yō, vēsú cácujeñu ga yā jíin fuerza jíin jniñu ndiiso ya, te tu cácahān ndeváha ya siquī tāca jēe cácujeñu ún.

<sup>12</sup> Te tēe ún chi cácuu de nájñuhun quiti yúcu jēe ní jéconāā tī jíin modo sáha tī, te cátañhú tī návaha nihñ ñayuu tī cahñi i tī. Chi cácahān neé de siquī tāca jēe tu cájecūhun ní de. Te cuu de nájñuhun jíihí tācá quiti ún. <sup>13</sup> Te jeé ní castóho de ñayuu, suni súcuan naniñin de ndoho de. Te cácusñi ní de jíin tāca jēe cácajni ní de, te casáha de tācá jniñu jeé cándiyo néé ní de. Te cácuu de tēe quini jeé casáha jniñu súcuan ñayuu. Te jeé cándututú de jíin ró vico ró, te níni cácusñi ní de jíin jniñu néé jniñu stáhú.

<sup>14</sup> Te cándiyo ní de cájito de ñahan, te tu cájecuñi de sáha de cuēchi. Te cástáhú de ñayuu tahya ní. Chi ní cacāan de jíin jñuhun ndiyo ní de tācá ndajniñu. Te tēe jñahnū ndetū cácuu de. <sup>15</sup> Te ní casana de, chi ní castó de jñuhun jeé cúu ichi ndaā. Te ní candiquñ de modo Balaam, tēe ní nacani jñuhun nde jenahán, séhe Beor. Chi tēe un ní cusñi ní de nihñ de xūhun siquī jñuhun neé jēe cahān de. <sup>16</sup> Te ñin burro ní cahān tī nájñuhun ñin ñayuu, vēsú quiti ñihñ cúu tī. Te ní cahān tī nuū tēe ún, te súcuan ní jesi tī jeé ma quihñ de cahān de tāca jñuhun neé stívi.

<sup>17</sup> Te tāca tēe súcuan chi cácuu de nájñuhun tesoco ichi, nájñuhun vicó jeé stehí táchi. Te jñahnū ndetū de quivicoo de nuū néé nuū lúchi jñúu coyucú de ní cáni. <sup>18</sup> Chi yōhyo casándúxi de máa de jíin jñuhun cácahān saá-ni de. Te cánducú de squívi tucu de sava ñayuu nuū jniñu néé jniñu ndiyo ní. Te súcuan cástáhú de ñayuu jeé sa ní quenda i ní cácu i nuū ñayuu casáha jniñu néé. <sup>19</sup> Te cácahān de jeé cáhiyo libre i sáha i ndese-ni cúni máa i, te ní máa de tu cáhiyo libre de, chi cácuu de mozo nuū cuēchi, chi máni jniñu jnehén casáha de. Chi tācá jniñu jeé cūndeyí jíin ñin tēe jeé sáha de, suu yúcuan ndúu de mozo nuū. <sup>20</sup> Chi núu je ní cajini de ndese Yāā cúu máá Jítoho yō Jesucristo, Yāā jnāma yóho, te núu súcuan ní quenda de ní cácu de nuū jniñu jnehén iyó ñin ñayiví, te yúcuan

na te núu ndivicoo tucu de nuū jniñu un jēe cūndeyí tucu jíin de, núu súcuan te néé gá quendóo de jeé sándihí vēsú jeé xihna ñuhún. <sup>21</sup> Chi váha ga núu jeé tu ní cájini de jñuhun ichi ndaā nuū, vēsú jeé ní cajini de, te stóo tucu de jniñu ndoo jeé ní ndacu ya nuū de. <sup>22</sup> Chi cūndaā jíin de nájñuhun cáhān ñin jñuhun jenahán: Ina ní nacaji tī jeé ní ndujen tī. Te quini ní ndundo, ní nacuchi tucu tī ndehyū, achí.

### Siquí jeé ndíji Jítoho yō

## 3

<sup>1</sup> Ñáni máni, yáha cúu carta uū jeé tēe ri nuū ró. Te jíin ndindúu carta yáha cúni rí jeé nacani ní ró siquí ndihí jeé váha ndaā jeé jeni ichi rí rohó. <sup>2</sup> Te na núcūhun ní ró tāca jñuhun jeé ní canacani tēe ndoo Yāā Dios nde jenahán, jíin jniñu ní ndacu máá Jítoho yō, Yāā jnāma yóho. Te suu cúu jeé ní castéén tēe cácuu apóstol nuū ró.

<sup>3</sup> Te xihna gā jñuhun yáha na jécūhun ní ró: Jeé nuū cuándihí quiví te quijicoo tēe sácatā siquí jñuhun ndaā yā, chí sáha de tācá jniñu néé jēe ndiyo ní máa de. <sup>4</sup> Te cahān de jíinahan de: ¿Najehé cúu jeé tu ndíji Cristo nájñuhun ní jejnūhun ya? Chi nde quiví ní cajihí jíi yō te nde vijna, tu ndé sáma cuiti ndihí jeé iyó ndé ná ní jecóo ñayiví, achí de. <sup>5</sup> Chi tu cácuu de jecūhun ní de jeé ndé jenahán ní cuváha andiví jíin jñuhun ní cahān Yāā Dios. Te ní ndacu ya jniñu jeé na cuváha ñayiví jíin ndute, te mēhñú ndute ní nane ñuhun íchi. <sup>6</sup> Te suni jíin ndute ní naa ñayiví jenahán, chí ní ndaa ndute jeé ní cuun saū xeén. <sup>7</sup> Te suni súcuan jíin jñuhun ní cahān Yāā Dios ní sátuhva ya jeé cayú andiví jíin ñayiví iyó vijna. Chi máa quiví juicio te cayú ndihí, te jñahnū ndetū ñayuu ní casáha néé.

<sup>8</sup> Te suni ma náa ní ró jñuhun yáha, ñáni máni: Jeé nuū máá Jítoho yō chí ñin quiví cúu nájñuhun mil cuiyā, te mil cuiyā cúu nájñuhun ñin quiví-ni. <sup>9</sup> Chi nasūu jēe cucuéé máá Jítoho yō siquí jñuhun ní jejnūhun ya, nájñuhun cájeni ní sava ñayuu. Chi sa suhva iyó paciencia ní ya nuū yó, chí tu cúni yā jeé jñahnū ndetū ní ñin yó, chí sa cúni yā jeé ndihí yó nacani ní yó stóo yó cuēchi yó.

<sup>10</sup> Te quiví ndíji máá Jítoho yō, ñin sanaa-ni te quee, nájñuhun ñin sanaa-ni te quee ñacuñhá jecuáa. Te quiví ún chí ñihñ ndasí andiví, te naa-ni. Te ndihí jeé iyó andiví chí naa sáha ñuhūn. Te ñayiví jíin tāca jēe iyó ñin, ndihí cayú.

<sup>11</sup> Te núu súcuan naa tācá un, te cánuú ndasí jēe coo ndoo ánuá ró te chíñuhūn váha ro yá jíinahan ró. <sup>12</sup> Te condetu ró te condihví ní ró jeé na quee yachí quiví ndíji Yāā Dios. Te quiví ún cayú andiví te naa-ni, te tāca jēe iyó chí ndute sáha yáñuhūn. <sup>13</sup> Te

máá yó chi cándetu yó andiví jéé jíín ñáyiví jéé, chi súcuan ni jejnūhun Yaā Dios. Te yūcuán chi máni jniñu ndaā jíín jniñu váha coo.

<sup>14</sup> Nūu súcuan, ñánī mánī, níni jéé cándetu ró jéé squícu tācá jniñu yáha, te na ndúcú ndéyí ró návāha quiví ndíji ya te nihīn yā rohó jéé cáyūcu mánī rō, te coo ndoo ró jéé tú na cuēchi ró. <sup>15</sup> Te na jécūhun ni rō jeē siquī jeē iyó paciencia ni maá Jítoho yō, jeē yūcuan cácu yó. Chi hermano yō Pablo jeē maní yō jíín, suni súcuan ni tee de nuū rō, chi súcuan ni steén Yaā Dios jnūhun ndíchí yá nuū de. <sup>16</sup> Te cáhán de siquī jnūhun yáha nuū tāca carta jeē ní tee de. Te nuū carta de un iyó jecu jnūhun jeē yí jécūhun ni yō. Te ñayuu tu jécūhun ni jíín ñáyuu tu íje jíín jnūhun cándíje, cánasama i modo steén jnūhun yí un, nájñūhun násama i jeē cahán sava ga tutu íi. Te súcuan sáha i jeē jnahnú ndetū maá i.

<sup>17</sup> Te róhó ñánī mánī, vijna te je ni cajini rō ndese coo tācá jniñu yáha. Nūu súcuan te coto má condiquín rō jnūhun stáhú cástéén ñayuu casáha néé. Chi núu tuú te snáá rō jnūhun cáhīn nīhin ró jíín. <sup>18</sup> Chi sa na cóndihvī gā ni rō cuni rō ndese Yaā cúu máá Jítoho yō Jesucristo, Yaā jnáma yóhó. Te na íje ga ni rō jíín jnūhun cúndáhú ni yā rohó. Te na cáhán yō jeē yóhyo luu cújéhu ya nde vijna jíín ní cáni. Súcuan na cóo. Amén.

## CARTA HN JEE NI TEE SAN JUAN APOSTOL NUU ÑAYUU CACANDIJE

### *Jñuhun cotecu yō nñ cáni*

<sup>1</sup> Jñuhun cátee ri cuajeē nuū rō jijnáhan rō cúu jñuhun máa Yaā jeē je iyó ndé ná tu jecóo táca jée iyó. Te ni cajini sóho ri jeē ni cáhān yā, te ni cajito jñúu rī yā, chi ni cajito vāha ri nuū yā, te ni cajñi ri yā. Te máa yá cúu Jñuhun cotecu yō nñ cáni. <sup>2</sup> Chi Yaā yāha jée sáha ya jeē cótecu yō, ni quenda ndijin yā. Te cácahān ri jñuhun ya, chi ni cajito ri yā. Te cácastūhun rī nuū rō jijnáhan rō síquī Yaā cúu Jñuhun cotecu yō nñ cáni, Yaā ni condee jijn Tátá yō Yaā Dios, te ni quenda ndijin yā nuū ri jijnáhan rī. <sup>3</sup> Jeē ni cajito ri jijn jée ni cajini sóho ri, yūcuan cúu jeē cácastūhun rī nuū rō, návāha coo inuū ni rō jijn yō jijnáhan yó. Te jendaá chi cáhiyo inuū ni yō jijn máa Tátá yō Yaā Dios jijn Séhe ya Jesucristo. <sup>4</sup> Te jñuhun yāha cátee ri cuajeē nuū rō, návāha cusñi teyí ni rō jijnáhan rō.

### *Yaā Dios cúu luz*

<sup>5</sup> Te yāha cúu jñuhun ni steén Jesucristo nuū rī, te vijna cácastūhun rī nuū rō: Yaā Dios cúu luz, chi yōhyo ndaa yā, te tú cuiti na jniñu néé iyó jijn yá. <sup>6</sup> Núu cácahān yō jeē cáhiyo inuū ni yō jijn yá, te núu cájica yó nájñuhun nuū néé jeē sáha yó jniñu néé, núu súcuan te cástáhú yó, te nasūū jniñu ndaa casáha yó. <sup>7</sup> Te núu cájica yó jijn luz yā jeē casáha yó jniñu ndaa, nájñuhun iyó máa yá jijn luz yā jeē sáha ya jniñu ndaa, yūcuān na te cáhiyo inuū ni yō jijn táca jñáhan yó. Te niñi máa Séhe ya Jesucristo sándoo yóhó núu ndñi cuéchi yó.

<sup>8</sup> Núu cácahān yō jeē tú na cuéchi yó, te cástáhú yó máa yó jeē jéni ni yō súcuan, te tu ñuhun jñuhun ndaa ini yō. <sup>9</sup> Te núu nacani ndaa yō cuéchi yó núu yā, te cone cáhnu ni yā nuū cuéchi yó, te sándoo ya yóhó ndñi jeē néé casáha yó. Chi jini yō jeē Yaā vāha Yaā ndaa cúu ya. <sup>10</sup> Te núu cácahān yō jeē tú na cuéchi yó, te nájñuhun sáha yó jée Yaā stahú cúu ya, te tu cándije ndije yó jñuhun ya.

### *Cristo cúu Yaā cahán jehē yō*

## 2

<sup>1</sup> Táca jñuhun yāha téé ri cuajeē nuū rohó jée cácuu rō nájñuhun séhe ri, návāha ma sáha rō cuéchi jijnáhan rō. Te núu ndé ñi rō ní sáha cuéchi, te iyó máa Yaā cahán jehē yō nuū máa Tátá yō Yaā Dios. Jesucristo Yaā ndaa cúu ya. <sup>2</sup> Te ni socó yā máa yá jeē ndahva yā cuéchi yó, te nasūu cuéchi máa-ni yó, chi suni cuéchi ñayuu nñ ñáyiví.

<sup>3</sup> Núu squícu yó jniñu ndácu Yaā Dios nuū yó, jijn yūcuan cúcáhnu ni yō jeē jini ndije yó ndese Yaā cúu ya. <sup>4</sup> Te núu cáhān ñi ñayuu: Ruhū chi jini rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhān i jñuhun ndaa. <sup>5</sup> Te sa ñayuu squícu jñuhun ya, je ni ije vāha ni i jeē maní i jijn yá. Súcuan te cuni yó núu ndúú yó jijn yá chí tuú. <sup>6</sup> Núu cáhān ñi ñayuu jeē nduú i jijn yá, cánuú jée caca ndaa i nájñuhun ni jica Jesucristo.

### *Jniñu jée ndácu ya nuū yō*

<sup>7</sup> Hermano, nasūū ñi jniñu jée ndácu ri nuū rō jeē cahán rī jeē na cundáhú ni rō jñáhan rō. Chi jniñu jeē je cájini rō nde ná ni quejéé rō candije rō cúu. Te jniñu yāha jeē ndácu ya, vēji nde jenahán, te suu cúu jñuhun ni cajini sóho rō ndé quiví ni quejéé rō candije rō. <sup>8</sup> Te vēsú súcuan, te nini jniñu jée cúu, te jniñu ndaa cúu nuū Cristo jijn nuū máa rō jijnáhan rō. Chi je cuayāha jniñu néé jée iyó núu néé, te je steén máa luz ndaa ini anuá yō vijna.

<sup>9</sup> Núu ñi ñayuu cahán i jeē jica i jijn luz yā, te núu jito uhū i jñáhan i, ñayuu ún chi jica ga i nájñuhun nuū néé jijn cuéchi. <sup>10</sup> Te ñayuu jeē cundáhú ni jñáhan, chí jica i jijn luz yā, cúu jeē sáha i jniñu vāha. Te ni ñi ma cúu sáha jeē quiví i cuéchi. <sup>11</sup> Te ñayuu jito uhū jñáhan, chí iyó i nuū néé, te jica i nuū néé. Te tu jini i ndé chi quíñi i, chí nuū néé un ní jesi jeē tu jécūhun ni i.

<sup>12</sup> Róhó jée cácuu séhe, téé ri jñuhun yāha cuajeē nuū rō, chí jeē síquī Jesucristo te ni ine cáhnu ni Yaā Dios nuū cuéchi rō. <sup>13</sup> Róhó tátá jijnáhan rō, suni téé ri nuū rō, chí cájini rō ndese Yaā cúu Yaā iyó ndé xihna ñuhún. Róhó téé suchí jijnáhan rō, suni téé ri nuū rō, chí ni cacundeyí rō jeē tu ní cúu squiví jexeén rohó cuéchi.

Róhó jée cácuu séhe, téé ri jñuhun yāha cuajeē nuū rō, chí cájini rō ndese Yaā cúu máa Tátá yō Yaā Dios. <sup>14</sup> Róhó tátá jijnáhan rō, suni téé ri nuū rō, chí cájini rō Yaā iyó ndé xihna ñuhún. Róhó téé suchí jijnáhan rō, suni téé ri nuū rō, chí cáhñi niñi rō, te cácañdije rō jñuhun Yaā Dios, te ni cacundeyí rō síquī jéxeén.

<sup>15</sup> Ma cutóo ni rō síquī ñayiví, ni táca jée iyó ini ñayiví. Chi núu ndé ñayuu cutóo ni i síquī ñayiví, ñayuu ún tu iyó mání i jijn Tátá yō Yaā Dios. <sup>16</sup> Chi táca jée cúu cuenta ñayiví, nasūu ndé nuū Tátá yō Yaā Dios vēji, chí cuenta ñayiví cúu. Te yūcuan cúu táca jée cájini ni yō jeē cuni modo néé máa yó, jijn jée ndiyo ni yō jeē jito yó núu, jijn jée sanduxí yó máa yó síquī ndajniñu névāha yó. <sup>17</sup> Te cuandñi ñayiví jijn táca jée ndiyo néé ni yō. Te ñayuu casáha jeē cuni máa Yaā Dios, chí cotecu i nñ cáni.

### *Jñuhun ndaa jijn jñuhun stáhú*

<sup>18</sup> Róhó jéé cácuu nájñuhun sêhe ri, cáhán ri jíin ró jeé cuandíhi quiví. Te je ni cajini jñuhun ró jéé quíji máá téé cuu contra siquí Cristo. Te nde vijna je ni canecoo cuehē téé jeé cácuu contra siquí Cristo. Te jeé yúcuan jíni yó jeé cuandíhi quiví. <sup>19</sup> Mēhñu máá yó ni quendacoo de, te nasūu jñáhan yó cácaandíje cácuu de. Chi núu jeé jñáhan yó cácuu de, te quendōo de jíin yó nuú. Te ni quenda de cuango de, náváha cuni cají yó jéé násūu jñáhan yó cácuu ndíhi de.

<sup>20</sup> Te máá ró jijnáhan ró, chi Cristo ni jēhe ya Espíritu Santo, ndeé yá ini anuá ró, te jeé yúcuan cájini ró jñuhun ndaá. <sup>21</sup> Núu súcuan te téé ri yáha cuájeé nuú ró, siquí jeé cájini ró jñuhun ndaá, nasūu síquí jeé tu cájini ró. Te cájini ró jeé tú na jñuhun stáhú íyó nuú jñuhun ndaá.

<sup>22</sup> ¿Ndeé ñin cúu jeé cahán máni jñuhun stáhú? Suu tēe jeé cahán jeé Jesús, tu cúu ndije ya Cristo, Yaá ní tají Yaá Dios. Yúcuan cúu tēe jeé cúu contra siquí Cristo, chi tu jéjñuhún de máá Tátá yó Yaá Dios jíin Séhe ya. <sup>23</sup> Táca ñáyuu jeé tu jéjñuhún i Séhe ya, suni tu íyó máá Tátá jíin i. Te ñáyuu jeé jéjñuhún i Séhe ya, suni íyó máá Tátá jíin i.

<sup>24</sup> Núu súcuan te chuhun váha ni ró máá jñuhun ni cajini sóho ró ndé jeé xíhna ñúhún. Te núu ñúhun váha ni ró jñuhun ni cajini sóho ró ndé jeé xíhna ñúhún, yúcuán na te suni ndúú ró jíin máá Tátá yó jíin Séhe ya. <sup>25</sup> Te yáha cúu jñuhun jeé ni jéjñuhun Jesucristo nuú yó: jeé cótecu yó ní cáni sáha ya.

<sup>26</sup> Jñuhun yáha ní tee ri nuú ró jeé cástuhun rí siquí ñáyuu cánducú stáhú róhó. <sup>27</sup> Te máá ró jijnáhan ró, chi ni jēhe Jesucristo Espíritu Santo, ndeé yá ini anuá ró. Te jeé yúcuan tu jíni ñúhún jéé steén ni ñin ñáyuu nuú ró ndé vé cúu jendaá, chi máá Espíritu cúu jeé steén ndíhi nuú ró, te steén yá jñuhun ndaá, chi tu stáhú cuítí yá. Núu súcuan te caca ndúú ró jíin Cristo, nájñuhun steén Espíritu nuú ró.

<sup>28</sup> Sēhé jijnáhan ró, vijna te na cáca ndúú ró jíin Cristo, náváha núu na quénda ndijin yá, te ma yúhu yó, ni ma cúcuan yó nuú yá quiví ndíji ya. <sup>29</sup> Chi je cájini ró jeé Yaá ndaá cúu Jesucristo, te suni na jécuhun ni ró jeé táca ñáyuu casáha jñiñu ndaá, sēhe Yaá Dios cácuu i.

*Jñuhun ñáyuu cácuu sēhe Yaá Dios*

### 3

<sup>1</sup> Nacá jeé yóhyo ni cundáhú ni Tátá yó Yaá Dios yohó, chi ní nihñn yó jñuhun cuu yó séhe ya, te suu cúu ndije yó. Jeé yúcuan, ñáyuu ñáyiví tu cájini i jeé cúu yó séhe ya, chi tu jíin i ndese Yaá cúu máá yá. <sup>2</sup> Ñání máni, vijna te cúu yó séhe Yaá Dios, te ná tu cuni yó ndese coo yó ní cáni. Te je jíni yó jeé quiví quénda ndijin Jesucristo, te nduu yó nájñuhun íyó máá yá, chi coto yó núu yá ndese íyó yá. <sup>3</sup> Te

táca ñáyuu jeé súcuan ñúhun ni i, chí sándoo i ánuá i, nájñuhun íyó ndoo Jesucristo.

<sup>4</sup> Te ñáyuu casáha cuéchi, chí stíví i ley Yaá Dios. Chí núu sáha yó cuéchi, te stíví yó ley yá. <sup>5</sup> Te je cájini ró jeé ní quíji Jesucristo ini ñáyiví náváha quende yá cuéchi yó. Te máá yá tú na cuéchi ya. <sup>6</sup> Te táca ñáyuu jeé nduú i jíin yá, tu cájica i jíin cuéchi. Te táca ñáyuu cájica jíin cuéchi, tu jíin i ya, ni tu jécuhun ni i ndese Yaá cúu ya. <sup>7</sup> Sēhé jijnáhan ró, coto ró jéé ma stáhú ni ñin i róhó. Chi na jécuhun ni ró jeé ñáyuu casáha jñiñu ndaá, máá i cácuu ñáyuu ndaá, nájñuhun íyó ndáá máá yá. <sup>8</sup> Te ñáyuu casáha cuéchi, máá i cácuu sēhe jexeén. Chí jexeén cúu jeé sáha cuéchi vēji nde jeé xíhna ñúhún. Jeé yúcuan ní quíji Sēhe Yaá Dios, jeé snáá yá táca jñiñu néé sáha jexeén.

<sup>9</sup> Ni ñin ñáyuu jeé cúu sēhe Yaá Dios, tu jíca i jíin cuéchi, chí ni sáha Yaá Dios jeé ní nduu i nájñuhun íyó máá yá. Te ma cúu ga caca i jíin cuéchi, chí sēhe Yaá Dios cácuu i. <sup>10</sup> Súcuan cuni yó ndé ñin cúu sēhe Yaá Dios jíin sēhe jexeén: Táca ñáyuu jeé tu sáha jñiñu ndaá, jíin jéé tu cundáhú ni jñáhan, nasūu sēhe Yaá Dios cúu i.

*Jeé na cundáhú ni yó jñáhan yó*

<sup>11</sup> Yáha cúu jñuhun jeé ní cajini sóho ró ndé jeé xíhna ñúhún: jeé na cundáhú ni yó jñáhan yó. <sup>12</sup> Te ma sáha yó nájñuhun ni sáha Caín, jeé ní cuu de sēhe jexeén, te ni jehni de ñani de. ¿Te najehé ni jehni de ñani de? Siquí jeé ñani de ni sáha jñiñu ndaá, te máni jñiñu néé ní sáha máá de.

<sup>13</sup> Hermano jijnáhan ró, ma cunéé ni ró te núu ñáyuu ñáyiví cáquití ni i nuú ró. <sup>14</sup> Te máá yó chí siquí jeé cundáhú ni yó jñáhan yó, súcuan jíni yó jeé jé ni cácu yó jéé cótecu yó ní cáni. Te ñáyuu jeé tu cundáhú ni jñáhan, íyó i jíin jñuhun jñahnú ndetú i. <sup>15</sup> Chí táca ñáyuu quítí ni nuú jñáhan, nájñuhun ñáyuu jéjni ndíyí cúu i. Te cájini ró jeé ñáyuu jéjni ndíyí, ma nihñn tahú i cótecu i ní cáni. <sup>16</sup> Jeé ni jíhi Cristo jehé yó, yúcuan cúu jeé steén cají ndese cúu jñuhun cundáhú ni. Te máá yó, chí suni súcuan jíni ñúhún cundáhú ni yó jñáhan yó vésú na cúu yó jehé i. <sup>17</sup> Te núu névaha yó jéé cótecu yó ñáyiví, te núu jíni yó jeé cumaní nuú jñáhan yó, te núu tú cundáhú ni yó i cuáha yó jéé jíni ñúhún i, núu súcuan ¿te á íyó máni yó jíin Yaá Dios, chí naún? <sup>18</sup> Sēhé jijnáhan ró, ma cundáhú ni yó jíin máá jñuhun cáhán-ni yó, chí sa suhva na cundáhú ndije ni yó nde jíin jñiñu sáha yó.

*Ndese cucáhnu ni yó jeé váha sáha yó núu Yaá Dios*

<sup>19</sup> Te súcuan cundaá ni yó jeé squícu yó jñuhun ndaá, te cucáhnu ni yó jeé váha sáha yó núu yá. <sup>20</sup> Chí núu ánuá yó tú váha sáha siquí jeé íyó cuéchi yó, te Yaá Dios chí cújehnu ga yá vésú anuá yó, te jíni ndíhi ya táca un. <sup>21</sup> Núu súcuan ñání máni, núu váha

sáha ánuá yō siquī jeē tú na cuēchi yō, yūcuán na te cúcáhu ni yō jeē váha sáha yō núu Yaā Dios. <sup>22</sup> Te táca jeē cacán yō nuū yā, te sáha ya jeē cahán yō, chí squícu yō jniñu ndácu ya te sáha yō jniñu jeē cúsiñ ni yā. <sup>23</sup> Te yáha cúu jniñu ndácu ya: jeē na cándije yō jeē ni sáha Sēhe ya Jesucristo jehē yō, jiín jeē na cundáhú ni yō jnáhan yō, nájnūhun ni ndacu ya jniñu nuū yō. <sup>24</sup> Te táca ñáyuu squícu jniñu ndácu Yaā Dios, ndúú i jíin yá, te ndéé yá ini anuá i. Te jíin máá Espiritu jeē ni jéhe ya jeē ndeé ini anuá yō, jíin yúcuán te jíni yō jeē ndeé Yaā Dios ini yō.

*Jñūhun jeē véji nuū Espiritu jíin jñūhun cáhán contra Cristo*

#### 4

<sup>1</sup> Ñānī mánī, ma candíje ró táca tée jeē cácahān de jeē jíin Espiritu Yaā Dios cácanani de jñūhun. Chí sa suhva coto ndee ró de, núu nde nuū Yaā Dios véji jñūhun cácahān de, chí tuú. Chí ini ñáyiví je ni canecoo cuehē tēe cácanani jñūhun stáhú, te cácahān de jeē ndé nuū Yaā Dios véji. <sup>2</sup> Te súcuán nacuni ró ndé-ni i cúu jeē jíin Espiritu Yaā Dios cahán: táca ñáyuu jeē cácahān ndaā jeē ni quiji Jesucristo, ni nduu ya tēe, máá i cúu jeē jíin Espiritu Yaā Dios cácahān. <sup>3</sup> Te táca ñáyuu jeē tu cájejnūhún jeē súcuán ni nduu ya tēe, máá i chí nasūu jíin Espiritu Yaā Dios cácahān i. Chí sa suhva cácuu i contra siquī Cristo. Te je ni cajini jñūhun ró jeē quíjicoo ñáyuu súcuán, te vijná je cáhiyo i ini ñáyiví.

<sup>4</sup> Sēhé jijnáhan ró, máá ró cácuu sēhe Yaā Dios, te je ni cacundeyí ró siquī tēe cástáhú un. Chí jéhnua cácuu poder máá Yaā jeē ndeé ini ró, vēsú poder máá jeē ndeé jíin ñáyuu ñáyiví jeē cástáhú. <sup>5</sup> Máá i cácuu cuenta ñáyiví, te jeē yúcuán cácahān i jñūhun cuenta ñáyiví. Te ñáyuu cácuu cuenta ñáyiví, cájini nahín i jñūhun ún. <sup>6</sup> Te máá yó chí sēhe Yaā Dios cácuu yó. Te ñáyuu jeē cáhán i ndese Yaā cúu Yaā Dios, máá i cájini nahín i jñūhun cácahān yō. Te ñáyuu jeē násūu sēhe Yaā Dios cácuu, máá i tu cájini nahín i jñūhun cácahān yō. Te súcuán nacuni yō ndé-ni cúu jeē cahán jñūhun ndaā jíin ndé-ni cúu jeē cahán jñūhun stáhú.

*Máni jñūhun cundáhú ni iyó jíin Yaā Dios*

<sup>7</sup> Ñānī mánī, na cundáhú ni yō jnáhan yó, chí jñūhun cundáhú ni, nde nuū Yaā Dios véji. Te táca ñáyuu cundáhú ni jnáhan, chí sēhe Yaā Dios cúu i, te jíini i ndese Yaā cúu Yaā Dios. <sup>8</sup> Te ñáyuu jeē tu cundáhú ni jnáhan, tu jíini i ndese Yaā cúu Yaā Dios, chí mánī jñūhun cundáhú ni iyó jíin Yaā Dios. <sup>9</sup> Súcuán ni steén Yaā Dios ndese cundáhú ni yá yohó, chí ni tají yá Sēhe ya ni quiji ini ñáyiví yáha, vēsú mañūhún-ni ya iyó, náváha cotecu yō ni cáni sáha ya. <sup>10</sup> Te yáha cúu jñūhun cundáhú ni: nasūu jeē xihna máá yó ni iyó maní yō jíin

Yaā Dios, chí sa suhva máá yá cúu jeē ní cundáhú ni yá yohó. Te ni tají yá Sēhe ya ni quiji, náváha socó yá máá yá jeē quende yá cuēchi yó.

<sup>11</sup> Ñānī mánī, núu súcuán ni cundáhú ni Yaā Dios yohó, te suni súcuán cánuú jeē cundáhú ni yō jnáhan yó. <sup>12</sup> Ni iin ñáyuu tu ní jíto cuiti nuū Yaā Dios. Te núu cundáhú ni yō jnáhan yó, te ndeé Yaā Dios ini anuá yō, te je ni ije váha ni yō jíin jñūhun cundáhú ni. <sup>13</sup> Te máá Espiritu Santo jeē ni jéhe ya jeē ndeé ini yō, máá yá steén jeē nduú yó jíin Yaā Dios, te ndeé Yaā Dios ini yō. <sup>14</sup> Te ni cajito ri te cácastūhun rí jeē máá Tátá yō ni tají yá Sēhe ya ni quiji náváha jnama ya ñáyuu ñáyiví. <sup>15</sup> Te núu ndé ñáyuu jejnūhún i jeē Sēhe Yaā Dios cúu Jesus, te nduú i jíin Yaā Dios, te Yaā Dios ndeé yá ini i.

<sup>16</sup> Te máá yó, je ni jini yó te ni candíje yó jeē cundáhú ni Yaā Dios yohó. Chí mánī jñūhun cundáhú ni iyó jíin Yaā Dios. Te ñáyuu cundáhú ni jnáhan, nduú i jíin Yaā Dios, te ndeé yá ini anuá i. <sup>17</sup> Te súcuán cúu jeē íje váha ni yō jíin jñūhun cundáhú ni, náváha ma yūhu yó quiví sándaā yá jniñu yó. Chí nájnūhun cundáhú ni Cristo, suni súcuán cándaā máá yó ini ñáyiví yáha. <sup>18</sup> Te núu maní yó jíin yá, te tu yúhú yó nuū yá. Chí núu ni ije yó jíin jñūhun maní yó jíin yá, te tú na siquī yuhú yó nuū yá. Chí jñūhun yúhú un cúu jeē yuhú yó ndoho yó castigo. Jeē yúcuán ñáyuu cáyūhú chí ná tu ije váha i jíin jñūhun maní i jíin yá.

<sup>19</sup> Te yohó chí maní ndasí yó jíin Yaā Dios, chí xihna gā máá yá ni cundáhú ni yá yohó. <sup>20</sup> Te núu iin ñáyuu cahán i jeē maní i jíin Yaā Dios, te núu quiñi ni i nuú jnáhan i, núu súcuán te ñáyuu stahú-ni cúu i. Chí núu iin ñáyuu tu iyó mánī i jíin jnáhan i jeē jíto i nuú, te ni ma cúu coo maní i jíin Yaā Dios jeē tu jíto i nuú yá. <sup>21</sup> Chí je ni ndacu ya jniñu yáha nuū yó: Ñáyuu jeē maní i jíin Yaā Dios, suni na cóo maní i jíin jnáhan i.

*Jeē cundeyí yó siquī jeneé iyó ini ñáyiví*

#### 5

<sup>1</sup> Táca ñáyuu jeē cácañíje i jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñáyuu maní jíin Yaā cúu Tátá, suni cácañíje ni i ñáyuu cácuu sēhe ya. <sup>2</sup> Súcuán jíni yó jeē cundáhú ni yō ñáyuu cácuu sēhe ya, núu maní yó jíin yá te squícu yó jniñu ndácu ya. <sup>3</sup> Chí jeē squícu yó jniñu ndácu Yaā Dios cúu jeē maní yó jíin yá. Te jniñu ndácu ya chí tú vēyi. <sup>4</sup> Chí táca ñáyuu cúu sēhe Yaā Dios, cundeyí i siquī jeneé iyó ini ñáyiví. Te jeē candíje yó jeē cundáhú ni yá yohó, yúcuán cúu fuerza jeē sáha jeē cundeyí yó. <sup>5</sup> Máá-ni ñáyuu jeē candíje jeē Jesús cúu Sēhe Yaā Dios, máá i cúu jeē cundeyí siquī jeneé iyó ini ñáyiví.

*Jnūhun cáhān ndaā siquī Séhe Yaā Dios*

<sup>6</sup> Te jeē ní quiji Jesucristo ini ñayiví, chí ni jendute ya jíin ndute, te ni jeti niñí yā jeē ní jíhi yā jehē yō. Te nasūu máá ñn-ni jeē ní jendute ya jíin ndute, chí suni ni jeti niñí yā. Te máá Espíritu Yaā Dios cáhān ndaā siquī yā, chí nuū máá Espíritu vēji jnūhun ndaā.

<sup>7</sup> Chí ini andiví iyó úní jeē cáhān ndaā siquī jnūhun yáha: máá Yaā cúu Tátá, jíin Yaā cúu Jnūhun, jíin Espíritu Santo. Te ndinúni yá, chí ñn-ni cúu ya. <sup>8</sup> Te ini ñayiví suni iyó úní jeē steén ndaā: máá Espíritu, jíin jéé ní jendute Jesús, jíin jéé ní jeti niñí yā. Te ndinúni yáha, chí inuū-ni steén siquī yā. <sup>9</sup> Te cájetáhú yó jnūhun cáhān ndaā tēe, te jéhu ga cúu jnūhun cáhān máá Yaā Dios. Te jnūhun ni cáhān yā cúu jnūhun siquī Séhe ya. <sup>10</sup> Ñayuu cácandíje jeē Séhe Yaā Dios cúu Jesús, je ni cacundaā ni i jnūhun yáha jeē ní cáhān Yaā Dios. Te ñayuu jeē tu cácandíje jeē ní cáhān Yaā Dios, nájnūhun cásáha i jeē Yaā stahú cúu ya, chí tu cácandíje i jnūhun ni cáhān ndaā yā siquī Séhe ya. <sup>11</sup> Te jnūhun ndaā un cúu jeē ní sáha ya jeē cótecu yō ní cáni, te Séhe ya ndiso jnūhun cotecu yō. <sup>12</sup> Ñayuu jeē iyó Séhe ya jíin i, je ni nihín tahú i cotecu i. Te ñayuu jeē tu iyó Séhe ya jíin i, ma nihín tahú i cotecu i.

*Jnūhun consejo jeē sándihí*

<sup>13</sup> Jnūhun yáha tēe ri nuū rohó ñayuu cácandíje Séhe Yaā Dios, návāha cucáhu ni rō jeē ní nihín tahú rō cotecu rō ní cáni.

<sup>14</sup> Te cucáhu ni yō Yaā Dios, chí jíni yō jeē núu na vé jíicán yō nuū yā jeē suni cúni máá yá, te jíni nahín yá jeē jíicán yō. <sup>15</sup> Te núu jíni yō jeē jíni nahín yá jeē jíicán yō, núu súcuan te suni jíni yō jeē sáha ya jeē jíicán yō.

<sup>16</sup> Núu ñn ñayuu jíni i jeē sáha jnáhan i cuēchi jeē násūu cuēchi jeē jnahnú ndetū i cúu, te na cácan tahú i nuū Yaā Dios, te cuāha ya jnūhun cotecu jnáhan i, te núu nasūu cuēchi jeē sáha jeē jnahnú ndetū i cúu. Iyó cuēchi jeē jnahnú ndetū i sáha, te tu cáhān rí jeē cacán tahú rō jehē ñayuu sáha cuēchi súcuan. <sup>17</sup> Tācá jniñu néé cúu cuēchi, te iyó cuēchi jeē násūu jéé jnahnú ndetū i cúu.

<sup>18</sup> Te jíni yō jeē tāca ñayuu cácuu séhe Yaā Dios, tu jíca i jíin cuēchi. Chí Yaā cúu Séhe Yaā Dios, ndító vāha ya i. Te tú na vé cúu sáha jexeén jíin i.

<sup>19</sup> Te jíni yō jeē séhe Yaā Dios cácuu yó. Te ñayuu ní ñayiví yíhi i ndaha jexeén.

<sup>20</sup> Te suni jíni yō jeē ní quiji Séhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúú yó jíin Yaā ndaā, suu jíin máá Séhe ya Jesucristo. Máá yá cúu ndíje Yaā ndaā, te máá yá sáha jeē cótecu yō ní cáni. <sup>21</sup> Séhé jijnáhan ró, na cújiyo ró núu tāca jéé násūu Yaā ndaā cúu. Súcuan na cóo. Amén.



## CARTA UU JEE NI TEE SAN JUAN APOSTOL

*Jnūhun ndaa jín jnūhun cúndáhú ní*

<sup>1</sup> Máá ná cúu tēe jéhnū ndíso jniñu, te tēe ná carta yáha cuájeē nuū ní jēē cúu ní hermana ní nacāji Yaā Dios, jín núū séhe ní jijnáhan i. Te maní na jín ní jijnáhan ní sáha jnūhun ndaa yā, te nasūu máá-ni ná, chí suni táca ñáyuu jini jnūhun ndaa. <sup>2</sup> Te maní na jín ní jijnáhan ní síquī jeē cácanđije yó jnūhun ndaa yā jeē iyó ini anuá yō, te coo jín yó ní cāni. <sup>3</sup> Te ñūhun ní na jēē Tatá yō Yaā Dios jín Séhe ya Jitoho yō Jesucristo, na sáha ga yā jeē váha nihín, te cundáhú ní yā nihín, te sáha ya jeē coo ndeyí coo sī ní ní, jín jnūhun ndaa jín jnūhun cúndáhú ní.

<sup>4</sup> Yōhyo ní cusī ní ná, chí ní jini na jēē sava séhe ní cájica i jín jnūhun ndaa, nájñūhun ní ndacu máá Tatá yō Yaā Dios jniñu nuū yō. <sup>5</sup> Hermana, cáhán ndahú ná jín ní jeē na cúndáhú ní yō jnáhan yó. Te jnūhun tēe ná yáha cuájeē nuū ní, nasūú ñin jniñu jēē sá ndacu ya cúu, chí jniñu ní ndacu ya nuū yō nde ná ní quejéé yó candije yó cúu. <sup>6</sup> Te jeē cundáhú ní yō jnáhan yó cúu jeē caca yó nájñūhun ní ndacu ya jniñu nuū yō. Te jniñu ní ndacu ya cúu jeē caca ní jín jnūhun cúndáhú ní, nájñūhun ní cajini sōho ní ndé ná ní quejéé ní candije ní.

*Siquī tēe cástáhú*

<sup>7</sup> Chí cuehē tēe cástáhú ní canecoo de ní ñáyivi, te tu cájejnūhún de jeē ní quiji Jesucristo ní nduu ya tēe. Te tēe tu cájejnūhún súcuan, cácuu de tēe stáhú, te cácuu de contra síquī Cristo. <sup>8</sup> Coto ní jēē ma snáa ní táhū síquī jniñu váha ní casáha ní, chí sa suhva jeē na nihín ní ndíhi tahú ní.

<sup>9</sup> Núu ndé ñáyuu jniñu inga jnūhun, te tu quéndōo i jín jnūhun ní steén Cristo, núu súcuan te tu íyó Yaā Dios jín i. Te ñáyuu quéndōo jín jnūhun ní steén Cristo, chí íyó Tatá yō jín i, te suni íyó Séhe ya jín i. <sup>10</sup> Te núu jín ñin ñáyuu vehe ní, te núu tu quijnáhan jnūhun stéén i jín jnūhun yáha, te ma cuáha ní jnūhun condee i vehe ní, ní ma cahán ní jnūhun ndeyí ní jín i. <sup>11</sup> Chí ñáyuu cahán jnūhun ndeyí ní jín i, chéndéé ñájnáhan jín i síquī jniñu néé casáha i.

*Jnūhun sandíhi*

<sup>12</sup> Iyó cuehē gā jnūhun cahán na jín ní jijnáhan ní, te tu cúni na tee ná núu tútu jín tinta. Chí ñūhun ní na cuájeē ná coto jnáhan yó, te ndajnūhun yó, náváha cusī ndasí ní yó.

<sup>13</sup> Táca séhe culū ní, ñahan jeē suni ní nacāji ya, cácahán i jeē sándeiyí ní ní. Súcuan na cóo. Amén.

## CARTA UNI JEE NI TEE SAN JUAN APOSTOL

### *Jeē jejnūhún de tēe nání Gayo*

<sup>1</sup> Máá rí cúu tēe jéhu ndíso jniñu, te tēe ri carta yáha cuájeē nuū rō, amigo Gayo, chi manī rī jín ró sáha jnūhun ndaā.

<sup>2</sup> Nánī mánī, jícán tahu rī jeē vāha na quihín tǎcá jniñu sáha ró, jín jéē na cóo vāha ró, nájñūhun iyó vāha ánuá rō jín jnūhun ya. <sup>3</sup> Yōhyo ni cusī ni rī ná ni quecoo sava hermano te ni cacastūhún de nuū rī ndese vāha squícu ró tǎcá jniñu ndaā, chi jícá ndaā rō. <sup>4</sup> Tuá na inga sáha jeē cúsī gā ni rī, chi mánī jeē nihín rī jnūhun jeē cájica ndaā ñayuu cácuu nájñūhun sēhe rī siquī jeē ni scándíje ri i.

<sup>5</sup> Nánī mánī, yōhyo vāha sáha ró jéē chindéé ñáhán ró tǎcá hermano, te víhyá gā núu tēe ñuu jicá cácuu de. <sup>6</sup> Chi tēe un ní canacani de jnūhun nuū ñayuu cácandíje yáhá, ndese cúndáhú ni rō de. Te jícán rī jeē chindéé ñáhán gá rō de, núu na vé jínī ñūhún de jeē caca ga de ichi nuū quihín de, nájñūhun núnjahan ni Yaā Dios. <sup>7</sup> Chi tēe un ní quendacoo de cájica de siquī jniñu Jesucristo. Te tú na vé cáquihín de nuū ñayuu jeē tu jínī jnūhun Yaā Dios. <sup>8</sup> Jeē yúcuan cánuú coto yó de, chindéé ñáhán yó de jeē cánacani de jnūhun ndaā.

### *Siquī jeē tú vāha sáha Diótrefes*

<sup>9</sup> Je ni tee ri ñin carta nuū ñayuu cácandíje jñā. Te Diótrefes, tu jétáhú de jnūhun cáhán rī, siquī jeē cuní de cujéhu máá de nuū i. <sup>10</sup> Jeē yúcuan, núu na jéé rī te cahán rī nuū de siquī jniñu sáha de, chi yōhyo sájnūhún de te cáhán de jnūhun stáhú siquī rī jijnáhan rī. Te nasūu máá yúcuan-ni sáha de, chi suni tu jétáhú de tǎcá hermano jéngoo nuū de, te jési de jeē ma cuátáhú ñayuu nuū tǎcá hermano un. Te ñayuu cájetáhú nuū hermano un, quénehen de i nuū cándutútú ñayuu cácandíje.

<sup>11</sup> Nánī mánī, ma ndácu ró ñayuu casáha jniñu néé, chi sa suhva ñayuu casáha jniñu vāha. Chi sēhe Yaā Dios cácuu ñayuu casáha jniñu vāha. Te ñayuu casáha jniñu néé, tu cájini i ndese Yaā cúu Yaā Dios.

### *Jeē cácahān i jeē vāha sáha Demetrio*

<sup>12</sup> Tǎca ñayuu chi cácahān i jeē vāha sáha Demetrio. Te jniñu ndaā jeē sáha de, stéén jeē tēe ndaā cúu de. Te suni súcuan cácahān máá rí, te cájini rō jeē iyó ndáā jnūhun cáhán rī.

### *Jnūhun sandihí*

<sup>13</sup> Iyó cuéhē gā jnūhun cahán rī jín ró, te tu cúní rī tee rī jín tinta jín pluma. <sup>14</sup> Chi ñūhún ni rī cuajeē yachī rī coto jnáhan yó, te ndajñūhun yó.

<sup>15</sup> Te ñūhún ni rī jeē na cóo ndeyí coo sī ni rō. Tǎcá amigo yō vāha cácahān i jeē sándeýí ni rō. Te suni cahán rō jín ñin ñin amigo jñā jeē sándeýí ni i, áchí rí, te cocahán yō.

## CARTA JEE NI TEE SAN JUDAS APOSTOL NUU ÑAYUU CACANDIJE

<sup>1</sup> Máá rí cúu Judas ñani Jacobo, te mozo Jesucristo cúu rí. Te tée rí carta yáha cuájeé nuū rohó ñáyyuu jeé ní cana máá Tátá yō Yaā Dios, te ní sáha ya jeé iyó ndoo íyó í rō nuū yā jeé cácuu rō ñáyyuu manī yā jíin. Te Jesucristo ndító vāha ya rohó jée cāyihī rō ndaha ya. <sup>2</sup> Te ñūhun ní rī jeé na cūndáhú gá ní yā rohó, te sáha ya jeé coo ndeyí coo sī ní rō, te coo manī ndasí yá jíin rō, te na ndúcuehē gā tāca jée yáha nuū rō.

*Siquí tēe cástéén jñūhun stáhú  
(2 Pedro 2.1-17)*

<sup>3</sup> Ñānī mánī, yōhyo ní cuu ní rī tee rí nuū rō siquí jñūhun ní jnama ya rohó jíin rúhū jijnáhan yó. Te ní jini rī jeé cánuú gá tee rí carta jeé stihví ní rī rohó návāha nducú ndeyí rō jeé ma cási ñayuu nuū jñūhun cácandije yó. Te jñūhun ún chi je ní jēhe ya ñin jínu-ni nuū tāca ñáyyuu máá yá. <sup>4</sup> Chi sava tēe ní castáhú de rōhó ní quivicoo de mehñu rō. Te tēe ún chi nde jenahán je cáhán tutu ñi jeé jñahnú ndetú de siquí jñiñu cásaáha de. Cácuu de tēe ndevāha, chí cácahān de jeé vāha ní Yaā Dios, te jeé yūcuan vetū-ni sáha de jñiñu néé, cácahān de. Te tu cájejnūhún ndije de Jitoho yō Jesucristo jíin Yaā Dios, jeé mañūhún-ni ya cujēhnu nuū yō.

<sup>5</sup> Te vijna chí vesú je cájini vāha rō, te cúni rī jeé na núcūhun ní rō ndese ní sáha máá Jítoho yō. Chí ní jnama ya ñayuu Israel jenahán, ní chindéé ñájnāhan ya i jeé ní jinu i ñi ñuu tatú Egipto cuahān i. Te vesú sūcuan te cuéé gá te ní snāá yá sava i jeé tu ní cácandije i. <sup>6</sup> Te suni nucūhun ní rō siquí ndajéhé yā jeé ní castóo jñiñu ndiso, te ní castóo nuū ní ndeé andiví. Te Yaā Dios ní chindihyū yā jijnāhan, te cándetu nde quiji quiví cáhnu jeé sándaā yā jñiñu. Te cánuhñi jíin cadena, cáyūcu ní cáni nuū cunú nuū néé. <sup>7</sup> Te suni ní stóho ya ñayuu ñuu Sodoma jíin ñuu Gomorra jíin sava ga ñuu jeé ní Iyo yajni, chí suni ní casáha néé i nájñūhun ní casáha táca ndajéhé un ndé jenahán gá. Te máá i ní cajica jnéni i te ní casáha i táca cuéchi néé ndasí. Te ní canihñi i castigo ñūhūn jeé cayú ní cáni, te sūcuan cúu i ñin ejemplo nuū ndihī ñayuu.

<sup>8</sup> Te tēe cástáhú jeé ní quivicoo mehñu rō, vesú cájini de jeé sūcuan ní sáha ya, te cájeni cáhá ní de, te cásaáha jnehén de yiqui cúñu de, te cásquéhichī ní de tēe cándacu jñiñu Jitoho yō, te cácahān ndevāha de siquí tāca jée cácujeñu nuū sucún. <sup>9</sup> Te nasūñu sūcuan ní sáha ndajéhé Miguel, vesú ndajéhé cujēhnu

ga cúu ya. Chí tu ní cáhán ndevāha ya ní tu ní ndácunehen ya cuéchi siquí jexeén ná ní casásáhán jñāhan ya jíin jéxeén un jeé siquí yiqui cúñu Moisés ná ní jihī de. Chí suhva-ni ní cahān yā: Máá Yaā Dios, Yaā cúu Jitoho, cuxeén yā nuū rō, ní achi Miguel. <sup>10</sup> Te tēe cástáhú yáha chí cácahān neé de siquí tāca jée tu cájecūhun ní de. Te tāca modo cánevāha de siquí jeé sá cáa de, nájñūhun quiti yúcu jée sá cáa tí, suu yūcuan sáha jeé jñahnú ndetú de.

<sup>11</sup> Nacā xeén ndoho de núu sūcuan, chí tu cájetáhú de Yaā Dios, nájñūhun jeé tu ní jétáhú Caín. Te siquí jeé cácuu de ñihñ de xūhūn te cástéén de jñūhun stáhú, nájñūhun ní sáha Balaam. Te jñahnú ndetú de nájñūhun Coré, tēe ní jihī siquí jeé ní cunihñi ní de. <sup>12</sup> Tēe yáha núu cándutútú de jíin rō jeé cáyeji manī rō, te cásaáha de jñiñu cúcanu rō. Chí cáyeji cájini sī ní de, te tu cásaáha de cuenta ndese caji inga ñayuu, chí máni máá de ndáhvi ní de caji vāha de. Te cácuu de nájñūhun vicó ichi jée stehí táchī. Te suni cácuu de nájñūhun yujnu jeé tu jēhe ndehē máá tiempo. Te cácuu de nájñūhun yujnu jeé ní quenda nde jíin yoho, te tú cuiti gá na modo nane numa. <sup>13</sup> Te nájñūhun jeé jisó cóyo ndute mar te cáne tiñū, sūcuan Jícu de jíin jñiñu néé jée cúu jñūhun canu. Te cácuu de nájñūhun quimi jeé ní sana ichi. Te je iyó túhva nuū néé nuū lúchi jñúú coyúcu de ní cáni.

<sup>14</sup> Te jeé ní yáha iñū yucūn Adán, te ní cacu Enoc, te ní nacani de jñūhun jeé ní steén Yaā Dios nuū de siquí tāca tēe yáha, áchí de: Máá Jítoho yō ní steén yā nuū rī jeé ñin quiví te quiji ya jíin cuéhe mil ñayuu máá yá. <sup>15</sup> Te sándaā yā jñiñu tāca ñayuu, te snáhnú ndetú yā tāca ñayuu casáha néé. Chí máni jñiñu néé cásaáha i siquí jeé canéé máá i, te cácahān i cuéhe jñūhun ndevāha siquí yā. Ní achi Enoc. <sup>16</sup> Tāca tēe yáha máni cácahān sōo de, te cácahān de siquí ñayuu. Te máni jeé cúsi ní máá de cánductú de. Te cácahān de jeé tēe téyí cácuu de, te cácahān yñiñhún de jíin ñayuu návāha ñihñ de jecu nuū i.

*Jeé stihví ní Judas ñayuu cácandije*

<sup>17</sup> Te máá rō jijnāhan rō ñānī mánī, na núcūhun ní rō jñūhun jeé jí ní canacani tēe cácuu apóstol máá Jítoho yō Jesucristo. <sup>18</sup> Chí ní cacahān de: Nde nuū cuándihī quiví te quijicoo tēe sácatā siquí jñūhun ndaā yā, te sáha de táca jñiñu néé jée ndíyo ní máá de. Sūcuan ní cacastūhún apóstol. <sup>19</sup> Tēe un cúu jeé casásñn ñayuu. Te máni cándihví ní de tāca jée cutíndí ní máá de, chí tu ndeé Espíritu yā jíin de.

<sup>20</sup> Te máá rō ñānī mánī, na ije vāha ní rō jíin jñūhun ndoo ndasí jée cácandije rō. Te cacān tahú rō jíin fuerza Espíritu Santo. <sup>21</sup> Te quendōo ñihñ rō jíin jñūhun jeé cundáhú ní Yaā Dios rohó. Te condetu rō quiví jeé cōtecu

rō nī cāni sāha máá Jítoho yō Jesucristo siquī  
jeē cundáhú ni yā rohó.

<sup>22</sup> Te sava ñayuu jeē cájeni siquī ni, nducú  
ró modo scandíje ró i. <sup>23</sup> Te sava ga i chi  
nducú ndéyí ró jeē cácu i nuū cuéchi i, jeē  
nájñuhun stáa ró i nuū ñuhún. Te cundáhú ni  
rō i jnama ró i, te coto ró máá ró, te cuquini  
ni rō coto ró nde sahma i jeē ní cujnéhén jíin  
jniñu néé cásáha i.

*Jñuhun cújéhnú Yaā Dios nī cāni*

<sup>24</sup> Te Yaā Dios chi máñuhún-ni máá yá cúu  
Yaā ndichí, Yaā jnáma yóhó. Te íyó poder yā  
jeē coto ya rohó jéé ma quiví ró cuéchi, jíin  
jéé sāha ya jeē cuíñi ró núu ndíndēe yá, te  
quíví ún coo ndoo ró núu yā, te cusí ndasí  
ni rō sāha ya. <sup>25</sup> Te na cáhán yō jeē yóhyo luu  
cújéhnú ya siquī jeē ni sāha ya jíin Jítoho yō  
Jesucristo. Te na cáhán yō jeē cujéhnú téyí  
yá, te ndácu ya jniñu jíin poder jeē ndiso ya  
nde jenahán ndasí jíin ndé vijna jíin ndé nī  
cāni. Súcuán na cóo. Amén.

## JNIÑU QUIJI JEE NI JITO NDIJIN SAN JUAN

*Jeē ni stéén Jesucristo tācá jniñu quiji*

<sup>1</sup>Jñuhun yáha cúu jeē ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñáyyuu cácanđije jeē cácuu i mozo yā. Te stéén yā nuū i tācá jniñu jeē yachī coo. Te ni tají yá ndajéhé yā ní quiji ya ni stéén ndijin yā jniñu un nuū ruhū Juan jeē cúu ri mozo yā. <sup>2</sup>Te máá rí cástūhun ndāā rí siquī tāca jéē ní jito ri ún, te nácani ndāā rí jñuhun Yaā Dios jíin jñuhun jeē ní cahán ndāā Jesucristo.

<sup>3</sup>Yōhyyo ndetū ñayuu cahu tutu yáha, te suni yōhyyo ndetū ñayuu cuni nahín jeē cáhu ñayuu tāca jñuhun yáha jeē ní cachi Yaā Dios, te chuhun ni i. Chi je cuacuyajni quivī coo tācá jniñu yósó nuū tútu yáha.

*Jeē téé Juan carta nuū ndihúxá grupo ñayuu cácanđije*

<sup>4</sup>Máá rí cúu Juan, te téé ri jñuhun yáha cuájeē nuū rohó, ndihúxá grupo ñayuu cácanđije jeē cáyūcu Asia. Te ñuhun ni rí jeē máá Yaā Dios na sáha ga yā jeē váha rohó jíjnáhan ró, te sáha ya jeē coo ndeyí coo sī ní ró. Chi máá yá cúu Yaā iyó vijna, te ni iyo ya ní cáni, te coo ya ní cáni. Te ñuhun ni rí jeē suni súcuan sáha ndihúxá Espiritu jeē cáhūin ya yuhu mesa nuū ndácu Yaā Dios jniñu. <sup>5</sup>Te ñuhun ni rí jeē suni súcuan sáha Jesucristo, Yaā cahán ndāā tāca jñuhun. Te xihna gā máá yá ní natecu méhñu ndiyi. Te cújéhu ya nuū tāca rey jeē iyó ñayiví. Te máá yá cúndáhú ní yā yohó, te ni nacate ya yohó nuū cuéchi yó jíin níñi yā. <sup>6</sup>Te ni sáha ya jeē ní nduu yó rey jíin sūtū cájejniñu nuū Tatá yā Yaā Dios. Te na cahán yō jeē yōhyyo luu cújéhu ya te jnái ya poder ní cáni. Amén.

<sup>7</sup>Cuni sōho jíjnáhan ró, chi ndiji Cristo jíin vícō. Te ndivii ñayuu coto i nuū yā, te nde jíin ñayuu jeē ní castújí i ya. Te tāca raza ñayuu níí cáhnu ñayiví ndahyū i jeē tu ní cácanđije i ya. Súcuan nahín coo.

<sup>8</sup>Suhva cahán máá Jítho yō, Yaā jnái ndihi poder: Máá rí cúu nájñuhun letra A xihna ñuhún jíin letra Z jeē sándihí na, chi máá rí ní squejeé ndihi te máá rí sínu, áchi máá Yaā iyó vijna, te ni iyo ya ní cáni, te coo ya ní cáni.

*Jeē ní jito Juan jeē cújéhu luu Cristo*

<sup>9</sup>Máá rí cúu hermano rō Juan jíjnáhan ró. Te inuú-ni ndóho rí jñundóho jíin rō siquī jeē cácanđije yó Jesucristo, te inuú-ni ndácu Yaā Dios jniñu nuū yō, te inuú-ni jéndeyí ní yō sáha Jesucristo. Te siquī jeē ní nacani ri jñuhun Yaā Dios jíin jéē ní cachi ndāā rí jñuhun Jesucristo, jeē yúcuan ní cajni i ruhū cuenta preso, te ni cachune i ruhū isla jeē

naní Patmos. <sup>10</sup>Te iin domingo ni jito ndijin rí jeē ní stéén máá Espiritu Santo nuū rí. Te ni jini sōho ri iin jeē cána jee nihin ichi yátá rí nájñuhun jeē tívi trompeta. <sup>11</sup>Te ni cahán jíin rí:

Máá rí cúu nájñuhun letra A xihna ñuhún jíin letra Z jeē sándihí na, chi máá rí cúu Yaā iyó ndé xihna ñuhún te coo ri níí cáni. Te na téé ró nuū iin tutu tāca jéē cóto ró, te tají ró quihín nuū ndihúxá grupo ñayuu cácanđije jeē cáyūcú i níí cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

<sup>12</sup>Yūcuán na te ní ndicó cóto ri jeē cóto ri ndé iin cúu jeē cahán jíin rí. Te ná ni ndicó cóto ri te ni jito ri uxā candelero oro. <sup>13</sup>Te méhñu ndihúxá candelero un índichi máá Yaā ní nduu tēe. Te ñuhun ya iin sahna cáni jeē jinú nde nuū jehé yā. Te núhni iin cinturón oro jicā yā. <sup>14</sup>Te ixi xíní yā chi yaa nájñuhun ixi lánchi, nájñuhun yuhvá volcán. Te tinū ya ndíndēe nájñuhun yáñuhūn. <sup>15</sup>Te jehé yā xíñú jíto nájñuhun cāa cuaán jéē ní ndúhvā nuū horno. Te níhni ndasí cáhan yā, nájñuhun níhni cuehé yūte náhnu. <sup>16</sup>Te ndaváha ya jnái ya uxā quāmi. Te yuhu ya quénda jeē cáa nájñuhun espada jeē xeén ndindúú lado, te suu cúu jñuhun ya jeē niní sándaā yā siquī cuéchi. Te nuū yā cáa nájñuhun niándii jeē nándii ndaxin.

<sup>17</sup>Te ná ni jito ri yā te ni cotúú rí nuū jehé yā nájñuhun jeē ní jíhi rí. Te ni soó yá ndaváha ya siquī rí, te ni cahán ya:

Ma yūhu ró. Máá rí cúu Yaā iyó ndé xihna ñuhún te coo ri níí cáni. <sup>18</sup>Te Yaā técu cúu ri. Chi ni jíhi rí te ni natecu rí, te vijna chi técu rí níí cáni. Te máá rí jnái poder siquī cuéhyí jéhi ñayuu jíin siquī lugar nuū cáyūcu ánuá ndiyi. <sup>19</sup>Núu súcuan te tee ró nuū tútu tāca jéē ní jito ró, jeē cúu vijna jíin jéē cóo ichi nuú. <sup>20</sup>Te yáha cúu jñuhun sáhi siquī ndihúxá quāmi ni jito ró jnái ndaváha rí, jíin siquī ndihúxá candelero oro. Ndhúxá quāmi ún cúu nájñuhun ndihúxá jeē cácujehu nuū ndihúxá grupo ñayuu cácanđije. Te ndihúxá candelero cúu nájñuhun ndihúxá grupo ñayuu cácanđije.

*Jñuhun cuahán nuū ndihúxá grupo ñayuu cacandije:*

*Jñuhun cuahán ñuu Efeso*

## 2

<sup>1</sup>Teé ró jñuhun yáha na quihín nuū jeē cújéhu nuū ñayuu cácanđije ñuu Efeso: Súcuan cáhan ruhū, Yaā jeē jnái ndihúxá quāmi jíin ndaváha rí, te jica cuu ri méhñu ndihúxá candelero oro. <sup>2</sup>Je jíni rí táca jniñu váha casáha ró, jeē cándihví ní rō siquī jñuhun rí, jíin jéē cájendeyí ní ró. Te jíni rí jeē tu cájéhe ró jñuhun quivicoo ñayuu casáha néé méhñu rō. Te jíni rí jeē ní cajito ndee rō

tēe cástáhú jeē cácahān de jeē cúu de apóstol, te ni cajini rō jeē tēe stáhú cácuu de. <sup>3</sup> Te ni cajendeyi ni rō ni candoho rō jnūndóho, te tu ní ndínuu ni rō jeē cácuu ndasí rō jín jniñu ri. <sup>4</sup> Te vēsú sūcuan te iyó jecu jeē cahán ri nuū rō, chí tuá cáhiyo maní vāha rō jín rí nájñuhun ni iyo maní rō jín rí quiví jehé. <sup>5</sup> Núu sūcuan te nucūhun ni rō ndese ni castóo rō jñuhun jeē ni iyo maní rō jín rí, te nacani ni rō, te na sáha rō nájñuhun ni casáha rō ndé quiví ún. Te núu ma nácani ni rō, te yachí jeē rí te stáa ri candelero rō nuū iin, cúu jeē ma cuñi ga rō jín ñáyuu cácadnje. <sup>6</sup> Te vēsú sūcuan te iyó iin jeē vāha casáha rō, chí tu cánujnahan cuiti ni rō cájito rō jniñu neé casáha ñayuu cándiquin jñuhun jeē steén Nicolás. Te suni máa rí tu nujnahan cuiti ni rí jito ri. <sup>7</sup> Ñayuu iyó sóho na chúsóhó i jeē cahán maá Espiritu Santo jín táca grupo ñayuu cácadnje. Táca ñáyuu jeē cūndeyí siquí jeneé, cuāha ri jñuhun caji i ndehé jeē cúun xiní yújnu jeē sáha jeē cótecu i ní cáni. Te yujnu un iin nuū jardín Yaa Dios nde andiví, áchí yá.

#### *Jñuhun cuahān ñuu Esmirna*

<sup>8</sup> Te tee rō jñuhun yáha na quihín nuū jeē kujénu nuū ñáyuu cácadnje ñuu Esmirna: Súcuan cáhan ruhū, Yaa jeē iyó ndé xihna ñuhūn te coo ri ní cáni, te ni jilhi rí te ni natecu rí. <sup>9</sup> Je jín rí táca jniñu vāha casáha rō, jín jnūndóho cándoho rō, jín jeē cándoho ndáhú rō. Te vēsú sūcuan te cucá rō ndihí jeē ndíso jñuhun ri. Te jín rí jeē cácahān neé ñayuu siquí rō jijnáhan rō. Ñayuu un cácahān i jeē ñayuu hebreo, ñayuu maá Yaa Dios cácuu i, te tuú chí cástáhú-ni i, chí sa ñayuu yhi ndaha Satanás cácuu i. <sup>10</sup> Te ma yūhú cuiti rō táca jéē ndoho rō. Chí jexeén je yajni sáha jeē quivicoo sava rō vecāa jeē cóto ndee rohó jijnáhan rō, te ndoho rō jnūndóho uxí quiví. Te na cuñi nihin rō ndé cuu rō, te cuāha ri premio jeē cótecu rō ní cáni. <sup>11</sup> Ñayuu iyó sóho na chúsóhó i jeē cahán maá Espiritu Santo jín táca grupo ñayuu cácadnje. Táca ñáyuu jeē cūndeyí siquí jeneé, ma nihín i jnūndóho jeē jnahnú ndetú i cuu i vuelta uū, achí yá.

#### *Jñuhun cuahān ñuu Pérgamo*

<sup>12</sup> Te tee rō jñuhun yáha na quihín nuū jeē kujénu nuū ñáyuu cácadnje ñuu Pérgamo: Súcuan cáhan ruhū, Yaa jeē nevāha espada jeē xeén ndindúú lado, te suu cúu jñuhun ri jeē sándaā rí siquí cuéchi. <sup>13</sup> Je jín rí táca jniñu vāha casáha rō, te jín rí jeē cáyūcu rō mēhñu ñáyuu jeē ndácu Satanás jniñu nuū. Te vēsú sūcuan te cáhīn nihin rō jín jñuhun ri, te tu ní cánayūhu rō jeē cácadnje rō ruhū, ni quiví ni jilhi Antipas, tēe ni squicu vāha ni nacani ndaā jñuhun ri. Chí ñuu rō cáyūcu ñayuu cácejnīfu nuū Satanás, te ni cajehni

i Antipas. <sup>14</sup> Te vēsú sūcuan te iyó jecu jeē cahán ri nuū rō jijnáhan rō. Chí mēhñu rohó ñáyuu ñuu Pérgamo iyó sava ñayuu cándiquin jñuhun ni steén Balaam. Chí tēe un ní steén de nuū Balac ndese squiví de ñayuu Israel cuéchi jeē cáji i jeē ní sócō nuū ídolo jín jéē cosíquí ndéē jnāhan i. <sup>15</sup> Te suni iyó sava ñayuu mēhñu rō jeē cácadnje ga i jñuhun ni steén Nicolás, te jñuhun ún chí tu nujnahan cuiti ni rí. <sup>16</sup> Núu sūcuan te nacani ni rō siquí cuéchi rō. Chí núu tuú te yachí jeē rí jín espada jeē quēnda yuhu ri, te suu cúu jñuhun ri jeē sándaā rí siquí cuéchi. Te jín yúcuun te stóho ri ñayuu jeē cádnje ga jñuhun neé un. <sup>17</sup> Ñayuu iyó sóho na chúsóhó i jñuhun jeē cahán maá Espiritu Santo jín táca grupo ñayuu cácadnje. Táca ñáyuu jeē cūndeyí siquí jeneé, scáji rí i maná jeē yisáhi ichi ándiví. Te suni cuāha ri iin yuú cuijnú nuú i, te nuū ún condee iin síhví jéé, te ni iin ñayuu ma cūni síhví un, chí máa-ni i jeē nihín. Achí yá.

#### *Jñuhun cuahān ñuu Tiatira*

<sup>18</sup> Te tee rō jñuhun yáha na quihín nuū jeē kujénu nuū ñáyuu cácadnje ñuu Tiatira: Súcuan cáhan ruhū, maá Séhe Yaa Dios jeē ndíndēe tñūu rí nájñuhun yáñuhūn. Te jehé rí xihú jito nájñuhun cāa cuaán jéé ni ndúhvā. <sup>19</sup> Je jín rí táca jniñu vāha casáha rō, chí cácadnhú ni rō jnāhan rō, te cácadnje nihin rō ruhū, te cácejnīfu rō núu rí, te cájendeyí ni rō. Te jín rí jeē vihíyá gā casáha rō vijna vēsú nde quiví jehé. <sup>20</sup> Te vēsú sūcuan te iyó jecu jeē cahán ri nuū rō. Chí iyó iin ñahan mēhñu rō jéé naní Jezabel, te cájēhe rō jñuhun steén ña nuū rō. Te áchí ña jeē nácani ña jñuhun Yaa Dios. Te tuú chí jín jñuhun steén ña te stáhú ña ñayuu cácadnje jeē cácuu i mozo rí. Te sáha ña jeē casíquí ndéē jnāhan i, jín jéé cáyeji i jeē ní sócō nuū ídolo. <sup>21</sup> Te ni jēhe ri tiempo jeē na nacani ni ña, te tu cūni ña nacani ni ña stóo ña jeē casíquí ndéē ña. <sup>22</sup> Núu sūcuan te na sáha ri jeē jécāva ña jín cuéhyí. Te táca ñáyuu casíquí ndéē jín ña, suni cuāha ri jñūndóho xeén nuú i, te núu ma nácani ni i stóo i jniñu neé nájñuhun sáha ña. <sup>23</sup> Te sáha ri jeē cúu ñayuu jeē ní scádnje ña. Te sūcuan cuni táca grupo ñayuu cácadnje jeē maá rí cúu Yaa jín ndihí ndese cáa jeē níjnūni jín ánuá ñayuu. Te cuāha ri yāhu iin rō nuū ndese ni casáha rō. <sup>24</sup> Te sava ga rō jeē cáyūcú ñuu Tiatira, jeé tu ní cájetáhú jñuhun steén ñahan ún, ni tu ní cájni rō jñuhun jeē cácahān i jeē jñuhun sáhi gá Satanás cúu, jín máa rō cahán ri jeē ma tēe ga rí inga jniñu siquí rō. <sup>25</sup> Chí máa-ni jeē na quēndōo nihin rō jín jñuhun ndaā cácadnje rō, te quēndōo nihin rō jín ndé quiví ndiji ri. <sup>26</sup> Táca ñáyuu jeē cūndeyí siquí jeneé, jín jéé squicu vāha jniñu cūni rí nde vijna te nde quiví sándihí, sáha ri jeē kujénu i ndacu i jniñu nuū táca nación, <sup>27</sup> nájñuhun ní sáha Tátá rí jeē kujénu ri

ndácu ri jniñu. Te ndacu nihin i jniñu nuū táca nación. Te nájñuhun cúun yúú i quísi tahu, súcuan squéhichí i ñayuu tu cájendetū nuū rí. <sup>28</sup> Te sáha ri jeē coto i ruhū jeē luu kujéhu ri quenda ndijin rí, nájñuhun jíto i lucero jeē cáne cúndijin. <sup>29</sup> Ñayuu iyó sóho na chúsóhó i jñuhun jeē cahán maá Espiritu Santo jíin táca grupo ñayuu cácandíje. Achí yá.

*Jñuhun cuahān ñuu Sardis*

**3**

<sup>1</sup> Te tee ró jñuhun yáha na quihín nuū jeē kujéhu nuū ñayuu cácandíje ñuu Sardis: Súcuan cáhán ruhū, maá Yaā jeē névāha ndihúxá Espiritu Yaā Dios jíin ndihúxá quími. Je jíni rí táca jniñu cásáha ró, te cácahān ñayuu jeē cátecu ró, te nuū rí chí nájñuhun ndíyi cácuu ró. <sup>2</sup> Na nátaħu ni rō, te ndejéé nihin ró jíin jniñu jeē jecu na iyó te ndúcú naa. Chí je jíni rí jeē tu squícu vāha vāha ró nuū Yaā Dios. <sup>3</sup> Te na núcūhun ni ró táca jñuhun jeē ní castéén nuū rō. Te cuatáhú ró jñuhun ún te nacani ní jeē quíu cuéchi ró. Chí núu tú natahū ni rō, te cuajeē rí nuū ró ñin sanaa-ní nájñuhun jeē ñin sanaa-ni te quíji ñaculhá, te ma cúní ró na hora jíin rí nuū ró. <sup>4</sup> Te vēsú súcuan te iyó nahín jecu ró ñuu Sardis jeē tu ní cásáha ró cuéchi, jeē cúu nájñuhun jeē tu ní sájñehén ró sahma ró. Jee yúcuán cujíin yaa coo sahma ró caca ró jíin rí, chí ñayuu vāha cácuu ró. <sup>5</sup> Chí táca ñayuu jeē cúndeyí síquī jeneé, cuāha ri sahma cujíin yaa cūhun i. Te ma ndáhva rí síhví i nuū libro jeē yosó síhví ñayuu cotecu ní cáni. Te cuajñuhún rí i nuū Tatá rí jíin núu táca ndajéhé yā. <sup>6</sup> Ñayuu iyó sóho na chúsóhó i jñuhun jeē cahán maá Espiritu Santo jíin táca grupo ñayuu cácandíje. Achí yá.

*Jñuhun cuahān ñuu Filadelfia*

<sup>7</sup> Te tee ró jñuhun yáha na quihín nuū jeē kujéhu nuū ñayuu cácandíje ñuu Filadelfia: Súcuan cáhán ruhū, Yaā ndoo Yaā ndaa, te névāha ri ndacáa rey David. Te máá rí núne jeē quívi ñayuu nuū ndácu ri jniñu, te ni ñin ma cúu casí, te máá rí jési, te ni ñin ma cúu nune. <sup>8</sup> Je jíni rí táca jniñu vāha cásáha ró. Te ni nune rí nájñuhun ñin yéhyí quívicoo ró, te ni ñin ma cúu casí. Chí vēsú jecu-ni fuerza ró iyó, te ni cacandíje ró jñuhun ri, te tu cájesi ró yuhu ró jeē cácandíje ró ruhū. <sup>9</sup> Te iyó sava ñayuu yíhi ndaha Satanás, te cácahān i jeē ñayuu hebreo, jíin ñayuu maá Yaā Dios cácuu i, te tuú chí cástáhú-ni i. Núu súcuan te sáha ri jeē jécóo i nuū rō te jecuñi yití i nuū rō, te cuni i jeē maní rí jíin ró. <sup>10</sup> Te vāha ni casquícu ró jñuhun ní cahán rí jeē cúndeyí ni rō. Te jeē yúcuán jnama ri rohó quíví jeē quíji ñin jñúndóho xeēn síquī ñayuu ní cáhu ñayví, jéé coto ndee ún i jíjnāhan i. <sup>11</sup> Te yachí ndiji rí. Núu súcuan te quéndóo nihin ró jíin

jñuhun cácandíje ró, návāha ni ñin ma quénde premio ró. <sup>12</sup> Táca ñayuu jeē cúndeyí síquī jeneé, sáha ri jeē cuu i nájñuhun síhin yuū luu ñin templo Yaā Dios maá rí. Te ma cújijo i nuū ndeé yá un. Te tee ri síhví Yaā Dios maá rí jneé i, jíin síhví jéé máá rí, jíin síhví ñuu Yaā Dios maá rí. Te ñuu un cúu Jerusalén jeé, te cuun quíji ichi ándiví ndé nuū Yaā Dios maá rí. <sup>13</sup> Ñayuu iyó sóho na chúsóhó i jñuhun jeē cahán maá Espiritu Santo jíin táca grupo ñayuu cácandíje. Achí yá.

*Jñuhun cuahān ñuu Laodicea*

<sup>14</sup> Te tee ró jñuhun yáha na quihín nuū jeē kujéhu nuū ñayuu cácandíje ñuu Laodicea: Súcuan cáhán ruhū, maá Yaā cúu jñuhun ndaa, Yaā cúu testigo vāha jeē cahán ndaa. Te máá rí ni sáha ndíhi jeē ní cáhān Yaā Dios jeē na jécóo. <sup>15</sup> Je jíni rí táca jniñu cásáha ró. Te cácuu ró nájñuhun jeē tú mĭjin ni tú jihní, cúu jeē jecu-ní cácandíje ró jñuhun rí, te ni tu cájito uhū ró ni tu cándihví ni rō síquī. Te nacā jeē vāha núu jeē mĭjin ró chí jéé jihní ró nuú. <sup>16</sup> Te tuú chí máá yívixi-ni ró, chí ni tu cájito uhū ró ni tu cándihví ni rō síquī. Te jeē yúcuán squéhichí rí rohó nájñuhun ñin jeē tésihi rí jeē séyūhu rí jeē tu nújñahan ni rí. <sup>17</sup> Te cácahān ró jeē cucá ró, te quéndóo vāha ró, te tu cūmani ni ñin nuū ró. Te tu cásáha ró cuenta jeē cuécá íi cándoho ró, te ndáhú ndasi ró, te cácuáá ró, te máá ñii líi ró. Te táca jéé yáha cúní cahān jeē tu cácandíje vāha ró. <sup>18</sup> Núu súcuan te cáhán rí jíin ró jeē nuū rí cuaan ró oro jeē ni ndúhvā nuū ñuhún te ni nduu máá nene, te suu cúu jeē sáha rí jeē coo cucá ndíje ró ndíhi jeē ndíso jñuhun rí. Te nuū rí cuaan ró sahma cujíin cūhun ró, návāha tú cucanu ró jeē máá ñii líi ró, cúu jeē quéndóo ndaa ró sáha rí. Te cuaan ró tájnā nuū rí, quívi tinūu ró, návāha ndundijin tinūu ró, cúu jeē jecūhun ni ró jñuhun rí. <sup>19</sup> Táca ñayuu jeē cundáhú ni rí, chí cáhán rí nuū i te stóho rí i, návāha na chúhun ni i. Núu súcuan te na cándihví ni rō jíjnāhan ró, te nacani ni rō jeē stóo ró cuéchi ró. <sup>20</sup> Cuni sóho, chí íin ri yehyí ánuá ró te cáhán rí. Te núu ndé-ni rohó cuni sóho te nune ró yehyí ánuá ró, te quívi rí caji rí staa jíin ró, te suni caji máá ró jíin rí. Te suu cúu jeē cóndee rí ánuá ró. <sup>21</sup> Táca ñayuu jeē cúndeyí síquī jeneé, cuāha ri jñuhun conene i jíin rí nuū mesa nuū ndácu ri jniñu. Chí máá rí suni ni snáā rí poder jeneé, te ni cucóo rí jíin Tatá rí nuū mesa nuū ndácu ya jniñu. <sup>22</sup> Ñayuu iyó sóho na chúsóhó i jñuhun jeē cahán maá Espiritu Santo jíin táca grupo ñayuu cácandíje. Achí yá.

*Tāca jéé cáyucú andiví cáchiñuhún núu yā*

**4**

<sup>1</sup> Yúcuán na te ni ndacoto ri, te ni jito ri jeē núne ñin yéhyí andiví, te máá Yaā jeē ní cáhān

jiin rí jeē xíhna ñúhún, ní cahān tucu jiin rí nájñuhun jeē tíví trompeta. Te ní cahān:

Caa quiji ró yáha, te na stéén rí nuū rō tācá jñiñu jeē cóo ichi nuū gā, achí yá.

<sup>2</sup>Te máá Espíritu Santo ní scóto-ni ya ruhú. Te ní jito rí jeē andiví íin íin mesa nuū ndácu jñiñu, te néne máá yá nuū mesa un. <sup>3</sup>Te máá yá jeē néne yūcuan cáa ya nájñuhun ndíndéé íin yuū quiyí ndíí chí íin yuū cuehé ndíí. Te íin ticō vēhnde ní jicó ndúú yuhu mesa yā, te ndíndéé nájñuhun íin yuū cuí ndíí. <sup>4</sup>Te xiin mesa yā ní jito rí jeē ní jicó ndúú ocō cuñ gā mesa nuū ndácu jñiñu. Te nuū mesa un néne ocō cuñ tēe jéhu cándiso jñiñu. Te cáñuhun de sahma cuijñ yaa, te xiní de cáñuhun corona oro. <sup>5</sup>Te nde nuū mesa nuū ndácu ya jñiñu ndíndéé taja te náñin te cáhān taja. Te ichi nuū mesa yā íin ndihúxá Espíritu Yaa Dios, jeē cáa nájñuhun uxā yiti náhnu jeē cayú ñuhún. <sup>6</sup>Te ichi nuū mesa yā ún suni iyó nájñuhun íin mar jeē jito quiyí nájñuhun vidrio.

Te xiin mesa yā un ní jicó ndúú cuñ jeē técu. Te iyó cuehé tinúu ní cáhnu ichi nuū jiin ichi yátá un. <sup>7</sup>Te íin jeē técu un cáa nájñuhun ndicaha. Te inga cáa nájñuhun stiquí. Te jeē uní chí néne nuū tēe. Te jeē cuñ chí cáa nájñuhun yaha chócó jéé jicó nuū tachí. <sup>8</sup>Te ndicúún jeē técu un iyó íñu ndijēn jeē íin íin. Te máni máá tinúu cúu ní cáhnu nde jiin ní chíji ndijēn. Te nduú ñuú tu jécucñí cuiti jeē cahān:

Yaa íi Yaa ndoo ndasí

cúu máá Jítoho yō Yaa Dios, Yaa jñí ndihí poder,

Yaa iyó vijna, te ní iyo yá ní cáni, te coo ya ní cáni.

Achí.

<sup>9</sup>Chi máni jeē cácahān ndicúún un jéé cujéhu ndasí máá Yaa jeē néne nuū mesa, Yaa jeē técu ní cáni cuiti. Te yíñuhún cácahān un jiin yá, te nácuatáhú nuū yā. <sup>10</sup>Te táca jínu jeē casáha súcuan, te ndihócó cuñ tēe jéhu cándiso jñiñu, cájecucñí yiti de nuū Yaa jeē técu ní cáni cuiti, cáchiñuhún de ya. Te cástáa de corona de, cájequin de ichi nuū jehé mesa yā. Te cácahān de:

<sup>11</sup>Jítoho ná te Yaa Dios na cúu ní.

Te vāha ndasí Yaa cúu ní jéé cácahān i jeē luu cújéhu ní,

te cáhiyo yíñuhún i nuū ní, te jñá ní ndihí poder.

Chi máá ní ní sáha ndihí jeē iyó, te siquí jeē súcuan ni cuu ní máá ní te ní jecōo ndihí.

Achí de jíjñahan de.

*Jeé ní nune Londe Yaa Dios tutu*

## 5

<sup>1</sup>Yūcuán na te ní jito rí jeē Yaa néne mesa jeē ndácu jñiñu, ndaváha ya jñá ya íin tutu

cáni jeē ní tuu. Te yósó jñuhun ndíndúú lado tutu ún, te ndihyú jiin úxá sello. <sup>2</sup>Te ní jito rí íin ndajéhé yā jeē ndíso poder, te ní cahān jee:

¿Nde íin cúu tēe vāha ndasí jeē cándiso jñiñu cahnde sello te nune tutu yáha? achí ndajéhé yā.

<sup>3</sup>Te ní andiví ní ñayiví ní jeē iyó chíji ñayiví, tu ní iyo ní íin jeē cándiso jñiñu nune tutu ún, ní jeé cóto nuū. <sup>4</sup>Te ní ndahyú ndasí rí, chí tu ní iyo ní íin jeē cándiso jñiñu nune te cahu tutu ún, ní jeé cóto nuū. <sup>5</sup>Yūcuán na te ní cahān íin tēe jéhu un jiin rí.

Ma ndahyú rō, chí iyó íin Yaa ndíso jñiñu jeé cahnde yā ndihúxá sello ndihyú tutu, te nune ya. Te máá yá chí iyó cuehé poder yā, nájñuhun jeē iyó cuehé fuerza íin ndicaha. Te ní cacu ya chíji yucún Judá, jeé cuu yucún rey David. Te ní snāá yā poder táca jéneé.

<sup>6</sup>Yūcuán na te ní jito rí Yaa jeé cúu Londe Yaa Dios jeé ní cajehni i te ní natecu. Te Londe un íin ya nuū íin mesa Yaa Dios, méññu ndicúún jeé técu, jiin tēe jéhu cándiso jñiñu. Te iyó úxá ndiqui jiin úxá tinúú Londe ún. Te tinúú un cúu ndihúxá Espíritu Yaa Dios jeé ní tají yá ní jengoco ní cáhnu ñayiví. <sup>7</sup>Te Londe un ní jequihñ ya tutu jeé jñá ndaváha Yaa jeé néne nuū mesa. <sup>8</sup>Te ná ní quihñ ya tutu ún, te ndicúún jeé técu jiin ndihócó cuñ tēe jéhu cándiso jñiñu, ní cájecucñí yiti nuū yā. Te ná íin ná íin tēe jéhu un cándaha yaa jeé naní arpa, jiin cóhō cúu oro jeé ñuhun chitú sūje cutú. Te sūje cutú un cúu máá táca jñuhun jeé cájicān tahú ñayuu yíhi ndaha Yaa Dios. <sup>9</sup>Te ní cajita de íin yaa jeé, te suhva cáhān:

Vāha ndasí Yaa cúu ní jéé quihñ ní tutu te cahnde ní sello jeé ndihyú.

Chi ní cajehni i níhín, te jiin náñí ní ní nacuaan ní ñayuu

méññu táca raza, táca yuhu, táca ñuu, táca nación, návāha cuu i ñayuu Yaa Dios.

<sup>10</sup>Te ní sáha ní jéé cuu i rey jiin sūtū nuū Yaa Dios,

te ndacu i jñiñu ini ñayiví.

Achí de cájita de.

<sup>11</sup>Te ní jito ga rí, te ní jini sōho rí jeé cácahān cuehé ndajéhé yā jeé ní cájicó ndúú xiin mesa yā, jiin xiin ndicúún jeé técu, jiin xiin tēe jéhu cándiso jñiñu. Te iyó cuehé ndasí millón ndajéhé un. <sup>12</sup>Te suhva ní cacahān jee ya:

Vāha ndasí Yaa cúu Londe jeé ní cajehni i.

Te jeé yūcuan jñá ya poder, te yōho cúcá yá, te yōho ndíchí yá, te ndíso ya cuehé fuerza, te cáhiyo yíñuhún ndihí nuū yā, te luu cújéhu ya,

te cácahān i jeé vāha ndasí Yaa cúu ya.

Achí.

<sup>13</sup>Te suni ní jini sōho rí jeé cácahān ndihí jeé ní sáha Yaa Dios jeé iyó ini andiví jiin ini



ñayiví jín chiji ñayiví jín ini mar. Te ndivii un ní cacahán:

Cúsñ ní yó cahán yó jeé yóhoyo vāha Yaā cúu máa Yaā néne mesa nuū ndácu ya jniñu,

jín Yaā cúu Londe Yaā Dios.

Te na cóo yñíhún yó núu yā, chí cújéhu luu ya,

te jñá ya poder ní cání cuiti.

Achí.

<sup>14</sup> Te ni cacahán ndicúún jeé técu:

Súcuan na cóo, áchí.

Te ndihóco cuñ tēe jéhu cándiso jniñu ní cajecuiñ yiti de, te ní cachihún de nuū Yaā jeé técu ní cání cuiti.

*Siquí ndihúxá sello*

## 6

<sup>1</sup> Yūcuán na te ni jito ri jeé Yaā cúu Londe Yaā Dios, ni jehnde yā ñn jeé uxá sello un. Te ni jini sóho ri jeé cahán ñn jnāhan ndicúún jeé técu ún, nájñuhun cáhán taja:

Nehen te cuni rō.

<sup>2</sup> Te ni ndacoto ri, te ni jito ri ñn caballo cuijín. Te jeé yosó siquí tñ un ndáhá ñn arco jeé stáva nduva. Te ni jecūhun ñn corona xiní. Te ni quenda ni jejnāhan, te ni cundeyi siquí ndihi.

<sup>3</sup> Yūcuán na te Londe un ní jehnde yā sello uū. Te ni jini sóho ri jeé cahán inga jnāhan ndicúún jeé técu:

Nehen te cuni rō.

<sup>4</sup> Te ni quenda ñn caballo cuehé, te jeé yosó siquí tñ ndiso jniñu jeé snāá jñuhun cáyūcu máni ñayuu ñayiví, te quejéé i cahni jnāhan i. Te ni nihñ ún ñn espada cáhnu.

<sup>5</sup> Yūcuán na te Londe un ní jehnde yā sello uní. Te ni jini sóho ri jeé cahán inga jnāhan ndicúún jeé técu:

Nehen te cuni rō.

Te ni ndacoto ri, te ni jito ri ñn caballo jnuú. Te jeé yosó siquí tñ ndáhá ñn balanza jeé chícuāha, chí coo jnamā xeēn. <sup>6</sup> Te mēhñú ndicúún jeé técu un ní jini sóho ri ñn jeé cahán:

Máa ñn kilo-ni trigo nihñ i jín yáhu i jeé sájniñu i ñn quiví. Te núu cebada, te uní-ni kilo nihñ i jín yáhu i jeé sájniñu i ñn quiví. Te aceite jín vino chí ma sáha ró jéé cúmaní. Achí.

<sup>7</sup> Yūcuán na te Londe un ní jehnde yā sello cuñ. Te ni jini sóho ri jeé cahán tucu inga jnāhan ndicúún jeé técu:

Nehen te cuni rō.

<sup>8</sup> Te ni ndacoto ri, te ni jito ri ñn caballo cuaán yaa, te jeé yosó siquí tñ cúu máa cuéhyí jémi ñayuu. Te ichi yátá un ndiquín máa jñuhun jeé quiví ñayuu lugar nuū cáyūcu ánuá ndiyi. Te ndindúú un cándiso jniñu jeé ndóna siquí ñn jeé ndicúún parte ñayiví, te cuu sáha jeé cúu ñayuu jín guerra, jín jnamā,

jín cuéhyí xeēn, jín táca quití xeēn jeé iyó ñayiví.

<sup>9</sup> Yūcuán na te Londe un ní jehnde yā sello uhūn. Te chiji altar cáhnu ní jito ri anuá ñayuu jeé ní cacandíje jñuhun Yaā Dios te ni canacani ndaaá i jñuhun ya, te siquí yucuan ní cajehni ñayuu i. <sup>10</sup> Te ni cacana jee ánuá un:

Jitoho ná Yaā Dios, máa ní cúu Yaā ndoo te vāha squícu ní jéé ní jéjñuhun ní. ¿Te nasaa ga tiempo coo te sándaá ní jéhē ná, te nacuaña ní jéé ndútahú ñayuu ñayiví jéé ní cajehni sáña? áchí.

<sup>11</sup> Yūcuán na te ni jéhe ya sahna cuijín cuhun i jijnāhan i, te ni cahán yā jín i jeé na ndetátú i jecu gá tiempo. Chí iyó gá hermano i jeé cájejniñu nuū yā, jeé suni jini ñuhún cuu i návāha jñu número i, áchí yā.

<sup>12</sup> Yūcuán na te Londe un ní jehnde yā sello iñu. Te ni jito ri jeé ní jnaá ndasí. Te ni cujnuú níandii nájñuhun ñn sahna jnuú. Te ní yóo ní nduu nájñuhun niñí.

<sup>13</sup> Te quími andiví ní ningoyo nuū ñuhun nájñuhun níngoyo ndehé yihí yujnu higo sáha tachí nihñ. <sup>14</sup> Te andiví ní cujiyo cuahán nájñuhun jeé nátuu ñn tutu cáhnu. Te táca yucu jín táca isla ní cujiyo cuango inga lado. <sup>15</sup> Te táca rey ñayiví, jín jéé cácujeñu, jín jéé cucá, jín táca capitán, jín jéé cándiso poder, jín mozo jee ní cajeen ñayuu, jín tēe cásájniñu cuenta máa, ní cachisáhi máa ini yaú cava jín méhñu cava chiji yucu. <sup>16</sup> Te ni cacahán i jín yucu jín cava:

Ndicó cava siquí ri, na quísáhi rí návāha tú coto máa Yaā néne mesa ndácu jniñu, jín Yaā cúu Londe jeé cuáha ya castigo xeēn ruhú.

<sup>17</sup> Chí ni quee máa quiví cáhnu jeé cuáha ya castigo, ¿te ndé ñn canda condichi nuū yā? achí i jijnāhan i.

*Ñayuu táca yúcūn Israel jeé ní jécondee sello jneē*

## 7

<sup>1</sup> Te ná ni cuu jniñu yáha, te ni jito ri cuñ ndajéhé yā jeé cáhñn ndicúún lado ñayiví. Te cájesi yā nuū ndicúún tachí, návāha ma quee nuū ñuhun ni nuū mar ni nuū ní ñn yujnu. <sup>2</sup> Te suni ni jito ri inga ndajéhé yā, vėjí ichi núu cáne niāndii. Te ndáhá yā sello Yaā Dios, Yaā técu. Te ni cahán jee ya jín ndicúún ndajéhé un jéé ndiso jniñu jeé sáha dañu nuū ñuhun ichi jín nuū mar:

<sup>3</sup> Ma sáha ró dañu nuū ñuhun ni nuū táca yujnu ni nuū mar, chí nde na tēe yó sello jneē táca ñayuu cájejniñu nuū Yaā Dios yó.

<sup>4</sup> Te ni jini sóho ri jeé achí jéé iyó ciento uū xico cuñ mil ñayuu jeé ní jécondee sello jneē. Te ñayuu un cácuu táca yúcūn ñayuu Israel. <sup>5</sup> Te iyó úxí uū mil ñayuu cácuu yucūn Judá jeé ní jécondee sello, jín úxí uū mil yucūn Rubén, jín úxí uū mil yucūn Gad, <sup>6</sup> jín úxí uū mil yucūn Aser, jín úxí uū mil yucūn Neftalí,

jiin úxí uū mil yucūn Manasés, 7 jiin úxí uū mil yucūn Simeón, jiin úxí uū mil yucūn Leví, jiin úxí uū mil yucūn Isacar, 8 jiin úxí uū mil yucūn Zabulón, jiin úxí uū mil yucūn José, jiin úxí uū mil yucūn Benjamín. Ndihi yucūn yáha cúu jeē ní jécondee sello.

*Nāyuu cuehē jeē cáñuhun sahma cuijín*

9 Te ná ní cuu jniñu yáha te ní ndacoto ri, te ní jito ri cuehē ndasí ñāyuu. Te cúu i ñāyuu táca nación jiin táca raza jiin táca yuhu jiin táca ñuu. Te cáhīn i nuū mesa nuū ndácu Yaā Dios jniñu jiin núu maá Yaā Londe. Te siquī jeē cuehē ndasí i, te ní ñn ma cúu cahu nasaa i cúu. Te cáñuhun i sahma cuijín, te cándahá i ñuū. 10 Te ní cacana jee i:

Yaā Dios maá yó cúu jeē ní jnama yóhó, Yaā jeē néne nuū mesa jeē ndácu jniñu, jiin Yaā cúu Londe Yaā Dios.

Achí i jijnáhan i. 11 Te ndihí ndajéhé ní cajicó ndúu yā cáhīn ya xiin mesa Yaā Dios, jiin xiin tēe jéhnú cándiso jniñu, jiin xiin ndicúún jeē técu. Te ní cajecuñi yiti yá ní cachíñuhún yá Yaā Dios ichi núu mesa yā. 12 Te ní cacahān yā:

Amén. Cúsī ní yō cahán yō jeē yóhoyo vāha Yaā cúu Yaā Dios maá yó.

Te luu cújéhnú ya te ndíchi yá.

Te na nácuatáhu yó nuū yā, te na cóo yíñuhún yó núu yā.

Chi jniñi ya poder, te ndíso ya cuehē fuerza jeē ní cáni cuiñi. Amén.

Achí táca ndajéhé yā.

13 Yūcuán na te ní cahān ñn tēe jéhnú un jíin rí:

¿Nde ñāyuu cúu yáha jeē cáñuhun sahma cuijín, te ndé chí véjicoo i?

14 Te ní cahān rí jíin de:

Máá ní cúu jeē jíiní, Tátá.

Te ní cahān de jíin rí:

Yáha cácuu ñayuu jeē ní cayāha i jeē ní cajiito i jnūndóho xeēn. Te ní canacate i sahma i jíin níñi maá Londe, te ní nduyaa vāha, cúu jeē ní ndundoó ánuá i ní sáha ya. 15 Jeē yūcuán cúu jeē cáhīn i nuū mesa nuū ndácu Yaā Dios jniñu, te cájejniñu i ini templo yā nduú ñuú. Te Yaā jeē néne nuū mesa, coto ya i jeē quéndóo vāha i nuū yā. 16 Te ma cúu gā i sóco, te ma jíichí gā i ndute. Te ma cayú gā i nuū niāndii, ní ma ndóho ga i jeē jihní. 17 Chí máá Yaā cúu Londe jeē néne nuū mesa jeē ndácu jniñu, coto ya i nájnūhun jeē cúu i lanchi ya. Te condeca ya i quihñ yā jíin i nuū cáne ndute jeē cótecu i sáha. Te Yaā Dios nacuaa yā ndute núu i jijnáhan i, te ma ndahyú gā i. Achí tēe jéhnú ún.

*Siquī sello uxá jíin cohó cúu oro*

**8**

1 Te Londe un ní jehnde yā sello uxá jeē ndihyú tutu ún, te nayúú-ni ní iyo ini andiví nájnūhun sava hora. 2 Te ní jito ri ndihúxá

ndajéhé jeē cáhīn nuū Yaā Dios. Te ní cajéhe uxá trompeta nuū ndajéhé un. 3 Yūcuán na te ní quee inga ndajéhé, ndáhá yá ñn cohó cúu oro, te ní jecuiñi yā nuū altar. Te ní jéhe cuehē sūje cutú núu yā, návāha socó yā jíin jnūhun cájicān tahú ndihí ñayuu cácandije Yaā Dios. Te ní socó yā nuū altar oro jeē índichi ichi núu mesa nuū ndácu Yaā Dios jniñu. 4 Te nuū cohó cúu jniñi ndajéhé un ní cane ñuhmā sūje cutú, ní caa nuū Yaā Dios nde jíin jnūhun cájicān tahú ñayuu cácandije Yaā Dios. 5 Yūcuán na te ní quihñ ndajéhé un cohó cúu un. Te ní scutú yá tíca ñuhñ jeē cayú nuū altar. Te ní jete yā nde ini ñayiví. Te ní sáha jeē ní cáhān taja, te ní níñin, te ní ndindéé taja, te ní jnāa.

*Jnūhun siquī trompeta*

6 Yūcuán na te ndihúxá ndajéhé jeē cándahá ndihúxá trompeta, ní casatūhva ya jeē tiví yā.

7 Te ndajéhé ñn ní tiví yā trompeta. Te ní cuun níñi ini ñayiví jíin ñuhñ jeē ní sácā núu jíin níñi. Te ní cayú ñn jeē uní parte ñayiví, jíin ñn jeē uní parte yujnu, jíin ñn jeē uní parte ite cuiñi.

8 Te ndajéhé uū ní tiví yā trompeta. Te ñn nájnūhun ñn yucu cáhnu jeē cayú ñuhñ ní ningava cuahān nuū mar. Te ñn jeē uní parte mar ní nduu níñi. 9 Te ní jihí ñn jeē uní parte quiti ñuhñ nuū mar. Te ní naa cuehē barco, chí ñn ñn jeē táca úní ní naa.

10 Te ndajéhé uní ní tiví yā trompeta. Te ní ningava ñn quimi cáhnu ichi ándiví, te cayú nájnūhun cayú ñn yiti cáhnu. Te ní ningava siquī ñn ñn jeē táca úní yūte jíin núu cáne ndute. 11 Te quimi un nání quimi uvuá. Te ñn jeē uní parte ndute ní cuu uvuá. Te ní cajihí cuehē ñayuu ní sáha jeē ní cuu uvuá ndute ún.

12 Te ndajéhé cuñ ní tiví yā trompeta. Te ñn jeē uní parte niāndii jíin yóo jíin quimi ní tiví. Te ní ndunee ñn jeē uní parte i, te tuá ní cundijin ñn jeē uní parte nduú jíin ñuú.

13 Te ní ndacoto ri, te ní jini sóho rí jeē cána jee ñn ndajéhé yā jeē ndáva cuahān sava andiví:

Nacā xeēn gā ndoho ñayuu cáyucú ini ñayiví, chí je yajni cuecu uní gā trompeta jeē tiví uní gā ndajéhé, achí yā.

**9**

1 Te ndajéhé uhñ ní tiví yā trompeta. Te ní jito rí jeē ichi ándiví ní ningava ñn quimi nde ini ñayiví. Te nuū quimi un ní jéhe ndacáa jeē nūne túhnchi cúnú ndasí. 2 Yūcuán na te ní nune un túhnchi, te ní cane ñuhmā ní caa nájnūhun ñuhmā ñn ijnū cáhnu. Te ñuhmā un ní sáha jeē ní cunee niāndii jíin ní núu tachí. 3 Te nuū ñuhmā un ní canecoo tíca ndicuéhyí, ní jité núu tí ní cáhnu ñayiví. Te ní jéhe ya jnūhun jeē sáha tí nájnūhun

cásaha tisuhma xeēn jeē iyó ini ñayiví. <sup>4</sup> Te ni ndacu ya jniñu nuū tī jeē ma sáha ti dañó ite jíin yúcu cuíi jíin yujnu, chi máni ñayuu jeē tu ndéé sello Yaa Dios jneē i cúu jeē tuu tī. <sup>5</sup> Te tu ní jéhe ya jñūhun jeē cáhni tī ñayuu, chi máni jeē stóho tī i uhūn yoō. Te sáha tī jeē jetú i nájnūhun jeē jetú ñayuu jeē túu tisuhma i. <sup>6</sup> Te quiví ún nducú ndasí ñáyuu modo cuu i, te ma nihín i modo. Te vesú cuní i cuu i, te tú na modo cuu i.

<sup>7</sup> Te táca ndicuéhyí un cáa tī nájnūhun caballo jeē cáhiyo túhva quingoo nuū cuájñahan. Te xiní tī ñūhun nájnūhun corona oro. Te née tī nuū tée. <sup>8</sup> Te iyó ixi tī jeē cáa nájnūhun ixi xíní ñahan. Te jñūhun tī cáa nájnūhun jñūhun ndicaha. <sup>9</sup> Te ní tī ndihyú nájnūhun sahma cáa. Te ñihin ndijēn tī nájnūhun ñihin jeē cuángoo cuehē caballo nuū guerra cáñuhun tī carreta. <sup>10</sup> Te suhmā tī ndiso iñu nájnūhun tisuhma. Te jíin súhmā tī cuu stóho tī ñayuu uhūn yoō. <sup>11</sup> Te iyó ñin jeē cujéhu nuū tī, te suu cúu ndajéhé jexeēn jeē ndító túhñchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jéē snāā.

<sup>12</sup> Je ní yāha ñin jñūndóho, te iyó úu gā jñūndóho jeē quíji.

<sup>13</sup> Te ndajéhé iñu ní tiví yā trompeta. Te ni jini sóho rī ñin jñūhun jeē ní cahān nde mēhñú ndicúun yiquí altar oro jeē íin nuū Yaa Dios. <sup>14</sup> Te ní cahān un jíin ndajéhé iñu jeē ndahá trompeta:

Nandají ró ndicúun ndajéhé jeē nuhni yuhu yúte cáhnu jeē naní Eufrates, achí.

<sup>15</sup> Te ní nandají ndicúun ndajéhé un, návāha cahni ñin jeē uní parte ñayuu ñayiví. Chi je cáhiyo túhva ndajéhé un jeē siquí maá hora jíin quiví jíin yoō jíin cuiyá jeē cóo súcuan. <sup>16</sup> Te ní jini sóho rī jeē achí jéē iyó úu ciento millón soldado jeē cáyoso caballo.

<sup>17</sup> Te ní steén gā yā nuū rī, te ní jito ndijin rī táca caballo. Te tée cáyoso siquí tī cáñuhun de camisa cáa jeē cuehē, jeē ndeé, jíin jéē cuaán. Te xiní caballo un cándāa nájnūhun xiní ndicaha. Te yuhu tī quénda ñuhūn jíin ñūhmā jíin azufre. <sup>18</sup> Te jíin úná jeē quénda yuhu caballo un, te ní jihí ñin jeē uní parte ñayuu, suu jíin ñūhūn jíin ñūhmā jíin azufre. <sup>19</sup> Chi yuhu tī jíin súhmā tī iyó fuerza jeē cáhni tī ñayuu. Chi suhmā tī cándāa nájnūhun coō, te iyó xíní, te jíin yúcuan stóho tī ñayuu.

<sup>20</sup> Te sava ga ñayuu jeē tu ní jihí jíin táca jñūndóho yāha, tu ní nacani ní i stóo i ídolo jeē ní casáha i. Te tu ní stóo i jeē cáchiñūhūn i táca táchi jíin ídolo jeē ní cuvāha jíin oro jíin plata jíin cáa cuaán jíin yúu jíin yujnu. Te táca un chi tu cúu coto, ní tu cúu cuní sóho, ní tu cúu caca. <sup>21</sup> Te ní tu ní cácanani ní i stóo i jeē jéhni i ndiyi, jíin jéē satásí i, jíin jéē jíca jnéni i, jíin jéē sacuíhná i.

*Ndajéhé jeē ndahá libro lulí*

## 10

<sup>1</sup> Te ní jito rī inga ndajéhé yā jeē ndiso poder, ní cuun ya ichi ándiví. Te ñúsúcún yá vicó, te xiní yā ñūhun ticó vėhndé. Te nuū yā ndíndēe nájnūhun nāndii, te sihin ya cáa nájnūhun uū sihin jeē cáa ná cáa ñuhūn. <sup>2</sup> Te ndáhá yá ñin libro lulí jéē núne. Te ní jeni ya jehē váha ya nuū mar, te jehē jecó yá nuū ñūhun íchi. <sup>3</sup> Te ní cana jee téyí yá, nájnūhun jeē ndahyú ndicaha. Te ná ní cana jee ya, te ní cacahān uxā taja. <sup>4</sup> Te ná ní cacahān uxā taja, te je iyó túhva rī jeē tée rī jñūhun un núu. Te ní jini sóho rī ñin jñūhun ichi ándiví jeē ní cahān jíin rī:

Chuvāha ró táca jñūhun jeē ní cacahān uxā taja ún, te ma steén ró, ní ma tée ró, achí.

<sup>5</sup> Yūcuán na te ndajéhé jeē ní jito rī jeē íin nuū mar jíin nuū ñūhun, ní ndonehen ya ndaha váha ya ichi ándiví. <sup>6</sup> Te ní ndacunehen ya sihví máá Yaa jeē técu ní cáni, Yaa ní sáha ándiví jíin ñayiví jíin mar jíin táca ndihí jeē iyó ini. Te jíin sihví yá un ní cahān teyí ndajéhé:

Ma cucuéé gá jeē jinu ñayiví. <sup>7</sup> Chi núu na quéjéé ndajéhé uxā tiví yā trompeta, yūcuán na te squícu-ní Yaa Dios jñūhun sáhi yá, nájnūhun ní castūhun yá nuū táca mozo yá, téē ní canacani jñūhun ya nde jenahān, achí ndajéhé.

<sup>8</sup> Yūcuán na te máá jéē ní jini sóho rī jeē ní cahān ichi ándiví, ní cahān tucu jíin rī:

Cuáhān te quihin ró libro lulí jéē núne jeē ndahá ndajéhé jeē íin nuū mar jíin nuū ñūhun, achí.

<sup>9</sup> Te ní jehēn rī nuū ndajéhé un, te ní jicān rī jeē na cuáha ya libro lulí un núu rī. Te ní cahān yā:

Quihin te caji ró. Chi vixí sáha ini yuhu ró nájnūhun ndúxi, te chíji ró chí cuhiyá sáha, achí yá.

<sup>10</sup> Yūcuán na te ní quihin rī libro lulí jeē ndahá ndajéhé yā, te ní yeji rī. Te vixí ní sáha ini yuhu rī nájnūhun ndúxi. Te ná ní cuu ní yeji rī, te ní jitē iyá ní rī. <sup>11</sup> Te ní cacahān jíin rī:

Cánuú jéē nacani tucu ró jñūhun Yaa Dios, ndese coo siquí ñayuu cuehē ñuu jíin cuehē nación jeē sán sán yuhu, jíin siquí cuehē rey cándacu jniñu, achí jíin rī.

*Siquí uū testigo yá*

## 11

<sup>1</sup> Yūcuán na te ní cajéhe ñin yujnu nuū rī, jeē cúu ñin cuvāha jeē chícuāha. Te ní cacahān jíin rī:

Ndocuñí te chícuāha ró templo cáhnu Yaa Dios jíin altar, te cahu ró nasaa ñayuu cúu jeē cáchiñūhūn núu yā yūcuán. <sup>2</sup> Te ma chícuāha ró patio yatā templo. Chi je ní jéhe ya nuū ñayuu táca ñuu jicá. Te coyúcu i ini ñuu ñi yáhá, te uū xico uū yoō cueñú i siquí ñuu. <sup>3</sup> Te

tají rí uū testigo rí jeē nácani jnūhun ri mil uū ciento uní xico quiví. Te cuhun de sahna ndáyí jeē cácuquíhá ní de siquí cuéchi ñayuu, achí yá.

<sup>4</sup> Te ndindúú testigo un cúu nájnūhun ndindúú yujnu olivo jíin ndindúú candelero jeē ín nuū Yaā Dios, Yaā chíí ñayíví. <sup>5</sup> Te na-ní ñayuu núu nducú sáha ndeváha jíin ndindúú testigo un, te quenda ñuhūn yuhu ndindúú de, te cayū ndihí ñayuu cájito uhū i de. Te súcuan cuu táca ñayuu jeē nducú sáha ndeváha jíin de. <sup>6</sup> Te iyó poder ndindúú testigo un jeē cási de jeē ma cúun saū níí tiempo jeē nácani de jnūhun ya. Te suni iyó poder de sáha de jeē nduu nííí táca ndute. Te cuu stívi de ñayívi jíin ndinuū jnūndóho, núu nasaa jínu cácuuni de. <sup>7</sup> Te ná ní jínu ní canacani de jnūhun ya, yūcuán na te quenda quití xéén jeē néne túhnci ún. Te cuajnáhan jíin ndindúú de, te cundeyí jíin de, te cahni de. <sup>8</sup> Te ndíyí ún cava nuū yáhu ñuu cáhnu nuū ní cajehni i máá Jítoho yō jicā cruz. Te ñuu un cácahān yatá i jeē ñuu Sodoma jíin Egipto cúu, siquí jeē xeēn cuéchi iyó ñuu ún. <sup>9</sup> Te ñayuu táca ñuu, táca yúcūn, táca yuhu, táca nación, chí coto i jeē cáva ndindúú ndíyí un úní quiví yosáva, te ma cuáha i jnūhun jeē quindúji. <sup>10</sup> Te ñayuu níí cáhnu ñayíví cusí ndasí ni i jeē ní cajihí de, te sáha i vico, te cuáha i regalo nuū jnáhan i. Chí ndindúú téé ní canacani jnūhun ya ún, ní casáha de jeē ní candoho ndasí ñayuu ñayíví. <sup>11</sup> Te jeé yáha uní quiví yosáva ún, te Yaā Dios sáha ya jeé nastáa tachí de, te ndonda-ní de. Te yūhú ndasí ñayuu coto i jeē ní canatecu de. <sup>12</sup> Yūcuán na te cuni sōho de jeé cána jee ichi ándiví:

Caa ró quijicoo ró ndé yáhá, áchí.

Te ndaa de mēhñu vico quingoo de ándiví, cuni ñayuu cájito uhū i de. <sup>13</sup> Te máá hora un jnáa ndasí, te ndico cáva naa ñn jeé uxí parte ñuu ún. Te jíin ñujnáa ún cuu uxá mil ñayuu. Te táca gá ñayuu jeé ndóo, yūhú ndasí i, te cahān i jeé cujéhnu Yaā Dios jeé ndeé ándiví.

<sup>14</sup> Súcuan yáha jnūndóho uū, te yachí coo jnūndóho uní.

*Siquí trompeta uxá*

<sup>15</sup> Te ndajéhé uxá ní tiví yā trompeta. Te ni jíni sōho ri ní cacahān jee ichi ándiví. Te súcuan ní cacahān:

Táca nación ñayíví je ni nuquihí ndaha máá Jítoho yō Yaā Dios jíin Cristo jeé ní tají yá.

Te ndacu ya jniñu níí cáni cuití.

Achí.

<sup>16</sup> Yūcuán na te ndihóco cuūn téé jéhnu cándiso jniñu jeé cánene de mesa de ichi núú Yaā Dios, ni cajecuiñí yití de, ni cachíñúhún de ya. <sup>17</sup> Te ní cacahān de:

Na cútahū na núu ní, Tátá Yaā Dios, chí máá ní jnāi ndihí poder,

te cúu ní Yaā iyó vijna, te ní Iyo ní níí cáni, te coo ní níí cáni.

Te ni najni ní ndívii jeé iyó, te jíin poder ni ní quejéé ní ndácu ní jniñu nuū.

<sup>18</sup> Ñayuu táca nación ní caquití ní i siquí ní.

Te vijna chí ní quee quiví jeé cuáha ní castigo i,

jíin jeé sándaā ní jniñu táca ndíyí.

Te cuáha ní táhū nuū táca mozo ní jeé ní canacani jnūhun ní,

jíin núu táca ñayuu cájejniñu nuū ní, jíin ñayuu cáchiñúhún núu ní,

cúu ñayuu cácujeñu jíin jeé tuú.

Te vijna te snáhnú ndetū ní ñayuu castívi ñayíví.

Achí de jíinán de.

<sup>19</sup> Yūcuán na te ni nune templo Yaā Dios jeé iyó ándiví. Te ní cajito ñayuu jeé yúcuan íne yejnú jeé ñūhun contrato yā. Te ni ndindéé taja, te níhin, te cáhán taja, te ní jnáa, te ni cuun xeēn nííí.

*Jnūhun ñahan jíin cóo cáhnu*

## 12

<sup>1</sup> Yūcuán na te ini ándiví ní cane ñn jeé nahán náa ní yō jito yó: ñn ñahan jeé ñūhun ña niándii nájnūhun sahna, te íin jehē ña siquí yoo, te ñūhun ñn corona xiní ña jeé ndeé uxí uū quími. <sup>2</sup> Te ñūhun sēhe ña. Te ni ndahyū cohó ña jeé ndóho ña jéhnde chíjii ña jeé scácu ña i. <sup>3</sup> Yūcuán na te ini ándiví ní cane tucu inga jeé náa ní yō jito yó: ñn cóo cuehé cáhnu ndasí. Te iyó úxá xiní tí jíin úxí ndiquí tí. Te ndihúxá xiní tí ñūhun corona. <sup>4</sup> Te jíin súhmā tí ní stáa tí ñn jeé uní parte quími jeé iyó ándiví, te ní síngoo tí ini ñayíví. Te ni íne tí nuū ñahan jeé scácu sēhe ún, ndétu tí cocó tí sēhe ña jeé jé yajni cacu i. <sup>5</sup> Te ní scácu ña ñn sēhe yí, te sūchi un ní jeconaā jeé ndácu níhin i jniñu nuū ndívii nación. Yūcuán na te ní ndoñúhún sēhe yí ña ún, ní ndaa i cuahān i nde nuū íin mesa Yaā Dios nuū ndácu ya jniñu. <sup>6</sup> Te ñahan un ní jinu ña cuahān ña nde nuū ñūhun téhé núu iyó ñn lugar jeé ní sátúhva Yaā Dios. Te yūcuán condee ña níhin ña jeé cáji ña mil uū ciento uní xico quiví.

<sup>7</sup> Yūcuán na te ní cajejnáhan ini ándiví. Chí ndajéhé jéhnu ga jeé naní Miguel jíin táca ndajéhé jeé cácu mozo nuū yā, ní cajejnáhan jíin cóo cáhnu. Te coo un jíin táca ndajéhé máa, ní cajejnáhan jíin yá. <sup>8</sup> Te tu ní cácuñdeyí tí, te tuá ní cúu coyūcu tí ándiví. <sup>9</sup> Súcuan ní cuu jeé ní quenehen ya coo cáhnu un jeé iyó ndé jenahán ndasí. Te nání tí jexeén jíin Satanás, te máá tí cúu jeé stahú ndihí ñayuu ñayíví. Te ní scáne ya tí nde ini ñayíví jíin táca ndajéhé tí.

<sup>10</sup> Yūcuán na te ní jíni sōho ri ñn jnūhun jeé cahán jee ichi ándiví:

Je ni quee quiví jeē jínu njama ya yohó, jín jéē steén ndijín yā jeē jn̄i ya poder, jín jéē ndácu ya jniñu, jín jéē ndíso jniñu máá Cristo jeē ní tají yá. Chi je ni quenehen ya maá jéē cahán cuēchi siquī tācá hermano yó. Chi nduú ñuú ní cahán cuēchi siquī i nuú Yaa Dios maá yó. <sup>11</sup> Te ni cacundeyí i siquī Satanás un, ní sáha jñuhun jeē ní jíhi Yaa cúu Londe, jíin jéē ní cacahán ndaá i jñuhun Yaa Dios, jíin jéē tu ní cundáhú ní i máá i, chí ni jéhe i jñuhun candíje i vésú núu cuu i jeē siquī yá. <sup>12</sup> Núu súcuan te na cúsi ndasí ní tāca róhó jéē cáyúcu andiví. Te nacá xeén ndoho tāca róhó jéē cáyúcu iní ñayiví jíin núu mar. Chí ni cuun jexeén ní jinū nuú rō jíjnánan ró. Te quítí xeén ní, chí jíin jeē tuá coo cuehē gā tiempo jeē stahú ñayuu. Achí.

<sup>13</sup> Te ní jini coó cáhnu ún jéē ní scáne ya maá cuáhán iní ñayiví, te ní jinu tí jíin ñahan ní scácu sēhe yí, jeē xeén sáha tí jíin ña núú. <sup>14</sup> Te ní cajéhe uū ndijén yaha chócó cáhnu nuú ñahan ún, náváha ndava ña quihín ña lugar ña nuú ñuhun téhé, te cácu ña nuú coó ún. Te yúcuán condee ña uní cuiyá yosáva, te nihín ña jeē cáji ña. <sup>15</sup> Te yuhu coó un ní cane ndute nájnūhun ún yúte cáhnu, cuahán yatá ña náváha jneni ña. <sup>16</sup> Te máá ñuhun chí ní chindéé ñahán ñahan ún, chí ní nune-ni, te ní nungoo yúte jeē ní cane yuhu coó ún. <sup>17</sup> Yúcuán na te xeén ní quití ní coó cáhnu ní jito tí ña. Te cuahán tí cuajnáhan tí jíin táca gá sēhe ña, suu ñayuu casquícú jniñu ndácu Yaa Dios te cácandíje váha i jñuhun Jesucristo.

*Jñuhun siquī uū quiti xéén*

**13**

<sup>1</sup> Te ni indichi rí yumár. Te ní jito ri jeé ní cane ñn quiti xéén iní mar. Te iyó úxā xini tí jíin úxā ndiquí tí. Te ndihúxí ndiquí tí ñuhun corona. Te ndihúxā xini tí ndeé ñn síhví néé jéē quiti ní Yaa Dios sáha. <sup>2</sup> Te quiti xéén jeē ní jito ri ún, cáa tí nájnūhun cuiñí, te ndaha tí cáa nájnūhun ndaha oso, te yuhu tí cáa nájnūhun yuhu ndícaha. Te nuú quiti un ní jéhe coó cáhnu poder maá jíin mesa nuú ndácu máá jniñu. Te ní sáha jeē cujéhnu ndasí quiti ún. <sup>3</sup> Te ní jito ri jeé ní tújī ñn xini tí, jeé jé yajni cuu tí nuú. Te ní nduváha tí jeé ní tújī tí. Te nahán ní naa ní ñayuu ní cáhnu ñayiví ní jito i, te ní cajetáhú i nuú tí. <sup>4</sup> Te ní cachiñúhún i coó cáhnu siquī jeē ní sáha tí jeé cujéhnu ndasí quiti xéén un, te suni ní cachiñúhún i quiti xéén un. Te ní cacahán i:

Tú ní ñn jeē cujéhnu nájnūhun quiti yáha, te tú ní ñn cundeyí cuajnáhan jíin tí, áhí i jíjnánan i.

<sup>5</sup> Te tu ní jési ya jeē cahán tí jeē quiti téyí cúu tí, jíin jéē cahán ndeváha tí siquī yá. Te ní nihín jniñu tí jeē ndácu tí jniñu uū xico uū yoó. <sup>6</sup> Te ní quejéé tí ní cahán ndeváha tí siquī Yaa Dios, jíin siquī síhví yá, jíin siquī

nuú ndeé yá, jíin siquī tāca jéē iyó andiví. <sup>7</sup> Te tu ní jési ya jeē cuajnáhan tí jíin ñayuu maá Yaa Dios, te cundeyí tí jíin i. Te suni ní nihín jniñu tí jeē ndácu tí jniñu nuú ñayuu tāca yúcuán, táca ñuu, táca yuhu, táca nación. <sup>8</sup> Te ñayuu ní cáhnu ñayiví jeé tu yósó síhví i nuú tútu, ní cachiñúhún i quiti xéén un. Te Yaa cúu Londe jeē ní cajehni i, máá yá névaha tutu un jéé yósó síhví ñayuu cotecu ní cáni, te je yósó síhví i nde quiví ní jécóo ñayiví.

<sup>9</sup> Ñayuu iyó sóho na chúsohó váha i jñuhun cahán ri yáha. <sup>10</sup> Táca ñayuu jeē sáha jeē quiví njánan vecáa, suni vecáa cone máa i. Te táca ñayuu jeé jéhi njánan jíin espada, suni jíin espada cuu maá i. Núu súcuan te ñayuu maá Yaa Dios chí jíin ñuhún cuandeyí ní i jíin jñundóho te ma jécuiñí i candíje i jñuhun cundáhú ní yá i.

<sup>11</sup> Yúcuán na te ní jito ri inga quiti xéén jeé ní cane chíhi ñuhun. Te iyó uū ndiquí tí jeé cáa nájnūhun ndiquí lánchi. Te nájnūhun tachí coó cáhnu, súcuan tachí cahán tí. <sup>12</sup> Te nájnūhun ndácu quiti xéén xíhna ñuhún jniñu, suni súcuan ndácu quiti uū ún jniñu, ín tí nuú quiti xíhna ñuhún. Te quiti uū sáha tí jeé chíñúhún táca ñayuu ní cáhnu ñayiví nuú quiti xíhna ñuhún, quiti ní tújī jeé jé yajni cuu tí te ní nduváha tí. <sup>13</sup> Te quiti uū suni sáha táca jniñu jéhu jeé nahán náa ní yó jito yó. Chí ní scúun tí ñuhún ichi ándiví ní quijí iní ñayiví, ní cajito ñayuu. <sup>14</sup> Te ní stahú tí ñayuu ñayiví jíin táca jniñu jéhu jeé ní nihín tí poder jeé sáha tí, jito jínúú quiti xíhna ñuhún. Te ní ndacu tí jniñu jeé na sáha ñayuu imagen quiti xíhna ñuhún, quiti ní tújī jíin espada, jeé jé yajni cuu tí te ní nduváha tí. <sup>15</sup> Te quiti uū ní nihín tí poder jeé chutáchí tí xijni imagen quiti xíhna ñuhún, náváha cuu cahán, te cahni táca ñayuu jeé tu cajetáhú i chíñúhún i máá. <sup>16</sup> Te táca ñayuu cujéhnu jíin ñayuu tu cújéhnu, táca ñayuu cucá jíin ñayuu ndahú, táca ñayuu sáajniñu cuenta maá jíin mozo jeé ní cajeen ñayuu, ní sáha tí jeé ní jécondee ñn jñuni ndaváha i chí jnéé i. <sup>17</sup> Te ní ñn ñayuu ma cúu cuan i xicó i te núu tu ndíso i jñuni jeé cúu síhví tí chí jñuni número jeé cúu síhví tí. <sup>18</sup> Jñuhun ndíchí cúu jeé cahán rí yáha: Táca ñayuu jécúhun váha ní cuu tava i cuenta número quiti xéén un, chí número un cúu síhví ñn té. Te número un cúu inū ciento uní xico inū.

*Yaa jeé cájita 144,000 ñayuu*

**14**

<sup>1</sup> Yúcuán na te ní ndacoto ri, te ní jito ri jeé ñn máá Yaa cúu Londe xini yucu Sión. Te cáhñin ciento uū xico cuñ mil ñayuu jíin yá. Te jneé i ndeé síhví máá yá jíin síhví Tátá yá Yaa Dios. <sup>2</sup> Te ní jini sóho ri jeé ñhín ndasí ichi ándiví, nájnūhun jeé jica cuehē yúte chí

jeē cahān nīhin taja. Te jeē nīhin un sāha nájñuhun jeē cátee cuehē ñayuu yaa jeē nani arpa. <sup>3</sup> Te cáhīn i ichi núu mesa nuū ndácu Yaā Dios jñiñu, jín nuū ndicúun jeē técu, jín nuū ndihóco cuñ tēe jéhu cándiso jñiñu. Te ni cajita i ñn yaa jeē. Te ni ñn ñayuu tu cúu cutūhva i yaa ún, chi máni máa ciento uū xico cuñ mil ñayuu jeē ní jnama ya i ini ñayívi. <sup>4</sup> Te táca tēe yáha cácuu jeē tu ní casáha cuéchi jín ñahan casáha néé, chi tēe ndoo ánuá cácuu de. Te cándiquín de Londe ndé-ni cúu-ni nuū cuahān yā. Chi ni jnama ya de ini ñayívi, te máa de cácuu tēe jeē xihna gā ni cacandije nuū Yaā Dios jín nuū Yaā cúu Londe. <sup>5</sup> Te tú cuiti na jñuhun stáhú cácahān de, chi tēe ndoo ánuá cácuu de, cáhīn de nuū mesa Yaā Dios.

*Jñuhun jeē ní cacahān ndinúni ndajéhé yā*  
<sup>6</sup> Yūcuán na te ni jito ri inga ndajéhé yā jeē ndáva cuahān sava andiví. Te ndiso ya jñuhun jeē jnama Yaā Dios ñayuu cotecu i ní cáni. Te ni nacani ya jñuhun un núu táca ñayuu ní cáhu ñayívi, nuū ñayuu táca naciún, táca yúcun, táca yuhu, táca ñuu. <sup>7</sup> Te ni cahān jee ya:

Conso iyo ró nuū Yaā Dios, te na cáhān ró jeē yóhoyo cújéhu ya, chi je ni quee quiví jeē sándaā yā siquí ró ndese ni casáha ró. Te na chíñúhún ró yā, chi máa yā ní sáha andiví jín ñayívi jín mar jín táca núu cáne ndute, áchi ndajéhé yā.

<sup>8</sup> Yūcuán na te ndíquín inga ndajéhé yā vēji, te ni cahān yā:

Je ni naa í ñuu teyí Babilonia. Chi ni sāha jeē ñayuu táca naciún casíquín ndéé i Yaā Dios jeē ní castóo i ya te cándiquín i ídolo jín táca jñiñu néé, áchi ndajéhé uū.

<sup>9</sup> Yūcuán na te ndíquín inga ndajéhé uní vēji, te ni cahān jee ya:

Xeēn coo siquí ñayuu cáchiñúhún quiti xéén jín imagen tí, te jéhe i jñuhun condee jnuní tí jneé i chí ndaha i. <sup>10</sup> Chi nihīn i castigo xeēn siquí cuéchi ní casáha i, chi quiti ní Yaā Dios nuū i, te tuá cone cáhu ní yā. Te ndoho i nuū cayú ñuhún jín azufre, coto táca ndajéhé Yaā Dios jín Yaā cúu Londe. <sup>11</sup> Te ñuhmā nuū cándoho i cánda ní cáni cuiti. Te nduú ñuu tu ndétátú ñayuu cándoho ún jeē ní cachíñúhún quiti xéén jín imagen tí, jín jéé ní jécondee jnuní síhví tí. <sup>12</sup> Jeé yúcuan ñayuu maá Yaā Dios jeé casquicu i jñiñu ndácu ya te cácaandije vāha i Jesús, cánuú jéé cuándeýí ní i. Achi ndajéhé uní.

<sup>13</sup> Yūcuán na te ni jini sōho ri ñn jñuhun ichi ándiví jéé ní cahān jín ri:

Teé ró jñuhun jeē cahān rí jín ró yāhá: Nacā jeé ndetú táca ñayuu cácaandije jitoho yō jeé cájihí vijná jín ndé ní cuahān yō. Jendaá chí ndetátú i jeé ní casáha i jñiñu vāha, te jñiñu i un má náa chí sáha jeé quendōo vāha i ní cáni, áchi Espiritu.

*Jeē ní nastútú yá ñayuu ñayívi*

<sup>14</sup> Yūcuán na te ni ndacoto ri, te ni jito ri ñn vicó cuijín. Te nuū vicó un néne Yaā ní nduu tēe. Te xini yā ñuhun corona oro, te ndáhá yā ñn hoz xeēn. <sup>15</sup> Te ni quenda inga ndajéhé yā ini templo, te ni cana jee, te cáhān jín Yaā néne nuū vicó un:

Cahnde ní jín hoz ní, te nastútú ní ñayuu ñayívi. Chi je ni quee quiví jeé nastútú ní i nájñuhun táhndé trigo jeé jé ní cuaan, áchi.

<sup>16</sup> Yūcuán na te Yaā néne nuū vicó ní nastútú yá ñayuu váha ini ñayívi, nájñuhun táhndé trigo jín hoz.

<sup>17</sup> Yūcuán na te ni quenda inga ndajéhé yā ini templo jeé iyó andiví, te suni ndáhá yā ñn hoz xeēn. <sup>18</sup> Te nde nuū altar ní quenda tucu inga ndajéhé, te ndiso jñiñu ya siquí ñuhún altar. Te ni cana jee ya, te cáhān yā jín ndajéhé jeé ndahá hoz xeēn:

Cahnde ró jín hoz xeēn ró, te nastútú ró ñayuu casáha néé ini ñayívi, nájñuhun jeé cájehnde i chutū ndehē uva jeé jé ní jichi, áchi.

<sup>19</sup> Te ndajéhé un ní jehnde yā jín hoz yā, te ni nastútú yá ñayuu casáha néé ini ñayívi, nájñuhun ndútútú ndéhé uva. Te ni jnaa ya i nuū nihīn i castigo xeēn Yaā Dios, nájñuhun jnáa i ndehē uva nuū taxín. <sup>20</sup> Te ní jéhe ya castigo i yatā ñúu, te ni jica níñi i nájñuhun ndúxi uva. Te ni ndaa ní jinū cūhva jeé sucún yuhu caballo, te ni jica cuahān nde uní ciento kilómetro.

*Ndihúxá ndajéhé jín ndihúxá jñúndóho jee sándihí*

**15**

<sup>1</sup> Te ni jito ri inga jñiñu jéhu ichi ándiví jeé náa ní yō jito yó. Chi cáhīn uxā ndajéhé yā jeé cuāha ndihúxá jñúndóho sándihí na. Te jeé jínu ndihúxá jñúndóho yáha, te jinu jeé cuāha Yaā Dios castigo xeēn siquí cuéchi.

<sup>2</sup> Te suni ní jito ri ñn jeé cáa nájñuhun mar, te cáa nájñuhun vidrio jeé ndíndee nájñuhun ñuhún. Te yumar un cáhīn ñayuu ní cacundeyí siquí quiti xéén jín imagen tí, jín jéé tu ní cáquihin i jnuní número jeé cúu síhví tí. Te cándāhá i yaa jeé nani arpa jeé ní jéhe Yaā Dios nuú i. <sup>3</sup> Te cájita i yaa jeé ní tava Moisés, tēe cúu mozo Yaā Dios, jín yaa maá Yaā cúu Londe. Te súcuán cáhān yaa ún:

Yóhoyo náa ní na cájito ná ndihí jñiñu jéhu teyí jéé sáha ní,

Tátá Yaā Dios, chí jñá ní ndihí poder:

Te máni jñiñu ndaā jñiñu váha sáha ní,

jeé cúu ní Rey nuū táca naciún.

<sup>4</sup> Tú ní ñn i iyó jéé ma cónso iyo i nuū ní, Tátá Yaā Dios.

Te ndihí i cahān nahín i jeé yóhoyo cújéhu ní. Chi máñúhún ní máa ní cúu Yaā ndoo Yaā í. Te quijicoo ñayuu táca naciún, chíñúhún i nihín,

chi je ni cajini i jeē ndaā vāha sāha ní táca jniñu.

Achí i cájita i.

<sup>5</sup> Yūcuán na te ni ndacoto ri, te ni jito ri jeē ini andiví nūne cuarto i i ni templo nuū íne tabla yūi jeē yosó ley yā. <sup>6</sup> Te ini templo un ní quendacoo ndihúxá ndajéhé jeē cándiso jniñu siquī ndihúxá jñūndóho. Te cáñuhun ya sahna fino iyó ndoo te xíñú. Te núhni cinturón oro jicā yā. <sup>7</sup> Te iin jnāhan ndicúún jeē técu ni jéhe iin iin cohō oro nuū ndihúxá ndajéhé un. Te ini cohō un ñūhun chitú castigo xeēn jeē ni jéhe Yaa Dios, Yaa técu ní cāni. <sup>8</sup> Te ni chitú ndā ñūhmā ini templo, te suu ni steén jeē yóhoyo cújéhu Yaa Dios jíin poder jnā ya. Te ni iin tu ní cúu quiví ini templo, chí nde na ndíhi ndihúxá jñūndóho jeē cuáha ndihúxá ndajéhé yā.

*Siquī ndihúxá cohō jeē ñūhun castigo*

## 16

<sup>1</sup> Yūcuán na te ini templo ni jini sōho ri iin jñūhun cáhān jee jíin ndihúxá ndajéhé yā:

Cuango te cati ró siquī ñayiví ndihúxá cohō jeē ñūhun castigo xeēn jeē ni jéhe Yaa Dios, achí.

<sup>2</sup> Te cuahān ndajéhé iin, te ni jeti ya cohō yā siquī ñayiví. Te táca ñayuu jeē ndeé jñuní quiti xéén un jíin jéé cáchiñūhún imagen tí, ni canecoo ndíhyi xeēn jeē jetú ndasí.

<sup>3</sup> Te ndajéhé uū ni jeti ya cohō yā nuū mar, te ndute mar ni nduu nájñūhun níñi ndiví. Te ni cajihí táca quiti jeē ñūhun ini mar.

<sup>4</sup> Te ndajéhé uní ni jeti ya cohō yā ini táca yúte jíin táca nuū cáne ndute, te ni nduu níñi.

<sup>5</sup> Te ni jini ri jeē cahān ndajéhé jeē ndíso jniñu siquī ndúte:

Tátā Yaa Dios, maá ní cúu Yaa ndoo Yaa íi, Yaa iyó vjina, te ni íyo ní ní cāni. Te ndaa sāha ní jeē súcuan ní ndonda ní siquī cuéchi i. <sup>6</sup> Chí ni casáha i jeē ní jeti níñi ñayuu ndoo ní jíin ñayuu ní canacani jñūhun ní. Te vjina chí ni sāha ní jéé cájihí i níñi, chí ñayuu casáha jniñu néé cácuu i, jeē cánuu ndoho i súcuan.

<sup>7</sup> Te ni jini sōho ri jeē cahān inga nde nuū altar:

Tátā Yaa Dios, maá ní cúu jeē jnāi ndíhi poder. Te jniñu váha jniñu ndaa ní sāha ní jéé ní ndonda ní siquī cuéchi i. Achí.

<sup>8</sup> Te ndajéhé cuūn ni jeti ya cohō yā siquī níandí, te ni jéhe Yaa Dios jñūhun jeē ndujíhni ndasí níandíi návāha cayú ñayuu. <sup>9</sup> Te xeēn ndasí ní cayú táca ñayuu. Te vésú súcuan te tu ní cánacani ni i stóo i cuéchi i, ni tu ní cacahān i jeē cújéhu Yaa Dios. Chí sa suhva ni cacahān ndevāha i siquī yā jeē ni jéhe ya táca castigo yāha nuū i.

<sup>10</sup> Te ndajéhé uhūn ni jeti ya cohō yā nuū mesa nuū ndácu quiti xéén jniñu. Te ni cunee ní cáhnu nuū ndácu tí jniñu. Te cáncayihí ñayuu yuhu i jeē cájetú ndasí i.

<sup>11</sup> Te vésú súcuan te tu ní cánacani ni i stóo i jniñu néé casáha i. Chí sa ni cacahān ndevāha i siquī Yaa Dios andiví siquī jeē cájetú ndasí i jíin ndíhyi xeēn cándoho i.

<sup>12</sup> Te ndajéhé iñu ni jeti ya cohō yā siquī yúte cáhnu jeē naní Eufrates. Te ni ichi ndíhi ndute yúte ún, návāha nune iin ichi jee quíjicoo táca rey ichi nuū cáne níandíi.

<sup>13</sup> Te ni jito ri jeē ini yuhu coō cáhnu jíin ini yuhu quiti xéén jíin ini yuhu máá téé nácani jñūhun stáhú ní canecoo uní tachí jeē cáa nájñūhun sáhvá. <sup>14</sup> Te tachí ún chí ndajéhé jexeén cácuu, te casáha jniñu jéhu jeē náa ní ñayuu cájito i. Te ni quendacoo tachí un jéé nastútú táca rey ní cáhnu ñayiví, jéé cuajnáhan de siquī Yaa Dios quiví jeē ndíji ya. Te máá yā cúu jeē jnāi ndíhi poder. <sup>15</sup> Cuni sōho jíin náhan ró, chí sanaa ní rō te ndíji ri, nájñūhun jeē iin sanaa ní te quíji ñacuñhá. Te nacā jeē ndetú ñayuu jeē ndito ni i, te ndíto yúcun i sahna i, návāha ma cáca vichí lí i, cúu jeē tú na cuéchi coo siquī i jeē cucanu i nuū táca ñayuu, achí yā. <sup>16</sup> Te ni canastútú tachí un táca rey, ni candutútú iin lugar jeē yuhu hebreo naní Armagedón.

<sup>17</sup> Te ndajéhé uxā ni jeti ya cohō yā nuū tachí. Te ini templo andiví jíin nuū mesa nuū ndácu ya jniñu, ni cane iin jñūhun jeē ni cáhān jee:

Je ni jñu, achí.

<sup>18</sup> Yūcuán na te ni ndindéé taja, te níñin, te cáhān taja, te ní jnāa ndasí. Chí nde ní cāni jeē iyó ñayuu ñayiví, tu ní jnāa níñin ndasí nájñūhun jeē ní jnāa ní jito ri. <sup>19</sup> Te máá ñuu cújéhu Jerusalén, ni cusān ni nduu uní parte, te ní cáhnu ñayiví ní naa táca ñuu. Te ñuu teyí Babilonia, chí ni sāha nahín yā jeē ní ndutahū i castigo xeēn, chí ni quiti ndasí ní yā siquī cuéchi i. <sup>20</sup> Te ní naa táca isla, te suni yucu tuá gā. <sup>21</sup> Te ichi andiví ní cuun níñi náhnu siquī ñayuu, jeē véyi nde uū xico kilo. Te ni cacahān ndevāha ñayuu siquī Yaa Dios jeē ní cuun ndasí níñi, chí iin jñūndóho xeēn ni cuu.

*Jeē ndonda ya siquī ñuu neé Babilonia*

## 17

<sup>1</sup> Yūcuán na te ni quíji iin jnáhan ndihúxá ndajéhé jeē ní candāhá ndihúxá cohō ún, te ní cahān yā jíin rí:

Nehen, te na steén rí nuū rō ndese coo castigo siquī maá ñahan jnéni jeē cúu ñuu cújéhu íne nuū iyó cuéhé ndute. <sup>2</sup> Chí táca rey ñayiví nájñūhun ni casíquí ndeé de jíin ñahan ún, cúu jeē ní castóo de Yaa Dios te cándiquín de jñūhun néé ní steén ña. Te ní sāha ña jeē ñayuu ní cáhnu ñayiví, nájñūhun nájini i te casíquí ndeé i Yaa Dios cúu jeē ní castóo i ya te casáha ndasí i cuéchi. Achí ndajéhé yā.

<sup>3</sup> Te ni sáha ga Espíritu Santo jeē ní jito ndijin rí, te ndajéhé yā un cuáhān yā jín rí nde nuū ñuhun téhé. Te ni jito rí ñn ñahan, yósó ña ñn quití xéén cacuéhé. Te ní cáhnu tí ndeé jñuhun néé jéé quití ní Yaā Dios sáha. Te iyó úxā xini tí jín úxī ndiqui tí. <sup>4</sup> Te ñahan un ñuhun ña sahma ndihí jín sahma cuehé, te suni ñuhun ña siquí oro jín yū luu jín perla jeē ndeé yahu. Te ndahá ña ñn cohō oro jeē ñuhun chitū jín jñuñu néé ndasí jín jñuñu jnehén jéé jica jnéni ña. <sup>5</sup> Te jneē ña ndeé ñn shívi jéé cúu ñn jñuhun sáhi, te suhva cáhān: Yāha cúu ñuu teyí Babilonia, jeē cúu nájñuhun náná táca jéé cájica jnéni jín jé casáha néé ndasí ini ñayívi, áchí. <sup>6</sup> Yūcuán na te ni jini rí jeē ñahan un nájini ña jeē nájñuhun ni jihí ña niñí ñayuu maá Yaā Dios jín níñi ñayuu ni cajihí siquí jeē ní canacani ndaā i jñuhun Jesús. Te nahán ní naa ni rí ni jito rí ña. <sup>7</sup> Yūcuán na te ni cahān ndajéhé un jín rí:

¿Naun náa ni rō jito ró? Na cástūhun rí nuū rō ndese cúni cahān jñuhun sáhi siquí ñahan un jín quití xéén yósó ña, jeē iyó úxā xini tí jín úxī ndiqui tí. <sup>8</sup> Quití xéén jeē ní jito ró, chí ní cotecu tí, te vijna chí tuá tí. Te ndenda tucu ti ini túhñchi cúnú, te yūcuán na te quihñ tí nuū jñahnú ndetū tí. Te ñayuu cáyūcu ní cáhnu ñayívi, naa ni i coto i nuū quití un jéé ní cotecu tí te ni jihí tí, te natecu tucu ti. Te cácuu i ñayuu jeē tu yósó shívi i nuū tútu jeé yósó shívi ñayuu cotecu ní cáni jeē ní jécósó shívi i nde quívi ní jécóo ñayívi.

<sup>9</sup> Táca ñayuu jécūhun vāha ní, cuu tava i cuenta ndese cúu: Ndihúxá xini tí cácuu nájñuhun uxā yucu nuū néne ñahan ún. <sup>10</sup> Te ndihúxá xini tí suni cácuu nájñuhun uxā rey. Te uhñun rey un je ni naa jeé ndácu de jñiñu, te ñn de ndácu jñiñu vijna, te inga de chí ná tu quiji de. Te núu na quiji de te jecu-ni tiempo coo de. <sup>11</sup> Te quití xéén jeē ní cotecu te tuá iyó tí vijna, maá tí cuu rey unā. Te ñn jñahan ndihúxá rey un cúu tí. Te suni quihñ tí nuū jñahnú ndetū tí.

<sup>12</sup> Te ndihúxí ndiqui jeē ní jito ró cúu nájñuhun uxí rey, te ná tu ndacu de jñiñu jijnáhan de. Te maá de jín quití xéén un, chí nihñ jñiñu de cuu de rey jecu-ni tiempo. <sup>13</sup> Te ndihúxí rey un chí squijnáhan de jñuhun, te nacuaña de poder de jín jñiñu ndiso de nuū quití xéén un návāha ndacu tí jñiñu. <sup>14</sup> Te cuajnáhan de jín Yaā cúu Londe. Te Yaā cúu Londe quende yā poder de jijnáhan de. Chí maá yā cúu Jitoho nuū táca jítoto, te maá yā cúu Rey nuū táca rey. Te ñayuu cáhñiñ jín yā, chí ni nacāji Yaā Dios i te ni cana ya i, te cáscuicu vāha i. Achí ndajéhé un.

<sup>15</sup> Te ni cahān gā yā:

Cuehé ndute jeē ní jito ró nuū néne ñahan jica jnéni, suu cúu ñayuu cuehé táca ñuu, táca yuhu, táca nación. <sup>16</sup> Te ndihúxí ndiqui jeé

ní jito ró jéé névāha quití xéén un, suu cácuu rey jeé coto uhú de ñahan jica jnéni un. Te sáha de jeē quendōo ndáhú ña te quendōo vichí lí ña. Te caji de cuñu ña te cahmu de ña nuū ñuhún. <sup>17</sup> Chí Yaā Dios scānda ya ini de jeē na sáha de jñiñu cúni yā. Te squijnáhan de jñuhun jeē nacuaña de jñiñu ndiso de nuū quití xéén un, ndacu tí jñiñu nde na squícu táca jñuhun ni cahān Yaā Dios. <sup>18</sup> Te ñahan jeē ní jito ró cúu maá ñuu teyí jéé cujéhu nuū táca rey ñayívi. Achí ndajéhé un.

*Siquí jeē naa ñuu Babilonia*

## 18

<sup>1</sup> Yūcuán na te ni jito rí jeē ní cuun inga ndajéhé yā ni quiji ichi ándivi. Te cújéhu ndasí yā. Te jeé ndindéé yā te ni ndindéé nuū ñayívi. <sup>2</sup> Te ni cana jee ya:

Je ni naa ñi ñuu teyí Babilonia. Te ni nduu vehe táca táchi, nuū ñuhun ndinuū tachí neé, jín táca téji, quití quíni jeé tu núnahan ni yó. <sup>3</sup> Chí ñuu un cúu nájñuhun ñn ñahan ndevāha, te ni sáha ña jeé ñayuu táca nación, nájñuhun nájini i te casíquí ndeé i Yaā Dios, cúu jeé ní castóo i ya te casáha ndasí i cuéchi. Te táca rey ñayívi, nájñuhun ni casíquí ndeé de jín ñahan ún jeé ní cajetáhú de jñuhun néé ní steén ña. Te ñayuu ní ñayívi jéé cájeen cáxícó, ní cacucúca i jín cuehé jeneé jeé ní nevāha ña.

<sup>4</sup> Yūcuán na te ni jini sóho rí inga jñuhun jeé ni cahān ichi ándivi:

Maá rō jeé cácuu rō ñayuu maá rí, quendaco rō ini ñuu jijnā, návāha ma quívi nduu rō jín táca cuéchi jeé sáha ña, te návāha ma ndóho rō jñundóho xeén jeé ndoho ña. <sup>5</sup> Chí ni cayā cuehé ndasí cuéchi ña, nájñuhun ñn montón cáhnu ndasí jéé ní cusúcún ndé ándivi. Te vijna te nduxeén Yaā Dios siquí cuéchi ña. <sup>6</sup> Stóho rō ña nájñuhun ni sáha ña jeé ní ndoho sava ga ñayuu. Te nachunaa rō nuū ña doble jñundóho jeé ní jéhe ña nuū inga ñayuu. Te sáha rō jeé nandicó coo doble siquí ña vésú jeé ní sáha ña siquí inga ñayuu. <sup>7</sup> Te yóho ni satéyí ña maá ña, te cúca ndasí ní cotecu ña. Te suni jín cúhva yúcuan nacuaña rō jéé ndóho xeén ndasí ña. Chí jéni ní ña: Yāha néne rí ndácu rí jñiñu, te tu cúu rí ñahan viuda, te ma quiji cuiti jñundóho ndoho rí, achí ña. <sup>8</sup> Jeé yúcuan cúu jeé ñn quívi-ni te quiji cuehé jñundóho siquí ña. Chí cuu ndíyi, te cucuíhá ndasí ní ña, te coo jnamā, te cayú ña nuū ñuhún. Chí yóho iyó poder maá Jitoho yó Yaā Dios, Yaā ní ndonda siquí cuéchi ña, áchí.

<sup>9</sup> Te táca rey ñayívi jéé ní casíquí ndeé de jín ña te ni cotecu cucá ndasí de jín ña, ndahyū de te ndahyū cohó de coto de jeé cánda ñuhmā cayú ña. <sup>10</sup> Te cuñi jicá de chí yuhú de coto de jeé súcuun ndoho ña castigo. Te cahān de jijnáhan de:



Nacā jeē xeēn ndóho ró, ñuu cujéhu Ba-bilonia, chí yá-ni ñuu teyí ní cuu ró núú. Te vijna chí ñn núnúu-ni te ni quee castigo jeē nāā rō, achi de jijnáhan de.

<sup>11</sup> Te tāca tēe ñayiví jēē cájeen cáxicō ñuu ún, ndahyū de te ndahyū cohó de jehē. Chí tuá ndé ñn cuaan ndajniñu cáxicō de. <sup>12</sup> Te ndajniñu cáxicō de un cúu oro, plata, yuū luu jíin perla jeē ndeé yahu, jíin sahma fino jíin sahma seda jeē ndihí jíin jēē cuehé. Te suni tāca yujnu jeē asīn jéen xicō, jíin tāca ndajniñu luu jeē ní sáha jíin marfil jíin yujnu lúu jeē ndeé yahu jíin cáa cuañ jíin cáa hierro jíin yúu cuijín luu. <sup>13</sup> Te suni cáxicō de canela jíin tāca jíhyo asīn jíin súje cutú jíin súje uvuā jíin tāca perfume jíin vino jíin aceite jíin harina fina jíin trigo. Te suni cáxicō de quiti ndiso jíin lanchi jíin caballo jíin carreta, te nde ñayuu cáxicō de jeē sájniñu sáá-ni i. <sup>14</sup> Te cahān de jíin ñuu ún:

Ni cujiyo ndihí ndajniñu cúca jeē ní nujnahan ndasí ní rō. Te tāca jēē lúu jeē váha jeē ní cotecu cucá ró, chí ni naa ndihí, te ma nánihin cuiti gā rō, achi de jijnáhan de.

<sup>15</sup> Te tāca tēe ní cajeen ní cacixō ní cacucúca jēē siquī ndajniñu ñuu ún, chí cuiñí jícá de jeē yúhú de coto de castigo coo ñuu ún. Te ndahyū de te ndahyū cohó de. <sup>16</sup> Te cahān de jijnáhan de:

Nacā jeē xeēn ndóho ñuu teyí yáha. Chí ni cuu nájnūhun ñn ñahan jeē ní ñūhun sahma fino, sahma ndihí jíin jēē cuehé. Te ni ñūhun ña siquī oro jíin yúu luu jíin perla jeē ndeé yahu. <sup>17</sup> Te vijna te ñn núnúu-ni te ni naa ndihí tāca ndajniñu váha ún, achi de jijnáhan de.

Te cuiñí jícá tāca tēe cáscaca barco, jíin ñayuu cuángoo nuū barco, jíin tēe cásajniñu ini barco, jíin tāca gá tēe cásajniñu nuū mar. <sup>18</sup> Chí coto de ñuhmā jeē cayú ñuu ún, te cana jeē de jijnáhan de:

¿Ndeé ine ga ñuu teyí jēē cujéhu nájnūhun ni iyo ñuu yáha? achi de.

<sup>19</sup> Te cosō de ticachā ñūhun xiní de jeē cácuicuhyá ní de. Te ndahyū de te ndahyū cohó de. Te cana jee de jijnáhan de:

Nacā jeē xeēn ndóho ñuu teyí yáha. Chí jíin ndajniñu cúca jeē ní iyo ñuu un ní cacucúca tāca ñayuu cánevāha barco cájica nuū mar. Te vijna te ñn núnúu-ni te ni naa ndihí-ni, achi de.

<sup>20</sup> Te na cúsiñ ní tāca róhó jēē cáyucú andiví, siquī jeē ní naa ñuu ún. Te na cúsiñ ní rohó, tāca tēe apóstol, jíin tēe cáncani jnūhun Yaā Dios, jíin ñayuu maá Yaā Dios. Chí ní sáha néé ñuu un siquī rō jijnáhan ró, te jeē yúcuan ní ndonda Yaā Dios siquī, achi de.

<sup>21</sup> Yúcuan na te ñn ndajéhé ndiso poder, ni quihñ ya ñn yuū cáhnu nájnūhun ñn yōso cáhnu, te ní scāne ya ini mar. Te ní cahān yā:

Nájnūhun ní naa yōso yáha, suni súcuan naa Babilonia, ñuu cujéhu teyí. Te ma núcoo

cuiti gā jeē cóto yó núú. <sup>22</sup> Te ní cahān yā jíin ñuu ún: Ini calle rō ma cúni sōho cuiti gā ñayuu jeē scáta i yaa arpa jíin flauta jíin trompeta. Te suni ma cóo cuiti gā ñayuu casáha tāca ndajniñu. Te suni ma cúni sōho ga i jeē ñihñ táca molino rō. <sup>23</sup> Te ní ñn lámpara ma sáha ga jeē cúndijin nuū rō. Te ní ma cúni sōho ga i vico jeē cácusñ ní ñahan tēe nándāha mēhñu ró. Te ñayuu ní cajeen ní cacixō nuū rō, ní cacujéhu ndasí i ini ñayiví. Te ní stahú ró ñayuu tāca nación jíin jniñu tasi jíin jniñu mágica. Achí ndajéhé un.

<sup>24</sup> Te ñuu un ní nihñ castigo xeēn, chí siquī ñuu un ndeé cuéchi jeē ní jeti niñí tāca tēe ní canacani jnūhun Yaā Dios, jíin tāca ñayuu maá yá, jíin tāca gá ñayuu ní cajehni i níí cáhnu ñayiví.

## 19

<sup>1</sup> Te ná ni cuu tāca jēē yáha, te ní jini sōho ri jeē cahān jee cuehé ndasí ñayuu ini andiví: Yōhyo cújéhu Yaā Dios. Chí Yaā Dios maá yó cúu jeē ní jnama yóhó.

Te maá yá cujéhu ndasí, te maá yá jññ ndihí poder.

<sup>2</sup> Te ndaā te váha sándaā yā tāca jniñu, chí ní ndonda ya siquī cuéchi ñuu néé cújéhu ún.

Chí ní stíví un ñayuu níí cáhnu ñayiví jíin jnūhun cásiquí ndeé Yaā Dios.

Te ní sáha ya jeē ní ndutahú ñuu un siquī jeē ní jehni tāca mozo yā.

Achí i jijnáhan i.

<sup>3</sup> Te ní cacahān tucu i:

Yōhyo cújéhu ya. Chí níí cáni canda ñuhmā ñuu un jēē cayú, achí.

<sup>4</sup> Te ndihócó cuñ tēe jéhu cándiso jniñu, jíin ndicúñ jeē técu, ní cajecuiñí yití de, te ní cachiñúhún de Yaā Dios, Yaā néne nuū mesa ndácu jniñu. Te ní cacahān:

Amén. Súcuan na cóo. Yōhyo cújéhu ya.

<sup>5</sup> Te nde nuū mesa nuū ndácu ya jniñu ní cahān ñn jnūhun:

Róhó jēē cájeñiñu nuū Yaā Dios,

jíin róhó jēē cándiso iyo nuū yá,

jeē cácujeñu jíin jēē tu cácujeñu,

na cáhán rō jeē yóhyo váha Yaā cúu ya.

Achí.

*Vico jeē nándāha Yaā cúu Londe*

<sup>6</sup> Te ní jini sōho ri jeē cacahān ñayuu cuehé ndasí, te ñihñ nájnūhun ñihñ cuehé yūte, te nájnūhun jeē cahān ñihñ taja. Te ní cacahān: Yōhyo cújéhu ya. Chí Jitoho yō Yaā Dios, Yaā jññ ndihí poder,

vijna te ndácu ñihñ ya jniñu.

<sup>7</sup> Te na cúsiñ ní yō, te siñ ndasí na cóo ní yō,

te na cáhán yō jeē yóhyo cújéhu ya.

Chí ní quee quiví jeē nándāha maá Yaā cúu Londe.

Te je iyó túhva ñahan nándāha jíin yá, te suu cúu ñayuu maá Yaā Dios.

<sup>8</sup> Te ni nihĩn ña jñũhun cuhun ña sahma fino jeẽ ndoo ndasi te xĩũ.

Achĩ i jĩjnáhan i. Te sahma fino un cúu táca jñĩũ ndaã jeẽ casáha ñayuu maã Yaã Dios.

<sup>9</sup> Te ni cahãn ndajéhé yã jíin rĩ:

Teẽ ró jñũhun yáha: Nacã jeẽ ndetũ táca ñáyuu jeẽ ní cana ya quingoo vico nãndáha Yaã cúu Londe.

Te ni cahãn gã ndajéhé un jíin rĩ:

Tãca jñũhun yáha cúu jñũhun ndaã ni cahãn Yaã Dios, achĩ yã.

<sup>10</sup> Te ni jecuíñĩ yĩtĩ rĩ nuũ jehé ndajéhé un jeẽ chĩũhũn rĩ yã nuũ. Te ni cahãn yã jíin rĩ:

Ma sáha ró súcuan. Chi ruhũ suni mozo Yaã Dios cúu rĩ, nájñũhun maã ró jíin táca hermano rō jeẽ cácanđje váha jñũhun Jesús. Sa suhva nuũ maã Yaã Dios chĩũhũn ró. Achĩ yã.

Chĩ jñũhun siquĩ Jesús cúu jeẽ cácahãn ndaã ñayuu cácanani jñũhun Yaã Dios.

#### *Yaã yosó siquĩ caballo cuijĩn*

<sup>11</sup> Yũcuán na te ni jito ri jeẽ núne andiví. Te ni cane ñin caballo cuijĩn, te Yaã yosó siquĩ tĩ nanĩ yã Yaã ndaã, Yaã squicu, chi squicu ya jeẽ ní jéjñũhun ya. Te ndaã sãndaã yã jñĩũ te ndaã ndónđa ya siquĩ táca jéneé. <sup>12</sup> Te tinũu yã ndĩndēe nájñũhun yãñũhũn. Te xinĩ yã ñũhun cuehē corona. Te yosó ñin síhvĩ yã jeẽ maã-ni ya cúu jeẽ jíin. <sup>13</sup> Te ñũhun ya ñin sahma jeẽ ní ñũndaji nuũ ñĩñ, te nání yã Jñũhun Yaã Dios. <sup>14</sup> Te táca ndajéhé yã jeẽ iyó andiví, cáyosó caballo cuijĩn, cándiquĩn yatã yã. Te cáñũhun sahma fino cuijĩn iyó ndoo. <sup>15</sup> Te ñin yuhu maã Yaã jeẽ yosó siquĩ caballo, quenda jeẽ cáca nájñũhun ñin espada xeẽn. Te espada un cúu jñũhun ya jeẽ stóho ya ñayuu táca naciõn. Te ñihin ndacu ya jñĩũ nuũ i. Te sãndaã yã siquĩ cuéchi i nájñũhun jeẽ jeñũ siquĩ ndehē uva cájexĩn. Te cuáha ya castigo xeẽn ndoho i jeẽ quiti ní yã siquĩ cuéchi i. Chi maã yã jnã ndihĩ poder. <sup>16</sup> Te sahma ya jíin síhin ya yosó jñũhun yáha: Rey nuũ táca rey jíin Jitoho nuũ táca jitoho, achĩ.

<sup>17</sup> Yũcuán na te ni jito ri ñin ndajéhé yã jeẽ ñin nuũ ñãndii. Te ni cana jee ya xinĩ táca quiti ndáva nuũ tachĩ:

Ndututũ ró quijicoo ró cuxĩnĩ ró ñin vico cáhnu sáha Yaã Dios. <sup>18</sup> Te caji rō cũñũ táca rey jíin capitán jíin tēe tēyĩ, jíin cũñũ táca caballo jíin tēe ni cayosó siquĩ tĩ. Te suni caji rō cũñũ táca gã ñayuu, cúu ñayuu casãjñũ cuenta maã jíin mozo jeẽ ní cajeen ñayuu, cúu ñayuu cácujeñũ jíin ñáyuu tu cácujeñũ. Achĩ ndajéhé yã.

<sup>19</sup> Yũcuán na te ni jito ri maã quiti xeẽn jíin táca rey ñayivĩ jíin cuehē soldado de. Te ni candututũ de jeẽ cuajnáhan de jíin maã Yaã yosó caballo jíin táca ndajéhé yã. <sup>20</sup> Te ni jñũ ya quiti xeẽn cuahãn tĩ preso jíin tēe ni nacani jñũhun stáhũ jeẽ ní sáha táca jñĩũ jéñũ jeẽ ní jito jínũũ quiti xeẽn. Chi jíin jñĩũ

jéñũ un cúu jeẽ ní stáhũ de táca ñáyuu jeẽ ní cajēhe jñũhun condiso jñunĩ quiti xeẽn, jíin jeẽ ní cachiñũhũn imagen tĩ. Te quiti xeẽn un jíin tēe ni nacani jñũhun stáhũ un, cátecu ndĩndũũ te ni scãne ya nuũ laguna ñũhũn jeẽ cayũ jíin azufre. <sup>21</sup> Te jíin espada jeẽ cáne yuhu Yaã yosó caballo ni cajihĩ táca soldado quiti xeẽn un. Te táca quiti ndáva nuũ tachĩ ni candutũ chĩjĩ tĩ ni cayeji tĩ cũñũ de jíjnáhan de.

#### *Siquĩ mil cuiyã*

## 20

<sup>1</sup> Te ni jito ri jeẽ ní cuun ñin ndajéhé yã ichi ándiví. Te ndáhã yã ndacãa jeẽ núne tũhñchi cúnũ ndasi. Te suni ndáhã yã ñin cadena cáhnu. <sup>2</sup> Te ni jñũ ya maã cóo cáhnu jeẽ iyó ndé jenahãn ndasi, te nání tĩ jexeẽn jíin Satanás. Te ni jihni yã jeẽ conuhni mil cuiyã. <sup>3</sup> Te ni scãne ya ñin tũhñchi cúnũ ndasi. Te ni jesi váha ya, te ni sãcutũ yã yuyáũ, návãha ma stáhũ gã un ñáyuu táca naciõn, chi nde na jĩnu mil cuiyã. Te jeẽ yáha mil cuiyã ún, yũcuán na te cánuũ jéẽ ndajĩ caca cuu jecu na tiempo.

<sup>4</sup> Te ni jito ri táca mesa nuũ ndácu jñĩũ, te yũcuan cáyũcu táca ñáyuu jeẽ ní canihĩn jñĩũ i sãndaã i jñĩũ. Te suni ni jito ri anuã táca ñáyuu jeẽ ní cajehnde xinĩ i siquĩ jeẽ ní canacani i jñũhun Jesús jíin jñũhun Yaã Dios. Te tu ní cachiñũhũn i quiti xeẽn jíin imagen tĩ, ni tu ní cájēhe i jñũhun jeẽ cóndee jñunĩ tĩ jneé i chí ndaha i. Te ni jito ri jeẽ ní natecu i te ni candacu i jñĩũ jíin Cristo mil cuiyã. <sup>5</sup> Yáha cuu ndiyĩ jeẽ nátecu xĩhna gã. Te táca gã ndiyĩ, tu ní cácatecu i, chi nde jeẽ jĩnu mil cuiyã. <sup>6</sup> Te nacã jeẽ ndetũ táca ñáyuu ndoo ánuã jeẽ nátecu xĩhna gã. Chi ma cũũ cuiti i vuelta uũ. Te cuu i sutũ nuũ Yaã Dios jíin núũ Cristo, te ndacu i jñĩũ jíin yã mil cuiyã.

<sup>7</sup> Te jeẽ jĩnu mil cuiyã ún, te ndajĩ Satanás te quenda nuũ yĩndihyũ. <sup>8</sup> Te stáhũ tucu ñayuu táca naciõn ñĩ cáhnu ñayivĩ. Te stáhũ ñayuu ñuu Gog jíin Magog. Te sáha jeẽ ndututũ táca soldado ñuu un jeẽ cuajnáhan de. Te coo cuehē ndasi de nájñũhun ñĩtĩ yumar. <sup>9</sup> Te cuitē núu de quingoo de ñĩ cáhnu ñayivĩ. Te cuiçó ndũũ de ñuu nuũ cáyũcu ñáyuu maã Yaã Dios, ñuu jeẽ manĩ yã jíin. Te Yaã Dios chi scũun ya ñũhũn ichi ándiví, te cayũ ndihĩ de. <sup>10</sup> Te jexeẽn jeẽ ní stáhũ táca ñáyuu ún, chi scãne ya quihĩn nuũ laguna ñũhũn jeẽ cayũ jíin azufre. Te yũcuán chi xĩhna gã ni scãne ya quiti xeẽn jíin tēe ni nacani jñũhun stáhũ. Te yũcuán ndoho nduũ ñuũ ñĩ cáni cuiti.

#### *Jeẽ sãndaã yã jñĩũ nuũ mesa cuijĩn*

<sup>11</sup> Yũcuán na te ni jito ri ñin mesa cuijĩn cáhnu, te néne maã Yaã ndácu jñĩũ. Te ñayivĩ jíin andiví ni ndoñũhũn cuahãn jeẽ ní jito ya nuũ, chi tuã ní cúu quendõo nuũ

yā. <sup>12</sup> Te ni jito ri tāca ndíyí, jeē ní cujéhnú jín jéé tu ní cujéhnú, cáhīn nuū Yaā Dios. Te ni sāha ya jeē nūne tāca libro, te suni ni nune inga libro jeē yosó síhví ñáyuú cotecu ní cáni. Te ni sándaā yā siquí tāca ndíyí ún, núu ndese jniñu ni casáha i jín ndese yosó núú tāca libro un. <sup>13</sup> Te tāca ndíyí jeē ní cajihí nuū mar; ni nanecoo. Te suni ni nanecoo tāca ndíyí jeē ní cajihí i, jeē ine i máá lugar nuū cáyūcu ánuá ndíyí. Te ni sándaā yā siquí, núu ndese ni casáha ñn ñn i. <sup>14</sup> Yūcuán na te cuehyí jéhní ñayuu jín lugar nuū cáyūcu ánuá ndíyí, ni snáá yā ni scáne ya cuangoó nuū laguna ñuhūn. Te jeē ndóho ñayuu nuū laguna ñuhūn, yūcuan cúu jeē cúu i vuelta uū. <sup>15</sup> Te yūcuan ní scáne ya tāca ñáyuú ni casáha jniñu néé jéé tu yosó síhví i nuū libro jeē yosó síhví ñayuu cotecu ní cáni.

*Andiví jéé jín ñáyiví jéé*

**21**

<sup>1</sup> Yūcuán na te ni jito ri andiví jéé jín ñáyiví jéé. Chi andiví jín ñáyiví xihna ñuhūn ni naa. Te suni tuá mar. <sup>2</sup> Te ruhú Juan, ni jito ri ñuu i jeé cúu Jerusalén jeé. Te ñuu un ní cuun vēji iche ándiví núu néne Yaā Dios. Te ñuu ún luu cáa nájnūhun ñn ñahan jeē ní sātūhva ña ni cucutú ña jeé nándaā ña jín yí ña. <sup>3</sup> Te ni jini sóho ri ñn jnūhun jeē ní cáhān jee ichi ándiví:

Condéhé, chi vijna te ndéé Yaā Dios mēhñu ñáyuú. Te condee yā jín i jínñahan i, te cuu i ñayuu máá yá. Te máá yá condee yā jín i jeé cúu ya Yaā Dios i. <sup>4</sup> Te nacuaa yā ndute tñnú i jínñahan i. Te ma cúu gā ñayuu, ni ma ndahyú gā i, ni ma cucuhýá gā ní i, ni ma jetú gā i. Chi je ni yāha tāca jnūndóho jeē ní íyo, áchí.

<sup>5</sup> Yūcuán na te ni cahān máá Yaā néne nuū mesa:

Condéhé, chi nasáha jeé rí tāca jéé íyo, áchí yá.

Te suni ni cahān yā:

Teé ró jnūhun yáha. Chi tāca jnūhun yáha cúu jnūhun jeé jini ndije ró jéé ndaa cúu.

<sup>6</sup> Te ni cahān gā yā:

Je ni jīnu. Máá rí cúu nájnūhun letra A xihna ñuhūn jín letra Z jeé sándihí na, chi máá rí ni squeejé ndihí te máá rí sínu. Te tāca ñáyuú cájichí, súcuan-ni cuāha ri coho i ndute cáne jeé cotecu i ní cáni. <sup>7</sup> Tāca ñáyuú jeé cūndeyí síquí jéneé, nihñi i ndihí jeé yáha cuu tahú i. Te cuu ri Yaā Dios i, te cuu i sēhe ri. <sup>8</sup> Te tāca ñáyuú jeé cáyūhú ndoho siquí jnūhun rí, jín ñáyuú tu cácandíje, jín ñáyuú casáha jniñu néé, jín ñáyuú cájehni ndíyí, jín ñáyuú cájica jnéni, jín ñáyuú casáha tásí, jín ñáyuú cáchiñūhūn ídolo, jín tāca ñáyuú castáhú, ñayuu ún chi quívicoo i laguna ñuhūn jeé cayú jín azufre. Te yūcuan cúu jeé cúu i vuelta uū.

*Jerusalén jeé*

<sup>9</sup> Yūcuán na te ni quiji ñn jñahan ndihúxá ndajéhé jeé ní candahá ndihúxá cohó jeé ni ñūhun chitú ndihúxá jnūndóho sandihí. Te ni cahān yā jín rí:

Nehen, te na steén rí nuū rō ñahan jeé nándaā ña cuu ña ñasihí Yaā cúu Londe, áchí yá.

<sup>10</sup> Te ni sāha ga Espíritu Santo jeé ní jito ndijin rí, te ndajéhé un ní jeca ya ruhú cuahān yā jín rí xiní ñn yucu cáhnu súcún. Te ni steén yā nuū rí máá ñuu i cujéhnú jeé cúu Jerusalén, te ni cuun vēji nde andiví núu néne Yaā Dios. <sup>11</sup> Te ndíndéé ndasí ñuu un nájnūhun ndíndéé Yaā Dios. Te xíñú nájnūhun xíñú ñn yuū luu jeé ndeé yahu ndasí, nájnūhun yuū cuijín jeé quiyí nájnūhun vidrio. <sup>12</sup> Te yuhu ñúu un ní jicó ndúú ñn jeé cáhnu súcún ndihyú ñuu ún. Te íyo úxí uū yehyí. Te tāca yéhyí un íñ ñn ndajéhé yā. Te tāca yéhyí un yosó síhví ndihúxí uū yucūn Israel. <sup>13</sup> Te lado nuū cáne niāndii íyo úní yehyí. Te lado norte suni íyo úní yehyí. Te lado sur suni íyo úní yehyí. Te lado nuū quée niāndii suni íyo úní yehyí. <sup>14</sup> Te íyo úxí uū yuū náhnu jeé cúu cimientó máá jéé ndihyú ñuu ún. Te tāca yúu un yosó síhví ndihúxí uū apóstol máá Yaā cúu Londe.

<sup>15</sup> Te ndajéhé jeé ní cahān jín rí, ndahá yá ñn yujnu oro jeé chícuaāha yá ñuu un jín tāca yéhyí jín máá jéé ndihyú ñuu ún. <sup>16</sup> Te ñuu ún chí ñn cūhva-ni cúu ndicúún lado. Chi jeé cáni jín jéé jité, inuú-ni cúu. Te ndajéhé un ní chícuaāha yá ñuu un jín yujnu ún. Te néé uū mil uū ciento kilómetro jeé ñn ñn lado. Te inuú-ni cūhva jeé cáni, jeé sucún, jín jéé jité. <sup>17</sup> Te suni ni chícuaāha yá máá jéé ndihyú ñuu ún, te néé uní xico cuū metro jeé sucún. Te yūcuan cúu cūhva jejniñu ñayuu, jeé suni jéjniñu ndajéhé un.

<sup>18</sup> Te máá jéé ndihyú ñuu un ní cuvāha jín yúu cuijín quiyi. Te ñuu ún chí máá nene oro cúu, te cáa nájnūhun vidrio quiyi. <sup>19</sup> Te tāca yúu jeé cúu cimientó máá jéé ndihyú ñuu ún, ní cucutú jín ndinuū yuū luu jeé ndeé yahu. Yuū ñn cúu yuū cuijín quiyi. Te jeé uū cúu yuū ndeé ndí. Te jeé úní cúu yuū pinto. Te jeé cuún cúu yuū cuí ndí. <sup>20</sup> Te jeé uhún cúu yuū pinto jeé ñūhun raya. Te jeé íñú cúu yuū cuehé pinto. Te jeé uxá cúu yuū cuaán quiyi. Te jeé uná cúu yuū cuí ndéé. Te jeé ñn cúu yuū cuaán ndí. Te jeé uxí cúu yuū cuí cujín. Te jeé uxí ñn cúu yuū cuehé cuaán. Te jeé uxí uū cúu yuū ndihí ndí. <sup>21</sup> Te ndihúxí uū yehyí un cácuu uxí uū perla jeé ndeé yahu. Te ñn ñn yéhyí cúu ñn ñn perla. Te máá nene oro cúu calle cáhnu ñuu ún, te quiyí nájnūhun vidrio.

<sup>22</sup> Te tú na templo ni jito ri ini ñuu ún, chi ní cáhnu ñuu un ndeé máá Jítoho yó, Yaā jniñ ndihí poder, jín Yaā cúu Londe. <sup>23</sup> Te ñuu ún tu jini ñuhūn cundijin jín luz niāndii jín yóó.

Chi jeē ndíndēe máá Yāā Dios cúu jeē cúndijin ñuu ún. Te luz ñuu un cúu máá Yāā cúu Londe. <sup>24</sup> Te ñayuu tǎcǎ naci3n ñayǎvi jeē ní jnama ya, caca i jeē cúndijin luz ñuu un núu i. Te tǎca rey ñayǎvi quijicoo de ñuu ún, quindeca de tǎcǎ ndajniñu jeē ndeé yahu jíin jeē cujéhnú de sáha. <sup>25</sup> Te tǎca yéhyí ñuu ún ma cóndihyú cuíti nduú, chí tú na jecuáá coo. <sup>26</sup> Te ini ñuu ún quijicoo ñayuu tǎcǎ naci3n, quindeca i tǎcǎ ndajniñu jeē ndeé yahu jíin jeē cujéhnú i sáha. <sup>27</sup> Te ma quívicoo cuíti ni iin jeē jnehén. Ni ma quívicoo ñayuu casáha jniñu neé jíin jeē castáhú. Chi quívicoo máni máá ñayuu jeē yosó síhví i nuú libro jeē yosó síhví ñayuu cotecu ní cǎni, jeē névaha Yāā cúu Londe.

## 22

<sup>1</sup> Yúcuán na te ndajéhe yā ni steén yā nuú rí iin yúte iyó ndoo. Te ndute un sáha jeē cótecu yó ní cǎni. Te xíntú nájnūhun vidrio, te cǎne nuú mesa nuú ndácu Yāā Dios jniñu jíin Yāā cúu Londe. <sup>2</sup> Te jica yúte ún sava mēñu calle cáhnú ñuu ún. Te ndíndúú lado yuyúte un yǎhi yujnu jeē cótecu yó ní cǎni sáha. Te yujnu un jéhe ndehé uxí uú jínu jeē iin cuiyá, chí tǎca yóó cúun ndehé. Te ndaha yúcu i cúu tajná jeē ndúvaha ñayuu tǎcǎ naci3n. <sup>3</sup> Te tǎcǎ-ni jeē ní cǎhān yā jeē násūu jéé váha cúu, ma cóo ini ñuu ún. Te ini ñuu ún cuiñi máá mesa nuú ndácu Yāā Dios jniñu jíin Yāā cúu Londe. Te ñayuu cáncandje jeé cácuu i mozo yā, chíñúhún i ya. <sup>4</sup> Te coto i nuú yā, te condee síhví yá jneé i. <sup>5</sup> Te ma cóo ga jecuáá ñuu ún. Te ñayuu cáyúcu yúcuán tuá jíni ñúhún i jeē cúndijin lámpara nuú i, ni jeé cúndijin niāndii. Chí jeē ndíndēe máá Jítoho yó Yāā Dios cúu jeē cúndijin nuú i. Te ndacu i jniñu ní cǎni cuíti.

### *Jeē cuácuyajni ndiji Cristo*

<sup>6</sup> Yúcuán na te ni cǎhān ndajéhe un jíin rí: Tǎca jnúhun yáha cúu jnúhun jeē jíni ndije ró jéé ndaá cúu. Te Jítoho yó Yāā Dios, máá yá sáha jíin téé cǎnacani jnúhun ya jeé jíin Espírítu yā cǎnacani de. Te suu máá yá ni tají yá ndajéhe yá návaha steén nuú ñayuu cácuu mozo yā tǎcǎ jniñu jeé yachí coo.

<sup>7</sup> Ndiji yachí rí, achí yá.

Te nacá jeē ndetú ñayuu chusóhó jnúhun Yāā Dios jeé yosó núu tútu yáha.

<sup>8</sup> Te ruhú Juan, ni jíni sóho rí tǎca jnúhun yáha, te ni jito rí tǎcǎ jniñu yáha. Te ná ni jíni sóho rí ni jito rí, yúcuán na te ni jecuiñí yití rí nuú jéhe máá ndajéhe jeē ní steén tǎcǎ jniñu yáha núu rí, jeé chíñúhún rí yá nuú. <sup>9</sup> Te ni cǎhān ndajéhe un jíin rí:

Ma sáha ró súcuán. Chí ruhú suni mozo Yāā Dios cúu rí, nájnūhun máá ró jíin tǎca hermano ró jeé cǎnacani jnúhun ya, jíin ndihi

ñayuu cájetáhú jnúhun yósó nuú tútu yáha. Sa suhva nuú máá Yāā Dios chíñúhún ró. Achí yá.

<sup>10</sup> Te ni cǎhān gá ndajéhe un jíin rí:

Ma chísañi ró tǎca jnúhun Yāā Dios jeé yosó núu tútu yáha, chí je cuacuyajni tiempo jeé cúndaá ndihi. <sup>11</sup> Te ñayuu casáha jniñu neé, na sáha ga máá i jniñu neé. Te ñayuu jnehén ánuá, na quéndoo máá i súcuán. Te sa ñayuu casáha jniñu ndaá, na sáha ga i jniñu ndaá. Te ñayuu cáhlyo ndoo ánuá, na cǎca ndoo ga i súcuán. Achí ndajéhe un.

<sup>12</sup> Jendaá jeē ndiji yachí rí, achí Jesús. Te quiji rí jíin táhú cuáha rí nuú iin iin ñayuu, núu ndese jniñu ní casáha i. <sup>13</sup> Máá rí cúu nájnūhun letra A xíhna ñúhún jíin letra Z jeé sándihí na, chí iyó rí nde xíhna ñúhún te coo rí ní cǎni.

<sup>14</sup> Nacá jeē ndetú ñayuu jeé jéhe i jnúhun ndundoo ánuá i nájnūhun ndúndoo sahna. Chí cuu caji i ndehé yujnu jeé sáha jeé cótecu i ní cǎni, te cuu quívicoo i yéhyí ñuu i ún. <sup>15</sup> Te ichi fuera ñuu ún cuiñi ñayuu tu cáncandje, jíin ñayuu casáha tásí, jíin ñayuu cájica jnéni, jíin ñayuu cájehni ndíyí, jíin ñayuu cáchíñúhún ídolo, jíin ñayuu cácusí ni stahú jñahan.

<sup>16</sup> Máá ruhú Jesús, ni tají rí ndajéhe rí návaha castúhun yá tǎca jnúhun yáha nuú tǎca grupo ñayuu cáncandje. Te máá rí ní sáha jeé ni iyó rey David, te ní quiji rí nuú yucún David. Te cúu rí nájnūhun lucero ndíndēe cǎne cúndijin. Achí yá.

<sup>17</sup> Te máá Espírítu Santo jíin máá ñahan jeé nándaña jíin Yāā cúu Londe, cácahān:

Nehen, quívicoo ró ndaha ya, achí.

Te tǎca ñayuu jeé jíni sóho, suni na cǎhān i: Nehen, quívicoo ró ndaha ya.

Te tǎca ñayuu cájichí jeé cácuani i coho i, na quívicoo i ndaha ya, te súcuán-ni na cóho i ndute jeé cótecu i ní cǎni sáha.

<sup>18</sup> Te tǎca ñayuu jíni sóho jnúhun Yāā Dios jeé yosó núu tútu yáha, cǎhān níhin rí jíin i: Núu ndé ñayuu chísoó i nuú jnúhun cǎhān tutu yáha, te Yāā Dios chísoó yá jnúndóho cǎhān tutu yáha, ndoho i. <sup>19</sup> Te núu ndé ñayuu quende i jecu jnúhun cǎhān tutu yáha, te Yāā Dios quende yá tahú i jeé yosó núu libro jeé yosó síhví ñayuu cotecu ní cǎni, te ma níhin i tahú i ini ñuu i ún. Te tutu yáha cúu jeé cǎhān síquí tǎcǎ un.

<sup>20</sup> Te Yāā jeé ní cǎhān tǎca jnúhun yáha, suhva cǎhān yā:

Jendaá jeē ndiji yachí rí, achí yá.

Amén. Súcuán na cóo. Jítoho ná Jesús, jícán tahú na jéé ndiji yachí ní.

<sup>21</sup> Te ñúhún ni rí jeé Jítoho yó Jesucristo na sáha ga yá jeé váha róhó jíñahan ró. Amén.